







CHRISTIANUS HUGENIUS

natus 14 Aprilis 1629.

denatus 8 Junii 1695.

Fr. Olearii Sculp.

LUGD. BAT. Apud JANSSONIOS VANDER Aa. Bibliopolas.

CHRISTIANI HUGENII - HU
Z U L I C H E M I I,

Dum viveret Zelemii Toparchæ,

OPERA VARIA.

V O L U M E N P R I M U M.



LUGDUNI BATAVORUM,
Apud **JANSSONIOS VANDER AA,**
Bibliopolas. MDCCXXIV.

C H R I S T I A N I
HUGENII A ZULICHEM,

CONST. F.

H O R O L O G I U M.



WELLCOME

HISTORICAL MEDICAL LIBRARY

1907

WELLCOME

G. J. 's GRAVESANDE

L. S.

Illos de re litteraria bene mereri, semper persuasum habui, qui doctorum virorum scripta dispersa colligunt; & minoribus, seorsim perituris, in majori volumine collocatis posteritatem quasi donant.

Hac de causa cùm Bibliopolæ hujus Urbis, Janfonii vander Aa, mihi declararent, se in mente habere Hugonii opus, olim Parisiis editum, de Horologio Oscillatorio typis mandare, & hac de re quid sentirem ego quærent, Ipsis Auctor fui, ut non modo in proposito perseverarent, sed ut omnia ante edita ejusdem Auctoris opera minora huic adjungerent.

P R Æ F A T I O.

In me libenter suscepi curam colligendi hæc, & disponendi; schedasque semel & altera vice a correctore examinatas, ipse attente relegi, & cum figuris contuli; scripta etiam quedam, in Diariis non sub Auctoris oculis edita, sæpe mendis variis purgavi.

Opera quæ hic exstant, in quatuor dispersi tomos; quæ Mechanicam Machinasque spectant tomo primo continentur: Geometrica secundo: Astronomica tertio: Miscellanea pauca quarto.

Tractatus varios Auctor separatim ediderat; scripta minora multa in Diariis dispersa dantur: inter hæc quedam spectant controversias quæ Auctori cum viris doctis intercedere, & quæ ad eandem controversiam pertinent, aliquando in variis regionibus publicata exstant, partim Gallicè conscripta, partim Latinè.

In edendis libris, separatim ab Auctore publici juris factis, exemplaria manu ipsius recognita, & in variis locis aucta, & emendata, secutus sum; quod etiam referri debet ad scripta pauca ex iis quæ in Diariis fuisse tradita.

Exemplaria hæc accepi à Nob. D^{no} Hugenio Zelmii Toparchâ, qui patris Christiani opera hæc
cum

P R Æ F A T I O.

cum cura servaverat , & qui libenter mihi hæc ea lege concessit , ut absoluta editione in Bibliotheca publica Acad. Lugd. Bat. jungantur cum ejusdem Auctoris manuscriptis quæ ibi servantur.

*In Indice , ad calcem libri adjecto , monui ubi scripta singula antea edita fuere. Tractatus separatos Latine Auctor conscripsit , præter Institutionem de Usu Horologiorum * , quæ Belgico sermone in lu- * pag. 193. cem prodiit. Ex Gallicis Diariis excerpta scripta Gallico sermone conscripta dantur. Illorum autem quæ inter opera Acad. Reg. Paris. Artium & Scient. cum publico communicata fuere , quædam Gallica sunt reliqua Latina , nempe ;*

*De potentiis funesve trahentibus * : * pag. 287.*

*Constructio loci ad Hyperbolam * : * pag. 485.*

*De maximis & minimis * : * pag. 490.*

*De inveniendis tangentibus * . * pag. 498.*

Ut omnia Latino sermone exhiberentur , quæ Belgicè , aut Gallicè , edita fuere , Latinè reddidit Clariss. Hermanni Oosterdyk Schacht , Med. Professoris in hac Acad. Celeberrimi , Filius Dignissimus Johannes Oosterdyk Schacht , qui ad studia subtiliora na-

P R Æ F A T I O.

tus , à naturâ acceptum , adhuc dum juvenis , diligentiâ pulcherrime excoluit ingenium.

Si collectioni huic volumen operum posthumorum Hugonii, & tractatus duos de Lumine & Gravitate, addas , omnia B. L. habebis Hugonii opera.

Hæc autem quæ hic deficiunt , eâdem formâ cum hisce , brevi edituri sunt Bibliopolæ Amstelodamenses Waesbergii.

Dabam Lugd. Bat. 3°. Id. Mart. MDCCXXIV.

HUGENII VITA.



Christianus Hugenus, natus est Hagæ Comitum in Hollandia, 14. April. 1629. Patrem habuit Constantinum Hugenum, Equitem, Toparcham Zulichemii, Zelhemi, & in Monikenlandt, qui tribus Auriacis Principibus a secretis & consiliis fuit. Mater erat Susanna van Baerle.

In studiis Mathematicis integram consumsit vitam, non tantum speculationibus deditus, sed harum disciplinarum subtilissima ad vitæ usum referens. Ab ipsa infantia huic studio applicavit animum, vix natus annos novem, ipso Patre duce, in Musicis, Arithmeticis, Geographicis, miris, & vix credibiles, progressus fecit, Latinis & Græcis litteris interim animum applicans.

Anno ætatis decimo tertio quàm ingenium studio Mechanices esset aptum, quod tanta deinde hominum utilitate excoluit, in examinandis machinis, hasque, quantum infanti liceret, imitando, demonstravit.

Anno 1644. studium Matheseos aggressus est, Mathematicumque Belgam Stampioen præceptorum habuit.

Sequenti anno Academiam petiit quæ Leidæ est apud Batavos. Ibi Vinnium jus civile explicantem audivit, & magistro Schotenio studium

**

Ma-

HUGENII VITA.

Matheseos continuavit, ingenique ad hæc studia nati varia tunc temporis dedit specimina, brevique famam inter Mathematicos, annos superantem, acquisivit.

Studium autem Juridicum Bredæ prosecutus est annis 1646, 1647, 1648, occasione scholæ illustris, tunc temporis ibi erectæ, & curæ Patris ipsius pro parte commissæ.

Hagam anno sequenti redux, Henricum Comitem Nassavium secutus, Holfatiam, & Daniâ, invisit. Vehementi tenebatur desiderio in Sueciam usque iter suum producendi, Cartesium ut videret, quod ipsi non licuit, brevi finitâ Comitis legatione.

Anno 1651. Tractatum edidit *de quadratura Hyperboles, Ellipsis, & Circuli, ex dato portionum gravitatis centro* *.

* Vide pag.
309.

Ut librum hunc perlustrent Lectores rogo Mathematicos, & videant an non merito, in ipsa juventute, inter summos Mathematicos relatus fuerit Hugenus.

Eodem anno & sequentibus varia de refractionibus & Dioptrica conscripsit, quæ in operibus posthumis edita exstant.

Anno 1655. Galliam petiit, & Andegavi Doctor Juris renunciatus est.

Eodem anno cum fratre Constantino vitris formandis, quæ Telescopiis majoribus inservirent
ope-

HUGENII VITA.

operam dedit. Telescopium decem pedum construxit quod, ut ipse persuasum habebat, omnia illius temporis superabat. Hujus auxilio comitem Saturni detexit. Omnes hujus Planætæ satellites tunc temporis Astronomos latebant, & nisi multis annis serius, reliquos quatuor, inter quos unus Hugenario à Saturno remotior, detexit Casinus.

Non statim sibi novum sidus cognitum dari cum Astronomis communicavit, ad quosdam tamen inventum, hisce verbis & litteris involutum, misit.

Admovere oculis distantia sidera nostris VVVVVVV
CCRRHNBQX.

Quæ verba cum adjectis litteris ipso vitro inscripsit.

Explicatio est Saturno Luna sua circumducitur diebus sexdecim horis quatuor. Exactius tamen in sequentibus hujus Lunæ periodum determinavit*.

Transpositione litterarum Ænigma explicatur.

Per multos annos vitris formandis quibus nova in cœlis detegeret sedulam cum fratre impendit operam, præcipuè ab anno 1681 ad annum 1687, artemque hanc perfectiorem reddidere; multa ex acuratè admodum elaboratis vitris majora construxere Telescopia. Inter vi-

* Vide pag.

551.

HUGENII VITA

* *Vide pag.*
698.

tra hæc duo præ ceteris antecellunt, magnitudine Telescopiorum quibus inservire debent, &, si Auctori nostri fidem habeamus, excellentiâ*; majus destinatum erat Telescopio ducentorum & decem pedum, alterum Telescopio centum & septuaginta. Hæc duo nunc possidet Anglia. Multa alia Telescopiis, centum pedes excedentibus, ut & minoribus, inservientia apud heredes adhuc dum supersunt.

* *Vide pag.*
723.

Anno 1656 tractatum conscripsit de ratiociniis in ludo alexæ*, editus hic fuit ad calcem Exercitationum Mathematicarum Schotenii. Methodum in hoc tractatu demonstravit ipsam sortem computationi Mathematicæ subjiciendi, primusque publici juris fecit principia artis post illum ad vix sperandam perfectionem prolata.

Anno 1657 primus mortalium tempus exactissime mensuravit, pendula dum Horologiis applicavit. Ante illum Astronomi adhibitis pendulis tempus quidem mensurabant, sed ad exigua intervalla, cum pendula talia homine indigerent qui curaret ut in motu perseverarent. Ipse autem ope Horologiorum perpetuum quasi pendulis motum communicavit, ponderibus enim Horologia agitabantur, quæ, non mutata actione in Horologia, elevari poterant.

Persuasum habebat talia Horologia & mari usu venire posse, & nil præter hæc in nave requiri ad determinandas longitudes. No-

HUGENII VITA.

Notum enim est, utilis hujus longitudinum problematis diu desideratam, & forte desiderandam, solutionem, ab exacta temporis mensura pendere.

Non tamen satis erat Horologiorum motus legibus fixis adstrinxisse, sed ut ipse notabat, motum æquabilem servare, navim jactantibus austris; hoc opus, hic labor erat; difficultatem tamen superari posse semper speravit, multa tentavit, & ad mortem fere usque nova, ut ad scopum perveniret, molitus est; sed licet ad hunc pertinere non potuerit, quo ingenio, qua perspicacitate, rem prosecutus est, qui horum operum totum primum perleget dijudicabit; non omnia tamen tentamina publici juris facta fuere.

Anno 1659. *Systema Saturnium* * edidit, in^{* Vide pag. 527.} quo veram causam ansarum hujus planetæ tradidit, quam ante illum nemo ne suspicione quidem attingere potuerat, hancque invictis firmavit argumentis.

Sequenti anno altera vice Galliam petiit, unde in Angliam anno 1661. profectus est. Ibi artem suam laborandi vitra demonstravit, cum inter omnes constaret, Hugonii Telescopia, longitudinem viginti quatuor pedum tunc temporis non excedentia, ceteris omnibus perfectiora esse.

Novum tunc temporis inventum erat Antlia pneumatica, hujus, ab ipso ex Anglia reduce

HUGENII VITA.

perfectioris redditæ, auxilio varia instituit experimenta *.

* *Vide pag.*
765.

Eodem anno regulas de collisione corporum Elasticorum detexit, quas easdem postea etiam detexere in Anglia viri celeberrimi Wallisius & Wrennius, cum quo tamen ultimo contentionem, super hoc invento, habuit Hugenius noster.

Anno 1663. Lutetiam Parisiorum iterum petiit, & cum Patre in Angliam iter suscepit, ubi Sociorum numero Regiæ societatis Londiniensis adscriptus est.

Per paucos tantum ibi stetit menses & in Galliam rediit.

Anno 1664 Hagam redux de invento applicationis pendulorum ad Horologia ipsi cum invidioso quodam lis fuit.

Hoc tempore, in Gallia, studiorum se Mæcenatem demonstrabat vir Illustris Colbertus; cuius consilia de studiis promovendis libenter audiebat Galliarum Rex. Undique viri scientiâ illustres in Galliam vocabantur, inter quos Hugenius.

Hic anno 1665, nomine Regis, Colberti literis, ut Lutetiam peteret, ibique domicilium eligeret, promisso largo annuo stipendio, oblataque habitatione in ædificio servandis Regiis bibliothecis destinato, invitatus est.

Ibi vixit ab anno 1666. ad annum 1681. Durante hoc tempore pulcherrima, subtilissimaque mul-

HUGENII VITA.

multa, in Mathematicis detexit, variaque ex iis operibus conscripsit, quæ nunc in unum corpus collecta, quid in variis Matheseos partibus præstiterit, sub oculis ponunt.

Præter ipsius jam memorata inventa præclara inter alia duo insigni usu eminent. Libellam Telescopio munitam ita construxit, ut ipsi præ ceteris fides haberi possit *. Inventum aliud spectat ^{* Vide pag. 254.} temporis mensuram, Horologiis portatilibus filum, chalybeum, spirale, elasticum, adaptavit *; quo nunc nullum portatile Horologium ^{* Vide pag. 253.} destituitur, quo etiam sublato, accuratissimè constructa omnem motus æquabilitatem amittunt.

Nimium verò studiis Mathematicis deditus, menti gratum Corpus non potuit sustinere laborem. Bis Hollandiam hac de causa petiit, annis 1670, & 1675, iterumque recuperatâ sanitate in Galliam rediit, sed tandem valetudini ut consuleret illi in perpetuum dixit vale anno 1681, omnibusque Regis beneficiis nuncium remisit.

Reliquum vitæ cursum iisdem occupatus studiis absolvit.

Anno 1682. construi curavit Automaton Planetarium in quo planetarum motus in plano pulcherrime æmulatus est.

Machina hæc in operibus posthumis delineata, & accuratissimè descripta, datur. Exstat adhucdum apud hæredes.

An-

HUGENII VITA.

Anno 1689. Angliam tertia vice invisit.

Sequenti anno tractatus duos, alterum de *Lumine*, de *Gravitate* alterum edidit.

Cosmotheoros tempore mortis sub prælo sudabat, editio tamen inchoata tantum erat.

Vitam finivit Hagæ Comitum octavo Junii 1695.

Scripta omnia legato dedit Bibliothecæ Academiæ Ordinum Hollandiæ quæ est Lugd. Bat. virosque duos, insignes Mathematicos, Burcherum de Volder, in eâdem Acad. Philosophiæ & Math. Professore celebrem, & Bernhardum Fullenium, in Academiâ Frisiâ Franequeræ Professore, rogavit ut ex scriptis eligerent, quæ prælo committi possent, cui petitioni volumen debemus operum posthumorum, anno 1700. editorum.



CHRISTIANI HUGENII

OPERA

MECHANICA.

TOMUS PRIMUS.

Tomi primi contenta.

HOROLOGIIUM.	pag. I.
HOROLOGIIUM OSCILLATORIUM, sive de motu pendulorum, ad horologia aptato, demonstrationes Geometricæ.	15.
BREVIS INSTITUTIO DE USU HOROLOGIORUM, ad inveniendas longitudes.	193.
De Hugeniana centri oscillationis determinatione CONTROVER- SIA.	215.
MACHINE QUÆDAM, & varia circa Mechanicam.	249.

ILLUSTRISSIMIS AC POTENTISSIMIS
HOLLANDIAE
Et
WESTFRISIAE
ORDINIBUS

Dominis suis,

CHRISTIANUS HUGENIUS à ZULICHEM

Felicitatem omnem.



*Proditum est memoriae primum Ro-
mæ solare horologium fuisse, quod
è capto Siciliae oppido quodam, an-
nis post urbem conditam CCCCLXXVII,
cum cætera præda deportatum sit,
locoque publico dedicatum. Cui non
planè ad Latii clima descripto, eo-
que nec lineas horis congruentes ex-
hibenti, quum necessitate tamen &
meliorum penuria undecentum annis
Pop. Romanus paruisset, Censorem tandem Q. Marcium Phi-
lippum diligentius ordinatum juxta posuisse, idque munus in-
ter censoria opera gratissime acceptum. Mihi, Proceres Am-
plissimi, rem haud absimilem nec minore publico bono hodie
agitanti, ut qui non in una modo urbe, sed omnium ubivis
horologiorum instabilem motum correxerim, similem quoque ab
universis gratiam expectandam censuissem atque à civibus suis
Q. Marcius reportavit, si, quemadmodum res eventusque ii-
dem ex intervallo redire solent, ita priscus candor & ingenui-
tas in terris aliquando reduces cernerentur. Verum hæc cum
jam diu apud majorem hominum partem desitæ sint virtutes,*

D E D I C A T I O.

contraque impostura & obtrectatio late omnia obtineant; quænam fortuna maneret inventum nostrum, simul ac vulgò innotescere cæpisset, facile equidem prævidi, neque me fefellit augurium. Ecce enim jam primum in patria hac nostra eo excessit quorundam tum audacia tum impudentia, ut nihil interdicto vestro deterriti, interpolare acceptum à nobis inventum, ac dein tanquam novum prorsus, nostroque etiam, si diis placet, præstantius jactare ausi sint. Atque hæc qui coram & ante oculos nobis fieri viderunt, nihilo meliora ab exteris regionibus imminere crebro admonuerunt. Nempe alibi quoque exorituros, & in gloriolam hanc nostram involaturos homines inique invidos, qui, forte an & sibi ipsis, certe orbi universo persuadere conentur, non hæc nostratium ingeniis deberi, sed à sua suorumve alicujus industria diu ante profecta fuisse. Cujus rei indignitas cum ad gentem omnem nostram, æoque ad vos etiam, Domini Illustrissimi, spectare videretur, qui nunquam æquo animo tuleritis inventorum longe præclarissimorum, typographiæ inquam & telescopii, laudem à Batavia vestra, plagiariorum fraude, averti; fateor me non levi stimulo impulsus fuisse, ut eidem hujus quoque qualiscunque reperti decus adsererem. Itaque eam quæ sola ad hoc patere visa est, viam secutus, rationem omnem & constructionem novi automati, autor ipse, paucis describendam & in publicum producendam suscepi; exiguo sanè volumine, sed quod brevius etiam fuisset nisi obiter ad ea quoque respondendum duxissem quæ à nonnullis objici mihi, ipsumque artificii nostri fundamentum laceffere posse, prospiciebam. Hoc vero quicquid est operæ, quum melioribus auspiciis lucem aspicere non posset, vestro Illustrissimo Nomini ac tutelæ, ea qua decet veneratione, dicatum commissumque venio, neque tam pagellas hasce pauculas, quam inventum ipsum, ut videtur, non incelebre futurum, dedico consecroque. Vos pro solita benignitate vestra favete, ad publicam utilitatem, quoquo modo studia sua referenti, neque aliud magis in votis habenti, quam ut majoris momenti in rebus eadem posthac approbare vobis contingat. Ita Rempublicam sub imperio vestro incolumem servet, beneque fortunet Deus.

CHRI.



CHRISTIANI HUGENII A ZULICHEM,

CONST. F.

HOROLOGIU M.

TEmporis dimetiendi rationem novam, quam exeunte Anno 1656. excogitavimus, paucisque deinde mensibus in patria divulgare instituimus; etsi dubitandum non erat, propter egregiam utilitatem, brevi longe lateque manaturam, quippe pluribus jam distractis, ac dimissis quaqua-
versum novi operis exemplaribus, nos tamen haud inviti consiliis eorum obtemperamus, qui ut scripto comprehensam in lucem ederemus, autores fuere. cum ut illos demereamus, ad quos, ob locorum intervalla, tardius fortasse perventura erat: tum ut male feriatorum hominum audaciae obviam eamus, ne, quod solenne ipsis est, alienis insidientur inventis, ac per summam injuriam pro suis venditent. Quanquam hos, si fuerit opus, & dati Privilegii tempus. refellere possit, quod à Celsissimis Fœderatarum Provinciarum Ordinibus die 16. Junii Anno 1657. impetratum est, & testes præterea non pauci, quos de oblato nobis recens invento subinde certiores fecimus. Occasionem ei præbuisse Astronomorum pendula, facile quivis conjiciet, qui non nescierit aliquot jam retro annis hæc usurpari illis coepta.

Nimirum fallentibus clepsydris automatisque quibuslibet, quæ inter observandum adhibere consueverant, tandem, docente primum Viro sagacissimo Galileo Galilei, hunc modum inierunt, ut è catenula tenui pondus appensum manu impellerent, cujus vibrationibus singulis dinumeratis, totidem colligerentur æqualia temporis momenta. Hac methodo Observationes Eclipsium scrupulosius quam antea peregere, Solisque item diametrum, & Stellarum distantias dimensi sunt non infeliciter. Sed præterquam quod deficiebat necessario pendulorum motus, nisi adstantis opera identidem juvaretur, tædiosus insuper labor evadebat, omnes eorum itus reditusque numerantibus; cui sane integris noctibus mirabili patientia nonnullos invigilasse, ipsis prodentibus, constat. Nos autem æquabilissimum hocce genus motus cernentes, ac veluti unicum in rerum natura datum, quod ad Mechanicam constructionem posset traduci, quælivimus quo pacto hoc ipsum brevissime assequi liceret, atque ita remedium invenire gemino quod retulimus incommodo. Ac multa fabricæ varietate animo perpenſa, hanc denique, quam deinceps tradituri sumus, ut cæteris planiorem facilioremque selegimus. Qua percepta & in publicum porro privatumque usum, sicut jam fieri cœpit, conversa, ad universos quidem hic fructus redundabit, quod horologiorum, cum inter se, tum cum Sole ipso, quantus nunquam antehac, imo quantus pene optari posset, consensus animadvertetur. Astronomi vero id consequentur, ut nulla posthac agitandorum perpēdiculorum molestia, numerandive sollicitudine, & illa omnia exequantur, quorum paulo ante meminimus, & alia illis subtiliora, ipsam puta dierum de meridie in meridiem inæqualitatem, scrutentur; quam qui negare audent, ratione hætenus magis quam certa experientia refutati sunt. Ut jam de Longitudinum, quam vocant, scientia dicere omittam: quæ si unquam extitura est, desideratumque tantopere usum cursui navigantium præbitura, non aliter, quam vectis per mare exquisitissimis atque omni errore vacuis horologiis, id obtineri posse, multi nobiscum existimant. Verum

rum hæc res vel ipsi mihi, vel aliis quandoque curæ erit. Nunc automaton nostrum & figura oculis subijciam, & figuram verbis quam potero dilucide explicabo.

Præcipuam operis partem binæ laminæ continent oblongæ ^{TAB.} _{1.} atque inter se æquales, A B, C D; quibus rotarum axes utrinque inserti sunt. Eæ laminæ lateribus tantum hic sunt conspiciuæ: columellas autem quatuor, quibus versus angulos connexæ sunt, de industria exprimere neglexi, ut ne reliquis officerent. Prima rota seu tympanum dentatum est E, cujus axi orbiculus quoque F affixus est. Huic circumjectus funis cum appenso pondere Δ , eo quem postea dicemus modo. Ponderis itaque vi tympanum E vertitur. Hoc movet proximum tympanum H. hoc rotam L, cujus dentes ad instar ferræ dentium formati sunt. Hujus prope axem erectus stat axis M N, cum affixis lamellis five auriculis binis, quarum alteri occurrunt superiores rotæ L dentes, alteri inferiores, idque perpetua vicissitudine, ita ut non in gyrum axis hic circumagatur, sed reciproco motu, nunc in hanc, nunc in illam partem libretur, dum interim rota L in orbem vertitur. Quem motum pluribus exponere supersedeo, quod in vulgaribus passim horologiis reperiatur. à quibus equidem hucusque nostrum hoc non discrepat; at plurimum in his quæ sequuntur. Axi enim N M infigitur O tympanum, cujus dentibus aptantur dentes rotæ P, ejus generis quas coronarias vocant artifices nostri. Nec vero toto ambitu dentata ut sit necesse est, sed parte superiori duntaxat. quippe tympanum O, haud aliter atque axis N M cui cohæret, reciprocam librationem habet, unde & rotam P simili motu agitat. Cumque major sit hujus diameter quam tympani O, sequitur ut minori etiam circuitus parte rota quam tympanum dictum gyretur. quod quo pertineat alibi indicabimus. Porro ejusdem rotæ P axis trans laminam C D aliquantum extenditur, habetque conjunctam clavulam Q R, inferius itidem inflexam & terebratam ad R, ita ut per foramen hoc laxiusculum virgula ænea I-T libere transmeet. Hæc vero virgula superius ad S suspensa est filo S I, ex inferiori parte pondus T sustinens,

nens, quod cochleæ subjectæ conversione sursum propellitur cum opus est, vel ulterius descendit.

Quibus expositis ut motus ratio, totiusque adeo inventi percipiatur (nam quæ præterea in Schemate notata apparent, postea exequemur) advertendum est in primis, quod si pendiculum SIT per foramen R trajectum non esset, neque omnino adesset, tunc quidem clavula QR concitato motu ultro citroque jactaretur, vi ponderis Δ , omnes rotas automati agitantis. Transmissa autem virgula IT , cum appenso pondere T per foramen R , impeditur eo dictus clavulæ motus, totumque horologium quiescit, donec pondus T semel impulsus principium agitationis nanciscatur. Quo facto, pendulum quidem SIT oscillatorio motu fertur juxta planum laminæ CD . clavula vero QR , momentum sentiens ponderis Δ , ultro obsequitur penduli motui, ita ut paulisper etiam vibrationibus hunc singulis adjuvet. Atque hoc modo perennis efficitur penduli agitatio, quæ nisi illud horologio conjunctum foret, brevi deficeret vergeretque ad quietem. Ad singulos autem recursus penduli, percipientur ictus totidem ex appulsu dentium rotæ L ad lamellas M, N . Et hæc quidem de motu automati nostri, quæ præcipue explicationem requirebant, quoniam in eo summa totius inventi vertitur.

In schemate porro tertia lamina est YZ , prioribus parallela, & à lamina AB spatio distans. quo in spatio conspiciatur tympanum dentatum V , communem cum rota E axem habens. Huic congruunt dentes rotæ X , quæ media sui parte conjunctum habet tubulum cavum Γ ultra laminam YZ prominentem, impositumque gerentem horologii indicem primarium Λ . Ipsi vero Γ tubulo alius itidem cavus introrsus constitutus est, laminæque YZ confertus, axis nimirum quo rota X volvatur, & per quem simul transmittatur axis rotæ H , cui impositus est index alius Σ longior indice Λ . Is secunda scrupula demonstrat. Primorum vero scrupulorum seu minutorum index prioribus illis utrisque multo brevior Ψ , extremo axi DV , ultra laminam YZ producto, affixus est. Et hic quidem indculus, laminæ, YZ proximus fertur,
parvo

parvo in circello singula prima scrupula distinguens. Hoc verò superior index horarum Λ convertitur : & supra hunc denique Σ index, quem dixi, secundorum. Hæc autem, uti & tympanorum omnium dispositio ac dentium numerus, cum multimodis variari possint, nos hunc unum in exemplum proponere satis habuimus, eumque experientia comprobatum. Itaque & dentium multitudinem in singulis tympanis designabimus, eam quæ huic formæ optime convenire visa est. In circumferentia rotarum singularum E H septuageni bini sunt, feni in tympanis G & K . rota L viginti quinque habet, tympanum O decem. rota P viginti, vel tantum partem horum aliquam, quia, ut dixi, totam dentibus infecari nihil opus est. Penduli longitudo S I T pedis Rhenolandici, qui ad Romanum veterem proxime accedit, dextantem circiter æquat, & cuique vibrationi simplici impendit semiscrupulum secundum. ad quam mensuram observationibus ad solem vel ad aliud hujus generis horologium comparatis non difficile perducitur. Ea longitudo rotis ita ordinatis convenit : & exquisitam motus æqualitatem, quæque etiam Astronomicis usibus sufficiat, præstare valet. Quod si tamen concinnitate operis insuper habita, quadruplo majus pendulum adhibeatur, vel ultra etiam producat, rotis interim majoribus quoque adsumptis, haud dubiè lentioribus oscillationibus tutius etiam fidemus. Et jam in magnis publicis Horologiis, egregio successu, perpendicula ejusmodi prælonga usurpari vidimus, alibi duodecim, alibi vicensimum pedum, cum appensa sphaera 25 vel 30 librarum. Cæterum revertendo ad ea quæ hic posita fuere, apparet quidem, rota E semel circumacta, duodecies converti rotam H . centies vero quadragies & quater eam quæ sequitur L . Quæ cum dentes 25 habeat, 3600 vicibus alternatim impellit lamellas M . N . ac totidem recursus duplices facit pendulum S I T . Cumque 3600 scrupula secunda, horâ unâ contineantur; hinc horæ spatium rota E semel convertetur. Quamobrem & circulus indici Ψ subjectus in 60 partes dividitur, quæ prima scrupula significant. Rota vero H quia

B duo-

duodecies in hora, hoc est, semel spatio 5 scrupulorum primorum versatur, unaque index Σ , ideo circulum huic indici suppositum in 5 partes primum dispescimus, & harum deinde singulas in 60 minores, quæ secunda scrupula denotent. Denique index Λ in suo circulo duodecim horas distinguere debet; ac proinde, ut harum tempore semel circumbeat, tympano V sex dentes tribuuntur, rotæ X septuageni bini.

Nunc qua ratione pondera Δ , Ξ , horologio appendantur docebimus. Hæc enim novo artificio ita ordinavimus, ut cum sursum retrahitur pondus primum Δ , non propterea cesset aut ullatenus impediatur horologii cursus. Quod in hac inventione apprime necessarium erat, ne particula temporis aliqua quotidie subduceretur, neve penduli motus interea dum pondus attollitur languesceret. Paratur itaque funis continuus atque in se rediens, extremitatibus apte inter se connexis. Is primo orbiculum F amplexus, aculeis ferreis asperum, quo melius funis inhæreat, parte altera trochleæ, cui pondus primum Δ alligatum est, circumvolvitur. Hinc ascendens super orbiculo Ω transit, ac rursus descendens sustinet trochleam alteram cum appenso minori pondere Ξ ; unde denuo ad F redit. Orbiculus Ω (quem demonstrandi gratia hic inter laminas AB , YZ , suspendimus, nam alioqui commodius thecæ quæ toti horologio circumdatur affigi solet) circumferentiam versus denticulos habet, ut in rota L , ferratos, ac desuper prementem elaterem Θ , quo fit ut in alteram tantummodo partem volvi possit, attracto nimirum fune Π , ac pondere propterea Δ ascendente: Nam contrarium motum elater dentibus occurrens prohibet. Crenam autem secundum circumferentiam dicti orbiculi ita cavari oportet, ut funem immissum nonnihil coarctet constringatque, quo minus possit immoto orbiculo delabi; quem in finem etiam pondus Ξ adhibetur. His sic constitutis, semper Δ dimidia sui gravitate incumbet funi Φ , motumque horologio continuabit etiam dum attracto fune Π in altum attollitur. Et hæcenus
qui

quidem quæ ad constructionem automati pertinent declaravimus.

Reliquum est, ut, quantum idem iis omnibus, quæ ad hanc diem in usu fuere, antecellat, perspicuum faciamus. Satis constat plurimas in his erroris & inæqualitatis causas esse. Nam & in disponendis rite elimandisque tympanis vel levissimum peccatum, continuo motus inconstantia notabilis consequitur. Tum vero & siccato atque evanescente oleo, quod axibus addi solet, tardius horæ procedunt. atque ut hæc absint, varias tamen, anni tempestatum & aeris, mutationes horologia sentiunt, imo præsentiant nonnunquam: & frigore quidem plerunque pigriora comperiuntur, æstu plus æquo properant. Penduli vero cum sit ea vis ac proprietas, ut necessario eodem semper tenore feratur, neque ab eo nisi mutata longitudine unquam declinet; apparet sane omnia illa quæ diximus incommoda invento nostro penitus nos sustulisse, adeo ut nisi tale quod interveniat impedimentum, quo horologii motus omnis sistatur, nulla jam cursus ejus retardatio aut inæqualitas timenda sit. At enimvero non nemini duplicem hic dubitandi causam oboriri posse scio. Primum, quod differre à pendulo libero nostrum hoc videatur, quippe ad singulas vibrationes vim quandam ac nixum clavulæ Q R sentiens. Deinde quod, etiamsi penduli simplicis proprietates retineat, perque omnia æmuletur, hujus tamen ipsius geminæ inæqualitates à nonnullis, qui subtiliter hæc perquisiverunt, animadversæ sint. Hic illud quod de clavulæ impressione dicitur verum esse non diffitemur. Sed levissimam utique hanc esse novimus ratione gravitatis T, quæ sic temperatur, ut tantum non deficiat penduli agitatio, sed quam minimâ, & eâdem tamen latitudine perseveret. Proinde nihilo concitator aut minus æquabilis hic ipsius motus evadit, quam si clavulæ prorsus obnoxius non esset, pendulumque simplex S I T, ut adhuc fieri consuevit, manu impelleretur. Et hoc quidem ex-


perientia optime comprobat. Penduli vero ipsius, quas adnotant, binas inæqualitates, alii autem contra pernegant, earum alteram admittimus, sed vix quicquam horologio nostro officientem, alteram plane nullam esse adseverare non dubitamus. Illud itaque vere asserunt, non prorsus æquali tempore latiores ejusdem penduli ac angustiores vibrationes transire, sed his illas paulo plus insumere, quod facili experimento demonstrari potest. Nam si pendula duo, pondere ac longitudine æqualia, alterum procul à perpendiculo, alterum parumper dimoveantur, simul dimissa, non diu in partes easdem una ferri cernentur, sed prævertet illud cujus exiliores erunt recursus. Verum huic inæqualitati nostrum, uti dixi, horologium minus obnoxium est, eo quod omnes oscillationes æquali spatio à perpendiculo excurrant. Nec tamen in totum expers remansit, si minutissima quæque, sicut hac in re fieri necesse est, consectari velimus. Contingit siquidem vel aëris intemperie, vel operis vitio aliquo, ut non semper pari vi agitetur clavula QR , unde & oscillationes penduli (licet exiguo discrimine) crescere ac rursus imminui necesse est. Cumque ampliores recursus arctioribus, sicut modo dicebam, plus temporis impendant, idcirco nonnulla hinc in horologii motu inæqualitas existit. Et huic quidem, utut contemptibilis videri possit, remedium etiam adhibere solebamus, quamdiu ita constructa erant horologia, ut majuscula esset penduli agitatio. Postmodum vero, ne remedio opus esset, effecimus adhibito tympano O rotaque P : quibus hoc consequimur, ut quamlibet angustæ sint penduli vibrationes, neque eo secius axis MN , quantum necesse est, reciproco motu convertatur. Nam cum tympani O diametro dupla vel tripla ponatur diameter rotæ P , sequitur ut hujus exigua licet oscillatione, illud tamen satis magnam circuitus partem absolvat. Sic igitur oscillationibus universis exilioribus redditis, etiam si harum aliæ alias latitudine quandoque excedant, singulorum tamen tempora, experientia teste, nullo memorabili discrimine differunt. Qua ex re & hoc contingit, ut aucto
vel


vel ad duplum pondere Δ , non propterea penduli motus acceleretur, aut horologii cursus alteretur, quod in omnibus aliis hactenus usitatis fecus accidit. Alteram penduli inæqualitatem, Vir Astronomiæ studiis clarus, Gothofr. Wendelinus, primus & solus, ut opinor, prodidit; expertum sese scribens, ejusdem penduli velociores esse oscillationes hyemali tempore quam æstivo idque notabili differentia. Sed quoniam in eo examine arenaria tantum horologia, vulgariaque automata sese adhibuisse fatetur, cum sciotericis, fortasse non nimia cura descriptis; multi, quam recte se haberet hæc ipsius observatio, dubitarunt. Mihi certe nihil ejusmodi licuit animadvertere. Quin contra, & minoribus horologiis, quibus semipedale est pendulum, & majoribus, in quibus 24 fere pedes æquat, eandem perpetuo longitudinem, brumæ tempore ac æstate media, convenire expertus sum. Quæ longitudo saltem septima sui parte per hyemem productior esse deberet, si Wendelini vera foret opinio.


Afferta igitur & hac in parte automati nostri motus æquabilitate & constantia, finem jam descriptioni imponeamus; multa quæ his addi præterea possent, artificum industriæ relinquentes, qui rationem inventi hujus edocti, non difficile reperient quo pacto illud varii generis horologiis, atque iis etiam quæ pridem ad veterem formam fabricata sunt, applicari queat. Nos quidem apud eum, cujus opera primum in his fabricandis usi sumus, talia quoque confecta vidimus, quæ non pondere, sed elateris vi moverentur. In quibus, cum antehac pyramide illa æquatoria, chordaque huic circumvoluta opus esset, quorum ope adæquarentur primi ac postremi elateris impetus; nunc iis omisiss, ipsi tympano, cui elater inclusus est, dentes adduntur. Nam licet hoc modo non æque in fine ac principio vigeat penduli motus, non tamen eo lentiores sub finem oscillationes efficiuntur, uti superius fuit demonstratum. Elater vero ea parte, qua ad centrum convolutus est, intenditur, atque ita cavetur ne quo temporis momento cursus horologii suf-

flaminetur. Mitto quod & sonitu horas edentia automata hujusmodi machinatus est, ita ut uno eodemque, sive pondere, sive elatere, pars utraque, tam quæ ad hoc comparata est, quam quæ indicem horologii versat, moveretur. Etenim hæc omnia ad inventum nostrum haud aliter spectant, quam quod occasionem iis atque opportunitatem præbuerit.

F I N I S.







CHRISTIANI
HUGENII

ZULICHEMII, CONST. F.

HOROLOGIIUM
OSCILLATORIUM.

SIVE

DE MOTU PENDULORUM

AD HOROLOGIA ADAPTATO

DEMONSTRATIONES

GEOMETRICÆ.

Dividitur liber hic in partes quinque,
quarum

Prima *Descriptionem* HOROLOGII OSCILLATORII continet.

Secunda agit de *Descensu gravium*, & *motu eorum in Cycloide*.

Tertia de *Evolutione & Dimensione linearum curvarum*.

Quarta de *Centro Oscillationis seu Agitationis*.

Quinta *alterius Horologii constructionem*, in quo circularis
est penduli motus, exhibet, & Theoremata
de *Vi Centrifuga*.



LUDOVICO XIV,
FRANCIÆ ET NAVARRÆ
REGI INCLYTO.




RENATAM, Rex maxime, restitutamque hoc sæculo Geometriam, Galliæ præcipue debemus. Hinc enim orti, qui magna meliorique sui parte deperditam, ac veluti sepultam, instaurarunt primi, & in lucem reduxerunt. Quorum vestigiis insistentes, ita eam deinde, per totam Europam, excoluere viri subtilissimi, ut pauca jam posterorum industriæ ab his relicta videantur; veterum vero inventa longissime prætervecti sint. In hac scientia, quam semper admiratus sum & amavi plurimum, quandocunque ad eam animum applicui, illa mihi præ cæteris proposui investiganda, quæ vel ad vitæ commodā, vel ad Naturæ cognitionem, reperta
C pro-

prodesse possent. Tunc verò optimè operam me collocasse existimavi, cum in ea incidissem, in quibus utilitas cum inveniendi difficultate, ac subtilitate aliqua, conjuncta foret. Quod si commendationis nonnihil accersere muneri nostro permittitur, ne prorsus indignum tua magnitudine appareat; non alias felicius, quam in hoc Horologii invento, utrumque illud me consecutum esse profiteor. Etenim, cum ex parte mechanicum sit inventum; ex parte altera, eaque multò præcipua, geometricis principiis constet; id quod ad hanc attinet, non levi conamine, ex intimis artis recessibus petendum fuit: adeo quidem, ut inter omnia, quæ impensiore studio hætenus pertractaverim, haud dubie primum huic speculationi locum tribuam. Quænam vero in his sit utilitas, non est quod multis, Rex potentissime, ostendere tibi laborem. Non solum enim diutinâ experientiâ comper- tum habes, ex quo regię tuæ penetralibus reci- pi meruere Automata nostra, quantum, æqua- bili horarum demonstratione, cæteris hujusmo- di machinationibus excellant: sed & potiores usus eorum, quibusque jam inde à principio mihi destinata fuere, non ignoras. Illos scili- cet, quos & in Cælestium observationibus, & in Longitudinibus locorum inter navigandum dimetiendis, præstare apta sunt. Tuo enim jussu, non semel, per mare vecta fuere Horo-
logia

logia nostra. . Tuis auspiciis eadem nec pauca, Astronomiæ usibus dicata, visuntur in præclara illa Urania arce, quam insigni nuper magnificentia, quantaque antehac regum nemo, exædificandam curasti. Quæ quoties mecum reputo, toties de fortuna hujus inventi, quod in tua tempora inciderit, non parum mihi gratulari soleo. Nec jam requireret quisquam, opinor, qui quantum tibi illud debeat intelliget, cur lucubrationes has, quibus rationem ejus omnem descriptionemque explicui, augusto Nomini tuo inscribendas duxerim. Ac minus etiam id mirabitur, qui mihi, ad hæc atque alia meditando, tranquillum otium benignitate tua contigisse didicerit. Namque & hujus, ut mihi aliquatenus apud te ratio constaret, adnitendum erat; & quoquo modo conandum, ut, multis continuisque à te beneficiis affectus, nonnulla grati animi significatione defungerer. Scio equidem, rebus maximis, negotiisque iis intento, quæ in illo rerum fastigio positum agitare convenit, haudquaquam tibi liberum esse, ut ad hujusmodi contemplationes animum, alioqui rerum omnium capacem, advertas. Sed non ideo minus grata hæc fore, minusve tibi probatum iri arbitror, Rex augustissime; cui illa maxime placere videmus, quæ plurimum publicè profunt; neque aliud magis curæ esse, quam ut nova incrementa sumant optimæ disciplinæ,

novisque illustrentur inventis. Hoc enim fatis declarat eximia illa tua, ac singularis, tum in ipsis promovendis, tum in his qui cognitione earum præminent remunerandis, liberalitas. Quam non immensæ, ac solito majores, bellorum impensæ quidquam imminuunt: non Galliæ tuæ fines circumscribunt. Ut plane te hoc agere appareat, quo non solum sub imperio tuo viventes, sed & Orbis universus, quacunque beneficio tuo dignus est, te regnante, eruditior, ornatior, felicior evadat. Cui verissimæ præclarissimæque gloriæ tuæ, ita aliquid fortasse etiam hæc literaria monumenta conducent; ut, si viguisse hoc tempore studia ista, artesque, posteris testari possint, simul illos edoceant, tuæ hoc virtuti, atque animi magnitudini, ante omnia acceptum ferendum esse. Lutetiæ Parisiorum; xxv. Mart. A. C1D1DCLXX I I I.



HADRIANI VALLII DAPHNIS, E C L O G A.

Ad Christianum Hugenum Zulichemium,
Constantini F.

EINITIMUM tutela, simul jucunda voluptas,
Dilectæ Phæbo, Sceverinides * Oceaninæ;
Hunc quoque Pierium mihi fortunate laborem:
Pervigilem noctem quo carmine duxerit Ancon
Navita, dicemus: vestro sic gurgite numquam
Pan lavet, aut turpes incestent æquora Fauni.

Te, quem Fama vehit super aurea sidera curru,
Ne pigeat nobis aurem præbere faventem,
HUGENIDE, decus Hugenidum, fratrumque patrisque:
Haud indigna tuo ferimus donaria sensu,
Sicelisin aptata modis à vate Batavo
Mixta Palæphatio commenta Solensia versu,
Teque intertextum tuaque præclara reperta.

Jam caput Oceano, stipata minoribus astris,
Extulerat radiis fraternis æmula Phæbe,
Cum reditum molirentur pastoria pubes,
Sidere quam pleno conchas legisse marinas
Juverat, hærentesque vadis captare paguros.
In celso tamen advertunt Ancona morantem
Colle, reum toties promissi carminis. ipsum
Thestylis & Corydon, quas cætera turba secuti,
A tergo circumveniunt, cinguntque corona.

C 3

Ec

* Sceverina, Pagus apud Batavos; mari adjacens.

Ecquid agat, rogitant blande: tum fausta precantur;
 Et damnant voti, promissaque carmina poscunt.
 Contra ille; O Pueri, quid portet crastinus Eos,
 Sedi explorator: turmales agmine mergi,
 Solivaga aut cornix, aut alcyones desertæ
 Si qua darent mihi signa. maris cras æquor arandum.
 Detinuit nunc usque Jovis clementia sudi,
 Et picturatus tot circum animalibus æther.
 Quæ nos in vitreo miramur monstra profundo,
 Fert radians æther, vultus formasque natantum.
 Cancer ibi est, delphinque; est grandi corpore cetus.
 Ad Boream pisces, & contemplere sub Austro
 Pisces; nuper ubi numero crevisse feruntur.
 Sunt urna, fluviusque, & aplustris comta carina
 Illic. quin operis simulamina plurima vestri,
 Luminaque in cælo pecori debentia nomen.
 Sunt hædi parvæque sues, materque capella.
 Et fuse sparso quæ candet semita lacte.
 Vestibulum servant, elucens vellere fulvo
 Dux aries, ingensque auratus cornua taurus.
 Bini cernunturque canes, pernoxque bubulcus;
 Plaustraque; quique auriga suis excussus habenis.
 Stellatum volat alatus per inane caballus:
 Ac præsepe suum juxta stabulantur aselli.
 Illic virgo, manum Cereali inlustris arista,
 Et, transmutatus faciem, Pan ipse renidet;
 Daphnin amans vestrum, secretæ rupis in umbra,
 Uranie velut edocuit: me singula Daphnis.
 Singula quæ (carmen quia poscitis) ordine pandam.
 Extemplo tentat vocem: numerosque modosque
 Perpendens mulcet variis concentibus auras.
 Tum venti posuere. jacet sine fluctibus æquor;
 Factaque sunt terris, sunt facta silentia ponto.
 Mox interfatur: Quod prosperet; ab Jove magno
 Ordinar: ordiri consuerunt ab Jove vates.
 Vos, nec enim rerum brevis hic mihi nascitur ordo,

Noctur-

Nocturnum chorea defendite corpore frigus.

Inde Jovis magni cunas, veterisque celebrat
Saturni jussum crudele, dolumque Cybelles;
Ortaque Dictæis Corybantia sacra latebris:
Ut puero nutrix sit olentis læta mariti
Uxor; & ipsa recens hædos enixa gemellos;
Queis comitata polum modo lucida stella frequentet,
Quæ prius Oleniis balavit bestia campis;
Sub pedibusque terat formosi limen Olympi.
Tantus amor Jovis, & percepti gratia lætis.

Nec tamen hoc niveum manasse fluore nitorem,
In duo secta vias, oculis manifesta videntum,
Semitæ quo candet ducens ad tecta Tonantis;
Tergeminam sed noctem productumque canebat
Alciden mundo; Deus immortalis haberi
Haud pote qui fuerat, sopitæ parvula mammis
Labra pater gnati nisi conjugis admovisset:
Quæ, simul experrecta, simul conterrita, surgens
Uvidulas tenero mammas subtraxerit ori,
Indignata. pavimentum tabulataque cæli
Deciduis maculis ut tunc infecerit albis
Per convexa ruens in se revolubilis humor:
Orbita cycneo nunc unde bifurca colore,
Ducta per æquales medio discrimine partes,
Ceruleum velut argento ferruminet axem:
Axem, cervices qui quum lassaret Atlantis,
Haud gravis Herculeo requierit sarcina collo;
Atque tot ærumnas quem post, manesque subactos,
Ipse suis ornet jam portio magna triumphis;
Hesperidum contra custodem divitis horti
Insurgens Anguem pede nixus; aperta que retro
Terribili rictu nil curans ora Leonis;
Lerneæque audacem Hydræ succurrere Cancrum;
Monstra novercales testantia jugiter iras
Et frustra bacchatum odium Junonis iniquæ.

Hinc aliam memorat grassatam fraude novercam;

Et

*Et transmittendi pavidam nimis æquoris Hellen:
In thalamos sit ut illa tuos, Neptune, recepta:
Phryxeumque pecus, fætamque heroibus Argo
Phasidos ad fluctus deducit & æthera cantu.*

*Nec silet Europæ vectoris præmia; vel te,
Bigarum Pelopis perjuri, Myrtilæ, rector.
Myrtoum pelagus signaras ante caduco
Funere; sublimem nunc tollunt cornua Tauri.*

*Haud procul his Hyades notat exardescere: sed, quæ
Sunt Hyades Grajæ, Suculas dixisse Latinos;
Atque duas septem mutasse Trionibus Arctos;
Arctophylaca pigro, sua plaustra sequente, Bubulco;
Quando bovem prisco vocitabant more trionem,
Quod tereret duro proscissam vomere terram.*

*Hanc adeo sortem miserans, suspiria ducit;
Buceriumque genus questu compellat inani;
Ab pecus infelix, armentum! sæcla fuerunt,
Pondere quum duro neque vos gemeretur aratri,
Navita nec vestro vocitaret nomine stellas.*

*Tunc neque sidus erat terris pia Virgo relictis,
Quæ Cereale manu spicum gerit; Icariotis
Sive sit Erigone, cui fida Canicula patrem
Quærenti indigna monstravit cæde peremptum;
Atque, comes dominæ, domino comitem Oarioni
Astra minor socium majorem repperit inter:
Seu magis Astræi sit sanguine creta, perenne
De genitore suo quæ nomen contulit astris:
Sive sit antiquæ Themidis justissima proles,
Aversata jugo vos aspectare gravari,
Tempora dum, pulsas melioribus, ærea surgunt:
Sive sit alma Ceres; horrens fugitiva videre
Vos quoque mactari; nil pejor linquit inausum
Ferrea dum soboles, ipsorum inimica Deorum:
Quos, quasi de terra (nam Dii coluistis & illam)
Sit pepulisse parum, tentavit pellere cælo.*

Tum detestatur suffultos angue Gigantas;

Por-

*Porphyriona, statu terrentem cuncta minaci ;
 Rhæcumque ; immanemque Gygen, validumque Mimanta ;
 Enceladumque ; manusque rotantem Ægeona centum ;
 Et, cui par nemo feritate, Typhœa dirum,
 Ausos invasisse Deos tellure fugatos,
 Ac totum magno cælum complexse tumultu,
 Undique divulsas jaculantes torviter ornos
 De tumulis cumulorum montibus ex aggestis.
 Terrigenam ut pubem, Divam penetralia sancta
 Rimantem, Superi mentito fallere vultu
 Quæsierint, addit ; dispertitosque pavore :
 Donec apud late stagnantis flumina Nili
 Horrificam faciem Pan sumserit Ægocerotis ;
 Ambiguoque sono Superos animarit ad arma,
 Anguipedesque metu dare terga coëgerit omnes :
 Cælo donandos Asinos auxisse timorem
 Congerie vocum, perterrificoque fragore :
 Illa cælicolis nam tempestate fuisse
 Auxilio Satyros, Silenorumque phalangem,
 Evantes in asellis cum Bacchæo ululatu,
 Thyrsis armatos, tectos colocynthide parma.*

*Parvus ut interea volucer cum matre Cupido
 Venerit Assyrii fugiens Euphratis ad undam ;
 Induerintque gregis (Syriæ post numina genti)
 Squammigerum formas, gemini nunc aurea Pisces
 Lumina, signiferum Capricorno juncta per orbem,
 Ni fusa medius secernat Aquarius Urna ;
 Deucalioneos neque non edisserit imbres,
 Nectaris aut quanti Ganymedes pocula verset ;
 Sive sit is Cecrops, peplo præsignis Athenæ ;
 Pastor Aristæus seu plena alvearia gestet,
 Quæ subter volitetis apes examine denso.*

*Qualiter & pandus vectarit Ariona Delphin,
 Ac aliter vectum Danaeium Persea narrat ;
 Cepheaque, Andromedenque, & mæstam Cassiopeiam ;
 Insertumque polo vastum Pistricis hiatum :*

*Quem Phaëthonteus longo sinuamine propter
Fulgeat Eridanus declivi proximus Austro :
Nuper ad occulti Batavos ubi verticis axem
Intuitos nova squammigerum simulacra micare :
Sollertes Batavos, imo seu gurgite piscem
Venari sit opus, vel in alto sidera cælo.*

*Tum canit, ut Daphnis sacra sub rupe docentem
Viderit Uranien: argutas carmina silvas,
Et repetita cavos ediscere carmina montes :
Ut Chaldæa vetus, mira dulcedine capti,
Stent auditores circum, & Babylonia turba ;
Dein quos Graja tulit, quos aut Nilotica tellus,
Itala quos, ac pulchra suo cum Cæsare Roma ;
Post Arabum de stirpe viri & regnator Iberus ;
Ac tandem quos consultos Germania misit.
Astrorum cælique, suæ qui sidera terræ ;
Inferior nullis ut item neque Gallia desit ;
Gallia magnanimi Regis splendore superba,
Borbonios ignes cui parturit arduus æther :*

*Tum Dea quo Daphnin, Divam quo Daphnis amore
Complexus, quanti non conscia Latmia saxa :
Utque Cenon juveni radium donarit, utrimque
Multo insignem auro, & pellucidulis crystallis ;
Per quas quod spectes, prope fiat ; & augmina sumat :
Dixerit & : Sollers, en, primus quale Batavus
Munus adornarit ; sed Etrusci quo decus Arni
Est Antenorea senior Tyrrhenus in urbe
Regna Jovis princeps metatus, ab æthere vobis
Nunquam nota prius miracula nuntia portans ;
Lunæ montes, vultus tibi, Phosphore, ternos ;
Quove satellitio sublustri nocte vagetur
Stella Deum regis per cæcula templa superne.
Hoc quoque tu non nota prius miracula prodes :
Hujus erat tibi servatus sollertior usus ;
Arcanumque Chroni mortalibus omne recludes.
Accipe frustra olim nobis optabile donum.*

Daphni-

Daphnidis ad gratum nomen pernice chorea
 Exsultant alacres Pueri: neque segnius ipse
 Prosequitur; Geminas imitantia lumina falces
 Hactenus ut vane Saturni credita sidus
 Oblongo tam diversa sub imagine disco
 Fingere, quando globum teretem teres annulus extra
 Splendet, & ambo nigror spatii determinat intus;
 Exiguo circum quos erret stellula gyro:
 Omnia divino quæ fretus munere Daphnis
 Extulerit, non ante novam vulgata per artem:
 Adjungitque; quod his meritis permulsus, eundem
 In sua magna Chronus sit adire sacraria passus:
 Heic oculis lustrarit ut omnia; promserit atque
 Inventum subtile secandi temporis illinc;
 Partes quo minimas ac momina dividat horæ,
 Oscilla ex tenui suspendens mollia filo:
 Id labyrinthos cursus qui dirigat alni,
 Ignarumque viæ ratis haud sinat esse magistrum:
 Cui neque quotidie tam certus spondeat auctor,
 Oceano quantum Titan altissimus exstet;
 Ac quibus emergat, queis tunc simul occidat oris,
 Daphnidos egregio norint conamine docti.

Ille canit: chorus in numerum sua brachia quassant,
 Alternoque solum pede pulsant. at freta saltu
 Librabant hilares sese super humida thynni.
 Auritus leporum populus tunc creditur ultro
 Iliceas liquisse domos, carasque quietes
 Vicini nemoris: nulloque frequentior unquam
 Caricis arrosor prodiiſſe cuniculus antris
 Tempore narratur; narrent si vera puellæ
 Littoreæ, quæ siccandis custodia passim
 Retibus ad ventos expansis forte sedebant.
 Pectore Nereides nudo, lasciva caterva,
 Visa per incertam Lunam, visæve putantur,
 Et Triton, Glaucusque, procul sub luce maligna;
 Tuque, cubans juxta stratas prope littora phocas,

Neptuninarum pecudum fidissime custos:
Neu quisquam seræ meminit decedere nocti.
Interea tenebræ densantur; & abdita nimbo
Cynthia dum latitat, cæli de parte serena
Cinctum non solitis processit crinibus astrum,
Prolixumque trahens albore notabile syrma.
Mirantur chorus attoniti. miratur & ipse;
Præsertim tantum capiti cum demsit honorem,
Ornatumque sequacem omnem mox reddita Luna.
Insit &: Ad sua quisque inapalia tendite nota,
Prodigio nil solliciti, curamve foventes.
Insuetos alias tales cantabimus ignes,
Et trepidantem nequicquam formidine vulgum.

Hæc Ancon: mihi visa tibi quæ digna referri,
HUGENIDE, decus Hugenidum, cui sidera curæ,
Nec Phæbum ac Pimplæ fas est contemnere Divas,
Queis tua tota domus, fratres, genitorque dicati.
Sic neque te facies peregrini terreat astri,
Idemve anne alijs vario fulgore cometes.

A. CIO IOC LXV.



CHRISTIANI HUGENII
ZULICHEMII, CONST. F.
HOROLOGIIUM
OSCILLATORIUM,
SIVE
DE MOTU PENDULORUM
AD HOROLOGIA APTATO

Demonstrationes Geometricæ.

ANNUS agitur sextus decimus ex quo fabricam horologiorum, tunc recens à nobis inventorum, edito libello * publicam fecimus. Ab illo verò * Vide ^{supra} tempore cùm multa invenerimus ad perfectio- ^{pag. 5.} nem operis spectantia, visum est eà singula hoc libro exponere. Quæ quidem adeo ad perfectionem ejus inventi pertinent, ut potissima ejus pars cenferi possint, ac velut fundamentum totius mechanicæ hujus, quo prius de-

stituta erat. Mensura enim temporis certa atque æqualis, pendulo simplici naturâ non inerat, cum latiores excursus angustioribus tardiores observentur; sed geometria duce diversam ab ea, ignotamque antea penduli suspensionem reperimus, animadversâ lineæ cujusdam curvaturâ, quæ ad optatam æqualitatem illi conciliandam mirabili planè ratione comparata est. Quam postquam horologiis adhibuimus, tam constans certusque eorum motus evasit, ut post crebra experimenta terra marique capta, manifestum jam sit & Astronomiæ studiis & arti Nauticæ plurimum in iis esse præsidii. Hæc ea est linea quam defixus in circumferentia currentis rotæ clavus, continua circumvolutione, in aëre designat; à Geometris nostri ævi cycloidis nomine donata, & ob alias multas sui proprietates diligenter expensa; à nobis verò propter eam quam diximus mensurandi temporis facultatem, quam nihil tale suspicantes, ac tantum artis vestigiis insistentes, inesse ipsi comperimus. Hanc cum jam pridem amicis horum intelligentibus notam fecerimus (nam non multo post primam horologii editionem animadversa fuit) nunc eandem, demonstratione quàm potuimus accuratissima firmatam, omnibus legendam proponimus. Itaque in hac tradenda demonstratione potissima pars hujus libri versabitur. Ubi primum necesse fuit novis nonnullis demonstrationibus stabilire & promovere ulterius viri maximi Galilei de descensu gravium doctrinam, cujus fructus desideratissimus, atque apex veluti summus, hæc ipsa quam invenimus cycloidis est proprietas.

Quæ porro ut ad pendulorum usum aptari posset, nova curvarum linearum consideratio adhibenda fuit, earum scilicet
quæ


quæ fui evolutione alias curvas generant. Unde comparatio inter se longitudinis curvarum cum rectis nascitur, quam ulterius etiam quam præfens necessitas postulabat profecutus sum, propter theoriæ, ut mihi visum est, elegantiam & novitatem.


Cæterum ad explicandam Penduli Compositi naturam, cujus utilitatem in constructione horum automatôn demonstro, adjungenda fuit Centrorum Oscillationis contemplatio, à pluribus quidem, sed minus feliciter, hætenus tentata; in qua theoremata complura animadversione, ni fallor, digna reperientur, ad figuras lineares, planas, solidasque pertinentia. Ante hæc omnia vero præmittitur ipsa horologii mechanica constructio, pendulique applicatio, eâ formâ quæ ad usus astronomicos aptissima reperta est, ad cujus instar reliquæ omnes, mutatis quæ opus est, facile ordinari possint.

Quia vero contigit egregio hujus inventi successu, quod fieri plerumque solet, quodque futurum prædixeram, ut plures sese ejus auctores esse cuperent, aut si non sibi ipsis, suæ tamen nationis alicui potius quàm nobis eum honorem tribui vellent, iniquis eorum conatibus tandem aliquando occurrendum hic arbitror. Nec sanè aliud fere opponere iis necesse fuerit præterquam id unum, nempe ante annos sexdecim, cum nec dicto nec scripto cujusquam de horologiis hujusmodi mentio facta esset, aut rumor ullus omnino ferretur (loquor autem de penduli simplicis usu ad horologia translato, nam de Cycloidis additione nemo credo controversiam movebit) constructionem eorum propria meditatione me adinvenisse & perficiendam curasse. In sequenti anno, qui nempe hujus sæculi quinquagesimus octavus fuit, deli-

nea-

neationem automati descriptionemque typis vulgasse; exemplaria, tum operis ipsius, tum libelli, quaquaversum dimississe. Nam cum hæc ita omnibus nota sint, ut nec testimoniis eruditorum, nec Bataviæ Ordinum actis, quibus posset, confirmari opus habeant, facile apparet quid de illis existimandum sit, qui septem post annis eandem constructionem, quasi à se suisve amicis profectam, libris suis venditarunt. Qui vero Galileo primas hic deferre conantur, si tentasse eum, non vero perfecisse inventum dicant, illius magis quam meæ laudi detrudere videntur, quippe qui rem eandem, meliore quam ille eventu, investigaverim. Cum autem vel ab ipso Galileo, vel à filio ejus, quod nuper voluit vir quidam eruditus, ad exitum perductum fuisse contendunt, horologiaque ejusmodi re ipsâ exhibita, nescio quomodo sibi creditum iri sperent, cum vix verisimile sit adeo utile inventum ignoratum manere potuisse annis totis octo, donec à me in lucem ederetur. Quod si deditâ operâ celatum fuisse dicant, idem hoc intelligunt à quolibet alio posse obtendi, qui sibi originem inventi arrogare cupiat. Itaque probandum quidem id foret, neque eo magis ad me tamen quicquam pertineret, nisi unâ quoque ostendatur, id quod omnes latebat, mihi soli innotuisse. Et hæc quidem necessariæ defensionis causa dicenda fuere. Nunc ad ipsius automati constructionem pergamus.





HOROLOGII OSCILLATORII

PARS PRIMA,

Descriptionem ejus continens.

FIGURA adscripta horologium à latere inspiciendum præbet, ubi primum laminæ binæ sunt A A, B B, semipedali aut paulo ultra longitudine, latæ pollices duo & semis, quarum anguli quatuor columellis coaptantur, ut sesquipollice inter se distent. His laminis rotarum præcipuarum axes utrinque inferuntur. Prima atque infima est quæ notatur C, dentibus 80 incisa, cujus axi orbiculus quoque D affixus est, aculeis ferreis asper, ut funem cum appensis ponderibus contineat, quæ qua ratione ordinentur postea dicetur. Ponderis itaque vi rota C vertitur; hæc movet proximum tympanum E dentium octo, unaque rotam F eodem axe hærentem; cui dentes 48. Hanc excipit tympanum aliud G, & in eodem axe rota H, quibus dentium numerus idem qui tympano rotæque præcedenti. Sed hæc rota ejus est generis quas à forma coronarias vocant artifices nostri. Hujus dentibus agitatur tympanum I simulque rota K, quæ eodem axe tenetur, ad perpendicularum erecto. Tympano dentes 24; rotæ 15, atque hi ad instar ferræ dentium incisi. Supra mediam rotam K transversus jacet axis pinnatus L M, cujus extrema sustinent hinc inde gnomones N Q & P, seorsim affixi laminæ B B. Notanda vero in gnomone N Q pars deorsum prominens Q, quæ oblongo foramine patens transmittit axem L M, simulque retinet eum quem rotæ K tympanoque I communem esse diximus, inferiori sui parte gnomoni R innitentem. In lamina B B foramen amplum excavatum est, quo ultra ipsam extendatur axis pinnatus L M, qui subtili cuspidè insertus gnomoni P, liberius ita movetur quam si ab ipsa lamina B B sustineretur simulque ultra eam pro-

TAB. II.
Fig. I.

E

mine-

mineret, debet enim prominere necessario ut affigi possit clavula S, quæ simul cum eo versationes faciat. Est autem hic motus reciprocus, nunc in hanc nunc in illam partem, quum dentes rotæ K alternatim occurrant pinnulis L L, notâ vulgo ratione, quæque proinde diligentiori explicatione non indiget.

TAB. II.
Fig. 2.

Porro clavula S, ima sui parte reflexa ac foramine oblongo terebrata, penduli virgam ferream, cui plumbum X affixum est, amplectitur. Hæc vero virga supernè duplici filo suspensa est inter geminas lamellas, quarum una T hic tantum cernitur; itaque alteram figuram juxta descripsimus, quæ utriusque formam flexumque & totam hanc suspendendi penduli rationem exprimeret. Quanquam de vera laminarum istarum curvatura pluribus postea agendum erit.

Nunc autem ut de motu horologii dicamus, nam reliquas figuræ partes postea exequemur, facile equidem apparet & vi rotarum, à pondere tractarum, perpendiculi V X motum sustentari, postquam semel manu incitatum fuerit; & simul perpendiculi statos recursus rotis universis, totique adeo horologio movendi legem normamque præscribere. Clavula enim, quantumvis levi rotarum impulsu acta, non tantum obsequitur trahenti perpendiculo, sed & singulis recursibus paulisper ejus motum adjuvat, atque ita perennem reddit, qui alioqui sua sponte, vel verius occurso aëris, deficeret paulatim, vergeretque ad quietem. Rursus vero, quum ejusmodi sit natura penduli ut eodem semper tenore feratur, neque ab eo ulla ratione præterquam mutata longitudine dimoveri possit; utique postquam flexu lamellarum, inter quas suspensum est, æqualitatem illam consequuti fuimus; nequaquam permittitur rotæ K, ut nunc citius nunc tardius incedat, etsi sæpe, ut in vulgaribus horologiis, id facere conetur; sed necessario singuli dentes ejus coguntur æqualibus transire temporibus. Hinc vero manifestum est, & reliquarum quæ præcedunt rotarum, & denique etiam indicum æquabiles conversiones effici, cum omnia propor-
tio-

tionaliter moveantur. Quamobrem siquid in fabrica vi-
tiii fuerit, vel, ob aëris mutatam temperiem, diffici-
lius rotarum axes volvantur; dummodo non eo usque ut
omnis horologii motus interrumpatur; nulla propter
hæc inæqualitas aut motus retardatio timenda erit, sem-
perque aut rectè tempus metietur aut omnino non metie-
tur.

Indices porro hoc pacto circumaguntur atque ordinantur.
Tertia lamina prioribus parallela est $Y Y$, pollicis quarta
parte distans ab ea quæ notatur $A A$. In ea circuli horarii
descripti sunt centro eodem α quo protenditur axis rotæ C .
Quorum circulorum interior duodecim horarum divisionem
habet, alter scrupulorum 60. Axi vero rotæ C aptatur, ul-
tra laminam $A A$, rota β , tubulo cohærens qui usque ad ϵ
continuatur trans laminam $Y Y$; atque ita insidet axi illi,
ut una cum illo circumferatur; sine illo tamen, ubi opus
fuerit, converti possit. Ad ϵ index imponitur, horæ spa-
tio circuiturus atque ita scrupula prima, seu sexagesimas ho-
rarum, demonstraturus. Rota vero quam diximus β , aliam
rotam, totidem quot ipsa habet dentium, impellit, atque
una affixum ei tympanum cui dentes sex, axiculo eorum
communi hinc laminâ A , inde gnomone δ suffulto. Hoc
tandem tympano rota ζ movetur, dentes habens 72, tubu-
lumque affixum qui & ipse ultra laminam Y ad θ porrigitur,
paulo citra quam desinit tubulus rotæ β , quem intra se com-
plectitur. Parte extrema θ apponitur horarius index, brevior
aliquanto illo quem scrupula prima signare diximus, cum in-
teriore gyro ferri debeat. Secunda vero scrupula ut absque
errore demonstrantur, imponitur axi rotæ H , usque ad la-
minam Y producto, orbis λ , cui circulus in sexaginta par-
tes divisus inscribitur, incisoque in laminâ Y foramine
ad Z , ex divisiones, cuspidè in summo foramine defixâ,
prætereuntes notantur. Hæc vero tota indicum circulo-
rumque horariorum dispositio ex figura minori (*fig. 3.*) clä-
rius perspicitur, exteriorem horologii formam referen-
te.

DESCRIP-
TIO HC-
ROLOGII.

Cæterum penduli longitudinem, rotis quemadmodum diximus ordinatis, eam esse oportet ut scrupula secunda singulis recursibus metiatur, quæ longitudo tripedalis est, & commodè in schemate exhiberi non potuit. Tripedalem dico, non alicujus respectu pedis qui apud Europæ gentem hanc illamve in usu sit, sed certo æternoque pedis modulo ab ipsa hujus penduli longitudine desumpto, quem **PEDEM HORARIUM** in posterum appellare liceat, ad illam enim omnium aliorum pedum mensuræ referri debent quas incorruptas posteris tradere voluerimus. Neque enim, verbi gratiâ, ignorabitur unquam venturis sæculis Parisini pedis modus, dum constabit eum ad *Pedem Horarium* esse ut 864 ad 881. Sed de hujus mensuræ exactissima constitutione pluribus agemus in iis quæ de Centro Oscillationis. nunc tempora conversionum in singulis rotis indicibusque obiter designabimus, ut rectè omnia ad dentium supra descriptorum numerum quadrare intelligantur.

Ergo una quidem conversione rotæ *C*, decies circumire apparet rotam *F*, sexagies vero rotam *H*, & centies vices supremam *K*: cui quum dentes sint quindecim, iisque alternatim pulsantur pinnulæ *L L*, una conversione rotæ *K* numerabuntur ictus 30, quibus respondent totidem itus reditusque penduli *V X*. ideoque conversionibus 120, respondebunt oscillationes simplices 3600, qui numerus est scrupulorum secundorum unam horam efficientium. Itaque horæ tempore semel circumit rota *C*, cumque ea simul index ad *E* impositus, qui scrupula prima demonstrat. Et quoniam eodem temporis spatio etiam rota β , & per eam γ , convertitur, cum tympanidio suo dentium sex, ad quem numerum duodecuplus est numerus dentium rotæ ζ , apparet duodecim demum horis hanc circumduci, totidemque indicem illi conjunctum in θ . Denique cum rotæ *H* sexaginta conversiones respondere ostenderimus singulis conversionibus rotæ *C*, hinc illa, una cum affixo orbe λ , sexagies in singulas horas circumferetur, hoc est, semel unius scrupuli primi tempore, ideoque partes sexagesimæ orbiculi λ

secun-

secunda scrupula transitu suo ostendent: atque ita omnia rectè se habere manifestum erit. Ponderus X in imo perpendiculo trilibre est, plumbeum totum, vel ænea superficie plumbum continente. Nec tantum metalli gravitate sed & figurâ insuper prospiciendum (plurimi enim refert) ut quam minimum occursum aëris impedimentum sentiat. Eoque in cylindri jacentis oblongi & utrinque præacuti formam fingitur, qualis cernitur ad a schemate horologii minore. Quanquam in his quæ ad navigationem parantur, forma lentis erectæ aptior visa est.

TAB. II.
Fig. 1.

Porro eodem schemate & ponderis alterius b , quo motus horologii continuatur, suspendendi ratio expressa est, quam, incognitam prius, investigare nobis necesse fuit, ne interim dum sursum retrahitur ponderus istud, cessaret vel impediretur aliquatenus horologii cursus, quod hic omnino cavendum erat. Paratur itaque funis continuus atque in se rediens, extremitatibus apte inter se connexis. Is primum orbiculum rotæ infimæ conjunctum, qui in schemate majori notatus est D , amplectitur; inde descendens, altera sui parte trochleam c , cui ponderus b appensum est, subit. Hinc super orbiculum d ascendit, extrinsecus horologio affixum, qui ferreos per circumferentiam aculeos habet, atque insuper ferratis dentibus ita est aptatus ut volvatur tracto fune e ; nequaquam vero in partem contrariam revolvitur possit. Ab hoc orbiculo descendit funis ad alteram trochleam f , cui ponderus exiguum g appenditur, quantum sufficit continendo majori b , ne aliter quam revolutio orbiculo descendat. Namque à trochlea f rursus ad ipsum orbiculum D , unde descenderat, funis revertitur. Quibus ita se habentibus, manifestum est semper ponderus b dimidia sui gravitate conari ut rotas horologii circumagat, nec tunc quidem cessare cum manu funem e trahente ascendere cogitur; adeoque horologii motum nusquam interrumpi, nec momentum temporis deperdi.

Gravitatis modus in pondere b definiri certo non potest, sed quo minor conservando motui suffecerit, eo melius ac-

curatiusque fabrefactum automaton arguet. In nostris, quæ optima hætenus habemus, ad sex libras redactum est, posita nimirum orbiculi D diametro pollicari fere; uti exhibitæ fuit; item perpendiculi pondere trilibri, ac totidem pedum longitudine. Quæ longitudo, ut hoc etiam admoneamus, trans capsam horologii dependet, oblongo foramine perviam, quantum oscillationibus peragendis necesse est. Ipsum vero horologium, ad hominis altitudinem suspensum, horis 30 moveri perseverat.

Supereft nunc forma lamellarum describenda inter quas perpendiculum affigi diximus, quarumque ad æquabilem horologio motum præstandum vel præcipua est opera. Absque his enim Penduli simplicis oscillationes (etsi nonnullis aliter visum est) non erunt æque diuturnæ, sed brevioris temporis eæ quæ per minores arcus incedent; idque primùm experimento hujusmodi facileprehenditur. Si enim fila accipiantur ejusdem longitudinis duo, paribusque in parte ima ponderibus religatis, utrumque seorsim suspendatur, tumque alterum eorum procul à linea perpendiculari, alterum parumper duntaxat extrahatur, simulque è manu dimittantur; non diu utrumque simul in partes easdem ferri videbitur, sed prævertet illud cujus exiliores erunt recursus. Sed & temporum per quoslibet arcus rationes numeris definiri possunt, certâ scientiâ nixis, & vero quam libuerit propinquis, veluti quod tempus descensus per totum circuli quadrantem est ad tempus per arcum minimum fere ut 34 ad 29. Adeo ut nequaquam resistantiæ aëris ea diversitas imputanda sit, ut quidam voluere, sed ex ipsa motus natura circuli que proprietate nascatur. Quod alio quoque argumento concludi possit ex ipsa Penduli isochroni constructione, ubi à circulari linea haud parum receditur, uti mox patebit.

Sed videatur forsan in nostris horologiis hisce, ubi eadem semper est oscillationum latitudo, nullius momenti futura quam diximus inæqualitas, adeoque nec correctione ulla perpendiculi opus fore. Quod sane ita esset si latitudo omni-
um

um planè eadem constanter maneret. Sed cum pauxillum quandoque excedat vel deficiat, ex multis minimis differentiis tandem magna satis conflatur, idque ita esse reipsa atque experimentis evincitur. Etsi enim eadem semper sit ponderis vis, rotæ sibi proximæ respectu, tamen per tot alias transdita, quantâcunque curâ limatæ fuerint, non semper eadem ad perpendicularum usque pervenit. Præterquam quod frigore quoque difficilior motus rotarum efficitur; itemque evanescente aut fordescente quod illis additur oleo. Sed præcipue inæquales fiunt oscillationes horologiis quæ mari vehuntur, ob jactationem navis continuam, adeo ut omnibus quidem in universum, sed his maxime omnium remedio opus sit, quo reciprocationum Penduli latiorum angustiorumque tempora æqualia evadant.

Ad definiendam ergo lamellarum formam in quibus positum est remedium istud, in primis Penduli longitudinem statuisse oportet, quæ facile ex eo habetur, quod sint inter se longitudines perpendicularorum, sicut temporum quæ in singulos recursus impenduntur quadrata. Adeo ut cum tribus pedibus definiverimus longitudinem perpendiculari quod scrupula secunda metitur, ejus quarta pars, sive uncia novem debeantur ei quod semisecunda notaturum sit. Item si Penduli longitudo quæretur, cujus recursus simplices 10000 horæ spatio peragantur, hoc modo ratio inibitur. Penduli nempe tripedalis scimus 3600 recursus in horas singulas numerari: ergo hujus recursuum tempora singula, majora sunt temporibus Penduli quæsi, proportionem 10000 ad 3600, sive 25 ad 9. Quare ut quadratum numeri 25 ad quadratum 9, hoc est, ut 625 ad 81, ita erit longitudo pedum 3 ad eam quæ quærebatur, nempe unciam 4 cum $\frac{66}{100}$.

Posita ergo longitudine perpendiculari, puta pedum trium in horologio à nobis proposito, inde Cyclois linea, quæ curvaturam laminarum T data est, hoc modo describitur.

Super tabula plana affigatur regula A B, semidigiti crassitudine. Deinde fiat cylindrus C D E eadem illa altitudine, diametrum

DESCRIP-
TIO HO-
ROLOGII.

TAB. III.
Fig. 1.

DESCRIP-
TIO HO-
ROLOGII.

metrum vero baseos, dimidiæ perpendiculi longitudi-
ni, æqualem habens; sitque $F G H E$ fasciola, seu
potius bractea tenuis, affixa regulæ in F , cylindro verò in
circumferentiæ puncto aliquo E , ita ut partim huic circum-
voluta sit, partim extendatur juxta latus regulæ $A B$. Cy-
lindro autem infixæ sit ferrea cuspis $D I$, pauxillum ultra
basin inferiorem prominens, atque ita ut circumferentiæ ejus
exacte respondeat.

His ita se habentibus, si cylindrus secundum regulam $A B$
volvatur, bracteolæ tantum $F G$ crassitudine intercedente,
eâque semper quantum potest extensâ, describet cuspis I in
subjecto tabulæ plano lineam curvam $K I$, quæ Cyclois vo-
catur. Circulus vero genitor erit $C D E$, cylindri adhibiti
basis. Quod si jam laminam $K L$ ad regulam $A B$ appli-
cuerimus, exaratâ primum in ea cycloidis portione $K I$, in-
vertemus deinde ipsam, & in superficie adversa similem li-
neam $K M$, ab eodem puncto K egredientem, incidemus.
Tum figuram $M K I$, accurate secundum lineas istas, ef-
formabimus, cui figuræ lamellarum interstitium aptari oportet,
inter quas perpendiculum suspenditur. Sufficiunt au-
tem ad horologiorum usum portiones exiguæ arcuum $K M$,
 $K I$; reliquo flexu inutili futuro, ad quem perpendiculi fi-
lum accedere non potest.

TAB. III.
Fig. 2.

Verum, ut mirabilis lineæ natura atque effectus plenius
intelligantur, integras semicycloides $K M$, $K I$, alio sche-
mate hic exprimere visum fuit, inter quas suspensum agita-
tumque Pendulum $K N P$, diametri circuli genitoris du-
plum, cujuscunque amplitudinis oscillationes, usque ad
maximam omnium per arcum $M P I$, iisdem temporibus
confecturum sit: atque ita, ut appensæ sphæræ P centrum,
in linea $M P I$, quæ & ipsa cyclois integra est, semper
versetur. Quæ proprietas insignis, nescio an alii præter hanc
lineæ data sit, ut nempe se ipsam sui evolutione describat.
Hæc autem quæ dicta sunt, in sequentibus, ubi de descen-
su gravium, deque evolutione curvarum agemus, singula
demonstrabuntur.

Li-

Licebit autem aliter quoque, per inventa puncta, cycloidem designare. Describatur circulus diametro AB , quæ dimidiæ longitudini perpendiculi æqualis sit. In cujus circumferentia sumptis partibus æqualibus quotlibet, AC , CD , DE , EF , AG , GH , HI , IK , jungantur GC , HD , IE , KF , quæ erunt inter se parallelæ. Deinde arcui AF sumatur æqualis linea recta LM , eaque in partes æquales totidem dividatur quot sunt in arcu AF , earumque partium uni æquales ponantur singulæ CN , GO in recta CG ; duabus vero partibus rectæ LM , æquales fiant singulæ DP , HQ in recta DH . Tribus vero, singulæ ER , IS in recta EI ; atque ita porro si partes plures fuerint acceptæ; ac tandem toti LM æquales fiant singulæ FT , KV in linea extrema FK . Jam si curvæ describantur per puncta $AOSV$, $ANPRT$, hæ rursus quæsitæ cycloidis partes erunt, inter quas perpendiculum affigi oportet.

Recta autem LM æqualis arcui AF invenitur, si primum duabus rectis, quæ semissibus arcus AF subtenduntur, æqualis ponatur XZ , totius vero arcus subtensæ AF æqualis ab eodem termino accipiat XY , differentiaque YZ triens $Z\Delta$ ad totam XZ adponatur. Nam tota $X\Delta$ toti arcui AF tam prope æqualis erit, ut licet sextans fuerit circumferentiæ, (neque major hic unquam requiritur) non una sexies millesima parte suæ longitudinis deficiat, uti in his, quæ de Circuli Magnitudine antehac scripsimus, demonstratum est.

Explicitis quæ ad horologii fabricam attinent, nunc quoque illud declarandum est, quo pacto ad veram horarum mensuram componi debeat. Ergo primum, an recte se habeat motus ejus, hoc modo examinabitur.

Oculo observatoris certus eligatur locus, unde sidera despici possint, simulque tecta parietesve vicinarum ædium, sic posita, ut, cum eò appulerint stellæ quædam è fixarum numero, simul videri desinant. Eo loco foramen, ad pupillæ magnitudinem, constituitur, ut sequentibus diebus,

F

abs-

absque errore, oculus ad idem punctum reponi possit. Jam ad momentum ipsum, cum stellarum aliqua è conspectu abit, notetur tempus horologio indicatum. Atque idem postero die, vel potius aliquot diebus intermissis, fiat. Quod si tantum unius diei spatium duabus observationibus intercesse-rit, oportet in postrema observatione tempus horologii deficere ab illo, quod prima observatione annotatum fuerat, scrupulis primis 3, secundis 56. Ita enim rectè se habere perpendiculi longitudinem constabit; quum tanto superetur quælibet siderum fixorum revolutio à die solari mediocri. Mediocri dico, quoniam dies solares, de meridie ad meridiem, non omnes inter se æquales sunt, ut mox amplius exponetur. Si vero post plures demum dies observatio repetatur, in singulos tantundem differentiæ causa computandum erit. Sit, exempli gratiâ, in prima observatione, ad momentum evanescentis stellæ, adnotata horologii hora 9, cum scrupulis primis 30, secundis 18; deinde, septimo post die, eâdem disparente stellâ, indicet horam 8, cum scrupulis pr. 50, sec. 24. Hæc hora deficit à priore scrupulis pr. 39, secundis 54. Quæ, in septem divisa, dant retardationem diurnam scrupulorum 5'. 42". Debebat autem esse scrupulorum 3'. 56". quæ illâ minor est scrupulis 1'. 46". Itaque tantundem quotidie deficit horologium à vera, seu media, dierum mensura.

Cæterum alio quoque modo, ad solem, horologii motum examinare licebit. Sed hic jam inæqualitatis dierum naturalium ratio habenda erit. Sunt enim, ut jam dixi, non omnes ejusmodi dies inter se æquales; & quanquam exiguum sit discrimen, tamen plurium dierum intervallo sæpe eo usque excrescit, ut haudquaquam contemni possit. Etenim si & solarium quam perfectissime descriptum habeatur, & horologii automati motus ad verissimam dierum mensuram exactus sit, neque ab ea recedat; eveniet tamen necessario ut, certis anni temporibus, sæpe horæ quadrante, aut etiam semihora, inter se discrepent, ac rursus statim temporibus ultro concordent. Hoc enim ita esse, ex tabula tem-
poris

poris æquatoria quam subjicimus , intelligetur ; postquam usum ejus ostenderimus, qui est hujusmodi.

Accipiatur æquatio tabulæ , assignata diei qua primum cum sole, sive cum sciotherico , horologium ut conveniret fecimus. Itemque æquatio diei , qua quæritur quam bene ad dierum mensuram temperatum sit. Quod si jam prior æquatio major fuerit sequente , superare debet hora automati horam gnomonis eo, quo inter se æquationes istæ differunt. At si posterioris diei æquatio major invenitur, erit excessus penes horam gnomonis , sive eam quæ ex sole observatur. Ut si , exempli gratiâ , die 5 Martii in eandem horam convenient sciothericum horologium atque automaton , cujus diei æquatio invenitur, in tabula, scrupulorum primorum 3, secundorum 11. lubeatque scire ejusdem mensis die 20, an automaton horas æquales rectè metiatur necne: invenietur die posteriori adscripta æquatio scrupulorum primorum 7 , secundorum 27. quæ quia superat præcedentem scrupulis primis 4 , secundis 16 , debet tanto serior esse hora sciotherici, quam quæ automato indicatur. Unde, si diversum reperiatur, facile inde colligetur, quantum in dies singulos exuperet automaton, aut retardet.

In computanda tabula hac duplicem causam adhibui , utramque Astronomis notam , Eclipticæ nimirum obliquitatem, & solaris motus anomaliam. Quod cum ratio postulat, tum experientia quoque, his ipsis horologiis superstructa, quæque sine his nequaquam haberi poterat, evincit; quandoquidem, cum æquatione hîc proposita, observationes solis; quas sæpe per complures menses , quotidie ad momentum quo meridianum circulum sol occuparet , instituimus, planissime consentire inventæ sunt.

<i>Dies.</i>	<i>Januar.</i>		<i>Febr.</i>		<i>Mart.</i>		<i>Apr.</i>		<i>Maj.</i>		<i>Jun.</i>	
	Min.	Sec.	Min.	Sec.	Min.	Sec.	Min.	Sec.	Min.	Sec.	Min.	Sec.
1	10	40	0	32	2	15	11	18	18	32	18	10
2	10	10	0	24	2	28	11	37	18	39	18	1
3	9	41	0	18	2	42	11	56	18	46	17	51
4	9	13	0	13	2	56	12	15	18	53	17	41
5	8	45	0	9	3	11	12	34	18	59	17	30
6	8	17	0	6	3	26	12	53	19	4	17	19
7	7	50	0	3	3	41	13	12	19	9	17	8
8	7	23	0	1	3	56	13	31	19	14	16	57
9	6	58	0	0	4	12	13	49	19	18	16	46
10	6	34	0	0	4	29	14	6	19	22	16	35
11	6	10	0	0	4	46	14	23	19	25	16	24
12	5	47	0	2	5	4	14	39	19	28	16	13
13	5	24	0	4	5	22	14	55	19	29	16	1
14	5	2	0	8	5	40	15	10	19	29	15	49
15	4	41	0	12	5	58	15	25	19	29	15	37
16	4	21	0	16	6	16	15	39	19	28	15	24
17	4	2	0	21	6	33	15	53	19	26	15	11
18	3	44	0	26	6	51	16	7	19	24	14	58
19	3	27	0	32	7	9	16	21	19	21	14	45
20	3	11	0	40	7	27	16	34	19	18	14	32
21	2	55	0	48	7	45	16	47	19	15	14	19
22	2	39	0	57	8	3	16	59	19	11	14	6
23	2	23	1	6	8	22	17	11	19	7	13	53
24	2	7	1	16	8	41	17	22	19	2	13	40
25	1	52	1	26	9	1	17	33	18	57	13	27
26	1	38	1	37	9	21	17	43	18	51	13	15
27	1	25	1	49	9	41	17	53	18	45	13	3
28	1	13	2	2	10	1	18	3	18	39	12	52
29	1	2			10	21	18	13	18	33	12	41
30	0	51			10	40	18	23	18	26	12	30
31	0	41			10	59			18	18		

<i>Dies.</i>	<i>Jul.</i>		<i>Aug.</i>		<i>Sept.</i>		<i>Octob.</i>		<i>Nov.</i>		<i>Dec.</i>	
	Min.	Sec.	Min.	Sec.	Min.	Sec.	Min.	Sec.	Min.	Sec.	Min.	Sec.
1	12	19	10	4	16	23	26	30	31	55	25	34
2	12	8	10	8	16	42	26	49	31	55	25	10
3	11	58	10	13	17	1	27	8	31	54	24	45
4	11	48	10	18	17	21	27	26	31	52	24	20
5	11	38	10	23	17	41	27	43	31	50	23	55
6	11	28	10	28	18	1	28	0	31	47	23	30
7	11	18	10	34	18	21	28	16	31	43	23	4
8	11	9	10	41	18	41	28	32	31	37	22	38
9	11	0	10	49	19	1	28	47	31	30	22	11
10	10	52	10	58	19	21	29	2	31	22	21	43
11	10	47	11	7	19	41	29	16	31	13	21	14
12	10	38	11	16	20	1	29	30	31	3	20	44
13	10	31	11	25	20	22	29	43	30	53	20	14
14	10	25	11	36	20	43	29	56	30	43	19	44
15	10	19	11	48	21	4	30	9	30	32	19	14
16	10	13	12	1	21	25	30	22	30	20	18	44
17	10	7	12	14	21	47	30	34	30	8	18	14
18	10	2	12	28	22	9	30	45	29	55	17	44
19	9	58	12	42	22	31	30	55	29	40	17	14
20	9	54	12	57	22	52	31	4	29	23	16	44
21	9	51	13	12	23	13	31	12	29	6	16	14
22	9	49	13	27	23	33	31	19	28	48	15	44
23	9	47	13	43	23	53	31	26	28	30	15	14
24	9	46	13	59	24	13	31	32	28	11	14	43
25	9	46	14	16	24	33	31	38	27	51	14	12
26	9	46	14	33	24	53	31	43	27	30	13	41
27	9	47	14	50	25	13	31	47	27	8	13	10
28	9	49	15	8	25	33	31	50	26	45	12	40
29	9	52	15	26	25	52	31	53	26	22	12	10
30	9	56	15	45	26	11	31	55	25	58	11	40
31	10	0	16	4			31	55			11	10

F 3

Jam

DESCRIP-
TIO HO-
ROLOGII.

TAB. II.
Fig. 1.

Jam postquam utrovis modo eorum quos diximus, sed priore potius, examen institutum fuerit, si multum aberrare à media dierum longitudine horologium reperiatur, adeo ut differentia ultra tria quatuorve prima scrupula ascendat, remedium adhibebitur aucta aut diminuta ipsius penduli longitudine. Ubi hæc tenenda est regula, tot scrupulis primis, in singulos dies, motum horologii acceleratum aut retardatum iri, quot $\frac{7}{8}$ unius lineæ auferentur pendulo aut addentur. Cumque ad veram mensuram hoc pacto jam prope reductum erit, reliqua correctio transpositione exigui ponderis Δ , virgæ $V V$ adhærentis, commode peragetur. Id pondus lentis formam habet, cujus sectionem secundum axem in figura 1. expressimus. Et quia tantum vicesimam tricesimamve, aut etiam minorem, partem æquat ponderis X , hinc fit ut sat magnis spatiis è priore loco discedens, haud multum tamen perpendiculi motum afficiat, accelerando nempe quoties versus mediam virgæ longitudinem attrahitur, retardando cum inde sursum aut deorsum movetur. Ne verò diu punctum illud quærendum sit quo verissimam daturum sit dierum mensuram, divisimus certa ratione, ex motus legibus petita, inferiorem virgæ medietatem, posito nimirum pondere Δ parte quinquagesima ponderis X , parique gravitate ipsius virgæ $V V$. Quæ quidem divisiones figura 4 exhibentur, ubi penduli portio inferior in tres partes secta cernitur, quarum, quæ infimo loco ponenda, est AB . Punctum A est centrum gravitatis ponderis X , à puncto autem C , centro oscillationis, partes singulæ, quindecim scrupulorum secundorum differentiam diurnam efficiunt, ubi tali intervallo mota fuerit lens Δ . Demonstratio autem divisionumque inventio, dabitur in iis quæ de Centro Oscillationis.

TAB. II.
Fig. 4.

Cæterum illorum quoque quæ mari vehuntur, longitudinum investigandarum gratiâ, formam hic describeremus, si quænam maxime ad hunc usum accommodata sit, æque ac in præcedentibus, exploratum determinatumque haberemus; etsi quidem jam nunc eo res deducta sit, ut parum deesse

Fig. 1.




Fig. 2.

TAB. II.

Fig. 4.






Fig. 3.



deesse videatur ad perficiendum tantæ utilitatis inventum. Quid autem & qua fortuna hîc tentatum fuerit, quidve deinceps tentandum restet, exponere non pigebit.

Prima duo hujusmodi horologia Britannica navi vecta fuere anno 1664, quæ vir nobilis è Scotia nobisque amicus ad nostrorum exemplum fabricari curaverat. Hæc ponderis loco laminam chalybeam habebant in spiram convolutam, cujus vi rotæ circumagerentur, quemadmodum in exiguis illis quæ circumferri solent automatis adhiberi solent. Ut autem jactationem navis perferre possent, è chalybea pila, cylindro æneo inclusa, horologia suspenderat, clavulamque quæ penduli motum continuat (erat autem semipedali longitudine pendulum) deorsum productam geminaverat, ut literæ F inversæ formam referret; ne videlicet in gyrum evagari posset penduli motus, unde cessationis periculum. Navis hæc, cum tribus aliis quas itineris socias habuerat, postquam in Britanniam reversa est, Præfectus classis hæc retulit. Se nempe, cum à Guinææ littore solvisset, atque ad insulam, sancti Thomæ dictam, pervenisset, quæ æquinoctiali circulo subjacet, compositis hîc ad solem horologiis, occidentem versus cursum instituisse, atque ad septingenta circiter milliaria continuo tramite progressum, tum rursus vento favente Libonoto ad Africæ littora declinavisse. Cum autem ad ducenta trecentave milliaria eò cursum tenuisset, magistros aliarum navium, veritos ne priusquam Africam attigissent aquâ ad potum deficerentur, suavisse ut ad insulas Americanas, Barbatorum dictas; aquandi gratiâ defleceret. Tum sese concilio nauclerorum habito, jussisque ut Ephemeridas ac supputationes singuli suas proferrent, reperisse cæterorum calculos à suis diversos abire, unius quidem 80 milliariibus, alterius centenis, tertii amplius etiam. Ipsum vero, cum ex horologiorum indicio collegisset non amplius quam triginta circiter milliariibus abesse insulam *del Fuego* dictam, quæ una est earum, non procul ab Africa distantium, quæ à Viridi promontorio nomen habent, eamque postero die teneri posse; confisum

pen-

pendulis suis eò cursum dirigi imperasse, ac die insequenti sub meridiem eam ipsam in conspectum venisse insulam, paucisque post horis navibus stationem præbuisse. Et hæc quidem ex Præfecti illius relatu.

Ab eo vero tempore aliquoties tum Batavorum tum Gallorum opera, idque Regis Serenissimi jussu, repetita fuere experimenta, vario eventu, sed ita ut sæpius negligentia eorum quibus horologia commissa erant quam ipsamet automata culpari possent. Optimus vero successus fuit in Mediterraneo mari, expeditione in Cretam insulam, quò illustrissimus Dux Belfortius, Candia à Turcis obsessæ auxilium laturus, cum Gallorum copiis missus erat, ubi & in prælio occubuit. Is in ea qua vehebatur navi, horologia hujusce experimenti gratiâ habebat, virumque Astronomiæ peritum iis præfecerat, è cujus observationibus, in singulos dies habitis, longitudes locorum ad quæ in ea profectioe aut appulerunt naves, aut quæ prætervecti dignoscere oculis potuerant, horologiorum operâ exacte dimensas fuisse comperimus, atque ita ut Geographicis descriptionibus quæ melioris notæ habentur eademmet longitudinum differentiarum designatæ reperiantur. Namque inter Toloni portum Candiamque oppidum differentia hor. 1. scrup. 22' reperta fuit, hoc est graduum longitudinis 20. scrup. 30'. ac rursus à Candia Tolonum revertentibus differentia proxime eadem. qui consensus certissimum veritatis est indicium.

Inter eundem Toloni portum & insulam quandam cui *Marretimo* nomen est, prope promontorium Siciliae quod Occidentem spectat, Lilybæum olim vocatum, differentia horaria observata est scrup. prim. 25, sec. 20, quibus respondent gradus longitudinis 6, scrup. 20'. Item à Tolono ad insulam *Sapienza* dictam, quæ juxta Peloponnesum est Occidentem versus, hora 1, scrup. prima 5', sec. 45'', quibus respondent longitudinis gradus 16, scrup. 26.

Horologia ad solem examinata fuerant, mane ad Orientem, vespere ad Occidentem, supputato ex data poli altitudine utroque temporis momento. Atque hæc ratio cum na-




Fig. 1.




Fig. 3.






Fig. 2.



ves in anchoris stant omnium optima videtur, quod, abs-
que instrumentorum ope, solis oculis eæ observationes per-
agantur.

DESCRIP-
TIO HO-
ROLOGII.

Pendulum vero unciarum novem longitudine inerat horologiis hisce, pondere semissis. Rotæ ponderum attractu circumagebantur, eademque cum illis theca inclusæ erant quaternum pedum longitudine. In ima theca plumbum insuper centum atque amplius librarum additum erat, quo melius perpendicularem situm suspensa in navi machina servaret.

Quanquam autem æquabilis admodum sibi quæ constans automati motus per hæc experimenta comperiebatur, tamen alia quoque ratione ulterius illud perficere aggressi sumus, quæ erat huiusmodi. Rotæ illi quæ ferratos dentes habet, penduloque proxima est, pondus exiguum ex catenula affabre constructa appendimus, quo sola ipsa moveretur, reliqua omni machina nihil aliud agente quam ut singulis semis-
scrupulis horariis plumbum illud exiguum ad priorem altitudinem restitueret; eadem fere ratione atque in constructione horologii superius exposita videre est, ubi pondus altero fune attollitur, dum altero gravitatem suam horologii motui impertit. Quibus ita constructis, cum veluti ad unicam rotam omnia essent redacta, major adhuc quam antea apparuit horologiorum æqualitas, illudque accidit memoratu dignum, quod cum duo ad hanc formam constructa ex eodem tigno suspendissemus, tignum vero fulcris duobus impositum esset; motus penduli utriusque ita ictibus adversis inter se consensere, ut nunquam inde vel minimum recederent, sed utriusque sonus una semper exaudiretur: imo si data opera perturbaretur concordia illa, semetipsam brevi tempore reduceret. Miratus aliquandiu rem adeo insolitam, inveni denique, instituto diligenti examine, à motu tigni ipsius, licet haudquaquam sensibili, causam petendam esse. Nempe pendulorum reciprocationes horologiis, quanto libet pondere gravatis, motum aliquem communicare; hunc vero motum, tigno ipsi impressum, necessario efficere ut si aliter quam contrariis ad unguem ictibus pendulum u-

G

trum-

trumque moveatur, eo tamen necessario tandem deveniant, ac tum demum tigni motum penitus interquiescere. Quæ tamen causa non satis efficacix haberet, nisi & horologiorum motus aliunde æquabilissimus foret atque inter se consensuens.


Cæterum experimentis in Oceani navigatione habitis, ac præsertim procella vehementiore aquas agitante, compertum fuit primam ac præcipuam curam de motu horologiorum absque interruptione conservando habendam esse, quod jactationem navis tantam ægrè tunc perferre illa animadversum sit. Quamobrem nova denique ratione & penduli formam immutavimus, & aliter horologia ipsa suspendimus. Pendulum trianguli formam habet, in cujus vertice deorsum spectante plumbea lens affixa est. Anguli utrique reliqui filis inter laminas cycloides suspensi sunt. Basis clavulam bifurcatam puncto sui medio recipit ab eaque movetur, illa vero ab rota ferrata horizonti parallela motum accipit. Motus rotarum omnium non à pondere sed à chalybea lamina, tympano inclusa, principium habet. In figura adjecta pendulum triangulare est A B C; lens plumbea B; laminæ cycloides E D, F G. Clavula bifurcata H K; rota ferratis dentibus N, quæ cæteris horologii rotis inferior est. Lenticulæ ad temperandum penduli motum L L.

TAB. IV.
Fig. 1.TAB. IV.
Fig. 2.

Suspensionis modum altera hæc figura exhibet; ubi theca A B axibus primum duobus, quorum alter C tantum apparet, rectangulo ferreo D E inserta est; quod deinde rectangulum rursus axibus suis F G ferreo gnomone F H K G sustinetur, qui contignationi navis immobiliter affixus est. in ima theca pondus 50 librarum appensum est. Quibus ita se habentibus, quacunque navis inclinatione perpendicularem positum servat horologium. Axis autem C, cum sibi opposito, ita collocati sunt, ut ad rectam lineam respondeant punctis suspensionum penduli ejus quod diximus: quo fit ut motus ipsius oscillatorius machinam nequaquam commovere possit, quo nihil est alioqui quod magis penduli motum destruat. Porro axium C C, & F G crassitudo, quæ pollicem

cem æquat, gravitasque plumbi inferius appensi, nimiam DESCRIP-
TIO HO-
ROLOGII, movendi libertatem horologio adimunt, faciuntque ut si forte succussu navis graviore commotum fuerit, continuo ad quietem perpendiculumque suum revertatur.

Et hæc quidem ita adaptata machina ut in mare deducatur experientiaque committatur superest, quæ & certam pene successus spem præbet, quod iis quæ hæcenus instituere licuit experimentis, multo melius quam priores illæ omnem motus diversitatem perferre reperta sit.



HOROLOGII OSCILLATORII

PARS SECUNDA.

De descensu Gravium & motu eorum in Cycloide.

HYPOTHESES.

I.

SI gravitas non esset, neque aër motui corporum officeret, unumquodque eorum, acceptum semel motum continuaturum velocitate æquabili, secundum lineam rectam.

II.

Nunc vero fieri gravitatis actione, undecunque illa oriatur, ut moveantur motu composito, ex æquabili quem habent in hanc vel illam partem, & ex motu deorsum à gravitate profecto.

III.

Et horum utrumque seorsim considerari posse, neque alterum ab altero impediri.

DE DE-
SCENSU
GRAVIUM.
TAB. IV.
Fig. 3.




Ponatur grave C è quiete dimissum, certo tempore, quod dicatur F, vi gravitatis transire spatium C B: Ac rursus intelligatur idem grave accepisse alicunde motum quo, si nulla esset gravitas, transiret pari tempore F motu æquabili lineam rectam C D. Accedente ergo vi gravitatis non perveniet grave ex C in D, dicto tempore F, sed ad punctum aliquod E, recta sub D. situm, ita ut spatium D E semper æquetur spatio C B, ita enim, & motus æquabilis, & is qui à gravitate oritur suas partes peragent, altero alterum non impediante. Quamnam vero lineam, composito illo motu, grave percurrat, cum motus æquabilis non recta sursum aut deorsum sed in obliquum tendit, è sequentibus definiri poterit. Cum vero deorsum in perpendiculari contingit motus æquabilis C D, apparet lineam C D, accedente motu ex gravitate, augeri recta D E. Item, cum sursum tendit motus æquabilis C D, ipsam C D diminui recta D E, ut nempe, peracto tempore F, grave inveniatur semper in puncto E. Quod si, utroque hoc casu, seorsim, uti diximus, duos motus consideremus, alterumque ab altero nullo modo impediri cogitemus, hinc jam accelerationis gravium cadentium causam legesque reperire licebit. Et primum quidem duo ista simul ostendemus.


P R O P O S I T I O I.

Æ Qualibus temporibus æquales celeritatis partes gravi cadenti accrescere, & spatia æqualibus temporibus ab initio descensus emensa, augeri continue æquali excessu.

TAB. V.
Fig. 1.

Ponatur grave aliquod, ex quiete in A, primo tempore lapsum esse per spatium A B, atque ubi pervenit in B, acquisivisse celeritatem qua deinceps, tempore secundo, motu æquabili, percurrere posset spatium quoddam B D. Scimus ergo spatium secundo tempore peragendum majus fore spatio B D, quia vel cessante in B. omni gravitatis actione
spa-





spatium B D percurreretur. Feretur vero motu composito DE DE-
SCENSU
GRAVITIS ex æquabili quo percursum esset spatium B D, & ex motu gravium cadentium, quo deprimi necesse est per spatium ipsi A B æquale. Quare ad B D addita D E, æquali A B, scimus tempore secundo grave perventurum ad E.

Quod si vero inquiramus quam velocitatem habeat in E, in fine secundi temporis, eam inveniemus duplam esse debere velocitatis quam habebat in B fine temporis primi. Diximus enim moveri composito motu ex æquabili cum celeritate acquisita in B, & ex motu à gravitate producto, qui cum tempore secundo idem plane sit ac primo, ideo decursu temporis secundi æqualem celeritatem gravi contulisse debet atque in fine primi. Quare cum acquisitam in fine primi temporis celeritatem conservaverit integram, apparet in fine secundi temporis bis eam celeritatem inesse quam acquisiverat in fine temporis primi, sive duplam.

Quod si jam, postquam pervenit in E, pergeret deinceps tantum moveri celeritate æquabili, quantam illic acquisivit, apparet tempore tertio, prioribus æquali, percursum spatium E F, quod duplum futurum sit spatii B D, quia hoc percurri diximus dimidia hujus celeritatis, motu æquabili, & temporis parte æquali. Accedente autem rursus gravitatis actione, percurreret tempore tertio, præter spatium E F, etiam spatium F G, ipsi A B vel D E æquale. Itaque in fine tertii temporis grave invenietur in G. Velocitatem vero hîc habebit triplam jam ejus quam habebat in B, in fine primi temporis: quia præter celeritatem acquisitam in E, quam diximus duplam esse acquisitæ in B, vis gravitatis, temporis tertii decursu, æqualem rursus atque in fine primi celeritatem contulit. Quamobrem utraque celeritas, in fine temporis tertii, triplam celeritatem constituet ejus quæ fuerat in fine temporis primi.

Eodem modo ostendetur tempore quarto peragi debere & spatium G H triplum spatii B D, & spatium H K ipsi A B æquale: velocitatemque in K, in fine quarti temporis, fore quadruplam ejus quæ fuerat in B, in fine temporis primi.

G. 3.

At--

Atque ita spatia quotlibet deinceps considerata, quæ æqualibus temporibus peracta fuerint, æquali excessu, qui ipsi $B D$ æqualis sit, crescere manifestum est; simulque etiam velocitates per æqualia tempora æqualiter augeri.

P R O P O S I T I O II.

Spatium peractum certo tempore à gravi, è quiete casum inchoante, dimidium est ejus spatii quod pari tempore transiret motu æquabili, cum velocitate quam acquisivit ultimo casus momento.

TAB. V.
Fig. I.

Ponantur quæ in propositione præcedenti, ubi quidem $A B$ erat spatium certo tempore, à gravi cadente ex A , peractum. $B D$ vero spatium quod pari tempore transiri intelligebatur celeritate æquabili, quanta acquisita erat in fine primi temporis, seu in fine spatii $A B$. Dico itaque spatium $B D$ duplum esse ad $A B$.

Quum enim spatia primis quatuor æqualibus temporibus à cadente transmissa sint $A B$, $B E$, $E G$, $G H$, quorum inter se certa quædam est proportio: si eorum temporum dupla tempora sumamus, ut nempe pro primo tempore jam accipiantur duo illa quibus spatia $A B$, $B E$, peracta fuere; pro secundo vero tempore duo reliqua quibus peracta fuere spatia $E G$, $G K$, oportet jam spatia $A E$, $E K$, quæ sunt æqualibus temporibus à quiete peracta, inter se esse sicut spatia $A B$, $B E$, quæ æqualibus item temporibus à quiete percurrerantur.

Quum igitur sit ut $A B$ ad $B E$, ita $A E$ ad $E K$; & convertendo, ut $E B$ sive $D A$ ad $A B$ ita $K E$ ad $E A$: erit quoque, dividendo, $D B$ ad $B A$ ut excessus $K E$ supra $E A$ ad $E A$. Quum sit autem, ex ostensis propositione præcedenti, $K E$ æqualis tum duplæ $A B$, tum quintuplæ $B D$: $E A$ vero æqualis tum duplæ $A B$, tum simplici $B D$; apparet dictum excessum $K E$ supra $E A$ æquari quadruplæ $B D$.

B D. Sicut igitur D B ad B A ita erit quadrupla D B ad E A: unde E A quadrupla erit ipsius B A: eadem vero E A æquatur, uti diximus, & duplæ A B & simplici B D. ergo B D duplæ A B æqualis erit; quod erat demonstrandum.

DE DE
SCENSU
GRAVIUM.

PROPOSITIO III.

Spatia duo, à gravi cadente quibuscumque temporibus transmissa, quorum utrumque ab initio descensus accipiat, sunt inter se in ratione duplicata eorundem temporum, sive ut temporum quadrata, sive etiam ut quadrata celeritatum in fine cuiusque temporis acquisitarum.

Quum enim ostensum sit propositione antecedenti spatia A B, B E, E G, G K, quotcumque fuerint, æqualibus temporibus à cadente, peracta, crescere æquali excessu, qui excessus sit ipsi B D æqualis: Patet nunc, quoniam B D est dupla A B, spatium B E fore triplum A B; E G quintuplum ejusdem A B; G K septuplum; aliaque deinceps auctum iri secundum progressionem numerorum imparium ab unitate, 1, 3, 5, 7, 9, &c. cumque quotlibet horum numerorum, sese consequentium, summa faciat quadratum, cujus latus est ipsa adsumptorum numerorum multitudo (velut si tres primi addantur, facient novem, si quatuor sexdecim) sequitur hinc spatia, à gravi cadente transmissa, quorum utrumque à principio casus inchoetur, esse inter se in ratione duplicata temporum quibus casus duravit, si nempe tempora commensurabilia sumantur.

TAB. VI
Fig. 1.

Facile autem & ad tempora incommensurabilia demonstratio extendetur. Sint enim tempora hujusmodi, quorum inter se ratio ea quæ linearum A B, C D. spatiaque temporibus his transmissa sint E, & F, utraque nimirum ab initio descensus adsumpta. Dico esse, ut quadratum A B ad quadratum C D, ita spatium E ad F,

TAB. VI
Fig. 2.

Si

DE DE-
SCENSU
GRAVIUM.

Si enim negetur; habeat primo, si potest, spatium E ad F majorem rationem quam quadratum $A B$ ad quadratum $C D$, nempe eam quam quadratum $A B$ ad quadratum $C G$, sumpta $C G$ minore quam $C D$, & à $C D$ auferatur pars $D H$, minor quam $D G$ excessus $C D$ supra $C G$, atque ita ut reliqua $H C$ commensurabilis sit ipsi $A B$; hoc enim fieri posse constat. Erit ergo $C H$ major quam $C G$. Atqui ut quadratum temporis $A B$ ad quadratum temporis $C H$, ita spatium E , quod tempore $A B$ peractum est, ad spatium peractum tempore $C H$, per superius ostensa. Hoc vero spatium majus est illud quod tempore $C D$ percurritur, nempe spatium F . ergo spatii E ad spatium F minor est ratio quam quadrati $A B$ ad quadratum $C H$. Sicut autem spatium E ad F , ita ponebatur esse quadratum $A B$ ad quadratum $C G$; ergo minor quoque erit ratio quadrati $A B$ ad quadratum $C G$, quam quadrati $A B$ ad quadratum $C H$, ac proinde quadratum $C G$ majus quadrato $C H$; quod est absurdum, quum $C H$ major dicta sit quam $C G$. Non habet igitur spatium E ad F majorem rationem quam quadratum $A B$ ad quadratum $C D$.

Habeat jam, si potest, minorem; sitque ratio spatii E ad F eadem quæ quadrati $A B$ ad quadratum $C L$, sumptâ $C L$ majore quam $C D$, & à $C L$ auferatur $L K$ minor excessu $L D$, quo $C D$ superatur à $C L$, atque ita ut reliqua $K C$ sit commensurabilis $A B$. Quia ergo ut quadratum temporis $A B$ ad quadratum temporis $C K$, ita est spatium E , peractum tempore $A B$, ad spatium peractum tempore $C K$. Hoc vero spatium minus est spatium peractum tempore $C D$, nempe spatium F . erit proinde spatii E ad F major ratio quam quadrati $A B$ ad quadratum $C K$. Sicut autem spatium E ad F , ita ponebatur esse quadratum $A B$ ad quadratum $C L$. Ergo major erit ratio quadrati $A B$ ad quadratum $C L$ quam ejusdem quadrati $A B$ ad quadratum $C K$, ideoque quadratum $C L$ minus erit quam $C K$. quod est absurdum, quum $C L$ major sit quam $C K$. Ergo neque minorem rationem habet spatium E ad F quam qua-

quadratum $A B$ ad quadratum $C D$. quare necesse est ut eandem habeat. Porro cum celeritates in fine temporum $A B$, $C D$ acquisitæ sint inter se sicut ipsamet tempora ; apparet rationem spatiorum E ad F eandem quoque esse quæ quadratorum temporum $A B$, $C D$, quibus transmissa sunt. Itaque constat propositum.

P R O P O S I T I O I V .

*S*I grave celeritate ea quam in fine descensus acquisivit sursum tendere cœperit, fiet ut paribus temporis partibus, spatia quæ prius sursum, eadem deorsum transeat, adeoque ad eandem unde descenderat altitudinem ascendat. Item ut æqualibus temporis partibus æqualia amittat celeritatis momenta.

Sunto enim ut in propositione 2, spatia quotlibet, æqualibus temporis partibus cadendo è quiete peracta, quorum primum $A B$; secundum compositum ex $B D$, quod celeritate æquabili acquisita per $A B$ transeundum erat, & ex $D E$ ipsi $A B$ æquali; tertium compositum, ex $E F$, duplo ipsius $B D$, & ex $F G$, eidem $A B$ æquali; quartum compositum ex $G H$, triplo ipsius $B D$, & ex $H K$ ipsi itidem $A B$ æquali, atque eadem ratione porro crescentia, si plura fuerint. Dico totidem æqualibus temporibus eadem spatia $K G$, $G E$, $E B$, $B A$, singula singulis peragenda esse à gravi sursum tendente, atque incipiente cum celeritate in fine descensus K acquisita.

Brevitatis autem gratia celeritas quæque designetur deinceps longitudine spatii quod grave motu æquabili, cum celeritate illa, atque temporis parte una, quales in descensu consideravimus, transmissurum esset.

Itaque ex ostensis dicta propositione, cum in K grave pervenerit, habet celeritatem $G H$ auctam celeritate $B D$,
H
hoc

TAB. V.
Fig. 1.

hoc est celeritatem $K F$, quia $K F$ æquatur ipsis $H G$, $B D$, sunt enim partes singulæ $H K$, $F G$, æquales ipsi $A B$, ac proinde utraque simul ipsi $B D$, quam esse duplam $A B$ ostendimus propositione 2. Itaque celeritatem in fine descensus K acquisitam sursum convertendo, si grave æquabili motu ferretur, conficeret una temporis parte spatium $K F$. Atqui, gravitatis actione accedente, diminuetur ascensus $K F$ spatio $F G$ ipsi $A B$ æquali, ut patet ex dictis ad hypothesein initio sumptam. Ergo parte prima temporis ascendet grave tantum per $K G$, quo eodem spatio parte temporis novissima descenderat. Simul vero & celeritati tantum decessisse necesse est, quantum acquiritur temporis parte una deorsum cadendo, hoc est celeritatem $B D$. Itaque grave, ubi ad G ascenderit, habet celeritatem reliquam $H G$, cum initio ascensus habuerit celeritatem $H G$ una cum celeritate $B D$. Est autem ipsi $H G$ æqualis $G D$; quum æquetur ipsi $F E$ una cum $D B$, hoc est una cum dupla $A B$, hoc est una cum duabus $F G$ & $E D$; Ergo si ex G , cum celeritate æquabili, quantam illic habet, sursum pergeret, conficeret una parte temporis spatium $G D$. Accedente autem gravitatis actione, diminuetur ascensus iste spatio $D E$, ipsi $A B$ æquali. Ergo, hac secunda parte temporis, ascendet per spatium $G E$, quod simili temporis parte etiam cadendo transierat. Simul autem celeritati tantum decessisse denuo debet quantum temporis parte una ex casu acquiritur, nempe celeritas $B D$. Itaque ubi usque ad E ascenderit, habet duntaxat celeritatem $F E$, quæ nimirum relinquitur quum à celeritate $G D$ aufertur celeritas $B D$. Nam $B D$, ut jam diximus, æqualis est duabus $D E$, $F G$.

Est autem ipsi $F E$ æqualis $E A$, quum $F E$ æquetur ipsi $B D$ bis sumptæ, hoc est ipsi $B D$ una cum dupla $A B$, hoc est una cum duabus $A B$, $D E$. Ergo si ex E cum celeritate æquabili, quantam illic habet, sursum pergeret, confecturum esset una temporis parte spatium $E A$. Sed accedente actione gravitatis, diminuetur ascensus iste ipso spatio $A B$. Proinde hac parte temporis per spatium $E B$ tantum ascen-

ascendet, quod simili parte temporis descendendo quoque transierat. Hic vero rursus celeritati tantum decessisse necesse est quantum una temporis parte cadendo deorsum acquiritur, hoc est celeritatem $B D$. Itaque grave, ubi usque ad B ascenderit, habet celeritatem ipsam $B D$ reliquam, cum in E habuerit celeritatem $F E$ ipsius $B D$ duplam. Si ergo ex B cum celeritate æquabili, quantam illic habet, sursum pergeret, confecturum esset parte una temporis spatium æquale ipsi $D B$, hoc est duplum $A B$. Sed accedente gravitatis actione, diminuitur ascensus iste spatium quod ipsi $A B$ æquale sit. Igitur hac parte temporis ascendet tantummodo per spatium $B A$, quod etiam primo descensus tempore transierat. Atque in fine quidem extremi temporis hujus necessario grave in A puncto reperietur. Sed dicetur forsan altius ascendisse quam ad A , atque inde eo relapsum esse. At hoc absurdum esset, cum non possit, motu à gravitate profecto, altius quam unde decidit ascendere. Porro quum celeritati quam in B habebat rursus decesserit celeritas $B D$, patet jam gravi in A constituto nullam celeritatem superesse, ac proinde non altius excursurum. Itaque ostensum est ad eandem unde decidit altitudinem pervenisse, & singula spatia, quæ æqualibus descensus temporibus transmiserat, eadem totidem ascensus temporibus remensum esse: sed & æqualibus temporibus æqualia ipsi decessisse celeritatis momenta apparuit. Ergo constat propositum.

Quia vero in demonstratione propositionis secundæ, ex qua pendet præcedens, adsumptum fuit certam quandam esse proportionem spatiorum quæ continuis æqualibus temporibus à gravi cadente transeuntur, quæque eadem sit, quæcunque æqualia tempora accipiantur; quod quidem & ex rei natura ita se habere necesse est, & si negetur, fatendum frustra proportionem istorum spatiorum investigari. Tamen, quia propositum etiam absque hoc demonstrari potest, Galilei methodum sequendo, operæ pretium erit demonstrationem, ab illo minus perfecte traditam, hic accuratius conscribere. itaque rursus hic demonstrabimus.

P R O P O S I T I O V.

*Spatium peractum certo tempore, à gravi è quie-
te casum inchoante, dimidium esse ejus spatii
quod pari tempore transiret motu æquabili, cum
celeritate quam acquisivit ultimo casus momento.*

TAB. V.
Fig. 3.

Sit tempus descensus totius AH , quo tempore mobile peregerit spatium quoddam cujus quantitas designetur plano P . ductaque HL perpendiculari ad AH , longitudinis cujuslibet, referat illa celeritatem in fine casus acquisitam. Deinde completo rectangulo $AHLM$, intelligatur eo notari quantitas spatii quod percurreretur tempore AH , cum celeritate HL . Ostendendum est igitur planum P dimidium esse rectanguli MH , hoc est, ducta diagonali AL , æquale triangulo AHL .

Si planum P non est æquale triangulo AHL , ergo aut minus eo erit, aut majus. Sit primo, si fieri potest, planum P minus triangulo AHL . dividatur autem AH in tot partes æquales AC , CE , EG &c. ut, circumscriptâ triangulo AHL figurâ è rectangulis quorum altitudo singulis divisionum ipsius AH partibus æquetur, ut sunt rectangula BC , DE , FG , alterâque eidem triangulo inscriptâ, ex rectangulis ejusdem altitudinis, ut sunt KE , OG &c. ut, inquam, excessus illius figuræ supra hanc, minor sit excessu trianguli AHL supra planum P . hoc enim fieri posse perspicuum est, cum totus excessus figuræ circumscriptæ super inscriptam æquetur rectangulo infimo, basin habenti HL . Erit itaque omnino excessus ipsius trianguli AHL supra figuram inscriptam minor quam supra planum P , ac proinde figura triangulo inscripta major plano P . Porro autem, quum recta AH tempus totius descensus referat, ejus partes æquales AC , CE , EG , æquales temporis illius partes referent. Cumque celeritates mobilis cadentis crescant eadem proportionem qua tempora descensus*, sitque celeritas

* Prop. I.
huj.

in fine totius temporis acquisita HL ; erit ea, quæ in fine primæ partis temporis AC acquireretur, CK ; quia ut AH ad AC , ita HL ad CK . Similiter quæ in fine partis temporis secundæ CE acquiritur, erit EO , atque ita deinceps. Patet autem, tempore primo AC , spatium aliquod à mobili transmissum esse, quod majus sit nihilo; tempore vero secundo CE transmissum esse spatium quod majus sit quam KE , quia spatium KE transmissum fuisset tempore CE , motu æquabili, cum celeritate CK . habent enim spatia, motu æquabili transacta, rationem compositam ex ratione temporum, & ratione velocitatum, ideoque cum tempore AH , celeritate æquabili HL percurri posuerimus spatium MH , sequitur tempore CE , cum celeritate CK , percurri spatium KE , quum ratio rectanguli MH ad rectangulum KE componatur ex rationibus AH ad CE , & HL ad CK .

DE DE-
SCENSU
GRAVIUM.

Quum ergo, ut dixi, spatium KE sit illud quod transmitteretur tempore CE , cum celeritate æquabili CK , mobile autem feratur tempore CE motu accelerato, qui jam principio hujus temporis habet celeritatem CK ; manifestum est isto accelerato motu, tempore CE , majus spatium quam KE confecturum. Eadem ratione, tempore tertio EG , majus spatium conficiet quam OG , quia nempe hoc confecturum esset tempore eodem EG , cum celeritate æquabili EO . Atque ita deinceps, singulis temporis AH partibus, à mobili majora spatia quam sunt rectangula figuræ inscriptæ, ipsis partibus adjacentia, peragentur. Quare totum spatium motu accelerato peractum majus erit ipsa figura inscripta. Spatium vero illud æquale positum fuit plano P . Itaque figura inscripta minor erit spatio P . quod est absurdum; eodem enim spatio major ostensa fuit. Non est igitur planum P minus triangulo AHL . At neque majus esse ostendetur.

Sit enim, si potest; & dividatur AB in partes æquales, atque ad earum altitudinem, inscripta circumscriptaque rursus, ut ante, sit triangulo AHL figura ex rectangulis, ita ut altera alteram excedat minori excessu quam quo planum

H 3

P su-

DE DE-
SCENDU
GRAVIUM.

P superat triangulum A H L , erit igitur necessario figura circumscripta minor plano P. Constat jam , prima temporis parte A C , minus spatium à mobili transmitti quam sit B C , quia hoc percurreretur eodem tempore A C cum celeritate æquabili C K , quam demum in fine temporis A C mobile adeptum est. Similiter secunda parte temporis C E , minus spatium motu accelerato transmittetur quam sit D E , quia hoc percurreretur eodem tempore C E , cum celeritate æquabili E O , quam demum in fine temporis C E mobile assequitur. Atque ita deinceps , singulis partibus temporis A H , minora spatia à mobili trajicientur quam sunt rectangula figuræ circumscriptæ , ipsis partibus adjacentia. Quare totum spatium motu accelerato peractum , minus erit ipsa figura circumscripta. Spatium vero illud æquale positum fuit plano P ; ergo planum P minus quoque erit figura circumscripta. quod est absurdum , cum figura hæc plano P minor ostensa fuerit. Ergo planum P non majus est triangulo A H L , sed nec minus esse jam ostensum fuit. Ergo æquale sit necesse est ; quod erat demonstrandum.

Et hæc quidem omnia quæ hætenus demonstrata sunt , gravibus per plana inclinata descendentibus atque ascendentibus æque ac perpendiculariter motis convenire sciendum est : cum , quæ de effectu gravitatis posita fuerunt , eadem ratione utrobique sint admittenda.

Hinc vero non difficile jam erit demonstrare propositionem sequentem quam concedi sibi , ut quodammodo per se manifestam , Galileus postulavit. nam demonstratio illa quam postea adferre conatus est , quæque in posteriori operum ejus editione extat , parum firma meo quidem judicio videtur. Est autem propositio hujusmodi.

PROPOSITIO VI.

Celeritates gravium , super diversis planorum inclinationibus descendendo acquisitæ , æquales sunt , si planorum elevationes fuerint æquales.

Ele-

Elevationem plani vocamus altitudinem ejus secundum perpendicularum.

Sunto itaque plana inclinata, quorum sectiones factæ plano ad horizontem erecto, AB , CB ; quorumque elevationes AE , CD sint æquales; & cadat grave ex A per planum AB , & rursus ex C per planum CB . dico utroque casu eundem gradum velocitatis in puncto B acquisiturum.

Si enim per CB cadens minorem velocitatem acquirere dicatur quam cadens per AB , habeat ergo, per CB cadens, eam duntaxat quam per FB acquireret, posita nimirum FB minore quam AB . Acquiret autem per CB cadens eam velocitatem qua rursus per totam BC possit ascendere*. Ergo & per FB acquiret eam velocitatem qua possit ascendere per totam BC . Ideoque cadens ex F in B , si ^{* Prop. 4. huj.} continuet porro motum per BC ; quod percussu ad superficiem obliquam fieri potest; ascendet usque in C , hoc est, altius quam unde decedit, quod est absurdum.

Eodem modo ostendetur neque per planum AB decedenti minorem velocitatem acquiri quam per CB . Ergo per utraque plana eadem velocitas acquiritur, quod erat demonstrandum.

Quod si verò, pro plano alterutro, sumatur perpendicularum ipsum planorum elevationi æquale, per quod decidere mobile ponatur, sic quoque eandem quam per plana inclinata velocitatem ei acquiri constat; eadem namque est demonstratio.

Porro hinc jam recte quoque procedet demonstratio alterius theorematis Galileani, cui reliqua omnia, quæ de descensu super planis inclinatis tradidit, superstruuntur. Nempe

PROPOSITIO VII.

Tempora descensuum super planis diversimode inclinatis, sed quorum eadem est elevatio, esse inter se ut planorum longitudines.

Sint

DE DE-
SCENSU
GRAVIUM.
TAB. V.
Fig. 5.

* Prop. 2.
huj:

* Prop.
preced.

Sint plana inclinata AC , AD quorum eadem elevatio AB . dico tempus descensus per planum AC ad tempus descensus per AD esse ut longitudo AC ad AD . Est enim tempus per AC æquale tempori motus æquabilis per eandem AC , cum celeritate dimidia ejus quæ acquiritur casu per AC *. Similiter tempus per AD est æquale tempori motus æquabilis per ipsam AD , cum dimidia celeritate ejus quæ acquiritur casu per AD . Est autem hæc dimidia celeritas illi dimidiæ celeritati æqualis *, ideoque dictum tempus motus æquabilis per AC , ad tempus motus æquabilis per AD , erit ut AC ad AD . Ergo & tempora singulis istis æqualia, nimirum tempus descensus per AC , ad tempus descensus per AD , eandem rationem habebunt, nempe quam AC ad AD . quod erat demonstrandum.

Eodem modo ostendetur & tempus descensus per AC , ad tempus casus per AB perpendicularem, esse ut AC ad AB longitudine.

P R O P O S I T I O VIII.

SI ex altitudine eadem descendat mobile continuo motu per quotlibet ac quælibet plana contigua, utcunque inclinata; semper eandem in fine velocitatem acquirat, quæ nimirum æqualis erit ei quam acquireret cadendo perpendiculariter ex pari altitudine.

TAB. VI.
Fig. 1.

Sint plana contigua AB , BC , CD , quorum terminus A , supra horizontalem lineam DF per infimum terminum D ductam, altitudinem habeat quanta est perpendicularis EF . descendatque mobile per plana illa ab A usque in D . Dico in D eam velocitatem habiturum quam, ex E cadens, haberet in F .

Producta enim CB occurrat rectæ AE in G . Itemque DC producta occurrat eidem AE in E . Quoniam itaque
per

Fig. 1.




Fig. 2.





Fig. 3.



P




Fig. 4.





Fig. 5.



per A B descendens eandem acquirit velocitatem in termino B, atque descendens per G B *; manifestum est, cum flexus ad B nihil obstare motui ponatur, tantam velocitatem bahiturum ubi in C pervenerit, quantam si per G C planum descendisset; hoc est, quantam haberet ex descensu per E C. Quare & reliquum planum C D eodem modo transibit ac si per E C advenisset, ac proinde in D denique parem velocitatem habebit, ac si descendisset per planum E D, hoc est, eandem quam ex casu perpendiculari per E F. quod erat demonstrandum.

DE DE-
SCENSU
GRAVIUM.
* Prop. 6.
huj.

Hinc liquet etiam per circuli circumferentiam, vel per curvam quamlibet lineam descendente mobili (nam curvas tanquam ex infinitis rectis compositæ essent hic considerare licet) semper eandem illi velocitatem acquiri si ab æquali altitudine descenderit: tantamque eam esse velocitatem, quantam casu perpendiculari ex eadem altitudine adipisceretur.

PROPOSITIO IX.

SI grave, à descensu, sursum convertat motum suum, ascendet ad eandem unde venit altitudinem, per quascunque planas superficies contiguas, & quomodocunque inclinatas, incesse-rit.

Cadat grave ex altitudine A B, & ex puncto B inclinata TAB. VI.
sint sursum plana B C, C D, D E, quorum extremitas E Fig. 2.
sit eadem altitudine cum puncto A. Dico si mobile, post casum per A B, convertat motum ut pergat moveri per dicta plana inclinata, perventurum usque in E.

Dicatur enim, si fieri potest, tantum ad G perventurum. Producantur B C & C D, donec occurrant horizontali G F in F & H. Cum igitur mobile, superatis planis B C, C D, habeat tantum eam velocitatem quâ possit ascendere per D G, vel per D H; nam ad hæc utraque eadem velocitate opus esse constat ex propositione 6; Ergo, superato plano B C, eam duntaxat habebat qua potuisset ascendere per C H,

I

vel

DE DE-
SCENSU
GRAVIUM.

vel per C F. Ergo in B duntaxat eam qua potuisset ascendere per B F, hoc est, eandem quam acquireret descendendo per F B. Atqui in B habet velocitatem qua potest ascendere usque in A. Ergo illa velocitate quam acquirit grave descendendo per F B, posset ascendere per B A, hoc est, altius quam unde discesserat, quod fieri non potest.

Est autem eadem prorsus demonstratio quotcunque plana fuerint per quæ mobile ascendat. Unde & si infinita fuerit planorum multitudo, hoc est, si superficies aliqua curva ponatur, per hanc quoque ad eam ex qua venit altitudinem mobile assurgit.

PROPOSITIO X.

SI mobile cadat perpendiculariter, vel per quamlibet superficiem descendat, ac rursus impetu concepto per quamlibet aliam feratur sursum, habebit ascendendo ac descendendo in punctis æque altis eandem semper velocitatem.

TAB. IV.
Fig. 3.

Ut si mobile ex altitudine A B decidens, motum deinde continuet per superficiem B C D, in qua punctum C sit pari altitudine atque in A B est punctum E. Dico in C eandem velocitatem inesse mobili atque in E fuerat.

* Prop.
preced.

* Prop.
preced.

Quum enim in C ea velocitas supersit mobili qua porro ascendat usque ad D punctum, æque altum ac A*: cumque & ex descensu per A E velocitatem eam acquirat qua, converso motu, ascensurum sit per C D*; Patet cum pervenit ad C ascendendo, eandem ipsum habere velocitatem, quam habebat in E descendendo; quod erat demonstrandum.

PROPOSITIO XI.

SI mobile per superficiem aliquam deorsum tendat, ac deinde converso motu sursum per eandem

dem superficiem vel aliam similem similiterque positam feratur, æqualibus temporibus per idem spatium descendet atque ascendet.

DE DESCENSU GRAVIUM.

Velut si per superficiem $A B$ descendat mobile, atque, ubi ad B pervenerit, converso motu fursum per eandem $A B$, vel ei similem & respectu plani horizontalis similiter positam $B C$, ascendat, constat ex ante demonstratis, perventurum ad eandem ex qua venit altitudinem. Cum autem perpetuo, in punctis quorum eadem altitudo, eandem velocitatem habeat ascendendo ac descendendo *; apparet eandem lineam bis eadem velocitate singulis sui partibus percurri: unde & tempora utriusque motus æqualia esse necesse est; quod erat demonstrandum.

TAB. VI.
Fig. 4.

* Prop. præced.

PROPOSITIO XII.

ESto circulus $A B C$, diametro $A C$, cui ad angulos rectos sit $F G$; huic vero occurrat à termino diametri A educta $A F$ extra circulum, quæ quidem necessario secabit circumferentiam, puta in B . Dico arcum $B D$, lineis $G F$, $A F$ interceptum, minorem esse recta $D F$.

TAB. VI.
Fig. 5.

Jungatur enim $B C$, & ducatur ex B puncto tangens circumferentiam recta $B E$, quæ necessario occurret rectæ $F G$ inter F & D . Est igitur angulus $B A C$ in circulo æqualis angulo $E B C$ *. quare & angulus $F B E$, qui una cum $E B C$ constituit angulum rectum $F B C$, erit æqualis $B C A$. Quia autem similia sunt triangula $A B C$, $A G F$, erit & angulus F æqualis angulo $A C B$. Ergo idem angulus F æqualis angulo $F B E$. Itaque isosceles est triangulus $F E B$, habens crura æqualia $F E$, $E B$. Addita ergo utrique eorum recta $E D$, fiet $F D$, æqualis duabus $B E$, $E D$. Hæc vero duas majores esse constat arcu $B D$, iisdem termi-

* Prop. 32.
Lib. 3. Eucl.

DE DE-
SCENSU
GRAVIVM.

nis intercepto, & in eandem partem cavo. Ergo & F D eodem arcu B D major erit: quare constat propositum.

PROPOSITIO XIII.

TAB. VI.
Fig. 6.

Isdem positis, si recta A B occurrat ipsi D G intra circulum; Dico arcum B D, rectis G D, A B interceptum, majorem esse recta D F.

Jungatur enim D C & ducatur arcui D B subtensa D B. Quoniam ergo angulus A B D æqualis A C D, hoc est, angulo A D G; angulus autem D F B major angulo A D F, five A D G; erit idem D F B etiam major D B F. Ergo in triangulo D F B latus D B majus latere D F; unde multo magis arcus D B superabit eandem D F. Quare constat propositum.







PROPOSITIO XIV.

TAB. VII.
Fig. 1.

Sit cyclois A B C cujus basis A C axis B D. Quomodo autem generetur ex definitione & descriptione mechanica superius traditis satis manifestum arbitror. Et circa axem B D, circulus descriptus sit B G D, & à quolibet puncto E in cycloide sumpto agatur E F basi A C parallela, quæ occurrat axi B D in F, secetque circumferentiam B G D in G, Dico rectam G E arcui G B æqualem esse.

Describatur enim per E punctum circulus L E K ipsi B G D æqualis, quique tangat basin cycloidis in K, & ducatur diameter K L. Est igitur recta A K arcui E K æqualis; sed tota A D æqualis semicircumferentiæ K E L; ergo K D æqualis arcui E L five G B. Est autem K D five N F æqualis E G, quoniam E N æqualis G F, & communis utrique N G. Ergo constat & G E æqualem esse arcui G B.

PRO-



PROPOSITIO XV.

DE DE-
SCENSU
GRAVIUM.

Dato in Cycloide puncto, rectam per illud ducere quæ Cycloidem tangat.

Sit cyclois A B C, & punctum in ea datum B, per quod tangentem ducere oporteat. TAB. VII.
Fig. 2.

Circa axem cycloidis A D describatur circulus genitor A E D, & ducatur B E parallela basi cycloidis, quæ dicto circulo occurrat in E, & jungatur A E, cui denique parallela per B agatur H B N. Dico hanc cycloidem in B contingere.

Sumatur enim in ea punctum quodlibet, à B diversum, ac primo versus superiora velut H, & per H ducantur recta basi cycloidis parallela, quæ occurrat cycloidi in L, circulo A E D in K, rectæ A E in M. Quia ergo K L est æqualis arcui K A, recta autem K M minor arcu K E, erit recta M L minor arcu A E, hoc est, rectâ E B, sive M H; unde apparet punctum H esse extra cycloidem.

Deinde in recta H N sumatur punctum N inferius B, & per N agatur, ut ante, basi parallela, quæ occurrat cycloidi in Q, circulo A E D in O, rectæ A E productæ in P. Quia ergo O Q, æqualis est arcui O A; O P autem major arcu O E; erit P Q minor arcu E A, hoc est, rectâ E B, sive P N. Unde apparet rursus punctum N esse extra cycloidem. Cum igitur quodlibet punctum præter B, in recta H B N sumptum, sit extra cycloidem, constat illam in puncto B cycloidem contingere; quod erat demonstrandum.

Huic demonstrationi an locum suum hic relinquerem dubitavi, quod non multum ei absimilem à clarissimo Wrennio editam inveniam in libro Wallisii de Cycloide. Potest autem & universali constructione propositum absolvi, quæ non cycloidi tantum sed & aliis curvis, ex cujuslibet figuræ circumvolutione genitis, conveniat; dummodo sit figura in eandem partem cava, & ex iis quæ geometricæ vocantur.

Sit enim curva N A B, orta ex circumvolutione figuræ TAB. VII.
Fig. 3.

I 3

O L

O L super regula L D; describente nempe puncto N, in circumferentia figuræ O L sumpto. Et oporteat ad punctum curvæ A tangentem ducere. Ducatur recta C A à puncto C, ubi figura regulam tangebatur cum punctum describens esset in A: quod punctum contactus semper inveniri potest, siquidem eo reducitur problema ut duæ rectæ inter se parallelæ ducendæ sint, quarum altera transeat per punctum describens in figuræ ambitu datum, altera figuram tangat, quæque inter se distent quantum distat punctum datum A ab regula L D: dico ipsam C A occurrere curvæ ad angulos rectos, sive circumferentiam M A F descriptam centro C radio C A, tangere curvam in puncto A, unde perpendicularis ad A C, per punctum A, ducta curvam ibidem continget.

Ducatur enim C B primum ad punctum curvæ B, quod distet ultra punctum A ab regula L D, intelligaturque figuræ positus in B E D, cum punctum describens esset in B, contactus regulæ in D. & punctum curvæ quod erat in C, cum punctum describens esset in A, hîc jam sublatum sit in E; & jungantur E C, E B, tangatque figuram in E recta K H, occurrens regulæ in H.

Quia ergo recta C D æqualis est curvæ E D; eadem vero curva major est utraque simul E H, H D; erit E H major quam C H. Unde angulus E C H major quam C E H, & proinde E C L minor quam C E K. Atqui addendo angulum K E B, qui æqualis est L C A, ad K E C, fit angulus C E B: & auferendo ab E C L angulum L C B, fit E C B. Ergo angulus C E B major omnino angulo E C B. Itaque in triangulo C E B, latus C B majus erit quam E B. sed E B æquale patet esse C A, cum sit idemmet ipsum unâ cum figura transpositum. Ergo C B etiam major quam C A, hoc est, quam C F. unde constat punctum B esse extra circumferentiam M A F.

Sit rursus punctum N in curva sumptum inter regulam L D & punctum A. Cumque punctum describens esset in N, ponatur situs figuræ fuisse in V L, punctumque contactus L, punctum verò quod tangebatur prius regulam in C, sit jam subla-

sublatum in V : & jungantur CN , NV , VC , VL . E-
 rit ergo VN æqualis CA ; imo erit ipsa CA translata in VN . Jam quia recta LC æquatur curvæ LV , ac proin-
 de major est recta LV , erit in triangulo CLV angulus
 LVN major quam LCV . Quare addito insuper angulo
 LVN ad LCV , fiet totus NVC major utique quam
 LCV , ac proinde omnino major angulo NVC , qui pars
 est LCV . Ergo in triangulo CVN latus CN majus erit
 latere VN , cui æquatur CA , ideoque CN major quo-
 que quam CA , hoc est quam CM . Unde apparet pun-
 ctum N cadere extra circulum MAF , qui proinde tanget
 curvam in puncto A . quod erat demonstrandum.

DE DE-
 SCENSU
 GRAVIUM.

Est autem eadem quoque tum constructio tum demonstra-
 tio, si curva genita sit à puncto describente, vel intra vel
 extra ambitum figuræ circumvolutæ sumpto. Nisi quod,
 hoc posteriori casu, pars quædam curvæ infra regulam de-
 scendit, unde nonnulla in demonstratione oritur diversitas.

Sit enim punctum A , per quod tangens ducenda est, da-
 tum in parte curvæ NAB , quæ infra regulam CL de-
 scendit, descripta nimirum à puncto N extra figuram revo-
 lutam sumpto, sed certam positionem in eodem ipsius pla-
 no habente. Invento igitur puncto C , ubi figura revoluta
 tangit regulam CD quum punctum describens esset in A ,
 ducatur recta CA . Dico hanc curvæ NAB occurrere ad
 rectos angulos, sive circumferentiam radio CA centro C
 descriptam tangere curvam NAB in puncto A . Ostendetur
 autem exterius ipsam contingere, cum in curvæ parte supra
 regulam CD posita interius contingat.

TAB. VIII.
 Fig. 1.

Positis enim & descriptis iisdem omnibus quæ prius, os-
 tenditur rursus angulus ECH major quam CEH . atqui
 ad ECH addito HCB fit angulus ECB , & à CEH
 auferendo HEB , qui æqualis est DCA , fit angulus
 CEB . Ergo ECB major omnino quam CEB . unde in
 triangulo ECB latus EB majus quam CB . sed ipsi EB
 æqualis est CA , sive CF . Ergo & CF major quam CB :
 ideoque punctum circumferentiæ F est ultra curvam NAB
 à centro remotum.

Item

DE DE-
SCENSU
GRAVIUM.

Item rursus ostenditur angulus LVC major LCV . Quare $CV P$, qui cum LVC duos rectos æquat, minor erit quam VCD . Atqui addendo ad VCD angulum DCN , fit VCN ; & auferendo ab $CV P$ angulum PVN , fit CVN . Ergo angulus VCN omnino major quam CVN . In triangulo itaque CVN , latus VN majus erit quam CN . Est autem ipsi VN æqualis CA sive CM . Ergo & CM major quam CN , ideoque punctum circumferentiæ M erit ultra curvam NAB à centro C remotum. Itaque constat circumferentiam MAF tangere curvam in puncto A , quod erat demonstrandum.

Quod si punctum curvæ per quod tangens ducenda est, sit illud ipsum ubi regula curvam secat, erit tangens quæsitæ semper regulæ perpendicularis; ut facile esset ostendere.




PROPOSITIO XVI.

DE MOTU
IN CY-
CLOIDE.
TAB. VIII.
Fig. 2.

SI circuli circumferentiam, cujus centrum E , secant rectæ duæ parallelæ AF , BG , quarum utraque ad eandem partem centri transeat, vel altera AF per centrum ipsum: & à puncto A , quo centro propior circumferentiam secat, ducatur recta ipsam contingens: dico partem hujus AB , à parallela utraque interceptam, minorem esse arcu AC , ab utraque eadem parallela intercepto.

Ducatur enim arcui AC subtenfa recta AC . Quia ergo angulus BAF est æqualis ei quem capit portio circuli AHF , quæ vel major est semicirculo vel semicirculus, erit proinde angulus BAF , vel minor recto vel rectus; ideoque angulus ABC vel major recto vel rectus. Quare in triangulo ABC latus AC , angulo B subtenfum, majus erit latere AB . sed idem latus AC minus est arcu AC . Ergo omnino & AB arcu AC minor erit.

P R O-



PROPOSITIO XVII.

DE MOTU
IN CY-
CLOIDE.

Isdem positis, si tertia recta prioribus parallela TAB. VIII.
Fig. 3. IDK , circumsecuerit, quæ ab ea quæ centro propior est AF , tantundem distet quantum hæc à reliqua BG : dico partem tangentis in A , à parallela ultimo adjecta, & media interceptam, nempe AD , arcu AC à primis duabus parallelis intercepto minorem esse.

Hoc enim patet quum AD ipsi AB æqualis sit, quam antea ostendimus arcu AC minorem esse.

PROPOSITIO XVIII.

Si circum, cujus centrum E , duæ rectæ parallelæ secuerint AF , BG ; & à puncto B , ubi quæ à centro remotior est, vel tantundem atque altera distat, circumferentiæ occurrit, ducatur recta circumferentiam tangens: erit pars hujus BA , à parallelis intercepta, major arcu ab iisdem parallelis intercepto BC . TAB. VIII.
Fig. 4.

Ducatur enim in puncto C , recta MCL circumferentiam tangens, quæ occurrat tangenti BA in L . In triangulo igitur ACL , angulus C æqualis est angulo MCB , hoc est, ei quem capit portio circuli CBF . angulus autem A æquatur angulo quem capit portio circuli BCG , quæ portio quum sit major vel æqualis portioni CBF , quippe quum BG vel ulterius distet à centro quam CF , vel tantundem: erit proinde trianguli ACL angulus A minor vel æqualis angulo C : & consequenter latus CL vel minus vel æquale lateri AL . Atqui CL una cum LB majores sunt arcu CB . Ergo & AL una cum LB , hoc est, tan-

K gens

gens AB , eodem arcu CB major erit. quod erat demon-
strandum.

P R O P O S I T I O XIX.

TAB. VIII.
Fig. 5.

Idem positis, si tertia recta prioribus parallela
 DK circulum secet, quæ tantundem distet ab ea
quæ remotior est à centro quantum hæc à reliqua
 AF : Erit pars tangentis in B , à parallela me-
dia, & ultimo addita DK , intercepta, nimirum
 BD , major arcu BC .

Hoc enim manifestum est cum BD fiat ipsi BA æqualis,
quam ostendimus arcu BC majorem esse.

P R O P O S I T I O XX.

TAB. VIII.
Fig. 6.

Si arcus circuli, semicircumferentia minor, AB ,
in partes quotlibet secetur lineis rectis paralle-
lis, quæ & inter se, & cum rectis sibi parallelis
per terminos arcus ductis, æqualia intervalla con-
stituant, quales sunt CD , EF , GH , KL &c.
ducanturque ad terminum arcus alterutrum A , &
ad reliqua omnia sectionum puncta rectæ circumfe-
rentiam tangentes, omnes in eandem partem, &
ut unaquæque occurrat proximæ dictarum paralle-
larum; cujusmodi sunt tangentes AC , DE , FG ,
 HK &c. Dico has tangentes, dempta prima AC ,
simul sumptas, minores esse arcu proposito AB .
Easdem vero omnes, non omissa AC , majores esse
arcu AB diminuto parte extrema NB , hoc est,
majores arcu AN .

Ponamus enim primo per parallelarum aliquas transire ab u-
tra-

traque parte centri Z, & sit G H, earum quæ sunt à parte B, centro proxima, vel per ipsum centrum transeat. Itaque tangentes omnes inter G H & B O comprehensæ, ut H K, L M, N O, singulæ suis arcubus minores sunt *. Porro autem & tangens G F, arcu sequente F D minor est *, & similiter tangens E D arcu D A. Itaque tangentes omnes inter B O & C D interjectæ, minores sunt arcubus B H & F A, ac proinde omnino minores arcubus B H, H A, sive arcu B A, quod erat primo ostendendum.

DE MOTU
IN CY-
CLOIDE.

* Prop. 16.

huj.

* Prop. 17.

huj.

Porro jam demonstrabimus tangentes omnes inter B O & A majores esse arcu A N. Enimvero parallela G H, vel propius centrum Z transit quam parallela E F, quam pono proximam esse earum quæ à parte A transeunt, vel erit remotior, vel æque distabit.

Quod si E F longius à centro vel æque remota est ac G H, erit tangens F G major arcu suo F H, & reliquæ tangentes versus A, nimirum E D, C A majores singulæ arcubus suis *, adeo ut omnes simul G F, E D, C A majores sint arcu H A. sed & arcu H L major erit tangens L M *, & arcu L N tangens N O; itaque tangentes omnes, præter H K, majores simul erunt arcu A N; multoque magis, accedente ipsa H K, tangentes omnes inter A & B comprehensæ arcu eodem A N majores erunt.

* Prop. 18.

huj.

* Prop. 19.

huj.

Si vero G H à centro longius distat quam E F, erit tangens K H major arcu H F *, & tangens M L ut ante major arcu L H, & tangens O N major arcu N L, & omnes proinde tangentes O N, M L, K H majores arcu N F. Sed & tangens E D major est arcu suo F D *, & tangens C A major similiter arcu suo D A. Itaque tangentes omnes inter B O & A, præter G F, majores erunt arcu N A; multoque magis tangentes eadem, accedente G F, hoc est, omnes quæ inter B O & A interjiciuntur, eodem arcu N A majores erunt.

* Prop. 19.

huj.

* Prop. 18.

huj.

Ex his vero etiam demonstratio manifesta est in casibus aliis, qualiscunque semicircumferentiæ arcus accipiatur, quippe cum vel eadem sit ubique, vel pars tantum præcedentis demonstrationis.

P R O P O S I T I O XXI.

SI mobile descendat continuato motu per quælibet plana inclinata contigua, ac rursus ex pari altitudine descendat per plana totidem contigua, ita comparata ut singula altitudine respondeant singulis priorum planorum, sed majori quam illa sint inclinatione. Dico tempus descensus per minus inclinata, brevius esse tempore descensus per magis inclinata.

TAB. IX.
Fig. 1.







Sint series duæ planorum inter easdem parallelas horizontales comprehensæ $A B C D E$, $F G H K L$, atque ita ut bina quæque sibi correspondentia plana utriusque seriei iisdem parallelis horizontalibus includantur; unumquodque vero seriei $F G H K L$ magis inclinatum sit ad horizontem quam planum sibi altitudine respondens seriei $A B C D E$. Dico breviori tempore absolvi descensum per $A B C D E$, quam per $F G H K L$.

* Prop. 7.
huj.

Nam primo quidem tempus descensus per $A B$, brevius esse constat tempore descensus per $F G$, quum sit eadem ratio horum temporum quæ rectarum $A B$ ad $F G$ *, sitque $A B$ minor quam $F G$, propter minorem inclinationem. Producantur jam fursum rectæ $C B$, $H G$, occurrantque horizontali $A F$ in M & N . Itaque tempus per $B C$ post $A B$, æquale est tempori per eandem $B C$ post $M B$, cum in puncto B eadem celeritas contingat, sive per $A B$, sive per $M B$ descendenti *. similiterque tempus per $G H$ post $F G$, æquale erit tempori per eandem $G H$ post $N G$. Est autem tempus per $B C$ post $M B$ ad tempus per $G H$ post $N G$, ut $B C$ ad $G H$ longitudine, sive ut $C M$ ad $H N$, cum hanc rationem habeant & tempora per totas $M C$, $N H$, & per partes $M B$, $N G$ *, ideoque etiam tempora reliqua. Estque $B C$, minor quam $G H$ propter minorem inclinationem. Patet igitur tempus per $B C$ post $M B$ sive post $A B$,

* Prop. 6.
huj.

* Prop. 7.
huj.



A B, brevius esse tempore per G H post N G five post F G. DE MOTU IN CYCLOIDE.
 Similiter ostendetur, productis D C, K H sursum, do-
 nec occurrant horizontali A F in O & P, tempus per
 C D post A B C, five post O C, brevius esse tempore per
 H K post F G H five post P H. Ac denique tempus per
 D E post A B C D, brevius esse tempore per K L post
 F G H K. Quare totum tempus descensus per A B C D E,
 brevius erit tempore per F G H K L. quod erat demon-
 strandum.

Hinc vero manifestum est, considerando curvas lineas
 tanquam ex innumeris rectis compositas, si fuerint duæ su-
 perficies, secundum lineas curvas ejusdem altitudinis incli-
 natæ, quarum in punctis quibuslibet æque altis major sem-
 per sit inclinatio unius quam reliquæ, etiam tempore bre-
 viori per minus inclinatam grave descensurum quam per ma-
 gis inclinatam.

Velut si sint duæ superficies inclinatæ secundum curvas TAB. IX. Fig. 2.
 A B, C D, æqualis altitudinis, quarumque in punctis æ-
 que altis quibuslibet E, F, major sit inclinatio ipsius C D
 quam A B, hoc est, ut recta tangens curvam C D in F,
 magis inclinata sit ad horizontem, quam quæ curvam A B
 tangit in puncto E. erit tempus descensus per A B brevius
 quam per C D.

Idemque continget si altera linearum recta fuerit: dum-
 modo inclinatio rectæ, quæ ubique est eadem, major mi-
 norve fuerit inclinatione curvæ in quolibet sui puncto.

PROPOSITIO XXII.

*SI in Cycloide cujus axis ad perpendicularum erectus
 stat, vertice deorsum spectante, duæ portiones
 curvæ æqualis altitudinis accipiantur, sed quarum
 altera propior sit vertici; erit tempus descensus
 per superiorem, brevius tempore per inferiorem.*

Sit Cyclois A B, cujus axis A C ad perpendicularum ere- TAB. IX. Fig. 3.
 ctus, vertex A deorsum spectet; & accipiantur in ea por-
 K 3 tio-

DE MOTU
IN CY-
CLOIDE.

tiones $B D$ & $E F$, æqualis altitudinis, hoc est, ejusmodi ut parallelæ horizontales $B C$, $D H$, quæ superiorem portionem $B D$ includunt, æque inter se distent ac $E G$, $F K$, inferiorem portionem $E F$ includentes. Dico tempus descensus per curvam $B D$ brevius fore tempore per $E F$.

Sumatur enim in $B D$ punctum quodlibet L , & in $E F$ punctum M , ita ut eadem sit altitudo E supra M quæ B supra L . Et descripto super axe $A C$ semicirculo, occurrant ei rectæ horizontales $L N$, $M O$, in N & O , & jungantur $N A$, $O A$. Itaque quum punctum N sit altius puncto O , manifestum est rectam $N A$ minus ad horizontem inclinari quam $O A$. Est autem ipsi $N A$ parallela tangens curvæ in L puncto *, & ipsi $O A$ parallela tangens curvæ in M . Ergo curva $B D$ in puncto L minus inclinata est quam curva $E F$ in puncto M . Quod si igitur portio $E F$, invariata inclinatione, altius extolli intelligatur velut in $e f$, ita ut inter easdem parallelas cum portione $B D$ comprehendatur, invenietur punctum M in m , æquali altitudine cum puncto L . eritque etiam inclinatio curvæ $e f$ in puncto m , quæ eadem est inclinationi curvæ $E F$ in M , major inclinatione curvæ $B D$ in L . Similiter vero, & in quolibet alio puncto curvæ $e f$, major ostendetur inclinatio quam curvæ $B D$ in puncto æque alto. Itaque tempus descensus per $B D$ brevius erit tempore per $e f$ *, sive, quod idem est, per $E F$. quod erat demonstrandum.

* Prop. 15.
huj.

* Prop.
graced.

L E M M A.

TAB. IX.
Fig. 4.

ESto circulus diametro $A C$, quem secet ad angulos rectos $D E$, & à termino diametri A educta recta $A B$ occurrat circumferentiæ in B , ipsi vero $D E$ in F . Dico tres hæc, $A B$, $A D$, $A F$, proportionales esse.

Sit enim primo intersectio F intra circulum; & arcui $B D$ recta subtensa ducatur. Quia igitur arcus æquales sunt $A E$,
 $A D$,

$A D$, erunt anguli ad circumferentiam ipsis insistentes, DE MOTU
IN CY-
CLOIDE,
 $E D A$, $A B D$ æquales. Itaque in triangulis $A B D$,
 $A D F$, æquales anguli $A B D$, $A D F$. Communis au-
 tem utrique est angulus ad A . Ergo dicti trianguli similes
 erunt, ideoque $B A$ ad $A D$ ut $A D$ ad $A F$.

Sit jam punctum intersectionis f extra circulum, & du-
 catur $b H$ parallela $D E$, quæ occurrat rectæ $A D$ in H .
 Itaque secundum jam demonstrata erit ut $D A$ ad $A b$, ita
 $A b$ ad $A H$, hoc est, ita $A f$ ad $A D$: Ideoque rursus
 proportionales erunt $A f$, $A D$, $A b$. Quare constat propo-
 situm.

P R O P O S I T I O XXIII.

Sit Cyclois $A B C$, cujus vertex A deorsum con- TAB. IX.
Fig. 5.
 versus sit, axe $A D$ ad perpendicularum erecto;
 sumptoque in ea quolibet puncto B , ducatur inde
 deorsum recta $B I$ quæ Cycloidem tangat, terminetur-
 que recta horizontali $A I$. recta vero $B F$ ad axem
 perpendicularis agatur, & divisa bifariam $F A$ in
 X , super ea describatur semicirculus $F H A$. Du-
 ctâ deinde per punctum quodlibet G in curva $B A$
 sumptum, rectâ ΣG parallelâ $B F$, quæ circum-
 ferentiæ $F H A$ occurrat in H , axi $A D$ in Σ , in-
 telligantur per puncta G & H rectæ tangentes u-
 triusque curvæ, earumque tangentium partes iis-
 dem duabus horizontalibus $M S$, $N T$ interceptæ
 sint $M N$, $S T$. Iisdemque rectis $M S$, $N T$ in-
 cludantur tangentis $B I$ pars $O P$, & axis $D A$
 pars $Q R$.

Quibus ita se habentibus, dico tempus quo gra-
 ve percurreret rectam $M N$, celeritate æquabili
 quan-

DE MOTU
IN CY-
CLOIDE.

quanta acquiritur descendendo per arcum Cycloidis B G, fore ad tempus quo percurreretur recta O P, celeritate æquabili dimidia ejus quæ acquiritur descendendo per totam tangentem B I, sicut est tangens S T ad partem axis Q R.

Describatur enim super axe A D semicirculus D V A secans rectam B F in V, & Σ G in Φ , & jungatur A V secans rectas O Q, P R, G Σ in E K & Λ . Jungantur item H F, H A, H X & A Φ ; quæ postrema secet rectas O Q, P R in punctis Δ & Π .

* Prop. 5.
Galil. de
motu æ-
quab.
* Prop. 2.
huj.
* Prop. 3.
huj.

Habet ergo dictum tempus per M N ad tempus per O P, rationem eam quæ componitur ex ratione ipsarum linearum M N ad O P, & ex ratione celeritatum quibus ipsæ percurruntur, contrarie sumpta*, hoc est, & ex ratione dimidiæ celeritatis ex B I sive ex F A, ad celeritatem ex B G, sive ex F Σ *. Atqui tota celeritas ex F A ad celeritatem ex F Σ , est in subduplicata ratione longitudinum F A ad F Σ *, ac proinde eadem quæ F A ad F H. Ergo dimidia celeritas ex F A ad celeritatem ex F Σ erit ut F X ad F H. Itaque tempus dictum per M N ad tempus per O P habebit rationem compositam ex rationibus M N ad O P, & F X ad F H. Harum vero prior ratio, nempe M N ad O P, eadem ostendetur quæ F H ad H Σ .

* Lemma
preced.

Est enim tangens Cycloidis B I parallela rectæ V A, similiterque tangens M G N parallela rectæ Φ A; ac proinde recta M N æqualis Δ Π , & O P æqualis E K. Ergo dicta ratio rectæ M N ad O P eadem est quæ Δ Π ad E K; hoc est, Δ A ad E A; hoc est, Φ A ad Λ A; hoc est V A ad Φ A *. Est autem ut V A ad A Φ ita F A ad A H; nam quia quadratum V A æquale est rectangulo D A F, & quadratum A Φ æquale rectangulo D A Σ , quæ rectangula sunt inter se ut F A ad Σ A, hoc est ut quadratum F A ad quadratum A H, erit proinde & quadratum V A ad quadratum Φ A ut quadratum F A ad quadratum A H; atque
etiam

etiam $V A$ ad $A \Phi$ longitudine, ut $F A$ ad $A H$. Ratio DE MOTU
IN CY-
CLOIDE. itaque $M N$ ad $O P$, eadem erit quæ $F A$ ad $A H$, hoc est, propter triangula similia $F A H$, $F H \Sigma$, eadem quæ $F H$ ad $H \Sigma$, ut dictum fuit. Itaque dicta ratio temporis per $M N$ ad tempus per $O P$, componitur ex rationibus $F X$ ad $F H$ & $F H$ ad $H \Sigma$, ideoque eadem erit quæ $F X$ five $X H$ ad $H \Sigma$. Sicut autem radius $X H$ ad $H \Sigma$, ita est tangens $S T$ ad rectam $Q R$; hoc enim facile perspicitur. Igitur tempus motus qualem diximus per $M N$, ad tempus per $O P$ constat esse sicut $S T$ ad $Q R$. quod erat demonstrandum.

PROPOSITIO XXIV.

*S*t rursus ut in præcedenti propositione Cyclois TAB. X.
Fig. 1. $A B C$, cujus vertex A deorsum spectet, axis $A D$ ad horizontem erectus sit; & sumpto in ea quovis puncto B , ducatur inde deorsum recta $B \odot$ quæ Cycloidem tangat, occurratque rectæ horizontali $A \odot$ in \odot : recta vero $B F$ ad axem perpendicularis agatur, & super $F A$ describatur semicirculus $F H A$. Deinde alia recta $G E$, parallela $F B$, secet Cycloidem in E , rectam $B \odot$ in I , circumferentiam $F H A$ in H , & denique axem $D A$ in G .

Dico tempus descensus per arcum Cycloidis $B E$, esse ad tempus per tangentem $B I$ cum celeritate dimidia ex $B \odot$, sicut arcus $F H$ ad rectam $F G$.

Si enim hoc verum non est, habebit tempus per arcum $B E$ ad dictum tempus per $B I$, vel maiorem rationem quam arcus $F H$ ad rectam $F G$ vel minorem. Habeat primo, si fieri potest, maiorem.

L

Ita-

DE MOTU
IN CY-
CLOIDE.






Itaque tempus aliquod brevius tempore per $B E$ (sit hoc tempus Z) erit ad dictum tempus per $B I$ ut arcus $F H$ ad rectam $F G$. Quod si jam in Cycloide supra punctum B sumatur punctum aliud N , erit tempus per $B E$ post $N B$, brevius tempore per $B E$. Manifestum est autem punctum N tam propinquum sumi posse ipsi B , ut differentia eorum temporum sit quamlibet exigua, ac proinde ut minor sit ea qua tempus Z superatur à tempore per $B E$. Sit itaque punctum N ita sumptum. unde quidem tempus per $B E$ post $N B$ majus erit tempore Z , majoremque proinde rationem habebit ad tempus dictum per $B I$ cum dimidia celeritate ex $B \odot$, quam arcus $F H$ ad rectam $F G$. Habeat itaque eam quam arcus $F H O$ ad rectam $F G$.

Dividatur $F G$ in partes æquales $F P$, $P Q$, &c. quarum unaquæque minor sit altitudine lineæ $N B$, atque item altitudine arcus $H O$; hoc enim fieri posse manifestum est; & à punctis divisionum agantur rectæ, basi $D C$ parallelæ, & ad tangentem $B \odot$ terminatæ $P \Lambda$, $Q \Xi$, &c. Quibusque in punctis hæ secant circumferentiam $F H$, ab iis, itemque à puncto H , tangentes sursum ducantur usque ad proximam quæque parallelam, velut ΔX , $\Gamma \Sigma$ &c. Similiter vero & à punctis, in quibus dictæ parallelæ Cycloidi occurrunt, tangentes sursum ducantur velut $S V$, $T M$ &c. additâ vero ad rectam $F G$ parte una $G R$ æquali iis quæ ex divisione, ductâque $R \Phi$ parallelâ similiter ipsi $D C$, patet eam occurrere circumferentiæ $F H A$ inter H & O , quia $G R$ minor est altitudine puncti H supra O . Jam vero sic porro argumentabimur.

Tempus per tangentem $V S$ cum celeritate æquabili quæ acquireretur ex $B S$, majus est tempore motus continue accelerati per arcum $B S$ post $N B$. Nam celeritas ex $B S$ minor est celeritate ex $N B$, propterea quod minor altitudo $B S$ quam $N B$. At celeritas ex $B S$ æquabiliter continuari ponitur per tangentem $V S$, cum celeritas acquisita ex $N B$ continue porro acceleretur per arcum $B S$, qui arcus minor

in.

TAB. IX.



insuper est tangente $V S$, omnibusque partibus suis magis <sup>DE MOTU
IN CY-
CLOIDE,</sup> erectus quam ulla pars tangentis $V S$. Adeo ut omnino majus sit futurum tempus per tangentem $V S$ cum celeritate ex $B S$, tempore per arcum $B S$ post $N B$. Similiter tempus per tangentem $M T$, cum celeritate ex $B T$, majus erit tempore per arcum $S T$ post $N S$, & tempus per tangentem ΠY cum celeritate ex $B Y$, majus tempore per arcum $T Y$ post $N T$. Atque ita tempora motuum æquabilium per tangentes omnes usque ad infimam quæ tangit cycloidem in E , cum celeritatibus per singulas quantæ acquiruntur cadendo ex B adusque punctum ipsarum contactus, majora simul erunt tempore per arcum $B E$ post $N B$. Eadem vero & minora essent, ut nunc ostendemus.

Considerentur enim denuo tempora eadem motuum æquabilium per tangentes cycloidis. Et est quidem tempus per tangentem $V S$ cum celeritate ex $B S$, ad tempus per rectam $B \Lambda$ cum celeritate dimidia ex $F A$, ut tangens circumferentiæ ΔX ad partem axis $F P^*$. Similiterque tempus per tangentem $M T$, cum celeritate ex $B T$, ad tempus per rectam ΛZ cum eadem dimidia celeritate ex $F A$, ut tangens $\Gamma \Sigma$ ad rectam $P Q$. Atque ita deinceps singula tempora per tangentes cycloidis, quæ sunt eadem supradictis, erunt ad tempora motus æquabilis per partes sibi respondentes rectæ $B I$ cum celeritate dimidia ex $B \odot$, sicut tangentes circumferentiæ $F H$, iisdem parallelis comprehensæ, ad partes rectæ $F G$ ipsis respondentes. <sup>* Prop.
preced.</sup>

Sunt igitur quantitates quædam rectæ $F P$, $P Q$, &c. & totidem aliæ, tempora scilicet quibus percurruntur rectæ $B \Lambda$, ΛZ &c, motu æquabili cum celeritate dimidia ex $B \odot$; Et unaquæque quantitas in prioribus ad sequentem eadem proportionem refertur, qua unaquæque posteriorum ad suam sequentem; sunt enim utrobique inter se æquales. Quibus autem proportionibus priores quantitates ad alias quasdam, nempe ad tangentes circuli ΔX , $\Gamma \Sigma$, &c, referuntur, iisdem proportionibus & eodem ordine posteriores quoque referuntur ad alias quasdam, nempe ad tempora motus

DE MOTU
IN CY-
CLOIDE.

• Prop. 2.
Archimedis
de Spha-
roid. &
Conoid.

• Prop. 20.
huj.

TAB. X.
Fig. 2.

• Prop. 22.
huj.

qualem diximus per tangentes cycloidis VS , MT &c. Er-
go, sicut se habent omnes simul priores ad omnes eas ad
quas ipsæ referuntur, hoc est, sicut tota FG ad tangentes
omnes $X\Delta$, $\Gamma\Sigma$, &c. ita tempus quo percurritur tota BI
cum celeritate dimidia ex $B\odot$, ad tempora omnia motuum
quales diximus per tangentes cycloidis VS , MT , &c.*.
Et invertendo itaque, tempora motuum dictorum per tan-
gentes cycloidis, ad tempus per rectam BI cum celeritate
dimidia ex $B\odot$, eandem rationem habebunt quam dictæ tan-
gentes omnes circumferentiæ FH ad rectam FG ; ac mi-
norem proinde quam arcus FO ad rectam eandem FG ;
quia arcus $F\Phi$, ideoque omnino & arcus FO major est
dictis omnibus arcus FH tangentibus*. Atqui tempus per
 BE post NB , ad tempus per BI cum celeritate dimidia ex
 $B\odot$, posuimus esse ut arcus FO ad rectam FG . Ergo
dicta tempora omnia per tangentes cycloidis minora simul
erunt tempore per BE post NB , cum antea majora esse os-
tensum sit; quod est absurdum. Itaque tempus per arcum
cycloidis BE , ad tempus per tangentem BI , cum celerita-
te dimidia ex $B\odot$ vel ex FA , non habet maiorem rationem
quam arcus circumferentiæ FH ad rectam FG .

Habeat jam, si potest, minorem. Ergo tempus aliquod
majus tempore per arcum BE , (sit hoc tempus Z) erit ad
tempus dictum per BI , ut arcus FH ad rectam FG .

Quod si jam sumatur arcus NM æqualis altitudine cum
arcu BE , sed cujus terminus superior N sit humilior puncto
 B , erit tempus per arcum NM majus tempore per arcum
 BE *. Manifestum autem quod punctum N tam propinquum
sumi potest puncto B , ut differentia dictorum temporum sit
quamlibet exigua, ac proinde minor ea qua tempus Z supe-
rat tempus per arcum BE . Sit itaque punctum N ita sum-
ptum. Unde quidem tempus per NM minus erit tempore Z ,
habebitque proinde ad dictum tempus per BI , cum dimi-
dia celeritate ex $B\odot$, minorem rationem quam arcus FH ad
rectam FG . Habeat ergo eam quam arcus LH ad rectam FG .

Dividatur jam FG in partes æquales FP , PQ , &c.
qua-

quarum unaquæque minor sit arcus cycloidis BN altitudine, DE MOTU IN CYCLOIDE. itemque minor altitudine arcus circumferentiæ FL ; & additâ ad FG unâ earum partium $G\zeta$, ducantur à punctis divisionum rectæ basi DC parallelæ, & ad tangentem $B\Theta$ terminatæ, PO , QK , &c; itemque à puncto ζ recta $\zeta\Omega$ quæ fecet cycloidem in V , circumferentiam in η ; quibusque in punctis ductæ parallelæ secant circumferentiam FH , ab iis tangentes deorsum ducantur usque ad proximam quæque parallelam, velut $\theta\Delta$, $\Gamma\Sigma$: Quarum infima à puncto H ducta occurrat rectæ $\zeta\Omega$ in X . Similiter vero & à punctis, in quibus dictæ parallelæ occurrunt cycloidi, ducantur totidem tangentes deorsum, velut $S\Lambda$, TZ , &c. quarum infima, tangens nempe à puncto E ducta, occurrat rectæ $\zeta\Omega$ in R .

Quia igitur $P\zeta$ æqualis est FG altitudini arcus BE , cui æqualis est ex constructione altitudo arcus NM , erit & $P\zeta$ æqualis altitudini arcus NM . Est autem recta PO ex constructione superior termino N . Ergo & $\zeta\Omega$, & in ea punctum V , superius termino M . Quare, cum arcus SV æqualis sit altitudinis cum arcu NM , sed termino S sublimiore quam N , erit tempus per SV brevius tempore per NM *. * Prop. 22. huj.

Atqui tempus per tangentem $S\Lambda$, cum celeritate æquabili ex BS , brevius est tempore descensus accelerati per arcum ST , incipientis in S . Nam celeritas ex BS , qua tota $S\Lambda$ transmissa ponitur, æqualis est celeritati ex ST *. * Prop. 2. huj. quæ motui per arcum ST in fine demum acquiritur; ipsaque $S\Lambda$ minor est quam ST . Similiter tempus per tangentem TZ , cum celeritate æquabili ex BT , brevius est tempore descensus accelerati per arcum TY post ST ; quum celeritas ex BT , qua tota TZ transmissa ponitur, sit æqualis celeritati ex SY , quæ in fine demum acquiritur motui dicto per arcum TY post ST ; ipsaque TZ minor sit arcu TY . Atque ita tempora omnia motuum æquabilium per tangentes cycloidis, cum celeritatibus per singulas quantæ acquiruntur descendendo ex B usque ad punctum ipsarum contactus, breviora simul erunt tempore descensus accelerati

DE MOTU
IN CY-
CLOIDE.



per arcum $S V$. Eadem verò & longiora essent, ut nunc ostendemus.


• Prop.
preced.

Est enim tempus dictum per tangentem $S \Lambda$, cum celeritate æquabili ex $B S$, ad tempus per rectam $O K$ cum celeritate æquabili dimidia ex $B \odot$, sicut tangens semicirculi $\theta \Delta$ ad rectam $P Q^*$. similiterque tempus per tangentem $T \Xi$, cum celeritate æquabili ex $B T$, est ad tempus per rectam $K \Psi$ cum celeritate æquabili dimidia ex $B \odot$, ut tangens $\Gamma \Sigma$ ad rectam $Q \Pi$. Atque ita deinceps singula tempora per tangentes cycloidis, quæ sunt eadem supra dictis, erunt ad tempora motus æquabilis per partes sibi respondentes rectæ $O \Omega$, cum celeritate dimidia ex $B \odot$, ut tangentes circumferentiæ $\theta \eta$, iisdem parallelis inclusæ, ad partes rectæ $P \zeta$ ipsis respondentes. Unde, ut in priori parte demonstrationis, concludetur omnes simul rectas $P Q$, $Q \Pi$ &c. hoc est, totam $P \zeta$ esse ad omnes simul tangentes $\theta \Delta$, $\Gamma \Sigma$, &c. sicut tempus quo percurritur tota $O \Omega$, cum celeritate dimidia ex $B \odot$, ad tempora omnia motuum quales diximus per tangentes cycloidis $S \Lambda$, $T \Xi$, &c. Quare & convertendo, tempora omnia per tangentes cycloidis, eam rationem habebunt ad tempus dictum motus æquabilis per rectam $O \Omega$, sive per $B I$, quam dictæ tangentes omnes arcus $\theta \eta$ ad rectam $P \zeta$ vel $F G$, ac proinde maiorem quam arcus $L H$ ad rectam $F G$; est enim arcus θH , adeoque etiam omnino arcus $L H$, minor dictis tangentibus arcus $\theta \eta^*$. Sed tempus per $N M$ posuimus ab initio ad idem tempus per $B I$ se habere ut arcus $L H$ ad rectam $F G$. Ergo tempus per $N M$, multoque magis tempus per $S V$, minus erit tempore per tangentes cycloidis. Quod est absurdum, cum hoc tempus, illo per arcum $S V$, antea minus ostensum fuerit. Patet igitur tempus per arcum cycloidis $B E$ ad tempus per tangentem $B I$ cum celeritate æquabili dimidia ex $B \odot$, non minorem rationem habere quam arcus $F H$ ad rectam $F G$. Sed nec maiorem habere ostensum fuit. Ergo eandem habeat necesse est. quod erat demonstrandum.

• Prop. 20.
huj.

P R O.





PROPOSITIO XXV.

DE MOTU
IN CY-
CLOIDE.

IN Cycloide cujus axis ad perpendicularum erectus est, vertice deorsum spectante, tempora descensus quibus mobile, à quocunque in ea puncto dimissum, ad punctum imum verticis pervenit, sunt inter se æqualia; habentque ad tempus casus perpendicularis per totum axem cycloidis eam rationem, quam semicircumferentia circuli ad diametrum.

Esto cyclois A B C cujus vertex A deorsum spectet, axis TAB. XI. Fig. 1. vero A D ad perpendicularum erectus sit, & à puncto quovis in cycloide sumpto, velut B; descendat mobile impetu naturali per arcum B A, sive per superficiem ita inflexam. Dico tempus descensus hujus esse ad tempus casus per axem D A, sicut semicircumferentia circuli ad diametrum. Quo demonstrato, etiam tempora descensus, per quoslibet cycloidis arcus ad A terminatos, inter se æqualia esse constabit.

Describatur super axe D A semicirculus, cujus circumferentiam secet recta B F, basi D C parallela, in E; junctaque E A, ducatur ei parallela B G, quæ quidem cycloidem tanget in B. Eadem vero occurrat rectæ horizontali per A ductæ in G: sitque etiam super F A descriptus semicirculus F H A.

Est igitur, per præcedentem, tempus descensus per arcum cycloidis B A, ad tempus motus æquabilis per rectam B G cum celeritate dimidia ex B G, sicut arcus semicirculi F H A ad rectam F A. Tempus vero dicti motus æquabilis per B G, æquatur tempori descensus naturaliter accelerati per eandem B G, sive per E A, quæ ipsi parallela est & æqualis; hoc est, tempori descensus accelerati per axem D A*. Itaque tempus per arcum B A, erit quoque ad tem-

* Prop. 6.
Galil. de
motu Accel.

pus descensus per axem D A, ut semicirculi circumferentia F H A ad diametrum F A. quod erat demonstrandum.

Quod

DE MOTU
IN CY-
CLOIDE.

* Prop. 9.
huj.

* Prop. 11.
huj.

Quod si tota cycloidis cavitas perfecta ponatur, constat mobile, postquam per arcum $B A$ descenderit, inde continuato motu per alterum ipsi æqualem arcum ascensurum*, atque in eo tantundem temporis atque descendendo consumpturum*. Deinde rursus per A ad B perventurum, ac singularum ejusmodi reciprocationum, in magnis parvisve cycloidis arcubus peractarum, tempora fore ad tempus casus perpendicularis per axem $D A$, sicut circumferentia circuli tota ad diametrum suam.

PROPOSITIO XXVI.


TAB. XI.
Fig. 1.

Iisdem positis, si ducatur insuper recta horizontalis $H I$ quæ arcum $B A$ secet in I , circumferentiam vero $F H A$ in H : dico tempus per arcum $B I$, ad tempus per arcum $I A$ post $B I$, eam rationem habere quam arcus circumferentiæ $F H$ ad $H A$.

* Prop. 24.
huj.

* Prop. 24.
huj.

Occurrat enim recta $H I$ tangenti $B G$ in K , axi $D A$ in L . Est itaque tempus per arcum $B A$, ad tempus motus æquabilis per $B G$ cum celeritate dimidia ex $B G$, sicut arcus $F H A$ ad rectam $F A$ *. Tempus autem dicti motus æquabilis per $B G$, est ad tempus motus æquabilis per $B K$, cum eadem celeritate dimidia ex $B G$, sicut $B G$ ad $B K$ longitudine, hoc est, sicut $F A$ ad $F L$. Et rursus tempus motus æquabilis, cum dicta celeritate, per $B K$, ad tempus per arcum $B I$, sicut $F L$ ad arcum $F H$ *. Igitur ex æquo erit tempus per arcum $B A$ ad tempus per $B I$, ut arcus $F H A$ ad $F H$. Et dividendo, & convertendo, tempus per $B I$, ad tempus per $I A$ post $B I$, ut arcus $F H$ ad $H A$. quod erat demonstrandum.



HOROLOGII OSCILLATORII

DE LINEA-
RUM CUR-
VARUM
EVOLUTIO-
NE.

PARS TERTIA.

De linearum curvarum evolutione & dimensione.

DEFINITIONES.

I.

LINEA in unam partem inflexa vocetur quam rectæ omnes tangentes ab eadem parte contingunt. Si autem portiones quasdam rectas lineas habuerit, hæ ipsæ productæ pro tangentibus habentur.

II.

Cum autem duæ hujusmodi lineæ ab eodem puncto egrediuntur, quarum convexitas unius obversa sit ad cavitatem alterius, quales sunt in figura adscripta curvæ ABC, ADE, ambæ in eadem partem cavæ dicantur.

TAB. XI.
Fig. 2.

III.

Si lineæ, in unam partem cavæ, filum seu lineam flexilis circumplicata intelligatur, & manente una fili extremitate illi affixa, altera extremitas abducatur, ita ut pars ea quæ soluta est semper extensa maneat; manifestum est curvam quandam aliam hac fili extremitate describi. Vocetur autem ea, Descripta ex evolutione.

M

IV.

DE LINEA-
RUM CUR-
VARUM
EVOLUTIO-
NE
TAB. XI.
Fig. 2.

Illā vero cui filum circumplicatum erat, dicatur Evoluta. In figura superiori, A B C est evoluta, A D E descripta ex evolutione A B C, ut nempe cum extremitas fili ex A venit in D, pars fili extensa sit D B recta, reliqua parte B C adhuc applicata curvæ A B C. Manifestum est autem D B tangere evolutam in B.

P R O P O S I T I O I.

Recta omnis, quæ evolutam tangit, occurret lineæ ex evolutione descriptæ ad angulos rectos.

TAB. XI.
Fig. 3.

Sit A B evoluta, A H vero quæ ex evolutione illius descripta est. Recta autem F D C, tangens curvam A D in D, occurrat in C curvæ A C H. Dico ei occurrere ad angulos rectos: hoc est, si ducatur C E recta perpendicularis C D, dico eam in C tangere curvam A C H. Quia enim D C tangit evolutam in D, apparet ipsam referre positionem fili tunc cum ejus extremitas pervenit in C. Quod si igitur ostenderimus filum, in tota reliqua descriptione curvæ A C H, nusquam pertingere ad rectam C E præterquam in C puncto, manifestum erit rectam C E ibidem curvam A C H contingere.

Sumatur punctum aliquod in A C præter C, quod sit H, sitque primo remotius à principio evolutionis A quam punctum C, & intelligatur pars libera esse H G, cum extremitate sua ad H pervenit. Tangit ergo H G lineam A B in G. Cumque interea dum describitur pars curvæ C H, evolutus sit arcus D G, occurret C D à parte D, producta ipsi H G, ut in F. Ponatur autem G H occurrere rectæ C E in E. Quia igitur duæ simul D F, F G, majores sunt quam D G, siue curva ea fuerit siue recta: fiet addendo utrinque rectam D C, ut rectæ C F, F G simul majores sint recta

C D

C D & ipsa D G. Sed propter evolutionem, apparet utrisque simul, rectæ C D, & lineæ D G, æquari rectam H G. Ergo duæ simul C F, F G majores quoque erunt recta H G, & ablata communi F G, erit C F major quam H F. Sed F E major est quam F C, quia angulus C trianguli F C E est rectus. Ergo F E omnino major quam F H. Unde apparet, ab hac quidem parte puncti C, fili extremitatem non pertingere ad rectam C E.

Sit jam punctum H propinquius principio evolutionis A quam punctum C, sitque fili positio H G, tunc cum ejus extremitas esset in H, & ducantur rectæ D G, D H, quarum hæc occurrat rectæ C E in E: apparet autem D G rectam non posse esse in directum ipsi H G, adeoque H G D fore triangulum. Jam quia recta D G vel minor est quam D K G, vel eadem, si nempe evolutæ pars D G recta sit; additâ utrique G H, erunt rectæ D G, G H simul minores vel æquales duabus istis, scilicet D K G & G H, sive his æquali rectæ D C. Duabus autem rectis D G, G H minor est recta D H. Ergo hæc minor utique erit rectâ D C. Sed D E major est quam D C, quia in triangulo D C E angulus C est rectus. Ergo D H multo minor quam D E. Situm est ergo punctum H, hoc est extremitas fili G H, intra angulum D C E. Unde apparet neque inter A & C usquam illam pertingere ad rectam C E. Ergo C E tangit curvam A C in C; ac proinde D C, cui C E ducta est perpendicularis, occurrit curvæ ad angulos rectos. quod erat demonstrandum.

Hinc etiam manifestum est curvam A H C in partem unam inflexam esse, & in eandem partem cavam ac ipsa A G B, cujus evolutione descripta est. Omnes enim tangentes lineæ A H C, cadunt extra spatium D G A H C: omnes vero tangentes lineæ A G D, intra dictum spatium. unde liquet cavitatem A H C respicere convexitatem A G D.

PROPOSITIO II.




DE LINEA-
RUM CUR-
VARUM
EVOLUTIO-
NE.
TAB. XII.
Fig. 2.

OMnis curva linea terminata, in unam partem cava, ut ABD, ut potest in tot partes dividi, ut si singulis partibus subtensæ rectæ ducantur, velut AB, BC, CD; & à singulis item divisionis punctis, ipsaque curvæ extremitate rectæ ducantur curvam tangentes, ut AN, BO, CP, quæ occurrant iis, quæ in proxime sequentibus divisionis punctis curvæ ad angulos rectos insistant, quales sunt lineæ BN, CO, DP; ut inquam subtensa quæque habeat ad sibi adjacentem curvæ perpendicularem, velut AB ad BN, BC ad CO, CD ad DP, rationem majorem quavis ratione proposita.

Sit enim data ratio lineæ EF ad FG, quæ recto angulo ad F jungantur, & ducatur recta GEH.

Intelligatur primo curva ABD in partes tam exiguas secta punctis B, C, ut tangentes quæ ad bina quæque inter se proxima puncta curvam contingunt, occurrant sibi mutuo secundum angulos qui singuli majores sint angulo FEH, quales sunt anguli AKB, BLC, CMD. quod quidem fieri posse evidentius est quam ut demonstratione indigeat. Ductis jam subtensis AB, BC, CD, & erectis curvæ perpendicularibus BN, CO, DP, quæ occurrant productis AK, BL, CM, in N, O, P: dico rationes singulas rectarum, AB ad BN, BC ad CO, CD ad DP, majores esse ratione EF ad FG.

Quia enim angulus AKB major est angulo HEF, erit residuus illius ad duos rectos, nimirum angulus NKB, minor angulo GEF. Angulus autem B trianguli KBN est rectus, sicut & angulus F in triangulo EFG. Ergo ma-



major erit ratio $K B$ ad $B N$ quam $E F$ ad $F G$. Sed $A B$ major est quam $K B$, quoniam angulus K in triangulo $A K B$ est obtusus, est enim major angulo $H E F$ qui est obtusus ex constructione. Ergo ratio $A B$ ad $B N$ major erit ratione $K B$ ad $B N$, ac proinde omnino major ratione $E F$ ad $F G$. Eodem modo & ratio $B C$ ad $C O$, & $C D$ ad $D P$, major ostendetur ratione $E F$ ad $F G$. Itaque constat propositum.

DE LINEARUM CURVARUM EVOLUTIONE.

PROPOSITIO III.

DUæ curvæ in unam partem inflexæ & in easdem partes cavæ ex eodem puncto egredi nequeunt, ita ad se invicem comparatæ, ut recta omnis quæ alteri earum ad angulos rectos occurrit, similiter occurrat & reliquæ.

Sint enim, si fieri potest, hujusmodi lineæ curvæ $A C E$, $A G K$, communem terminum habentes A , & sumpto in exteriori illarum puncto quolibet K , sit indeeducta $K E$ recta, curvæ $A G K$ occurrens ad angulos rectos, ac proinde etiam curvæ $A C E$.

TAB. XII.
Fig. 3.

Potest jam recta quædam sumi major curva $K G A$, quæ sit Q . Divisa autem intelligatur ipsa $K G A$, ut in propositione antecedenti dictum fuit, in tot partes punctis $H G F$, ut subtenſæ singulæ $K H$, $H G$, $G F$, $F A$, ad perpendiculares curvæ sibi contiguas $H M$, $G N$, $F O$, $A P$ majorem rationem habeant quam linea Q ad rectam $K E$. Itaque & omnes simul dictæ subtenſæ ad omnes dictas perpendiculares majorem habebunt rationem quam Q ad $K E$. Producantur autem perpendiculares eædem & occurrant curvæ $A C E$ in D , C , B , nimirum ad angulos rectos ex hypothesi. Erit jam $K E$ minor quam $M D$. Etenim, ducta $E L$ ipsi $K E$ perpendiculari, quoniam $K E$ occurrit lineæ curvæ $E C A$ ad angulos rectos, tanget $E L$ curvam $A C E$, occurretque necessario rectæ $M D$ inter D & M . Unde

M 3

cum

cum KE sit brevissima omnium quæ cadunt inter parallelas EL , KM , erit ea minor quam ML , ac proinde minor quoque omnino quam MD . Eodem modo & HD minor ostendetur quam NC , & GC minor quam OB , & FB minor quam PA . Cum sit ergo PA major quam FB , erunt duæ simul PA , OF majores quam OB . Item quum OB sit major quam GC , erunt duæ simul OB , NG , majores quam NC . Sed duæ PA , OF majores erant quam OB . Itaque tres simul PA , OF , NG omnino majores erunt quam NC . Rursus, quia NC major quam HD , erunt duæ simul NC , MH majores quam MD . Unde, si loco NC sumantur tres hæ ipsa majores PA , OF , NG , erunt omnino hæ quatuor PA , OF , NG , MH majores quam MD : ac proinde eadem quoque omnino majores recta KE , quia ipsa MD major erat quam KE . Diximus autem subtenfas omnes AF , FG , GH , HK majorem rationem habere ad omnes perpendiculares PA , OF , NG , MH , quam linea Q ad KE . Ergo cum dictis perpendicularibus minor etiam sit KE , habebunt dictæ subtenfæ ad KE omnino majorem rationem quam Q ad KE . Ergo subtenfæ simul sumptæ majores erunt recta Q . Hæc autem ipsa curvâ AGK major sumpta fuit. Ergo subtenfæ AF , FG , GH , HK simul majores erunt curva AGK cujus partibus subtenduntur; quod est absurdum, cum singulæ suis arcubus sint minores. Non igitur poterunt esse duæ curvæ lineæ quæ quemadmodum dictum fuit sese habeant. quod erat demonstrandum.

PROPOSITIO IV.

SI ab eodem puncto duæ lineæ exeant in partem unam inflexæ, & in eandem partem cavæ, ita vero mutuo comparatæ ut rectæ omnes, quæ alteram earum contingunt, alteri occurrant ad angulos rectos; posterior hæc prioris evolutione, à puncto communi cæpta, describetur.

Sun-

Sunto lineæ $A B C$, $A D E$, in partem unam inflexæ, & quarum utraque in easdem partes cava existat, habeantque communem terminum A punctum. Omnes autem rectæ tangentes lineam $A B C$, velut $B D$, $C E$, occurrant lineæ $A D E$ ad angulos rectos. Dico evolutione ipsius $A B C$, à termino A incepta, describi $A D E$.

DE LINEARUM CURVARUM EVOLUTIONE.
TAB. XII.
Fig. 4.

Si enim fieri potest; describatur dicta evolutione alia quædam curva $A F G$. Ergo lineæ rectæ quælibet, evolutam $A B C$ tangentes, ut $B D$, $C E$, occurrent ipsi $A F G$ ad angulos rectos*, puta in F & G . Sed eadem tangentes etiam ad rectos angulos occurrere ponuntur lineæ $A D E$. Sunt igitur lineæ curvæ $A D E$, $A F G$, eodem puncto A terminatæ, inque partem unam flexæ, & ambæ in eandem partem cavæ, quippe utraque in eandem atque ipsa $A B C$; nam de linea $A D E$ constat ex hypothese, de $A F G$ vero ex propositione prima hujus; & omnes quæ uni earum occurrunt ad angulos rectos, etiam alteri similiter occurrunt. quod quidem fieri non posse antea ostensum est*. Quare constat ipsam $A D E$ descriptum iri evolutione lineæ $A B C$. quod erat demonstrandum.

* Prop. 1.
huj.

* Prop. 3.
huj.

PROPOSITIO V.

SI Cycloidem recta linea in vertice contingat, super qua, tanquam basi, alia cyclois priori similis & æqualis constitutatur, initium sumens à puncto dicti verticis; recta quælibet inferiorem cycloidem tangens, occurret superioris portioni, sibi superpositæ, ad angulos rectos.

Tangat cycloidem $A B C$ in vertice A recta $A G$, super qua, tanquam basi, similis alia cyclois constituta sit $A E F$, cujus vertex F . Cycloidem autem $A B C$ tangat recta $B K$ in B . Dico eam productam occurrere cycloidi $A E F$ ad angulos rectos.

TAB. XVI.
Fig. 1.

Describatur enim circa $A D$, axem cycloidis $A B C$, circulus

DE LINEA-
RUM CUR-
VARUM
EVOLUTIO-
NE.

* Propos. 15.
partis 2.

* Propos. 14.
partis 2.

culus genitor AHD , cui occurrat BH , basi parallela, in H , & jungatur HA . Quia ergo BK tangit cycloidem in B , constat eam parallelam esse rectæ HA *. Itaque $AHBK$ parallelogrammum est, ac proinde AK æqualis HB , hoc est, arcui AH *. Sit porro jam descriptus circulus KM , genitori circulo, hoc est ipsi AHD , æqualis, qui tangat basin AG in K , rectam vero BK productam secet in puncto E . Quia ergo ipsi AH parallela est BKE , ac proinde angulus EKA æqualis KAH , manifestum est BK productam abscindere à circulo KM arcum æqualem ei, quem à circulo AHD abscindit recta AH . Itaque arcus KE æqualis est arcui AH , hoc est rectæ HB , hoc est rectæ KA . Hinc vero sequitur, ex cycloidis proprietate, cum circulus genitor MK tangebatur regulam in K , punctum describens fuisse in E . Itaque recta KE occurrit cycloidi in E ad angulos rectos *. Est autem KE ipsa BK producta. Ergo patet productam BK occurrere cycloidi ad angulos rectos. quod erat demonstrandum.

* Propos. 15.
partis 2.

PROPOSITIO VI.


Semicycloidis evolutione, à vertice cæpta, alia semicyclois describitur evolutæ æqualis & similis, cujus basis est in ea recta quæ cycloidem evolutam in vertice contingit.

TAB. XVI.
Fig. I.

Sit semicyclois ABC , cui superimposita sit alia similis AEF , quemadmodum in propositione præcedenti. Dico, si linea flexilis, circa semicycloidem ABC applicata, evolvatur, incipiendo ab A , eam describere extremitate sua ipsam semicycloidem AEF . Quia enim ex puncto A egrediuntur semicycloides ABC , AEF , in unam partem inflexæ, & ambæ in eandem cavæ, ac præterea ita comparatæ, ut omnes tangentes semicycloidis ABC occurrant semicycloidi AEF ad angulos rectos, sequitur hanc evolutione illius, à termino A incepta, describi *. quod erat demonstrandum.

* Propos. 4.
lib. I.

Et



Et apparet, si dimidiam cycloidem, ipsi A B C gemel-
lam, contrario situ ab altera parte lineæ C G disponamus, DE LINEA-
velut C N, ejus evolutione, vel etiam dum filum, jam RUM CUR-
extensum in C F, circa eam replicatur, alteram semicy- VARUM
cloidem F N fili extremitate descriptum iri, quæ simul EVOLUTIO-
cum priore A E F integram constituat. NE.

Atque ex his, & propositione 25 de descensu gravium, ma-
nifestum jam est quod supra in Constructione Horologii de
æquabili penduli motu dictum fuit. Patet enim perpendicu-
lum, inter laminas binas, secundum semicycloidem inflexas,
suspensum agitatumque, motu suo cycloidis arcum descri-
bere, ac proinde æqualibus temporibus quolibet ejus reci-
procationes absolvi. Non refert enim utrum in superficie,
secundum cycloidem curvata, mobile feratur, an filo alliga-
tum lineam ipsam in aëre percurrat, cum utrobique eandem
libertatem, eandemque in omnibus curvæ punctis inclina-
tionem ad motum habeat.

P R O P O S I T I O VII.

*Cyclois linea sui axis, sive diametri circuli ge-
nitoris, quadrupla est.*

Repetita enim figura præcedenti: cum post totam semi- TAB. XVI,
cycloidem A B C evolutam, filum occupet rectam C F, Fig. I.
quæ dupla est A D, propterea quod axes cycloidum A B C,
A E F sunt æquales; apparet semicycloidem ipsam A B C,
filo sibi circum applicito æqualem, duplam esse sui axis A D,
ac totam proinde cycloidem axis sui quadruplam.

Apparet etiam tangentem B E, quæ refert partem fili ex-
tensam, antea curvæ parti B A applicatam, huic ipsi longi-
tudine æquari. Est autem B E dupla ipsius B K, sive A H,
quoniam in propositione quinta ostensum est K E ipsi A H
æqualem esse. Itaque pars cycloidis A B rectæ A H, sive
B K, dupla erit: existente nimirum B H parallela basi
cycloidis: idque ubicunque in ea punctum B sumptum fue-
rit.

N

Hanc

Hanc cycloidis dimensionem primus invenit, via tamen longe alia, eximius geometra Christophorus Wren Anglus, eamque deinde eleganti demonstratione confirmavit, quæ edita est in libro de cycloide viri clarissimi Ioannis Wallisij. De eadem vero linea, alia quoque multa extant pulcherrima inventa nostri temporis mathematicorum, quibus præcipuè occasionem præbuere problemata quædam à Blasio Paschalio Gallo proposita, qui in his studiis præcellebat. Is cum sua, tum aliorum inventa recensens, primum omnium Mersennum lineam hanc in rerum natura advertisse ait. Primum Robervalium tangentes ejus definivisse, ac plana & solida dimensum esse. Item centra gravitatis tum plani, tum partium ejus invenisse. Primum Wrennium curvæ cycloidis æqualem rectam dedisse. Me quoque primum reperisse dimensionem absolutam portionis cycloidis, quæ rectâ, basi parallelâ, abscinditur per punctum axis, quod quarta parte ejus à vertice abest. quæ nimirum portio æquatur dimidio hexagono æquilatero, intra circulum genitorem descripto. Seipsum denique solidorum ac semisolidorum, tam circa basin quàm circa axem, centra gravitatis definivisse, itemque partium eorum. Lineæ etiam ipsius (Sed hæc post acceptam à Wrennio dimensionem) centrum gravitatis invenisse, & dimensionem superficierum convexarum, quibus solida ista eorumque partes comprehenduntur, earumque superficierum centra gravitatis. Ac denique dimensionem curvarum cujusvis cycloidis, tam protractæ quam contractæ: hoc est earum quæ describuntur à puncto intra vel extra circumferentiam circuli genitoris sumpto. Et horum quidem demonstrationes à Paschalio sunt editæ. A quibus suas quoque, de eadem linea, subtilissimas meditationes exposuit Cl. Wallisius, atque eadem illa omnia suo Marte se reperisse, ac problemata à Paschalio proposita solvisse contendit. Quod idem & doctissimus Lovera sibi vindicat. Quantum vero unicuique debeatur, ex scriptis eorum eruditi dijudicent. Nos propterea tantum præcedentia retulimus, quod silentio prætereunda non videbantur egregia adeo inventa, quibus factum est, ut, ex lineis omnibus, nulla nunc melius aut peni-

penitiùs quam cyclois cognita sit. Methodum vero nostram, qua in hac metienda usi sumus, in aliis quoque experiri libuit, de quibus porro nunc agemus.

DE LINEARUM CURVARUM EVOLUTIONE.

PROPOSITIO VIII.

Cujus lineæ evolutione parabola describatur ostendere.

Sit paraboloides AB , cujus axis AD ; vertex A ; proprietates autem istæ, ut ordinatim ad axem applicatâ BD , cubus abscissæ ad verticem DA æquetur solido, basin habenti quadratum DB , altitudinem vero æqualem lineæ cui-dam datæ M ; quæ quidem curva pridem geometris nota fuit; & ponatur axi DE junctâ in directum AE , quæ habeat $\frac{8}{27}$ ipsius M . Jam si filum continuum circa EAB applicetur, idque ab E evolvi incipiat, dico descriptam ex evolutione esse parabolam EF , cujus axis EAG , vertex E , latus rectum æquale duplæ EA .

TAB. XIII.
Fig. 1.

Sumpto enim in curva AB puncto quolibet B , ducatur quæ in ipso tangat curvam recta BG , occurrens axi EA in G . & ex G ducatur porro GF , quæ ad rectos angulos occurrat parabolæ EF in F ; & sit ipsi GF perpendicularis FH , quæ parabolam in F continget; & denique FK ordinatim ad axem EG applicetur.

Est igitur KG æqualis dimidio lateri recto, hoc est, ipsi EA ; ac proinde, additâ vel ablatâ utrimque AK , erit EK æqualis AG . Est autem AG triens ipsius AD , quoniam BG tangit paraboloidem in B : illud enim ex natura curvæ hujus facile demonstrari potest. Ergo & EK æqualis est trienti AD : & KH , quæ ex natura parabolæ dupla est KE , æquabitur duabus tertiis AD . Itaque cubus ex KH æqualis est $\frac{8}{27}$ cubi ex AD , hoc est, solido basin habenti quadratum DB , altitudinem vero æqualem $\frac{8}{27} M$, hoc est, ipsi AE . Quamobrem ut quadratum DB ad quadratum KH , ita erit KH longitudine ad AE , hoc est ad KG . Erat autem KH æqualis $\frac{2}{3} AD$, hoc est ipsi GD . Ergo

N 2

ut

DE LINEA-
RUM CUR-
VARUM
EVOLUTIO-
NE.

ut quadratum $B D$ ad quadratum $D G$ ita est $H K$ ad $K G$. Ut autem $H K$ ad $K G$, ita est quadratum $F K$ ad quadratum $K G$. Ergo sicut quadratum $B D$ ad quadratum $D G$, ita quadratum $F K$ ad quadratum $K G$. Et proinde sicut $B D$ ad $D G$ longitudine, ita $F K$ ad $K G$. Unde sequitur $B G F$ esse lineam rectam. Sed $G F$ occurrit parabolæ $E F$ ad angulos rectos. Ergo apparet $B G$, tangentem paraboloidis, productam occurrere eidem parabolæ ad angulos rectos. Idque similiter de quavis illius tangente demonstrabitur. Ergo constat ex evolutione lineæ $E A B$, à termino E incepta, describi parabolam $E F$ *. quod erat demonstrandum.

* Propos. 4.
huj.

PROPOSITIO IX.

Rectam lineam invenire æqualem datæ portioni curvæ paraboloidis, ejus nempe in qua quadrata ordinatim applicatarum ad axem, sunt inter se sicut cubi abscissarum ad verticem.

TAB. XIII.
Fig. 2.

Quomodo hoc fiat ex prop. præcedenti manifestum est. Parabola vero $E F$ ad constructionem non requiritur, quæ sic peragetur. Data quavis parte paraboloidis hujus $A B$, cui rectam æqualem invenire oporteat, ducatur $B G$ tangens in puncto B , quæ occurrat axi $A G$ in G . Tanget autem si $A G$ fuerit tertia pars $A D$, inter verticem & ordinatim applicatam $B D$ interceptæ. Porro sumpta $A E$ æquali $\frac{2}{3}$ lineæ M , quæ latus rectum est paraboloidis $A B$, ducatur $E F$ parallela $B G$, occurratque lineæ $A F$, quæ parallela est $B D$, in F . Jam si ad rectam $B G$ addatur $N F$, excessus rectæ $E F$ supra $E A$, habebitur recta æqualis curvæ $A B$. Cujus demonstratio ex ante dictis facile perspicitur.

Semper ergo curva $A B$ tantum superat tangentem $B G$, quantum recta $E F$ rectam $E A$.

Rursus autem hic in lineam incidimus, cujus longitudinem alii jam ante dimensi sunt. Illam nempe quam anno 1659 Joh. Heuratus Harlemensis rectæ æqualem ostendit, cujus demonstratio post commentarios Joh. Schotenii in Cartesii

Geo-

Geometriam, eodem anno editam, adjecta est. Et ille quidem omnium primus curvam lineam, ex earum numero quarum puncta quælibet geometricè definiuntur, ad hanc mensuram reduxit, cum sub idem tempus Cycloidis longitudinem dedisset Wrennius, non minus ingenioso epicheremate.

Scio equidem, ab edito Heuratii invento, Doctissimum Wallisium Wilhelmo Nelio, nobili apud suos juveni, idem attribuere voluisse, in libro de Cissoide. Sed mihi, quæ illic adfert perpendenti, videtur non multum quidem ab invento illo Nelium absuisse, neque tamen plane id adsecutum esse. Nam neque ex demonstratione ejus, quam Wallisius affert, apparet illum satis perspexisse quænam foret curva illa, cujus, si construeretur, mensuram datam fore videbat. Et credibile est, si scivisset ex earum numero esse quæ jampridem Geometris cognitæ fuerant, vel ipsum, vel alios ejus nomine, tam nobile inventum Geometris maturius impertituros fuisse, quod, si quod aliud, merebatur ut Archimedeum illud *εὕρημα* exclamarent. Sane ejusdem inventi, tanquam à se profecti, etiam Fermatius, Tholosanus senator ac Geometra peritissimus, demonstrationes conscripsit, quæ anno 1660 excusæ sunt; sed illæ fero utique.

Cum vero in his simus, etiam de nobis dicere liceat, quid ad promovendum tam eximium inventum contulerimus: siquidem & Heuratio ut eo perveniret occasionem præbuimus, & dimensionem curvæ parabolicæ ex hyperbolæ data quadratura, quæ Heuratii inventi pars est, ante ipsum atque omnium primi reperimus. Etenim sub finem anni 1657 in hæc duo simul incidimus, curvæ parabolicæ quam dixi dimensionem, & superficiei conoidis parabolici in circulum reductionem. Cumque Schotenio, aliisque item amicorum, per literas indicassemus, duo quædam non vulgaria circa parabolam inventa nobis sese obtulisse, eorumque alterum esse conoidicæ superficiei extensionem in circulum, ille literas eas cum Heuratio, quo tum familiariter utebatur, communicavit. Huic vero, acutissimi ingenii viro, non difficile fuit intelligere, conoidis istius superficiei affinem esse dimensionem ipsius cur-

DE LINEA-
RUM CUR-
VARUM
EVOLUTIO-
NE.

væ parabolicæ. Qua utraque inventa, ulterius inde investi-
gans, in alias istas curvas paraboloides incidit, quibus rectæ
æquales absolute inveniuntur.

Ac de Conoidis quidem superficie in planum redacta, ne
quis forte testimonium desideret, pauca hæc adscribere vi-
sum est ex literis viri clarissimi, atque inter præcipuos ho-
die Geometras censendi, Franc. Sluſii, quibus eo ipso anno
mihi inventum illud, ac prolixius forte quam pro merito,
gratulatus est. In quibus literis 24. Decemb. anni 1657. da-
tis, ista habentur. *Duo tantum addo, unum &c. Alterum
est, me has omnes curvas, ipsumque adeo locum linearem in-
tegrum, nihili pene facere præ invento hoc tuo, quo superfi-
ciei in conoide parabolico rationem ad circulum suæ baseos de-
monstrasti. Hanc pro circuli quadratura pulcherrimam ἀπα-
ραγν præfero libens iis omnibus, quas ex loco lineari nec pau-
cas olim deduxi, & quas tecum, si ita jusseris, data occa-
sione communicabo.*

Anno autem inſequenti etiam superficies conoidum hyper-
bolicorum & sphæroidum reperi, quomodo ad circulos re-
duci possent, constructionesque eorum problematum, non
addita tamen demonstratione, Geometris quibuscum tunc
literarum commercium habebam, in Gallia Paschalio aliis-
que, in Anglia Wallisio impertii, qui non multo post sua
quoque super his, una cum aliis multis subtilibus inventis
in lucem edidit, fecitque ut nostris demonstrationibus per-
ficiendis supersederem. Quoniam vero non inelegantes visæ
sunt constructiones nostræ, neque adhuc publice extant,
placet hoc loco illas adscribere.

*Conoidis parabolici superficiei curvæ circulum
æqualem invenire.*

TAB. XIII.
Fig. 1.

SIt datum conoides cujus sectio per axem parabola A B C,
axis ejus B D, vertex B, diameter basis A C, quæ sit axi
B D ad angulos rectos. Et oporteat superficiei portionis cur-
væ invenire circulum æqualem.

Pro-

Producto axe à parte verticis, fumatur B E æqualis B D, & jungatur E A, quæ parabolam A B C in A continget. Porro secetur A D in G, ut sit A G ad G D sicut E A ad A D. Et utrisque simul A E, D G æqualis statuatur recta H. Item trienti basis A C æqualis sit recta L, & inter H & L media proportionalis inveniatur K. qua tanquam radio circulus describatur. Is æqualis erit superficiei curvæ conoidis A B C. Hinc sequitur, si fuerit A E dupla A D, superficiem conoidis curvam ad circulum baseos fore ut 14 ad 9. Si A E tripla A D, ut 13 ad 6. si A E quadrupla A D, ut 14 ad 5. Atque ita semper fore ut numerus ad numerum, si A E ad A D ejusmodi rationem habuerit.

DE LINEARUM CURVARUM EVOLUTIONE.

Sphæroidis oblongi superficiei circulum æqualem invenire.

Sto sphæroides oblongum cujus axis A B, centrum C, sectio per axem ellipsis A D B E, cujus minor diameter D E.

TAB. XIII.
Fig. 4.

Ponatur D F æqualis C B, seu ponatur F alter focorum ellipseos A D B E, rectæque F D parallela ducatur B G, occurrens productæ E D in G. centroque G, radio G B, describatur super axe A B arcus circumferentiæ B H A. Interque semidiametrum C D & rectam utrisque æqualem, arcui A H B & diametro D E, media proportionalis sit recta K. Erit hæc radius circuli qui superficiei sphæroidis A D B E æqualis sit.

Sphæroidis lati sive compressi superficiei circulum æqualem invenire.

Sit sphæroides latum cujus axis A B, centrum C, sectio per axem ellipsis A D B E.

TAB. XIII.
Fig. 5.

Sit rursus focorum alteruter F, divisâque bifariam F C in G, intelligatur parabola A G B quæ basin habeat axem A B, verticem vero punctum G. Sitque inter dimetrum D E, & rectam curvæ parabolicæ A G B æqualem, media propor-

portionalis linea H. Erit hæc radius circuli qui superficiei sphæroidis propositi æqualis sit.

Conoidis hyperbolici superficiei curvæ circulum æqualem invenire.

TAB. XIV.
Fig. I.






ESto conoides hyperbolicum cujus axis A B, sectio per axem hyperbola C A D, cujus latus transversum E A, centrum F, latus rectum A G.


Sumatur in axe recta A H, æqualis dimidio lateri recto A G. & ut H F ad A F longitudine ita, sit A F ad F K potentiâ. Et intelligatur vertice K alia hyperbola descripta K L M, eodem axe & centro F cum priore, quæque latera rectum & transversum illi reciproce proportionalia habeat. Occurrat autem ipsi producta B C in M, sitque A L parallela B C. Erit jam sicut spatium A L M B, tribus rectis lineis & curva hyperbolica comprehensum, ad dimidium quadratum ex B C, ita superficies conoidis curva ad circulum bases suæ, cujus diameter C D. Unde constructio reliqua facile absolvetur, positâ hyperbolæ quadraturâ.

Quum igitur conoidis parabolici superficies ad circulum redigatur, æque ac superficies sphæræ, ex notis geometriæ regulis; in superficie sphæroidis oblongi, ut idem fiat, ponendum est arcus circumferentiæ longitudinem æquari posse lineæ rectæ. Ad sphæroidis vero lati, itemque ad conoidis hyperbolici superficiem eadem ratione complanandam, hyperbolæ quadratura requiritur. Nam parabolice lineæ longitudo, quam in sphæroide hoc adhibuimus, pendet à quadratura hyperbolæ, ut mox ostendemus.

Verum, quod non indignum animadversione videtur, invenimus absque ulla hyperbolice quadraturæ suppositione, circulum æqualem construi superficiei utrique simul, sphæroidis lati & conoidis hyperbolici.

Dato enim sphæroide quovis lato, posse inveniri conoides hyperbolicum, vel contra, dato conoide hyperbolico, posse inveniri sphæroides latum ejusmodi, ut utriusque si-
mul





mul superficiei exhibeatur circulus æqualis. cujus exemplum in casu uno cæteris simpliciore sufficiet attulisse.

Sit sphæroides latum cujus axis $S I$, sectio per axem ellipsis $S T I K$; cujus ellipsis centrum O , axis major $T K$. ponatur autem ellipsis hæc ejusmodi, ut latus transversum $T K$ habeat ad latus rectum eam rationem, quam linea secundum extremam & mediam rationem secta, ad partem sui majorem.

Sumatur $B C$ potentia dupla ad $S O$, item $B A$ potentia dupla ad $O K$. & sint hæ quatuor continue proportionales $B C$, $B A$, $B F$, $B E$, & ponatur $E P$ æqualis $E A$. Intelligatur jam conoides hyperbolicum $Q F N$, cujus axis $F P$; axi adjecta, sive $\frac{1}{2}$ latus transversum $F B$; dimidium latus rectum æquale $B C$.

Hujus conoidis superficies curva, unà cum superficie sphæroidis $S I$, æquabitur circulo cujus datus erit radius $M L$, qui nempe possit quadratum $T K$ cum duplo quadrato $S I$.

*Curvæ parabolicæ æqualem rectam lineam
invenire.*

Sit parabolæ portio $A B C$, cujus axis $B K$, basis $A C$ axi ad angulos rectos; & oporteat curvæ $A B C$ rectam æqualem invenire.

Accipiatursi basi dimidiæ $A K$ æqualis recta $I E$, quæ producatursi ad H , ut sit $I H$ æqualis $A G$, quæ parabolam in puncto basis A contingens, cum axe producto convenit in G . Sit jam portio hyperbolæ $D E F$, vertice E , centro I descriptæ, cujusque diameter sit $E H$; basis vero $D H F$ ordinatim ad diametrum applicata. Latus rectum pro lubitu sumi potest. Quod si jam super basi $D F$ intelligatur parallelogrammum constitutum $D P Q F$, quod portioni $D E F$ æquale sit; ejus latus $P Q$ ita secabit diametrum hyperbolæ in R , ut $R I$ sit æqualis curvæ parabolicæ $A B$, cujus dupla est $A B C$.

Apparet igitur hinc quomodo à quadratura hyperbolæ pendeat curvæ parabolicæ mensura, & illa ab hac vicissim.

O

Quæ-

DE LINEARUM CURVARUM EVOLUTIONE.
TAB. XIV.
Fig. 1.

TAB. XIV.
Fig. 3.

DE LINEA-
RUM CUR-
VARUM
EVOLUTIO-
NE.

TAB. XV.
Fig. I.

Quæcunque vero problemata ad alterum è duobus hisce reducuntur, quamlibet veræ proximam solutionem per numeros accipiunt, logarithmorum admirabili invento. Cum per hos hyperbolæ quadratura, ut olim invenimus, numeris quam proxime explicetur. Est autem regula hujusmodi.

Sit $D A B$ portio hyperbolæ, cujus asymptoti $C S, C V$, ductis $D E, B V$ parallelis asymptoto $S C$.

Accipiaturs differentia logarithmorum qui conveniunt numeris, eandem inter se rationem habentibus quam rectæ $D E, B V$; ejusque differentiæ quæraturs logarithmus. Cui addatur logarithmus hic (qui semper est idem) $0,36221,56887$. Summa erit logarithmus numeri qui spatium $D E V B A D$ designabit, tribus rectis & curva $D A B$ comprehensi, in partibus qualium parallelogrammum $D C$ est $100000,00000$. Unde porro facile quoque habebitur area portionis $D A B$.

Sit ex. gr. proportio $D E$ ad $B V$ ea quæ 36 ad 5 .

Ab $1,55630,25008$. $\logar^o. 36$.
auferatur $0,69897,00043$. $\logar^{us}. 5$.

Erit $0,85733,24965$. differ. \logar^{orum} .

Et $9,93314,92856$. \logar^{us} . differentiæ.

Cui addatur $0,36221,56887$. \logar^{us} . semper addendus.

Fit $10,29536,49743$. \logar^{us} . spatii $D E V B A D$.

Habebit hujus logarithmi numerus 11 characteres, quum characteristica sit 10 . Quæraturs itaque primo numerus proxime minor, conveniens invento logarithmo, qui numerus est 19740 . Deinde ex differentia logarithmi ejusdem, & proxime eum in tabula sequentis, reliqui characteres elicianturs. 81026 , scribendi post priores, ut fiat $197408,10260$, addito ad finem zero, ut efficiatur numerus characterum 11 . Est ergo area spatii $D E V B A D$ proxime partium $197408,10260$, qualium partium parallelogrammum $D C$ est $100000,00000$.




Fig. 2.





Fig. 1.





Fig. 3.



PROPOSITIO X.

DE LINEARUM CURVARUM EVOLUTIONE.

Lineas curvas exhibere quarum evolutione ellipses & hyperbolæ describantur, rectasque invenire iisdem curvis æquales.

Sit ellipsis vel hyperbole quælibet AB , cujus axis transversus AC ; centrum figuræ D ; latus rectum duplum ipsius AE . Et sumpto in sectione quovis puncto, ut B , applicetur ordinatim ad axem recta BK , & ad dictum punctum B tangens ducatur quæ conveniat cum axe in F ; sitque BG ipsi FB perpendicularis, axique occurrat in G ; & producat BG usque ad H , ut BH ad HG habeat rationem eam quæ componitur ex rationibus GF ad FK , & AD ad DE .

TAB. XV.
Fig. 2. & 3.

Dico curvam EHM , cujus puncta omnia inveniuntur eodem modo quo punctum H , esse eam cujus evolutione, unâ cum recta EA , describetur sectio AB . Ipsam autem BH tangere curvam in H ; & esse toti HEA æqualem. Quamobrem, si ab HB auferatur EA , reliqua recta portioni curvæ HE æquabitur. Apparet autem, cum curvæ puncta quævis indifferenter, certa que ratione inveniantur, esse eam utrobique ex earum genere, quæ merè geometricæ censentur. Unde & relatio horum omnium punctorum ad puncta axis AC , æquatione aliqua exprimi poterit, quam æquationem ad sextam dimensionem ascendere invenio; minimumque habere terminorum, si fuerit AB hyperbola cujus latera transversum rectumque æqualia. Tunc enim ducta ex quovis curvæ puncto, ut H , ad axem CAN perpendiculari HN ; vocatâque AC , a ; CN , x ; & NH , y ; erit semper cubus ab $x x \cdot y y \cdot a a$ æqualis $27 x x y y a a$. Sed hoc casu brevius quoque multo, quam prædicta constructione, curvæ EHM puncta reperiri possunt, ut in sequentibus ostendetur.

Cæterum notandum est, in ellipsi singulos quadrantes singularum linearum evolutione describi; sicut quadrans ABL

DE LINEA-
RUM CUR-
VARUM
EVOLUTIO-
NE.

evolutione lineæ A E H M, quadrans C L evolutione simili huic oppositæ C O M. Est enim hæc in sectione utraque diversitas, quod cum principium quidem curvæ E H M, tam in ellipsi quam in hyperbola, sit punctum E, sumpta A E æquali $\frac{1}{2}$ lateris recti; in hyperbola in infinitum inde dicta linea extenditur, at in ellipsi finitur in puncto axis minoris M, sumpta L M æquali $\frac{1}{2}$ lateris recti, secundum quod possunt ordinatim applicatæ ad dictum minorem axem. Namque hos terminos esse hujus curvæ, facile apparebit ortum ejus consideranti, quodque in ellipsi est sicut A D ad D E, ita L M ad M D.

Horum autem demonstrationi non immorabimur, sed ad ipsam methodum tradendam pergemus, qua & hæc curvæ ex sectionibus conicis, & aliæ innumeræ ex aliis quibuscunque datis inveniuntur.

PROPOSITIO XI.

DAtâ lineâ curvâ, invenire aliam cujus evolutione illa describatur; & ostendere quod ex unaquaque curva geometrica, alia curva itidem geometrica existat, cui recta linea æqualis dari possit.

TAB. XV.
Fig. 4. & 5.

Sit curva quæpiam, vel pars ejus, in partem unam inflexa A B F, & recta K L, ad quam puncta omnia referantur; & oporteat invenire curvam aliam, ut D E, cujus evolutione ipsa A B F describatur.

Ponatur jam inventa; & quoniam tangentes omnes curvæ D E, necesse est occurrere lineæ A B F, ex evolutione descriptæ, ad angulos rectos; patet quoque vicissim eas quæ ipsi A B F ad rectos angulos insistant, ut B D, F E, tacturas evolutam C D E.

Intelligentur autem puncta B, F, inter se proxima; & si quidem à parte A evolutio incipere ponatur, ulteriusque inde distet F quam B, etiam contactus E ulterius quam D distas-

tas.

stabit ab A ; intersectio vero rectarum B D, F E, quæ est G, cadet ultra punctum D in recta B D. Nam concurrere ipsas B D, F E necesse est, cum curvæ B. F ad partem cavam insistant rectis angulis.

DE LINEAS.
RUM CUR-
VARUM
EVOLUTIO-
NE.

Quanto autem punctum F ipsi B propinquius fuerit, tanto propius quoque puncta D, G & E convenire apparet; ideoque, si interstitium B F infinite parvum intelligatur, tria dicta puncta pro uno eodemque erunt habenda; ac præterea, ductâ rectâ B H, quæ curvam in B tangat, eadem quoque pro tangente in F censebitur. Sit B O parallela K L, & in hanc perpendiculares cadant B K, F L: secetque F L rectam B O in P, & sint puncta notata M, N, in quibus rectæ, B D, F E, occurrant ipsi K L. Quia igitur ratio B G ad G M est eadem quæ B O ad M N, data hac dabitur & illa; & quia recta B M datur magnitudine ac positione, dabitur & punctum G in producta B M, sive D in curva C D E, quia G & D in unum convenire diximus. Datur autem ratio B O ad M N, simpliciter quidem in Cycloide, ubi primum omnium illam investigavimus, invenimusque duplam; in aliis vero curvis, quas hætenus examinavimus, per duarum datarum rationum compositionem. Nam quia ratio B O ad M N componitur ex rationibus B O ad B P, sive N H ad L H, & ex B P sive K L ad M N, patet, si rationes hæc utraqque dentur etiam ex iis compositam rationem B O ad M N datum iri. Illas vero dari in omnibus curvis geometricis, in sequentibus patebit; ac proinde iis semper curvas assignari posse, quarum evolutione describantur, quæque ideo ad rectas lineas sint reducibiles.

Ponatur primò parabola esse A B F, cujus vertex A, axis A Q. Cum igitur lineæ B M, F N, sint parabolæ ad angulos rectos; ductæque sint ad axem A Q perpendiculares B K, F L; erunt, ex proprietate parabolæ, singulæ M K, N L dimidio lateri recto æquales; & ablata communi L M, æquales inter se K L, M N. Hinc, quum ratio B G ad G M componatur ex rationibus N H ad H L, & K L ad M N, uti dictum fuit, sitque earum posterior ratio

TAB. XVI.
Fig. 2.

DE LINEA-
RUM CUR-
VARUM
EVOLUTIO-
NE.

æqualitatis, liquet rationem BG ad GM fore eandem quæ NH ad HL ; & dividendo, BM ad MG , eandem quæ NL ad LH , sive MK ad KH ; nam LH , KH pro eadem habentur, propter propinquitatem punctorum B , F . Data autem est ratio MK ad KH , dato puncto B ; quoniam tam MK , quam KH dantur magnitudine; nam MK æquatur dimidio lateri recto, KH vero duplæ KA . Dataque etiam est positione & magnitudine recta BM . Ergo & MG data erit, adeoque & punctum G , sive D , in curva RDE ; quod nempe invenitur producta BM usque in G , ut sit BM ad MG sicut $\frac{1}{2}$ lateris recti ad duplam KA .

Et sic quidem, adsumptis in parabola ABF aliis quotlibet punctis præter B , totidem quoque puncta lineæ RDE , simili ratione, invenientur; atque hoc ipso lineam RDE geometricam esse constat, unaque proprietas ejus innotescit, ex qua cæteræ deduci possunt. Ut si inquirere deinde velimus, quam æquatione exprimatur relatio punctorum omnium curvæ CDE ad rectam AQ : ducta in hanc perpendiculari DQ , vocatoque latere recto parabolæ ABF , a ; AK , b ; AQ , x ; QD , y . Quoniam ratio BM ad MD , hoc est, KM ad MQ , est ea quæ $\frac{1}{2}a$ ad $2b$, estque ipsa $KM \propto \frac{1}{2}a$, erit & MQ æqualis $2b$. Est autem $MA \propto \frac{1}{2}a + b$. ergo AQ sive x æqualis $3b + \frac{1}{2}a$. Unde $b \propto \frac{1}{3}x - \frac{1}{6}a$. Porro quoniam, sicut quadratum MK , hoc est, $\frac{1}{4}aa$ ad quadratum KB , hoc est, ab , ita qu. MQ , hoc est, $4bb$ ad qu. QD ; erit qu. QD , sive $y \cdot y \propto \frac{16b^3}{4}$. Ubi, si in locum b substituatur $\frac{1}{3}x - \frac{1}{6}a$, quod illi æquale inventum est, fiet $yy \propto 16 \cdot \text{cub.} \frac{1}{3}x - \frac{1}{6}a$ divisus per a . Ac proinde $\frac{27}{16}ayy \propto \text{cubo ab } x - \frac{1}{2}a$. Accipiat AR in axe parabolæ $\propto \frac{1}{2}a$; eritque $RQ \propto x - \frac{1}{2}a$. Curvam igitur CDE ejus naturæ esse liquet, ut semper cubus lineæ RQ æquetur parallelepipedo, cujus basis qu. QD , altitudo $\frac{27}{16}a$; ac proinde ipsam paraboloidem esse, cujus evolutione describi parabolam AB supra ostendimus; cujus nimirum paraboloidis latus rectum æquetur $\frac{27}{16}$ lateris recti parabolæ AB . tunc enim hujus latus rectum æquale fit $\frac{1}{27}$ lateris recti paraboloidis, quemadmodum ibi fuit definitum.

Quo-

Quomodo porro ratio $O B$ ad $B P$, five $N H$ ad $H L$, non tantum cum $A B F$ parabola est, sed etiam alia quælibet curva geometrica, semper inveniri possit manifestum est. Quoniam tantum recta $F H$ ducenda est, quæ curvam in adsumpto puncto F tangat, & $F N$ ipsi $F H$ perpendicularis: unde $N H$ & $H L$ datæ erunt, ac proinde ratio quoque earum data.

DE LINEARUM CURVARUM EVOLUTIONE.
TAB. XV.
Fig 4. & 5.

At non æque liquet quo pacto ratio $K L$ ad $M N$ innotescat, quam tamen semper quoque reperiri posse sic ostendemus.

Sint rectæ $K T$, $L V$, perpendiculares super $K L$, sitque $K T$ æqualis $K M$, & $L V$ æqualis $L N$, & ducatur $V X$ parallela $L N$, quæ occurrat ipsi $K T$ in X . Quoniam ergo semper eadem est differentia duarum $L K$, $N M$, quæ duarum $L N$, $K M$, hoc est, quæ duarum $L V$, $K T$; est autem differentia ipsarum $L V$, $K T$ æqualis $X T$, & $X V$ ipsi $L K$; erit proinde $N M$ æqualis duabus simul $V X$, $X T$, vel ei quo $V X$ ipsam $X T$ superat. Atque adeo, si data fuerit ratio $V X$ ad $X T$, data quoque erit ratio $V X$ ad utramque simul $V X$, $X T$, vel ad excessum $V X$ supra $X T$, hoc est, data erit ratio $V X$ five $L K$ ad $N M$.

Sciendum est autem, quoniam $K T$ ipsi $K M$, & $L V$ ipsi $L N$, æquales sumptæ sunt, locum punctorum T , V , fore lineam quandam vel rectam vel curvam datam, ut mox ostendetur. Et siquidem sit linea recta; ut contingit si $A B F$ conici sectio fuerit, & $K L$ axis ejus; constat rationem $V X$ ad $X T$ datam fore, data positione ipsius lineæ $V T$, quæ locus est punctorum V , T ; semperque eandem tunc haberi dictam rationem, qualecunque fuerit intervallum $K L$.

At si locus alia linea curva fuerit, diversa erit ratio $V X$ ad $X T$, prout majus minusve fuerit intervallum $K L$. Inquirendum est autem quænam futura sit ista ratio, cum $K L$ infinite parvum imaginamur, quoniam & puncta B , F , proxima invicem posuimus. Similiter itaque & puncta V , T , lineæ curvæ minimam particulam intercipere intelligendum est; unde recta $V T$, cum ea quæ in T curvam contingit, coincidet. Sit ergo tangens illa $T Y$; potest enim duci quoniam

niam

DE LINEA-
RUM CUR-
VARUM
EVOLUTIO-
NE.

niam curva, ad quam sunt puncta T , V , geometrica est. Ratio igitur YK ad KT data erit, adeoque & VX ad XT . ex qua etiam rationem LK ad NM dari ostendimus.

Quænam vero sit linea ad quam sunt puncta T , V , invenitur ponendo certum punctum S in recta KL , & vocando SK , x ; KT , y . Nam quia data est curva ABF , eique BM ad angulos rectos ducta, invenietur inde quantitas lineæ KM , per methodum tangentium à Cartesio traditam, quæ ipsi KT , sive y æquabitur, & ex ea æquatione, natura curvæ TV innotescet, ad quam deinde tangens ducenda est. Sed clariora omnia fient sequenti exemplo.

TAB. XVI.
Fig. 3.

Sit ABF paraboloides illa, cui superius rectam æqualem invenimus; in qua nempe cubi perpendicularium in rectam SK , sint inter se sicut quadrata ex ipsa SK abscissarum. Et oporteat invenire curvam CDE cujus evolutione paraboloides SBF describatur.






Hic primum ratio BO ad BP facile invenitur, quia tangentem paraboloidis in puncto B duci scimus, sumpta SH æquali $\frac{1}{2} SK$. Cui tangenti cum BM ad angulos rectos insistat, dantur jam lineæ MH , HK , ac proinde earum inter se ratio, quæ est eadem quæ OB ad BP .


Ut autem ratio BP , sive KL ad MN innotescat, ponantur ad KL perpendiculares rectæ KT , LV , æquales singulis KM , LN , sitque VX parallela LK . Jam quia ex duabus simul KL , LN , auferendo KM , relinquitur MN^* ; hoc est, auferendo ex duabus XV , VL , sive XV ,

* In Exemplari suo ad marginem scripsit Auctor. supponitur hic rectam LN majorem esse quam KM , quod melius fuerat antea probari, etsi verum est. Demonstratio autem baud difficilis est, sit abscissa $SK \propto x$; perpendicularis $KB \propto u$; latus rectum paraboloidis $\propto a$. Quia $SH \propto \frac{1}{2} SK$, est $HK \propto \frac{3}{2} SK$ ($\frac{3}{2}x$). Propter angulum rectum HBM , triangula rectangula HBK , KBM similia sunt, & HK ($\frac{3}{2}x$), KB (u), KM , sunt in continua proportione; ergo

$KM \propto \frac{2uu}{3x}$, cujus quadratum est $\frac{4u^4}{9xx} \propto \frac{4au^4}{9axx}$; sed ut notavit auctor ex natu-

ra Paraboloidis ABF ; $u^3 \propto axx$; ergo quadratum lineæ $KM \propto \frac{4au^4}{9axx} \propto \frac{4au^4}{9u^3} \propto \frac{4au}{9}$ unde sequitur ipsum KM , augeri si crescat BK (u). Cum autem LF excedat BK , LN superabit KM , quod demonstrandum erat.





X V, X K, ipsam K T; hinc autem relinqui apparet V X & X T: erunt igitur hæ duæ V X, X T ipsi M N æquales, ac proinde ratio K L ad M N eadem quæ V X ad duas simul V X, X T. Ut autem hæc ratio innotescat cum intervallum K L est minimum; oportet secundum prædicta inquirere quis sit locus, sive linea ad quam sunt puncta T, V. Quod ut fiat sit latus rectum paraboloidis A B F $\propto a$; S K $\propto x$; K T $\propto y$.

DE LINEA-
RUM CUR-
VARUM
EVOLUTIO-
NE.

Quia igitur proportionales sunt K H, K B, K M, est-
que H K $\propto \frac{1}{2} x$: K B ex natura paraboloidis æqualis R.
cub. $a x x$: fiet K M, hoc est K T $\propto \frac{2}{7} R$. cub. $a a x \propto y$,
ac proinde $\frac{2}{7} a a x \propto y^3$. Unde patet locum punctorum T,
V, esse paraboloidem illam, quam cubicam vocant geome-
træ. Cui proinde ad T tangens ducetur, sumptâ S Y duplâ
ipsius S K, junctâque Y T. Et jam quidem ratio V X ad
duas simul V X, X T, quam diximus eandem esse ac K L
ad M N, erit ea quæ Y K ad utramque simul Y K, K T.
Hæc autem ratio data est, ergo & ratio K L ad M N. Sed
& rationem O B ad P B datam esse ostensum est. Ergo,
cum ex duabus hisce componatur ratio B D ad D M, ut su-
pra patuit, dabitur & hæc; & dividendo, ratio B M ad
M D; adeoque & punctum D in curva D E.

Ad constructionem autem brevissimam hoc pacto hic per-
veniemus. K T sive K M dicta fuit y . Itaque M H erit y
 $\rightarrow \frac{1}{2} x$. Et M H ad H K, sive O B ad B P, ut $y \rightarrow \frac{3}{2} x$
ad $\frac{3}{2} x$. sive, sumptis omnium duplis, ut $2 y \rightarrow 3 x$ ad $3 x$.
Deinde quia Y K $\propto 3 x$, erit Y K ad Y K \rightarrow K T, si-
ve per prædicta, K L ad M N, ut $3 x$ ad $3 x \rightarrow y$. Atqui
ex rationibus O B ad B P, & K L ad M N, componi di-
ximus rationem B D ad D M. Ergo ratio B D ad D M erit
composita ex rationibus $2 y \rightarrow 3 x$ ad $3 x$, & $3 x$ ad $3 x \rightarrow y$;
ideoque erit ea quæ $2 y \rightarrow 3 x$ ad $3 x \rightarrow y$. & divi-
dendo, ratio B M ad M D, eadem quæ y ad $3 x \rightarrow y$.

Sit S Z perpendicularis ad S K, eique occurrat M B pro-
ducta in Z. Quia ergo ratio B M ad M D inventa est ea quæ
 y ad $y \rightarrow 3 x$, hoc est quæ M K ad M K $\rightarrow 3 K S$. Sicut au-
tem

P




tem

DE LINEA-
RUM CUR-
VARUM
EVOLUTIO-
NE.

tem $M K$ ad $M K + 3 K S$, ita $M B$ ad $M B + 3 B Z$: erit proinde $M B$ ad $M D$ ut $M B$ ad $M B + 3 B Z$. Unde liquet $M D$ æqualem sumendam ipsi $M B + 3 B Z$. Atque ita quotlibet puncta curvæ $C D E$ invenire licebit. Cujus curvæ portio quælibet ut $D S$, rectæ $D B$, quæ paraboloidi $S A B$ ad angulos rectos occurrit, æqualis erit. Constat autem geometricam esse, & si velimus, possumus æquatione aliqua relationem exprimere punctorum omnium ipsius ad puncta axis $S K$.

TAB. XVII.
Fig. 1.

Simili modo autem, si inquiremus in paraboloidē illa sive parabola cubica, in qua cubi ordinatim applicatarum ad axem, sunt inter se sicut portiones axis abscissæ, inveniemus curvam cujus evolutionē describitur, quæque proinde rectæ lineæ æquari poterit, nihilo difficiliōri constructione per puncta determinari. Nam si fuerit illa $S A B$; axis $S M$; (dicitur autem improprie axis in hac curva, cum forma ejus sit ejusmodi, ut ductâ $S Z$, quæ secet $S M$ ad angulos rectos, ea portiones similes curvæ habeat ad partes oppositas;) agatur per punctum quodlibet B , in paraboloidē sumptum, recta $B D$, quæ curvam ad angulos rectos secet, axique ejus occurrat in M , rectæ vero $S Z$ in Z . Deinde sumatur $B D$ æqualis dimidiæ $B M$, unâ cum sesquialtera $B Z$. Eritque D unum è punctis curvæ quæsitæ $R D$ vel $R I$, cujus evolutione, juncta tamen recta quadam $R A$, describetur paraboloides $S A B$. Sunt autem hic, quod notatu dignum est, quodque in aliis etiam nonnullis harum paraboloidum contingit, duæ evolutiones in partes contrarias, quarum utraque à puncto certo A initium capit; ita ut evolutione ipsius $A R D$, in infinitum porro continuatæ, describatur paraboloidis pars infinita $A B F$; evolutione autem totius $A R I$, similiter in infinitum extensæ, tantum particula $A S$. Punctum autem A definitur, sumptâ $S P$ quæ sit ad latus rectum paraboloidis, sicut unitas ad radicem quadrato-quadraticam numeri 91125, (is cubus est ex 45) applicatâque ordinatim $P A$. Unde porro punctum R , confinium duarum curvarum $R D$, $R I$, invenitur sicut cætera omnia harum



rum curvarum, hoc est, sicut punctum D modo inventum fuit.

DE LINEARUM CURVARUM EVOLUTIONE.

Denique, quæcunque fuerit ex paraboloidum genere curva S A B, semper æque facile curvam aliam, cujus evolutione ipsa describatur, quæque propterea rectæ adæquari possit, per puncta inveniri comperimus. Atque adeo constructionem universalem sequenti tabella exhibemus, quæ quousque libuerit extendi poterit.

$$\text{Si } \begin{cases} a x \propto y^2 \\ a^2 x \propto y^3 \\ a x^2 \propto y^3 \\ a x^3 \propto y^4 \\ a^3 x \propto y^4 \end{cases} \text{ Erit } \begin{cases} B M + 2 B Z \\ \frac{1}{2} B M + \frac{1}{2} B Z \\ 2 B M + 3 B Z \\ 3 B M + 4 B Z \\ \frac{1}{3} B M + \frac{4}{3} B Z \end{cases} \propto B D.$$

Sit S B parabola, vel paraboloidum aliqua, cujus vertex S, recta S K vel axis, vel axi perpendicularis, ad quam referuntur æquatione puncta paraboloidis; & ipsa quidem S K semper ad partem cavam ducta intelligitur; cui perpendicularis S Z. Ponendo jam S K $\propto x$; B K $\propto y$, quæ à puncto quovis curvæ perpendicularis est ipsi S K; & latere recto curvæ $\propto a$; prior pars tabellæ, quæ ad sinistram est, naturam singularum paraboloidum singulis æquationibus explicat. Quibus respondent in parte dextra quantitates lineæ B D, quæ si curvæ S B insistant ad angulos rectos, exhibitura sit punctum D in curva quæsita C D. Exempli gratia, si S B est parabola quæ ex conic sectione fit, ei scimus convenire æquationem tabellæ primam, $a x \propto y^2$; cui respondet ab altera parte $B M + 2 B Z \propto B D$. Unde longitudo lineæ B D cognoscitur, adeoque inventio quotlibet punctorum curvæ C D. Quam quidem, hoc casu, paraboloidem esse supra demonstratum fuit, eam nempe, cujus æquatio tertia est hujus tabellæ.

TAB. XVII.
Fig. 2.

Construitur autem tabella hoc pacto, ut B M sumatur multiplex secundum numerum qui est exponens potestatis x in æquatione; B Z vero, multiplex secundum exponentem potestatis y ; ex his autem utrisque compositæ accipiatur pars denominata ab exponente potestatis a .

DE LINEA-
RUM CUR-
VARUM
EVOLUTIO-
NE.

Præter hæc autem paraboloides lineas, alias item invenimus, à quibus, non absimili constructione, deducuntur curvæ rectis comparabiles. Assimilantur autem hyperbolis, eo quod asymptotos suas habent, sed tantum angulum rectum constituentes. Et harum primam quidem statuimus hyperbolam ipsam, quæ est è conic sectione.

TAB. XVII.
Fig. 3.

Reliquarum vero naturam ut explicemus; sunt PS, SK , asymptoti curvæ AB , rectum angulum comprehendentes, & à curvæ puncto quolibet B ducatur BK parallela PS , fitque $SK \propto x$; $KB \propto y$. Si igitur hyperbola sit AB , scimus rectangulum linearum SK, KB , hoc est, rectangulum xy semper eidem quadrato æquale esse, quod vocetur aa .

Proxima vero hyperboloidum erit, in qua solidum ex quadrato lineæ SK , in altitudinem KB ductum, hoc est, solidum $xx y$, cubo certo æquabitur, qui vocetur a^3 . Atque ita innumeræ aliæ hujus generis hyperboloides existunt, quarum proprietatem sequens tabella singulis æquationibus exhibet, simulque rationem construendi curvam DC , cujus evolutione quæque generetur.


$$\begin{array}{l} \left\{ \begin{array}{l} x y \propto a^2 \\ x^2 y \propto a^3 \\ x y^2 \propto a^3 \\ x^3 y \propto a^4 \\ x y^3 \propto a^4 \end{array} \right. \quad \text{Si} \quad \left\{ \begin{array}{l} \frac{1}{2} B M \rightarrow \frac{1}{2} B Z \\ \frac{2}{3} B M \rightarrow \frac{1}{3} B Z \\ \frac{1}{3} B M \rightarrow \frac{2}{3} B Z \\ \frac{3}{4} B M \rightarrow \frac{1}{4} B Z \\ \frac{1}{4} B M \rightarrow \frac{3}{4} B Z \end{array} \right. \quad \text{Erit} \quad \left\{ \begin{array}{l} \frac{1}{2} B M \rightarrow \frac{1}{2} B Z \\ \frac{2}{3} B M \rightarrow \frac{1}{3} B Z \\ \frac{1}{3} B M \rightarrow \frac{2}{3} B Z \\ \frac{3}{4} B M \rightarrow \frac{1}{4} B Z \\ \frac{1}{4} B M \rightarrow \frac{3}{4} B Z \end{array} \right\} \propto BD. \end{array}$$

Recta $DBMZ$ curvam AB , ut antea quoque, fecit ad angulos rectos, occurritque asymptotis SK, SP , in M & Z . Si igitur exempli gratia hyperbola fuerit AB , cujus æquatio est $xy \propto a^2$, sumetur $BD \propto \frac{1}{2} BM + \frac{1}{2} BZ$, quemadmodum tabella præcipit. Eritque punctum D in curva DC quæsitum, cujus alia quolibet puncta sic inveniri poterunt, & portio ejus quælibet rectæ lineæ adæquari. Et hæc quidem eadem illa est curva, cujus relationem ad axem hyperbolæ superius æquatione expressimus. Constructio autem tabellæ hujus plane eadem est quæ superioris.

Cæterum, quoniam tum ad harum curvarum, tum ad earum

rum quæ ex paraboloidibus nascuntur constructionem, du-
cendæ sunt lineæ $D B Z$, quæ ad datum punctum B secant
curvas $A B$, sive ipsarum tangentes $B H$, ad angulos re-
ctos; dicemus in universum quomodo hæ tangentes inve-
niantur. In æquatione itaque, quæ cujusque curvæ naturam
explicat, quales æquationes duabus tabellis præcedentibus
exponuntur, considerare oportet quæ sint exponentes pote-
statis x & y , & facere ut, sicut exponens potestatis x ad
exponentem potestatis y , ita sit $S K$ ad $K H$. Juncta enim
 $H B$ curvam in B continget. Velut in tertia hyperboloide,
cujus æquatio est $x y^2 \propto a^3$: quia exponens potestatis x est
 1 , potestatis autem y exponens 2 ; oportet esse ut 1 ad 2 ita
 $S K$ ad $K H$. Horum autem demonstrationem noverunt
analyticæ artis periti, qui jam pridem omnes has lineas con-
templari cœperunt; & non solum paraboloidum istarum,
sed & spatiorum quorundam infinitorum, inter hyperboloi-
des & asymptotos interjectorum, plana solidaque dimensi
sunt. Quod quidem & nos, facili atque universali metho-
do, expedire possemus, ex sola tangentium proprietate sum-
pta demonstratione. Sed illa non sunt hujus loci.

DE LINEA-
RUM CUR-
VARUM
EVOLUTIO-
NE.



HOROLOGII OSCILLATORII

PARS QUARTA.

De centro Oscillationis.

CEntrorum Oscillationis, seu Agitationis, investigatio-
nem olim mihi, fere adhuc puero, aliisque multis, do-
ctissimus Mersennus proposuit, celebre admodum inter illius
temporis Geometras problema, prout ex litteris ejus ad me
datis colligo, nec non ex Cartesii haud pridem editis, qui-
bus ad Mersennianas super his rebus responsum continetur.
Postulabat autem centra illa ut invenirem in circuli sectori-

DE CENTRO
OSCILLA-
TIONIS.

bus, tam ab angulo quam à medio arcu suspensis, atque in
latus agitatís, item in circuli segmentis, & in triangulis,
nunc ex vertice, nunc ex media basi pendentibus. Quod eo
redit, ut pendulum simplex, hoc est, pondus filo appensum
reperiatur ea longitudine, ut oscillationes faciat temporum
eorundem ac figuræ istæ, uti dictum est, suspensæ. Simul
vero pretium operæ, si forte quæsitis satisfecissem, magnum
fane & invidiosum pollicebatur. Sed a nemine id quod desi-
derabat tunc obtinuit. Nam me quod attinet, cum nihil re-
perirem quo vel primus aditus ad contemplationem eam pa-
tesceret; velut à limine repulsus, longiori investigatione tunc
quidem abstinui. Qui vero rem sese confecisse sperabant viri
insignes, Cartesius, Honoratus Fabrius, aliique, nequaquam
scopum attigerunt, nisi in paucis quibusdam facilioribus,
sed quorum tamen demonstrationem nullam idoneam, ut mi-
hi videtur, attulerunt. Idque comparatione eorum quæ hic
trademus manifestum fore spero, si quis forte quæ ab illis
tradita sunt, cum nostris hisce contulerit; quæ quidem &
certioribus principiis demonstrata arbitror, & experimentis
prorsus convenientia reperi. Occasio vero ad hæc denuo ten-
tanda, ex pendulorum automati nostri temperandorum ratio-
ne oblata est, dum pondus mobile, præter id quod in imo
est, illis applico, ut in descriptione horologii fuit explica-
tum. Hinc melioribus auspiciis atque à prima origine rem
exorsus, tandem difficultates omnes superavi, nec tantum
problematum Mersennianorum solutionem, sed alia quoque
illis difficiliora reperi, & viam denique, qua in lineis, su-
perficiebus, solidisque corporibus certa ratione centrum illud
investigare liceret. Unde quidem, præter voluptatem inve-
niendi quæ multum ab aliis quæsitæ fuerant, cognoscendique
in his rebus naturæ leges decretaque, utilitatem quoque
eam cepi, cujus gratia primo animum ad hæc applicueram,
reperita illa horologii temperandi ratione facili & expedita.
Accessit autem hoc quoque, quod pluris faciendum arbitror,
ut certæ, sæculisque omnibus duraturæ, mensuræ defini-
tionem absolutissimam per hæc tradere possem; qualis est ea
quæ ad finem horum adjecta reperietur.

DE-

DEFINITIONES.

DE CENTRO
OSCILLA-
TIONIS.

I.

Pendulum dicatur figura quælibet gravitate prædita, sive linea fuerit, sive superficies, sive solidum, ita suspensa ut circa punctum aliquod, vel axem potius, qui plano horizontis parallelus intelligitur, motum reciprocum vi gravitatis suæ continuare possit.

I I.

Axis ille horizontis plano parallelus, circa quem penduli motus fieri intelligitur, dicatur axis Oscillationis.

I I I.

Pendulum simplex dicatur quod filo vel linea inflexili, gravitatis experte, constare intelligitur, ima sui parte pondus affixum gerente; cujus ponderis gravitas, velut in unum punctum collecta, censenda est.

I V.

Pendulum verò compositum, quod pluribus ponderibus constat, immutabiles distantias servantibus, tum inter se, tum ab axe Oscillationis. Hinc figura quælibet suspensa, ac gravitate prædita, pendulum compositum dici potest, quatenus cogitatu in partes quotlibet est divisibilis.

V.

Pendula isochrona vocentur, quorum Oscillationes,

nes, per arcus similes, æqualibus temporibus peraguntur.

V I.

Planum Oscillationis dicatur illud, quod per centrum gravitatis figuræ suspensæ duci intelligitur, ad axem oscillationis rectum.

V I I.

Linea centri, recta quæ per centrum gravitatis figuræ ducitur, ad axem oscillationis perpendicularis.

V I I I.

Linea perpendiculi, recta in plano oscillationis, ducta ab axe oscillationis, ad horizontis planum perpendicularis.

I X.

Centrum oscillationis vel agitationis figuræ cujuslibet, dicatur punctum in linea centri, tantum ab axe oscillationis distans, quanta est longitudo penduli simplicis quod figuræ isochronum sit.

X.

Axis gravitatis, linea quævis recta, per centrum gravitatis figuræ transiens.

X I.

Figura plana, vel linea in plano sita, in planum agitari dicatur, cum axis oscillationis in eodem cum figura lineave est plano.

XII.

X I I.

Eædem vero in latus agitari dicantur, cum axis oscillationis ad figuræ lineæve planum rectus est.

DE CENTRO
OSCILLA-
TIONIS.

X I I I.

Quando pondera in rectas lineas duci dicentur, id ita est intelligendum, ac si numeri lineæve, quantitates ponderum rationemque inter se mutuam exprimentes, ita ducantur.

H Y P O T H E S E S.

I.

S*I pondera quotlibet, vi gravitatis suæ, moveri incipiant; non posse centrum gravitatis ex ipsis compositæ altius, quam ubi incipiente motu reperiatur, ascendere.*

Altitudo autem in his secundum distantiam à plano horizontali consideratur, graviaque ponuntur ad hoc planum, secundum rectas ipsi perpendiculares, descendere conari. Quod idem ab omnibus, qui de centro gravitatis egerunt, vel ponitur expresse, vel à legentibus supplendum est, cum absque eo centri gravitatis consideratio locum non habeat.

Ipsa vero hypothesis nostra quominus scrupulum moveat, nihil aliud sibi velle eam ostendemus, quam quod nemo unquam negavit, gravia nempe sursum non ferri. Nam primo, si unum quodpiam corpus grave proponamus, illud vi gravitatis suæ altius ascendere non posse extra dubium est. ascendere autem tunc intelligitur scilicet, cum ejus centrum gravitatis ascendit. Sed & idem de quotlibet ponderibus, inter se per lineas inflexiles junctis, concedi necesse est, quoniam nihil vetat ipsa tanquam unum aliquod considerari.

Q

Ita-

DE CENTRO
OSCILLA-
TIONIS.





Itaque neque horum commune gravitatis centrum ultro ascendere poterit.


Quod si jam pondera quotlibet non inter se connexa ponantur, illorum quoque aliquod commune centrum gravitatis esse scimus. Cujus quidem centri quanta erit altitudo, tantam ajo & gravitatis ex omnibus compositæ altitudinem censeri debere; siquidem omnia ad eandem illam centri gravitatis altitudinem deduci possunt, nullâ aliâ accersita potentia quam quæ ipsis ponderibus inest, sed tantum lineis inflexilibus ea pro lubitu conjungendo, ac circa gravitatis centrum movendo; ad quod nulla vi neque potentia determinata opus est. Quare, sicut fieri non potest ut pondera quædam, in plano eodem horizontali posita, supra illud planum, vi gravitatis suæ, omnia æqualiter attollantur; ita nec quorumlibet ponderum, quomodocunque dispositorum, centrum gravitatis ad majorem quam habet altitudinem pervenire poterit. Quod autem diximus pondera quælibet, nulla adhibita vi, ad planum horizontale, per centrum commune gravitatis eorum transiens, perducì posse, sic ostendetur.

TAB. XVII.
Fig. 4.

Sint pondera A, B, C, positione data, quorum commune gravitatis centrum sit D. per quod planum horizontale ductum ponatur, cujus sectio recta E F. Sint jam lineæ inflexiles D A, D B, D C, quæ pondera sibi invariabiliter connectant; quæ porro moveantur, donec A sit in plano E F ad E. Virgis vero omnibus per æquales angulos delatis, erunt jam B in G, & C in H.

Rursus jam B & C connecti intelligantur virgâ H G, quæ secet planum E F in F; ubi necessario quoque erit centrum gravitatis binorum istorum ponderum connexorum, cum trium, in E, G, H, positorum, centrum gravitatis sit D, & ejus quod est in E, centrum gravitatis sit quoque in plano E D F. Moventur igitur rursus pondera H, G, super puncto F, velut axe, absque vi ulla, ac simul utraque ad planum E F adducuntur, adeo ut jam tria, quæ prius erant in A, B, C, ad ipsam sui centri gravitatis D altitudinem, suo





fuo ipſorum æquilibrium, translata appareat. quod erat oſtendendum. Eademque de quocunque aliis eſt demonſtratio. DE CENTRO
OSCILLA-
TIONIS.

Hæc autem hypotheſis noſtra ad liquida etiam corpora valet, ac per eam non ſolum omnia illa, quæ de innatantibus habet Archimedes, demonſtrari poſſunt, ſed & alia pleraque Mechanicæ theoremata. Et ſanè, ſi hac eadem uti ſcirent novorum operum machinatores, qui motum perpetuum irritò conatu moliuntur, facile ſuos ipſi errores deprehenderent, intelligerentque rem eam mechanica ratione haudquaquam poſſibilem eſſe.

I I.

Remoto aëris, alioque omni impedimento manifeſto, quemadmodum in ſequentibus demonſtrationibus id intelligi volumus, centrum gravitatis penduli agitati, æquales arcus deſcendendo ac aſcendendo percurrere.

De pendulo ſimplici hoc demonſtratum eſt propoſitione 9 de Deſcenſu gravium. Idem vero & de compoſito tenendum eſſe declarat experientia; ſiquidem, quæcunque fuerit penduli figura, æque apta continuando motui reperitur, niſi in quantum plus minusve aëris objectu impeditur.

P R O P O S I T I O I.

Ponderibus quotlibet ad eandem partem plani exiſtentibus, ſi à ſingulorum centrīs gravitatis agantur in planum illud perpendiculares; hæ ſingulæ in ſua pondera ductæ, tantundem ſimul efficiant, ac perpendicularis, à centro gravitatis ponderum omnium in planum idem cadens, ducta in pondera omnia.

Sint pondera A, B, C, ſita ad eandem partem plani, TAB. XVIII
Fig. 1.

Q 2

CU-

DE CENTRO
OSCILLA-
TIONIS.

cujus sectio recta DF , inque ipsum à singulis ponderibus ducantur perpendiculares AD , BE , CF . Sit autem G punctum centrum gravitatis ponderum omnium A , B , C , à quo ducatur perpendicularis in idem planum GH . Dico summam productorum, quæ fiunt à singulis ponderibus in suas perpendiculares, æquari producto ab recta GH in omnia pondera A , B , C .

Intelligentur enim perpendiculares, à singulis ponderibuseductæ, continuari in alteram partem plani DF , sintque singulæ DK , EL , FM , ipsi HG æquales; omnesque lineæ, inflexiles virgas referant, ad horizontem parallelas; & ponantur in K , L , M , gravitates ejusmodi, quæ singulæ cum sibi oppositis A , B , C , æquilibrium faciant ad intersectionem plani DEF . Omnes igitur K , L , M , æquiponderabunt omnibus A , B , C . Erit autem, sicut longitudo AD ad DK , ita pondus K ad pondus A , ac proinde DA ducta in magnitudinem A , æquabitur DK , five GH , ductæ in K . Similiter EB in B æquabitur EL , five GH , in L ; & FC in C æquabitur FM , five GH , in M . Ergo summa productorum ex AD in A , BE in B , CF in C , æquabitur summæ productorum ex GH in omnes K, L, M . Quum autem K , L , M , æquiponderent ipsis A , B , C , etiam iisdem A , B , C , ex centro ipsorum gravitatis G suspensis, æquiponderabunt. Unde, cum distantia GH æqualis sit singulis DK , EL , FM , necesse est magnitudines A , B , C , simul sumptas, æquari ipsis K, L, M . Itaque & summa productorum ex GH in omnes A, B, C , æquabitur productis ex DA in A , EB in B , & FC in C . quod erat demonstrandum.

Etsi vero in demonstratione positæ fuerint rectæ AK , BL , CM , horizonti parallelæ, & planum ad horizontem erectum; patet, si omnia simul in alium quemlibet situm transponantur, eandem manere productorum æqualitatem, cum rectæ omnes sint eadem quæ prius. Quare constat propositum.

PRO-

P R O P O S I T I O II.

Positis quæ prius, si pondera omnia A, B, C , sint æqualia; dico summam omnium perpendicularium AD, BE, CF , æquari perpendiculari, à centro gravitatis ductæ, GH , multiplici secundum ponderum numerum.

DE CENTRO
OSCILLA-
TIONIS.
TAB. XVIII.
Fig. 1.

Quum enim summa productorum, à ponderibus singulis in suas perpendiculares, æquetur producto ex GH in pondera omnia; sitque hîc, propter ponderum æqualitatem, summa illa productorum æqualis producto ex uno pondere in summam omnium perpendicularium; itemque productum ex GH in pondera omnia, idem quod productum ex pondere uno in GH , multiplicem secundum ponderum numerum: patet summam perpendicularium necessario jam æquari ipsi GH , multiplici secundum ponderum numerum. quod erat demonstrandum.

P R O P O S I T I O III.

Si magnitudines quædam descendant omnes, vel ascendant, licet inæqualibus intervallis; altitudines descensus vel ascensus cujusque, in ipsam magnitudinem ductæ, efficient summam productorum æqualem ei, quæ fit ex altitudine descensus vel ascensus centri gravitatis omnium magnitudinum, ducta in omnes magnitudines.

Sunto magnitudines A, B, C , quæ ex A, B, C , descendant in D, E, F ; vel ex D, E, F , ascendant in A, B, C . Sitque earum centrum gravitatis omnium, dum sunt in A, B, C , eadem altitudine cum puncto G ; cum vero sunt in D, E, F , eadem altitudine cum puncto H . Dico summam productorum ex altitudine AD in A , BE in B , CF in C , æquari producto ex GH in omnes A, B, C .

TAB. XVIII.
Fig. 2.

DE CENTRO
OSCILLA-
TIONIS.

Intelligatur enim planum horizontale cujus sectio recta $M P$, atque in ipsum incidant productæ $A D$, $B E$, $C F$ & $G H$, in M , N , O , P .

Prop. I.
Huj.

Quia igitur summa productorum ex $A M$ in A , $B N$ in B , $C O$ in C , æqualis est facto ex $G P$ in omnes A , B , C *. Similiterque summa productorum ex $D M$ in A , $E N$ in B , $F O$ in C , æqualis facto ex $H P$ in omnes A , B , C ; sequitur & excessum priorum productorum supra posteriora, æquari facto ex $G H$ in omnes magnitudines A , B , C . Dictum vero excessum æquari manifestum est productis ex $A D$ in A , $B E$ in B , $C F$ in C . Ergo hæc simul etiam æqualia erunt producto ex $G H$ in omnes A , B , C . quod erat demonstrandum.

PROPOSITIO IV.

SI pendulum è pluribus ponderibus compositum, atque è quiete dimissum, partem quamcunque oscillationis integræ confecerit, atque inde porro intelligantur pondera ejus singula, relicto communi vinculo, celeritates acquisitas sursum convertere, ac quousque possunt ascendere; hoc facto, centrum gravitatis ex omnibus compositæ, ad eandem altitudinem reversum erit, quam ante inceptam oscillationem obtinebat.

TAB. XVIII.
Fig. 3. 4.

Sit pendulum compositum ex ponderibus quotlibet A , B , C , virgæ, vel superficiiei pondere carenti, inhærentibus. Sitque suspensum ab axe per D punctum ducto, qui ad planum, quod hic conspicitur, perpendicularis intelligatur. In quo eodem plano etiam centrum gravitatis E , ponderum A , B , C , positum sit; lineaque centri $D E$, inclinetur ad lineam perpendiculi $D F$, angulo $E D F$: attracto, nimirum, eo usque pendulo. Hinc vero dimitti jam ponatur, ac partem quamlibet oscillationis conficere, ita ut pondera A , B , C , perveniant in G , H , K . Unde, relicto

Et deinceps communi vinculo, singula intelligantur acqui-
fitas celeritates sursum convertere, (quod impingendo in pla-
na quædam inclinata, fieri poterit,) & quousque possunt
ascendere, nempe in L, M, N. Quo ubi pervenerint, sit
centrum gravitatis omnium punctum P. Dico hoc pari alti-
tudine esse cum puncto E.

Nam primum quidem, constat P non altius esse quam E,
ex prima sumptarum hypothesium. Sed nec humilior fore sic
ostendemus. Sit enim, si potest, P humilior quam E, &
intelligentur pondera ex iisdem, ad quas ascenderunt, alti-
tudinibus recidere, quæ sunt L G, M H, N K. Unde
quidem easdem celeritates ipsis acquiri constat, quas habe-
bant ad ascendendum ad istas altitudines *, hoc est, eas i-
psas quas acquisierant motu penduli ex C B A D in
K H G D. Quare, si cum dictis celeritatibus ad virgam su-
perficiemve, cui innexa fuere, nunc referantur, eique si-
mul adhærescant, motumque secundum inceptos arcus con-
tinuent; quod fiet, si priusquam virgam attingant, à planis
inclinatis Q Q percussa intelligantur; absolvet, hoc modo
restitutum pendulum, oscillationis partem reliquam, æquè
ac si absque ulla interruptione motum continuasset. Ita ut
centrum gravitatis penduli, E, arcus æquales E F, F R,
descendendo ac ascendendo percurrat, ac proinde in R ea-
dem ac in E altitudine reperiatur. Ponebatur autem E esse
altius quam P centrum gravitatis ponderum in L, M, N,
positorum. Ergo & R altius erit quam P: adeoque ponde-
rum ex L, M, N, delapforum centrum gravitatis, altius,
quam unde descenderat, ascendisset. quod est absurdum *.
Non igitur centrum gravitatis P humilior est quam E. Sed
nec altius erat. Ergo æque altum sit necesse est. quod erat
demonstrandum.

DE CENTRO
OSCILLA-
TIONIS.

* Propos. 4.
part. 2.

* Hypoth. 1.
hui.

PROPOSITIO V.

Dato pendulo ex ponderibus quotlibet composito,
si singula ducantur in quadrata distantiarum
sua-

DE CENTRO
OSCILLA-
TIONIS.




suarum ab axe oscillationis, & summa productorum dividatur per id quod fit ducendo ponderum summam, in distantiam centri gravitatis communis omnium ab eodem axe oscillationis; orietur longitudo penduli simplicis composito isochroni, sive distantia inter axem & centrum oscillationis ipsius penduli compositi.

TAB. XIX.
Fig. 1. 2.

Sint pondera pendulum componentia, (quorum nec figura nec magnitudo, sed gravitas tantum consideretur), A, B, C, suspensa ab axe, qui per punctum D, ad planum quod conspicitur, rectus intelligitur. In quo plano sit quoque eorum centrum commune gravitatis E; nam pondera in diversis esse nihil refert. Distantia puncti E ab axe, nempe recta ED, vocetur d . Item ponderis A distantia AD, sit e ; BD, f ; CD, g . Ducendo itaque singula pondera in quadrata suarum distantiarum, erit productorum summa $aee + bff + cgg$. Et rursus, ducendo summam ponderum in distantiam centri gravitatis omnium, productum æquale erit $ad + bd + cd$ *. Unde, productum prius per hoc dividendo, habebitur $\frac{aee + bff + cgg}{ad + bd + cd}$. Cui longitudini si æqualis statuatur longitudo penduli simplicis FG, quæ etiam x vocabitur; dico hoc illi composito isochronum esse.

* Prop. I.
Schol.

Ponantur enim tum pendulum FG, tum linea centri DE, æqualibus angulis à linea perpendiculi remota, illud ab FH, hæc ab DK, atque inde dimissa librari, & in recta DE sumatur DL æqualis FG. Itaque pondus G penduli FG, integra oscillatione arcum GM percurrent, quem linea perpendiculi FH medium secabit. punctum vero L arcum illi similem & æqualem LN, quem medium dividet DK. Itemque centrum gravitatis E, percurrent similem arcum EI. Quod si in arcubus GM, NL, sumptis punctis quibuslibet, similiter ipsos dividantibus, ut O & P, eadem celeritas esse ostendatur ponderis G in O, & puncti L in P; constabit inde æqualibus temporibus utrosque



que arcus percurri, ac proinde pendulum FG , pendulo DE CENTRO OSCILLATIONIS. composito ex A, B, C , isochronum esse. Ostendetur autem hoc modo.

Sit primo, si potest, major celeritas puncti L , ubi in P pervenit, quam ponderis G in O . Constat autem, dum punctum L percurrit arcum LP , simul centrum gravitatis E percurrere arcum similem EQ . Ducantur à punctis Q, P, O , perpendiculares sursum, quæ occurrant subtensis arcuum EI, LN, GM , in R, S, Y . & SP vocetur y . Unde, cum sit ut LD, x , ad ED, d , ita SP, y , ad RQ ; erit RQ æqualis $\frac{dy}{x}$. Jam quia pondus G eam celeritatem habet in O , qua valet ad eandem unde descendit altitudinem ascendere, nempe per arcum OM , vel perpendicularem OY ipsi PS æqualem; punctum igitur L , ubi in P pervenerit, majorem ibi celeritatem habebit, quam qua ascenditur ad altitudinem PS . Dum vero L transit in P , simul pondera A, B, C , similes arcus percurrunt ipsi LP , nimirum AT, BV, CX . Estque puncti L celeritas in P , ad celeritatem ponderis A in T , quum vinculo eodem contineantur, sicut distantia DL ad DA . Sed ut quadratum celeritatis puncti L , quam habet in P , ad quadratum celeritatis puncti A in T , ita est altitudo ad quam illa celeritate ascendi potest, ad altitudinem quò hac celeritate ascendi potest*. Ergo etiam, ut quadratum distantiae DL , quod est xx , ad quadratum distantiae DA , quod est ee , ita est altitudo quo ascenditur celeritate puncti L , quum est in P , (quæ altitudo major dicta est quam PS sive y), ad altitudinem quo ascenditur celeritate ponderis A in T ; si nempe postquam in T pervenit, relicto pendulo, seorsim motum suum sursum converteret. Quæ proinde altitudo major erit quam $\frac{ey}{xx}$.

* Prop. 3.
& 4. part. 2.

Eadem ratione, erit altitudo ad quam ascenderet pondus B , celeritate acquisita per arcum BV , major quam $\frac{ffy}{xx}$. Et altitudo ad quam ascenderet pondus C , celeritate acquisita per arcum CX , major quam $\frac{ggy}{xx}$. Unde, ductis singulis al-

R

titu-

DE CENTRO
OSCILLA-
TIONIS.

titudinibus istis in sua pondera, erit summa productorum major quam $\frac{a e e y + b f f y + c g g y}{x x}$. quæ proinde major quoque probatur quam $\frac{a d y + b d y + c d y}{x}$. Nam quia posita est longitudo x æqualis $\frac{a e e + b f f + c g g}{a d + b d + c d}$; erit $a d x + b d x + c d x$ æquale $a e e + b f f + c g g$. Et ductis omnibus in y , & dividendo per $x x$, erit $\frac{a d y + b d y + c d y}{x}$ æquale $\frac{a e e y + b f f y + c g g y}{x x}$. Unde quod dictum est consequitur. Est autem summa ista productorum æqualis ei, quod fit ducendo altitudinem, ad quam ascendit centrum gravitatis commune ponderum A, B, C, in summam ipsorum ponderum, $a + b + c$; si nempe singula, uti dictum, seorsim quousque possunt moveantur. Quantitas vero $\frac{a d y + b d y + c d y}{x}$ producit ex descensu centri gravitatis eorundem ponderum, (qui descensus est R Q, sive $\frac{d y}{x}$, ut supra inventum fuit,) in eandem quoque ponderum summam $a + b + c$. Ergo quum prius productum altero hoc majus ostensum fuerit, sequitur ascensum centri gravitatis ponderum A, B, C, si, relicto pendulo ubi pervenere in T, V, X, singula celeritates acquisitas fursum convertant, majorem fore ejusdem centri gravitatis descensu, dum ex A, B, C, moventur in T, V, X. quod est absurdum, cum dictus ascensus descensui æqualis esse debeat, per antecedentem.

Eodem modo, si dicatur celeritatem puncti L, ubi pervenerit in P, minorem esse celeritate ponderis G quum in O pervenerit; ostendemus ascensum possibilem centri gravitatis ponderum A, B, C, minorem esse quam descensum, quod eidem propositioni antecedenti repugnat. Quare relinquitur ut eadem sit celeritas puncti L, ad P translati, quæ ponderis G in O. Unde, ut superius dictum, sequitur pendulum simplex F G composito ex A, B, C, isochronum esse.

PROPOSITIO VI.

Dato pendulo ex quocunque ponderibus æqualibus composito; si summa quadratorum factorum

*rum à distantis, quibus unumquodque pondus ab-
est ab axe oscillationis, applicetur ad distantiam
centri gravitatis communis ab eodem oscillationis
axe, multiplicem secundum ipsorum ponderum nu-
merum, oriatur longitudo penduli simplicis compo-
sito isochroni.*

Sint posita eadem quæ prius, sed pondera omnia inter se
æqualia intelligantur, & singula dicantur a . Rursus vero
nulla eorum magnitudo consideretur, sed pro minimis ha-
beantur, quantum ad extensionem.

Itaque penduli simplicis isochroni longitudo, per propo-
sitionem antecedentem, erit $\frac{ace + aff + agg}{ad + ad + ad}$. Vel, quia quanti-
tas divisa ac dividens utraque per a dividitur, fiet nunc ea-
dem longitudo, $\frac{ce + ff + gg}{3d}$. Quo significatur summa quadra-
torum à distantis ponderum ab axe oscillationis, applicata
ad distantiam centri gravitatis omnium ab eodem oscilla-
tionis axe, multiplicem secundum numerum ipsorum ponde-
rum, qui hic est 3. facile enim perspicitur numerum hunc,
in quem ducitur distantia d , respondere necessario ipsi pon-
derum numero. Quare constat propositum.

Quod si pondera æqualia in unam lineam rectam conjun-
cta sint, atque ex termino ejus superiore suspensa; constat
distantiam centri gravitatis, ex omnibus compositæ, ab axe
oscillationis, multiplicem secundum ponderum numerum,
æquari summæ distantiarum omnium ponderum ab eodem
oscillationis axe*; ac proinde, hoc casu, habebitur quoque
longitudo penduli simplicis, composito isochroni, si summa
quadratorum à distantis ponderum singulorum ab axe oscil-
lationis, dividatur per summam earundem omnium distan-
tiarum.

* Prop. 2.
huj.

DEFINITIO XIV.

SI fuerint in eodem plano, figura quædam, & linea recta quæ ipsam extrinsecus tangat; & per ambitum figuræ alia recta, plano ejus perpendicularis, circumferatur, superficiemque quandam describat, quæ deinde secetur plano per dictam tangentem ducto & ad dictæ figuræ planum inclinato; solidum comprehensum à duobus planis istis, & parte superficiei descriptæ, inter utrumque planum intercepta, vocetur Cuneus super figura illa, tanquam basi, abscissus.

TAB. XXI.
Fig. 3.

In schemate adjecto, est A B E C figura data; recta eam tangens M D; quæ vero per ambitum ejus circumfertur, E F; cuneus autem figura solida planis A B E C, M F G, & parte superficiei, à recta E F descriptæ, comprehensa.

DEFINITIO XV.

Distantia inter rectam, per quam cuneus abscissus est, & punctum baseos, in quod perpendicularis cadit à cunei centro gravitatis, dicatur cunei Subcentrica.

TAB. XIX.
Fig. 3.

Nempe in figura eadem, si K sit centrum gravitatis cunei, recta vero K I ad basin ejus A B E C perpendicularis ducta sit, & rursus I M perpendicularis ad M D; erit I M, quam subcentricam dicimus.

PROPOSITIO VII.

Cuneus super plana figura qualibet abscissus, plano inclinato ad angulum semirectum, æqualis

lis est solido, quod fit ducendo figuram eandem, in altitudinem æqualem distantie centri gravitatis figuræ, ab recta per quam abscissus est cuneus.

Sit, super figura plana $A C B$, cuneus $A B D$ abscissus plano ad angulum semirectum inclinato, ac transeunte per $E E$, rectam tangentem figuram $A C B$, inque ejus plano sitam. Centrum vero gravitatis figuræ sit F , unde in rectam $E E$ ducta sit perpendicularis $F A$. Dico cuneum $A C B$ æqualem esse solido, quod fit ducendo figuram $A C B$ in altitudinem ipsi $F A$ æqualem.

Intelligatur enim figura $A C B$ divisa in particulas minimas æquales quarum una G . Itaque constat, si harum singulæ ducantur in distantiam suam ab recta $E E$; summam productorum fore æqualem ei quod fit ducendo rectam $A F$ in particulas omnes*, hoc est, ei quod fit ducendo figuram ipsam $A C B$, in altitudinem æqualem $A F$. Atqui particulæ singulæ ut G , in distantias suas $G H$ ductæ, æquales sunt parallelepipedis, vel prismatibus minimis, super ipsas erectis, atque ad superficiem obliquam $A D$ terminatis, quale est $G K$; quia horum altitudines ipsis distantis $G H$ æquantur, propter angulum semirectum inclinationis planorum $A D$ & $A C B$. Patetque ex his parallelepipedis totum cuneum $A B D$ componi. Ergo & cuneus ipse æquabitur solido super basi $A C B$, altitudinem habenti rectæ $F A$ æqualem. quod erat demonstrandum.

PROPOSITIO VIII.

S*I figuram planam linea recta tangat, divisaque intelligatur figura in particulas minimas æquales, atque à singulis ad rectam illam perpendiculares ductæ: erunt omnium harum quadrata, simul sumpta, æqualia rectangulo cuidam, multiplici secundum ipsarum particularum numerum; quod*

DE CENTRO
OSCILLA-
TIONIS.

nempe rectangulum fit à distantia centri gravitatis figuræ ab eadem recta, & à subcentrica cunei, qui per illam super figura abscinditur.

TAB. XIX.
Fig. 4.

Positis enim cæteris omnibus quæ in constructione præcedenti, sit LA cunei ABD subcentrica in rectam EE . Oportet igitur ostendere, summam quadratorum omnium à distantis particularum figuræ ACB æquari rectangulo ab FA , LA , multiplici secundum particularum numerum.

Et constat quidem ex demonstratione præcedenti, altitudines parallelepipedorum singulorum, ut GK , æquales esse distantis particularum, quæ ipsorum bases sunt, ut G , ab recta AE . Quare, si jam parallelepipedum GK ducamus in distantiam GH , perinde est ac si particula G ducatur in quadratum distantia GH . Eodemque modo se res habet in reliquis omnibus. Atqui producta omnia parallelepipedorum in distantias suas ab recta AE , æquantur simul producto ex cuneo ABD in distantiam LA *, quia cuneus gravitat super puncto L . Ergo etiam summa productorum à particulis singulis G , in quadrata suarum distantiarum ab recta AE , æquabitur producto ex cuneo ABD in rectam LA , hoc est, producto ex figura ACB in rectangulum ab FA , LA . Nam cuneus ABD , æqualis est producto ex figura ACB in rectam FA *. Rursus quia figura ACB æqualis est producto ex particula una G , in numerum ipsarum particularum; sequitur, dictum productum ex figura ACB in rectangulum ab FA , LA , æquari producto ex particula G in rectangulum ab FA , LA , multiplici secundum numerum particularum G . Cui proinde etiam æqualis erit dicta summa productorum, à particulis singulis G in quadrata suarum distantiarum ab recta AE , sive à particula una G in summam omnium horum quadratorum. Quare, ommissa utrinque multiplicatione in particulam G , necesse est summam eandem quadratorum æquari rectangulo ab FA , LA , multiplici secundum numerum particularum in quas figura ACB divisa intelligitur. quod erat demonstrandum.

* Prop. 1.
huj.

* Prop.
preced.

PRO.

PROPOSITIO IX.

DE CENTRO
OSCILLA-
TIONIS.

DAtâ figurâ planâ & in eodem plano lineâ rectâ, quæ vel secet figuram vel non, ad quam perpendiculares cadant à particulis singulis minimis & æqualibus, in quas figura divisa intelligitur; invenire summam quadratorum ab omnibus istis perpendicularibus; sive planum, cujus multiplex, secundum particularum numerum, dictæ quadratorum summæ æquale sit.

Sit data figura plana A B C, & in eodem plano recta E D; divisâque figurâ cogitatu in particulas minimas æquales, intelligantur ab unaquaque earum perpendiculares ductæ in rectam E D, sicut à particula F ducta est F K. Oporteatque invenire summam quadratorum ab omnibus istis perpendicularibus. TAB. XIX. I
Fig. 5. 6.

Sit datæ E D parallela recta A L, quæ figuram tangat, ac tota extra eam posita sit. Potest autem figuram vel ab eadem parte ex qua est E D, vel à parte opposita contingere. Distantia vero centri gravitatis figuræ ab recta A L sit recta G A, secans E D in E; & subcentrica cunei, super figura abscissi plano per rectam A L, sit H A. Dico summam quadratorum quæsitam æquari rectangulo A G H una cum quadrato E G, multiplicibus secundum particularum numerum, in quas figura divisa intelligitur.

Occurrat enim F K, si opus est producta, tangenti A L in L puncto. Itaque primum, eo casu quo recta E D à figura distat, & tangens A L ad eandem figuræ partem ducta est, sic propositum ostendetur. Summa omnium quadratorum F K æquatur totidem quadratis K L, una cum bis totidem rectangulis K L F, & totidem insuper quadratis L F. Sed quadrata K L æquantur totidem quadratis E A. Et rectangula K L F æqualia esse constat totidem rectangulis E A G,

DE CENTRO
OSCILLA-
TIONIS.
* Prop. 2.
huj.
* Prop.
preced.

E A G, quia omnes F L æquales totidem G A *, Et denique quadrata L F æquantur totidem rectangulis H A G *, hoc est, totidem quadratis A G cum totidem rectangulis A G H. Ergo quadrata omnia F K æqualia erunt totidem quadratis E A, cum totidem duplis rectangulis E A G, atque insuper totidem quadratis A G cum totidem rectangulis A G H. Atqui tria ista; nempe quadratum E A cum duplo rectangulo E A G & quadrato A G, faciunt quadratum E G. Ergo apparet quadrata omnia F K æquari totidem quadratis E G, una cum totidem rectangulis A G H. Quod erat ostendendum.

TAB. XX.
Fig. 1. 2.

Porro in reliquis omnibus casibus, quadrata omnia F K æquantur totidem quadratis K L, minus bis totidem rectangulis K L F, plus totidem quadratis L F; hoc est, totidem quadratis E A, minus totidem duplis rectangulis E A G, plus totidem quadratis A G, cum totidem rectangulis A G H. Atqui, omnibus hisce casibus, fit quadratum E A, plus quadrato A G, minus duplo rectangulo E A G, æquale quadrato E G. Ergo rursus quadrata omnia F K æqualia erunt totidem quadratis E G, una cum totidem rectangulis A G H. Quare constat propositum.








Hinc sequitur, rectangulum A G H eadem magnitudine esse, utriusvis cunei subcentrica fuerit A H; hoc est, sive per hanc, sive per illam tangentium parallelarum A L abscissi. Itaque A G unius casus ad A G alterius, ut H G huius ad H G illius. Sicut autem rectæ A G inter se, ita in utroque casu cunei per A L abscissi, ut colligitur ex prop. 7. huj. Ergo ita quoque reciproce G H ad G H.

Apparet etiam, dato figuræ planæ centro gravitatis G, & subcentrica cunei, per alterutram tangentium parallelarum A L abscissi, dari quoque cunei, per tangentem alteram A L abscissi, subcentricam.

P R O P O S I T I O X.

TAB. XX.
Fig. 3.

Positis quæ in propositione præcedenti; si data recta E D transeat per G, centrum gravitatis



tis figuræ $A B C$; erit summa quadratorum à di-
 stantiis particularum, in quas figura divisa intel-
 ligitur, ab recta $E D$, æqualis rectangulo soli
 $A G H$, multiplici secundum ipsarum particula-
 rum numerum.

Hoc enim manifestum est, quum nullum tunc sit quadra-
 tum $E G$.

PROPOSITIO XI.

Positis rursus cæteris ut in præcedentium penul-
 tima; si $D E$ sit axis figuræ planæ $A B C$, in
 duas æquales similesque portiones eam dividens, sit-
 que insuper $V G$ distantia centri gravitatis dimi-
 diæ figuræ $D A D$ ab recta $E D$, cunei vero, su-
 per ipsam abscissi per ipsam $E D$, subcentrica $G X$;
 erit rectangulum $X G V$ æquale rectangulo $A G H$.

Est enim rectangulum $X G V$, multiplex secundum nu-
 merum particularum figuræ $D A D$, æquale quadratis omni-
 bus perpendicularium à particulis ejusdem figuræ dimidiæ in
 rectam $E D$ cadentium *. Ac proinde idem rectangulum
 $X G V$, multiplex secundum numerum particularum totius
 figuræ $A B C$, æquale erit quadratis perpendicularium, ab
 omnibus particulis figuræ hujus in rectam $E D$ demissarum;
 hoc est, rectangulo $A G H$ multiplici secundum eundem
 particularum numerum, ut constat ex propos. præcedenti.
 Unde sequitur rectangula $X G V$, $A G H$ inter se æqualia
 esse. quod erat demonstrandum.

PROPOSITIO XII.

Datis in plano punctis quotlibet; si ex centro
 gravitatis eorum circulus quilibet describatur;
 S du-

DE CENTRO
 OSCILLA-
 TIONIS.

TAB. XX.
 Fig. 4.

* Prop. 8.
 huj.

DE CENTRO
OSCILLA-
TIONIS.

ducantur autem ab omnibus datis punctis, ad punctum aliquod in circuli illius circumferentia lineæ rectæ; erit summa quadratorum ab omnibus semper eidem plano æqualis.

TAB. XX.
Fig. 5.

Sint data puncta A B C D: centrumque gravitatis eorum, siue magnitudinum æqualium ab ipsis suspensarum, sit E; & centro E describatur circulus quilibet F f, in cujus circumferentia sumpto puncto aliquo, ut F, ducantur ad id, à datis punctis, rectæ A F, B F, C F, D F. Dico earum omnium quadrata, simul sumpta, æqualia esse plano cuidam dato, semperque eidem, ubicunque in circumferentia punctum F sumptum fuerit.

Ducantur enim rectæ G H, G K, angulum rectum constituentes, & quarum unicuique omnia data puncta sint posita ad eandem partem. Et à singulis in utramque harum perpendiculares agantur A L, A K; B M, B O; C N, C P; D H, D Q. A centro autem gravitatis E, & à puncto F, in alterutram duarum, G H vel G K, perpendiculares E R, F S. Et item, à datis punctis, in ipsam F S perpendiculares A V, B X, C Y, D Z. Et F T perpendicularis in ipsam E R. Porro sit jam

$$\begin{array}{lll} A L \propto a & A K \propto e & \text{radius } E F \propto z \\ B M \propto b & B O \propto f & G S \propto x \\ C N \propto c & C P \propto g & \\ D H \propto d & D Q \propto h & \end{array}$$

Quia autem E est centrum gravitatis punctorum A, B, C, D, si addantur in unum perpendiculares A L, B M, C N, D H, compositaque ex omnibus dividatur in tot partes, quot sunt data puncta; earum partium uni æqualis erit E R*. Similiterque, divisâ in totidem partes summâ perpendicularium A K, B O, C P, D Q, earum uni æqualis erit perpendicularis, ducta ex E in rectam G K, siue ipsa R G*. Itaque, si summa omnium A L, B M, C N, D H, siue $a + b + c + d$ vocetur l : summa vero omnium, A K, B O, C P, D Q, siue $e + f + g + h$, vocetur m : & numerus, dato-

* Prop. 2.
huj.

* Prop. 2.
huj.

datorum punctorum multitudinem exprimens, dicatur θ ; erit $E R \propto \frac{l}{\theta}$; & $R G \propto \frac{m}{\theta}$. Cumque $G S$ sit x , erit $R S$ five DE CENTRO
OSCILLA-
TIONIS.

$F T \propto x - \frac{m}{\theta}$; vel $\frac{m}{\theta} - x$, si $G R$ major quam $G S$; & semper quadratum $F T \propto x x - 2 \frac{x m}{\theta} + \frac{m m}{\theta \theta}$. quo ablato ab quadrato $F E \propto z z$, relinquetur quadratum $T E \propto z z - x x + 2 \frac{x m}{\theta} - \frac{m m}{\theta \theta}$. Et proinde $T E \propto \sqrt{z z - x x + 2 \frac{x m}{\theta} - \frac{m m}{\theta \theta}}$.

Erat autem $E R \propto \frac{l}{\theta}$. Itaque $T R \propto \frac{l}{\theta} +$ vel $- \sqrt{z z - x x + 2 \frac{x m}{\theta} - \frac{m m}{\theta \theta}}$. quæ $T R$, brevitatis gratia, dicatur y . Colli-

gamus jam porro summam quadratorum omnium $F A$, $F B$, $F C$, $F D$. Quadratum $A F$ æquatur quadratis $A V$, $V F$. Est autem $A V$ æqualis differentiæ duarum $V K$, $A K$, siue duarum $S G$, $A K$; ac proinde $A V \propto x - e$ vel $e - x$; & qu. $A V \propto x x - 2 e x + e e$. $V F$ vero æqualis est differentiæ duarum $F S$, $V S$ siue duarum $F S$, $A L$; ac proinde $V F \propto y - a$ vel $a - y$; & qu. $V F \propto y y - 2 a y + a a$. Ad-
ditisque quadratis $A V$, $V F$, fit quadratum $F A \propto x x - 2 e x + e e + y y - 2 a y + a a$. Eodemque modo inveniuntur quadrata reliquarum $F B$, $F C$, $F D$; atque omnia ordine disposita erunt hæc;

$$\text{qu. } F A \propto x x - 2 e x + e e + y y - 2 a y + a a.$$

$$\text{qu. } F B \propto x x - 2 f x + f f + y y - 2 b y + b b.$$

$$\text{qu. } F C \propto x x - 2 g x + g g + y y - 2 c y + c c.$$

$$\text{qu. } F D \propto x x - 2 h x + h h + y y - 2 d y + d d.$$

Horum vero summa; si ponamus quadrata $e e + f f + g g + h h \propto n n$; & quadrata $a a + b b + c c + d d \propto k k$; erit ista, $\theta x x - 2 m x + n n + \theta y y - 2 l y + k k$. Siquidem θ erat numerus datorum punctorum ideoque & quadratorum, positumque fuerat $e + f + g + h \propto m$, & $a + b + c + d \propto l$.

In ista vero summa, si in terminis $\theta y y$ & $2 l y$, pro y , ponatur id cuius loco positum erat, nempe $\frac{l}{\theta} +$ vel $-$

$$\sqrt{z z - x x + 2 \frac{x m}{\theta} - \frac{m m}{\theta \theta}}$$

$$\text{fiet } + \theta y y \propto \frac{l l}{\theta} + 2 l \sqrt{z z - x x + 2 \frac{x m}{\theta} - \frac{m m}{\theta \theta}} + \theta z z - \theta x x + 2 x m - \frac{m m}{\theta}.$$

DE CENTRO
OSCILLA-
TIONES.

$$\& - 2ly \propto - 2\frac{ll}{\theta} - 2l\sqrt{zz - xx} + 2\frac{xm}{\theta} - \frac{mm}{\theta\theta}.$$

$$\text{vel } +\theta yy \propto \frac{ll}{\theta} - 2l\sqrt{zz - xx} + 2\frac{xm}{\theta} - \frac{mm}{\theta\theta} + \theta zz - \theta xx \\ xm - \frac{mm}{\theta}.$$

$$+ 2\& - 2ly \propto - 2\frac{ll}{\theta} + 2l\sqrt{zz - xx} + 2\frac{xm}{\theta} - \frac{mm}{\theta\theta}.$$

Ac proinde, utroque casu, pro $\theta yy - 2ly$ habebitur $-\frac{ll}{\theta} + \theta zz - \theta xx + 2xm - \frac{mm}{\theta}$. Quò appositis reliquis quantitatibus, summa prædicta contentis, $\theta xx - 2xm + nn + kk$, fiet tota summa, nempe quadratorum F A, F B, F C, F D, $\propto \theta zz + nn + kk - \frac{mm - ll}{\theta}$. Quod apparet esse planum datum, cum hæ quantitates omnes datæ sint; semperque idem reperiri, ubicunque in circumferentia sumptum fuerit punctum F. quod erat demonstrandum.

Quod si puncta data diversas gravitates habere ponantur, invicem commensurabiles, ut si punctum A ponderet ut 2, B ut 3, C ut 4, D ut 7, eorumque reperto gravitatis centro, circulus rursus describatur, ad cujus circumferentiæ punctum, à datis punctis rectæ ducantur, ac singularum quadrata multiplicia sumantur secundum numerum ponderis puncti sui; ut quadratum A F duplum, B F triplum, C F quadruplum, D F septuplum; dico rursus summam omnium æqualem fore spatio dato, semperque eidem, ubicunque in circumferentia punctum sumptum fuerit. Patet enim hoc ex præcedenti demonstratione, si imaginemur puncta ipsa multiplicia secundum numeros attributæ cuique gravitatis; quasi nempe in A duo puncta conjuncta sint, in B tria, in C quatuor, in D septem, atque illa omnia æqualiter gravia.

PROPOSITIO XIII.

SI figura plana, vel linea in plano existens, aliter atque aliter suspendatur à punctis, quæ, in eodem plano accepta, æqualiter à centro gravitatis suæ distent; agitata motu in latus, sibi ipsi isochrona est.

Sit

Sit figura plana, vel linea in plano existens $A B C$, cuius centrum gravitatis D . quo eodem centro, circumferentia circuli in eodem plano describatur, $E C F$. Dico, si à quovis in illa puncto, ut E , C , vel G , suspensa figura agitur in latus; sibi ipsi, sive eidem pendulo simplici, isochronam esse.

Sit prima suspensio ex E puncto, quando autem est extra figuram, ut hic, putandum est lineam $E H$, ex qua figura pendet, rigidam esse, atque immobiliter ipsi affixam.

Intelligatur figura $A B C$ divisa in particulas minimas æquales, à quarum omnium centrīs gravitatis, ad punctum E , rectæ ductæ sint; quas quidem manifestum est, quum moveatur figura motu in latus, esse ad axem agitationis perpendiculares. Harum igitur omnium perpendicularium quadrata, divisa per rectam $E D$; multiplicem secundum numerum particularum in quas figura divisa est, efficiunt longitudinem penduli simplici, figuræ isochroni*, quæ sit $K L$. Suspensâ autem figurâ ex puncto G , rursus longitudo penduli simplici isochroni invenitur, dividendo quadrata omnia linearum, quæ à particulis figuræ ducuntur ad punctum G , per rectam $G D$, multiplicem secundum earundem particularum numerum*. Quum igitur puncta G & E sint in circumferentia descripta centro D , quod est centrum gravitatis figuræ $A B C$, sive centrum gravitatis punctorum omnium, quæ centra sunt particularum figuræ æqualium; erit proinde summa quadratorum à lineis, quæ à dictis particulis ad punctum G ducuntur, æqualis summæ quadratorum à lineis quæ ab iisdem particulis ducuntur ad punctum E *. Hæ vero quadratorum summæ, utraque suspensione, applicantur ad magnitudines æquales: quippe, in suspensione ex E , ad rectam $E D$, multiplicem secundum numerum omnium particularum; in suspensione autem ex G , ad rectam $D G$, multiplicem secundum earundem particularum numerum. Ergo patet, ex applicatione hac posteriori, quum nempe suspensio est ex G , fieri longitudinem penduli isochroni eandem atque ex applicatione priori, hoc est, eandem ipsi $K L$.

DE CENTRO
OSCILLA-
TIONIS.

Eodem modo, si ex C, vel alio quovis puncto circumferentiæ E C F, figura suspendatur, eidem pendulo K L isochrona esse probabitur. Itaque constat propositum.

PROPOSITIO XIV.

DAtâ figurâ solidâ, & lineâ rectâ interminatâ, quæ vel extra figuram cadat, vel per eam transeat; divisâque figurâ cogitatu in particulas minimas æquales, à quibus omnibus ad datam rectam perpendiculares ductæ intelligantur; invenire summam omnium quæ ab ipsis fiunt quadratorum, sive planum, cujus multiplex secundum partium numerum, dictæ quadratorum summæ æquale sit.

TAB. XXI.
Fig. 1.

Sit data figura solida A B C D, & linea recta quæ, per punctum E transiens, ad planum hujus paginæ erecta intelligatur: quæque vel secet figuram, vel tota extra cadat. Intellectoque, à singulis particulis minimis æqualibus, solidum A B C D constituentibus, velut F, rectas duci perpendiculares in datam rectam per E, quemadmodum hic F E, oporteat omnium quadratorum F E summam invenire.

Secetur figura plano E A C, per dictam datam lineam & per centrum gravitatis figuræ ducto. Item aliud planum intelligatur per eandem lineam datam, perque E G, quæ ipsi est ad angulos rectos.

47. lib. 1.
Eucl.

Constat jam, quadratum rectæ cujusque, quæ à particula dictarum aliqua, ad lineam datam per E perpendicularis ducitur, sicut F E, æquari quadratis duarum F G, F H, quæ, ab eadem particula, in plana per E G & E C antedicta, perpendiculares aguntur*. Quare, si cognoscere possimus summam quadratorum, quæ fiunt ab omnibus perpendicularibus, quæ à particulis universis cadunt in plana dicta per E G & E C; habebimus etiam huic æqualem summam

Fig. 1.




Fig. 2.




Fig. 3.




Fig. 4.




Fig. 5.





Fig. 6.



nam quadratorum à perpendicularibus, quæ ab universis iisdem particulis cadunt in rectam datam per E punctum.

DE CENTRO
OSCILLA-
TIONIS.

Illa vero prior quadratorum summa colligetur hoc modo: Ponatur primò figuram planam dari O Q P, ad latus figuræ solidæ A B C D, ejusdem cum ipsa altitudinis, quæque sit ejusmodi, ut secta lineis rectis Q Q, R R, quæ respondeant planis figuram solidam A B C D secantibus M M, N N, & his parallelis; eadem sit dictarum linearum inter se, quæ & planorum horum ratio, si nempe sumantur utrinque quæ in ordine sibi respondent. Ut si linea R R sit ad Q Q quemadmodum planum N N ad M M. Quod si igitur figura plana O Q P, in totidem particulas minimas æquales divisa intelligatur, quot intelliguntur in solido A B C D, erunt etiam in unoquoque segmento figuræ planæ, velut Q Q R R, tot numero particulæ, quot sunt in figuræ solidæ segmento M M N N, isti segmento respondente; ac proinde & summa quadratorum, à perpendicularibus omnium particularum figuræ O Q P in planum E G; æquabitur summæ quadratorum, à perpendicularibus omnium particularum figuræ solidæ, in idem planum E G productis. Illa autem quadratorum summa data erit, si dentur in figura O Q P, cuneoque illius, quæ propof. 9. huj. requiri diximus. Ergo his datis, dabitur quoque summa quadratorum, à perpendicularibus quæ, à particulis omnibus solidi A B C D, ducuntur in planum E G.

Ponatur nunc alia item figura plana S Y T Z, ejusdem cum solido A B C D latitudinis, hoc est, quam includant plana B Y, D Z solidum contingentia, ac parallela plano E A C, quæque sit ejusmodi, ut, secta lineis rectis V V, X X &c. quæ respondeant planis figuram A B C D secantibus, K K, L L, & his parallelis, faciat eandem inter se rationem linearum harum atque illorum planorum, si sumantur quæ sibi mutuo respondent. Itaque rursus quadrata simul omnia perpendicularium, à particulis figuræ S Y T Z in rectam S T cadentium, æqualia erunt quadratis omnibus perpendicularium quæ, à particulis solidi A B C D, ducuntur in planum A C. Illo-
rum

DE CENTRO
OSCILLA-
TIONIS.

* Prop. 9.
huj.

* Prop. 11.
huj.

rum autem summa quadratorum data erit, si detur distantia centri gravitatis figuræ $S Y T Z$ ab recta $B Y$ vel $D Z$; nec non distantia indidem centri gravitatis cunei sui abscissi plano per eandem rectam*. Vel, figura $S Y T Z$ ordinata existente, ut $S T$ sit axis ejus, eadem quadratorum summa dabitur, si detur distantia centri gravitatis figuræ dimidiæ $S Z T$ ab axe $S T$, item centri gravitatis cunei, super eadem dimidia figura, abscissi plano per axem ducto*. Ergo, his datis, dabitur quoque summa quadratorum à perpendicularibus quæ, à particulis omnibus solidi $A B C D$, ductæ intelliguntur in planum $E A C$. Invenimus autem & summam quadratorum, à perpendicularibus omnibus in planum per $E G$ ductis. Ergo & aggregatum utriusque summæ habebitur, hoc est, per superius ostensa, summa quadratorum perpendicularium quæ, à particulis omnibus solidi $A B C D$, cadunt in rectam datam per E transeuntem, & ad paginæ hujus planum erectam, quod erat faciendum.

P R O P O S I T I O X V.

TAB. XXI.
Fig. 1. & 2.

Iisdem positis, si solidum $A B C D$ sit ejusmodi, ut figura plana $S Y T Z$, ipsi proportionalis, non habeat notam distantiam centri gravitatis à tangenti-
bus $B Y$ vel $D Z$, vel, ut subcentrica cunei super ipsa abscissi, plano per easdem $B Y$ vel $D Z$, ignoretur; in figura tamen proportionali, quæ à latere est, $O Q P$, detur distantia ΦP , qua centrum gravitatis figuræ dimidiæ $O P V$ abest ab axe $O P$; licebit hinc invenire summam quadratorum à distantiiis particularum solidi $A B C D$ à plano $E C$. Oportet autem ut sectiones omnes, $N N$, $M M$, sint plana similia; utque per omnium centra gravitatis transeat planum $E C$; quemadmodum in prismatico, pyramide, cono, conoidibus, multisque aliis figuris

vis contingit. Atque eorum planorum distantias centri gravitatis, super tangentibus axi oscillationis parallelis, datas esse necesse est; uti & subcentricas cuneorum, qui super ipsis abscinduntur, ductis planis per easdem tangentes.

DE CENTRO
OSCILLATIONIS

Veluti, si maxima dictarum sectionum sit $B D$, & in B intelligatur recta parallela axi E , hoc est, erecta ad planum quod hic conspicitur, oportet datam esse distantiam centri gr. sectionis $B D$ à dicta linea in B , quæ sit $B C$; itemque subcentricam cunei, super sectione $B D$ abscissi, plano ducto per eandem lineam in B , quæ subcentrica sit $B K$.

Etenim his datis, divisâque $P V$ bifariam in Δ , si fiat sicut ΔP ad $P \Phi$, ita rectangulum $B C K$ ad spatium quoddam Z ; dico hoc ipsum, multiplex per numerum particularum solidi $A B C D$, æquari summæ quæsitæ quadratorum, à distantis earundem particularum à plano $E C$.

Quadrata enim à distantis particularum planæ sectionis $B D$, à plano $E C$, quod per centrum gravitatis suæ transit; sive quadrata à distantis particularum solidarum segmenti $B N N D$ à plano eodem, æquari constat rectangulo $B C K$, multiplici per numerum dictarum particularum *. Similiter, si planæ sectionis $N N$ distantia centri gravitatis, ab recta quæ in N intelligitur axi E parallela, sit $N X$; subcentrica vero cunei super ipsa abscissi, plano per eandem rectam, sit $N F$; erunt quadrata à distantis particularum planarum sectionis $N N$ à plano $E C$; sive quadrata à distantis particularum solidarum segmenti $N M M N$, à plano eodem, æqualia rectangulo $N X F$, multiplici per numerum particularum ipsarum sectionis $N N$, vel segmenti $N M M N$. Est autem $B D$ divisa similiter in C & K , atque $N N$ in X & F . Ergo rectangulum $B C K$ ad rectangulum $N X F$, sicut quadratum $B D$ ad quadratum $N N$.

* Prop. 172
huj.

Est autem & numerus particularum sectionis $B D$, ad numerum particularum sectionis $N N$, sicut sectiones ipsæ;

T

hoc

DE CENTRO
OSCILLA-
TIONIS.

hoc est, sicut quadratum $B D$ ad quadratum $N N$. Itaque rectangulum $B C K$, multiplex per numerum particularum sectionis $B D$, ad rectangulum $N X F$, multiplex per numerum particularum sectionis $N N$, duplicatam habebit rationem quadrati $B D$ ad quadratum $N N$; hoc est, eam quam quadratum $V V$ ad quadratum $R R$, in figura proportionali. Erit igitur & dicta prior summa quadratorum, à distantis particularum segmenti $B N N D$ à plano $E C$, ad summam alteram quadratorum, à distantis particularum segmenti $N M M N$, ut qu. $V V$ ad qu. $R R$. Eademque ratione ostendetur, summas quadratorum à distantis particularum in reliquis segmentis solidi $A B C D$, esse inter se in ratione quadratorum quæ fiunt à rectis in figura $O V V$, quæ basi cujusque segmenti respondent. Quare summa quadratorum, à distantis particularum omnium segmentorum solidi $A B C D$ à plano $E C$, erit ad summam quadratorum, à distantis particularum segmentorum totidem, maximo segmento æqualium, hoc est, cylindri vel prismatis $B D S S$, eandem cum solido $A B C D$ basin altitudinemque habentis, sicut quadrata omnia rectarum $V V, R R, Q Q$, &c. ad quadrata totidem maximo $V V$ æqualia, hoc est, sicut solidum rotundum $O V V$ circa axem $O P$, ad cylindrum $V V \Omega \Omega$, qui basin & altitudinem habeat eandem. Hanc vero rationem solidi $O V V$ ad cylindrum $V V \Omega \Omega$, componi constat ex ratione planorum quorum conversione generantur, hoc est, ex ratione plani $O P V$, ad rectangulum $P \Omega$, & ex ratione distantiarum quibus horum planorum centra gravitatis absunt ab axe $O P$; hoc est, & ex ratione $P \Phi$ ad $P \Delta$. Et prior quidem harum rationum, nempe plani $O P V$ ad rectangulum $P \Omega$, eadem est quæ solidi $A B C D$ ad cylindrum vel prisma $B D S S$, hoc est, eadem quæ numeri particularum solidi $A B C D$, ad numerum particularum cylindri vel prismatis $B D S S$. Altera vero ratio, nempe $P \Phi$ ad $P \Delta$, est eadem, ex constructione, quæ spatii Z ad rectangulum $B C K$. Habebit itaque dicta summa quadratorum, à distantis omnium particularum

larum solidi $A B C D$ à plano $E C$, ad summam quadrato-
 rum, à distantiiis omnium particularum cylindri vel prismatis $B D S S$ ab eodem plano, rationem eam quæ componitur ex ratione numeri particularum solidi $A B C D$, ad numerum particularum cylindri vel prismatis $B D S S$, & ex ratione spatii Z ad rectangulum $B C K$: hoc est, rationem quam habet rectangulum Z , multiplex per numerum particularum solidi $A B C D$, ad rectangulum $B C K$, multiplex per numerum particularum cylindri vel prismatis $B D S S$. Atqui quarta harum magnitudinum æqualis est secundæ; nempe rectangulum $B C K$, multiplex per numerum particularum cylindri vel prismatis $B D S S$, æquale summæ quadratorum, à distantiiis particularum ejusdem prismatis vel cylindri $B D S S$ à plano $E C$; siquidem rectangulum idem $B C K$, multiplex per numerum particularum segmenti $B N N D$, æquatur quadratis distantiarum particularum ejusdem segmenti à plano $E C$ *. Ergo & tertia primæ æ-
 quabitur; nempe planum Z , multiplex per numerum particularum solidi $A B C D$, summæ quadratorum, à distantiiis particularum solidi ejusdem $A B C D$ à plano $E C$ *. quod
 erat demonstrandum.

* Prop. 10.
 huj.

* Prop. 14.
 lib. 5. Eucl.

Notandum vero, quando solidum $A B D$ rotundum est circa axem $A C$, fieri semper rectangulum $B C K$ æquale quartæ parti quadrati $B C$; quoniam subcentrica cunei, abscissi super circulo $B D$, plano per tangentem in B , nempe recta $B K$, æquatur $\frac{1}{4}$ radii $B C$. Unde, si $P V$ æqualis posita sit $B C$, sequitur, faciendo ut $P \Delta$ ad $P \Phi$ ita rectangulum $B C K$, hoc est, $\frac{1}{4}$ quadrati $B C$, hoc est, qu. $P \Delta$ ad planum aliud Z , fore hoc rectangulo $\Delta P \Phi$ æquale. Ac proinde tunc ipsum rectangulum $\Delta P \Phi$, multiplex secundum numerum particularum solidi $A B D$, æquari summæ quæsitæ quadratorum à perpendicularibus omnibus, quæ à particulis iisdem cadunt in planum $E C$.

PROPOSITIO XVI.

Figura quævis, sive linea fuerit, sive superficies, sive solidum; si aliter atque aliter suspendatur, agiteturque super axibus inter se parallelis, quique à centro gravitatis figuræ æqualiter distent, sibi ipsi isochrona est.

TAB. XXI.
Fig. 3.

Proponatur magnitudo quævis, cujus centrum gravitatis E punctum, sitque primo suspensa ab axe, qui per F intelligitur hujus paginæ plano ad angulos rectos. Itaque idem planum erit & planum oscillationis. In quo si centro E, radio E F, describatur circumferentia F H G, sumptoque in illa puncto quovis, ut H, magnitudo secundo suspendi intelligatur ab axe in hoc puncto infixio, atque agitari, manente eodem oscillationis plano. Dico isochronam fore sibi ipsi agitatae circa axem in F.

Intelligatur enim dividi magnitudo proposita in particulas minimas æquales. Itaque, quia in utraque illa suspensione idem manet oscillationis planum, respectu partium magnitudinis; manifestum est, si ab omnibus particulis, in quas divisa est magnitudo, perpendiculares cadere concipiantur in dictum oscillationis planum, illas utraque suspensione occurrere ipsi in punctis iisdem. Sint autem hæc puncta ea quæ apparent in spatio A B C D.

Quum igitur E sit centrum gravitatis magnitudinis propositæ, ipsaque proinde circa axem, qui per E punctum erectus est ad planum A B C D, quovis situ æquilibrium servet; facile perspicitur, quod si punctis omnibus ante dictis, quæ in spatio A B C D signantur, æqualis gravitas tribuatur, eorum quoque omnium centrum gravitatis futurum est punctum E. Quod si vero, ut fieri potest, in puncta aliqua plures perpendiculares coincidunt, illa puncta quasi toties geminata intelligenda sunt, gravitatesque toties multiplices accipiendæ. Atque ita consideratorum, patet rursus centrum gravitatis esse E punctum.

Porro.

Porro summam quadratorum ab rectis, quæ ducuntur à dictis punctis omnibus ad punctum F, eandem esse patet cum summa quadratorum ab iis rectis, quæ à singulis particulis magnitudinis propositæ ducuntur perpendiculares in axem oscillationis per F transeuntem; quippe cum lineæ ipsæ, quarum quadrata intelliguntur, utrobique eandem habeant longitudinem. Similiter etiam, cum suspensio est ex axe per H, patet summam quadratorum ab rectis, quæ ab omnibus punctis, in spatio A B C D signatis, ducuntur ad punctum H, eandem esse cum summa quadratorum, ab iis quæ, à particulis omnibus magnitudinis propositæ, ducuntur perpendiculares in axem oscillationis per H transeuntem. Ergo utroque casu, si summa quadratorum ab rectis quæ, à punctis omnibus prædictis, ducuntur ad puncta F vel H, dividatur per rectas E F vel E H, multiplices secundum numerum particularum in quas magnitudo proposita divisa intelligitur, orietur ex applicatione hac longitudo penduli simplicis, quod magnitudini suspensæ ex F vel H isochronum sit. Est autem summa quadratorum utroque casu æqualis*; & rectæ quoque E F, E H, inter se æquales; & particularum idem numerus. Ergo, quum & applicatæ quantitates, & quibus illæ applicantur, utrobique æquales sint, etiam longitudo ex applicatione ortæ æquales erunt, hoc est, longitudo pendulorum isochronorum magnitudini propositæ suspensæ ex F vel ex H. Quare constat propositum.

DE CENTRO
OSCILLA-
TIONIS.

* Prop. 12.
huius.

PROPOSITIO XVII.

Dato plano, cujus multiplex per numerum particularum, in quas suspensa figura divisa intelligitur, æquetur quadratis omnium distantiarum ab axe oscillationis; si illud applicetur ad rectam, æqualem distantie inter axem oscillationis & centrum gravitatis suspensæ magnitudinis, orietur longitudo penduli simplicis ipsi isochroni.

T 3.

Sit

DE CENTRO
OSCILLA-
TIONIS.

TAB. XXII.
Fig. 1.

Sit figura $A B C$, cujus centrum gravitatis E , suspensa ab axe qui, per F punctum ad planum quod conspicitur, erectus sit. Ponendoque divisam figuram in particulas minimas æquales, à quibus omnibus, in dictum axem, perpendiculares cadere intelligantur: esto, per superius ostensa, inventum planum H , cujus multiplex per numerum dictarum particularum, æquetur quadratis omnibus dictarum perpendicularium. Applicatoque plano H ad rectam $F E$, fiat longitudo $F G$. Dico hanc esse longitudinem penduli simplicis, isochronas oscillationes habentis magnitudini $A B C$, agitatae circa axem per F .

* Prop. 6.
huj.

Quia enim summa quadratorum, à distantis ab axe F , applicata ad distantiam $F E$, multiplicem secundum partium numerum, facit longitudinem penduli simplicis isochroni*. Isti vero quadratorum summæ æquale ponitur planum H , multiplex per eundem particularum numerum. Ergo & planum H , multiplex per eundem particularum numerum, si applicetur ad distantiam $F E$, multiplicem secundum particularum numerum; sive, ommissa communi multiplicitate, si planum H applicetur ad distantiam $F E$; oriatur quoque longitudo penduli simplicis isochroni. Quam proinde ipsam longitudinem $F G$ esse constat. quod erat demonstrandum.

P R O P O S I T I O XVIII.

SI spatium planum, cujus multiplex secundum numerum particularum suspensæ magnitudinis, æquetur quadratis distantiarum ab axe gravitatis, axi oscillationis parallelo; id, inquam, spatium si applicetur ad rectam, æqualem distantia inter utrumque dictorum axium, oriatur recta æqualis intervallo, quo centrum oscillationis inferius est centro gravitatis ejusdem magnitudinis.

TAB. XXII.
Fig. 2.

Esto magnitudo $A B C D$, cujus centrum gravitatis E ,
quæ-

quæque suspensa ab axe, qui per punctum F ad planum hu-
 jus paginae erectus intelligitur, habeat centrum oscillationis
 G . Porro axi per F intelligatur axis alius, per centrum gra-
 vitatis E transiens, parallelus. Divisaque magnitudine cogita-
 tu in particulas minimas æquales, sit quadratis distantiarum,
 ab axe dicto per E , æquale planum I , multiplex nempe se-
 cundum numerum dictarum particularum; applicatoque pla-
 no I ad distantiam $F E$, fiat recta quædam. Dico eam æ-
 qualem esse intervallo $E G$, quo centrum oscillationis infe-
 rius est centro gravitatis magnitudinis $A B C D$.

Ut enim universali demonstratione quod propositum est
 comprehendamus: intelligatur plana figura, magnitudini
 $A B C D$ analoga, ad latus adposita, $O Q P$; quæ nempe,
 secta planis horizontalibus iisdem cum magnitudine $A B C D$,
 habeat segmenta intercepta inter bina quæque plana, in ea-
 dem inter se ratione cum segmentis dictæ magnitudinis, quæ
 ipsis respondent; sintque segmenta singula figuræ $O Q P$,
 divisa in tot particulas æquales, quot continentur segmentis
 ipsis respondentibus in figura $A B C D$. Hæc autem intel-
 ligi possunt fieri, qualiscunque fuerit magnitudo $A B C D$,
 sive linea, sive superficies, sive solidum. Semper vero cen-
 trum gravitatis figuræ $O Q P$, quod sit T , eadem altitu-
 dine esse manifestum est cum centro gravitatis magnitudinis
 $A B C D$; ideoque, si planum horizontale, per F ductum,
 secet lineam centri figuræ $O Q P$, velut hic in S , æquales
 esse distantias $S T$, $F E$.

Porro autem constat quadrata distantiarum, ab axe oscil-
 lationis F , applicata ad distantiam $F E$, multiplicem secun-
 dum numerum particularum, efficere longitudinem penduli
 isochroni*; quæ longitudo posita fuit $F G$. Illorum vero
 quadratorum summam, æqualem esse perspicuum est, qua-
 dratis distantiarum à plano horizontali per F , unà cum qua-
 dratis distantiarum à plano verticali $F E$, per axem F & cen-
 trum gravitatis E ducto*. Atqui quadrata distantiarum ma-
 gnitudinis $A B C D$ à plano horizontali per F , æquantur
 quadratis distantiarum figuræ $O Q P$ ab recta $S F$. Quæ
 qua-

DE CENTRO
 OSCILLA-
 TIONIS.

* Prop. 6.
 huj.

* Prop. 47.
 lib. 1. Eucl.

DE CENTRO
OSCILLA-
TIONIS.

Prop. 9.
huij.

quadrata (si O sit punctum supremum figuræ OQP , & OH subcentrica cunei super ipsa abscissi, plano per rectam OV , parallelam SF) æqualia sunt rectangulo OTH & quadrato ST , multiplicibus secundum numerum particularum dictæ figuræ*, sive magnitudinis $ABCD$. Quadrata vero distantiarum magnitudinis $ABCD$ à plano FE , quantumcunque axis oscillationis F distet à centro gravitatis E , semper eadem sunt: quæ proinde putemus æquari spatio Z , multiplici secundum numerum particularum magnitudinis $ABCD$.

Prop. 6.
huij.

Itaque quoniam quadrata distantiarum magnitudinis $ABCD$, ab axe oscillationis F , æquantur istis, quadrato nimirum ST , rectangulo OTH , & plano Z , multiplicibus per numerum particularum ejusdem magnitudinis; si applicentur hæc omnia ad distantiam FE sive ST , orietur longitudo FG penduli isochroni magnitudini $ABCD$ *. Sed ex applicatione quadrati ST ad latus suum ST , orietur ipsa ST , sive FE . Ergo reliqua EG est ea quæ oritur ex applicatione rectanguli OTH , & plani Z , ad eandem ST vel FE .

Prop. 10.
huij.

Quare superest ut demonstremus rectangulum OTH , cum plano Z , æquari plano I . Tunc enim constabit, etiam planum I , applicatum ad distantiam FE , efficere longitudinem ipsi EG æqualem. Illud autem sic ostendetur. Rectangulum OTH , multiplex secundum numerum particularum figuræ OQP , sive magnitudinis $ABCD$, æquatur quadratis distantiarum figuræ ab recta XT *, quæ per centrum gravitatis T ducitur ipsi SF parallela; ac proinde etiam quadratis distantiarum magnitudinis $ABCD$, à plano horizontali KK , ducto per centrum gravitatis E , cum distantia utrobique sint eadem. At vero planum Z , similiter multiplex, æquale positum fuit quadratis distantiarum magnitudinis $ABCD$ à plano verticali FE . Ac patet quidem quadrata hæc distantiarum à plano FE , una cum dictis quadratis distantiarum à plano horizontali per E , æqualia esse quadratis distantiarum ab axe gravitatis per E , qui

qui sit axi F parallelus *. Itaque rectangulum O T H una cum plano Z, multiplicia secundum numerum particularum magnitudinis A B C D, æqualia erunt quadratis distantiarum ejusdem magnitudinis à dicto axe per E. Sed & planum I, multiplex secundum eundem particularum numerum, æquale positum fuit iisdem distantiarum quadratis. Ergo planum I æquale est rectangulo O T H & plano Z simul sumptis. quod ostendendum supererat.

Hinc rursus manifestum fit, quod propositione 16 demonstratum fuit; nempe magnitudinem quamlibet, si aliter atque aliter suspendatur atque agitetur, ab axibus parallelis, qui à centro gravitatis suæ æqualiter distent, sibi ipsi isochronam esse.

Sive enim magnitudo A B C D suspendatur ab axe F, si-
ve ab axe L illi parallelo; patet eadem utrobique esse quadrata distantiarum ab axe per E, qui sit axibus F vel L parallelus. Unde & planum I, cujus multiplex, secundum numerum particularum, æquatur quadratorum summæ, utroque casu idem erit. Hoc vero planum, applicatum ad distantiam centri gravitatis ab axe oscillationis, quæ utroque casu eadem ponitur, efficit distantiam qua centrum oscillationis inferius est centro gravitatis; Ergo etiam hæc distantia utroque casu eadem erit. Velut si, facta suspensione ex L, fuerit dicta distantia E Y; erit ipsa æqualis E G; & tota Y L æqualis G F; adeoque, in suspensione utraque, idem pendulum simplex isochronum fit magnitudini A B C D.

PROPOSITIO XIX.

SI magnitudo eadem, nunc brevius nunc longius suspensa, agitetur; erunt, sicut distantia axium oscillationis à centro gravitatis inter se, ita contraria ratione distantie centrorum oscillationis ab eodem gravitatis centro.

Sit magnitudo, cujus centrum gravitatis A, suspensa pri-
V mum

TAB. XXII.
Fig. 3.

DE CENTRO
OSCILLA-
TIONIS.

inum atque agitata ab axe in B, deinde vero ab axe in C; fitque in prima suspensione centrum oscillationis D, in posteriori vero centrum oscillationis E. Dico esse ut B A ad C A ita E A ad D A.

* Prop.
præced.

Quum enim, in suspensione ex B, efficiatur distantia A D, qua nempe centrum oscillationis inferius est centro gravitatis, applicando ad distantiam B A spatium quoddam, cujus multiplex secundum numerum particularum minimarum æqualium, in quas magnitudo divisa intelligitur, æquatur quadratis distantiarum ab axe per A, parallelo axi in B*; erit proinde rectangulum B A D dicto spatio æquale. Item, in suspensione ex C, quum fiat distantia A E, applicando idem dictum spatium ad distantiam C A; erit & rectangulum C A E eidem spatio æquale. Itaque æqualia inter se rectangula B A D, C A E; ac proinde ratio B A ad C A eadem quæ A E ad A D. quod erat demonstrandum.

Hinc patet, dato pendulo simplici, quod magnitudini suspensionis isochronum sit in una suspensione, datoque ejus centro gravitatis; etiam in alia omni suspensione, longiori vel breviori, dummodo idem maneat planum oscillationis, longitudinem penduli isochroni datam esse.

PROPOSITIO XX.

Centrum Oscillationis & punctum suspensionis inter se convertuntur.

TAB. XXII.
Fig. 3.

In figura superiori, quia, posita suspensione ex B, centrum oscillationis est D; etiam invertendo omnia, ponendoque suspensionem ex D, erit tunc centrum oscillationis B. Hoc enim ex ipsa propositione præcedenti manifestum est.

PROPOSITIO XXI.

Quomodo in figuris planis centra oscillationis inveniantur.

Intellectis quæ hætenus demonstrata sunt, facile jam erit in

TAB. XXI.

Fig. 1.




Fig. 3.





Fig. 2.



in plerisque figuris, quæ in Geometria considerari consueverunt, definire oscillationis centra. Atque ut de planis figuris primum dicamus; duplicem in iis oscillationis motum supra definivimus; nempe, vel circa axem in eodem cum figura plano jacentem, vel circa eum qui ad figuræ planum erectus sit. Quorum priorem vocavimus agitationem in planum, alterum agitationem in latus.

Quod si priore modo agitetur, nempe circa axem in eodem plano jacentem, sicut figura $B C D$ circa axem $E F$; hic, si cuneus super figura intelligatur abscissus, plano quod ita secet planum figuræ, ut intersectio, quæ hic est $D D$, sit parallela oscillationis axi; deturque distantia centri gravitatis figuræ ab hac intersectione, ut hic $A D$; itemque subcentrica cunei dicti super eadem intersectione, quæ hic sit $D H$. Habebitur centrum oscillationis K , figuræ $B D C$, applicando rectangulum $D A H$ ad distantiam $F A$; quoniam ex applicatione hac orietur distantia $A K$, qua centrum oscillationis inferius est centro gravitatis. Est enim rectangulum $D A H$, multiplex secundum numerum particularum figuræ $B C D$, æquale quadratis distantiarum ab recta $B A C$, quæ per centrum gravitatis A parallela ducitur axi oscillationis $E F$ *. Quare, applicando idem rectangulum ad distantiam $F A$, orietur distantia $A K$, qua centrum oscillationis inferius est centro gravitatis A *.

TAB. XXII.
Fig. 4. & 5.

* Prop. 163
huj.

* Prop. 164
huj.

Hinc manifestum est, si axis oscillationis sit $D D$, fieri centrum oscillationis H punctum; adeoque longitudinem $D H$, penduli simplicis isochroni figuræ $B C D$, esse tunc ipsam subcentricam cunei, abscissi plano per $D D$, super ipsam $D D$. Quod unum ab aliis ante animadversum fuit, non tamen demonstratum.

Quomodo autem centra gravitatis cuneorum super figuris planis inveniantur, persequi non est instituti nostri, & jam in multis nota sunt. Velut, quod si figura $B C D$ sit circulus, erit $D H$ æqualis $\frac{1}{2}$ diametri. Si rectangulum, erit $D H$ $\propto \frac{1}{3}$ diametri. Unde & ratio apparet cur virga, seu linea gravitate prædita, altero capite suspensa, isochrona sit pen-

V 2

dulo

DE CENTRO
OSCILLA-
TIONIS.

dulo longitudinis subsesquialteræ. Considerando nempe lineam ejusmodi, ac si esset rectangulum minimæ latitudinis.

Quod si figura triangulum fuerit, vertice sursum converso; sit $DH \frac{3}{4}$ diametri. Si deorsum, $\frac{1}{2}$ diametri.

Quod autem propositione 16 demonstratum fuit, id ad hujusmodi figuræ planæ motum ita pertinere sciendum. Nempe, si aliam atque aliam positionem demus figuræ BCD , invertendo eam circa axem BAC , ut vel horizonti parallela jaceat, vel oblique inclinetur, manente eodem agitationis axe FE , etiam longitudo penduli isochroni FK eadem manebit. Hoc enim ex propositione illa manifestum est.







TAB. XXIII.
Fig. 1. & 2.


Porro quando figura plana, circa axem ad planum figuræ erectum, agitur; quam vocavimus agitationem in latus; velut si figura BCD moveatur circa axem, qui per punctum F intelligitur ad planum DBC erectus; hic jam habenda est summa quadratorum a distantis particularum omnium ab recta quæ per centrum gravitatis A intelligitur axi oscillationis parallela; secundum ea quæ prop. 18. exposita fuere. Hoc est summa quadratorum a distantis ab ipso A centro gravitatis, quoniam figura plana est. Sive etiam summæ quadratorum a distantis tam ab recta BAC quam ab recta DA . Constat enim quadratum rectæ OA , quam pono esse distantiam unius cujusdam particulæ a centro A , æquari quadratis distantiarum ON , OV , quibus eadem particula abest a rectis BAC , DA *. Atqui summa quadratorum a distantis ab recta BAC æquatur rectangulo DAH , si DH sit subcentrica cunei super figura abscissi per tangentem DD , parallelam BA *. item summa quadratorum a distantis ab recta DA æquatur rectangulo BAL , si BL sit subcentrica cunei abscissi per tangentem BD parallelam AD . Oportetque dari, præter figuræ centrum gravitatis A , subcentricamque HD cunei prioris, etiam subcentricam LB cunei posterioris. Ita enim nota erunt rectangula DAH , BAL , quæ simul sumpta faciunt hic spatium applicandum, quod deinceps etiam rectangulum oscillationis vocabitur. Quod nempe, applicatum ad distantiam

FA ,

* Per 47.
lib 1.
Elem.

* Prop. 10.
huj.





F A, dabit distantiam A K, qua centrum oscillationis K inferius est centro gravitatis A.

DE CENTRO
OSCILLATIONIS.

Si vero F A sit axis figuræ B C D, potest, pro cuneo abscisso per B D super figura tota, adhiberi cuneus super figura dimidia D B M abscissus plano per D M. Nam, si cunei hujus subcentrica super D M sit O A, distantia vero centri gr. figuræ planæ D B M ab eadem D M sit N A, æquale esse constat rectangulum O A N. rectangulo B A L *. Itaque rectangulum O A N, additum rectangulo D A H, constituet quoque planum applicandum ad distantiam F A, ut fiat distantia A K.

TAB. XXIII.
Fig. 1.

* Prop. IX.
huj.

Et horum quidem manifesta est demonstratio ex præcedentibus, quippe cum rectangula D A H, B A L, vel D A H, O A N, multiplicia secundum numerum particularum figuræ, æqualia sint quadratis distantiarum à centro gravitatis A; sive, quod idem hic est, ab axe gravitatis axi oscillationis parallelo; ac proinde rectangula dicta, ad distantiam F A applicata, efficiant longitudinem intervalli A K *. *

Prop. X.
huj.

Centrum oscillationis Circuli.

Et in circulo quidem rectangula D A H, B A L, inter se æqualia esse liquet, simulque efficere semissem quadrati à semidiametro. Unde, si fiat ut F A ad semidiametrum A B, ita hæc ad aliam, ejus dimidium erit distantia A K, à centro gravitatis ad centrum oscillationis. Si igitur circulus ab axe D, in circumferentia sumpto, agitur, erit D K æqualis tribus quartis diametri D M.

Ad hunc modum & in sequentibus figuris planis centra oscillationis quæsimus, quæ simpliciter adscripsisse sufficiet. Nempe,

Centrum oscillationis Rectanguli.

In rectangulo omni, ut C B, spatium applicandum, sive rectangulum oscillationis, invenitur æquale tertiæ parti quadrati à semidiagonio A C. Unde sequitur, si rectangulum

TAB. XXIII.
Fig. 3.

V 3

ab

DE CENTRO OSCILLATIONIS. ab aliquo angulorum suspendatur, motuque hoc laterali agitetur, pendulum illi isochronum esse $\frac{2}{3}$ diagonii totius.

Centrum oscillationis Trianguli isoscelis.

TAB. XXIII.
Fig. 4.

In triangulo isoscele, cujusmodi C B D, spatium applicandum æquatur parti decimæ octavæ quadrati à diametro B E, & vigesimæ quartæ quadrati baseos C D. Unde, si ab angulo baseos ducatur D G, perpendicularis super latus D B, quæ occurrat productæ diametro B E in G; sitque A centrum gravitatis trianguli; divisoque intervallo G A in quatuor partes æquales, una earum A K apponatur ipsi B A; erit B K longitudo penduli isochroni, si triangulum suspendatur ex vetrice B. Cum autem ex puncto mediæ basis E suspenditur, longitudo penduli isochroni E K æquabitur dimidiæ B G.

Atque hinc liquet, triangulum isosceles rectangulum, si ex puncto mediæ basis suspendatur, isochronum esse pendulo longitudinem diametro suæ æqualem habenti. Similiterque, si suspendatur ab angulo suo recto, eidem pendulo isochronum esse.

Centrum oscillationis Parabolæ.

In parabolæ portione recta, spatium applicandum æquatur $\frac{1}{17}$ quadrati axis, una cum quinta parte quadrati dimidiæ basis. Cumque parabola ex verticis puncto suspensa est, invenitur penduli isochroni longitudo $\frac{2}{7}$ axis, atque insuper $\frac{1}{3}$ lateris recti. Cum vero ex puncto mediæ basis suspenditur, erit ea longitudo $\frac{4}{7}$ axis, & insuper $\frac{1}{2}$ lateris recti.

Centrum oscillationis Sectoris circuli.

TAB. XXIII.
Fig. 5.

In circuli sectore B C D, si radius B C vocetur r : semi arcus C F, p : semisubtensa C E, b : sit spatium applicandum æquale $\frac{1}{2} r r - \frac{4 b b r r}{9 p p}$, hoc est, dimidio quadrati B C, minus quadrato B A; ponendo A esse centrum gravitatis sectoris. Tunc enim B A $\propto \frac{2 b r}{3 p}$. Si autem suspendatur sector

ex

ex B, centro circuli sui, fit pendulum ipsi isochronum $\frac{3}{4} \frac{p}{b}$, DE CENTRO OSCILLATIONIS.
 hoc est, trium quartarum rectæ, quæ sit ad radium B F ut arcus C F D ad subtensam C D. Hæc autem inveniuntur cognitis subcentricis cuneorum; tum illius qui super sectore toto abscinditur, plano ducto per B K parallelam subtensæ C D, cujus cunei subcentricam super B K invenimus esse $\frac{3}{8} r - \frac{3}{8} a + \frac{3}{8} \frac{p}{b} r$, vocando a sinum versum E F; tum illius qui super dimidio sectore B F C abscinditur plano per B F, cujus nempe cunei subcentricam super B F invenimus $\frac{3}{8} b - \frac{3}{8} \frac{b}{a} r + \frac{3}{8} \frac{p}{a} r$.

Sed & alia via, sectoris centrum oscillationis, facilius invenitur, quæ est hujusmodi. Intelligatur sectoris B C D pars minima sector B C P, qui trianguli loco haberi potest. Quadrata autem, à distantiiis particularum ejus à puncto B, æqualia sunt quadratis distantiarum ab recta B R, bifariam sectorem dividente, una cum quadratis distantiarum ab recta B Q, quæ ipsi B R est ad angulos rectos. Sed, horum quadratorum ad illa, ratio quavis data est major, quoniam angulus C B P minimus; ideoque illa pro nullis habenda sunt. TAB. XXIII;
Fig. 6.

Positâ vero B O duarum tertiarum B R, hoc est, posito O centro gravitatis trianguli B C P; & B N trium quartarum B R: ut nempe N sit centrum gravitatis cunei, super triangulo B C P abscissi plano per B Q. His positis, constat quadrata, à distantiiis particularum trianguli B C P ab recta B Q, æquari rectangulo N B O multiplici secundum particularum ejusdem trianguli numerum. Itaque rectangulum N B O, ita multiplex, æquale censendum quadratis distantiarum à puncto B particularum trianguli B C P. Sunt autem quadrata distantiarum harum, ad quadrata distantiarum totius sectoris B C D, sicut sector B C P ad sectorem B C D, hoc est, sicut numerus particularum sectoris B C P, ad numerum particularum sectoris B C D; hoc enim facile intelligitur, eo quod sector B C D dividatur in sectores qualis B C P. Ergo rectangulum N B O, multiplex secundum nume-

DE CENTRO OSCILLATIONIS. numerum particularum sectoris B C D, æquale erit quadratis distantiarum particularum ejus à puncto B. Ideoque rectangulum N B O, applicatum ad B A, distantiam inter suspensionem & centrum gravitatis sectoris, dabit longitudinem penduli isochroni, cum sector ex B suspenditur *. Est autem rectangulum N B O $\propto \frac{1}{2} r r$: distantia autem B A, ut jam ante diximus, $\propto \frac{2 b r}{3 p}$. Unde, facta applicatione, oritur $\frac{3 p r}{4 b}$, longitudo penduli isochroni, ut ante quoque inventa fuit.

Centrum oscillationis Circuli, aliter quam supra.









TAB. XXIV. Eodem modo etiam simplicissime, in circulo, centrum oscillationis invenire licet. Sit enim circulus G C F, cujus centrum B; sectorque in eo minimus intelligatur B C P, sicut ante in sectore B C D.


Cum igitur, secundum modo exposita, quadrata, à distantis particularum sectoris B C P ad centrum B, æquentur rectangulo N B O, hoc est, dimidio quadrato radii, multiplici secundum sectoris ipsius particularum numerum; circulus autem ex ejusmodi sectoribus componatur; erunt proinde quadrata, à distantis particularum circuli totius ad centrum B, æqualia dimidio quadrato radii, multiplici secundum numerum earundem circuli particularum.

Est autem B centrum gravitatis circuli. Ergo dictum dimidium quadratum radii, hic erit spatium applicandum distantiae inter suspensionem & centrum B, ut habeatur intervallum, quo centrum oscillationis inferius est ipso centro B *. quod & supra ita se habere ostendimus.

Centrum oscillationis Peripheriæ circuli.

TAB. XXIV. Facilius etiam, centrum oscillationis circumferentiæ circuli, hoc pacto reperitur. Esto enim circumferentia descripta centro B, radio B R. Quadratum igitur B R, multiplex secundum numerum particularum in quas circumferentia divisa intelligitur, æquatur quadratis à distantis omnium earum





earum particularum ad centrum B. Quare quadratum B R DE CENTRO
OSCILLA-
TIONIS.
* Prop. 18,
huj. erit hic spatium applicandum*. Patetque hinc, si suspensio sit ex G, puncto circumferentiæ, penduli isochroni longitudinem æquari diametro G F.

Centrum oscillationis Polygonorum ordinatum.

Haud absimiliter & polygono cuivis ordinato, ut A B C, TAB. XXIV,
Fig. 3. pendulum isochronum invenitur. Fit enim, spatium applicandum, æquale semissi quadrati perpendicularis ex centro in latus polygoni, una cum vigesima quarta parte quadrati lateris. At, si perimetro polygoni pendulum isochronum quærat, fit spatium applicandum æquale quadrato perpendicularis à centro in latus, cum duodecima parte quadrati lateris.

Loci plani & solidi usus in hac Theoria.

Est præterea & Locorum contemplatio in his non injucunda. Ut si propositum sit, dato puncto suspensionis A, & longitudine A B, invenire locum duorum ponderum æqualium C, D, æqualiter ab A & à perpendiculari A B distantium, quæ agitata circa axem in A, perpendicularem plano per A C D, isochrona sint pendulo simplici longitudinis A B. TAB. XXIV,
Fig. 4.

Ponatur A B $\propto a$, ductâque C D, quæ fecet A B ad angulos rectos in E, sit A E indeterminata $\propto x$: E C vel E D $\propto y$. Ergo quadratum A C $\propto x x + y y$. Hoc vero multiplex secundum numerum particularum ponderum C, D, quæ hic minima intelliguntur, æquatur quadratis distantiarum earundem particularum ab axe suspensionis A. Ergo quadratum A C, sive $x x + y y$, applicatum ad distantiam A E, quæ nempe est inter axem suspensionis & centrum gravitatis ponderum C, D, efficiet $\frac{x x + y y}{x}$, longitudinem penduli isochroni*; quam propterea oportet æqualem esse A B * Prop. 17,
huj. sive a . Itaque $\frac{x x + y y}{x} \propto a$. Et $y y \propto a x - x x$. Unde patet, locum punctorum C & D, esse circumferentiam circuli, cu-
X. jus

DE CENTRO
OSCILLA-
TIONIS.

jus centrum F, ubi A B bifariam dividitur, radius autem $\propto \frac{1}{2} a$, five F A. Ergo, ubicunque in circumferentia A C B D duo pondera æqualia, æqualiter ab A distantia, ponentur, ea, ex A agitata, isochrona erunt pendulo longitudinem habenti æqualem diametro A B.

Atque hinc manifestum quoque, & circumferentiam A C B D, si gravitas ei tribuatur, & quamlibet ejus portionem, æqualiter in A vel B divisam, & ab axe per A suspensam, eidem pendulo A B isochronam esse.

TAB. XXIV.
Fig. 5.

Loci vero solidi exemplum esto hujusmodi. Sit A N linea inflexilis sine pondere. Propositumque sit, ad punctum in ea acceptum, ut M, affigere ipsi ad angulos rectos lineam, seu virgam, pondere præditam O M L, ad M bifariam divisam, cujus in latus agitatae oscillationes, ex suspensione A, isochronae sint pendulo simplici longitudinis A N.

Ducatur O H parallela A N, & A H parallela O M, & sit O R æqualis $\frac{2}{3}$ O L. Itaque cunei super recta O L, abscissi plano per O H ducto, subcentrica erit O R. Sed cunei alterius super eadem O L, abscissi plano per rectam A H, (est autem cuneus hic nihil aliud quam rectangulum) subcentrica erit ipsa A M. Quare rectangulum illud, quod supra Oscillationis vocavimus, erit solum rectangulum O M R. quod nempe, applicatum ad longitudinem A M, dabit distantiam centri oscillationis lineæ O L, ex A suspensæ, infra punctum M.

Sit jam A N $\propto a$: A M $\propto x$: M O vel M L $\propto y$. Est ergo rectangulum O M R $\propto \frac{1}{3} yy$. quo applicato ad A M, fit $\frac{1yy}{3x}$. quæ longitudo itaque ipsi M N æqualis esse debebit, cum velimus centrum oscillationis virgæ O L esse in N. Fit

ergo æquatio $\frac{1yy}{3x} + x \propto a$. Unde $y \propto \sqrt{3ax - 3xx}$. Quod significat puncta O & L esse ad Ellipsin, cujus axis minor A N; latus rectum vero, secundum quod possunt ordinatim ad axem hunc applicatae, ipsius A N triplum.

Hinc vero manifestum fit, cum omnis virga ipsi O L parallela, & ad Ellipsin hanc terminata, oscillationes isochronas

nas habeat pendulo simplici A N , etiam totum Ellipseos DE CENTRO OSCILLATIONIS. planum , ex A suspensum & in latus agitatum , ipsi A N pendulo isochronum fore. Sed & partem Ellipseos quamlibet , quæ lineis una vel duabus , ad A N perpendicularibus , abscindetur.

Cæterum adscribemus & aliud loci plani exemplum , in quo nonnulla notatu digna occurrunt.

Sit virga A B ponderis expers , suspensa ex A ; oporteatque , ad datum in ea punctum B , affigere triangula duo paria , & paribus angulis ab axe A B recedentia , quorum anguli ad B minimi , sive infinite parvi existimandi , quæque , ita suspensa ab A , oscillationes isochronas faciant pendulo simplici datæ longitudinis A L. TAB. XXIV, Fig. 6.

Hic , ducta C G perpendiculari in B G , & ponendo $AB \propto a$; $AL \propto b$; $BG \propto x$; $CG \propto y$: invenitur æquatio $y \propto \sqrt{2ab - 2aa - \frac{2}{3}ax + \frac{4}{3}bx - xx}$ ex qua patet , bases triangulorum C , & D , quæ bases hic ut puncta considerantur , esse ad circuli circumferentiam ; quia nempe habetur terminus simplex $-xx$.

Licet autem hic animadvertere , quod si a sit nihilo æqualis , hoc est , si punctum , ubi affiguntur trianguli B C , B D , sit idem cum puncto A ; tum futura sit æquatio $y \propto \sqrt{\frac{4}{3}bx - xx}$. Ac proinde , hoc casu , si sumatur A O $\propto \frac{2}{3}b$, hoc est , $\propto \frac{2}{3}AL$, centroque O per A circulus describatur A D N ; erunt bases triangulorum A C , A D , ad illius circumferentiam. Cum igitur quælibet duo triangula acutissima , quæ ex A ad circumferentiam A C N D constituuntur , magnitudine & situ sibi respondentia , centrum oscillationis habeant punctum L , positâ $AL \propto \frac{2}{3}$ diametri A N ; cumque circulus totus ex ejusmodi triangulorum paribus componatur ; uti & portio ejus quælibet , ut A C N D , latera A C , A D æqualia habens ; manifestum est , tum circuli totius , tum portionis qualem diximus , centrum oscillationis esse in L. TAB. XXV, Fig. 1.

Rursus , si in æquatione inventa ponatur $\frac{2}{3}a \propto \frac{4}{3}b$, seu $X \ 2$ TAB. XXVI, Fig. 2.

DE CENTRO
OSCILLA-
TIONIS.

$2a \propto b$; hoc est, si triangula affigi intelligantur in B, quod longitudinem A L secet bifariam, erit $y \propto \sqrt{2aa - xx}$. quæ æquatio docet, quod si centro B, radio qui possit duplum B A, circumferentia describatur, ea erit locus basium triangulorum acutissimorum B C, B D, quorum nempe, ex A suspenforum, centrum oscillationis erit L punctum. Cumque & circulus totus, & sector ejus quilibet, axem habens in recta A L, ex hujusmodi triangulorum paribus componatur, manifestum est & horum, ex A suspenforum, centrum oscillationis esse punctum L.







Adeoque quilibet circuli sector, suspensus à puncto quod distet, à centro circuli sui, semisse lateris quadrati circulo inscripti, pendulum isochronum habebit toti eidem lateri æquale. Atque ita, hoc uno casu, absque posita dimensione arcus, pendulum sectori isochronum invenitur.

TAB. XXV.
Fig. 3. & 4.

Porro, ad universalem constructionem æquationis primæ, $y \propto \sqrt{2ab - 2aa - \frac{2}{3}ax + \frac{4}{3}bx - xx}$, dividatur A L bifariam in E, & adponatur ad B E pars sui tertia E F; eritque F centrum describendi circuli; radius autem F O æqualis sumendus ei, quæ potest duplum differentiæ quadratorum A E, E F.

Si itaque, ex puncto B, ad descriptam circumferentiam triangula duo paria acutissima constituentur, ut B C, B D; illorum, ex A suspenforum, centrum oscillationis erit L. Quare & portionis cujuslibet descripti circuli, cujus portionis vertex sit in B, axis vero in recta A L, quales sunt utraque C B D; posita suspensione ex A; centrum oscillationis idem punctum L esse constat. Atque adeo etiam circuli segmentorum K O N, K M N, quæ facit recta K B N perpendicularis ad A B.

Et hæc quidem de motu laterali planorum, ac linearum, animadvertisse sufficiat. Quibus hoc tantum addimus; inventis centris oscillationis figurarum rectarum, seu quæ æqualiter ad axem utrinque constitutæ sunt; ut trianguli isoscelis, vel parabolicae sectionis rectæ; etiam obliquarum, quæ



quæ velut luxatione illarum efficiuntur, ut trianguli scaleni, & parabolæ non rectæ, centra oscillationis haberi. Ut si, exempli gratia, triangulum BAC isosceles, cujus axis AD , à puncto E suspensum intelligatur; sit vero & aliud triangulum scalenum FAG , axem eundem habens AD , & basin FG æqualem basi BC ; etiam hoc triangulum, ex E suspensum, priori BAC isochronum esse dico.

Quia enim virga, seu linea gravis, FG , affixa virgæ sine pondere ED in D , situ obliquo, suspensaque ex E , isochrona est virgæ BC , similiter in D affixæ*; idemque evenit in virgis cæteris trianguli utriusque, quæ axem AD secant in iisdem punctis, atque inter se æquales sunt: necesse est tota triangula, quæ ex lineis, seu virgis iisdem composita intelligi possunt, isochrona esse. In aliis figuris similis est demonstratio.

PROPOSITIO XXII.

Quomodo, in solidis figuris, oscillationis centra inveniantur.

In solidis porro figuris facile quoque, per ante demonstrata, centrum oscillationis invenire licebit. Si enim sit solidum ABC , suspensum ab axe, qui, per punctum E , intelligitur hujus paginæ plano ad rectos angulos; centrum autem gravitatis sit F : ductis jam per F planis EFD , $G FH$, quorum posterius sit horizonti parallelum, alterum vero per axem E transeat; inventisque, per propositionem 14, summis quadratorum à distantis particularum solidi ABC à plano $G FH$, itemque à plano EFD ; hoc est, inventis rectangulis utrisque, quæ, multiplicata secundum numerum dictarum particularum, æqualia sint dictis quadratorum summis; rectangula hæc applicata ad distantiam EF , quæ nempe axis suspensionis distat à centro gravitatis, dabunt intervallum FK , quo centrum agitationis K inferius est centro gravitatis F . Hoc enim patet ex propositione 18. Dabimus autem & horum exempla aliquot.

DE CENTRO
OSCILLA-
TIONIS.

TAB. XXVI.
Fig. 1.

Centrum oscillationis in Pyramide.

Sit primum $A B C$ pyramis, verticem habens A , axem $A D$, basin vero quadratum, cujus latus $B C$. ponaturque agitari circa axem qui, per verticem A , sit hujus paginæ plano ad angulos rectos.

Hic figura plana proportionalis $O V V$, à latere adponenda, secundum propositionem 14, constabit ex residuis parabolicis $O P V$, quæ nempe supersunt, cum, à rectangulis ΩP , auferuntur semiparabolæ $O V \Omega$, verticem habentes O .






Sicut enim inter se sectiones pyramidis $B C$, $N N$, ita quoque rectæ $V V$, $R R$, ipsis in figura plana respondentes. & sicut centrum gravitatis E distat, à vertice pyramidis, tribus quartis axis $A D$, ita quoque centrum gravitatis F , figuræ $O V V$, distabit tribus quartis diametri $O P$ à vertice O .


Intellecto porro horizontali plano $N E$, per centrum gravitatis pyramidis $A B C$, quod idem figuram $O V V$ fecet secundum $R F$; inventâque subcentricâ cunei, super figurâ $O V V$ abscissi plano per $O \Omega$, quæ subcentrica sit $O G$, (est autem $\frac{4}{5}$ diametri $O P$) erit rectangulum $O F G$, multiplex per numerum particularum figuræ $O V V$, æquale quadratis distantiarum ab recta $R F$ *, ac proinde quoque quadratis distantiarum à plano $N E$, particularum solidi $A B C$. Fit autem rectangulum $O F G$ æquale $\frac{7}{25}$ quadrati $O P$, vel quadrati $A D$.

* Prop. 10.
huj.

Deinde, ad inveniendam summam quadratorum à distantibus à plano $A D$, noscenda primo subcentrica cunei, super quadratâ basi pyramidis $B C$ abscissi, plano per rectam quæ in B intelligitur axi A parallela; quæ subcentrica sit $B K$, estque $\frac{2}{3} B C$. Noscenda item distantia centr. gr. dimidiæ figuræ $O P V$ ab $O P$; quæ sit ΦP ; estque $\frac{7}{10} P V$. Inde, divisâ bifariam $P V$ in Δ , si fiat ut ΔP ad $P \Phi$, hoc est, ut 5 ad 3, ita rectangulum $B D K$, quod est $\frac{1}{12}$ quadrati $B C$, ad aliud spatium Z ; erit hoc, multiplex secundum

nu-





numerum particularum solidi A B C, æquale quadratis distantiarum à plano A D *. Apparet autem, fieri spatium Z æquale $\frac{1}{20}$ quadrati B C.

DE CENTRO
OSCILLA-
TIONIS.
* Prop. 15.
huj.

Itaque, totum spatium applicandum, æquatur hic $\frac{3}{80}$ quadrati A D, cum $\frac{1}{20}$ quadrati B C. Unde, si suspensio, ut hic, posita fuerit in A, vertice pyramidis, ideoque distantia, ad quam applicatio facienda, A E æqualis $\frac{3}{4}$ A D; fiet hinc E S, intervallum quo centrum agitationis inferius est centro gravitatis, æquale $\frac{1}{25}$ A D, atque insuper $\frac{1}{15}$ tertiæ proportionalis duabus A D, B C. sive tota A S æqualis $\frac{4}{5}$ A D, præter dictam $\frac{1}{15}$ tertiæ proportionalis.

Centrum oscillationis Coni.

Quod si A B C conus fuerit, omnia eodem modo se habebunt, nisi quod spatium Z hic fit æquale rectangulo $\Delta P \Phi$ *, hoc est $\frac{3}{80}$ quadrati P V vel B D, sive $\frac{3}{80}$ quadrati B C. Quare, totum spatium applicandum, in cono erit $\frac{3}{80}$ quadrati A D, una cum $\frac{1}{20}$ quadrati B C. Ac proinde, posita suspensione ex vertice A, fiet E S, qua centrum agitationis inferius est centro gravitatis, æqualis $\frac{1}{25}$ A D, & $\frac{1}{20}$ tertiæ proportionalis duabus A D, B C. sive tota A S æqualis $\frac{4}{5}$ A D, una cum $\frac{1}{5}$ tertiæ proportionalis duabus A D, D B. Atque hinc manifestum est, si A D, D B æquales sint, hoc est, si conus A B C sit rectangulus, fieri A S æqualem axi A D.

Sequitur quoque porro, ex propositione 20, conum hunc rectangulum, si ex D centro baseos suspendatur, isochronum fore sibi ipsi ex vertice A suspenso, quemadmodum & de triangulo rectangulo supra ostensum fuit.

Centrum oscillationis Sphæræ.

Si A B C sit sphæra, erit figura plana proportionalis, à latere adponenda, O V H, ex parabolis composita, quarum basis communis O H, æqualis sphæræ diametro A D. Sectâ vero sphærâ planis per centrum E, quorum B C sit hori-

TAB. XXVI.
Fig. 2.

DE CENTRO
OSCILLA-
TIONIS.

Prop. 15.
in fine.

horizonti parallelum, $A D$ vero verticale: ut inveniatur summa quadratorum à distantis à plano $A D$, noscenda est distantia centri gr. parabolæ $O V H$ ab $O H$, quæ sit ΦP , estque $\frac{2}{3} V P$. Deinde, divisâ $P V$ bifariam in Δ , constat rectangulum $\Delta P \Phi$, multiplex per numerum particularum sphaeræ $A B C$, æquari quadratis distantiarum à plano $A D$ *. Est autem rectangulum $\Delta P \Phi$ æquale $\frac{1}{3}$ quadrati $P V$, vel quadrati $B E$.

Atqui, quadrata distantiarum à plano $B C$, æqualia esse liquet quadratis distantiarum à plano $A D$, ac proinde eodem rectangulo $\Delta P \Phi$, multiplici per dictum particularum numerum. Ergo spatium applicandum, in sphaera $A B C$, erit duplum rectanguli $\Delta P \Phi$; ideoque æquale $\frac{2}{3}$ quadrati à radio $E B$.

Itaque, si sphaera suspensa sit ex puncto in superficie sua A , erit $E S$, à centro sphaeræ E ad centrum agitationis S , æqualis $\frac{2}{3}$ semidiametri $A E$. Totaque $A S$ æqualis $\frac{7}{10}$ diametri $A D$. Si vero ex puncto alio, ut L , sphaera suspensa sit; erit $E S$ æqualis $\frac{2}{3}$ tertiæ proportionalis duabus $L E$, $E B$.

Centrum oscillationis Cylindri.

In cylindro, invenimus spatium applicandum æquari $\frac{1}{2}$ quadrati altitudinis, una cum $\frac{1}{4}$ quadrati à semidiametro basis. Unde, si cylindrus à centro basis superioris suspendatur, fit longitudo penduli isochroni æqualis $\frac{3}{2}$ altitudinis, una cum semisse ejus, quæ sit ad semidiametrum basis ut hæc ad altitudinem.

Centrum oscillationis Conoidis Parabolici.

In conoide parabolico, rectangulum oscillationis est $\frac{1}{2}$ quadrati altitudinis, cum $\frac{1}{4}$ quadrati à semidiametro basis. Unde, si à puncto verticis fuerit suspensum, fit longitudo penduli isochroni $\frac{3}{2}$ axis, cum $\frac{1}{4}$ ejus quæ sit ad semidiametrum basis, sicut hæc ad axem, id est, una cum $\frac{1}{4}$ lateris recti parabolæ genitricis.

Cen-

Centrum oscillationis Conoidis Hyperbolici.

DE CENTRO
OSCILLA-
TIONIS.

In conoide quoque hyperbolico centrum oscillationis inveniri potest. Si enim, exempli gratia, sit conoides cujus sectio per axem, hyperbola $B A B$; axem habens $A D$, latus transversum $A F$: erit figura plana ipsi proportionalis $B K A K B$, contenta basi $B B$, & parabolicae lineae portionibus similibus $A K B$, quae parabolae per verticem A transeunt, axemque habent $G E$, dividenter bifariam latus transversum $A F$, ac parallelum basi $B B$. Et hujus quidem figurae $B K A K B$, centrum gravitatis L , tantum distat à vertice A , quantum centrum gravitatis conoidis $A B B$; estque axis $A D$ ad $A L$, sicut tripla $F A$ cum dupla $A D$, ad duplam $F A$ cum sesquialtera $A D$. Deinde & distantia centri gr. figurae dimidia $A D B K$, ab $A D$, inveniri potest, atque etiam subcentrica cunei super figura $B K A K B$, abscissi plano per $A P$, parallelam $B B$; hujus inquam cunei subcentrica, super ipsa $A P$, inveniri quoque potest; atque ex his consequenter centrum agitationis conoidis, in quavis suspensione; dummodo axis, circa quem movetur, sit basi conoidis parallelus. Atque invenio quidem, si axis $A D$ lateri transverso $A F$ æqualis ponatur, spatium applicandum æquari $\frac{1}{10}$ quadrati $A D$, cum $\frac{31}{200}$ quadrati $D B$. Tunc autem $A L$ est $\frac{7}{10} A D$.

TAB. XXVI.
Fig. 3.

Unde, si conoides hujusmodi ex vertice A suspendatur, invenitur longitudo penduli isochroni, $A S$, æqualis $\frac{2}{3} A D$, cum $\frac{31}{145}$ tertiae proportionalis duabus $A D$, $D B$.

Centrum oscillationis dimidii Coni.

Denique & in solidis dimidiatis quibusdam, quæ sunt sectione per axem, centrum agitationis invenire licebit. Ut si sit conus dimidiatus $A B C$, verticem habens A , diametrum semicirculi baseos $B C$: ejus quidem centrum gravitatis D notum est, quoniam $A D$ est $\frac{2}{3}$ rectæ $A E$, ita dividens $B C$ in E , ut, sicut quadrans circumferentiæ circuli

TAB. XXVII.
Fig. 2.

Y

ad

DE CENTRO
OSCILLA-
TIONIS.

ad radium, ita sint $\frac{2}{3}$ C B ad B E. Tunc enim E est centrum gravitatis semicirculi baseos, ideoque in A E centrum gravitatis omnium segmentorum semiconi A B D, basi parallelorum.

Et figura quidem porro proportionalis à latere ponenda, O V V, eadem est quæ in cono toto supra descripta fuit: per quam nempe invenietur summa quadratorum, à distantibus particularum semiconi à plano horizontali N D, per centrum gravitatis ducto. Verum quadrata distantiarum, à plano verticali M D O, ut colligantur, altera quoque figura proportionalis S Y Z, sicut supra prop. 14. adhibenda est, cujus nempe sectiones verticales, exhibeant lineas proportionales sectionibus sibi respondentibus in semicono A B C. & hujus figuræ cognoscenda est distantia centri gr. F ab S Y, quam æqualem esse constat distantia D N, centri gr. semiconi à plano trianguli A B. positâque H G subcentricâ cunei abscissi super figura S. Z Y, ducto plano per S Y, noscendum est rectangulum G F H, cujus nempe multiplex, secundum numerum particularum semiconi A B C, æquabitur quadratis distantiarum semiconi in planum M D O. Licebit vero cognoscere rectangulum illud G F H, etiamsi subcentricæ H G longitudo ignoretur, hoc modo.

Diximus supra, cum de cono ageremus, quadrata distantiarum à plano per axem ejus, æquari $\frac{1}{3}$ quadrati à diametro basis, sive $\frac{1}{2}$ quadrati à semidiametro, multiplicis per numerum particularum conici totius. Unde & hic, in semicono A B C, quadrata distantiarum à plano A B æqualia erunt $\frac{1}{2}$ quadrati B C, multiplicis per numerum particularum ipsius semiconi. Sed & rectangulum H G F, multiplex per numerum particularum semiconi A B C, æquatur quadratis distantiarum à plano A B, ut patet ex propositione 9. Ergo rectangulum H G F æquale $\frac{1}{2}$ quadrati B C. Ponendo autem A B $\propto a$; B C $\propto b$; & quadrantem circumferentiæ, radio B C descriptæ, $\propto q$; fit E B $\propto \frac{2 b b}{3 q}$. Cujus cum N D tribus quartis æquetur, fiet proinde N D, sive G F $\propto \frac{1 b b}{2 q}$.
Cujus.




Fig. 1.





Fig. 2.






Fig. 3.



Cujus quadratum auferendo à rectangulo H G F, quod erat DE CENTRO OSCILLATIONIS. $\frac{1}{25}$ quadrati B C, fiet rectangulum G F H $\propto \frac{1}{25} b b - \frac{1}{4} \frac{b^4}{q^3}$. Hoc

autem rectangulum, multiplex per numerum particularum semiconi A B C, æquatur quadratis distantiarum à plano M D O. At quadratis distantiarum à plano N D æquantur, ut in cono, $\frac{1}{25}$ quadrati A B, sive $\frac{1}{25} a a$, multiplices per numerum particularum semiconi A B C. Itaque, totum spatium applicandum, æquabitur hic $\frac{1}{25} a a + \frac{1}{25} b b - \frac{1}{4} \frac{b^4}{q^3}$.

Unde quidem centrum agitationis invenitur in omni suspensione semiconi, dummodo ab axe qui sit parallelus basi trianguli à sectione A B. Notandum vero, cum figura S Z Y sit ignotæ prorsus naturæ, subcentricam tamen G H, cuncti super ipsa abscissi plano per S Y, hinc inveniri. Nam, quia rectangulum H G F æquale erat $\frac{1}{25} b b$, sive quadrati B C, & G F æqualis $\frac{1}{2} \frac{b^2}{q}$, fit inde G H æqualis $\frac{1}{25} q$.

Porro, etiam semicylindri, & semiconoidis parabolici, centra agitationis inveniri possunt, atque aliorum insuper semisolidorum; quæ aliis investiganda relinquimus.

Quemadmodum autem in figuris planis, ita & hic in solidis figuris locum habet, quod de obliquarum centrīs agitationis illic diximus, quæ veluti luxatione rectarum constituuntur, quarum centra oscillationis non differunt à centrīs oscillationis rectarum. Sic, si conī duo fuerint A B C, A F G, TAB. XXVII. FIG. I. alter rectus, alter scalenus; quorum & diametri & bases æquales; hi ex vertice suspensi, vel à quibuscunque axibus, æqualiter à centrīs eorum gravitatis distantibus, isochroni erunt; dummodo axis, unde conus scalenus suspensus est, rectus sit ad planum trianguli per diametrum, quod planum basi est ad angulos rectos.

P R O P O S I T I O XXIII.

Horologiorum motum temperare, addito pondere exiguo secundario, quod super virga penduli, certa ratione divisa, sursum deorsumque moveri possit.

TAB. XXVII.
Fig. 3.

Ut hoc expediamus, primo penduli ipsius, ex virga gravitate prædita, & appenso parte ima pondere, compositi, centrum oscillationis inveniendum est.

* Prop. 6.
hui. in fine.

Sit virga, cum appenso pondere, $A C$, cujus longitudo dicatur a . Intelligantur autem, tum virga ipsa, tum pondus appensum C , in particulas minimas æquales divisa, earumque particularum virga habeat numerum b , pondus vero C numerum c , ponendo nempe b ad c , sicut gravitas virgæ ad gravitatem appensi ponderis. Longitudo igitur penduli simplicis, dato isochroni, habebitur, si summa quadratorum à distantiiis particularum omnium à puncto suspensionis A , dividatur per summam earundem distantiarum *. Secetur $A C$ bifariam in M ; tum vero in T , ut $A T$ sit dupla $T C$. Quia ergo M est centrum gravitatis lineæ $A C$, & $A T$ subcentrica cunei super ipsa abscissi plano per $A D$, perpendicularem ad $A C$; qui cuneus hîc revera triangulum est; erit summa quadratorum, à distantiiis particularum virgæ à puncto A , æqualis rectangulo $A M T$, una cum quadrato $A M$; hoc est, rectangulo $T A M$, multiplici secundum numerum particularum b ; hoc est, $\frac{1}{3} a a b$; quia $M A$ est $\frac{1}{2} a$, & $T A$ $\frac{2}{3} a$, ac proinde rectangulum $T A M \propto \frac{1}{3} a a$. Summa vero quadratorum, à distantiiis particularum ponderis C ab eodem puncto A , æquabitur quadrato $A C$, multiplici secundum numerum particularum ipsius ponderis; hoc est, $a a c$. Adeoque summa quadratorum omnium, tam à distantiiis particularum virgæ, quam ponderis C , erit $\frac{1}{3} a a b + a a c$.

Porro, distantix omnes particularum virgæ $A C$ à puncto A , æquantur $\frac{1}{2} b a$; longitudini scilicet virgæ ipsius, quæ est

est a , multiplici secundum semissem numeri particularum DE CENTRO OSCILLATIONIS. quas continet. Et distantiae omnes particularum ponderis C , ab eodem puncto A , sunt $a c$. Ita ut summa utrarumque distantiarum sit $\frac{1}{2} a b + a c$. Per quam dividendo summam quadratorum prius inventam, $\frac{1}{3} a a b + a a c$, fit $\frac{\frac{1}{3} a a b + a a c}{\frac{1}{2} a b + a c}$ five $\frac{\frac{1}{3} a b + a c}{\frac{1}{2} b + c}$, longitudo penduli isochroni. Quae itaque habebitur, si fiat, ut dimidia gravitas virgæ, una cum gravitate appensi ponderis, ad trientem gravitatis virgæ, una cum gravitate ejusdem appensi ponderis, ita longitudo $A C$ ad aliam. Oportet autem sumere longitudinem $A C$, à puncto suspensionis A ad centrum gravitatis ponderis C ; cum magnitudinis ejus ratio hic non habeatur, ac veluti minimum consideretur.

Quod si jam, præter pondus C , alterum insuper D virgæ TAB. XXVII² Fig. 4. inhærere intelligatur, cujus gravitas, seu particularum numerus sit d : distantia vero $A D$ sit f . Ut pendulum simplex huic ita composito isochronum inveniat, addenda sunt ad summam superiorem quadratorum, quadrata distantiarum particularum ponderis D à puncto A , quæ quadrata apparet esse $d f f$. Adeo ut summa omnium jam sit futura $\frac{1}{3} a a b + a a c + f f d$. Item, ad summam distantiarum, addendæ distantiae particularum ponderis D , quæ faciunt $d f$. Ac summa proinde distantiarum omnium erit $\frac{1}{2} b a + c a + d f$; per quam dividenda est ista quadratorum summa, & fit $\frac{\frac{1}{3} a a b + a a c + f f d}{\frac{1}{2} a b + a c + f d}$, longitudo penduli isochroni.

Quod si vero, hæc longitudo penduli isochroni, datæ æqualis postuletur, quæ sit p , & reliqua omnia quæ prius data sint, præter distantiam $A D$ seu f , quæ determinat locum ponderis D : sitque invenienda hæc distantia, id fiet hoc modo.

Nempe, cum postuletur $\frac{\frac{1}{3} a a b + a a c + f f d}{\frac{1}{2} a b + a c + f d}$ æquale p , orietur ex

hac æquatione $f f \propto p f + \frac{\frac{1}{2} a b p + c a p - \frac{1}{3} a a b - a a c}{d}$. Et $f \propto \frac{1}{2} p + \text{vel}$

DE CENTRO
OSCILLA-
TIONIS.

\div vel $\sqrt{\frac{1}{4}pp + \frac{1}{2}abp + cap - \frac{1}{3}aab - aac}{d}$. Ubi animadverten-

dum, duas esse veras radices, si $\frac{1}{2}abp \div cap$ minus sit quam $\frac{1}{3}aab \div aac$; hoc est, si longitudo p minor sit quam $\frac{\frac{1}{3}ab + ac}{\frac{1}{2}b + c}$, quæ antea inventa fuit longitudo penduli isochroni, sive distantia centri oscillationis à suspensione, in pendulo composito ex virga AC & pondere C .

Unde patet, si velimus efficere, ut, applicato pondere D , acceleretur penduli motus; posse duobus locis, inter A & C , illud disponi, quorum utrolibet eadem celeritas pendulo concilietur: velut in D vel E . Quæ loca æqualiter distabunt à puncto N , quod abest ab A , semisse longitudinis p , hoc est, semisse penduli simplicis, cui compositum hoc isochronum postulabatur. Apparet autem, quando hæc longitudo p tantum exiguo minor ponitur quam AC , etiam punctum N exiguo superius esse puncto medio virgæ AC .

Porro, ex æquatione superiori, $f \propto \frac{1}{2}p \div$ vel $\sqrt{\frac{1}{4}pp + \frac{1}{2}abp + cap - \frac{1}{3}aab - aac}{d}$ habetur determinatio longitudinis p . Patet enim, $\frac{1}{4}pp \div \frac{1}{2}abp + cap$ non minus esse debere quam $\frac{1}{3}aab \div aac$. Unde non debet esse minor quam $\frac{a}{d} \sqrt{\frac{1}{3}bd \div 4cd \div bb \div 4bc \div 4cc - \frac{ab - 2ac}{d}}$. Quod si p æquetur huic quantitati, hoc est, si $\frac{1}{4}pp \div \frac{1}{2}abp + cap$ fuerit æquale $\frac{1}{3}aab \div aac$, erit jam, in eadem superiori æquatione, $f \propto \frac{1}{2}p$, hoc est, $\frac{a}{d} \sqrt{\frac{1}{3}bd \div 4cd \div bb \div 4bc \div 4cc - \frac{ab - 2ac}{2d}}$. Quo determinatur distantia ponderis D à puncto A , ex qua maxime omnium acceleret motum penduli.

Atque hæc ad horologiorum usum sic porro adhibentur. Sit, exempli gratia, pendulum horologii, quod singulis oscillationibus scrupula secunda notet. Virgæ autem gravitas sit $\frac{7}{8}$ gravitatis appensi ponderis in imo pendulo: &, præter hoc, sit aliud exiguum pondus mobile secundum virgæ longitudinem, cujus gravitas eadem ponatur quæ ipsius virgæ.

græ. Quæritur jam, quo loco hoc virgæ imponendum, ut uno scrupulo primo acceleretur horologii motus, spatio 24 horarum. Item, ubi collocandum, ut duorum scrupulorum primorum sit acceleratio; item, ut trium, quatuor, atque ita porro.

Ductis viginti quatuor horis sexagies, fiunt 1440, quot nempe scrupula prima una die continentur. Ex his unum aufer, quando unius scrupuli acceleratio quæritur: supersunt 1439. Ratio autem 1440 ad 1439 duplicata, proxime est ea quæ 1440 ad 1438. Ergo, si penduli simplicis, secunda scrupula notantis, longitudo divisa intelligatur in partes æquales 1440, earumque 1438 alii pendulo tribuantur, hoc præcedet alterum illud, in 24 horis, uno scrupulo primo. Adeo ut hic p valeat partes 1438.

Quia autem pendulum horologii, ex virga metallica & pondere appenso compositum, isochronum ponitur pendulo simplici partium 1440; invenienda primum est virgæ illius longitudo, ex æquatione superius posita. Erat nempe $\frac{\frac{1}{2}ab + ac}{\frac{1}{2}b + c}$ æquale longitudini penduli simplicis, quod isochronum composito ex virga habente longitudinem a , gravitatem b , & pondere affixo cujus gravitas c . Ergo si longitudo penduli simplicis isochroni dicatur f . Erit $\frac{\frac{1}{2}bf + cf}{\frac{1}{2}b + c} \propto a$. positoque, ut hic, $c \propto 50$; $b \propto 1$; $f \propto 1440$; fiet, $a \propto 1444\frac{4}{5}$, longitudo virgæ.

Jam, quia erat $f \propto \frac{1}{2}p - \frac{1}{2} \text{ vel } \sqrt{\frac{\frac{1}{4}pp + \frac{1}{2}abp + acp - \frac{1}{3}aab - aac}{d}}$,

fiet $f \propto \frac{1}{2}p - \frac{1}{2} \text{ vel } \sqrt{\frac{1}{4}pp - \frac{1}{2}p + 72962p - 105061210}$. Unde porro, si p sit, uti diximus, partium 1438; invenietur $f \propto 1331\frac{1}{2}$, qualium, nempe f , seu pendulum simplex, secunda scrupula oscillationibus designans, continet 1440. Cujus longitudo si pedum trium statuatur, quos horarios vocavimus, habebit f uncias 33, & 3 unciarum uncias, quas lineas vocant. Vel, auferendo hanc longitudinem f à tota trium pedum longitudine, supererunt uncix duæ, lineæ 9,

DE CENTRO
OSCILLA-
TIONIS.

à centro oscillationis penduli compositi sursum sumendæ, ut habeatur locus ponderis D, unius scrupuli primi accelerationem præstans tempore 24 horarum. Eodem modo reliquas distantias, quibus virga dividenda est, calculo investigavimus, aliam atque aliam ponendo longitudinem p : easque subjecta tabella exhibemus, secundum cujus numeros etiam virga penduli divisa est, quæ superius in descriptione horologii fuit exhibita. Procedunt autem accelerationes diurnæ, ut jam illic advertimus, per 15 scrupula secunda, seu primorum scrupulorum quadrantes. Ex. gr. si, pondere mobili D hærente in parte 73, 4, inveniatur horologium tardius justo incedere, in 24 horis, differentiâ 15 secundorum scrupulorum; oportebit sursum adducere pondus D, usque ad numerum 85, 6, ut corrigatur.

Acceleratio horologii
spatio 24 horarum.

Partes, à centro osc.
sursum accipiendæ.

Scrup. pr. Sec.

Linea & decima linearum pedis horarii.

0, 15	7, 0
0, 30	15, 2
0, 45	23, 7
1, 0	32, 6
1, 15	41, 9
1, 30	51, 7
1, 45	62, 2
2, 0	73, 4
2, 15	85, 6
2, 30	99, 0
2, 45	114, 1
3, 0	131, 8
3, 15	154, 3
3, 30	192, 6

Centrum oscillationis altius est centro gravitatis C partibus 1, 4.

PRO-

PROPOSITIO XXIV.

DE CENTRO
OSCILLA-
TIONIS.

Centri oscillationis rationem haberi non posse, in pendulis inter Cycloides suspensis; & quomodo hinc orta difficultas tollatur.

Si quis, subtili examine, contulerit ea quæ in superioribus, de pendulo inter cycloides suspenso, demonstravimus, cum his quæ ad centrum oscillationis pertinent; videbitur ei deesse aliquid ad perfectam illam, quam præferimus, oscillationum æqualitatem. Ac primo dubitabit, an, ad inveniendum circulum cycloidis genitorem, penduli longitudo accipienda sit à puncto suspensionis ad centrum gravitatis appensi plumbi, an vero ad centrum oscillationis; quod, ab altero illo, sæpe sensibili intervallo distat, atque eo majore, quo major fuerit sphaera aut lens plumbea. Quid enim, si sphaeræ diameter quartam, aut tertiam partem, penduli longitudinis æquet? Quod si ad centrum oscillationis illam longitudinem accipiendam dicamus, non tamen expediet quo pacto ea, quæ de centro oscillationis ostensa sunt, conveniant pendulo continue longitudinem suam immutanti, quale illud quod inter cycloides movetur. Posset enim videri, etiam centrum oscillationis mutari, ad singulas diversas longitudes; quod tamen hoc modo intelligendum non est. Res sane explicatu difficillima, si omnimodam ἀπελθεῖν sectemur. Nam in demonstratione temporum æqualium in cycloide, mobile, per eam delatum, veluti punctum gravitate præditum consideravimus. Sed, si ad effectum spectemus, non magni facienda est difficultas hæc; cum ponderis, quo pendulum constat, magnitudo in horologiis tanta non requiratur (etsi quo majus eo melius) ut differentia centrorum gravitatis, & oscillationis, aliquid hic turbare possit. Quod si tamen effugere prorsus has tricas velimus, id ita consequemur, si sphaeram lentemve penduli, circa axem suum horizontalem, mobilem efficiamus: axis extremâ utrinque, virgæ penduli imæ, inferendo: quæ idcirco ut bifida hac parte sit necesse est.

Z

DE CENTRO
OSCILLA-
TIONIS.

est. Fit enim hoc modo, ex motus natura, ut eandem perpetuo positionem, respectu horizontalis plani, sphaera penduli servet, atque ita puncta ejus quævis, æque ac centrum ipsum, cycloides easdem percurrant. Unde cessat hic jam centrorum oscillationis consideratio; nec minus perfectam temporum æqualitatem tale pendulum consequitur, quam si puncto unico omnis ejus gravitas contineretur.

P R O P O S I T I O X X V .

DE mensuræ universalis, & perpetuæ, constituendæ ratione.

Certa, ac permanens magnitudinum mensura, quæ nullis casibus obnoxia sit, nec temporum injuriis, aut longinquitate aboleri aut corrumpi possit, res est & utilissima, & à multis pridem quæsita. Quæ si priscis temporibus reperta fuisset, non tam perplexæ nunc forent, de pedis Romani, Græci, Hebræique veteris modulo, disceptationes. Hæc vero mensura, Horologii nostri opera, facile constituitur; cum sine illo nequaquam, aut ægre admodum, haberi possit. Et si enim, simplici pendulorum oscillatione, hoc à quibusdam tentatum fuerit, numerando recursus qui tota cæli conversione continentur, vel parte ejus cognita, per fixarum stellarum distantias, secundum ascensionem rectam; nec certitudo eadem hoc modo, quæ adhibitis horologiis, contingit, & labor longe est molestissimus ac tædiosissimus, propter numerandi sollicitudinem. Quia autem, præter horologia, aliquid, ad exactissimam hujus mensuræ inquisitionem, etiam centrorum oscillationis notitia confert; ideo hic demum, post eorum tractationem, hanc determinationem subjicimus.

Aptissima huic rei sunt horologia, quorum oscillationes singulæ secunda scrupula, vel eorum semisses, notant, quæque indicibus etiam, ad ea demonstranda, instructa sunt. Postquam enim, ad mediocrem dierum longitudinem, ejusmodi

modi horologium, fixarum stellarum observationibus, com-
positum fuerit, methodo illa quam in horologii descriptione
ostendimus: aliud pendulum simplex, hoc est, sphaera plum-
bea, aut alia materia gravi constans, ex tenui filo religata,
juxta suspendenda est, motuque exiguo impellenda; ac tan-
tis per producenda, aut contrahenda fili longitudo, donec
reversus ejus, per quadrantem horæ, aut semissem, una feran-
tur cum reciprocationibus penduli horologio aptati. Dixi
autem exiguo motu impellendum pendulum, quia oscilla-
tiones exiguæ, puta 5 vel 6 partium, satis æqualia tempora
habent, magnæ vero non item. Tunc, acceptâ mensurâ di-
stantiæ, à puncto suspensionis ad centrum oscillationis pen-
duli simplicis; eaque, si reversus singuli scrupula secunda
valeant, in tres partes divisâ; facient hæ singulæ longitudi-
nem pedis, quem HORARIUM in superioribus vocavimus:
quique, hoc pacto, non solum ubique gentium constitui
possit, sed & venturo ævo reintegrari. Adeo ut & moduli
pedum omnium aliorum, semel ad hunc proportionibus suis
expressi, certò quoque in posterum cognosci possint. Sicut
jam supra, pedem Parisiensem ad hunc horarium esse diximus,
ut 864 ad 881; quod idem est ac si, posito prius pede Pa-
risiensi, dicamus tribus hujusmodi pedibus, cum octo lineis
& dimidia, constitui pendulum simplex, cujus oscillationes
scrupulis secundis horariis responsuræ sint. Pes autem Pari-
sien-^{DE CENTRO}
sis ad Rhenanum, quo in Patria nostra utuntur, se habet
ut 144 ad 139; hoc est, quinque lineis suis diminutus, al-
terum illum relinquit. Atque ita & hic pes, & alii quilibet,
perpetuo duraturas mensuras accipiunt. <sup>OSCILLA-
TIONIS.</sup>

Quomodo autem centrum oscillationis in sphaera, ex
qualibet longitudine suspensa, inveniatur, in superioribus
demonstratum est. Nempe, si fiat ut distantia inter punctum
suspensionis & sphaeræ centrum, ad semidiametrum ejus,
ita hæc ad aliam; ejus duas quintas, à centro deorsum ac-
ceptas, terminari in quæsito oscillationis centro. Facile au-
tem apparet cur necessaria sit hujus centri consideratio, ad
accuratam pedis Horarii constitutionem. Nam, si à pun-

DE CENTRO
OSCILLA-
TIONIS.

cto suspensionis ad sphaeræ centrum distantia accipiatur, sphaeræ autem magnitudo non definiatur proportionem ad fili longitudinem, non erit certa mensura penduli cujus recursus secunda scrupula metiantur; sed quo major erit ejus sphaera, hoc minor invenietur mensura illa, inter centrum sphaeræ & punctum suspensionis intercepta. Quia in isochronis pendulis, centra quidem oscillationis à punctis suspensionum æqualiter distant; amplius autem descendit centrum oscillationis infra centrum sphaeræ majoris, quam minoris.

Hinc necesse fuit illis, qui, ante hanc centri oscillatorii determinationem, mensuræ universalis constituendæ rationem inierunt; quod, jam inde à prima Horologii nostri inventionem, nobilis illa Societas Regia Anglicana sibi negotium sumpsit, & recentius doctissimus Astronomus Lugdunensis, Gabriel Moutonus; his, inquam, necesse fuit designare globuli suspensi diametrum, vel proportionem certam ad fili longitudinem, cujus nempe tricesimam vel aliam partem æquaret; vel mensura quadam cognita, ut digiti vel pollicis. Sed hoc posteriore modo, ponitur jam certi aliquid, quod id ipsum est quod quærendum est: etsi scio vix sensibilem errorem fore, dummodo sphaeræ istam, quam jam dixi, magnitudinem non multum excedant. Priore autem posset quidem aliquo pacto res explicari; sed ita, ut numerandarum oscillationum labor subeundus sit, calculoque etiam utendum. Quamobrem præstat, centra oscillationis adhibendo, certam rationem sequi, nullisque præter necessitatem legibus obligari. atque hic jam majoribus sphaeris quam exiguis potius utendum, quod illæ occursum aëris minus impediuntur.

Cæterum, non sphaeræ tantum ex filo suspensæ, sed & conici, cylindri, aliaque omnia solida, planaue, quorum centra oscillationis superius exhibuimus, ad hanc mensuram investigandam, apta sunt; quoniam, à puncto suspensionis ad centrum oscillationis, certum idemque omnibus isochronis pendulis est intervallum. Neque etiam illa duntaxat horologia, quæ secunda scrupula aut eorum semisses singulis penduli recurribus

recursibus indicant, ad hæc usurpare possumus; sed & aliâ DE CENTRO OSCILLATIONIS.
 quæcunque penduli longitudine instructis propositum obti-
 nebitur, dummodo ex rotarum proportionibus, seu dentium
 numero, cognoscatur numerus oscillationum certo tem-
 pore peragendarum. Invento enim pendulo simplici, cu-
 jus librationes singulæ convenient vel singulis, vel binis
 ternisve recursibus horologii, constabit jam hinc, quot
 penduli illius vices horæ spatio transigantur. Quarum nume-
 rus si quadretur, erit ut quadratum è 3600, numero scru-
 pulorum secundorum horam unam efficientium, ad qua-
 dratum illius numeri, ita longitudo penduli simplicis in-
 venti, (quæ longitudo semper à puncto suspensionis ad
 centrum oscillationis accipienda est) ad longitudinem pen-
 duli illius horarii tripedalis, quod diximus. Hoc enim inde
 constat, quod duorum quorumvis pendulorum longitudes
 sunt inter se, sicut quadrata temporum quibus singulæ o-
 scillationes transeunt; ideoque contrariam rationem habent
 quadratorum à numeris, quos efficiunt oscillationes æquali-
 bus temporum intervallis peractæ. Nam, cum hætenus ex-
 perientiâ tantum comprobatum fuerit Theorema illud, de
 pendulorum longitudinibus; eas nempe duplicatam habere
 rationem temporum, quibus oscillationes singulæ peragun-
 tur; nunc ejus demonstratio ex superius traditis manifesta
 est. Cum enim ostenderimus, singulos recursus penduli, in-
 ter cycloides suspensi, ad casum perpendicularem, è dimi-
 dia penduli longitudine, certam rationem habere; eam sci-
 licet quam circumferentia circuli ad diametrum suam; faci-
 le hinc colligitur, tempora oscillationum in duobus pendulis
 esse inter se, sicut tempora descensus perpendiculis ex di-
 midiis eorum altitudinibus. Quæ altitudines dimidiæ, sive
 etiam totæ, cum habeant rationem duplicatam temporum,
 quibus ipsæ descensu perpendiculari percurruntur *; eadem
 quoque duplicatam rationem habebunt temporum, quæ o-
 scillationes singulas metiuntur. Ab oscillationibus autem mini-
 mis penduli, inter cycloides suspensi, non differunt sensi-
 biliter oscillationes minimæ penduli simplicis, cujus eadem

* Prop. 3.
 Part. 2.

DE CENTRO
OSCILLA-
TIONIS.

fit longitudo. Itaque & pendulorum simplicium longitudi-
nes, duplicatam rationem habebunt temporum, quibus o-
scillationes minimæ transiguntur.

Quod si quis oscillationum numerandarum, quæ horæ aut
femihoræ tempore transeunt, laborem non defugiat; horo-
logiumque adlit, cujus index secunda scrupula demonstret;
quæcunque accipiatur penduli simplicis longitudo, ejus nu-
merus oscillationum, quæ hora una continentur, hoc modo
cognoscetur; atque inde longitudo penduli tripedalis, ad
secunda scrupula, ut antea, calculo prodibit.

PROPOSITIO XXVI.

*Spatium definire, quod gravia, perpendicularari-
ter cadentia, dato tempore percurrunt.*

Hanc mensuram quicumque hætenus investigarunt, expe-
rimenta consulere necesse habuerunt; quibus, prout hæte-
nus instituta fuere, non facile ad exactam determinationem
pervenitur, propter velocitatem cadentium, sub finem mo-
tus acquisitam. Ex nostra autem prop. 25, de Descensu
gravium, cognitaque longitudine penduli ad secunda scru-
pula, absque experimento, per certam consequentiam,
rem expedire possumus. Ac primo quidem spatium il-
lud inquiremus, quod unius scrupuli secundi tempore grave
præterlabitur; ex quo quælibet alia deinde colligere lice-
bit. Quia igitur penduli, ad secunda scrupula, longi-
tudinem diximus esse pedum Horariorum 3: tempus au-
tem unius oscillationis minimæ, est ad tempus descensus
perpendicularis ex dimidia penduli altitudine, ut circumfe-
rentia circuli ad diametrum, hoc est, ut 355 ad 113: si
fiat, ut numerus horum prior ad alterum, ita tempus unius
secundi scrupuli, sive sexaginta tertiorum, ad aliud; fient
 $19\frac{1}{10}$, tempus descensus per dimidiam penduli altitudinem,
quæ nempe est pedis unciarum 18. Sicut autem quadrata
temporum, ita sunt spatia illis temporibus peracta, quemad-
modum

modum superiori propositione fuit ostensum. Ergo, si fiat ut quadratum ex $19''$ ad quadratum ex $60''$, hoc est, ut 36481 ad 360000 , ita 18 unciae ad aliud, fient ped. 14 . unc. 9 . lin. 6 , altitudo descensus perpendicularis, tempore unius secundi. Cum autem pes Horarius sit ad Parisiensem, ut 881 ad 864 ; erit eadem altitudo, ad hanc mensuram reduta, proxime pedum 15 & unciae unius. Atque hæc cum accuratissimis experimentis nostris prorsus conveniunt. in quibus punctum illud temporis, quo casus finitur, non aurum aut oculi iudicio discernitur; quorum neutrum hic satis tutum est; sed spatium descendendo peractum, alio modo, quem hic exponere tentabimus, absque ullo errore cognoscitur.

Penduli, ad parietem tabulamve erectam, suspensi dimidia oscillatio moram temporis, cadendo absumpti, indicat. Cujus sphaerula, ut eodem momento ac plumbum casui destinatum dimittatur, utraque filo tenui connexa tenentur, quod admoto igne inciditur. Sed prius, casuro plumbo, funiculus alius adnectitur, ejus longitudinis, ut, cum totus exierit à plumbo tractus, nondum ad parietem illidatur pendulum. Funiculi ejus caput alterum, regulæ chartaceæ, aut ex tenui membrana paratæ, cohæret; ita ad parietem tabulamve applicatæ, ut trahentem funem facile sequi possit, rectaque secundum longitudinem suam descendere; eo loci transiens, quo penduli sphaera ad tabulam accidet. Absumpto igitur funiculo toto, pars insuper regulæ deorsum trahitur à cadente plumbo, priusquam pendulum ad tabulam pertingat. Quæ quanta sit pars, sphaera fuligine leviter infecta, regulamque præterlabentem signans, indicat. Huc autem addita funiculi longitudine, spatium cadendo emensum certò definitum habetur.

Aëris autem occursum, quasi nullus esset in his intelligimus, ut mensura cadentibus corporibus præfixa cum experimentis exacte consentiat. Nec sane tantus est ille, ut in altitudinibus his, quò ascendere datur, sensibile discrimen inducere possit; dummodo solida corpora è metallo, aut, si levio-

DE CENTRO
OSCILLA-
TIONIS.

leviore materia constent, mole grandiuscula accipiantur. Levitas enim materiæ, in iis quæ cadendo aërem secant, ita magnitudine corporis pensatur, ut sphaera lignea, vel etiam è subere formata, paria faciat cum plumbea: quando nimirum diameter harum ad plumbeæ diametrum eam rationem habuerit, quam gravitas plumbi propria ad ligni suberisve gravitatem. Tunc enim gravitates sphaerarum erunt inter se sicut earum superficies. Veruntamen, ut æquali celeritate, quantum sensu percipi potest, decendant corpora, quæ multum intrinseca gravitate differunt, nequaquam opus est ut proportio illa diametrorum servetur. Possunt enim inter se æqualia esse, dummodo utraq;e satis magna sint; aut ex non nimia altitudine decendant. Etenim illud quoque hic animadvertendum est, tantam vel altitudinem esse posse; vel, in mediocri etiam altitudine, tantam projecti corporis levitatem; ut ob aëris renitentiam, acceleratio motus tandem ab illa, quam in superioribus demonstravimus, proportionem plurimum recessura sit. Namque in universum, corpori cuilibet, per aërem aliudve liquidum labenti, certus celeritatis modus, pro ratione ponderis ac superficiei suæ, constitutus est; quem excedere, aut potius ad quem pervenire nunquam possit. Quæ nempe celeritas ea est, quam si aër, aut liquor ille sursum tendens, haberet, suspensum corpus idem sibi innatans sustinere posset. Verum de his, alias fortasse, pluribus agendi occasio erit.





HOROLOGII OSCILLATORII

P A R S Q U I N T A.

*Constructionem aliam, è circulari pendulorum
motu deductam, continens; & Theoremata
de Vi Centrifuga.*

ES T & aliud Oscillatorii motus genus, præter id quod hætenus pertractavimus. Ejusmodi nempe, quo, per circuli ambitum, pendulum pondus circumfertur. Unde aliud quoque horologii commentum deduximus, eodem fere tempore quo prius illud; certoque itidem æquabilitatis principio nixum; sed cujus usus minus percrebuit, propter alterius illius constructionem, quodammodo simpliciore[m] facilioremque. Plura tamen hujus quoque generis de quo nunc loquimur, nec sine successu, constructa fuere: estque in his singulare illud, quod continuo atque æquabili motu circumferri cernitur index, postremus, qui secunda scrupula designat; cum in priore nostro horologio, omnibusque aliis, subsultim quasi feratur. Item hoc quoque, quod absque strepitu, sonoque omni, moveantur hac ratione constructa automata. quanquam, ad observationes astronomicas, sonus ad singula secunda scrupula repetitus, utilitate non careat. Et constitueram quidem, descriptionem horum cum iis demum edere, quæ ad motum circularem & Vim Centrifugam, ita enim eam vocare libet, attinent; de quo argumen-

SECUNDI
HOROLO-
GII DE-
SCRIPTIO.

* Vide Au-
ctoris Opera
posthuma
p. 401.
& seq.

to plura dicenda habeo, quam quæ hoc tempore exequi va-
cet. Sed, ut nova nec inutili speculatione maturius fruantur
harum rerum studiosi, neve casu aliquo intercيدات, hanc
quoque partem, præter destinatum, cæteris adjunxi, quia
machinæ hujus fabrica breviter exponitur, simulque Theo-
remata traduntur, ad Vim Centrifugam pertinentia; demon-
stratione ipsorum in aliud tempus dilata*.

Horologii secundi constructio.

TAB. XXVII.
Fig. 5.

Non necessarium duxi, ut rotarum, quibus interiora ho-
rologii constant, dispositionem hic exhiberem; cum ea ab
artificibus facile ordinari, variisque modis mutari possit;
sed eam partem explicari satis esse, quæ motum ejus certa
ratione moderatur. Cujus partis hic figura expressa est.

Axis D H ad horizontem erectus intelligendus est, ac
super polis duobus mobilis. Huic ad A affixa est lamina,
latitudine aliqua prædita, curvataque secundum lineam
A B; quæ est paraboloides illa de qua ostendimus, Propos. 8.
partis 3, evolutione ejus, postquam ipsi recta quædam juncta
fuerit, describi parabolam. Ea recta hic est A E; parabolam
verò, ex evolutione totius B A E descriptam, refert linea
E F. Filum curvæ B A applicatum, cujus extremo puncto
parabola describitur, est B G F. Pondus illi affixum F.
Dum autem axis D H in sese vertitur, filum B G F, in re-
ctam lineam extensum, sphæram F una circumducit,
ita ut circulos horizonti parallelos percurrat; qui majores
minoresve erunt, prout majori aut minori vi axis D H,
ab rotis horologii in tympanidium K agentibus, incitabitur:
sed ita, ut omnes in superficie conoidis parabolici continean-
tur. Atque hoc ipso æqualia semper circuitus tempora eva-
dent, ut ex iis, quæ de hoc motu postea dicemus, appa-
rebit.

Quod si circuitus singulos, secundorum scrupulorum se-
misses notare velimus, oportet latus rectum parabolæ E F
esse $4\frac{1}{2}$ unciarum pedis Horarii nostri, hoc est dimidium

lon-

longitudinis penduli, cujus singulae oscillationes semiscrupulum secundum impenderent. Ex parabolae autem latere recto, pendet magnitudo lateris recti paraboloidis A B, quippe quod illius $\frac{2}{3}$ continet: atque item longitudo A E, quae lateris recti parabolae dimidium est. Si vero secunda scrupula unoquoque circuitu expleri desideremus, quadrupla priorum accipienda sunt, tum latera recta, tum linea A E.

Porro, etsi filum B G F veluti unicum ac simplex haecenus designavimus, sciendum tamen longe praestare ut parte superiori duplex sit, ac F versus in angulum coeat, 20 vel 30 partium. In quem finem & laminae A B latitudo ad B tanta esse debet, quanta isti filorum divaricationi sufficit, vel & ipsa bifida facienda. Hoc pacto enim motus circularis ponderis F, absque alio ullo adminiculo, continuatur, ac filum utrumque sibi annexum in rectum extendit; quod non faceret, si unico tantum filo teneretur. Ubi tamen vim illam ab horologii rotis, vel pondere vel alia potentia motis, ad continuationem hujus motus circularis requiri sciendum. Quae nempe vis per tympanidium K ad axem K H pervenit, ac minimo nisu, motum sphaerae F semel inditum, conservat.

Hoc autem quo facilius possit, liberrimam axis K H revolutionem esse oportet. Quod nulla ratione melius perfici compertum, quam si, parte sui ima, durato chalybe constet, suppositamque habeat adamantis superficiem planam; cujus minima quavis particula hic sufficit, subter laminam perforatam collocanda.

Ceterum in locum fili B G F, qua parte curvae A B applicari debet, catenulam tenuem ex auro, aliove metallo, adhibere licebit, quo melius invariata servetur longitudo. Atque hoc in priore quoque horologio, ubi pendulum inter cycloides suspensum est, experti sumus. Sed ibi flexus catenulae continuus, attritu annulorum, perexiguo licet, non parum impedit liberam penduli agitationem.

DE VI CENTRIFUGA

ex motu circulari, Theoremata.

I.

S*I mobilia duo æqualia, æqualibus temporibus circumferentias inæquales percurrant; erit vis centrifuga in majori circumferentia, ad eam quæ in minori, sicut ipsæ inter se circumferentiæ, vel earum diametri.*

I I.

Si duo mobilia æqualia, æquali celeritate ferantur, in circumferentiis inæqualibus; erunt eorum vires centrifugæ in ratione contraria diametrorum.

I I I.

Si duo mobilia æqualia in circumferentiis æqualibus ferantur, celeritate inæquali, sed utraque motu æquabili, qualem in his omnibus intelligi volumus; erit vis centrifuga velocioris, ad vim tardioris, in ratione duplicata celeritatum.

IV. S₂





Fig. 2.





Fig. 1.




Fig. 3.




Fig. 4.





Fig. 5.



I V.

Si mobilia duo æqualia, in circumferentiis inæqualibus circumlata, vim centrifugam æqualem habuerint; erit tempus circuitus in majori circumferentia, ad tempus circuitus in minori, in subdupla ratione diametrorum.

V.

Si mobile in circumferentia circuli feratur eâ celeritate, quam acquirit cadendo ex altitudine, quæ sit quartæ parti diametri æqualis; habebit vim centrifugam suæ gravitati æqualem; hoc est, eadem vi funem quo in centro detinetur intendet, atque cum ex eo suspensum est.

V I.

In cava superficie conoidis parabolici, quod axem ad perpendiculum erectum habeat, circuitus omnes mobilis, circumferentias horizonti parallelas percurrentis, sive parvæ sive magnæ fuerint, æqualibus temporibus peraguntur: quæ tempora singula æquantur binis oscillationibus penduli, cujus longitudo sit dimidium lateris recti parabolæ genitricis.

V. II.

Si mobilia duo, ex filis inæqualibus suspensa, gyrentur ita ut circumferentias horizonti parallelas percurrant, capite altero fili immoto manente; fuerint autem conorum, quorum superficiem fila hoc motu describunt, altitudines æquales; tempora quoque circulationum æqualia erunt.

VIII.

Si mobilia duo, uti prius, motu conico gyrentur, filis æqualibus vel inæqualibus suspensa; fuerintque conorum altitudines inæquales; erunt tempora circulationum in subduplicata ratione ipsarum altitudinum.

I. X.

Si pendulum, motu conico latum, circuitus minimos faciat; eorum singulorum tempora, ad tempus casus perpendicularis ex dupla penduli altitudine, eam rationem habent, quam circumferentia circuli ad diametrum; ac proinde æqualia sunt tempori duarum oscillationum lateralium, ejusdem penduli, minimarum.

X.

DE VI.
CENTRIF.
FUGA.

Si mobile in circumferentia feratur, circuitusque singulos absolvat eo tempore, quo pendulum, longitudinem semidiametri circumferentiæ ejus habens, motu conico circuitum minimum absolveret, vel duplicem oscillationem minimam lateralem: habebit vim centrifugam suæ gravitati æqualem.

X I.

Penduli cujuslibet, motu conico lati, tempora circuitus æqualia erunt tempori casus perpendicularis, ex altitudine penduli filo æquali; cum angulus inclinationis fili, ad planum horizontis, fuerit partium 2. scrup. 54, proxime. Exacte vero, si anguli dicti sinus fuerit ad radium; ut quadratum circulo inscriptum ad quadratum à circumferentia ejus.

XII.

Si pendula duo, pondere æqualia, sed inæquali filorum longitudine, motu conico gyrentur, fuerintque conorum altitudines æquales; erunt vires, quibus fila sua intendent, in eadem ratione quæ est filorum longitudinis.

XIII. Si

XIII.

Si pendulum simplex oscillatione laterali maxima agitetur, hoc est, si per totum circuli quadrantem descendat: ubi ad punctum inum circumferentiæ pervenerit, triplo majori vi filum suum trahet, quam si ex illo simpliciter suspensum foret.

F I N I S.



BREVIS
INSTITUTIO
DE USU
HOROLOGIORUM
AD INVENIENDAS LONGITUDINES.

Adr. Metius in Geographicis Institutionibus

Cap. 4.

ET hæc sane facillima & aptissima est methodus (*scilicet qua adhibitis Horologiis longitudes de-
reguntur*) quam acquirere possis ; nisi quod difficultas & error consistat in irregulari Horolo-
giorum motu : ideoque diligentes inquisitores & inventores rerum naturalium id curate, neque
laboris vestri vos pœniteat, quo hunc errorem tollere tentetis. Inquirite in hunc verum & æqua-
bilem naturæ cursum ; quo potiti verum lapidem Philosophorum invenistis, neque fortes Nau-
cleri ad scopulos toties offendent.

Fournier in Hydrographia l. 12. C. 35.

UNDE tandem colligo , si via inveniri queat ad Horologia perficienda, & laborem suscipere ve-
limus iis bene utendi , nullam praxim (*ad inveniendas longitudes*) cum hac comparandam esse.

*Didericus Rembrantz a Nierop in Animadversionibus
de inveniendis longitudinibus.*

HOC modo laudabiliora censerem nova excogitata Horologia Domini Christiani Hugonii a Zuy-
lichem , quæ, loco liberamenti, a plumbo pendulo oscillato moderantur, de quibus per certa
testimonia certus sum, quod hæc tempus exacte ad hebdomadas, imò ferè ad menses juste di-
metiri queant ; Unde considerem, quod ope horum Horologiorum maximum perciperemus
commodum, imò quod, nisi agitatio navis impediret, satis attingere possemus ad inventionem
longitudinum.

BREVIS INSTRUCTIO DE USU HOROLOGIORUM AD INVENIENDAS LONGITUDINES.

I.



D minimum bina nova Horologia Oscillatoria in navem ferantur: ut si alterutrum forte fortunâ vel ex negligentia quiescat; vel si diuturnitate temporis contractis sordibus, purgandum sit, alterum nihilominus moveatur; præstaret autem 3 vel 4 adhibere horologia.

I I.

Cui cura horologiorum committetur, discat a fabro quæ spectant indices horarum minutarum primarum & secundarum, internas etiam horologiorum partes intelligere, & redu-
cendi ea methodum.

I I I.

Horologia in navi suspendenda sunt in loco arte clauso, ubi tuta sunt ab humore vel sordibus, & ne disturbentur contactibus: Et si locum illum in media navi prope malum principem ordinare possemus, multum præstaret, quoniam ibi motus minimus est.

I V.

Antequam horologia in navem inferantur, conabimur ea aptare ad rectam dierum mensuram, tum enim usus est facilissimus, nullusque fabris labor est ad unum bene adaptatum horologium alia accommodare. Sed si tamen tempus vel opportuna id præstandi occasio defuerit, nihilominus poterunt æque certe mari usurpari, dummodo observaveris vel scias, quanto citius vel tardius spatio 24 horarum moveantur, ut postea docebitur.

Reducere horologia ad rectam dierum mensuram vel cognoscere quanto citius vel tardius spatio 24 horarum moveantur.

Observe, dies ab una ad alteram meridiem aliquantulum differre quæ causa est cur horologium, licet prorsus exactum & secundum mediorum dierum mensuram moveatur, non semper cum sole conveniat. Sed ut hæc inæqualitas æquetur, & semper ope Horologii scire possimus, quam horam indicat Sol, & consequenter num horologium ad rectam mediorum dierum mensuram dispositum sit, conducit sequens tabula cujus usus talis est. Quando primum horologium constituendum est, subtrahe ex hora solari observatâ æquationem ejus diei quæ in tabula reperitur, & dispone horologium ad residuas horas, minuta prima & secunda: ubi post aliquot dies quæritur hora solaris, adde ad horam horologii æquationem diei ultimi, & aggregatum erit hora solaris, si horologium exacte fuit adaptatum, secundum mensuram dierum mediorum; verum ut hæc observationes quam certissime instituantur, & horologia ad mensuram adaptentur antequam in navem inferantur, methodus sequens aptissima est.

Duc lineam meridianam in pavimento, cujus operationis methodi satis notæ sunt; observandum præterea summam hic non requiri exactitudinem; Porro, directe super lineam meridianam, suspende 2 fila appensis infra ponderibus, vel aliter verticaliter tendantur, certosque a se mutuò distent pedes, quo plures eo melius.

Ubi dein medietas solis videtur exacte ex adverso amborum filorum (ad quod requiritur vitrum obscuri coloris, vel in fuligine candelæ denigratum) eo momento horologiorum indices disponendi sunt, non exacte in 12 horas, sed tanto magis retrorsum, quanta est æquatio illius diei in Tabula: ex. gr. si fuerit 22 dies Martii, cujus æquatio in Tabula est 8 min. 3 sec: hæc sunt subducenda ex 12 horis, & residuum erit 11 horæ 51 min. 57 sec: in quot horas minuta & secunda disponendi sunt indices Horologiorum quam primum sol medius

dius ex adverſo 2 filorum conſpicitur. Dein poſt aliquot dies obſervatio rurfus eodem modo eſt inſtituenda, ubi ſol ex adverſo filorum cernitur, & ſimiliter notanda hora minuta & ſecunda horologiorum, quibus adde æquationem ejus diei excerptam ex Tabulâ, & ſi aggregatum exacte componat 12 horas Horologium ad rectam meſuram accommodatum eſt. Si vero differat dividenda ſunt minuta & ſecunda iſtius differentiæ, per numerum dierum inter utramque obſervationem, ad obtinendam quotidianam differentiam.

Supponamus hanc ſecundam obſervationem fieri 30. Martii ſcil. octo diebus poſt primam & comperiatur medietate ſolis viſa in meridiano ex adverſo 2 filorum, horologium indicare

Æquatio 30. Martii in tabula eſt

Quæ addita horæ oſtenſæ per horologium præbet ſummam

<i>h.</i>	<i>m.</i>	<i>ſ.</i>
11.	51.	7.
0.	10.	40.
<hr/>		
12.	1.	47.

Si hæc ſumma exacte fuiſſet 12 horarum, horologium recte diſpoſitum fuiſſet, ſed cum excedat 12. horas 1. minuto 47. ſecundis, tanto citius promotum fuit ſpatio octidui; & hoc 1 minutum & 47 ſecunda, aut 107 ſecunda, diviſa per 8. efficiunt 13. $\frac{1}{3}$ ſecundorum, differentiam in ſpatio 24. horarum. Quâ differentiâ cognitâ, ſi non otium nec animus ſit ſuſcipiendi moleſtiam ut adaptetur horologium ad veram meſuram, neceſſe hoc non eſt; ita enim in navim inferre licet, modo prædicta quotidiana differentia annotetur, & ad eam nosmet componamus ut ſtatim dicetur.

Sed ſi accuratius Horologium diſponere velimus, removen- dum eſt minus pondus penduli parumper deorſum, quo tardius movebitur: & tum de novo obſervatio per ſolem inſtituenda eſt ut antea; ſi tarde nimis motum fuiſſet, ſupra memora- tum pondus parumper ſurſum promovendum fuiſſet, ita tamen, ne ſupra punctum medium penduli promoveatur. eâ quippe gaudet proprietate, quod inde ſurſum promotum horologium lentius iterum promoveat, cujus rei in deſcri- ptione Horologii datur demonſtratio*; ut & æquationis tem- poris, cujus ſolummodo hic docemus uſum. Præter certam

* Vide ſu-
pra pag 172.

Dies.	Januar.		Febr.		Mart.		Apr.		Maj.		Jun.	
	Min.	Sec.	Min.	Sec.	Min.	Sec.	Min.	Sec.	Min.	Sec.	Min.	Sec.
1	10	40	0	32	2	15	11	18	18	32	18	10
2	10	10	0	24	2	28	11	37	18	39	18	1
3	9	41	0	18	2	42	11	56	18	46	17	51
4	9	13	0	13	2	56	12	15	18	53	17	41
5	8	45	0	9	3	11	12	34	18	59	17	30
6	8	17	0	6	3	26	12	53	19	4	17	19
7	7	50	0	3	3	41	13	12	19	9	17	8
8	7	23	0	1	3	56	13	31	19	14	16	57
9	6	58	0	0	4	12	13	49	19	18	16	46
10	6	34	0	0	4	29	14	6	19	22	16	35
11	6	10	0	0	4	46	14	23	19	25	16	24
12	5	47	0	2	5	4	14	39	19	28	16	13
13	5	24	0	4	5	22	14	55	19	29	16	1
14	5	2	0	8	5	40	15	10	19	29	15	49
15	4	41	0	12	5	58	15	25	19	29	15	37
16	4	21	0	16	6	16	15	39	19	28	15	24
17	4	2	0	21	6	33	15	53	19	26	15	11
18	3	44	0	26	6	51	16	7	19	24	14	58
19	3	27	0	32	7	9	16	21	19	21	14	45
20	3	11	0	40	7	27	16	34	19	18	14	32
21	2	55	0	48	7	45	16	47	19	15	14	19
22	2	39	0	57	8	3	16	59	19	11	14	6
23	2	23	1	6	8	22	17	11	19	7	13	53
24	2	7	1	16	8	41	17	22	19	2	13	40
25	1	52	1	26	9	1	17	33	18	57	13	27
26	1	38	1	37	9	21	17	43	18	51	13	15
27	1	25	1	49	9	41	17	53	18	45	13	3
28	1	13	2	2	10	1	18	3	18	39	12	52
29	1	2			10	21	18	13	18	33	12	41
30	0	51			10	40	18	23	18	26	12	30
31	0	41			10	59			18	18		

TIONIS DIERUM.

199

<i>Dies.</i>	<i>Jul.</i>		<i>Aug.</i>		<i>Sept.</i>		<i>Octob.</i>		<i>Nov.</i>		<i>Dec.</i>	
	Min.	Sec.	Min.	Sec.	Min.	Sec.	Min.	Sec.	Min.	Sec.	Min.	Sec.
1	12	19	10	4	16	23	26	30	31	55	25	34
2	12	8	10	8	16	42	26	49	31	55	25	10
3	11	58	10	13	17	1	27	8	31	54	24	45
4	11	48	10	18	17	21	27	26	31	52	24	20
5	11	38	10	23	17	41	27	43	31	50	23	55
6	11	28	10	28	18	1	28	0	31	47	23	30
7	11	18	10	34	18	21	28	16	31	43	23	4
8	11	9	10	41	18	41	28	32	31	37	22	38
9	11	0	10	49	19	1	28	47	31	30	22	11
10	10	52	10	58	19	21	29	2	31	22	21	43
11	10	47	11	7	19	41	29	16	31	13	21	14
12	10	38	11	16	20	1	29	30	31	3	20	44
13	10	31	11	25	20	22	29	43	30	53	20	14
14	10	25	11	36	20	43	29	56	30	43	19	44
15	10	19	11	48	21	4	30	9	30	32	19	14
16	10	13	12	1	21	25	30	22	30	20	18	44
17	10	7	12	14	21	47	30	34	30	8	18	14
18	10	2	12	28	22	9	30	45	29	55	17	44
19	9	58	12	42	22	31	30	55	29	40	17	14
20	9	54	12	57	22	52	31	4	29	23	16	44
21	9	51	13	12	23	13	31	12	29	6	16	14
22	9	49	13	27	23	33	31	19	28	48	15	44
23	9	47	13	43	23	53	31	26	28	30	15	14
24	9	46	13	59	24	13	31	32	28	11	14	43
25	9	46	14	16	24	33	31	38	27	51	14	12
26	9	46	14	33	24	53	31	43	27	30	13	41
27	9	47	14	50	25	13	31	47	27	8	13	10
28	9	49	15	8	25	33	31	50	26	45	12	40
29	9	52	15	26	25	52	31	53	26	22	12	10
30	9	56	15	45	26	11	31	55	25	58	11	40
31	10	0	16	4			31	55			11	10

demonstrationem etiam revera exactis Pendulis compertum est, quod ad inæqualitatem dierum ad rectam mensuram reducendam, æquatio, prout eam hic per præcedentem Tabulam instituimus, exacte cum experientia conveniat, ita ut tuto ei confidere liceat. Idque tanti momenti est in inveniendis longitudinibus, ut, si non fuerit observatum, nonnunquam spatio 3 mensium in calculo errorem committas 7 graduum & amplius, sine ulla tamen horologiorum culpa: qui gradus sub Tropicis ultra 100 Germanica milliaria continent.

Ostenso, quomodo horologia possint adaptari terrâ, vel quomodo eorum differentia quotidiana sit invenienda, proximum erit dicere, quomodo idem faciendum sit in navi fixa ad anchoram, cum minime possibile sit idem præstare in verificatione.

Observabimus quodam die ortum & occasum Solis, & in utraque observatione ubi ejus medietas exacte supra Horizontem apparet, notabimus horam quam indicat horologium, & supputabimus quot horæ interea fuerint præteritæ, cujus numeri dimidio addito ad horam observationis matutinæ, habebimus horam quam indicavit horologium cum Sol esset in meridiano: cui addens Tabulæ æquationem istius diei, summam notabimus, & horologium ulterius promoveri patiemur. dein quibusdam diebus, elapsis (quo autem plures præterierint, eo melius est) idem omnino faciemus; Et si hora hujus ultimi diei sit eadem, cum ea quæ antea fuerat notata, horologium recte accommodatum est. Sin vero major vel minor sit, vel lentius vel celerius movetur, & differentia divisa per numerum dierum interim dilapsarum dabit quotidianam differentiam, quam annotabimus, & si velimus horologium relinquemus in illo statu; vel alioquin removendo minus pondus penduli ut supra dictum est, melius horologium accommodabimus.

Ex. Gr. pone 21. Martii mane cum solis medietas *b. m. s.*
 tas apparet supra horizontem horologium indicare. 5. 30. 10.
 Et vesperi ubi Solis medietas latet infra horizontem. 5. 20. 6.

Ut

DE USU HOROLOG.

201

Ut scias ope horologii horas inter binas *h. m. s.*
 observationes elapsas, subtrahe horam ortus *5. 30. 10.*
 ex *12. 0. 0.*

Restant *6. 29. 50.*
5. 20. 6.

Cui si addas horam occasus

Prodeunt horæ inter binas observationes
 elapsæ *11. 49. 56.*
 Quarum dimidium est *5. 54. 58.*
 Quo addito ad horam ortus *5. 30. 10.*

Prodit hora horologii, cum sol esset in Me-
 ridiano *11. 25. 8.*

Cui addita æquatione 21. Martii *0. 7. 45.*

Summa est *11. 32. 53.*

Septem diebus post sc. 28. Martii observetur
 ortus solis, quum horologium indicat *5. 19. 4.*

Et occasus quum indicat *5. 25. 4.*

Ad habendas horas interim elapsas, subtra-
 he horam ortus *5. 19. 4.*

ex *12. 0. 0.*

Restant *6. 40. 56.*

Cui si addas horam occasus *5. 25. 4.*

Prodeunt horæ interea delapsæ *12. 6. 0.*

Quarum dimidium est *6. 3. 0.*

Quo addito ad horam ortus *5. 19. 4.*

Prodit hora horologii cum Sol erat in me-
 ridie *11. 22. 4.*

Cui addita æquatione 28. Martii *0. 10. 1.*

Summa est *11. 32. 5.*

Quæ summa si fuisset eadem cum priori scilicet *11. 32. 53.*
 ad rectam mensuram dispositum fuisset horologium; sed cum
 posterior minor sit priori, differentiâ existente 49. secundo-
 rum, horologium spatio 7 dierum tanto tardius fuit promo-
 tum, quæ 49 secunda divisa per 7 numerum dierum, dant
 quotientem 7 secunda differentiam diurnam, quâ horolo-

Cc gium

gium tardius movetur; possumus etiam loco ortus & occasus Solis duas æquales Solis altitudines observare ante & post meridiem, & hora horologii annotatâ utriusque observationis tempore, eodem modo, ac hic dictum est procedemus.

V I.

Ope Horologiorum mari invenire longitudinem loci in quo versaris.

Singulis horologiis nomina vel signa impone ut A. B. C. & antequam velifices, dispone eadem secundum tempus observatum per Solem in loco, ubi moraris, diminutum æquatione ejus diei, quo observas; quem annotabis.

Dein ubi in mari versaris si vis scire longitudinem loci, in quo es; quot gradibus Meridianus loci hujus sit orientior vel occidentior meridiano loci illius in quo adaptasti horologia; observa Solem vel Stellas, ut determines horam, & vide quam horam eodem momento indicent horologia; quam horam, si horologia non fuerint disposita ad rectam mensuram æquabis cognitâ diurnâ differentiâ, ei porrò addens æquationem præsentis diei, quo ita habeas horam in loco illo, ubi horologia fuere disposita. Si hæc hora eadem sit cum illa quæ observata fuit in loco præsentem, consistis sub eodem Meridiano, ac ubi horologia fuere disposita ad Solem: Si vero hora observata major sit illâ quam horologia ostendunt, certus es, te pervenisse sub Meridianum Orientaliorem; sin denique fuerit minor, pervenisti sub Meridianum Occidentaliorem: & computatis in singulas quasque horas differentię temporis 15 gradibus longitudinis vel in singula minuta 15 minutis, vel totidem quadrantibus gradus, cognosces, quot gradibus dicti Meridiani ab invicem distent. E. Gr. pone Horologia A. B. C. fuisse aptata ad Solem in loco ex quo abiisti, 2 Martii, id est ad horam observatam, sed in tantum diminutam, quanta est æquatio 2 Martii, 2 min. 28 sec. & pone horologium A fuisse dispositum ad veram mensuram, sed B moveri singulis diebus 7 secundis tardius, & C singulis diebus 12 secundis citius.

Aliquot diebus post E. G. 15. Maji, ut detegas longitudinem loci in quo in mari versaris; observa
horam diei, quæ sit

<i>h.</i>	<i>m.</i>	<i>s.</i>
5.	18.	10.

Et comperis horologium A indicare

2.	6.	0.
----	----	----

Sed horologium B. indicare

1.	57.	22.
----	-----	-----

Sed cum singulis diebus 7. sec. tardius moveatur, prodeunt spatio 74. dierum nempe a
2. Martii ad 15. Maji

0.	8.	38.
----	----	-----

Quæ addita ad horam a B. demonstratam prodit hora eadem ac indicavit horologium A

2.	6.	0.
----	----	----

Invenis etiam horologium C. indicare

2.	20.	48.
----	-----	-----

Sed cum moveatur 12. sec. singulis diebus citius, habemus spatio 74. dierum

0.	14.	48.
----	-----	-----

Quæ subtracta ab hora a C. indicata, iterum prodeunt

2.	6.	0.
----	----	----

Cum itaque hora horologiorum sit

2.	6.	0.
----	----	----

Adde illi æquationem 15. Maji

0.	19.	29.
----	-----	-----

Prodit hora loci ubi horologia disposita sunt

2.	25.	29.
----	-----	-----

Sed hora observata est

5.	18.	10.
----	-----	-----

Excedens priorem

2.	52.	41.
----	-----	-----

Ergo Meridianus loci in quo versaris 15. Maji Orientalior est, Meridianoloci, in quo horologia fuere aprata

2.	52.	41.
----	-----	-----

Quæ horæ in gradus reductæ, ponendo 15. gr. min. sec. gradus valere unam horam, prodeunt

43.	0.	15.
-----	----	-----

Verum est ex eodem calculo posse concludi te esse sub Meridiano hōc ipso 180. gradus Orientaliori, quia index horarius revolutionem suam absolvit spatio 12. horarum in horologiis, sed differentia tanta est, ut nequeas in ea decipi. Alioquin enim horologium posset construi, cujus index circuitum suum semel absolveret spatio 24. horarum.

Observandum quoque hic est, cum dico, locum tot gradibus Orientaliorem esse illo ex quo abiisti, illud dici eo respectu quod illuc veneris ad Orientem navigans, versus quam partem gradus numerari possunt usque ad 360; alioquin enim satis no-

tum est : locum , qui 180. gradus Orientem versus ab alio distat , tantum etiam Occidentem versus inde distare : & pariter , qui 300. gradus Orientaliter ab alio distat etiam 60. gradus Occidentaliter inde distare.

V I I.

Mari invenire horam diei.

Quandoquidem pro inveniendâ longitudine requiritur ut hora loci , in quo es , cognita sit , ut supra dictum est , dicta hora summa exactitudine est observanda ; unumquodque enim minutum quo in calculo aberras constituit errorem $\frac{1}{4}$. gradus in longitudine , id est , prope Æquatorem $3\frac{1}{4}$. Germanicorum milliarium sed minus ubi longe inde abes :

Quare ad certam horæ inventionem , ne fidas observationi maximæ Solis altitudinis , ut inde concludas præcise meridiem esse vel Solem in Meridiano , nisi inter Tropicos Sol fuerit in ipso puncto Zenith vel ei quam proximus. Nam alias Sol existens prope Meridianum aliquamdiu perseverat sine ulla sensibili mutatione altitudinis suæ ; ideoque altitudo meridialis idonea satis est ad latitudinem vel elevationem Poli loci alicujus dimetiendam , non tamen ad longitudinem ejus exacte inveniendam. Multo minus niti potes pyxidibus nauticis in accurato meridiei tempore inquirendo.

Neque annuli Astronomici vel alia horologia solaria certa satis sunt in ostendenda hora ad minuta & secunda. Sed melius est observare solis altitudinem , ubi est in Oriente vel Occidente , quo autem Orienti aut Occidenti propior est , eo melius ; ibi enim cum est , mutatur ejus altitudo sensibilibus magis quam ante vel post & ita , ex inventa Poli elevatione , & notâ Solis declinatione , hora potest computatione detegi , cujus modus ab aliis satis descriptus est ; quia tamen computatio illa molesta est & nonnulli errores in mensuranda altitudine Solis committi possunt faciliorem hic methodum ostendam & demonstrabo.

VIII.

*Quomodo ex observatione ortus & occasus Solis & ex
hora horologiorum longitudo mari inveniri
queat.*

Hæc fane methodus meo judicio omnium est certissima, cum ad eam neque notitia Poli elevationis, neque Solis declinationis, neque ulla instrumenta ad observandum requirantur; cum neque refraction quid nocere possit, quoniam hæc in ortu & occasu Solis ejusdem diei parum aut nihil differre potest.

Sicuti ergo antea docuimus horologia in navi adaptare, & observare quâ horâ eorundem horologiorum Sol fuerit in meridiano; hic eodem modo procedendum est, id est, in ortu & occasu solis, ubi ejus medietas est supra horizontem, annotabis horam demonstratam tunc temporis per horologia; & licet interea velificando fueris progressus, nil refert, uti postea demonstrabitur: dein computans quot interea horæ horologiorum dilapsæ sint, earumque dimidium addens ad horam ortus, habebis horam quam horologium indicabat quum Sol erat in Meridiano; ad quam addenda est æquatio istius diei ex tabula desumpta; & si summa æqualis sit 12 horis, fuisti meridie sub eodem Meridiano, sub quo horologia ad solem fuere adaptata; sed si summa excedat 12. horas, fuisti meridie sub occidentaliori meridiano, quam loci ejus in quo horologia sunt disposita; sed si summa fuerit minor 12. horis fuisti sub orientaliori Meridiano, idque toties quindecim gradibus, quot horis summa fuerit minor vel excesserit 12. horas, prout istius rei computationem antea jam docuimus.

E. G. Ponatur Horologia A. & B, ut ante, fuisse adaptata ad Solem in loco ex quo decessisti 2. Martii, id est ad horam Solis diminutam æquatione istius diei scil. 2. min. 28. sec. Horologio A. ad rectam mensuram redacto; B. vero singulis diebus 7. secundis tardius moto; Postea scire desiderans longitudinem loci in quem pervenisti,

(pone 1. Junii,) observetur mane sol medius *b. m. s.*
supra horizontem quando horologium indicat 2. 30. 37.

Et Vesperis iterum medius Sol infra horizon-
tem, cum idem horologium indicat 3. 9. 7.

Ad inveniendashoras interea elapsas, sub-
trahe horam ortus
ex 2. 30. 37.
12. 0. 0.

Reliquum est 9. 29. 23.

Huic adde horam occasus 3. 9. 7.

Prodeunt horæ interea elapsæ 12. 38. 30.

Quarum dimidio 6. 19. 15.

Addito ad horam ortus 2. 30. 37.

Habebis horam Horologii A, quum Sol erat
in Meridiano 8. 49. 52.

Eodem modo quæratuur hora horologii B,
cum Sol erat in Meridiano, quæ sit 8. 38. 5.

Sed hoc horologium singulis diebus 7. se-
cundis tardius motum retardatur spatio 101.
dierum a 2. Martii ad 1. Junii 0. 11. 47.

Quæ propterea ad inventam horam addita,
datur 8. 49. 52.

Id est, eadem hora, quæ per horologium
A. inventa est; ad quam nunc addita æqua-
tione 1. Junii 0. 18. 10.

Prodit 9. 8. 2.

Hæc est diei hora loci in quo horologia ad-
aptata sunt, quæ cum coincidit cum meridie
loci observationis;

Differentia est 2. 51. 58.

Quare hic ultimus Meridianus tanto orienta-
lior est; quibus horis reductis ad gradus, *gr. min. sec.*
uti supra docuimus prodeunt 42. 59. 30.

Patet te hoc modo invenire longitudinem loci, in
quo meridie vel Sole existente in Meridiano fuisti; quæ
differt a longitudine loci, in quo observas Solis occa-
sum,

sum, sed sine sensibili errore æstimare potes, quantum paucis horis progressus fueris, vel longitudo mutata fuerit: Potes etiam, loco observationis ortus & occasus Solis, prius Solis occasum, vesperi observare, & dein proximo mane ortum, utroque tempore notando horam Horologiorum; & inde computa eodem modo horam in loco dispositionis, quum media nox erat in loco observationis, & detege differentiam longitudinis ut ante. Tandem potes quoque loco ortus & occasus Solis observare duas æquales solis altitudines ante & post meridiem, annotando horam horologiorum, & computando eodem modo, quo diximus de ortu & occasu; considerandum tamen est, Solis altitudines optime observari, quando Orienti vel Occidenti proximus est, ut antea notatum.

Licet forte quis censeat, in praxi hujus methodi, inter ante & pomeridianam observationem, quiescentem navem desiderari, aut quæ parum transferatur; certum tamen est, progrediendo nullum sensibilem errorem causari posse, in quantum interea eundem teneas cursum, æquabili velocitate.

Primum enim, si cursum Orientem vel Occidentem versus dirigas, nullus omnino error erit, sed certo concludere poteris, qua longitudine meridie vel mediâ nocte fueris, unde ergo, uti antea dictum est, satis exacte æstimare potes, ubi sis ultimæ observationis tempore.

V. G. pone, quod ante meridiana Solis altitudo 10 graduum observata sit, quum horologia indicant 8. horas & pomeridiana æqualis altitudo quum horologia indicant 2. horas; & quod inter utramque observationem æquabili velocitate Orientem versus navigaverim, licet inscius me 1. gradum in longitudine progressum esse, id est, 1. gradum paralleli juxta quem navigo: Agens jam secundum præscriptam regulam, comperio longitudinem 15. gradus Orientem versus, calculum ineundo a loco, in quo Horologia fuere disposita. quam longitudinem 15. graduum dico esse loci, ubi meridie fui.

Quod ita demonstratur. Quoniam locus vespertinæ obser-

vationis uno gradu Orientalior est, quam matutinæ; certum est in loco vespertinæ observationis Solem 4. minuta prius perventurum esse, ad altitudinem 10. graduum, quam in loco matutinæ. Ducrum enim locorum sub eodem paralelo sitorum, quot gradus unus altero Orientalior est, totidem 4. minutis prius in illo observantur singulæ Solis altitudines; ideo si in priori loco cum navi substitissem, Solem vespertinâ observatione reperissem ad altitudinem 10. graduum quum horologia indicabant non 2. horas, sed 2. horas 4. min. ubi tum loci ejus longitudinem, juxta regulam, invenissem $14\frac{1}{2}$. gradus Orientem versus. Sed certum est, me in priori temporis dimidio inter 2. observationes progressum fuisse $\frac{1}{2}$ gradum, quoniam ponitur, me toto tempore profecisse 1. gradum, velocitatemque fuisse æquabilem. Eram igitur meridie in longitudine 15. graduum Orientem versus, sicuti prius erat inventum.

Pariter potest demonstrari, progressum navis Occidentem versus nil obstare, sed regulam sequendo, iterum invenire longitudinem loci, quem meridie præternavigasti.

Si jam cursus inter 2. observationes Meridiem versus vel Septentrionem desciscat, imo licet fieret directe Septentrionem vel meridiem versus, modo ponatur æquabilis velocitas, nullus inde oriatur error si Solis altitudo sumatur, quando prope Orientem vel Occidentem est, quibus in locis alibi quoque dictum est optime fieri observationem. Ratio hæc est, quando 2. loca Septentrionaliter vel Australiter a se mutuò distant, & solummodo 1. vel 2. gradus in latitudine differunt, si Sol respectu unius loci in Oriente vel Occidente versetur, ad certam supra horizontem altitudinem, etiam quam proxime eodem tempore ad eandem altitudinem supra horizontem alterius loci apparebit. Ita ut comperiam, licet navis inter matutinam & vespertinam observationem 2. gradus navigaret, quod raro vel nunquam accidit, nullum tamen in longitudine errorem hinc oriri posse, vel tantum paucorum minutorum.

Præ-

Præscriptis ergo modis, vel per ortum & occasum Solis, vel per occasum & ortum Solis, vel per 2 æquales Solis altitudines, tuto semper uti possumus, non obstante progressu navium; quemcunque hæ teneant cursum.

Si autem procul ab Æquatore Septentrionem vel Meridiem versus naviges, præsertim hyeme, altitudo Solis lente mutatur, unde incertæ sunt observationes; sed iis in locis gradus longitudinis sunt breviores, vel pauciora milliaria continent quam prope Æquatorem, ideoque errores in inveniendis longitudinibus eo minus sensibiles sunt.

I X.

Potes verò, præsertim in iis oris, quæ procul ab Æquatore Septentrionem vel Austrum versus remotæ sunt, vel etiam ubicunque velis, præscriptam regulam ad praxin vocare, observando 2 æquales altitudines cognitæ alicujus stellæ, quæ multum attollitur supra Horizontem. Nam inde secundum memoratam regulam, disces quâ horâ Horologiorum in Meridiano fuerit stella, & porro cognita ejusdem *ascensione reëta*, ut & *ascensione reëta* Solis, facile inde supputabis horam solarem, qua comparatâ cum horâ Horologiorum, ut ante, habebis longitudinem loci, ubi fuisti stella existente in Meridiano.

X.

Quando Horologia, quorum aliquamdiu motus fuit accuratus, ab invicem paululum differunt, prout diuturnitate temporis facile accidit, ut unum vel alterum minuto circiter deficiat, eo in casu computatio ineunda est erit secundum istud, quod celerius movetur: nisi noris causam verisimilem ob quam citius moveatur; facilius enim Penduli motus retardatur, quàm acceleratur: nam filum, cui Pendulum appendet, poterit forsan per violentam navis agitationem nonnihil extendi, sed nequit contrahi.

X I.

Quando videndam se offert regio cognita, ne negligas annotare longitudinem illius, quantum exacte fieri poterit, ex inventa longitudine loci in quo versaris; Primo ad corrigendas inde mappas marinas, postquam longitudo loci fuerit diversis temporibus comperta eadem, ita ut nil amplius de ea dubites. In his enim mappis quantum attinet ad situm locorum Orientem & Occidentem versus, multa superflunt emendanda. Secundo ut scias, in prosecutione tui itineris, quantum respectu loci visi velificando progressus fueris ad Orientem vel Occidentem: etiamsi infortunio, vel negligentia, omnia quiescant Horologia, poteris eadem ad motum rursus adaptare, & disponere ad horam per Solem compertam. computando porro longitudinem ab eisdem loci visi Meridiano. Nam nullatenus teneris certum Meridianum alicujus loci cogniti, pro initio computationis longitudinum habere, cujus usus tantum est in mappis vel Tabulis longitudinum, in quo casu usu venit Meridianus montis Pici in insula Teneriffa, vel Meridianus insularum Corvo & Flores, occidentalissimarum Azorum vel insularum Flandricarum, vel cujusvis alterius loci: & foret egregium (quod non obtinet) si omnes auctores unum eundemque Meridianum pro primo eligerent, ut singula loca iisdem gradibus longitudinis pariter ac latitudinis determinarentur: sed in itinere fatis est longitudinum differentiam observare, initio computationis facto a Meridiano cujuscunque loci.

X I I.

Si accidat, ut mari medio omnia Horologia quiescant, quam primum fieri potest, rursus eadem ad motum adapta,
ut

ut illorum ope scias, quantum dein ad Orientem vel Occidentem progressus sis, quod non parvi est momenti, nam defectu hujus notitiæ, nonnunquam violentis fluctibus ita abriperis, ut, licet vento secundo naviges, tamen retrorsum abigaris, cujus rei varia dantur exempla.

F I N I S.



EXCERPTA EX LITERIS DATIS

LONDINI $\frac{12}{3}$ JANUARIII

MDCLXV.

Indem Navarchus Holmius huc advenit, & relatio, quam ipse mihi communicavit de experimento, quod de nostris Horologiis fecit, plane nos certos facit de bono, qui sperandus est, successu; Cum ad insulam St. Thomæ sub æquatore esset, ut inde huc veniret, coactus fuit, longissime Occidentem versus cursum dirigere, prosperum ut obtineret ventum; cum ergo sub ejus auspiciis quatuor darentur naves, omnes simul navigarunt per 600 milliaria non mutato cursu: cum dein secundum ventum nacti essent quo peterent littora Africæ, eo tendebant, cursum suum Orientem inter & Septentrionem dirigentes; cumque hoc cursu 4. vel 500 milliaria confecissent, judicabant navitæ 3 navium quæ sub ejus erant auspiciis, se procul a prædictâ orâ esse, ita ut non sufficientem aquæ quantitatem haberent, dum eo pervenient; Navarchi Holmii navis satis habebat; sed ubi audiret, quid sentirent cæteri, qui tribus reliquis præerant navibus, omnes nautas & gubernatores convocari jus-

sit, ut deliberarent de eo quod faciendum esset. Ubi verò vidisset commentarios, & ephemerides, quas illi, qui præerant 3 iis navibus proferebant, & conjecturam de loco in quo versabantur; cumque post longas deliberationes, omnes censerent, præstare ad Barbadas trajicere, quam oras Africæ quærere, quia ventus longe citius eos illuc transferret, dixit ille: Viri computatio vestra cum nostra minimè convenit; nam secundum Horologia mea processi, unde concludo, vos errare omnes, statuendo nos multò longius Occidentem versus esse progressos, quam revera sumus, unius error est 120 milliaria, aliis 100, aliis 80: verùm ita Horologiis confido ut hac vice experimentum facere velim; nam secundum meam computationem insula del Fuogo (quæ una est ex insulis Capoverdæ seu promontorii Hesperii,) non ultra 30 milliaria a nobis abest; Ibi nobis aquam possumus curare, & eo cursum dirigere constitui; Si vera est computatio, multum præstabit nobis hanc viam ingredi, quam a vobis ostensam; sin evenerit aliter, biduum tantum producemus navigationem, satisque aquæ interim supererit, ut Barbadas perveniamus; quoniam tanta mihi in navi copia est, ut vobis defectum vestrum supplere queam; Addens quem cursum tenere vellet, mandavit ut sequerentur ipsum cæteri. Postero mane detegebant insulam del Fuogo, & opportuno illuc advenère tempore, uti prædixerat: Cogor hic desinere, communicaturus tecum reliquos omnes casus peculiares, quos scriptis mandare promisit, quamprimum illos nactus fuero.

Nota, hæc Horologia fuisse ex primo Pendulorum genere, nec tam exacta quam recentiora.

EXCERPTA EX LITERIS HAGÆ CO-
MITUM, DIE XXVI. FEBRUAR.

MDCLXV. DATIS.



Um per aliquot dies necesse mihi foret cubiculum tenere, & variis observationibus circa duo mea novæ fabricæ Horologia pendula tempus impenderem, mirum quendam eorum effectum, & a nemine unquam vel cogitandum, detexi. Suspensa enim juxta se invicem ad distantiam unius aut duorum pedum, tam accurate congruebant, ut sine ullâ variatione pendulorum vibrationes simul peragerentur. Quod cum per aliquod tempus impense miratus fuisset, tandem reperi ex aliquâ quasi sympathiâ id oriri; ita ut si pendula movissem vibrationibus diversis, & ut ita dicam intermixtis, intra dimidiæ horæ spatium consona rursus fierent, & sibi mutuo, quamdiu motum non turbabam, responderent. Remotis deinde à se invicem Horologiis, & ad distantiam 15. pedum suspensis, uno die quinque secundorum discrepantiam animadverti, quæ clare demonstravit, priorem pendulorum convenientiam, uti dixi, à sympathia quadam debuisse proficisci; quæ, meo quidem judicio, unice insensibili æris agitationi, per pendulorum motus productæ, adscribi potest. Continentur tamen Horologia suis Capsis, quarum utraque si omne plumbum contentum numeres, centum fere li-

brarum pondus æquat. Et hoc observandum, pendula, cum congruunt, non parallelis motibus ferri, sed contrariis, nunc accedendo, nunc recedendo. Quando autem horologia ad parvam distantiam rursus à me fuere posita, pendula, priorem convenientiam brevi tempore recuperarunt.

Nec hisce contentus, asserem latum tres pedes, crassum unum pollicem, ita interposui, ut pars inferior fundum tangeret, superior Horologia excederet & quasi separaret. Non turbata tamen fuit motuum concordia, sed dies noctesque perduravit, imò si ipse turbassem, brevi instaurata fuit. Nunc in id incumbo, ut quam accuratissime Horologia concordent, experturus deinde ad quam usque distantiam sympathia hæc sese exerat; sed, ut ex observatis auguror, non infra 5. aut 6. pedes subsistet. Major tamen horum omnium est expectanda veritas, quam præstabit diligentia mea, & accuratior in rei causas inquisitio.


Quicquid sit, habemus duo Horologia, quæ nunquam inter se discrepant: quod etiamsi mirum sit, tamen est verissimum. Addo, præter Horologia quæ novo hoc invento constructa sunt, nulla alia idem præstitisse; unde simul patet, quam accurata illa sint, quæ ad perpetuum consensum tantillum requirunt.




DE
HUGENIANA
CENTRI
OSCILLATIONIS
DETERMINATIONE
CONTROVERSIA.

THE
HUGENIANT
GENTRI
OSCILLATIONS
DETERMINATION
CONSTITUTION

THE
HUGENIANT
GENTRI
OSCILLATIONS
DETERMINATION
CONSTITUTION





DE

HUGENIANA CENTRI OSCILLATIONIS DETERMINATIONE CONTROVERSI A.

I.

Observationes Abbatis Catelani in propositionem, quæ fundamentum est 4^a. partis tractatus de Pendulis, Hugonii.

DOminus Hugenius in tractatu suo de Pendulis, ut nil quod ad materiam spectat intactum relinqueret, hanc divisit in 5 partes, in quarum 4^a. fuse examinât quæstionem de Centro Oscillationis vel vibrationis. Sed cum difficile sit animo semper æqualiter attento abstrusas veritates, quales sunt Mathematicæ, perpendere, non est quod miremur, si quæstionem illam non æque accurate, quam quidem reliquas ejusdem operis, examinaverit. Principium autem, quo nititur totum ejus Systema Oscillationis hoc est.

Si Pendulum e pluribus ponderibus compositum atque e quiete dimissum, partem quamcunque Oscillationis integræ confecerit; atque inde porro intelligantur pondera ejus singula, relicto communi vinculo, celeritates acquisite sursum convertere, ac quo usque possunt ascendere; hoc facto centrum gravitatis ex omnibus compositæ, ad eandem altitudinem reversum erit, quam ante inceptam Oscillationem obtinebat *

* Vide supra pag. 126.

Ut parum firmam propositionem hanc demonstremus, sufficiet observasse; vim, quam vocamus gravitatem, longe aliter agere in pondera inter se juncta quam in pondera a se invicem separata. Sint A & B æqualia pondera, quorum

TAB XXVIII.
Fig. 1.

Ec

non

non considerantur neque magnitudo neque figura, quasi singula in unicum punctum reducta forent; si separatim suspensa ex eodem puncto D, & elevata ad idem planum Horizontale D A B, dimittantur usque ad F & G, gravitates eorum, ex ratione Mechanica, quæ cum experimentis, & principiis Physices congruit, augebuntur in tali ratione, vel quod idem est, acquirant velocitates tales, ut harum quadrata sint inter se ut altitudines A H & B I. unde illa pondera perpendiculariter descendunt ad Horizontem.

Quod si dein pondera hæc duo, lineâ aut virgâ inflexibili A B, quam pondere expertem ponimus, jungamus, & ex eodem puncto D, ad memoratas distantias D A & D B, suspensa, dimittamus ad F & G ab eadem, quâ ante, altitudine. Pendulum ex illis compositum, acquirat tantum velocitatis quantum summa duorum Pendulorum simplicium, quoniam commune gravitatis centrum E idem, quod antea, manebit, & ponderum non mutatur situs respectu centri Telluris; sed partes, in quas tota illa velocitas se distribuet ponderibus A & B, erunt inter se ut arcus A F, B G, vel ut radii D F, D G; quoniam in hoc casu ratio inter motus ponderum pendebit ab eorum situ respectu puncti suspensionis D, quod est motuum centrum. Triangula autem H A F & I B G, ut & triangula A F D, B G D cum sint similia, latera eorum A H & B I, A F & B G, D F & D G sunt proportionalia, id est datur eadem ratio inter altitudines, unde pondera A & B descendunt, & inter velocitates quas acquirunt descendendo; sed altitudines sunt eadem ac in priori suppositione; ergo velocitates sunt diversæ, quoniam illæ altitudines, quæ sunt proportionales velocitatibus ponderum simul appensorum, non sunt proportionales nisi quadratis velocitatum, quando sunt separata.

Porro ponamus pendulum compositum in vibratione suâ occurrere plano duro D F G, quo rumpatur, ita ut a se invicem pondera solvantur, erunt hæc reflexa juxta tangentes arcuum F A & G B ad altitudines, quæ inter se erunt ut quadrata velocitatum, quas cadendo acquisivere, id est, ut quadrata
radio-

radiatorum D F & D G, vel horum proportionalium A H & B I. nam separatio ponderum non mutat quantitatem motus eorum: efficit ut moveantur juxta legem corporum cadentium, quæ non inter se conjuncta sunt. Demonstratur in Mechanicis, altitudinem perpendicularem ad horizontem, unde descendit, vel ad quam ascendit, commune gravitatis centrum multorum ponderum, æqualem esse summæ altitudinum, quarum respectu (gallice *par raport auxquelles*). pondera descendunt vel ascendunt, divisæ per eorundem numerum: sed probavimus pondera, quæ separantur, rupto pendulo percussione in planum oscillationi illius oppositum, iterum ascensura esse, ad altitudines diversas ab iis, unde descenderunt, & quidem tales, ut summæ ad utramque partem æquales esse nequeant; nam ultimæ altitudines semper habent pro radicibus quantitates primis proportionales, & præterea eandem, quam eorum radices componentes summam, quæ exprimit totam celeritatem penduli A B; si ergo diversas illas summas separatim dividamus per numerum ponderum, habebimus altitudinem ad quam centrum commune gravitatis iterum ascendit, diversam ab illa, unde descendit; quoniam sunt partes aliquotæ similes quantitatum inæqualium.

Propositio igitur Domini Hugonii falsa est, & consequenter quidquid conclusit circa centrum Oscillationis corrui; vera autem Mathematica hujus quæstionis solutio hæc est.

I I.

Domini Abbatis Catelani Examen Mathematicum Centri Oscillationis.

Quæstio de determinando centro Oscillationis, si bene intellecta fuerit, haud difficilis est. Centrum Oscillationis vocatur punctum mobile in Pendulo ad talem ab axe, vel centro suspensionis, distantiam, ut si omnes aliæ Penduli partes destruerentur, illa sola pergeret in vibrationibus ut antea; id est eodem tempore ac totum Pendulum; Quod ita non fiet cum aliis partibus singulis separatim sumtis; nam

quæ axi viciniore sunt, breviores & frequentiores vibrationes peragent quam remotiores, si arcus similes describant, & aër non resistat.

Cujus rei ratio est, quod viciniore describant arcus minores & acquirant celeritates majores respectu arcuum quam remotiores: nam arcus sunt proportionales quadratis, & velocitates radicibus eorum, quo autem radices minores sunt inter se, eo majores sunt respectu quadratorum suorum.

Cum in Pendulo omnes partes nisi simul, propter earum conjunctionem, moveri nequeant, vibratio minus distantium ab axe ita retardata est a vibratione remotiorum, & vibratio remotiorum ita accelerata est a vibratione aliarum, ut inter illas detur compensatio velocitatum proportionalis arcubus quos describunt; ita ut tempus vibrationis totius Penduli medium sit inter tempus, quo Oscillationem peragunt ejus partes a se invicem solutæ, ut sit æquale summæ illorum temporum, divisæ per numerum partium, quas ut Mathematicæ & exactissime procedamus consideramus, ac si reductæ essent in puncta.

Constat experimentis, & per Philosophiam Cartesianam demonstrari potest, omnia gravia tellurem versus cadere in temporibus quæ sunt in ratione subduplicatâ, vel sicuti radices, altitudinum, unde descendunt, si verticaliter descendant, quod etiam & ex principiis Galilæi demonstrari potest, si cadant per arcus similes, qui incipiunt omnes in eodem plano.

Hæ altitudines in Pendulis, quæ describunt arcus similes circa axem, quocum formant idem planum, sunt inter se ut distantia ab axe, circa quem moventur.

Proposita ergo quæstio eo redit, ut dividamus, per numerum partium Penduli, summam radicum distantiarum partium ab axe. vel generaliter summam linearum rectarum quæ repræsentant tempora vibrationum partium separatim sumtarum, ut habeamus lineam rectam, quæ sit mensura temporis, quo vibrationes suas peragit Pendulum, cujus consequenter quadratum vel 3a. proportionalis erit distantia inter axem & centrum Oscillationis.

Applicatio hujus principii tribus magnitudinibus quas habet Geometria pro objecto satis facilis est. Ad

1. Ad determinandum centrum Oscillationis lineæ rectæ suspensæ ex axe, debemus illam concipere, divisam in partes æquales infinite parvas, vel in omnibus suis punctis. Parabola dein super maximâ lineæ ab axe distantia describenda est, cujus vertex sit punctum axis in quod terminatur hæc distantia & parameter linea quæ est unitas respectu ejusdem distantia. E quovis lineæ puncto ducenda est axi parallela quæ occurrat parabola, ejusque applicata fiat, summa omnium applicatarum similium est æqualis rectangulo, cujus altitudo est linea proposita, & basis radix distantia inter axem & centrum Oscillationis quæsitum; nam summa illa est Parabola, vel Parabola portio, cujus Diameter est linea data, & Parameter tertia proportionalis illi lineæ & maximæ ab axe distantia; vel 4a. proportionalis positis hisce tribus, linea, maxima distantia, & differentia hujus cum minimâ.

2. Ut habeamus distantiam quâ centrum Oscillationis Plani remotum est ab axe, debemus concipere partem solidi Parabolici, cujus Parabola habeant pro Diametris maximas distantias inter axem & unamquamque linearum parallelarum, quæ implent planum. Si solidum hoc in duas partes æquales secetur juxta Axis longitudinem; & dimidia pars secta fuerit inter applicatas ad distantias ab Axe, & inter Plani latera, segmentum æquale erit Prismati, quod pro basi habet planum, & pro altitudine radicem distantia axis a centro Oscillationis ejusdem plani. si vibratio fiat circa Punctum vel si, quum sit circa Planum, Pendulum sit compositum e partibus, quæ sint in planis diversis respectu Axis, determinabitur, eâ methodo quâ diximus, quodvis centrum Oscillationis partium, quæ sunt in eadem lineâ rectâ transeunte per punctum suspensionis, vel in eodem plano transeunte per Axem; omnia illa Oscillationis centra facient Pendulum multo simplicius & habens idem Oscillationis centrum, ac primum. Invenietur Oscillationis centrum dividendo per numerum aliorum Oscillationis centrorum summam linearum rectarum, quæ repræsentant tempora, quibus conficerent peculiare suas vibrationes. Tempora illa pendent ab arcubus, vel curvarum portionibus, descriptis ab omnibus Oscillationis centris in vibratione Penduli, qui arcus considerari debent singuli velut infinita plana diversimode ad Horizontem inclinata.

3. Quod ad solida attinet, concipe illa dividi in parallelas

Ee 3

inter

inter se superficies & ad axem perpendiculares; formari debet, secundâ sectione, planum vel superficies curva distantiarum inter illorum centra Oscillationis & axem †, circa cujus puncta moventur. Sic in summâ centrorum, quæ ab unâ parte rectas lineas terminant, ex quibus planum hoc, vel superficies illa curva, composita est, habetur Pendulum magis simplex quam solidum, & cujus vibratio æque diuturna est. Centrum Oscillationis novi illius Penduli determinabitur transferendo omnia illa centra Oscillationis particularia ad Axem qui est eorum numerus, & ponendo illum axem ita moveri, ut puncta ejus percurrant eosdem arcus ac centra. Si solida proposita sint Prismata recta, habebunt eadem Oscillationis centra, ac eorum bases, si hæ fuerint perpendiculares ad axem.

Sic centrum Oscillationis solidi pendet a centris Oscillationis certarum superficierum motarum circa punctum, quarum commune Oscillationis centrum est centrum Oscillationis lineæ rectæ motæ circa aliam rectam vel curvam; ita ut non requirantur aliæ regulæ pro corporibus quam pro lineis & superficiebus.

M O N I T U M.

Observationes Abbatis Catelani primum editæ fuere in 25 diario Parisiensi anni 1681, & examen Mathematicum in 29 diario ejusdem anni. Scripta ambo in primo diario sequentis anni iterum extant, cum monitu varia defici in prima editione, quam solam Hugenius viderat cum respondit; & in qua non reperiuntur ea quæ minori charactere hic edita sunt. Sola verba sequentia in prima dantur & in secunda fuere omissa post †. centrum Oscillationis hujus plani coincidet cum centro Oscillationis solidorum illorum.

I I I.

Excerpta ex literis Domini Hugenii, quibus respondet observationi Abbatis Catelani in 4^{am}. propositionem Tractatus de centris Oscillationis.

Admiratus vidi, Theoriam meam de centro Oscillationis oppugnari, contra quam per 9 annos, a quibus typis man-

mandata fuit, nemo quid protulit; sed considerata refutatione, qua Abbas Catelanus 4^{am}. meam propositionem aggreditur, non vidi, quod ullatenus me feriat. nam ut paucis dicam, in quo fallitur; negat, datis duabus lineis & præter has, duabus aliis, quæ diversam quam primæ inter se rationem habent, summam duarum ultimarum æqualem unquam fore summæ duarum priorum.

Concipe priores 5 & 10 pedum, & alteras 3 & 12 & vide num harum summa æque ac illarum non sit 15: ut autem pateat errorem ejus inde oriri, utar eodem, quod ille proposuit, exemplo.

A & B sunt duo pondera applicata virgæ vel lineæ D B, TAB. XXVIII.
Fig 2. quæ considerari debet ut inflexibilis & sine pondere; quæ libere notetur circa punctum D: tale Pendulum compositum voco e ponderibus A & B; si hoc peragat partem vibrationis, Ex. Gr. usque ad D F G, & occurrat plano, ad quod frangatur, ut pondera a lineâ inflexili separentur, & tendat sursum eorum unumquodque cum velocitate acquisita, ad maximam quam potest altitudinem, velut ad L & M, super planis inclinatis si velimus, quæ tangant arcus A F, B G; dico commune centrum gravitatis ponderum A & B quæ ascendant in L & M tunc ad eandem fore altitudinem, ac erat in E, ante vibrationem inchoatam.

Abbas Catelanus ut falsam hanc probet propositionem, demonstrat, altitudines, ad quas duo pondera soluta ascendant, ut hic N L, O M, diversas esse ab iis unde descenderunt, scilicet A H, B I. id quod verissimum est ex ratione ab ipso datâ, quod alteræ sint inter se ut lineæ D F, D G, alteræ vero ut quadrata harum linearum; *si ergo dividamus*, inquit *diversas illas summas per numerum illorum ponderum*, id est, si sumamus dimidium linearum L N, M O, & dimidium linearum A H, B I. *habebimus ab una parte altitudinem ad quam centrum commune gravitatis ascendit, & ab altera altitudinem unde descendit*: id verum est, per divisionem has duas altitudines detegi. sed minime concedo, duas summas divisas differre inter se; quod Abbas Catelanus probare

bare nequit; neque igitur, duas inventas altitudines centri gravitatis inæquales esse, id quod in conclusione contendit, nam licet altitudines $L N$, $M O$, diversam habeant rationem inter se quam altitudines $A H$, $B I$, non sequitur summas primarum & secundarum differre.

Possẽm præter hunc alium locum observare, ubi fallitur Abbas Catelanus, sed non hærebo, quoniam id, quod profert non spectat ea quibus me aggreditur. Unicum verbum addam de examine ejus Mathematico, ut vocat, de centro Oscillationis edito in diario 15. Dec. 1681. ubi contendit se invenisse regulam hanc generalem, scilicet, *per numerum partium Penduli dividi debere summam radicum distantiarum partium ab axe; ut habeamus lineam rectam, quæ sit mensura temporis quo vibrationem peragit illud Pendulum, cujus consequenter quadratum vel 3^a. proportionalis erit distantia inter axem & centrum Oscillationis.*

TAB. XXVIII.
Fig. 3.

Relicto omni peculiari examine, satis erit ad vitium regulæ detegendum, notasse, juxta hoc principium, duas lineas graves ut $A B$, $B C$, junctas & inter se angulum quemcunque efficientes, suspensas in B semper idem Oscillationis centrum habere; ideoque vibrationes semper fore æque veloces, uti facile intelligunt hi, qui in hisce materiis parum sunt versati; sed & illi videbunt, quod æqualitas illa vibrationum locum habere nequeat, quoniam augendo angulo tandem duæ lineæ simul junctæ unicam efficiunt rectam $a B c$, cujus vibrationes forent æque diuturnæ cum vibrationibus anguli $A B C$, linea vero recta in puncto medio suspensa, nullas peragit vibrationes, aut saltem velocitate infinite exigua movetur.

Porro credo Abbati Catelano satis difficile fore, suâ regulâ, centrum Oscillationis in quibusvis particularibus figuris, etiam simplicissimis, determinare, sed, si id forte perficiat, inveniet, suam Theoriam cum experienciâ nunquam convenire, & meam semper summâ exactitudine eidem respondere, si modo experimenta exactissimè instituta fuerint.

Non possum hac occasione silentio præterire, P. Dechales,
in

in quodam magni sui Cursus Mathematici loco, memorando experimentum cum Pendulo composito ex duobus ponderibus institutum, in quo computans rationem non habuit (ut debebat) ponderis baculi, cui pondera erant applicata, immerito regulas nostras de determinando centro gravitatis culpae, quasi non convenirent cum iis quæ ille revera observat.

I V.

*Exceptio Abbatis Catelani ad responsionem
Hugenii.*

Non debebat Hugenius a suo principio separare consequentiam, ut hanc aliter intelligat, quam ego in scriptis meis. Prorsus deberem oblitus esse Arithmetices, si absolute negarem, ut me facere contendit, *quod 4 magnitudines inæquales possint efficere 2 summas æquales*, quum nil aliud concludo in scriptis, præterquam quod propositio Hugonii vera esse nequeat, nisi pars sit æqualis toti. Ut hoc melius pateat, debemus hic proferre propositionem illam generalem propriis terminis.

Si Pendulum e pluribus ponderibus compositum, atque e quiete demissum, partem quamcunque Oscillationis integræ confecerit, atque inde porro intelligantur pondera ejus singula, relicto communi vinculo, celeritates acquisite sursum convertere, ac quousque possunt ascendere; hoc facto, centrum gravitatis ex omnibus compositæ, ad eandem altitudinem reversum erit, quam ante inceptam Oscillationem obtinebat.

Cum hæc propositio terminis generalissimis concepta sit, ita ut numerus ponderum, situs eorum, duratio Vibrationis, ipsam non mutant, pono, Exempli causâ, Pendulum compositum e ponderibus duobus æqualibus, & inter se ad quamlibet a se invicem distantiam junctis. Considero porro altitudines, quæ sunt proportionales quadratis velocitatum in duobus Pendulis simplicibus, esse inter se ut velocitates in

F f

Pen.

Pendulo composito. Nam eandem habent proportionem, quam arcus descripti a duobus ponderibus æqualibus, ex quibus Pendulum formatur; duo illi arcus sunt spatia, quæ duo pondera percurrunt, eodem tempore, velocitatibus, quæ necessario sunt ipsis spatiis proportionales.

Celeritas totalis Penduli compositi, quæ inter partes distribuitur proportionaliter ad arcus, quos ipsæ describunt, semper æqualis est summæ celeritatum, quas eadem partes acquirerent, si a se invicem fuissent sejunctæ, & omnes separatim ex iisdem altitudinibus & ad easdem ab axe, distantias descendissent. Altitudines semper sunt ut quadrata velocitatum, sive pondera separatim adscendant, sive descendant. Omnibus his bene intellectis facile patet, ad hanc propositionem redire quæstionem. *Si habeamus duas magnitudines inæquales a a & b b, summam radicum ipsarum a + b, & quadrata partium illius summæ, quæ sint proportionales dictis magnitudinibus, quæque adeo communem denominatorem habeant a a + b b, & numeratores diversos a³ + a a b & b³ + a b b, demonstrare, summam harum duarum magnitudinum, quæ altitudines, unde duo pondera æqualia Pendulo alligata dimittuntur, repræsentant, non esse æqualem summæ quadratorum illarum partium, quæ altitudines exhibent, ad quas duo pondera, postquam percussione fuerint separata, redeunt, nisi minor ex hisce magnitudinibus a a & b b sit æqualis majori, id est, quia istæ magnitudines in quæstione propositâ semper inæquales sunt, nisi pars æqualis sit, toti.*

Maxime sensibilis hujus veritatis demonstratio est comparatio terminorum quæstionis per regulas Algebraicas, id quod examinandum relinquo iis, qui usum illarum regularum norunt. Quod rem ipsam spectat, nullius est momenti; sive centrum Mathematicum Oscillationis bene sive male determinatum sit, inventio Penduli nec minus utilis hominibus, nec minus auctore suo digna est.

V.

*Objectio Abbatis Catelani contra motum
Pendulorum in Cycloidibus.*

Si vis gravitatis ageret in corpora tanquam in puncta Mathematica, vel si spatium contentum sub Cycloide esset divisibile in infinitas alias Cycloides, similes & parallelas, quidam Geometræ revera demonstraſſent, uti contendunt, pendula illam debere describere curvam ut Vibrationes, æqualibus temporibus, peragant; sed nulla datur pars in corpore gravi, quale est Pendulum ex cupro vel plumbo, quæ non æque ac centrum Tellurem verſus propellatur magis minusve pro inclinatione, juxta quam movetur; Præterea spatium, quod continet Cyclois, non poteſt repleti infinitis aliis Cycloidibus ſimilibus, quoniam tripla circuli ſuperficies æqualis eſſet duplo quadrato diametri. Latet igitur adhuc Geometras, quamnam lineam curvam deſcribat Pendulum, cujus Vibrationes ſunt iſochronæ. Conſequentia hæc patet, ſi conſideremus, in corpore Pendulo, quando centrum vel alia quælibet pars Cycloidem percurrit, partes vicinioreſ Axi, vel inde remotioreſ, eodem tempore, deſcribere lineas curvas inter ſe ſimiles, ſed quæ non ſunt Cycloides; ut patet ex dictis, & quia in quovis arcu perpendiculares ductæ e tangentibus ſuis ad tangentes Cycloidis ſunt æquales. Omnes itaque partes non habent æqualem inclinationem in deſcenſu, neque Tellurem verſus cum eâdem velocitatis proportionem propelluntur; unde ſequitur, Vibrationem totius Penduli, quæ neceſſario pendet a Vibrationibus, quas peragunt partes ejus ſeparatim ſumtæ, differre a Penduli Vibratione, ſi reductum foret ad illam partem, quæ movetur in Cycloide.

Videtur huic potius cauſæ, quam craſſitudini fili, cui pondus alligatur, adſcribendam eſſe artificum praxin, quos experientia cogit curvaturam a Cycloide diverſam laminis tribuere, inter quas ſuſpendunt Pendulum.

Non tamen mihi animus est, hic absolute oppugnare sententiam illorum, qui credunt corpora gravia moveri, veluti puncta, quæ in Cycloide, ad Horizontem perpendiculari, peragunt suas Oscillationes, temporibus æqualibus, a quacunque dimittantur altitudine. Contendo tantummodo, illud nondum esse demonstratum, nisi alterutrum horum probetur, vel quod curvæ parallelæ Cycloidi eandem habent proprietatem quantum ad motum corporum, licet non sint Cycloides, vel quod inæqualitas temporis, quod brevius est in parallelis, interioribus & Cycloide viciniore Axi, ita moderetur contraria inæqualitate temporis, quod majus est in parallelis exterioribus & ipsâ curvâ remotioribus ab Axe, ut compensatio inæqualitatum ambarum in Cycloide detur, quæ tanquam medium locum tenet inter omnes curvas ipsi parallelas. Geometræ hanc difficultatem examinabunt si dignam suâ attentione judicent; nec, nisi postquam eorum sententiam novero, observationes meas hac de re dare potero.

V I.

Responsio ad objectiones Hugonii adversus methodum Abbatis Catelani de determinando Centro Oscillationis.

HUGENIUS proposuit objectionem adversus propositionem deductam ex principio, a me, ad determinandum Mathematicæ centrum Oscillationis Penduli, proposito; sed debuit examinare id, quod præcedit locum, quem e scriptis meis profert, nec generalem habere regulam ad casum particularem tantum accommodatam, quem elegi, ut uterer exemplo simplicissimo & facillimo; scilicet quando Pendula composita sunt ex partibus, quæ describunt arcus similes circa Axem, quocum faciunt idem planum; tum enim distantia ab illo Axe sunt radii arcuum, qui habent eandem inter se proportionem, ac perpendiculares ad Horizontem, vel sinus, qui sunt altitudines, a quibus singulæ partes in Oscillatione descendunt. Itaque cum Pendula, de
qui-

quibus Hugenius loquitur, ut probet propositionem meam falsam, sint anguli rectilinei agitati circa verticem, non habentes requisitam conditionem, me non feriunt. Si concipiamus tales angulos moveri circa Axem, per vertices illorum transeuntem, patet summas distantiarum Axis ab omnibus punctis linearum, quæ Pendula componunt, esse inæquales, prout illæ lineæ efficiunt cum Axe angulos magis minusve acutos. Et meâ regulâ detego summas distantiarum esse æquales Parabolis habentibus pro Diametro maximam ab Axe distantiam, & pro Parametro 4^{am} proportionalem positis hisce tribus, linea datâ, quæ eadem est in quovis Pendulo, maximâ distantia, quæ variat pro variis angulis, & unitate; unde sequitur, tempus Oscillationis valere, maximæ ab Axe distantia, & non in omni casu idem esse; tanto enim brevius est, quanto angulus est obtusior, id est, quanto Pendulum magis Axi vicinum est.

Si Hugenius desiderat propositionem quæ conveniat Pendulis, circa punctum motis, mutanda tantum erunt verba quædam in principio Pendulorum habentibus Axem; loco *radices distantiarum illarum*, legendum *summæ linearum rectorum*, quæ repræsentant tempora Oscillationum omnium partium separatim sumtarum.

Hoc modo propositio inferviet ambobus casibus. Sed res melius intelligitur per generale Principium, quod proposui & ita se habet. *In eodem Pendulo, cum omnes partes nisi simul moveri nequeant, propter suam conjunctionem, vibratio minus distantium ab Axe, vel puncto suspensionis, ita retardatur a vibratione remotiorum, & reciproce Oscillatio remotiorum ita acceleratur per Oscillationem aliarum, ut detur inter illas compensatio celeritatum proportionalis arcubus, vel curvarum portionibus, quas describunt, ita ut tempus Oscillationis totius Penduli sit medium inter tempora Vibrationum, quas peragerent illæ partes, si non inter se forent conjunctæ, id est, ut sit æquale summæ temporum illorum divisæ per numerum partium, quas debemus considerare ut æquales & infinite parvas.*

Demonstrare potero in sequentibus, non adeo difficile esse, ut quidem Hugenio videtur, accommodare illud Principium ad particulares magnitudinum Geometricarum species suspensarum ex Axe vel puncto.

Quod ad experimenta attinet, paratus sum demonstrare hæc ita non posse institui, ut perfecte conveniant cum regulis simplicibus & generalibus, quæ deducuntur e principiis Mathematicis, eandem ob causam ob quam generalis regula, stabiliri nequit, certa, & constans, in casibus particularibus, qui dependent a pluribus causis, non exacte notis.

VII.

Excerpta ex litteris D. Bernoullii datis Basileæ ad Autorem Diarii Parisiensis, de Controversia, inter Abbatem Catelanum & Hugenum, de Centro Oscillationis.

Quum nondum observaverim, Hugenum respondisse, ad exceptionem Abbatis Catelani, quæ spectabat primariam ejus de centro Oscillationis propositionem, te haud ægre laturum credo, si verbulum ad ejus defensionem ad te scribam. Quicquid D. Catelanus disputat, eo redit ut probet, *summam radicum duarum magnitudinum quarumvis non posse in duas partes ita dividi, ut proportionales sint ad magnitudines datas, utque summa quadratorum ipsorum sit æqualis summæ magnitudinum.* Id vero neutiquam in dubium ab Hugenio vocatur, qui tantum affirmat, *summam harum magnitudinum posse esse æqualem summæ duarum aliarum, quæ quadratis priorum proportionales sunt.* Quod & veritati consonum est.

Atque ut ostendam, controversiæ omnis cardinem hic verti, utar eodem exemplo de duobus ponderibus æqualibus, & quidem positis numeris, ut veritates hæ abstractæ sensui magis obviæ fiant.

Sint

Sint A & B duo corpora ex Axe D suspensa ita, ut unius distantia ab Axe quadruplo major sit alterius distantia. TAB. XXVIII.
Fig. 4.

Adeoque si altitudo perpendicularis B I, ex qua descendit corpus B describendo arcum B G, ponatur quatuor pedum, altera A H, unde corpus A delabitur, unius pedis erit. Celeritates igitur, quas separatim cadendo acquirunt, quoniam sunt ut radices altitudinum, se habent ut 2. ad 1. Summa 3, quæ totalem Penduli celeritatem manifestat, quando proportionaliter ad altitudines, sive ad arcus B G & A F dividitur, dat gradus celeritatis, quos obtinent pondera, quando conjunctim in tabulam D G decidunt, videlicet $\frac{12}{5}$ & $\frac{3}{5}$, quorum quadrata sunt $\frac{144}{25}$ & $\frac{9}{25}$, unde quæ prodit summa, scilicet a summa altitudinum, e quibus pondera dimittuntur, differt. Veruntamen hæc quadrata proportionem solummodo altitudinum O M & N L, ad quas pondera, dum a tabula resiliunt, adscendunt, non ipsas altitudines exprimunt; quas inter ratio quidem esse potest, quæ est inter $\frac{144}{25}$ & $\frac{9}{25}$, hoc est inter 16 & 1, dum ipsa summa est quinque, quæ est summa altitudinum B I & A H unde pondera delapsa sunt.

Nam si ponamus altitudinem O M $4\frac{17}{17}$ pedum esse, & alteram N L $\frac{5}{17}$, O M se habebit ad N L, ut 16. ad 1; & O M + N L erit æqualis B I + A H. Idcirco centrum gravitatis commune ponderum A & B, ubi in L, M pervenere, erit ad eandem altitudinem, quam obtinebat ante Oscillationis initium. Id clare ex inspectione figuræ apparet. Pondus enim M tantum supra lineam Horizontalem B D elevatur, quantum L infra eam deprimitur, videlicet $\frac{12}{17}$ unius pedis; sequitur hinc in triangulis similibus M P Q & L Q R latera M Q & Q L esse æqualia, hoc est medium lineæ M L, quæ duo pondera conjungit, esse in intersectione lineæ Horizontalis.



VIII.

*Excerpta ex literis Dⁿⁱ Hugonii ad Auctores Diarii
Parisiensis, datis Hagæ 8. Junii 1684. quæ
continent ejus responsionem ad exceptio-
nem Dⁿⁱ Abbatis Catelani, de cen-
tro Oscillationis.*

HUc usque distuli respondere ad exceptionem Dⁿⁱ Abbatis Catelani, & fere omnis nostræ controversiæ oblitus eram, quoniam non audiveram, ullum ex iis qui tales ponderant quæstiones in illius partes ivisse. Sed cum ex amicis quidam desiderarent, ut Geometris facilius redderem litis nostræ examen; & eo impedirem quo minus illi, qui hanc norunt, silentium meum reprehendant, vos rogo ut diariis vestris, frequentia velletis inferere, cum quibusdam vestrum jam dudum communicata.

Abbas Catelanus, visâ meâ responsione ad primam observationem, suoque errore cognito, credidit se illam posse dissimulare, si diceret, observationes suas ex vitioso autographo editas esse, in quo non solum quædam verba deerant, sed etiam sex septemve ordine sequentes lineæ; cumque illæ suppletæ sint in secunda Editione, ubi addidit, *& quidem tales, ut summæ* cum sex aliis lineis, propositam objectionem omnino mutavit.

Non opportunum tamen duxit hac de re lectorem mone-
re, ne quidem in suâ exceptione, in qua positâ hac muta-
tione ratiocinatur. Cùm enim antea se demonstraturum pro-
miserat, propositionem meam 4^{am} de centris Oscillationum
falsam esse nisi pars sit æqualis toti, in præsens ut illud
probet, non tantum ponit axioma hoc irrefragabile *totum
esse majus parte*, sed præter hoc pro vero habet quoddam,
quod sibi finxit, de motu Pendulorum, principium.

Rem

Rem ita se habere ostendam, & ut mutata ejus objectionem solvam, demonstrabo principium, quod ponit, verum esse non posse. Etiam falsum esse ostendam alterum ejus principium generale, quo utitur *in suâ verâ solutione Mathematica Problematis de centrâ Oscillationis*, & tandem ambo hæc principia sibi mutuò contrariare: non despero fore ut ipse Abbas Catelanus mecum conveniat, si ad sequentia attendat.

Quæstio secundum illum ad hanc propositionem redit. Si habeamus duas magnitudines inæquales $a a$ & $b b$, & summam harum radicum dividamus in duas partes, quæ sint inter se ut $a a$ ad $b b$, quæ partes ideo sunt $\frac{a^3 + a a b}{a a + b b}$ & $\frac{b^3 + a b b}{a a + b b}$, ut facile per Algebram invenitur, demonstrare, summam magnitudinum $a a$ & $b b$, quæ repræsentant altitudines, unde descendunt pondera duo æqualia eidem Pendulo alligata, non posse æquari summæ quadratorum partium $\frac{a^3 + a a b}{a a + b b}$ & $\frac{b^3 + a b b}{a a + b b}$, quarum quadrata repræsentant altitudines, ad quas pondera, percussione separata, redeunt, nisi pars $a a$ æquetur $b b$; id est (quoniam quantitates in quæstione proposita sunt inæquales) nisi pars æqualis sit toti.

Hæc est propositio Abbatis Catelani, quam tantum clarius exprimere conatus sum, quâ demonstratâ, ut facile fit comparando duas illas summas per calculum Algebraicum, contendit, fundamentalem meam de centrâ Oscillationis propositionem ruere.

Sed etiam relictâ Algebrâ demonstrari potest illius propositio; nam si ponatur $a a$ æquale esse 1; & $b b$ æquale 4; summa radicum $a + b$ est 3, & partes proportionales hujus summæ sunt $\frac{3}{5}$ & $\frac{12}{5}$, faciunt enim junctim $\frac{15}{5}$ hoc est 3. Quadrata earundem partium sunt $\frac{9}{25}$ & $\frac{144}{25}$. Hoc igitur solum restaret demonstrandum, summam 1. & 4. non esse æqualem summæ, quæ prodit ex additione $\frac{9}{25}$ ad $\frac{144}{25}$, sive 5 & $6\frac{3}{25}$ non esse æqualia inter se; quod sane per se clarum est.

Vera ergo esset Abbatis Propositio nisi affirmaret quadrata partium $\frac{a^3 + a a b}{a a + b b}$ & $\frac{b^3 + a b b}{a a + b b}$, quæ hic sunt $\frac{9}{25}$ & $\frac{144}{25}$, re-

præsentare altitudines, ad quas pondera sejuncta redeunt. Non dissentiet & facile probari potest illud deductum esse ex Principio, quod sibi finxit, & pro fundamento habet propositionis suæ; scilicet, *celeritatem totalem Penduli compositi, quæ inter partes distribuitur proportionaliter ad arcus, quæ ipsæ describunt, semper æqualem esse summæ celeritatum, quas eadem partes acquisivissent, si sejunctæ singulæ separatim ex iisdem altitudinibus, & in eadem distantia ab Axe descendissent.* Ponit ergo, ut me refellat, principium hoc, quod falsum contendo; in demonstratione computationem memoratam sequar.

D^{nus} Abbas novit & concedit, detegi altitudinem, unde commune ponderum gravitatis centrum descendit, si dividamus summam altitudinum 1. & 4. (unde duo pondera simul alligata descenderunt) per 2 numerum ponderum, quæ ergo est $\frac{5}{2}$. Concedit pariter, dari altitudinem, ad quam revertitur commune eorum gravitatis centrum, scilicet $\frac{153}{70}$, vel $3\frac{3}{70}$, si per numerum ponderum duo, dividamus summam altitudinum $\frac{9}{27}$ & $\frac{144}{27}$, ad quas pondera percussione separata redeunt.

Centrum ergo gravitatis revertetur altius quam unde descenderat, quantum $3\frac{3}{70}$ excedit $2\frac{1}{2}$, quod primario adversatur Mechanices Principio. Hoc si D^{nu} Abbas efficere possit, detectum habebit perpetuum mobile: Quum ergo ejus Principium ex quo falsa sequitur conclusio, falsum sit, exinde nil quo mea labefactetur Propositio, potest inferri vel deduci. Quod ad alterum ejus Principium attinet, quod pro fundamento habet regulæ generalis de determinandis centrīs Oscillationis, in eundem inducit errorem. Hoc Principium est, *tempus Vibrationis Penduli compositi esse medium inter tempora Vibrationum partium, id est, æquale esse summæ illorum temporum, divisæ per numerum partium.* In Pendulo, quale consideravimus, ubi ponderum distantia, a puncto suspensionis, sunt 1 & 4, si ponamus tempus minoris ex partibus separatis esse unum, (unde sequitur, tempus alterius partis separatim agitatæ esse duo;) secun-

secundum ejus principium, summa illorum temporum, quæ est tria, divisa per duo, numerum partium, erit tempus Penduli compositi, scilicet $\frac{3}{2}$. Hisce positis, nil præterea ponendo præter id quod concedit D^{us} Abbas, deteguntur altitudines, ad quas revertuntur pondera, postquam a Pendulo composito sunt sejuncta; nempe $\frac{4}{9}$ & $\frac{64}{9}$; quarum summa $\frac{68}{9}$, divisa per duo, numerum ponderum, dat $\frac{34}{9}$, vel $3\frac{7}{9}$, altitudinem, ad quam adscendit commune gravitatis centrum, quæ etiam superat $\frac{5}{2}$ vel $2\frac{1}{2}$ unde demonstravimus centrum descendisse. Non addo methodum computationis quæ facilis est. D^{us} Abbas ergo dum quærit principium bis male divinavit; proprie enim divinare est, ratiocinia deducere ex principiis, quæ levem tantum veri speciem præ se ferunt; & verum esset, quæstionem de centro Oscillationis non difficulter resolvi, si, ut ipse fecit, tantum ponendum foret id, quod statim rem quæsitam determinat.

De cætero, contraria esse inter se ambo principia clarum est; quoniam ut patet, ex his diversæ sequuntur conclusiones, altitudines enim, ad quas centrum commune gravitatis ascendit, diversæ ex utroque deteguntur, nempe $3\frac{3}{22}$, $3\frac{7}{9}$.

Unum hoc addam, ut respondeam difficultati, quam D^{us} Abbas proposuit, contra motum in Cycloide*, hanc difficultatem solutam dari in ipso meo tractatu de centro Oscillationis in cujus propositione 24 explicavi, quomodo effici queat, ut omnia ponderum Penduli puncta moveantur in Cycloidibus æqualibus; licet in praxi minime necessaria sit correctio hæc.

* Vide supra pag. 227.

I X.

Responsio Dⁿⁱ Abbatis Catelani ad literas Dⁿⁱ Bernoulli de Controversia sua cum D^{no} Hugenio de centro Oscillationis.*

* Vide supra pag. 230.

UT respondeam ad has literas, idem repetam, quo utitur D^{us} Bernoulli, exemplum Penduli compositi ex ponderibus æqualibus eidem virgæ applicatis, & ex eodem centro

G g 2

suspensa

suspensis, a quo pondus unum quater magis quam alterum distat; ita ut altitudines perpendiculares, unde descendunt sint ut 1 ad 4.

Convenit inter nos de proportionem inter has altitudines, & de summa velocitatum, quas illa pondera acquirerent, si separatim ab iis altitudinibus caderent; sed contendimus de exprimendis his altitudinibus respectu spatii, quod sit communis earum mensura, & pro unitate habeatur. Cum omnibus, qui ante me de similibus quaestionibus scripserunt, pono veros numeros, quibus exprimuntur altitudines, esse quadrata ipsorum numerorum qui velocitates designant, in illis casibus, in quibus inter altitudines & inter velocitates non alia datur ratio, praeter generalem experientiam detectam.

Patet autem ex numeris quos in computatione mea detexi, (cum 9 & 144 ducta in $\frac{1}{2}$, pedis, id est 6 pedes cum 1 digito 5 lineis & quod excedit, differant cum 1 pede & 4 pedibus, aut 5 pedibus,) summas altitudinum, ad quas adscendunt pondera in exemplo proposito, non esse aequalem summae altitudinum unde descendunt, quam aequalitatem D^{us} Hugenius ponit in generali propositione, quam utitur pro principio in suo tractatu de centro Oscillationis.

D^{us} Bernoulli respondet, quadrata numerorum, qui exprimunt velocitates ponderum, tantum exprimere proportionem altitudinum, ad quas revertuntur post illorum separationem, & non ipsas altitudines, quae quidem inter se habere possunt rationem, $\frac{144}{25}$ ad $\frac{9}{25}$ dum tamen harum summa est 5, quae est summa altitudinum, unde pondera descenderunt. Nam altitudines, ad quas revertuntur separata, sunt juxta illum $4\frac{12}{17}$ & $\frac{5}{17}$, quarum summa valet 5, ut summa primarum altitudinum 1. & 4. Iterum respondere non difficile erit. Rogatum velim D^{um} Bernoulli, dum contendit, proportionem quadratorum numerorum, qui velocitates exprimunt, tantum considerandam esse, quam motus lege, & per quodnam principium Mechanicum pondera, de quibus agimus, potius redeant ad altitudines, quas ille notavit, &

quae

quæ cum ipsius sententia congruunt, quam ad illarum proportionales $5\frac{11}{17}$ & $\frac{6}{17}$, quarum summa est 6; vel ad $3\frac{13}{17}$ & $\frac{4}{17}$ quarum summa est 4; vel ad innumeras alias similes, quæ habeant inter se eandem proportionem, $\frac{1+4}{2 \cdot 5}$ ad $\frac{9}{2 \cdot 7}$, sed ex quibus altitudo centri gravitatis reversi major minorve, quam unde descendit deducitur. Certè pondera non revertentur ad omnes altitudines proportionales quadratis velocitatum, quas descendendo acquisiverunt, quoniam gravitas gradatim retardat, & tandem destruit velocitates, cum quibus reflectuntur pondéra.

Quid ergo eveniet? rogo D^{um} Bernoulli ut illud explicare velit? An Natura per se incerta de eo quod sibi agendum est, pro voluntate Dⁿⁱ Bernouilli actura est? Cum ipsius veniâ, hac de re dubitabo, donec sententiam suam solidis argumentis, ex Physica deductis probet. Interim credo me jure concludere, rationibus quas affert pro D. Hugenio hoc confirmari, propositionem hujus generalem & fundamentalem de centrâ Oscillationis non esse omni exceptione majorem.

X.

Dn. Bernouilli narratio controversiæ inter Dn. Hugenum & Abbatem Catelanum agitata de Centro Oscillationis, quæ loco Animadversionis esse poterit in Respon- sionem Dn. Catelani.

*Excerpta ex Litteris Dn. Bernoulli
Lipsiam missis.*

Mense Septembri A. 1681. Abbas Catelanus propositionem quandam tractatus Cl. Hugonii, quem de *Horologio*

logio Oscillatorio inscripserat, adortus est, formata contra illam objectionem; in qua quia mentem suam minus feliciter expreslit, ansam dedit isti controversiæ, quæ hucusque fere inter illos viguit. Verum quidem est, eum initio A. 1682. objectioni suæ, additis paucis lineis, variationem quandam induxisse; sed quoniam ejus partes satis adhuc male cohærentes reliquit, eam in mente Lectoris sui excitavit opinionem, quasi persuasum haberet, summas altitudinum, e quibus pondera alicujus penduli junctim descendunt, & ad quas postmodum separatim ascendunt, inæquales esse debere hanc solam ob causam, quod *priores altitudines sint proportionales ipsis ponderum celeritatibus, posteriores vero non nisi quadratis istarum celeritatum.* Quare etiam Hugenius, id unicum Catelano scrupulum movere ratus, respondere abstinuit, usque in mensem Junium, quo tandem calamum arripuit, ac exemplo duorum numerorum 5 & 10, duorumque aliorum 3 & 12 breviter monstravit, fieri utique posse, ut binæ quantitates eandem cum binis aliis conficiant summam, etiamsi diversam ab illis rationem habeant, neque tum temporis in dubium revocavit $\pi\epsilon\gamma\omega\tau\omicron\nu$ Catelani $\psi\epsilon\upsilon\delta\theta$ quod tamen in prima jam objectionis suæ impressione manifeste satis prodiderat, dum supposuit: *Pendulum ex duobus ponderibus compositum, eandem acquirere celeritatem, quantam acquirat summa pendulorum simplicium;* id vero sicco pede præteriit Hugenius, vel quod non penetrarit statim, ob nullam periodorum connexionem, quorsum falsa ista Catelani suppositio tenderet, vel potius quod illi ceu verisimili admodum tum ipsemet adstipularetur. Catelanus interea Hugeniano responso non contentus, excepit 20 Julii 1682, ac terminis Algebraicis rem aggressus est, eodem innixus fundamento: *Quod totalis celeritas penduli compositi æquet summam celeritatum partium ejus separatarum.* Quo facto controversia ista ultra annum sopita jacuit. Me quod spectabat, cui Hugenii liberum nondum visus, nedum lectus fuerat, scopum alium non habebam, quam illustrare ejus responsionem, remque examinare, qualiter ab ipso examinata, atque in Actis recensita fue-

fuerat. Animadvertens itaque, Catelani principium ab Hugenio non refutatum esse, & ego illud intactum reliqui, sufficere mihi ratus, si Hugenianum responsum simpliciter applicarem ad præsentem controversiam, proposito cum in finem exemplo penduli, e duobus æqualibus ponderibus compositi; ubi innuere saltem volui, quod supposito pro totali ejus celeritate numero ternario (quicquid statuatur de celeritatibus utriusque separatim spectati ponderis, dummodo ex sint in ratione 2 ad 1) quadrata $\frac{144}{25}$ & $\frac{9}{25}$ ex mente Hugonii significare debeant non nisi *rationem altitudinum*, ad quas ascendant separata pondera, minime vero *ipsas altitudines* (quod ipse quoque postmodum indigitavit Hugenius in secunda responsione, 8 Jun. 1684. *) partim quoniam celeritates atque altitudines, utpote quantitates heterogenæ, se mutuo mensurare non possunt; partim etiam, quia ipse Catelanus urgere saltem videbatur, altitudines esse *proportionales* quadratis, vel *sicut* quadrata celeritatum; tametsi in proxime sequenti calculo quadrata ista pro ipsis altitudinibus adhibuerit. Comparato mihi paulo post, & perlecto Hugonii libro, animadvertebam, Propositionem controversam ex priore Hypothesium, quas Auctor initio stabiliverat, adeo evidenter inferri, ut neutra infringi possit, quin simul evertatur altera; quocirca judicabam, si Catelano falsa fuisset visa propositio, cum potius ipsam adoriri debuisset Hypothesin, magnumque illud inibi contentum Principium Mechanicum. Verum enim vero cum hujus principii veritatem nullo jure in dubium revocare possem, atque simul etiam seriem ratiocinii a Catelano satis confuse propositi evolvere cœpisssem, errorem ejus detexi illico, falsamque cognovi esse, qua nitebatur, regulam, nimirum: *Celeritatem totalem penduli compositi æqualem esse summæ celeritatum partium ejus separatarum*. Atque ut ostendam, animadversum mihi fuisse errorem, priusquam Hugonii epistola de 8. Jun. lucem aspexisset, afferam hic causam physicam, omissam ab Hugenio, qua fit, ut penduli compositi celeritas perpetuo minor sit celeritate partium ejus separatarum: Ponamus majoris evi-

* Vide supra pag. 232.

TAB. XXVIII
Fig. 5.

dentia ergo, pondera penduli A & B in linea inflexili D B libere hinc inde moveri posse, sic ut linea hæc, dum rotatur circa axem D, quamvis secum rapiat pondera, non tamen impediat descensum illorum in linea recta centrum Terræ versus. Quo posito, constat, utrumlibet pondus sigillatim dimissum, eadem celeritate latum iri, qua ferretur absque virga D B, utpote nec a virga, nec ab ejus axe ullo modo impeditum; id est si pondus A absque virga certo tempore conficit spatium A H, & pondus B spatium æquale B N, utrumque etiam cum virga, sed sigillatim, dimissum eodem tempore idem spatium A H & B N conficiet. Constat insuper, quod si gravitas in utrumque pondus ageret viribus, quæ proportionatæ forent ipsorum respectivis ab axe distantis, virga nullum adhuc ipsorum descensui afferret impedimentum, propterea quoniam exacto certo tempore unum eorum reperiretur in H & alterum in I, vel prius in L, posterius in N, sive absque virga, sive cum virga, sive sigillatim sive conjunctim dimitterentur. Verum enim vero quoniam gravitas in utrumque pondus agit viribus æqualibus, sic ut pondera eodem tempore æqualia spatia A H & B N transigere annitantur, & tamen interea pondus A junctim dimissum, ob inflexilem virgam, nequit pertingere nisi ad L, dum pondus B jam est in N, hinc sequitur, gravitatis vim in pondere A non esse exhaustam; adeoque residuum harum virium, ex una parte urgere debere corpus B, ex altera ipsum axem D, eundemque premendo aliquam sui partem ibidem infumere & deperdere; siquidem virga hocce casu instar vectis considerari possit, prout extra dubium est; quod si corpus B infinite tarde moveri, id est, firmum & stabile esse intelligatur sicut axis D, corpus A partem sui ponderis æque in axem D atque in corpus B transferret. Ex hæcenus dictis colligere proclive est, si quis examinare vellet, quantam partem celeritatis suæ pondus A in premendo axe D consumere debeat, eum exinde, imitando Dn. Cartelani ratiocinium, veritatem aut falsitatem Hugonianæ Hypotheseos, inque hac fundatæ Propositionis, detegere posse.

Ro-

Rogantur hac occasione eruditi, ut examinent, qualem legem communicationis celeritatum observent corpora mota, quæ ex una parte innituntur firmo fulcimento, ex altera alii corpori itidem, sed tardius moto: si namque celeritatis excessus, qui hinc inde communicandus est, in eadem ratione distribueretur, in qua distribuitur onus aliquod, quod vecti duobus sustento fulcris impositum est, nimirum in ratione reciproca distantiarum mobilis a fulcris, tum imitando ratiocinium Dn. Catelani, deprehenderemus, summam altitudinum, ad quas ascendunt separata penduli pondera, vicissim nunc minorem esse summa altitudinum, e quibus antea conjunctim descenderant, quod iterum Hugenianam Propositionem everteret.

En calculum: Est altitude $AL \equiv 1$ ped.

Altitude $BN \equiv 4$ ped.

Celeritas ponderis A acquisita in puncto L, ubi descendit separatim $\equiv 1$

Celeritas ponderis B acquisita in puncto N, quando cadit separatim $\equiv 2$

Celeritas ponderis A acquisita in puncto L, quando descendit conjunctim $\equiv x$

Igitur Excessus celeritatis ponderis A, qui tam in axem, quam in pondus B redundat $\equiv 1 - x$

Et pars hujus excessus, quæ soli ponderi B communicatur $\equiv \frac{1}{4} - \frac{1}{4}x$

Tota ergo celeritas ponderis B in puncto N cum conjunctim cadit $\equiv 2\frac{1}{4} - \frac{1}{4}x$

Atqui vero $2\frac{1}{4} - \frac{1}{4}x, x :: 4, 1$. Igitur $x \equiv \frac{9}{17}$ & $4x \equiv \frac{36}{17}$ eorumque quadrata $\frac{81}{289}$ & $\frac{1296}{289}$ quorum summa $4\frac{13}{17}$ minor est $1 + 4 \equiv 5$.

Antequam finiam, in favorem Dn. Catelani hoc monebo, quod etiamsi commune gravitatis centrum juxta illum altius ascendere deberet, quam descendit, nondum tamen sequatur, repertum fore motum perpetuum, ut sibi persuadet Ill. Hugenius; quoniam in istis abstrahi solet ab aëris resistentia, a diminutione celeritatis, quæ necessario sequitur disruptionem vinculi, quo connectebantur partes penduli, aliorum-

H h

que

que obstaculorum ; prout ipsa quoque hæc aëris resistentia in causa est , cur simplex pendulum motum suum non continuet , ut maxime in Hypothesi Hugeniæ ad eandem ascendere debeat altitudinem , a qua descendit.

XI.

Litteræ Dⁿⁱ Marchionis de l'Hôpital ad D^{um} Hugenum, in quibus contendit , se regulam hujus Auctoris de Centro Oscillationis penduli compositi demonstrare per causam Physicam , & respondere simul D^{no} Bernoulli.

Ante aliquot annos , cum admiratione legi eruditum tuum de centrīs Oscillationis tractatum , & plenissime mihi persuasum est veras esse demonstrationes tuas. Interea cum Acta Lipsiensia nuper mihi ad manus venerint , inveni in actis mensis Julii anni 1686. relationem tuæ hac de re cum D^{no} Abbate Catelēno controversiæ , à D^{no} Bernoulli factam , qui tuam sententiam amplectitur , uti certe debent , quicunque aliquem inter Geometras locum se tenere contendunt. Sed attonitus vidi , finem ratiocinii quo utitur , contrarium esse tuis demonstrationibus : unde ad illud sedulo examinandum , perductus fui , & cognovi , quod utatur principio verissimo , licet in eodem applicando fallatur ; illud enim principium , uti demonstrabo , ducit ad eandem veritatem , quam probasti in 5^a tua propositione.

TAB. XXVIII.
Fig. 6.

Sit DAB virga inflexilis & sine gravitate , mobilis circa punctum fixum D , ad quam annexa sint 2 pondera æqualia A & B ; & sit distantia BD a puncto fixo quadrupla distantiae AD , quæritur longitudo DG penduli simplicis isochroni , id est , quod movetur cum eadem celeritate ac pendulum compositum.

Ad solvendum hoc problema , considero velocitates , cum quibus corpora A & B incipiunt descendere in primo instanti

ti casus sui, vel potius, spatia, quæ percurrunt eodem tempore, utut parvo; hoc sensu sumo 1 pro velocitate, quacum omne corpus grave sive magnum sive parvum incipit descendere super planis æqualiter inclinatis; nam, ut satis notum est, illa velocitas est æqualis in omnibus corporibus.

Concipio etiam, quantitatem motus corporis initio descensus sui oriri ex massa multiplicatâ per illam primam velocitatem; His suppositis, constat, quod corpus A conetur descendere cum eâdem celeritate, quâ corpus B; quod cum non possit, quoniam virgæ junctum est in puncto A, cujus velocitas tantum est $\frac{1}{4}$ pars velocitatis B, debet accelerare motum corporis B in pendulo composito. Tota ergo difficultas consistit in rite determinandâ motûs augmentatione; quod hoc pacto facio.

Sit x quantitas motus corporis A in pendulo composito, residuus excessus quantitatis ejus motus erit ergo $A - x$, vis hæc applicata in A exerit actionem in punctum fixum D & corpus B, quod considerari debet ut immobile ipsius respectu (quoniam clarum est, corpus B debere censerî immobile respectu illius excessus) & consequenter virga B D debet considerari ut vectis cujus extremitates sustinentur in B & D. habebimus ergo B D, 4. ad A D, 1. ut $A - x$ ad $\frac{1}{4} A - \frac{1}{4} x$ portionem excessus quantitatis motus corporis A, quæ communicatur corpori B; ita ut quantitas motus corporis B in pendulo composito sit $B + \frac{1}{4} A - \frac{1}{4} x$ id est $\frac{5}{4} A - \frac{1}{4} x$; Jam vero propter virgam inflexilem D B velocitas corporis B in pendulo composito debet necessario esse quadrupla velocitatis corporis A, & consequenter etiam quantitas ejus motus, quoniam corpora sunt æqualia; unde sequitur æqualia esse $4x$ & $\frac{5}{4} A - \frac{1}{4} x$ unde deducitur valor ipsius x , $\frac{5}{17} A$, qui exprimit quantitatem motus corporis A in pendulo composito; Jam si fiat, ut $\frac{5}{17}$, velocitas corporis A in pendulo composito, est ad 1, velocitatem, omnium corporum gravium in extremitate pendulorum simplicium, ita D A, 1; est ad D G, $\frac{17}{5}$, erit hæc longitudo penduli simplicis isochroni; si enim spatia sunt inter se ut velocitates, tempora æqualia sunt.

TAB. XXVIII.
Fig. 7.

Si addamus ad pendulum compositum D A B novum pondus C æquale cuivis ponderi A & B, ita ut D C duplum sit D A, considerari debent pondera A & B tanquam appensa ad G commune suum Oscillationis centrum, in extremitate penduli simplicis D G; & tunc ponendo x , quantitatem motus corporis C in pendulo composito D C G, habebimus C- x pro residuo excessu quantitatis motus corporis C. Quantitas hæc residua applicata in C exercet vim in punctum fixum D, & punctum G, quod considero ut fixum ipsius respectu; habebimus ergo D G, $\frac{17}{5}$, est ad D C, 2, ut C- x est ad $\frac{10C - 10x}{17}$, portionem ejus excessus, quæ distribuitur in G; unde sequitur, quantitatem motus corporum A & B in pendulo composito D A C B futuram $\frac{5}{17} A + \frac{20}{17} B + \frac{10C - 10x}{17}$ id est $\frac{35C - 10x}{17}$; Ob virgam autem inflexilem D B, velocitas corporis A in pendulo composito erit necessario dimidia velocitatis corporis C, & velocitas corporis B erit dupla velocitatis corporis C, & eadem quoque inter motus quantitates rationes dantur, cum tria corpora sint æqualia inter se; datur ergo æqualitas inter $2x + \frac{1}{2}x$ & $\frac{35C - 10x}{17}$, unde deducitur quantitas $\frac{2}{3}x = C$, exprimens quantitatem motus corporis C in pendulo composito D A C B. Jam si fiat, ut $\frac{2}{3}$, velocitas corporis C in pendulo composito, est ad 1, velocitatem cujusvis corporis gravis in extremitate penduli simplicis; ita D C, 2. est ad D E, 3, erit hæc longitudo penduli simplicis isochroni.

Si pondera A, B, C essent inæqualia, inveniretur semper, sequendo hoc ratiocinium, centrum Oscillationis. ita ut hæc methodus sit generalis, quicumque sit ponderum numerus, & quæcunque eorundem inæqualitas. Ostendendum nunc, methodum hanc etiam usu venire, si pondera sint ad puncti fixi partem utramque disposita.

Sit pendulum compositum A D B mobile circa punctum fixum D, & oneratum ponderibus æqualibus A & B, sitque D B quadrupla ipsius D A, patet quod corpus A debeat retardare motum corporis B in pendulo composito; & ut præ-

præcise inveniatur quantum retardet, voco x quantitatem, motus corporis B in pendulo composito $A D B$, & consequenter excessus residuus quantitatis ejus, motus erit $B - x$; sed ob virgam $B A$, velocitas corporis A debet necessario esse quarta pars velocitatis corporis B : quantitas ergo ejus motus in pendulo composito erit $\frac{1}{4} x$ (cum enim corpora A & B sint æqualia quantitates motus sunt proportionales velocitatibus. Illa autem motus quantitas produci non potuit, nisi per residuum excessum quantitatis motus corporis B . Patet ergo, quod ille excessus $B - x$ debeat superare quantitatem motus corporis A inferiora versus, & eidem præterea imprimere quantitatem motus $\frac{1}{4} x$ superiora versus; id est, quod debeat agere in corpus A ac si vis $A \rightarrow \frac{1}{4} x$ immediate applicita in A , illud sursum propelleret. Sed vis $B \cdot x$ ob punctum fixum D agit in A ac si vis $4 B \cdot 4 x$ immediate applicita in A , illud sursum propelleret; dabitur ergo æqualitas inter $4 B \cdot 4 x$ & $A \rightarrow \frac{1}{4} x$; unde deducitur quantitas $x = \frac{12}{17} B$, quæ præcise exprimit quantitatem motus corporis B in pendulo composito $A D B$. Porro si fiat, ut $\frac{12}{17}$, velocitas corporis B in pendulo composito, est ad 1, velocitatem corporis omnis gravis in extremitate penduli simplicis, ita $D B$, 4, est ad $D G$, $\frac{17}{3}$, erit hæc longitudo penduli simplicis Isochroni.

Facile concluditur ex his omnibus, principium Dⁿⁱ Bernoulli esse verum; sed eundem falli in conclusione quam inde deducit; quoniam considerat velocitates acquisitas corporum A & B , cum considerare deberet, uti nos fecimus illorum velocitates incipientes & præterea motus quantitates. Alias enim nunquam posset applicari hoc principium, quod non differt à principio, quod obtinet circa vectem, quum corpora sunt inæqualia; Adeo ut credam me plane petitioni ejus satis fecisse, *Rogantur hac occasione eruditi &c.*

Vides, quo pacto diversæ viæ ducant ad cognitionem ejusdem veritatis; nolim tamen meam tuæ æquiparare, quæ ultra omnem comparisonem eruditior est & magis Geometrica; Interim si existimes, non inutile fore demonstrare rationes Physicas, quas hic affero, perfecte convenire cum

tuis demonstrationibus, idque inservire posse tollendo Dⁿⁱ Bernoulli dubio, per me licet publici juris fieri has litteras, sed simul peto, ut iisdem observationes tuas subungere digneris, & persuasum habeas me a iudicio tuo non provocaturum, quod procul dubio doctum simul clarissimum & æquissimum futurum est: sum ex animo &c.

X I I.

Observationes Dⁿⁱ Hugonii in litteras præcedentes & in relationem Dⁿⁱ Bernoulli, cujus in iis fit mentio.

Semper credidi difficile esse inventu centrum Oscillationis Aliâ methodo, quam quâ ipse usus sum; neminem quoque vidi, qui id prospero successu tentârit, sive respectu solutionis generalis, sive in casu pendulorum compositorum, quorum pondera sunt in lineâ recta cum puncto suspensionis. Hunc casum D^{nus} Marchio de l'Hôpital sibi post plures alias proposuit, & primus, quod vere possum dicere, speratum sortitus est eventum; nam Dⁱ Wallisius, Mariotte, & Pater Deschales quæsierunt tantum centrum Percussionis, nec potuerunt demonstrare idem esse cum Centro Oscillationis, licet id revera ita se habeat.

Cæterum licet demonstratio Domini Marchionis valida sit & legitima, & naturæ rei congrua videatur, multa tamen continet quæ Lectorem aliquantum detinere queant; ut, quando considerat quantitatem motus corporis in primo initio casus, & quum distinguit & dividit, residuum motum corporis A, scilicet quem haberet cum separatim caderet, præ illo quem haberet, si descenderet veluti pars penduli compositi, & tandem, quum in pendulo trium ponderum vult A & B tanquam fixa considerari in G, centro Oscillationis illorum. cum hæc omnia non sint prorsus evidentia, patet viam, quam ingressus est Marchio, fatis esse difficilem, & accuratum valde ratiocinium fuisse requisitum, ne hic devia-
retur; D^{us} Bernoulli in sua relatione controversiarum me inter & Abbatem Catelanum, de qua in sequentibus ali-
quid

quid observabo, eandem viam fuerat secutus, sed cum nec illam ad finem usque sequi potuerit, novo inde ratiocinio ejusdem difficultas colligitur.

Obstrictus sum D^o Bernoulli, quod semper in hac controversiâ a meis partibus steterit adversus D^{um} Abbatem Catelanum. Interea non potui concipere, quo pacto, postquam dixit propositionem meam fundamentalem de centro Oscillationis pendere a magno illo principio, scilicet *quod commune centrum gravitatis plurium ponderum non possit ascendere altius per gravitatis eorum effectum, quam unde descendit*, in sequentibus vertat contra me quoddam ratiocinium, quemadmodum ipse confitetur, incertum, ac si posset in dubium vocare veritatem hujus ipsius propositionis, cum potius deberet concludere, se errasse in suo ratiocinio.

Ad id vero, quod mihi imputat, me in prima responsione non refutasse falsum Dⁿⁱ Abbatis principium, idque in ultima non refellisse per causam ejus Physicam, respondeo me in prima responsione credidisse, sufficere, si evidens vitium ostenderem in ratiocinio, quod mihi opponitur, licet ulterius hanc materiam non examinarem; In exceptione autem 8. Junii 1684. pari jure cum D^{no} Bernoulli possem pertendere me id principium refutasse per suam causam Physicam, quoniam ostendi, repugnare illud magno principio naturali *quod corpora gravia sponte non possint ascendere*.

Credo enim, in hoc æque consistere causam Physicam hujus phænomeni, scilicet quod in pendulo composito pondera A & B, cum descenderint junctim ad partem infimam vibrationum suarum, non acquirant simul tantam velocitatem, quantam acquisivissent separatim ex iisdem altitudinibus cadentia, quam in eo, quod pondus A consumat partem sui motus agendo in punctum fixum F, juxta demonstrationem Dⁿⁱ Bernoulli & Dⁿⁱ Marchionis de l'Hospital; Et ad hoc credendum ex eo adducor, quod sæpe pereat pars motus, licet hunc in aliquo affectu edendo consumi, affirmare non possumus, ut in multis casibus percussionis duorum corporum durorum, juxta id quod ob-








fer-


Servavi, quum in lucem ederem leges ejusmodi motuum in diario Parisiensi 1669 mensis Februarii, ita ut minime pro lege naturæ habendum sit, eandem motus quantitatem semper conservari, nisi alicui impendatur & consumatur, sed hæc constans lex est, corpora servare vim suam *adscendentem*, & idcirco summam quadratorum velocitatum illorum semper manere eandem; Hoc autem non solum obtinet in ponderibus pendulorum, & percussione corporum durorum, ut ibidem observavi, sed in multis quoque aliis mechanicis experimentis.

Demonstraveram admittendo principium Abbatis Catelani, vim *ascendentem* ponderum penduli augeri, & ita commune eorum gravitatis centrum altius posse reverti quam unde descendebat, unde inferebam, hoc posito inventum fore perpetuum mobile. D^{us} Bernoulli non concedit hanc consequentiam ob aëris obstaculum, & quædam alia, quæ effectum impedirent: sed considerare debuisset, cum altitudo illa major, quam acquirit centrum gravitatis, semper determinata sit quantitas, & effectus obstaculorum non sit determinatus, imo minui magis magisque possit, facile construi posse machinam, in qua commodum ex elevatione centri gravitatis derivatum, præponderaret impedimento obstaculorum; sed revera id experiri necesse erit nunquam.

F I N I S.







M A C H I N Æ
Q U Æ D A M,
E T
V A R I A
C I R C A
M E C H A N I C A M.

M A C H I N Æ

Q U Æ D A M,

E T

V A R I A

C I R C A

M E C H A N I C A M.

I.

Excerpta ex Literis Domini Hugonii, novam quandam Inventionem Horologiorum exactissimorum ac portatilium concernentibus.

CUM invenerim artificium diu desideratum quo fiant Horologia & exactissima simul & portatilia, credo rem gratam me facturum publico, si id communicem. Quamobrem mitto Tibi & descriptionem & picturam formæ, continentem id quod in hoc invento habetur singulare, ut inter cæteras novitates scientiarum, hanc quoque possis inferere, siquidem ita collubuerit, Ephemeridibus Tuis.

Horologia formâ modicâ ad hunc modum constructa, erunt horarum indices portatiles quam exactissimi, sub majori forma autem ubique utiliter adhibebuntur, ac speciatim in longitudinibus terrâ marique inveniendis, siquidem ipsorum motus regitur à principio quodam æquabilitatis, non aliter ac aliorum cum pendulis, per cycloidem quippe ita correctorum ut nullum vecturæ genus illa possit sistere aut sufflaminare.

TAB. XXIX.
Fig. 1.

Arcanum inventionis consistit in pinna quadam spirali quæ altera sui extremitate interiore affixa est hastæ animulæ seu rastri æquilibris, sed majoris ac ponderosioris quam pro solito, ac supra suos cardines ultro citroque mobilis; alterâ vero extremitate cohæret particulæ cuidam supra Horologii superius tegmen eminenti: quæque vibrato semel Horologii libramento, spiras suas alternis comprimit ac relaxat, ac accedente sibi parvulo adjumento ab Horologii rotis veniente, rastri, seu æquilibrîi, motum conservat, ita quidem, ut, licet majores aut minores faciat excursus, ejus reciprocationes tamen una alteri sint tempore prorsus æquales. In figura, superius Horologii planum est A B, circulus æquilibrîi vel libramentum circulare C D, hujusque axis seu hasta E F: Pinna seu elaterium in spiram contortum G H M, ferruminatum ad hastam æquilibrîi in M, & lamellam supra planum Horologii supremum in G, ita quidem ut spiræ omnes elaterii è duobus istis sustentaculis in aëre suspensæ hæreant, infernè nihil attingentes: N O P Q est quædam coronis aut fultura in qua vertitur alter cardo æquilibrîi seu libramenti: R S est una ex rotis dentatis Horologii, habens motum quendam libratorium ab occurrente rota proxima sibi impressum. Et hæc rota R S implicatur tympano T, ad axem seu hastam libramenti firmato, cujus adeo motus hoc medio conservatur quantum opus est.

II.

*Nova Libella, Telescopio instructa, propriam secum
ferens probationem, & quæ in unica statione
verificatur, & rectificatur.*

TAB. XXIX.
Fig. 2.

Hujus instrumenti præcipua pars est Telescopium A B, unius, duorum, aut plurium pedum longitudinis, prout ab eo plures expectantur effectus: ex duobus, quatuorve
con-

convexis vitris modo ordinario, sat superque cognito, perficitur; duo ad inversa objecta videnda, quatuor ad ea erigenda inserviunt. Tubus ex Bractea, aut alio metallo ad Cylindri formam componitur, transitque in annulum aut Cylindrum minorem Cupreum C, qui ipsum in medio includit & illi conferuminatur. Cum annulo duo plana & similia cohærent brachia D & E, unum in superiori parte, alterum in inferiori, utriusque longitudo est fere quartæ partis longitudinis Telescopii, adeo ut tota Machina Crucem imitetur. In brachiorum extremitatibus duplicia fila, per parvulos annulos transeuntia, & inter laminas inserta cum brachiis cohærent. Harum laminarum altera brachio affixa est, dum altera separari potest ut fila inter illas inferantur. Annulo crux suspenditur ex hamo F, dum ope alterius annuli cruci, uti postmodum notabitur, annectitur pondus ejusdem circiter gravitatis cum illa, & in pyxide G inclusum. Ex hac pyxide solus egreditur ponderis uncus. Spatium in pyxide vacuum oleo nucum, lini, aut alio quocunque quod frigore non coalescit repletur, quo motus ponderis & Telescopii illico reprimuntur.

In interiori Telescopii parte filum sericum horizontaliter ad vitri objectivi focum expansum est, sive unum, duo, aut tria adsint ocularia; hoc filum ope cochleæ, quæ circumvertitur in foramine H in Telescopii tubo, elevatur, & deprimitur. Methodus disponendi filum postea explicabitur. I levis admodum ex Cupro annulus est, non majoris ponderis, quam $\frac{1}{80}$ aut $\frac{1}{100}$ partis ponderis ipsius crucis, & qui juxta Telescopii tubum movetur, & ubi libuerit hæret; insuper si Crux non in æquilibrio est, alter annulus in interiori Telescopii parte sufficientis ponderis apponitur, ut æquilibrium detur, id est, ut Telescopii tubus Horizonti parallelus fiat, in quo tamen summa cura haud requiritur.

Plana Crux ex ligno Machinæ suspensioni inservit, ad hoc superne uncus F habetur, & in brachiorum altero furca K majorem Telescopii motum lateralem reprimens, ita ut per spatium semilineæ, id est $\frac{1}{24}$ pollicis, tantum agitari possit.

Pyxis plumbum, & oleum continens eidem Cruci annexitur, ad latera, & fundum inclusa, ut autem ventus a Libella arceatur, cava crux L planæ lignæ cruci cum duobus aut tribus hamis annexitur, adeo ut integra tum conficiatur pyxis.

Ut usui libella accommodetur, ac rectificetur, ut dictum suspenditur, plumbo non infernè annexo, & in quoddam distans objectum collineatur, attendendo ad punctum quod Horizontale filum obtegit, filum enim distincte, ut objectum ipsum observari potest. Deinde plumbum addatur, id est annulo inferiori jungatur, si tum Horizontale filum eidem objecti puncto respondeat, constabit crucis centrum gravitatis exacte dari in recta linea quæ duo suspensionis puncta conjungit, id est quæ transit per puncta quibus fila brachiis annexuntur. Hæc est primaria requisita præparatio: verum si hoc minime reperitur, res faciliè perficitur ope annuli I, observando, annulum vitrum objectivum versus promoveri debere, si Telescopium declinat, dum pondus annexum est; contra retrahi debere, si Telescopium post annexum pondus elevetur.

Ubi ergo ita constituta est Machina, ut ad idem punctum appenso & sublato pondere visum dirigamus, invertenda est, suspendendo eam ex annulo inferiori, & plumbum brachio alteri annexendo; quia citius motum sistere jubet, & quia hoc ad reliqua quæ supersunt perficienda plurimum conducit.

Quod si tunc filum in Telescopio, uti antea collineando, punctum idem ac in præcedenti observatione obtegit, punctum hoc in eodem plano Horizontali cum centro tubi Telescopii existere certissimum est, quemadmodum demonstrabitur.

Verum si filum punctum idem collimando non obtegit, elevando & declinando filum, ope cochleæ huic usui adaptæ, eo poterit reduci, elevando nempe filum si ad punctum magis elevatum visus dirigatur, & contra, Telescopium post singulas fili mutationes invertendo.

His peractis Instrumentum perfecte erit rectificatum, nec obstat

obstat (quod notabile est) si lentium axes non per harum centra transeant, aut si ipsæ non exacte in recta linea collocentur; & consequenter secure Machinâ utemur, dummodo nulla superveniat mutatio; filum namque Horizontale cujuscunque objecti, ad quem fiet collimatio, indicabit locum qui est in eodem plano Horizontali cum centro Telescopii; si autem mutatio quædam detur, in singulis observationibus detegi potest, primo cum plumbo annexo, deinde sine plumbo collineando, & tandem Telescopium invertendo. Et hoc utique præcipuum est, quo Libella præ cæteris gaudet commodum, quod in usu erroris periculum nullum detur.

Pes, quo Machina innitatur, est rotunda ferri, aut bractæ lamella modice concava, cui annectuntur tres baculi longitudinis circiter trium pedum cum semisse, pyxis huic lamellæ imposita hanc in tribus punctis, tangit, quare facile movetur, & ita constituitur, juvante cavitate lamellæ, ut plumbum in pyxide sua libero fruatur motu, quod videtur trans aperturam M in operculo ligneo.

Gravitas plumbi, ut pyxis firmiter pedi inhæreat, inservit, verum si firmitus eam sustentari velimus in lamellæ cavæ medio foramen fiat.

Si totum pondus in pyxide G recludi nolumus, tertia vel quarta tantum pars huic includatur & reliquum eidem ferreæ caudæ annectatur, sed extra pyxidem; primo tunc observabitur cum minori pondere solo, pyxide contento, tum cum altero desuper addito, in constituendo filo Horizontali ambobus utentum.

Hac methodo Telescopii agitationes promptissime, in omnibus observationibus quæ ad rectificandam Machinam instituuntur, cessant; si autem nullum in quibusdam observationibus imponatur pondus, hæ motiones difficiliter sistuntur.

Uncus F, cui Libella appenditur, simpliciter lignæ planæ cruci annecti potest, licet hic annexus apparet annulo, qui ope cochleæ adhærentis annulo, quo Machina defertur, elevari & deprimi potest.

Quan-

Quantum hoc proſit, experitur in ipſius translatione, nam tum crucis fila laxari queunt curando, ut ſupra furcam K, & brachium exiguum curvatum R, deſcendat Teſcopium, ne quidem thecam ligneam aperiendo.

Ne oleum pyxide G contentum ex hac deſluat, dum Libella in itineribus confertur, pyxidis hujus foramen ipſo pondere incluſo claudi poteſt; curabitur ad hoc, ut pondus illud deſuper planum admodum ſit, & detineatur juxta pyxidis operculum ope annuli cochleati S.

TAB. XXIX.
Fig. 3.

Tubus N, illum in magno repræſentat, cui in interiori Teſcopii parte Horizontale filum cohæret, continet elaſtrum O P furcæ Q annexum, cui ſericum filum cera affigitur; hoc elaſtrum furcam ad fruſtum bractæ T trahit, quod ingreditur cochlea, quæ reſpondet foramini H in tubo Teſcopii, quo dato foramine etiam modice tubus N verti poteſt, ut filum exacte fiat Horizontale, de quo judicatur per Teſcopium videndo.

Rectificationis Libellæ Demonſtratio.

TAB. XXIX.
Fig. 4.

Rectificationis requiſitum primum fuit hoc; ut centrum gravitatis ſuſpenſæ crucis in recta linea per puncta, quibus fila brachiis annectuntur, tranſeunte daretur. Ut hujus præparationis neceſſitas concipiatur, ſciri oportet, non ſufficere ſi Teſcopium ex utroque annulo ſucceſſive ſuſpenſum ad idem objecti punctum dirigatur, hoc enim fieri poteſt, licet objecti punctum multum infra, aut ſupra Horizontale planum inveniat. Sit A B Cylindri Teſcopiani axis; ſit C I ſuſpenſionis, aut nexum filorum linea, quarum linearum longitudinum hic non habetur ratio, quoniam, cujuſcunque magnitudinis Teſcopium ſit, nihil hoc ad ſuſpenſi corporis ſitum conferre, notum eſt: ponimus A B, C I ſe mutuo ad angulos perfectè rectos ſecare in puncto H. Deſuper centrum gravitatis crucis in E, ponatur in axe A B, magis tamen verſus B, quam punctum H; Cruce itaque ſuſpenſa in C, linea quæ a C ad centrum terræ tendit erit C E,
ita

ita ut axis $A B$ declinaturus sit infra Horizontale planum, cui $C E$ perpendicularis est, & cum quo efficiet angulum æqualem angulo $H C E$; si vero visus radius $A B$ filum Horizontale, & vitri objectivi B centrum pertransiens continuetur in recta linea ad objecti punctum usque; istud punctum infra Horizontale planum tunc esse futurum; evidens est; Invertendo interim Telescopium, & hoc per I suspendendo; ita tamen, ut extremitas B ad eandem partem remaneat, facile patet eundem situm, quem suspensum per C habebat, eum acquirere; quia, directionis linea denuo per punctum E transibit: igitur juxta filum Horizontale, uti antea collineabimus ad idem objecti punctum; licet minime æqua sit Libella.

Per primariam rectificationis partem, defectus hic detegitur, & corrigitur: nam primo si gravitatis Crucis centrum existit in H , directionis linea erit $C I$, & constat, pondere in I annectendo, crucis situm non mutari; & idcirco per Telescopium ad idem punctum, collineabimus; sed si centrum gravitatis crucis sit in E , & pondus in I appendatur, extremitas B elevabitur, & ideo visus per Telescopium ad punctum magis elevatum, quam ante, dirigitur. Quod aperte videtur ducendo lineam $I E$, eamque dividendo in K , ita ut pars $I K$ sit ad $K E$, uti crucis pondus est ad pondus in I annexum; nam commune centrum gravitatis erit K , & $C K$ directionis linea: & angulus $K C E$ æqualis erit illi, quo elevabitur Axis $A B$. Quia linea $C E$ supra $C K$ tali angulo elevatur, & quia $A B$ cum $C E$ eundem quem ante efficit angulum.

Ut vero clare pateat, appendendo pondus in I sufficienter detegi, an centrum gravitatis crucis detur extra suspensionis lineam; dico, angulum $K C E$, posito pondere appenso æquale ponderi ipsius crucis, sensibilibus æquari; anguli $I C E$, qui æqualis est angulo quo Axis $A B$, & ideo quoque Visus Radius, magis deprimitur versus partem B , quam fecisset, si centrum gravitatis crucis in H fuisset; nam ducendo $K L$ parallelam ad $E H$, in duas partes æquales dividet $H I$, &

HN valebit $\frac{1}{2}$ lineæ LK , æst LK est dimidium HE , ergo HN est $\frac{1}{4}$ ex HE , & NE ideo $\frac{3}{4}$ ex HE , sed uti EN est ad EH , ita sensibilibus angulus ECN est ad angulum ECH quia exigui sunt, id est ECK ad ECI .

Cum autem angulus ECK illi æqualis est, quo Telescopium elevatur addendo pondus in I , sequitur exiguum pondus P versus H retro trahendum esse ut magis elevetur Telescopium, ita tamen ut prima elevatio dupla sit secundæ, quia angulus KCE duplus est KCI ; & tunc directionis linea erit CI , in qua necessario gravitatis centrum crucis existet, quandoquidem centrum gravitatis ponderis in I appensi, in hac datur, uti & centrum gravitatis commune ejusdem ponderis & crucis, cujus pars est exiguum pondus P . Si annectendo pondus in I Telescopii extremitas B deprimatur, dimidia sua parte augenda erit depressio, quod eodem modo demonstratur. Hæc angulorum cognitio, ad primam Libellæ præparationem faciliorem reddendam usu venit.

Quod aliam verificationis partem spectat, ubi centrum gravitatis crucis est in CI , suspensionum linea, ex ante explicatis sequitur, hanc lineam esse perpendicularem ad Horizontem, sive crux per C , sive per I suspendatur, & sive illi ad infra pondus annectatur, sive crux sola suspendatur.

TAB. XXIX.
Fig. 5.

Tandem, positâ brachiorum ut & filorum æqualitate, certissimum est, centrum Cylindri Telescopii, quod sit H , ad eandem in utraque suspensione altitudinem dari: sint itaque DHM , EHP , axis Cylindri in una, & altera suspensione, ponendo primo, quod differentibus gaudeat positionibus, sit O objecti punctum, ad quod juxta filum Horizontale collineamus, & OM , OP , Radii luminis, qui a puncto O tendunt ad centrum aperturæ vitri objectivi, & inde æque ac omnes alii radii, qui a puncto O ad vitrum objectivum perveniunt, Horizontali filo obviam proficiscuntur, sive filum istud Telescopii axem pertranseat, sive non; hoc namque per Dioptricæ leges sequitur, cum filum punctum O tegere videatur, & utrumque distincte appareat. Ductis lineis rectis HO , MP , ultima parallela erit CI , quia HM , HP

HP sunt æquales, ac æqualiter inclinatæ ad CI . Ergo anguli M, P , trianguli MHP sunt æquales; at angulos HMO , HPO etiam esse æquales certum est, nullo habito respectu ad id, quod radiis OM, OP intra Telescopium accidit, nec si vitri objectivi axis per hujus centrum transeat, id est, an maximam suam in centro habeat crassitudinem. Anguli igitur M, P , trianguli MOP similiter æquales sunt, & triangulum hoc est Isosceles, uti MPH ; recta idcirco HO secabit MP ad angulos rectos; sed MP parallela erat CI ; OH ergo perpendicularis est CI , & idcirco punctum O in eodem plano Horizontali cum centro H Telescopii, quod probandum erat.

Si nunc centrum vitri objectivi M, P , in utroque casu detur in eodem puncto ut S , recta HS perpendicularis erit CI , quandoquidem anguli CHS, IHS tum æquales sint, propter Telescopii inversionem, verum quia SO tendit ad idem punctum O in ambabus suspensionibus, necessario erit in eadem recta linea cum HS , si enim lineæ hæ angulum conficerent, angulus iste superne in una suspensione esset dum in altera situm contrarium haberet, sicque juxta filum ad duo distincta puncta collinearem, cum ad unicum punctum id fieri posuimus; sed integra igitur linea OSH est perpendicularis ad CI , ideoque punctum O in eodem datur plano Horizontali cum puncto H .

III.

Astroscopeia Compendiaria, Tubi Optici molimine liberata.

Quod plerisque omnibus accidit novis inventis, ut, à parvis orta initiis, cura & tractatione hominum auctiora fiant ac perfectiora, id vel præcipuè, in admirando illo proferendi visus artificio, usu venisse animadvertimus. Notum est enim quàm fuerit à prima origine tenue ac pene nihili, cum rudimenta ejus quædam, in Portæ Neapolitani libris,

obscurè exposita conspicerentur; quibus tantum præcelluere nostratum hominum conatus, ut non sane immerito primi ejus inventores haberentur. Hos vero rursus longissime prævertit Galilæus, tot tantisque rebus, tubi sui opera, in cælo deprehensis, quarum nihil quidquam ante ipsum fuerat perceptum. Videbatur nihil præstantius iis, quæ sibi paraverat, organis repertum iri. At, si nunc in vitam redeat, quis dubitet quin suis ipse multo præpositurus sit ea quæ deinde exstiterunt; tum nostra, quibus Saturni planetæ veras figuras annulumque primi conspeximus; tum magis etiam, quæ his successerunt Italica, ab egregiis artificibus elaborata. Quibus usus Vir Clarissimus Dominicus Cassinus, alia insuper nova phænomena cælo deduxit; planetariorum globorum in sese revolutiones, comitesque Saturni duos, præter eum quem nos repereramus, reliquis manifestiorem.

Quod si attendamus quibus accessionibus in tantum hæc ars continue creverit, nihil aliud reperiemus nisi auctam tuborum longitudinem, lentisque, quas vocant, vitreas in sphaeræ majoris convexitatem diligentius conformatas. Etsi enim modos quosdam alios, compendiaque investigaverint viri subtilissimi; jam conicarum sectionum præscriptis figuris, quæ vitro inducerentur; jam speculorum reflexionibus radios lucis colligendo; certum est hæc omnia vel frustra fuisse, vel votis & expectatione longe minora, ob causas quas exponere non est hujus loci; unamque adeo rationem, qua proficeretur, hætenus esse relictam, tuborum productionem. Et sane, quanto magis rei ipsius naturam intueor, tanto propius est ut existinem, nihil alia via ne impofterum quidem esse sperandum.

Optime igitur operam suam ij collocasse videntur, qui parandis tubi majoris lentibus incubuerunt. Quorum diligentia successus hac in parte non defuit. Sed aliunde non exiguum oblatum fuit incommodum; nimia tuborum longiorum gravitas ac moles; quibus movendis necessario machinæ in auxilium advocandæ fuerunt. Hæ vero & in iis quæ nunc extant, pedum triginta aut quadraginta, longitudinibus difficile construun-

Fig. 1.





Fig. 4.





Fig. 3.




Fig. 2.





Fig. 5.



struuntur tractanturque; & , si ulterius progrediendum sit, multo plus exhibituræ sint negotii. Adeo ut hic velut obex quidam fixus fuisse videatur ad majora tendentibus. Quare rem inprimis gratam me facturum arbitror hæc studia colentibus, syderumque observationi intentis, si, quod nuper inveni, ostendero qua ratione impedimentum illud omne ac tædium tollatur; magnoque temporis, operæ & sumptuum compendio, maxima quæque telescopia ad hæc spectacula adhibeantur. Scio inter cætera quæ in hunc finem proposita fuere, hoc quoque, quod hic adferimus, aliis in mentem jam à multis annis venisse, ut sine tubo lentes disponderentur; sed quod volebant efficere eos nequuisse, nisi machinatione quadam difficili nimium, quæque propterea adhuc exitum non habuerit. Nos autem quæ docebimus, re ipsa utilia esse invenimus, idque magno commodo nostro quotidie experimur. Ea vero sic se habent.

Loco patente & undique aperto, malus in terram defigitur, ad perpendiculum erectus. Noster, quò primum usi sumus, pedum quinquaginta altitudinem habebat; telescopiis nempe pedum 70 & amplius suffecturus, quanquam non in omni syderum supra horizontem ascensu. Deberet enim non multo infra totam telescopii longitudinem produci. Hujus, priusquam erigatur, latus unum dolabra complanatur; atque ibi regulæ binæ affiguntur inter se parallelæ, ac sesquipollice distantes, itaque canalem efficientes, interius paulo latiore, qui à summo malo ad imum fere pertingat, reliquis tantum pedibus tribus vacuis. Præterea in ipso mali cacumine, orbiculus imponitur, circum axem mobilis, inque eum funis ducitur dupla mali longitudine, crassitudine minimi digiti dimidia. Utque eo, si forte opus sit, ascendi possit, triangula lignea æqualibus spatiis defiguntur, quibus scandentis pedes insistant. Ita demum paratus malus erigitur, parte ea, qua terra tegendus, illita pice, circumdataque arena, quò minus putredine corrumpatur. Usus mali est, ut lens major ejus opéra in altum tollatur, quousque opus est, quod sit hoc modo.

Afferculus bipedalis uno latere ita inciditur, ut intra canalem, quem diximus, liberrime moveri queat. Hujus medio affigitur brachium itidem ligneum, pedem unum à malo extans, cujus in extremo aliud sesquipedale, media item sui parte, conjungitur rectis angulis. Utrumque vero Horizonti parallelum extenditur. Huic transverso brachio lens imponitur ea qua dicemus ratione, atque omnia sursum adducuntur, adnexis afferculi extremis ad funem ante demonstratum; qui ab imo malo ad summum ascendens, ac super orbiculum transiens, inde descendit rursus ac, priusquam terram attingat, in sui ipsius caput alterum innectitur. Habet autem funis is adjectum plumbum, pondere æquali quantum est brachii mobilis cum lente imposita; eoque loco deligatum, ut ad summum malum pertingat, cum lens in imo consistit. Ita hæc facillime ad eam quæ requiritur altitudinem erigitur & , omisso fune, sponte ibi suspensa manet. Forma plumbi parte utraque in coni apicem definit, ne obhæreat ad triangula quæ per malum defixa diximus.

Cæterum lens hæc telescopii major collocatur aptaturque hoc modo. Primum in annulum seu cylindrum cavum, è ferri bractea fabricatum, ipsa includitur, longum digitos quaternos. Huic cylindro, sive alteri potius in quem hic inferitur, bacillus pedalis, digiti crassitudine, extrinsecus secundum latus affigitur, totus in partem unam prominens. Hæc omnia globulo æneo insistent, avellanæ nucis magnitudine, qui bacillo cohæret, inque subjecto sui moduli cavo liberrime volvitur; ita tamen ut excidere nequeat. Cavum partibus duabus constat, quæ, super pediculo tereti, cochlea junguntur adstringunturque, sed ita ut globulum nihil prorsus premant. Lens igitur, cum bacillo sibi adfixo, hoc modo mobilis efficitur. Quæ porro ut æqualiter librata consistat, pondus unius libræ circiter infra bacillum appenditur, filo æneo crassiore semipedali conjunctum atque infixum. Cujus flexu facile ita pondus temperatur, ut centrum commune, suæ lentisque gravitatis, cum centro Sphærulæ conveniat, atque hoc pacto quocunque positu lens suspensa maneat,

maneat, attactuque levissimo moveatur. Qua in re potissima versatur inventi pars. Pede enim globuli in foramen transversum brachii, quod supra designavimus, immisso, (duo autem vel plura ejusmodi foramina fiunt, ut in omnem cæli partem commode lens obverti possit) filum vel funiculus tenuissimus bacillo, sive caudæ extremæ, illigatur; juncturus nempe lentem majorem cum ea quæ oculo proxima ponitur, ac proinde futuri telescopii longitudinem æquans, vel potius paulo excedens. Hinc, ubi sublata ad malum fuerit lens, quocunque id filum, manu leviter tractum, circumferetur, lentem una movebit, eamque hoc modo ad astrum quodcunque recta opponet. Quod certe absque hoc libramento fieri non posset. Cæterum, ut extento filo cauda seu bacillus, quem lenti adposuimus, parallelus fiat, quod omnino necessesse est, infigitur parti ejus extremæ stylus æreus digiti longitudine, cui deorsum flexo, donec cuspide sua tantundem ac centrum globuli infra bacillum descendat, ita demum filum, quod diximus, adnectitur. Cur autem stylo flexili hic utamur postea dicetur.

Jam vero & de oculari lente explicandum, quomodo cum priore componatur; quod multis verbis non indiget, siquidem eadem fere omnia, quæ in majori lente, observanda sunt. Similiter enim tubo, seu cylindro brevi, hæc quoque includitur; item bacillo seu caudæ conjungitur; quæ porro globulum suum cui innitatur habet. Sed hujus loco axiculus transversus adhiberi potest. Infra bacillum vero pondus exiguum rursus appenditur, quanto opus est ad faciendum libramentum. Porro capulus, globulum vel axiculum ferens, manu observatoris apprehenditur; bacillus lentem majorem sublimè positam versus, directus est, filo eidem, quod inde descendit, illigatus. Adducta vero manu, contentoque leviter filo, parallelas inter se fieri lentes perspicuum est. At non eodem modo, bacilli hujus extrema parte, filum adnectitur, ac superiori illi, qui lentem majorem dirigit, sed per foramen trajectum, inde verticillo involvitur, cujusmodi sunt quibus testudinum chordas intendunt; qui verticillus medio

medio bacillo à latere infixus est. Hujus conversione, inter observandum, fili longitudo producitur contrahiturve, donec intervallum inter lentem utramque, oculo spectatoris exacte conveniat, postquam antea prope verum fuerit reperi-
tum, quod est facillimum.

Vide Aucta-
rium. pag.
274.

Cæterum, quo possit observator immotam detinere lentem sibi proximam, quod apprime necesse est, fulcrum quoddam præsto est. è levi materia compactum, duobus pedibus insi-
stens, ac superiori parte transversum habens baculum, cui brachia utraque, sive stantis sive sedentis, innitantur; dum altera manus, quomodo diximus, lentem sustinet. Multoque expeditior est hæc ratio, atque ad usum accommodatior, quam si tertius pes fulcro accedat, inque ipsum lens ocula-
ris imponatur.

Ut vero noctu, atque in tenebris, stellæ quævis telescopia nostro facile reperiantur, lumine utimur laternæ incluso, quales jam vulgo notæ sunt, vitri convexi vel speculi opera longe lucem projicientes. Hujus radiis ad malum lentemque in eo hærentem directis, ubi circulus ipsam continens con-
spectus fuerit, facile eo transfertur visus, ut stella ipsi media lente tegatur, simulque admota lente minori, per utramque se spectandam præbeat. Ac sane multo citius hoc per-
agitur, quam factum sit hætenus telescopiis tubo instructis. Adeo ut hoc quoque nomine longe præstet nova hæc obser-
vandi ratio. Lunam verò contemplari volentibus, lucerna ni-
hil opus est, quod ipsius astri luce lens conspici possit. Sed hic ob disci lunaris amplitudinem, ne partem quampiam in-
tuenti, ab alia parte lux, aliaque via quam per majorem lentem, ad oculum accidat; circulus papyraceus lenti huic circumponitur, paulo majore quam dupla diametro ad eum
quo tota Luna tegeretur. Quod nisi fiat, dilutiores apparent
umbræ tractusque ii qui, cæteris obscuriores, in ejus globo
conspici solent. Atque ita jam telescopii nostri aërii ratio-
nem omnem & apparatus explicuimus, non sane operosum;
filoque illo, velut Ariadnæo, unde hætenus inventus non
erat, exitum reperimus.

[Cæ]

Cæterum quo clarius ea, quæ diximus, intelligantur, delineationem hic subijcimus, in qua

Malus est, a b.

TAB. XXXI

Afferculus in canali mobilis, c d.

Brachium ipsi ad angulos rectos infixum, e.

Baculus transversus in quem lens imponitur, f f.

Funis in se rediens, g g.

Plumbum funi innexum, h.

Orbiculus in summo malo, a.

Cylindrus cavus lentem primariam continens, i.

Bacillus cylindro affixus, k l.

Globulus æneus bacillo hærens & in subjecto cavo volubilis, m.

Plumbum filo æneo junctum, n.

Stylus brevis ac flexilis, extremo bacillo insertus, l.

Tubulus minorem seu ocularem lentem ferens, o.

Bacillus tubulo affixus, p.

Axiculus mobilis, q.

Capulus manu tenendus, r.

Glans plumbea, s.

Verticillus cui filum involvitur, t.

Pinnulae decussatim positæ, atque ita foramen efficientes quo filum trajicitur, u.

Filum tenue bombycinum, l u.

Fulcrum cui spectator innititur, x.

Laterna, y.

Triangula per malum disposita, quibus conscendi possit; omissa sunt, ne figuram obscuriorem redderent.


Superest ut nonnulla, quæ fortasse nondum expertis scrupulum injicere possent, paulo accuratius examinemus. Verebuntur primum ne, subsidente filo quod ad utramque lentem pertingit, flexus ejus, quanquam exiguus, in magnis tamen illis, pedum centum aut ducentorum, longitudinibus impediatur positum earum parallelum. Et profecto, si fune graviore opus foret, non parum noceret curvatura ejus, nullaquæ fere tendendi vehementia superari posset hoc incommodum. Nunc verò, suspensa librataque lente majori ut à no-

bis factum est; levissimi tantum fili bombycini tractu eam dirigimus; cujus pondus in pedes quinquaginta semidrachmam non superat; quodque idem appensas libras septem sustinet priusquam rumpatur. Quare flexus ejus neque in hac, neque in multo majori lentium distantia quidquam officit, etsi non nisi modica vi trahatur, duabus tribusve æquipollente libris; utique cum geometrica perfectio nequaquam hic requiratur, ut cuilibet experto notum.

Etenim certum est eadem ratione, qua funis fune levior est, vim tensionis diminui, qua utrumque ad rectam lineam æqualiter accedat. Ut proinde funiculus quinquaginta pedes longus, atque unciam pendens, vi librarum quadraginta octo opus habeat, ubi filum nostrum, longitudine pari, non nisi tribus libris indigebit. Atque hoc per se clarius est quam ut demonstratione comprobetur. Idem enim est prorsus cum sexdecim funiculi semidrachmales trahuntur singuli trium librarum pondere, atque cum uncialem funiculum simul componentes, is à conjunctis itidem sexdecies ternis libris contenditur.

Sed ulterius quoque hæc, quæ ad fili flexum attinent, geometriæ rationibus, experimentisque expendi possunt. Nempe contentum filum, flexu illo exiguo, parabolicam lineam tam prope exprimit, ut pro vera absque errore habeatur. Cujus parabolæ profunditatem, in longitudine pedum centum quinquaginta, invenimus pedis unius circiter quartam partem; cum filum horizonti parallelum tenderetur, nec nisi vi librarum duarum & semis. Sit fili parabola $a b c$, profunditas ejus $d b$, ducta nimirum recta $a d c$. Porro tangent parabolam rectæ $a e$, $c f$: quibus occurrant $c e$, $a f$, parallelæ $d b$. Intuenti igitur ex a puncto, secundum rectam $a e$, notatum fuit spatium $c e$ fieri pedis unius; unde fit $d b$ pedis quarta pars. Ipsi vero $c e$ æquale est $a f$. Itaque lentem in c positam ita trahit filum $c b a$, ut non ad oculum, qui est in a , sed ad f punctum directe opposita sit. Ut proinde pedis unius intervallo à vero loco oculus absit: quod in ista pedum 150 distantia nihil obesse potest. Fit enim angulus defle-

TAB. XXXI.
Fig. 1.



deflexionis $c a e$ vel $a c f$ tantum duarum quintarum unius gradus; adeo ut remedio, quod tamen dabimus, non sit opus. Sumpta autem $g b$ distantia prioris dupla, seu pedum trecentorum, ut filum incurvum sit $g b h$, erit cavitationis mensura $k b$, prioris $d b$ quadrupla quidem, sed angulus deflexionis tantummodo duplus, hoc est, $\frac{4}{7}$ unius gradus; ut facile perspicitur, ducta tangente $g l$, quæ cum perpendiculari $h l$ conveniat. Ipsa enim $h l$ quadrupla erit ad $k b$ five $c e$; distantia vero $g b$ ad $a c$ erat dupla. Quare angulus deflexionis $h g l$, antea inventi $c a e$, duplus censeri potest.

Hæc verò, scrupulorum 48, aberratio nullius adhuc momenti est, neque neglecta nocebit. Attamen, quo minus causandi locus hic supersit, ostendam jam quænam adhiberi possit correctio, atque ejusmodi quidem ut, una opera, omnem aliam lentis declinationem restituat.

Igitur semel ab initio, ad superiorem lentis magnæ præparationem, hoc quod dicemus, adjungatur. Nempe lente quemadmodum præcepimus librata, atque ad oculi altitudinem defixa, filum caudæ adnexum manu altera capiatur, eaque oculo admoveatur; altera lucernam juxta teneat. Tum paulatim recedendo, extentumque filum producendo, observetur an duplex flammæ imago circa mediam lentem appareat, ab utraque nimirum superficie ejus reflexa. Id si contingat ubi jam tota fili longitudo exierit, quanta nimirum futuro telescopio debetur, indicio est rectissime lentem ad oculum converti. Quod si altera tantum flammæ reflexio conspiciatur, male collocata erit, sin neutra, pejus. Hic vero jam remedium adhibebitur, ubi cognitum fuerit in quam partem lens declinet. Stylus enim æneus extremæ caudæ adjectus, filumque innexum habens, in partem eandem parumper flectendus est; ac rursus, ut ante, lucernæ reflexio tentanda; idque ita repetitis vicibus faciendum, quoad utraque flammulæ imago in unum convenire conspiciatur. Tensione autem fili utendum mediocri, qualem supra definivimus, duarum aut trium librarum vim referente, eique

quatenus licet adfuescendum. Hoc modo correctâ semel lentis positio ad omnes observationes valebit. Neque hic subtiliter nimium objiciat quisquam quod obliquo fili ascensu, cum ad astra dirigitur, paulo minor efficitur flexus ejus à gravitate ortus, quam cum filum idem horizonti parallelum extenditur. Est enim differentia hæc perexigua, præsertim in tanta fili levitate, & lentium parallelismus, ut jam diximus, ad geometriæ leges exactus non requiritur.

Multo magis ventus obesse dicendus foret, filum sinuans, atque in latus impellens, præsertim in magnis, quas diximus, longitudinibus; nisi quod tubis quoque idem ventus adversus est, qui concussu ejus tremunt ac vacillant, magno spectantis incommodo; ut propterea sæpe observationibus supersedendum fuerit. Sed quo æquiore animo hæc dispendia feramus, sciendum est, flantibus ventis, semper fere aëris pelluciditatem adeo turbari, etiamsi serenus videatur, ut hoc uno omnis telescopiorum prospectus impediatur; quod exercitatis ignotum esse nequit. Imo & tranquillo interdum ac prorsus sereno cœlo, scintillantibus cum maxime sideribus, frustra tamen telescopia adhibentur; humido vapore quodam aërem obsidente, quo fit ut ad Planetarum corpora respicienti, undatio quædam tremula & fluctuans omnem visus aciem intercipiat. Possetque, ubi hoc accidit, ipsa lentium bonitas suspecta esse, nisi alio tempore ac puriore cœlo fuisset cognita. Idem vapor, ut hoc quoque obiter admo-
neam, non raro, lenti majori adhærescens, radiorum lucis partem avertit: cui malo, calefacto modice ad ignem vitro, occurritur.

Videamus nunc & illud quod de illustranda lente eadem diximus ad malum subrepta. Quæ si valde procul distet, puta ad ducentorum & amplius pedum intervallum, vix videtur tantum luminis, ut ab observatore cerni possit, acceptura, etiamsi lucerna convexo vitreo juvetur, uti præcepimus. Sed hic intendere amplius lumen licebit, vel aucto lucernæ ipsius ellychnio, vel latiori lente adhibita leniusque convexa, quæ lucem transmissam, etiamsi pari quantitate acci-

accipiat, minus tamen diffundet, longiusque proinde ejaculabitur.

Quantum igitur ad hæc attinet, nihil admodum referre liquet quænam fuerit telescopii longitudo, sed æque facile qualiacunque in usum deduci. Aliquod tantum discrimen in varia mali altitudine positum esse. Cujus quidem parandæ plures modi suppetunt. Possumus enim, uno statuto malo, alium ejus opera duplo altiore juxta attollere, ac simul firmiorem reddere, transversis fibulis utrumque conferendo. Ac firmissima quidem fuerit compages hujusmodi, si duo mali humiliores, cum tertio duplæ altitudinis, binis ternisve pedibus inter se distent, in triangulum dispositi, atque uti diximus religati. Qua ratione facile ad centum pedum altitudinem perveniemus. Ad multo majores vero, vel validiori malorum ac trabium substructione utendo, vel ad turrim aut ædificii altioris angulum inferiora ligna applicando; ita ut nihil tamen obstet, quo minus, ab imo ad summum, lens primaria adducatur, per continuum canaliculum, uti diximus, ascendens. Sed & super turri aut domus culmine erigi malus potest, ut ibi adstet is cui funis cura demandata est, ad evehendam demittendamve lentem.

Nec vero præpropæra aut supervacua cura hæc à nobis agitari quis putet, quod verisimile non sit his altitudinibus opus fore. Ecce enim, dum hæc scribo, Cassini literis certior fio, lentes quatuor, quarum maxima telescopio pedum centum quadraginta destinata sit, à Josepho Campano, easque præstantissimas Romæ esse perfectas, & ad magnum Galliæ Regem missas. Etsi enim ad cœlestium observationem nondum fuere admotæ, non dubitandum tamen interdum institutum fuisse earum examen, in atriis porticibusve prælongis, unde lux exclusa esset. Nunc vero, hoc nostro invento, utilitas sua tum his lentibus, tum si quæ has longitudine excedentes prodeant, constabit.

Quod si cogitemus quibus modis telescopiorum efficaciam alii augere studuerint; quæ frustra illi quæsierunt, ea nos levi hac opera consecutos esse videri possit. Sive enim figu-

ris lentium hyperbolicis ellipticisve, ut Cartesius, five speculis cavis, ut Neutonus, five alia quavis ratione id aggressi sint, huc omnia redibant ut brevioribus telescopiis, ac minori molimine usurpandis, multum amplificarentur res visæ. Nam neque accurata illa ac scrupulosa superficierum formatio devitari poterat, neque etiam lentium speculorumve magnitudo. quoniam obscuritate nimia, quicquid machinati fuerimus, inutile reddi necesse est, nisi pro ratione percepti augmenti crescant aperturæ quibus primum lux subintrat. Nos vero longitudines quidem non imminuimus, sed ne obessent effecimus, quod fere eodem redit.

Si quis vero jam requirat quousque & quo operæ pretio extendi porro telescopia posse existimem, & num productis longe ultra modum eorum quæ paulo ante diximus, sperandum sit adhuc decuplo propius ad lunam cæteraque astra nos accessuros, quam quo triginta pedes habentibus processimus; quibus tanti itineris partes centum quadraginta novem, una duntaxat reliqua, confectæ sunt: respondebo me certos quidem arti terminos præfinire non posse; huc tamen, quo dixi, nec maximo hominum conatu perventum iri. multoque minus futurum, quod aliqui videntur non desperasse, ut lunam ac Planetas cæteros velut è propinquo inspiciamus, & utrum animalibus habitentur, an præter vastas solitudines nihil habeant, visu penetremus. Primum enim, in parandis lentibus, scio quantoperè crescat cum magnitudine formandi difficultas; ipsiusque inveniendi vitri quod vitis iis careat, quæ maxime huic operi infesta sunt. Quanto enim ulterius radii colligentur, tanto magis hæc vitia se prodant necesse est. Constat præterea, ut jam ista nihil obstant, non amplificari res visas, nisi pro ratione diametrorum aperturæ lentis exterioris. Quæ diametri nequaquam crescant cum telescopiorum longitudine; sed, quantum video, rationem longitudinum subduplam sequuntur. Adeo ut data apertura pollicum trium, in telescopio triginta pedes longo; quantam circiter experientia concedi finit; alia, ad trecentos pedes, non nisi novem unciarum & semis sit futura,

futura , ac propterea tantum triplo majora fere omnia sint apparitura , prægrandi hoc telescopio , quam illo pedum tricenum. At si decuplo excessu idem superandum sit , jam ter mille pedum longitudine opus erit , quo quidem nulla humana ope perveniri posse , vel solius altitudinis causa , manifestum est.

Sane majores multo forent , & majori proportionem crescerent , ex , quas diximus , aperturæ , si nihil aliud obstaret quam figuræ sphaericæ parum idonea , in colligendis radiis , curvatura. Nunc vero alia quædam , ex ipsa refractionis natura , oritur radiorum aberratio , quam ante annos aliquot Neutonus egregiis quibusdam experimentis & prismatum vitreorum coloribus comprobavit. Hæc vero & ipsa leges suas habet , quibus , si recte eas perspicio , subdupla illa , quam dixi , aperturarum ad longitudines ratio colligitur.

AUCTARIUM.

*V*Idebatur jam perfecta absolutaque omnibus numeris nova Astroscopia nostra ; typisque excusa , nondum tamen edita erat ; cum secundis cogitationibus , ut fit , alia quædam nobis in mentem venire , quibus ea melior commodiorque fieret. Quæ cum auctarii vice hic adponere visum sit , simul hoc monemus , ut , sicut posterius reperta fuere , ita ultimo loco , postquam reliqua descriptio ac delineatio percepta fuerit , legantur.

Cum primum spectatores invento nostro , ac Planetis nacti sumus , telescopicis observationibus minus assuetos , docuit experientia , eos quidem per se difficilius stellæ conspectum consequi ; sicut antehac quoque , ubi in grandiores tubos inciderant , eveniebat. Quod autem hic fieri solitum , ut , reperto prius sidere , ac manente tubo , tantummodo oculum ei spectator jussus admoveret , id non perinde nobis nunc imitari licebat ; cum lens oculo proxima , ubi defigeretur , non haberet. Itaque hic quoque ratio fuit excogitanda , qua positum suum servaret ocularis lens. Quod quidem præstitimus

mus machinæ exiguæ opera, quæ fulcro bipedi, in descriptione designato affigitur; ut in figura adjecta videre est.

TAB. XXXI.
Fig. 2.

Transversarii namque in summo fulcro pars est *a a*. Rhombus plicatilis ex ære *b b*, binis lateribus ad duplam longitudinem productis. Longitudo laterum pollices $5\frac{1}{2}$, latitudo paulo major pollice dimidio; crassitudo parte ejus decima. Hunc rhombum transversarii medio applicitum tenet cochlea ferrea *f*, supposita æris vel ferri particulâ *g*, ac præterea orbiculo ex ære tenui, leniter convexo, cujus pressu lentus æquabilisque efficitur motus rhombi ac diductio. Porro ex angulo ejus superiore, axis seu columella prominet *c*, perpendiculariter insistent, longitudine sesqui pollicis. Cujus capite altero lamella mobilis adhæret, 4. pollices longa, dimidium lata; quæ hic conspici nequit, quippe tecta capulo ligneo *d*, paris longitudinis, cui conferta est. Huic demum capulo, plano ac parte anteriori leviter inciso, inseritur lamella altera ænea *e*, quæ super axiculo mobili bacillum sustinet, cum affixa oculari lente, tubulo suo inclusa. Ut autem rhombus cum imposito onere æqualiter libretur super axe *f*, adjiciuntur in productis lateribus extremis pondera paria *h h*, quantis ad hoc opus est.

Quibus ita se habentibus, quocumque perducta fuerit observantis manu lens ocularis, capulo *d* semper deorsum converso, ibi sponte sua consistit; atque ita, invento sidere, facile imperitior spectator in prioris locum succedit, eodemque fruitur spectaculo. Facit enim funiculus utramque lentem conjungens, ut positum suum fulcrum servet, spectatorem versus reclinans, etsi duobus tantum pedibus insistat; simulque fulcri pondere, eorumque quæ ipsi imposita docuimus, idem funiculus intenditur; adeo ut nihil aptius commodiusve hac in re optari queat.

Altitudo fulcri est pedum 4. poll. 9. Gravitas ejus librarum $2\frac{1}{4}$. Lentis ocularis, cum tubulo & bacillo, gravitas libra dimidia. Rhombi cum ponderibus *h h*, libræ $2\frac{1}{4}$. Quæ propterea adscribo, ut constructionem nostram, experientia comprobata, eo facilius cuivis imitari liceat.

Nunc

Nunc vero aliud præterea addemus, quo perfectior evadat hæc nostra observandi ratio. quod licet, omissum, nihil plerumque noceret, curioso tamen syderum inspectori nequaquam est negligendum. Nempe cum Saturni comites illos Cassinianos diligentius requirerem, eosque difficulter adsequerem, præsertim noctibus non admodum obscuris, intellexi in causa esse lucem tenuem quandam, ab aëre ad oculum manantem; non eam quæ per lentem majorem advenit, sed quæ extrinsecus circum latera præterlabitur. Huic importunæ luculæ excludendæ, nonnihil quidem conducere sciebam, si circulum illum papyraceum, quo in luna observanda utebar, etiam hic lenti majori circumponerem. Sed aliud efficacius remedium, circa hæc occupato incidit, priori illi jungendum; ut nempe, perforatæ laminæ oppositu, oculi pupilla arctaretur, quæ alioqui per tenebras late patere solet. Cujus simul ac experimentum feci, jam clare tres Saturni Lunulas conspexi; cum amoto exiguo foramine media illa nostra tantum cerneretur. Quia vero, ita reductâ pupillâ, minus facile propositum sydus investigatur, quam cum tota patet, idcirco orbiculum illum perforatum, ac semipollicem latum, brachiolo quodam mobili, ac Græco Λ hærentem simili, cui in figura hac adscriptum est k , ita conjunximus tubuli fundo per quem lens ocularis inspicitur, quique latiori foramine pervius est, ut non ante quam hoc foramine sydus inventum fuerit, superinducatur alterum illud angustius.

Credidisset fortasse aliquis hac oculi contractione non parum visum obscurari. cum tamen certum sit, si diameter exigui foraminis, ad diametrum aperturæ lentis majoris eam rationem habeat, quam habent inter se focorum utriusque distantia, nihilo obscurius telescopio ejusmodi omnia cerni, quam si apertus ac liber oculus relinquatur. Sed præstat duplicare tantillam hanc latitudinem, vel paulo etiam augere amplius, quo minus difficilis sit rei videndæ inquisitio, nec nimium cito inventa stella elabatur, ob mundi conversionem diurnam. Nobis in telescopio 34 pedes longo, foraminuli dia-


meter decimam sextam circiter pollicis partem habet. Ipsum vero duos pollices cum dimidio ab oculari lente abest, quanta est præcise in hac lente foci distantia. Quod diligenter curandum, quia alias non poterit amplum spatium, ut solet, uno obtutu comprehendi. Facile autem deltoidis brachii flexu, qui quidem in schemate nostro conspici nequit, quantum opus est, lamella perforata removetur, quæ nobis semipollice à tubuli fundo extat.

Porro circulus lenti magnæ circumdatus, telescopii partem longitudinis quadragesimam quintam circiter diametro æquet. Cujus circuli objectu quia paulo impeditiorem reddi necesse erat astri investigationem, visum fuit imponere bacillo, seu caudæ lentis ocularis, stylum *m*, perpendiculariter erectum; cujus apex tantundem supra axem lentium attollitur quantus est circuli illius semidiameter. Hinc enim fit, ut si oculum prius ibi collocemus, unde cum summo margine circuli in eandem rectam lineam stella conveniat; tumque, apprehenso capulo *d*, moveamus lentem ocularem cum adjuncto bacillo, donec in eandem quoque rectam quadret extremum styli *m*; fit inquam ut, ad tubulum ocularem visum referenti, stella eadem per telescopium sese conspiciendam det, vel certe parum absit. Usu vero & exercitatione tum hæc, tum cætera quæ ad hanc observandi rationem pertinent, facilia sunt.


IV.

*Excerpta ex literis Dⁿⁱ Hugonii de novâ
methodo construendi Barometrum.*

Quod novam meam methodum Barometri spectat, nosti, diversas aëris atmosphæræ pressiones multo magis fore visibiles, & faciliores distinctu, si in tubo 30 pedes alto fiat barometrum ope aquæ quam sunt in barometris vulgaribus, quæ cum Hydrargyro construuntur. Cum enim maxima diversitas sit circiter duorum pollicum in barometris vulgari-



79- 25-
1782-1786



garibus, in novo hoc barometro erit viginti octo pollicum id est decies & quater major erit, aliæque variationes augebuntur eadem ratione, quæ ipsa datur inter Mercurii & aquæ gravitates específicas.

Sed uti difficile est bene disponere hæc barometra ob magnam tubi altitudinem, quæ impedit etiam, quo minus commodè locari possint, aut de loco in locum transferri. Cogitavi, quo pacto construi posset barometrum mediocris magnitudinis & portatile, cujus effectus quam proxime idem esset ac aliorum illorum magnorum barometrorum, & duas diversas constructiones inveni.

Prima est, ut fiat tubus vitreus A B quatuor pedum cum semisse, qui clausus sit in extremitate A, & cujus cavitas sit circiter duarum linearum; requiritur ut latior sit in loco medio, ubi detur quasi pyxis cylindrica C D, cujus altitudo sit circiter unius pollicis, & Diameter E E 14 vel 15 linearum, id est septies vel octies major diametro tubi; infunditur in apertam extremitatem tantum aquæ, quantum requiritur ad replendum dimidium receptaculi C D cum partis superioris tubi dimidio C F; Porro repletur quidquid superest Mercurio; qui etiam infunditur in vas G ad altitudinem semipollicis, deinde immergitur in hunc extremitas tubi B; tum pro parte exit Mercurius, & qui super est manet ad altitudinem E E; aqua, quæ supernatat, descendit usque in F, relinquens reliquum tubi F A aëre vacuum, & superficies aquæ, adscendendo & descendendo denotat diversum atmosphææ pondus, gradibus fere æqualibus iis quibus aqua illud denotat in barometro 32 pedum.

TAB. XXXII,
Fig. 1.

Altera constructio partim similis est priori, sed multo melior est; detur tubus in medio incurvatus H M N, duæ in hoc tubo requiruntur pixides cylindricæ æquales K & M, quarum una, sc. K, quæ est ad tubi extremitatem, hermetice sit clausa superius, & M, quæ est paululum supra curvaturam, sit utrinque aperta in locis in quibus cum tubo jungitur; longitudo crurum determinata est per distantiam pyxi-

TAB. XXXII,
Fig. 2.

M m 2

dum

dum K, M, quæ sit circiter $27\frac{1}{2}$ pollicum *, mensurando distantiam inter harum media. Altitudo cujusvis pyxidis est præterpropter unius pollicis cum semisse; diameter interior unius pollicis vel $1\frac{1}{5}$ linearum; diameter cavitatis reliqui tubi $\frac{1}{10}$ vel $\frac{1}{12}$ ejusdem magnitudinis. Primo infunditur solus Mercurius in tubum per aperturam N, ut fiat barometrum vulgare ex iis, quæ inferius recurvata sunt. Infundendum vel tollendum est Hydrargyrum donec superficies dentur circiter in medio pyxidum K & M, si tempore quo fit hæc operatio aer mediæ sit gravitatis, id est in barometris vulgaribus. Mercurius sit ad altitudinem $27\frac{1}{2}$ pollicum; alioquin enim si pressio aeris sit major vel minor ordinariâ, ad hoc attendendum, computando pro uno pollice variationis, in vulgari barometro, lineam unam cum semisse variationis in quavis pyxide: Postquam Mercurius bene aëre depurgatus erit, ita ut nullus detur in pyxide K infundetur per aperturam N quidam liquor, qui hieme non congelatur, & qui nequit dissolvere Mercurium; E. G. aqua communis mixta cum $\frac{1}{4}$ aquæ fortis: spiritus vini quidem possidet has duas qualitates, sed non conveniret barometro, quia per calorem dilatatur. Hoc etiam referri debet ad primam formam Barometri.

Quod attinet ad liquoris quantitatem, debet illa adscendere ad pedem unum circiter in tubum B C positâ mediâ aeris pressione.

Disposito ita hoc Barometro videbimus, maximam differentiam pressionis aeris, quæ notabitur per superficiem liquoris in tubo M N, fore propemodum 22 pollicum, si diametri pyxidum cylindricarum, sint decies majores diametro tubi. Et ut inveniamus quantum differentiæ quas indicatæ barometrum hoc nostrum excedant illas, quas potest indicare barometrum vulgare, generalis est regula, differentias nostri novi Barometri esse ad differentias Barometri vulgaris, ut decies & quater quadratum diametri pyxidum ad idem quadratum plus vicies octies quadratum diametri tubi, qui aquam continet; & hinc sequitur, cujuscunque magnitudinis sint pyxides, maximas differentias non posse excedere 28 pollices, quandoquidem differentiæ Barometrorum ordinariorum non excedunt duos pollices.

Ut

* Pollices bi sunt partes duodecima pedis Regii Gallici.

Ut transferatur commodè hoc Barometrum, afferi adjungendum est: vel Thecâ includendum; & notari debent insigno divisiones æquales ad indicandas altitudinum differentias, quæ augebuntur eadem ratione, in quâ minuetur atmosphæaræ pondus.

Sic parvæ mutationes, in pondere atmosphæaræ, & quæ non percipiuntur in Barometris ordinariis, in his sensibiles fiunt.

Exempli gratiâ si ferantur in Turrim *de Nostre Dame* vel *Montmartre* videbimus superficiem aquæ descendere in primo Barometro quosdam pollices, & tantum in altero adscendere; si ferantur in domum elevatam tantum 50 pedes, & porro inde descendamus, habebimus notabilem mutationem $\frac{1}{2}$ propemodum pollicis, ita ut possimus ope hujus instrumenti satis bene mensurare diversam altitudinem montium a se invicem distitorum, & regionum, quarum situs non finit, ut has metiamur aliter. Si mutationes temporum ope Barometrorum, prævideri possint uti sperandum videtur, certum est, quod illa, quæ hoc modo constructa sunt, magnam utilitatem habebunt præ aliis, quæ adhibita sunt huc usque.

Verum est quod quædam novorum horum Barometrorum sensibilibus quodammodo mutantur ex calore vel frigore aëris exterioris, quamcunque etiam adhibeamus operam ad illam interiorem aërem purgandam; sed Barometra ordinaria sunt etiam eidem varietati obnoxia, & si in nostris magis conspicua sit, hoc inde venit, quod multo majores differentias indicent, quam Barometra vulgaria: sed ut occurramus huic malo, quod plane nobis impedimento esset, si vellemus metiri altitudines, possumus Thermoscopium includere in parte Barometri aëre vacuâ, & efficere calefaciendo aërem, qui utrumque cingit, ut Thermometrum redeat ad eandem notam in utraque operatione; & hac viâ certi erimus, quod aër externus nullam inducat mutationem Barometro, & quod omnis varietas, quæ ibi apparebit, oriatur ex diversâ atmosphæaræ gravitate.

Dixi posteriorem constructionem alterâ meliorem esse, non

solum, quia ultimum Barometrum multo minoris voluminis est, sed &, quia observavi, quod in priori parum aëris, quem aqua exhalat in vacuo, pedetentim augeatur temporis diuturnitate; cui vitio certum est Barometrum 32 pedum, de quo supra dixi, pariter obnoxium esse; Et, ut huic malo occurratur, quærendus est liquor, qui non producit aërem, ut faciunt aqua & spiritus vini. Sed patet, quod posterius nostrum Barometrum hoc vitio non laboret, quoniam aqua in vacuo non est inclusa: Quod si percipiamus aquam, quæ est in posteriore Barometro, vapores emittere, tantum superius infundenda est gutta olei, quod frigore non inspissatur, quodque calore non emittit vapores, ut oleum amygdali dulcis.

V.

*Nova vis movens mediante pulvere nitrato
& aëre.*

Desideratum a longo tempore est artificium quo vis pulveris pyrii aliis, quam quibus huc usque inservit, usibus applicari posset, in quibus omnibus vis admodum subita requiritur, qualem observamus in explosione bombardæ & sclopeti & disruptione cuniculorum: si impetus ille promptus posset moderari & reduci ad vim magis placidam, maximam in mechanicis utilitatem haberet, & in multis occasionibus, in quibus vim hominum, equorum, venti, aliarumque potentiarum adhibemus, inserviret. Ad hunc effectum excogitavi machinam, hic delineatam. Hanc non propono, acsi in omnibus partibus perfecta foret, sed tanquam inventum, quod cum pro parte successit, poterit ad majorem proferri perfectionem.

TAB. XXXII.
Fig. 3.

A A cylindrus cavus est, intus bene politus, & ubique æqualis magnitudinis; B est embolus in superiori parte Cylindri, & qui in hoc potest moveri; in C C cylindrus est perforatus duobus foraminibus, quorum diametri circiter sunt $\frac{1}{4}$ diametri cylindri; tubi D, D, corii madidi & mollis, firmiter

miter alligati sunt duobus cylindris minoribus, qui cum majori cohærent, & circumdant foramina; tubus unus exhibetur pendens, alter extensus. In fundo cylindri cum hoc conjungitur ope cochleæ interposito annulo coriaceo pyxis H; ita ut exacte claudat apperturam cylindri; E E sunt retinacula, quæ cylindrum in inferiori parte conjungunt cum theca, qua includitur, sed quæ hic non est exhibita, ne turbetur figura: E F est funis annexus embolo B, circumponitur trochlea G, & inservit ad movendum id, quod ei applicatur.

Obiecto parvâ aquæ quantitate embolo, qui superius firmiter debet consistere, ne possit exire ex cylindro, immittitur in cistam H parum pulveris tormentarii cum parva quantitate igniarii Germanici accensi, & clauditur bene cista mediante sua cochleâ.

Pulvis ille paulo post accensus implet cylindrum flammâ, & fugat aërem per tubos coriaceos C D, C D, qui extenduntur, quique statim clauduntur iterum ab aëre exteriori; ita ut cylindrus maneat aëre vacuus, saltem maximâ parte; porro embolus B est adactus per pressionem aëris, qui supra gravitat ad descendendum, & sic trahit funem F F pariter illud quod ei appenditur.

Quantitas ejus pressionis cognita est, & determinata, per gravitatem aëris, & per magnitudinem diametri emboli, qui, si sit unius pedis, ita premitur, ut sustineat pondus 1800, circiter librarum; posito, quod cylindrus totus fiat aëre vacuus, quod huc usque efficere non potui; etiam experimenta eo respectu in magnis & parvis cylindris non eodem modo processere.

Cylindrus diametri $2\frac{1}{2}$ pollicum, & 20 poll. longus, pondere 6 granorum pulveris aëre, evacuatus fuit $\frac{1}{2}$ partibus; in cylindro ejusdem latitudinis, sed longitudinis 44 poll., requiruntur 36 grana pulveris ut ejiciantur $\frac{1}{2}$ aëris; Et in cylindro diametri unius pedis, & $3\frac{1}{2}$ altitudinis, $1\frac{1}{2}$ drachma pulveris ad fugandum $\frac{1}{2}$ aëris; & duplicata pulveris quantitate vix magis evacuatus fuit cylindrus.

Aër.

Aër vero ille qui superest in cylindro, impedit magnam partem effectus, quem exereret machina, si omnis aër prorsus exhauriretur; ut satis videre est, & simul determinari computatione potest. Ideo deberet examinari, quæ ratio inter altitudinem & diametrum cylindri sit optima in hac machina ad hanc maxime evacuandam adhibitâ minima quantum posset pulveris quantitate, nam licet totus cylindrus non evacuetur, vis hujus pressioni nihilominus magnum ederet effectum.

Poterit hæc inservire non tantum elevationi magnorum ponderum quorumcunque & aquarum. Sed etiam ad propicienda globos & sagittas magna vi, juxta methodum balistarum veterum.

Ulterius, cum propter cylindri convexitatem, non sit necesse, ut sit valde solidus ad resistendum pressioni aëris externi, certum est totam machinam exigui ponderis esse posse, quæ levitas conjuncta cum magna vi, quam habet, poterit forte usui esse ad effectus edendos quos huc usque impossibiles duximus.

VI.

Demonstratio Æquilibrii bilancis.

TAB. XXXII.
Fig. 4.

In demonstratione, quam Archimedes dedit de propositione fundamentali Mechanices, tacite ponit quid, de quo jure aliquo possumus dubitare; est autem hoc, si plura pondera æqualia annexa sint libræ ad distantias æquales a se invicem; siue omnia sint ad eandem partem puncti suspensionis, siue quædam transferantur ad patrem oppositam, ut in hac figura, ubi punctum suspensionis est A, pondera habere eandem vim ad deflectendam libram quam si forent omnia suspensa in puncto, ubi est commune eorum centrum gravitatis, ut hic est punctum B. adeo ut si separatim suspensa in æquilibrio forent cum contrario pondere C, hoc etiam obtineret suspensis omnibus ponderibus in puncto B, vel eorum loco pondus D, quod æquat omnium gravitatem.

Qui-

Quidam Geometræ parumper mutando hanc demonstrationem tentarunt defectum minus sensibilem reddere, sed in totum fuisse sublatum mihi non videtur. Igitur conatus sum alio modo eandem propositionem demonstrare uti sequitur.

1°. Postulatur cum Archimede, duo pondera æqualia appensa extremitatibus brachiorum æqualium libræ fore in æquilibrio.

2°. Positis ponderibus æqualibus, & brachiis libræ, cui appensa sunt, inæqualibus, illam inclinari ad latus brachii longioris.

3°. Postulatur posse concipi, lineas & plana, de quibus loquimur in hac demonstratione, inflexilia & sine gravitate esse.

PROP. I. *Si super planum Horizontale quod imponitur lineæ rectæ, quæ id dividit in duas partes, applicetur pondus, vis, quam illud pondus habebit ad deflectendum planum partem versus ad quam applicatur erit major, quam si positum sit prope dictam lineam.*

Sit planum Horizontale A B impositum lineæ rectæ TAB. XXXII. Fig. 5. C D, & cui applicetur pondus E, cujus distantia a C D lineam perpendiculari E H mensuratur; & cui porro applicetur idem pondus in F, ita ut distantia F H minor sit quam E H, dico, quod habebit plus virium ad planum deflectendum, si sit applicatum in E quam in F.

Nam producta recta E F H in G & positis H G & H F æqualibus, certum est, pondus æquale illi, de quo locuti sumus, applicatum in G in æquilibrio futurum cum altero in F, propter æqualia brachia F H, H G.

Sed pondus translatum ex F in E deflectet planum, quoniam plano existente sine gravitate effectus idem est ac in balance brachiorum inæqualium quæ æqualibus ponderibus gravantur, idem ergo pondus positum in E plus virium habet ad planum deflectendum quam si est in F; Q. E. D.

PROP. II. *Si planum Horizontale, oneratum plurimis ponderibus, maneat in æquilibrio, impositum lineæ rectæ, quæ*
Tom. II. N n id

id secat in duas partes, centrum gravitatis plani sic onerati erit in ipsa lineâ rectâ.

TAB. XXXII.
Fig. 6.

Sit planum Horizontale A B oneratum ponderibus C C, D D & quod manet in æquilibrio, impositum rectæ E F; dico centrum ejus gravitatis esse in illa linea E F; nam posito, si fieri potest, centrum gravitatis esse alibi in puncto G, ducatur per id punctum recta H K parallela ipsi E F.

Tunc ergo, quia planum fultum in puncto G, manet in suo situ Horizontali, debent, ducta linea recta quacunque in plano per punctum G, pondera ad utramque partem lineæ esse in æquilibrio.

Idcirco pondera C C facient æquilibrio cum ponderibus D D, quando planum fulcitur a recta H K: id quod fieri nequit, quoniam manet in æquilibrio fultum a recta E F; nam patet, omnes distantias ponderum ad unam partem esse diminutas, scilicet ponderum C C, & consequenter etiam effectus gravitatis eorum; & distantias ponderum oppositorum D D esse auctas, & eodem tempore effectum eorum gravitatis, adeo ut ultima pondera deflexura sint planum ad suam partem, & multo magis si unum vel plura pondera C C sint ad alteram partem lineæ H K; Centrum ergo gravitatis plani onerati erit in linea E F. Q. E. D.

PROP. III. *Duo gravia commensurabilia appensa ad extremitates brachiorum Libræ erunt in æquilibrio, si brachia sint in ratione reciproca gravium.*

TAB. XXXII.
Fig. 7.

Sint gravia commensurabilia A & B, quorum A sit majus; & libra C D E, cujus brachium D E sit ad D C, ut grave A ad grave B; dico, libram esse in æquilibrio appensa A ad extremum C, & B ad extremum E, si C E sustineatur in D.

Concipiatur planum parallelum ad horizontem transiens per lineam C E, in eo plano sint ductæ per puncta E & C rectæ L E G, K C M perpendiculares ad C E; fiat ulterius E F æquale C D, & ducantur G F K, M D L quæ cum C E angulos semirectos efficiunt & sese mutuò ad angulos rectos secant in N; illæ lineæ necessario occurrunt duabus prioribus, quas duximus per E & C; ponamus pun-

cta

Ita occurfus esse G , K & M, L ; manifestum est, EG æquale esse EF , & CK, CF ; uti etiam GK, ML , se mutuo secare in medio in puncto N ; & triangula GNL, KNM esse similia & æqualia: sumatur EH æquale EG , & CO æquale CK ; tum, quia ED est ad DC ut pondus A ad B , patet quod lineæ ED & DC , sint commensurabiles, ut & HG & KO , cum inter se sint ut EF ad FC , id est ut CD ad DE . Sint ergo KO & HG divisæ in partes æquales per maximam earum communem mensuram, & quantitates A & B pariter divisæ; idcirco habebuntur tot partes ponderis A , quot habentur partes in linea KO , & tot partes ponderis B , quot habentur partes in linea HG , quæ partes ponderum, æquales inter se, sint singulæ appensæ in medio unius ex partibus linearum KO, HG .

Jam demonstrabimus, quod gravibus ita dispositis, planum maneat in æquilibrio, quando fulcitur a puncto D , unde veritas propositionis erit manifesta; quoniam concipere possumus omnes partes plani esse sublatas & solas lineas KO, HG , oneratas ponderibus æqualibus ipsis A & B , sustineri in extremitatibus libræ C & E , nam cum planum sit sine gravitate, partes sublatae non possunt mutare æquilibrio.

Ad demonstrandum igitur, æquilibrio plani, ut dictum est gravati, dari in puncto D , sint ductæ ex quovis pondere perpendiculares ad lineam LM , quantum necesse est, productam, uti $RS, ZI; TV, XY$. Perpendiculares TV & RS , quæ ducuntur a ponderibus maxime vicinis punctis G & K erunt inter se æquales; nam triangula GNL, KNM sunt æqualia & similia, uti dictum est, & latera GL & KM sunt etiam æqualia inter se, ut & intervalla GT & KR , quæ singula æqualia sunt dimidio unius ex partibus æqualibus in quas divisæ sunt lineæ HG, KO ; unde patet lineas TV, RS , etiam fore æquales, uti dictum est; Tunc si fulciatur planum in linea LMQ , pondus T in æquilibrio erit cum pondere R .

Pariter, ob æqualitatem perpendicularium XY & ZI , pondus X erit in æquilibrio cum pondere Z , & sic con-

sequenter omnia pondera lineæ GH cum tot ponderibus sumtis post K in linea KO ; id est, si sumatur pars KP æqualis lineæ GH , pondera appensa inter K & P , æquiponderabunt cum omnibus ponderibus lineæ GH .

Si ergo pondera reliqua in linea PO etiã faciant æquilibrium unum cum altero in plano fulto a linea LMQ , sequetur planum oneratum omnibus ponderibus mansurum in æquilibrio super eandam illam lineam.

Æquilibrium autem ponderum reliquorum ita invenitur: cum sit $KO = 2CF$; & $KP = HG$, id est $2CD$, erit $PO = 2DF$; sed $MO = DF$; quoniam $CM = CD$; ergo MP est dimidium PO ; Adeo ut lineã PO , quæ continet numerum partium, quibus KO superat HG , in 2 partes æquales dividatur per rectam LMQ , manifestum ergo est æqualem numerum ponderum illorum quæ continet illa linea PO dari ad partem utramque puncti M , & similiter disponi; ideo si numerus, illorum ponderum sit impar, illud quod in medio est, erit in puncto M , unde sequitur, singulas perpendiculares quas duximus ab iisdem ponderibus ad lineam LMQ æquales esse sibi respondentibus, & consequenter pondera esse in æquilibrio, quando planum fulcitur a linea LMQ ; quod cum ita sit demonstratum de aliis ponderibus linearum PK & HG , sequitur planum cum omnibus ponderibus mansurum in æquilibrio fultum a linea LMQ ; Centrum ergo gravitatis plani sic onerati est in illa linea; sed centrum gravitatis etiã est in linea CE , quoniam evidens est planum etiã futurum in æquilibrio si in hac linea sustineatur, Erit ergo centrum gravitatis punctum commune illis duabus lineis LMQ & CE , scilicet punctum D in quo si planum sustineatur manet in æquilibrio. patet ergo, veritas Theorematis.



Fig. 1.

Fig. 2.





Fig. 4.




Fig. 5.




Fig. 6.




Fig. 3.





Fig. 7.



V I I.

De potentiis fila funesve trahentibus.

PROP. I. Si punctum *A* trabatur a filis duobus *AB*, *AC* TAB. XXXIII. Fig. 1. angulum *BAC* facientibus, sintque potentie trahentes ut filorum ipsorum *AB*, *AC*, longitudines multiplices secundum numeros datos *N* & *O*; juncta vero *BC* dividatur in *E*, ut sit reciproce *CE* ad *EB* sicut numerus *N* ad *O*, & jungatur *AE*: dico filis *AB*, *AC* ita trahentibus, equipollere filum *AE* tractuum à potentia quæ sit ut longitudo *AE* multiplex secundum numerum æqualem utrisque *N* & *O*.

Producantur enim *AB*, *AC* ad *F* & *G*, ut sit *AF* multiplex *AB* secundum numerum *N*, & *AG* multiplex *AC* secundum numerum *O*; junctæque *FG* occurrat *AE* producta in *H*, & sint *BK*, *CL* parallelæ *AH*.

Quia ergo *FH* ad *HK* ut *FA* ad *AB*, hoc est, ut numerus *N* ad unitatem; *HK* vero ad *HL* ut *BE* ad *EC*, hoc est, ut numerus *O* ad numerum *N*: erit, in proportionem turbata *FH* ad *HL*, ut numerus *O* ad unitatem, hoc est ut *GA* ad *AC*, sive ut *GH* ad *HL*. Itaque *FH* ad *HL* ut *GH* ad *HL*, ac proinde *FH* æqualis *HG*.

Sit jam *AH* continuata usque in *P*, ut sint æquales *AH*, *HP*, & jungantur *GP*, *FP*: eritque *FAGP* parallelogrammum, ad cujus diametrum *PA* ducantur *FQ*, *GR*, parallelæ *BC*. Manifestum igitur est fieri triangula similia & æqualia *FPQ*, *GAR*, quorum latera inter se æqualia *PQ*, *RA*. Est autem *AE* ad *AR* ut *AC* ad *AG*, hoc est, ut unitas ad numerum *O*. Eadem verò *AE* ad *AQ* ut *AB* ad *AF*, hoc est, ut unitas ad numerum *N*. Ergo erit *AE* ad utramque simul *AQ*, *AR*, sive *AQ*, *QP*; hoc est, ad *AP*, ut unitas ad utrumque simul numerum *N* & *O*.

Cum ergo potentie fila *AB*, *AC* trahentes, sint ut *AF*, *AG*, quibus æquipollet attractio per filum *AE* à potentia quæ sit ut *AP*, ex theoremate Mechanico satis noto, manifesta est propositi veritas.

PROP. II. *Datis positione quotlibet punctis ; sive in eodem plano fuerint , sive non : si à puncto quod eorum commune est gravitatis centrum , ad unum quodque datorum fila extendantur , eaque singula trahantur à potentiis quæ sint inter se ut filorum longitudines , fiet æquilibrium manente nodo communi in dicto gravitatis centro.*

TAB. XXXIII.
Fig. 2.

Sint data puncta A, B, C, D, E, quæ vel in eodem plano vel aliter utcumque collocata intelligantur : attributâ autem singulis æquali gravitate , constat commune eorum gravitatis centrum inveniri hoc modo.

Jungantur nempe duo quælibet datorum punctorum rectâ A B, quâ bifariam sectâ in F, erit hoc centrum gravitatis punctorum A, B. Ducatur deinde ad punctum aliud C rectâ F C quæ secetur in G, ut sit C G dupla G F; & erit G centrum gravitatis punctorum trium A, B, C. Rursus ducatur ad aliud punctum rectâ G D, seceturque in H, ut sit D H tripla H G, & fiet H centrum gravitatis punctorum quatuor A, B, C, D.

Similiterque ductâ H E ad punctum quintum E, sectâque in K, ut K E sit quadrupla K H, erit K centrum gravitatis punctorum quinque A, B, C, D, E. Ac simili ratione quocumque punctorum centrum gravitatis invenire licebit.

Porro extentis filis à puncto K ad A, B, C, D, E, quæ trahantur singula à potentiis quæ sint inter se ut ipsæ longitudines K A, K B, K C, K D, K E: dico fieri æquilibrium manente nodo communi in K. Ducantur enim à centrâ gravitatis inventis F, G, H, ad centrum gravitatis omnium punctorum K, rectæ F K, G K, H K. Itaque constat filis A K, B K, punctum K trahentibus cum potentiis quæ sint ut longitudines eorum filorum, æquipollere filum F K, tractum à potentia quæ sit ut dupla longitudo F K. Rursus verò duobus his, filo F K trahenti cum potentia quæ sit ut dupla F K, & filo C K trahenti cum potentia quæ sit ut simplex longitudo C K, æquipollet filum G K tractum à potentia quæ sit ut tripla K G per præcedentem : ergo filum G K ita tractum æquipollet filis tribus K A, K B, K C,

K C. Similiter verò duobus his, filo $G K$ tracto à potentia quæ sit ut tripla $G K$, & filo $D K$ tracto à potentia quæ sit ut simplex longitudo $D K$, æquipollet filum $H K$ tractum à potentia quæ sit ut quadrupla $H K$. Ergo hoc æquipollet filis omnibus $K A$, $K B$, $K C$, $K D$, punctum K uti dictum est trahentibus. Atqui filo $K H$ in directum opponitur filum $K E$ tractum à potentia quæ est ut longitudo $K E$, id est ut quadrupla $K H$. Ergo cum filis $K E$, $K H$, in partes directè oppositas trahentibus cum potentiis æqualibus, punctum K necessario in locum suum servatum sit, sequitur & filis $K A$, $K B$, $K C$, $K D$, uti dictum est trahentibus & ex alia parte filo $K E$ nodum restare immotum. Quod erat demonstrandum.

Possunt autem & binorum quorumque punctorum centra gravitatis primò designari, & per hæc deinceps centra gravitatis quaternorum, & per hæc octonorum & sic porro; qua ratione simplicior plerumque efficitur demonstratio, ac præsertim si datorum punctorum numerus fuerit pariter par.

Ut si quatuor data fuerint A , B , C , D ; sive in eodem TAB. XXXIII.
Fig. 3. plano, sive non: junctis $A B$, $C D$, divisisque bifariam in E & F ; ductâque inde $F E$, quæ rursus bifariam secetur in G ; constat G esse centrum gravitatis punctorum A , B , C , D . Quod si jam nodus G trahatur filis $G A$, $G B$, $G C$, $G D$, à potentiis quæ sint inter se ut hæ ipsæ filorum longitudo; dico fieri æquilibrium.

Constat enim filis $G A$, $G B$, æquipollere filum $G E$ tractum à potentia quæ sit ut dupla $G E$; filis verò $G C$, $G D$, æquipollere filum $G F$ tractum à potentia quæ sit ut dupla $G F$. Cum ergo $G E$, $G F$ æquales sint, unamque lineam rectam efficiant, eodem modo nodus G trahitur, ac si traheretur à potentiis æqualibus per fila $G E$, $G F$. Unde immotum manere necesse est.

Constat verò si puncta A , B , C , D non sint in eodem plano, fore G centrum gravitatis pyramidis cujus anguli hæc ipsa quatuor puncta; cum in omni pyramide idem sit centrum

trum gravitatis ipsius solidi & quatuor punctorum angularium, uti ostendere facillimum est. Et hinc patet veritas theorematum Robervalliani, *Si à centro gravitatis pyramidis fila tendantur ad quatuor angulos, quæ trahantur à potentiis quæ sint inter se ut filorum ipsorum longitudines, fieri æquilibrium manente nodo in dicto gravitatis centro.*

V I I I.

Solutio problematis a G. G. Leibnitio propositi in diario (cui titulus Nouvelles de la Republique des Lettres) mensis Sept. 1687.

P R O B L E M A.

Detegere lineam juxta quam si corpus descendat temporibus æqualibus æqualiter tellurem versus accedat.

S O L U T I O.

Impossibile est problema si requiratur ut corpus motum in tali linea inchoet a quiete.

TAB. XXXIII.
Fig. 4.

Sed si ponamus corpus quandam, quantum vis exiguam, velocitatem habere ex. gr. quam acquirit cadendo ab altitudine $A B$, quæsito satisfacit curva $B C$, cujus hæc est proprietas ut cubus altitudinis $B D$ æqualis sit quadrato perpendicularis $C D$ ad $A B$ continuatam ducto in $\frac{2}{3} A B$.

Præter curvam hanc $B C$, in numeræ aliæ dantur ejusdem generis, & quæ facile deteguntur, in quibus corpus etiam, temporibus æqualibus, æqualiter, sed lentius quam per $B C$, ad Tellurem accedit.

Si $B D$ sit dupla ipsius $B A$, tempus descensus per curvæ partem $B C$ aequale erit tempori casus per $A B$.

H. D. Z.

IX.

I X.

*Christiani Hugonii, Solutio Problematis de
linea in quam flexile se pondere pro-
prio curvat.*

Si Catena C V A suspensa sit ex filis F C, E A utrin-^{TAB. XXXIII.}
que annexis, ac gravitate carentibus, ita ut capita C & A ^{Fig. 5.}
sint pari altitudine, deturque Angulus inclinationis filorum
productorum C G A, & catenæ totius positus, cujus vertex
sit V, axis V B.

1. Licebit hinc invenire tangentem in dato quovis catenæ
puncto. Velut si punctum datum sit L, unde ducta appli-
cata L H dividat æqualiter axem B V. Jam si angulus C G A
sit 60° , erit inclinanda a puncto A ad axem recta A W, æ-
qualis $\frac{1}{2}$ A B, cui ducta parallela L R, tanget curvam in pun-
cto L. Item si latera G B, B A, A G sint partium 3, 4, 5,
erit A W ponenda partium $4\frac{1}{2}$.

2. Invenitur porro & recta linea catenæ æqualis, vel da-
tæ cuilibet ejus portioni. Semper enim dato angulo C G A,
data erit ratio axis B V ad curvam V A. Velut si latera
G B, B A, A G sint ut 3, 4, 5, erit curva V A tripla
axis V B.

3. Item definitur radius curvitatæ in vertice V, hoc est,
semidiameter circuli maximi, qui per verticem hunc descri-
ptus totus intra curvam cadat. Nam si angulus C G A sit 60° ,
erit radius curvitatæ ipsi axi B V æqualis. Sin vero angulus
C G A sit rectus, erit radius curvitatæ æqualis curvæ V A.

4. Poterit & circulus æqualis inveniri superficiei conoidis,
ex revolutione catenæ circa axem suum. Ita si angulus C G A
sit 60° , erit superficies conoidis ex catenâ C V A genita æ-
qualis circulo, cujus radius possit duplum rectangulum
B V G.

5. Inveniuntur etiam puncta quolibet curvæ K N, cujus
evolutione, una cum recta K V, radio curvitatæ in verti-

ce, curva $V A$ describitur; atque evolutæ ipsius $K N$ longitudo. Velut si angulus $C G A$ fuerit 60° , erit $K N$ tripla axis $B V$. Si vero latera $G B$, $B A$, $A G$ sint ut 3, 4, 5, erit illa $\frac{2}{3}$ axis $B V$.

6. Præterea spatii $N K V A N$ quadratura datur. Posito enim angulo $C G A$ 60° , erit spatium illud æquale rectangulo ex axe $B V$, & ea quæ potest triplum quadratum ejusdem $B V$. Si vero latera $G B$, $B A$, $A G$ sint ut 3, 4, 5, erit idem spatium æquale septuplo quadrato $B V$, cum parte octava.

7. Porro puncta quotlibet catenæ inveniri possunt, posita quadratura curvæ alterutrius harum: $x x y y = a^4 - a a y y$, vel $x x y y = 4 a^4 - x^4$. Vel etiam data distantia centri gravitatis ab axe, in portionibus planis, quas abscindunt rectæ axi parallelæ in curva harum priorè. Quadratura autem hujus curvæ pendet a summis secantium arcuum per minima æqualiter crescentium: quæ summæ ex Tabulis sinuum egregio quodam adhibito compendio inveniuntur quamlibet proxime. Hinc ex. gr. inventum, quod si angulus $C G A$ sit rectus, & ponatur axis $B V$ partium 10000; erit $B A$, 21279, non una minus. Curva autem $V A$, per superius indicata cognoscitur hic esse partium 24142, non una minus.

In his omnibus non nisi ad casus singulares solutiones problematum dedi, vitandæ prolixitatis studio & quoniam non dubito quin regulas universales Viri docti affatim sint exhibitori. Quod si tamen aliquæ ex nostris requirentur, eas lubenter mittam. Ac jam pridem omnes apud Clarissimum Virum *G. G. Leibnitium* involucro quodam obtectas deposui.

X.

*Hugenii Annotationes in librum Parisiis 1689.
editum, de Manuaria Nautica.*

Auctor hujus libri est *D. Renaldus (M. Renau, Ingenieur general de Marine)*, summa cura & methodo conscriptus est, &

& auctoris peritia in Geometricis, & analysi in hoc patet; nulla ponuntur principia, quæ vera non fatear, & integra si Theoria inde legitime deducta foret, nihil in opere culpandum esset; hoc tamen deficiente, utile credidi de notabili quem notavi errorem, monere, cum enim spectet ad maximam partem regularum, quæ in hoc libro Nautis præscribuntur posset hos in maximos, & periculosos admodum errores inducere.

Initium faciam memorando quæ in Art. 1. cap. 2. continentur, in quo Auctor navem $H B M$ ponit, in qua linea recta $D C$ Veli positionem repræsentat, quod tanquam plana superficies concipitur, perpendiculariter super istam lineam elevatam; $A B$ est directio ventiqui velum propellit; $B G$ est perpendicularis ad $D C$; $G K$ est perpendicularis ad $B K$, carinam navis productam; $G E A$ est arcus circuli centro B descripti; $B K G$ est circuli peripheria cujus Diameter est $B G$.

TAB. XXXIII.
Fig. 6.

Verissimum est quod Auctor notat, superficiem $C D$ a vento $A B$ propelli juxta lineam $B G$, ita ut navis per $B G$ ad punctum G tenderet, si nullibi magis quam ad proram aqua resisteret. Addit, navem istam lineam percurrendo directe progredi per $B K$, & ad latus per $K G$; sed cum navis majori difficultate aquam lateribus, quam prorâ fecet, non poterit juxta directionem $K G$ per integram hanc lineam progredi, sed deerit pars, quæ sequetur rationem excessus quo difficultas secandi aquam ad latus superat difficultatem qua navis hanc prorâ fecat; ex. gr. si difficultas secandi aquam ad latus se habeat ad difficultatem qua prora illam fecat ut decem ad unum, si fiat $K G$ ad $K L$ ut 10 ad 1, & ducatur $B L$, dicit Auctor navem moveri per $B L$, hancque lineam percurrere eo tempore quo potuisset in G pervenire, si resistentia ab omni parte fuisset æqualis.

Auctorem huc usque nos fuisse secutos sufficiat. Contendo ipsius errorem in eo dari, quod dicat navem pervenire ex B in L *eodem tempore*, quo pervenisset ex B in G . Nam si deviatio nullam esse ponamus, ut ambages removeantur, certissimum est navem, juxta Auctorem, progredi

ex B in K, eodem tempore, quo pergeret ex B in G, si undequaque aquam eadem facilitate secaret, aut directe per B G, æque ac per B K progrediretur.

In his sic ratiocinatum fuisse auctorem videtur, scilicet, si in motu ex B in G, navis feratur ad latus per K G & directe progrediatur per B K, oportet, ut sublato motu per K G, motus per B K supersit, quo motu linea B K percurrebatur eodem tempore quo B G.

Sed notandum erat, licet motus navis per B G possit concipi tanquam compositus ex motibus per B K, & K G, inde non sequi si in re ipsa tantum supersit motus per B K (sive figura ipsius navis in causa sit, sive hæc cohæreat cum fune infinito B R, perpendiculari ad B M). ventum qui navem ex B in G transtulisset, hanc æquali tempore posse transferre ex B in K. Ut enim determinemus viam juxta B K percursum, vim propellentem debemus determinare, & attendere ad resistantiam quam ex actione aquæ patitur navis.

Constat autem in Mechanicis, vim, qua velum D C, navem pellit per B K, esse ad vim qua idem velum, & in eadem positione respectu venti, illam pelleret per B G, uti B K ad B G: ut Auctor ipse ponit in his, quæ scripsit de impressionibus aquæ in gubernaculum Art. 5. hujus secundi Cap. Sed celeritates quoque essent sicuti B K ad B G, quia ponit Auctor lineas æqualibus temporibus percurri. Vires ergo forent ut celeritates, quod impossibile est, dictisque Auctoris repugnat in 13^o Art. primi Cap. ubi dicit, *ut corpus diversis velocitatibus in fluido moveatur, requiri vires in ratione quadratorum celeritatum*: lineæ ergo B K, B G, non percurruntur æquali tempore. Ut autem determinetur, spatium juxta B K percursum continuanda est B K in S, ita ut B S sit media proportionalis inter B K, B G. Tum B S erit spatium, quod eo tempore permeabit navis quo pergeret per B G; si aquam juxta hanc directionem eadem facilitate secaret. nam quadrata celeritatum per
B G,

B G, & B S, & consequenter etiam aquæ resistantiæ sunt inter se ut B G ad B K; atq; uti modo ostendi, virium ratio est etiam ut B G ad B K; vires igitur sunt ut resistantiæ, & etiam ut quadrata velocitatum. Hæ ergo sunt velocitates, quæ sunt ut B G ad B S, quas Navis in ambobus motibus acquirere debet secundum ipsam Auctoris statim memoratam, nec in dubium revocandam, regulam. Non ergo ut credidit Auctor circumferentia circuli B K G determinat spatia a navi permeanda in diversis carinæ positionibus, manente eadem veli C D positione respectu directionis venti, sed determinantur hæc spatia curvâ B I S G T, cujus puncta eodem modo ac S, facile inveniuntur. Hic autem notandum est, spatia quæ hac curvâ deteguntur, eo magis ab iis differre, quæ Auctor adhibitâ circumferentiâ B K G determinat, quo angulus quem carina cum venti directione efficit acutior est; ita juxta B N navis progredietur per B I, quæ dupla est ipsius B N circulo inscriptæ, si B N sit $\frac{1}{2}$ B G; & tripla si B N sit $\frac{1}{3}$ B G.

Error a me notatus in toto fere tractatus reliquo locum habet, quo varia labefactantur Theoremata quæ de cætero elegantia videntur. Quale est inter alia hoc. Dato O B A angulo veli cum vento, carinæ situm, quo in adversum venti maxime progreditur navis, determinari dividendo æqualiter in duas partes complementum O B E anguli dati; unde Auctor deducit, ponendo quod deviatio nulla sit, carinæ & veli situm in hoc casu omnium maxime utilem dari, quando angulus quem carina cum vento efficit est 60 gr., & angulus venti cum velo 30 gr., quod a vero abest; nam per Regulam, quam veram novi detego, quando venti & carinæ angulus est graduum 60, navem celerius moveri, ideoque in adversum venti magis progredi, si angulus veli & venti. 38 gr. 23' fiat, quam si angulus hicce foret 30 graduum. Regula qua detego veli situm, ut navis omnium celerrime moveatur, ubi carinæ cum vento angulus datus est, talis est

$$x^4 = a a x x + \frac{1}{3} p p x x - \frac{4}{9} a a p p.$$

scilicet, si x designat sinum O Q anguli veli cum vento, a radius B A, p sinus F P anguli carinæ cum vento. Et congruit hæc regula cum illa quam

D. Fatio antea invenit, cum aliis pulcherrimis circa hanc materiam, ut percepi in tabula quadam, in qua quorundam istorum angulorum rationes designarat. Duas veras radices continet æquatio hæc inservientes duobus casibus, in quibus carina cum venti linea eundem angulum efficit, utpote, quando navis vento secundo aut adverso utitur.

Cæterum quin vera sit nostra regula non poterit, D. Renaldus dubitare, cum per eam angulus gubernaculi cum carina, quo navis omnium celerrime circumvolvitur, idem detegatur, quem determinavit in capite 7°. Quod ipsius inventum certe utilissimum est. Ponendo enim $p = a$, id est ponendo venti lineam ad carinam perpendicularem, nostrâ regula habetur $x = \sqrt{\frac{2}{3}} a$, quem ille detexit sinum anguli carinæ aut directionis motus aquæ cum gubernaculo, quod sic necessario sese habere facile patet.

Licet Theoria hæc post a me indicatam correctionem difficilior evadat, quam in tractatu Dñi Renaldi, percipio nihilominus regulam detegi posse, qua & navis & veli situs determinarentur, ut in adversum venti omnium maxime progrediatur, sed computatio nimium longa foret, quare hanc nunc non aggredior. Quibus addendum navis deviationem in hac computatione non considerari, ex qua consideratione maxima daretur difficultas. Quia non modo cum auctore attendendum est ad relationem inter resistentias quas patitur navis proram versus & ad latus, sed etiam ad actionem venti in ipsam navem, præcipue in hujus latus; ita ut ex unica observatione quæ ad deviationem spectant non possent deduci.

X I.

*Responsum Dñi Renaldi ad Dominum
Hugenium.*

Dñus Hugenus hæc ponit, licet motus navis per BG possit concipi tanquam compositus ex motibus per BK & KG , inde non sequi, si re ipsa tantum supersit motus per BK , ventum, qui navem ex B in G transtulisset, hanc æquali tempore posse trans-

transferre ex B in K. Et primo in eo mihi videtur falli. Nam ut navis possit ferri ex B in G tempore determinato, necesse est ut reapse celeritatem habeat, quâ eodem tempore secundum determinationem B K, lineam B K, & secundum determinationem K G, lineam K G possit percurrere. Et ne hoc in dubium vocari possit, concipiamus navim pelli secundum determinationem B K, vi quâ certo tempore ex B possit pervenire in K; concipiamus eandem simul pelli secundum K G, vi quâ eodem tempore possit percurrere lineam K G: cum duæ hæ vires nec sibi contrariantur nec etiam concurrant (est enim B K perpendicularis ipsi K G) necesse est ut harum unicuique navis ex toto obsecundet; & per consequens celeritas, quam singulis momentis habebit secundum B K, erit ad celeritatem, quam iisdem momentis habebit, secundum K G, ut B K ad K G; & ita navis utrique vi satisfaciens, movebitur per B G, & tempore determinato perveniet in G; Et ideo si in effectum ipsi relinquatur solus motus per B K, vis quæcunque, quâ pelleretur ex B in G, illam tempore æquali pellet ex B in K. Inutilem enim reddendo illam impressionis partem, quæ requiritur ut eodem tempore navis percurrat K G, neque augetur, ut diximus, neque minuitur celeritas per B K. Fateor, si angulus B K G esset acutus, vim peculiarem quâ pelleretur navis secundum K G, aliquid detracturam celeritati, quam haberet secundum B K utpote sibi contrariæ; & contra, si angulus B K G foret obtusus, eandem celeritatem utpote cum altera concurrentem, esse augendam; sed cum angulus B K G rectus sit, vis illa celeritatem navis secundum B K neque auget, neque minuit.

Addit D^{nus} Hugenius; *Ut enim determinemus viam juxta B K percursum, vim propellentem debemus determinare, & attendere ad resistantiam quam ex actione aquæ patitur navis.* Statim ostendi relationes celeritatum in variis determinationibus sibi invicem perpendicularibus, sufficere ad detegendam viam, quam navis est secutura; nec per consequens ad id requiri relationem virium, nec resistantiarum; sed cum dictæ celeritates à viribus dependeant, idem ex
rela-

relatione virium facile probabo.

Demonstravi Articulo 13^o Cap. 1. Theoriæ manuariæ nauticæ, de quo Articulo D^{nus} Hugenius mecum consentit, vires navem propellentes esse inter se ut quadrata velocitatum; & propterea vis requisita, ut navis certo tempore secundum determinationem BK conficiat BK , est ad vim, quâ secundum determinationem KG conficiat KG , ut quadratum BK , ad quadratum KG ; unde sequitur, navem, si secundum duas illas determinationes simul pelleretur, habituram vim duabus illis viribus æqualem; cum scilicet neutra neutri quicquam vel addat vel detrahat; per consequens vis illa exprimitur per quadratum ipsius BG , quod æquale est quadratis BK & KG ; & ita navis habebit celeritatem ex illa vi ortam, id est, dicto tempore quantitatem BG peragrabit. Et propterea, si navis pelleretur secundum BG , vi quæ exprimitur per quadratam BG , perveniret in G eodem tempore, quo perveniret in K , si pelleretur secundum BK , vi quam exprimit quadratum BK .

Pergit D^{nus} Hugenius hoc modo; *Constat autem in mechanicis, vim, quâ velum DC pellit navem per BK , esse ad vim, quâ idem velum, & in eadem positione respectu venti, navem pelleret per BG , ut BK ad BG .* Non ego fateor id ex regulis Mechanices sequi; è contra certum est, virium illarum relationem inter se esse ut quadratum BK ad quadratum BG , non vero ut BK ad BG ; & ut omne hic dubium eximatur, concipiamus aërem secundum lineam AB duplo citius moveri uno tempore quam altero. Quando duplo citius movebitur quadruplo fortius in velum impinget, quoniam unaquæque particula duplo fortius impingit propter velocitatem duplam, propter quam etiam duplo plures particule eodem tempore impingunt. Quare si velocitas sit dupla, & massa itidem dupla, vis seu potentia est quadrupla. Si tripla foret velocitas, unaquæque particula triplo fortius impingeret, quia tripla esset velocitas; & simul quia tripla esset velocitas, triplo plures par-

particulæ simul impingerent; unde triplâ existente velocitate, massâ etidem triplâ, potentia aut vis erit noncupla; ex quo patet massam augeri in eadem ratione, qua velocitas augeatur; & cum unaquæque pars etiam fortius impingat in ratione auctæ velocitatis, potentia aut vis venti in velum, est in ratione duplicata celeritatum venti, id est, in ratione quadratorum velocitatum venti in velum. Agnoscit hocce principium Cl. Hugenius; restat ergo tantum, ut illud applicemus.

Prima applicatio ostendet, quare vis venti in velum, cum ventus velo perpendicularis est, sese habeat ad vim ejusdem venti in velum, quando illud inclinatum vento opponitur, ut quadratum radii ad quadratum sinûs anguli incidentiæ; aut, quod idem est, cur vires ejusdem venti in vela varia inclinatione ipsi obtensa, sint inter se in ratione quadratorum sinuum angulorum incidentiæ, quod demonstravi Articulis 7. 8. & 9. Cap. 1., & quod etiam hoc modo nunc demonstro. Probaturum dedi in Theoria Manuariæ Nauticæ, Artic. 6. Cap. 1. corpus motum ab A in B non occurrere superfici ei C D nisi secundum determinationem suam A V, ponendo scilicet A V perpendicularem ipsi D C productæ, & in illam superficiem nullam vim exferere nisi secundum hanc determinationem; quod agnoscit D^{nus} Hugenius. Hoc posito, ventus A B in velum non agit, nisi secundum hanc determinationem, id est, cum velocitate A V. Si velum C D vento A B perpendiculare esset, ventus in velum ageret velocitate A B; & per consequens ex principio quod statim adstruxi, vis cum qua ventus in velum ageret, si vento esset perpendiculare, est ad vim venti in velum D, quod inclinatè vento obtenditur, ut quadratum A B ad quadratum A V, id est, ut quadratum radii ad quadratum sinûs anguli incidentiæ.

Secunda applicatio inservit solvendæ quæstioni, de qua lis est inter D^{nium} Hugenum & me, id est ostendit, quod, velo constituto in situ C D, & navi in situ B K, vis, qua ventus ope veli, navim secundum B G propellit, sit ad vim, qua idem ventus, ope ejusdem veli navim propellit secun-

dum B K, ut quadratum B G ad quadratum B K, & non quemadmodum sustinet Hugenus, ut B G ad B K.

Quod ut pateat, concipiamus ventum in velum impingere cum velocitate B G; quoniam in illud impingit solummodo per motum, qui dirigitur secundum B G spectandus est ventus, tanquam latus ex B in G velocitate B G. sed quando illa velocitate fertur ex B in G, fertur velocitate B K secundum determinationem B K, & velocitate K G secundum determinationem K G; quare ex iis quæ superius a me dicta sunt, vis qua navis pellitur secundum B G est ad vim qua pellitur secundum B K, ut quadratum B G ad quadratum B K; & ad vim, qua pellitur secundum K G, ut quadratum B G ad quadratum K G. Observandum autem est, eandem vim venti in velum, id est, vim totalem secundum B G, quam vim exprimit quadratum B G, divisam esse secundum B K, & K G, in duas partes, quarum summa vim totalem adæquat; & illa vis, potentia, seu motus, quibus tribus una eademque res significatur nominibus, nullum vel augmentum vel imminutionem accipit, ex nostris motum considerandi modis, qui motus non in sola corporum velocitate consistit, sed ex eorundem massis quoque constituitur. Ergo potentia, vis, seu motus, est productum quadrati celeritatis per massam. Quare potentia ex duabus aliis potentiis conflata, iis æqualis est, dummodo unius determinatio determinationi alterius sit perpendicularis, quia eo in casu duæ illæ potentiæ, nec quicquam addere, nec detrachere quicquam altera alteri, possunt, duabus determinationibus, uti diximus, nihil oppositi habentibus. Inde fit ut potentia secundum B K eadem manere possit, idemque per consequens illius effectus, licet in infinitum augeatur seu minuatur potentia secundum K G. Eo in casu sola potentia totalis B G mutationem patietur, quia semper æqualis erit summæ potentiarum, ex quibus producta fuerit.

Ex omnibus, quæ a me nunc dicta sunt, sequitur, navem H B M, si pellatur secundum B G ope veli D C, &
 si

si velocitas, quâ movetur ad latus, sit ad velocitatem quâ directè progreditur, ut GK ad LK , sequitur, inquam, navem juxta BL processuram, & in L perventuram eodem tempore, quo pervenisset in G , si ab omni parte aquas secaret eadem facilitate, quâ secat has à parte proræ; & si, quemadmodum posuit D^{nus} Hugenus, navis fune BR infinite longo, & ipsi BK perpendiculari adstringeretur, ad tollendum omnem motum secundum determinationem KG , sequeretur etiam perventuram navim ad punctum K eodem tempore quo pervenisset ad punctum G ; quod erat in quæstione, & quod erat demonstrandum.

Si vera foret mechanices regula, quam memorat D^{nus} Hugenus, scilicet vim cum qua velum DC navim propellit secundum BK esse ad vim, cum qua idem velum navem secundum BG propellit, ut BK ad BG , non solum navis non perveniret in K eodem tempore, quo pervenisset in G , positis circumstantiis, de quibus supra, sed & navis aquam æqualiter ab omni parte secans, & a velo DC , secundum BG ipsi perpendicularem propulsa, non ferretur juxta lineam BG : nam ex eadem mechanices regula, vis, qua ferretur navis juxta BK ope veli, foret ad vim qua ferretur secundum KG , ut BK ad KG , & velocitates navis essent inter se ut radices virium. Ergo velocitates quæ ex illis viribus orirentur, scilicet velocitas quam singulis momentis acquisivisset navis in motu juxta BK , esset ad velocitatem quam iisdem momentis haberet ex motu juxta KG , ut radix BK ad radicem KG . Sed ut navis moveatur secundum BG , quando inæquales sunt velocitates inter se, quales hic a nobis ponuntur, requiritur, ut sint inter se singulis momentis, ut BK ad KG , & non ut eorundem radices. Ergo navis non ferretur juxta BG , quod est absurdum; nam cum vis totalis, quæ navem impellit, sit juxta BG , ponendo navem ab omni parte æqualiter aquam secare, non potest non illam lineam sequi.

Ita pergit Cl. Hugenus, *Error à me notatus in toto*

fere tractatus reliquo locum habet, quo varia labefactantur theoremata, quæ de cætero elegantia videntur. Quale est inter alia hoc. Dato $O B A$ angulo velicum vento, Carinæ situm, quo in adversum venti maxime progreditur navis, determinari dividendo æqualiter in duas partes complementum $O B E$ anguli dati. Unde Auctor deducit &c.

Siquidem, quem errorem credidit D^{nus} Hugenius, errorem non esse ostenderim, intacta remanent tractatus mei theoremata.

Addit; Cæterum, quin vera sit nostra regula non poterit dubitare D^{nus} Renaldus; cum per eam angulus gubernaculi, quo navis omnium celerrime circumvolvitur, idem detegatur, quem Cap. 7. determinavit. Quod certe ipsius inventum utilissimum est. Ponendo enim $p = a$, id est ponendo venti lineam ad carinam perpendicularem, nostrâ regula habetur $x = \sqrt{\frac{2}{3}} a$, quem ille detexit sinum anguli carinæ aut directionis motus aquæ cum gubernaculo, quod sic necessario sese habere facile patet.

Et hic à D^{no} Hugenio dissentire cogor, & ab ipso meo consequenter tractatu, in quo error datur maximus, statim à me, detectâ prius ingenue ejusdem causâ, ostendendus. Composueram primo librum meum, pro vero ponendo principium falsum, à P. Pardies, art. 118. scientiæ virium motricium prolatum; præter quod nil continet de navis motu tractatus illius, & quod nec ipsum ulli rei applicatur; imo nullam auctor viam aperit solvendi vel unam, quæ spectat theoriam Manuariæ Nauticæ, propositionem. Cum jam sub prælo sudarent ultimæ libri I. paginae; principii memorati falsitatem animadverti, & quoniam per omnes tractatûs propositiones dispersum, falsas reddebat resolutiones omnes, totam editionem suppressi. Solidiori postea fundamento nixus easdem denuo solvi, præloque subjeci, hæ sunt quæ in lucem sunt editæ. Sed aliis distentis negotiis, vocem *vis*, loco *velocitatis*, quæ erat substituenda, in demonstratione Art. 5. Cap. 2. incogitanter reliqui; quod D^{nus} Hugenius non attendit. Fateor me, in Art. 6. Cap. 1. promiscue vocibus *virium* & *velocitatum* uti, sed unius tantum corporis in vacuo motum
ibi

ibi confidero , & in eo casu velocitas & vis eandem semper relationem habent. Capitis autem 7. errorem , post alteram tantum libri mei editionem animadverti , neque tunc illum corrigere per negotia mihi licuit. Falsitatem vero ita demonstro.

Centro B describatur circulus A D R E C , & repræsentet linea A B carinam navis , B R vero carinam productam. Supra B R , tanquam diametrum describatur semicirculus B G R , & similiter supra A B semicirculus A V B. Sit B D certus gubernaculi situs , & B C gubernaculum productum ; B E perpendicularis supra A B ; B G & A V perpendiculares supra D C ; & G H perpendicularis ad B E. Ponendo alium gubernaculi situm , qualis est B d producta in e ; ducantur in iisdem circumstantiis lineæ B g , A u , & g h. Si navis antrorsum moveatur secundum lineam B A , anguli A B C , & A B e æquales angulis G B E , & g B E , sunt anguli incidentiæ aquæ in gubernaculum. Unde sequitur , aquam , posito gubernaculo in situ B D , impingi secundum determinationem & cum velocitate A V , & per consequens cum vi , quam exprimit quadratum ipsius A V. Et quoniam velocitas navis sese habet tantum ut radix ipsius vis , propter aquæ resistentiam , propellitur navis secundum determinationem B G , velocitate quæ exprimitur per B G , quia B G est æqualis & parallela ipsi A V. Sed quando propellitur navis secundum B G velocitate B G , propellitur secundum B E velocitate B H. Si gubernaculum foret in alio situ B d , iisdem ratiociniis probaretur , navem pellendam fore secundum B E velocitate B h. Sed quando majori velocitate navis pellitur secundum B E , citius etiam convertitur. Quare si B G , quæ perpendicularis est ad gubernaculi situm , secet semicirculum B G R bifariam , id est , si angulus G B E , æqualis angulo incidentiæ A B C , sit 45. graduum , G H perpendicularis ipsi B E , erit tangens semicirculi. Ergo G H quæ exprimit celeritatem , quâ navis pellitur secundum B E , est omnium maxima. Nam si gubernaculum constituatur in alio situ , ut in B d , tunc B g ipsi perpendicularis , secabit

TAB. XXXIII.
Fig. 7.

femicirculum in g , unde si ducatur perpendicularis $g h$, erit illa propior puncto B , quam ipsa $G h$, & navis pelletur secundum $B E$ velocitate $B h$, quæ minor erit quam $B H$. Quare, ut navis citissime convertatur, necesse est ut *vectis* gubernaculi $B C$ cum carinâ navis faciat angulum 45 . graduum, non autem, sicut Cap. VII. Theoriæ dicitur, angulum graduum circiter 55 .

Concludit Cl. Hugenius hisce verbis, *licet theoria hæc post indicatam à me correctionem difficilior evadat, quam in tractatu Dni Renaldi, percipio nihilominus regulam detegi posse, qua & navis & veli situs determinarentur, ut in adversum venti omnium maxime progrediatur, sed computatio nimium longa foret quare hanc nunc non aggredior.*

TAB. XXXIII.
Fig. 8.

In meo certe tractatu facillimâ foret determinatio sitûs navis velique, non tantum si in adversum venti omnium maxime sit progrediendum, sed & conveniens cuicunque viæ instituendæ, si deviatio navis à calculo secluderetur; quod ut pateat, sit linea venti $A B$, & sit data via $B K$, cum vento constituens angulum quemcunque $A B K$. Ut inveniatur, quo veli situ, navis illa viâ citissime possit progredi, si scilicet nulla sit deviatio; sumatur $B R$ tanquam diameter, & centro M describatur semicirculus $B G V$; ab eodem puncto M ducatur $M G$ viæ $B K$ parallela; a puncto B ad punctum G ducatur $B G$, & tandem ducatur $D B C$ perpendicularis ipsi $B G$. Dico $D C$ repræsentare veli situm, quo per viam $B K$ navis omnium citissime possit progredi. Ad id probandum, ducatur $G K$ perpendicularis ipsi $B K$. Ex omnibus quæ superius dicta sunt, patet ventum $A B$ propellere navem ope veli $D C$, secundum $B G$ velocitate $B G$, eodem tempore quo eandem propelleret secundum $B K$ velocitate $B K$. Et quoniam $G K$ est perpendicularis ipsi $B K$, erit itidem perpendicularis ipsi $M G$. Ergo $G K$ est tangens semicirculi. Ergo quotcunque ducantur perpendiculares ex aliis circumferentiæ semicirculi punctis, supra $B K$, cadent omnes inter B & K . Ergo navis celeritas in veli situ $D C$ erit omnium maxima. Addo, velum $D C$ secare bifariam

an-

angulum $A B K$, qui est angulus venti cum viâ. Ad quod demonstrandum ducatur $M N$ perpendicularis ipsi $B G$. secat $M N$ angulum $B M G$ angulo $A B K$ æqualem, bifariam; & quoniam $M N$ est parallela ipsi $D C$, angulus $B M N$ dimidius anguli $B M G$, qui æqualis est angulo $A B K$, æqualis est angulo $A B C$, qui ipse per consequens æqualis est dimidio angulo $A B K$. Unde sequitur, veli situm semper bifariam debere secare angulum venti & viæ, & cum agitur de progrediendo in adversum venti, debere illum cum velo constituere angulum 30. graduum, proramque itidem cum velo angulum 30. grad.; quia, ut demonstratum fuit in Theoria Manuariæ Nauticæ, quocunque in situ respectu venti disponatur velum, necesse est ut ejus complementum prora bifariam secet. Et exinde apparet, quocunque in situ constituatur prora, quæ semper cum via congruit; quia ponitur navem non deviare, necesse esse ut angulum quem cum prora, ventus constituit, velum bifariam secet. Unde sequitur angulum rectum debere à prora & velo in tres partes æquales secari, id est, ventum cum velo 30. gradus constituere, proram itidem cum velo 30. gradus, & cum vento per consequens 60.

X I I.

*Exceptio Dⁿⁱ Hugonii ad Responsum
Dⁿⁱ Renaldi.*

Mihi evidens videbatur illud quod in observationibus de errore primario, qui reperitur in tractatu de manuaria nautica Dⁿⁱ Renaldi, proposueram, & censuerunt viri in re Mathematicâ versatissimi, argumentum meum omni exceptione majus esse; idcirco neque credideram, velle ipsum quidpiam respondere, quo suam confirmaret Theoriam; interim ex iis, quæ in lucem edidit, apparet eum minime de suo errore mecum sentire; & quandoquidem rationibus utitur, e quibus haud ita facile se expedire possent illi, qui non satis hæc omnia excusserunt, obstrictum me credidi ad demonstrandum

ma-

majori evidentiâ, quam antea, ejus Theoriam sustineri non posse, nisi principia mechanices, jam dudum stabilita, quorumque veritatem negare nec auderet, nec vellet, evertantur.

Ne inutiliter protraham controversiam nostram respondendo argumentis quæ D^{us} Renaldus mihi objicit, ostendam tantum illum, ut jam observaram, errasse in propositione, qua nititur tota ejus Theoria, deinde paucis indicabo, quid huic errori ansam dederit.

TAB. XXXIII.
Fig. 9.

Ut ostendam, quinam sit quæstionis status, hic maximam partem eorum, quæ nostras figuras spectant, repeto, scilicet; H M est navis carina; C D velum; A B linea venti velum inflantis; B G est perpendicularis ad C D; G K perpendicularis ad B K, quæ indicat carinam prolongatam; continuo G B ad Z, & M H ad X.

D^{us} Renaldus in Theoria cap. II. Art. 1. dicit, si ponatur navem undique eadem, qua puppis, facilitate aquam findere, illam ita a vento propelli, ut progressura sit per rectam B G, quod est verum; sed si juxta situm carinæ navis tantum progredi queat in recta B K, vel si funis B R perpendicularis ad B K, & cujus longitudo censetur infinita, eam cogat insistere in via B K, contendit, velo & vento iisdem ac antea manentibus, navem percursum spatium B K, eodem tempore quo percurrisset B G; ego autem defendo, quod percurreret spatium B S, medium proportionale inter B K & B G; Et hic est controversiæ nostræ status.

In probatione, quam affert in responsione suâ, loco venti A B oblique cadentis in velum C D, substituit ventum Z B, qui in id perpendiculariter agit; quod potest, & minime controversiam mutat, quam certum sit, quod quocunque sensu ventus in velum C D cadat, conetur navem propellere per viam B G perpendiculararem ad C D; neque ullius usus sunt, quas habet D. Renaldus, diversas considerationes de motu venti. Ratiocinando dein invenit, quod vis, quâ navis pellitur a vento secundum B G ope veli, sit ad vim, quâ pellitur ab eodem vento ope ejusdem veli secundum B K,
ut

ut quadratum $B G$ ad quadratum $B K$, non vero ut $B G$ ad $B K$, quod ego contendo, & inde tota res pendet.

Ut determinemus cujus sententia vera sit, concipiamus planum, in quo nostra figura existit, ita ad Horizontem erectum, ut linea $B G$ ad eundem sit perpendicularis, & sit $R B X$ funis affixus in R , ad quem in B alligatum & suspensum sit pondus Q : Ponamus ulterius portionem $B X$ perpendicularem ad $R B$ a manu retineri in X ; clarum est, id exacte representare casum navis, de quo est quaestio; nam loco venti, qui impingendo in velum $C D$ propellat navim secundum $B G$, hic habemus pondus Q , quod trahit punctum B juxta $B G$; & funis $B R$, qui censetur infinitae longitudinis, & impedit, quo minus navis aliam plagam versus, quam $B K$ possit progredi, hic eundem edit effectum respectu nodi B .

Ut ergo vis, qua ventus propellit navem secundum $B G$, est ad vim, qua hanc propellit secundum $B K$, ita est pondus Q ad gravitatem, quae agit in manum quae in X cohibet, quo minus nodus B moveatur versus $B K$; illa enim gravitas æquipollet vi, qua nodus secundum $B K$ trahitur. Cum autem $G K$ parallela sit ipsi $B R$, certum est ex notissimis Mechanicæ regulis, quod pondus Q sit ad id quod retinet chordam $B X$, vel ad gravitatem quae in X agit in manum ut $B G$ ad $B K$. Vis ergo, qua navim propellit ventus secundum $B G$, est ad vim, qua propulsa est versus $B K$, ut $B G$ ad $B K$ non vero, ut illarum linearum quadrata, ut *Dñus Renaldus* contendit.

Ponamus porro, navem $H M$, quae undas eadem undique facilitate fecat, propelli per ventum $Z B$ vel $A B$ (perinde enim est) quo naviget certo tempore per $B G$, velo existente in $C D$, & determinandum esse, quantum progressura sit secundum $B K$ æquali tempore eodem vento, eodemque veli situ. Cum celeritates navis in duabus illis viis tales debeant esse, ut resistentiae, quas infert ipsi aqua, sint ut vires, quibus propellitur (nam in eo casu solo motu æquabili progreditur), & cum resistentiae










sint ut quadrata celeritatum, ideo requiritur ut quadrata celeritatum sint ut vires, id est ut GB ad BK ; & consequenter ut velocitates sint ut GB ad BS ; quandoquidem quadrata GB & BS sunt ut lineæ GB , BK per constructionem. Probavi ergo ex ordinariis Mechanices principiis, id, quod in observatione mea proposueram.


Superfluum foret alia argumenta Dⁿⁱ Renaldi examinare, quibus vult hanc eandem, quam refutavi propositionem, confirmare; solummodo indicabo originem erroris, qui in iis occurrit, præsertim nasci ex eo, quod in Articulo 7. Cap. 1. Theoriæ suæ concludat, *vires relativas materiæ fluidæ ad superficies diversimode inclinatas esse inter se, ut quadrata sinuum angulorum incidentiæ*; debuisset addere *ad superficies æquales diversimode inclinatas*; cujus vocis *æquales* paulo ante in eodem Articulo pag. 7. quoque non meminerat; quod si suppleatur, tum demonstratio optime congruit cum conclusione cumque veris principiis P: Pardies in Art. 118. Tractatus de *Viribus moventibus*. Pater hic tantum in eodem illo Articulo deceptus fuit, quod ignorarit vel saltem non recordatus fuerit, resistentias aquæ in corpus esse ut quadrata velocitatum ejus corporis; ideo enim p. 225. facit *af ad au in duplicatâ ratione b o ad m p* cum simpliciter facere debuerit *af ad au, ut b o ad m p*.

Quod attinet ad utilissimum Gubernaculi situm, D^{nus} Renaldus se ipsum nullo jure culpat, & dum quæ primo determinaverat corrigere conatur, male ratiocinatur; in responsione p. 303, nam tantum determinandum est, in quonam Gubernaculi situ aqua id propulsura sit maximâ vi, juxta perpendicularem ad carinam; unde necessario sequetur maxima puppis velocitas juxta illam perpendicularem. Errat etiam, quum vult, p. 25 Theoriæ suæ de Manuaria Nautica, legi *velocitas loco vis*.

Quod superest, observo, totam hanc Theoriam, ut ediderat, veram fore si resistentiæ aquæ essent ut velocitates navis, sunt autem ut quadrata illarum velocitatum.

F I N I S.





CHRISTIANI HUGENII
O P E R A
GEOMETRICA.

TOMUS SECUNDUS.

Tomi secundi contenta.

THEOREMATA DE QUADRATURA HYPERBOLES, ELLIPSIS ET CIRCULI, ex dato portionum gravitatis centro. Quibus sub-
juncta est *Eξέτασις* Cyclometriæ Cl. Viri GREGORII à S. VIN-
CENTIO, editæ Anno MDCCXLVII. 309.

EPISTOLA AD C. V. FRANC. XAVERIUM AINSCOM. S. I. qua
diluuntur ea quibus *Eξέτασις* Cyclometriæ GREGORII à S. VIN-
CENTIO impugnata fuit. 341.

DE CIRCULI MAGNITUDINE INVENTA. Accedunt ejusdem Pro-
blematum quorundam illustrium Constructiones. 351.

DE CIRCULI ET HYPERBOLÆ QUADRATURA CONTROVER-
SIA. 405.

GEOMETRICA VARIA. 483.

CHRISTIANI HUGENII

A ZULICHEM,

Dum viveret Zelhemi Toparchæ,

OPERA VARIA.

VOLUMEN SECUNDUM.



LUGDUNI BATAVORUM,
Apud **JANSSONIOS VANDER AA.**
Bibliopolas. MDCCXXIV.

CHRISTIAN HUGENIUS

M R H D T J U X A

Das dritte Element ist die

CHRISTIANI HUGENII,

C O N S T. F.

T H E O R E M A T A

D E

Q U A D R A T U R A

H Y P E R B O L E S , E L L I P S I S

E T C I R C U L I ,

E X D A T O

P O R T I O N U M G R A V I T A T I S C E N T R O :

Quibus subjuncta est

Εξέτασις Cyclometriae Cl. Viri GREGORII à S. VINCENTIO,
editæ Anno CIO IO CXLVII.

CHRISTIAN HUGENIN

THEATRUM

QUADRATURA

HYPERBOLIS ALIIS

ET CIRCULI

EXACTO


ORTHOGONALIA ET ALIA

EXACTO

EXACTO

172

AD LECTOREM.



E Conicis Sectionibus & Circulo novi quid adferimus, Amice Lector, si tamen ita vocari queat, quod æternâ lege definitum constitutumque, quale nunc est, perpetuò fuit. Sic quod recens effoditur, novum quis aurum dicat. Sic stellas in cœlo novas, quæ superioribus sæculis incognitæ, nostrorum artificio deteguntur. Neque verò his Geometricum Theorema ullum vetustate cedit, sed nos novitatem singulis tribuimus, prout quæque sese nobis offerunt fiuntque manifesta. Itaque & inscripti trigoni Parabola ante Archimedem sequitertia fuisse dicenda est; neque illa minùs immutabili veritate reliquarum Sectionum Circulique portionibus semper inerant, quæ nunc circa eas prodimus, licet antehac nemini, de quo quidem ad nos pervenerit, comperta fuisse constet vel determinata. Damus autem non isti, quam retulimus, Archimedææ similem determinationem, neque vel ipsa rerum natura, post tot subtilissimorum hominum delusos conatus, spem reliquisse videtur tale quid unquam de figuris, quas tractandas sumpsimus, expectandi: Verùm id præstitisse profitemur, quod in ipsa

P R Æ F A T I O.

quoque inscriptione expressum est, & paulò quid amplius, si Lectoris æqui iudicium prævenire permittitur. Namque ex datis gravitatum centris Hyperbolas, Ellipses & Circulos ad quadrata redigere non finis est horum Theorematum, sed consequentia duntaxat; eoque nomine potissimum placere debent, quòd aliquatenus certam trium Portionum ad inscripta triangula rationem demonstrant. Eam in Hyperbola primum mihi deprehendere contigit, viâ destinatâ planè, sed impeditâ difficilique; quâ deinde breviorẽ exquirens, in hanc incidi quæ ad Ellipsin & Circulum quoque pertineret, commodumque obvenit constans illa in cognatis figuris mirabilisque convenientia. Quæ quidem universim in omnibus hisce quo minus locum habeat, sola facit Propositionum novissima, supernumeraria illa quasi, atque ultra propositum adscita, cujusque hoc solum mihi tribui par est, quod ex præcedentibus ipsam non ineleganti ratione comprobari posse ostendi. Dudum enim hîc nos prævenit, egregiumque Theorema ante annos undeviginti demonstratum dedit acutissimus Geometra I. Della Faille, felix, meâ quidem sententiâ, quod ante alios perspexerit, quomodo à sectorum gravitatis centro Quadratura dependeret: cumque illum in Circulo præcipuam laudem promeruisse agnoscam, non æquè gavissus sum detectâ in reliquis hujus segmentis simili connexion-

ne,

P R Æ F A T I O.


ne, quàm cum eandem in Hyperboles portionibus observassem, illudque invenissem de quo tantus Vir non potuit non & ipse cogitasse. Raros alioqui semper hæc figura, si cum Circulo conferatur, sui contemplatores nacta est; ejusque rei vel effectum vel indicium habemus, quod cum varia sint inspecta quibus datis Quadraturam quoque Circuli dari necesse sit; cujusmodi sunt exacta perimetri longitudo, Helicis Archimedeæ contingens, Quadratricis Dinostrati terminus, vel tangens quoque ejusdem Quadratricis ad terminum alterum, (sicut aliquando me demonstrasse memini) & alia nonnulla quæ recentioribus debentur; nihil interea à quoquam definitum extet, quo vel sub ulla conditione Hyperbole cum spatio rectis comprehenso lineis comparari possit. Nostrâ fanè ætate, paucisque abhinc annis Vir Clariss. D. Gregorius à S. Vincentio, de quo mihi deinceps dicendum restat, exquisitâ prorsus novâque methodo utramque Quadraturam aggressus est, & credidit eâdem se propemodum demonstratione absolvisse. At ego cum amplissima quæ de hisce volumina emisit, perscriptis jam Theorematis meis, diligentius evolverem, (certus, si quod intenderat obtineret, saltem gravitatis me centra exhibiturum,) intellexi tandem, majori subtilitate quàm successu rem arduam tentatam fuisse, ratione quoque repertâ quâ id clarissime ostendi posse confido.

Et

P R Æ F A T I O.

Et quando inter tot eximios hoc ævo Geometras nondum licuit animadvertere qui sibi hanc provinciam delegerit, ac proinde fieri posset ut longa porro dubitatio maneret circa demonstrationes, quas certissimas esse oportet; arbitratus sum me facturum quod & in publicum utile esset & à propositi argumenti ratione non alienum, si simul hîc prodire sinerem, quæ novam in re obscura lucem allatura videbantur. Nulla autem temeritate ad elevandam Viri gravis & eruditi auctoritatem accessi, sed causæ bonitate adductus, putavi quæ compereram liberè citraque offensam proponi posse. Majori quoque fiduciâ, posteaquam is sese ipsum per literas, quarum aliquod inter nos commercium est, auctorem hortatoremque candidè præbuit, ut si qua commentatus essem, ea cum universis communicarem. Ingenuitatem hanc insignem lubenti gratoque uti meretur animo accepi, & spero modestâ reprehensione satis me declarasse, quanti æstimem Doctiss. Viro haberi amicus. Cujus invicem summa, quâ me usque adhuc excepit, humanitas facit ne quid aliud expectem, nisi ut vel moderatè & sine ulla acerbitate ad mea respondeat, si quid iis reponendum esse duxerit, vel rationibus evidentissimis persuasus, æquè lubens nostra quam alterius posthac opera veriora sentiat & amplectatur.

CHRIST.



CHRISTIANI HUGENII,

C O N S T. F.

T H E O R E M A T A

D E

Q U A D R A T U R A

H Y P E R B O L E S , E L L I P S I S ,

E T C I R C U L I ,

E X D A T O

P O R T I O N U M G R A V I T A T I S C E N T R O .

T H E O R E M A I.



Portioni hyperboles, vel ellipsis vel circuli portioni, dimidiâ ellipsi dimidiove circulo non majori, circumscribi potest figura ex parallelogrammis æqualem latitudinem habentibus, quæ portionem excedat spatium quod minus sit quovis dato.



A T A sit portio A B C, cujus diameter B D. Super basin A C constituatur parallelogrammum A E, latera duo habens diametro B D parallela & æqualia, quo fiet ut latus reliquum portionem in vertice contingat. Hoc parallelogrammo continuè in duo æqualia secto, relinquetur tandem pars quæ

TAB. XXXIV.
Fig. 1.

Tom. II.

Rr

mi-

minor erit dato spatio; sit ea parallelogrammum $B F$, & dividatur basis $A C$ in partes æquales ipsi $D F$, punctis G, H, K &c. atque inde ducantur ad sectionem rectæ $G L, H M, K N$ &c. diametro $B D$ parallelæ, & perficiantur parallelogramma $D O, G P, H Q, K R$ &c. Dico figuram ex omnibus istis parallelogrammis compositam (quæ imposterum ordinatè circumscripta vocabitur) superare portionem $A B C$ minori quàm datum sit spatio.

Jungantur enim $A N, N M, M L, L B, B S$, &c. eritque hac ratione inscripta quoque portioni figura quædam rectilinea; majorque erit excessus figuræ circumscriptæ quæ ex parallelogrammis composita est, super inscriptam, quàm supra portionem $A B C$. Excessus autem circumscriptæ super inscriptam ex triangulis constat, quorum quæ sunt ab una diametri parte, ut $A R N, N Q M, M P L, L O B$, æquantur dimidio parallelogrammi $O D$ vel $B F$, quia singulorum bases basi $D F$ æquales sunt, & omnium simul altitudo, parallelogrammi $B F$ altitudini. Eâdem ratione triangula quæ sunt ab altera diametri parte, æquantur dimidio parallelogrammi $B F$: Ergo omnia simul triangula sive dictus excessus æqualis est parallelogrammo $B F$, eoque minor spatio dato. Sed eodem excessu adhuc minor erat excessus figuræ circumscriptæ supra portionem $A B C$: igitur hic excessus dato spatio multo minor est. Et apparet fieri posse quod proponēbatur.

THEOREMA II.

DAtâ portione hyperboles, vel ellipsis vel circuli portione, dimidiâ ellipsi dimidiove circulo non majore, & dato triangulo qui basin habeat basi portionis æqualem; potest utrique figura circumscribi ex parallelogrammis quorum sit omnium eadem latitudo, ita ut uterque simul excessus quo figuræ circumscriptæ portionem & triangulum superant, sit minor spatio quovis dato.

Da-

Data sit portio $A B C$ & triangulus $D E F$, basibus $A C$, $D F$ æqualibus; & portionis diameter sit $B G$, in trian-^{TAB. XXXIV.}
gulo verò ducta à vertice in mediam basin linea $E H$. Sint ^{Fig. 2.}

autem utræque $B G$, $E H$ vel ad bases rectæ vel æqualiter inclinatæ; & quam rationem habet $B G$ ad $E H$, in eandem dividatur spatium datum; sintque partes K & L . Circumscribatur jam sicut antea portioni $A B C$ figura ordinatè, quæ portionem superet excessu minore quàm sit spatium K . Et triangulo $D E F$ circumscribatur figura quæ totidem parallelogrammis constet, quot sunt in figura portioni $A B C$ circumscripta.

Quoniam igitur bases portionis & trianguli æquales sunt; apparet quidem omnium parallelogrammorum eandem fore latitudinem. Hinc quum parallelogrammum $B M$ sit ad $E R$ ut $B G$ ad $E H$, id est ut K ad L , sitque $B M$ minus quam K ¹, erit quoque $E R$ minus quam L ². Verum omnia trian-^{1 Ex constr.}
gula quibus constat excessus figuræ circumscriptæ supra trian-^{2 14. 5.}
gulum $D E F$, æqualia sunt parallelogrammo $E R$, ergo minor est idem excessus spatio L . Sed & excessus quo figura circumscripta portionem $A B C$ superat, minor est spatium K . Ergo uterque simul excessus minor erit spatio $K L$ dato. Et constat fieri posse, quod proponebatur. ^{Elem.}

T H E O R E M A I I I.

SI portioni hyperboles, vel ellipsis vel circuli portioni, dimidiâ ellipsi dimidiove circulo non majori, circumscribatur figura ordinatè; ejus figuræ centrum gravitatis erit in portionis diametro.

Sit portio quælibet istatum $A B C$, diameter ejus $B D$; ^{TAB. XXXIV.}
& circumscribatur ei ut supra figura ordinatè. Ostenden-^{Fig. 3.}
dum est ejus figuræ centrum gravitatis fore in $B D$ diametro. Ducantur lineæ $H K$, $N R$, $P S$, conjungentes suprema latera parallelogrammorum quæ à diametro portionis æqualiter utrinque distant.

Quoniam igitur FH , LK sunt diametro BD parallelæ, suntque DF , DL æquales, oportet lineam HK , quæ duas FH , LK conjungit, à diametro BD bifariam secari; quare eadem HK parallela erit basi AC , & $E H K G$ recta linea. Itaque EC parallelogrammum est; cujus opposita latera quum bifariam dividat diameter BD , erit in ea parallelogrammi centrum gravitatis². Eadem ratione parallelogramma erunt HM , NO , PQ , & singulorum centra gravitatis in linea BD . Ergo & figuræ ex omnibus dictis parallelogrammis compositæ centrum gravitatis in eadem BD reperiri necesse est. Ista autem figura eadem est quæ portioni ordinatè fuerat circumscripta. Ergo figuræ portioni ordinatè circumscriptæ centrum gravitatis constat esse in BD portionis diametro. Quod erat ostendendum.

THEOREMA IV.

Portionis hyperboles, ellipsis & circuli, centrum gravitatis est in portionis diametro.

TAB. XXXIV.
Fig. 4.

Estto portio hyperboles, vel ellipsis vel circuli dimidiâ primum figurâ non major, ABC ; diameter ejus BD . Ostendendum est, in BD reperiri portionis ABC gravitatis centrum.

Si enim fieri potest, fit extra diametrum in E , & ducatur EH diametro BD parallela. Dividendo itaque DC continuè bifariam, relinquetur tandem linea minor quam DH ; fit ea DF , & circumscribatur portioni figura ordinatè ex parallelogrammis quorum bases æquales sint lineæ DF , & jungantur BA , BC . Figuræ itaque portioni circumscriptæ centrum gravitatis est in BD portionis diametro. Sit hoc K , & jungatur $E K$, producaturque, & occurrat ei AL parallela BD . Quia autem portio major est triangulo ABC , & excessus quo figura circumscripta portionem superat, minor parallelogrammo BF , uti supra demonstratum fuit^{*}; erit major ratio portionis ABC ad dictum excessum, quàm trianguli ABC ad BF parallelogrammum, id est quàm

AD

A D ad D F; multoque major quam A D ad D H, vel quàm L K ad K E. Sit itaque M K ad K E sicut portio A B C ad excessum quo ipsa superatur à figura ordinatè circumscripta. Itaque cum K sit centrum grav. figuræ portioni circumscriptæ, & E centrum grav. ipsius portionis; erit M centrum gravitatis omnium spatiorum quæ eundem excessum constituunt¹. Quod esse non potest; Nam si per M¹ 8. lib. 5. Arch. de Equipond. linea ducatur diametro B D parallela, erunt ab una parte omnia quæ diximus spatia. Manifestum est igitur, portionis A B C centrum grav. esse in B D portionis diametro.

Esto nunc A B C portio ellipsis vel circuli, dimidiâ figurâ major. Absolvatur figura, & producat² B D usque dum sectioni occurrat in E; erit igitur portionis A E C diameter E D, & B D E diameter totius figuræ. Et quoniam in B D E diametro est figuræ totius centrum gravitatis, (hoc enim ex prædemonstratis constabit, si in duo æqualia tota figura dividatur diametro quæ ipsi A C sit parallela,) & in eadem centr. gravitatis A E C portionis minoris, sicut modò ostensum fuit; erit quoque centr. gravitatis portionis reliquæ A B C in B D E²; quod erat ostendendum. TAB. XXXIV. Fig. 5. 2 8. lib. 5. Archim. de Equipond.

* L E M M A.

Est¹ linea E B, cui ad utrumque terminum adjiciantur æquales duæ E S, B P, & insuper alia P D. Dico id quo rectangulum E D B excedit E P B, æquari rectangulo S D P. Est enim rectangulum E D B æquale istis duobus, rectangulo E D P & rectangulo sub E D, P B: quorum ultimum superat rectangulum E P B rectangulo D P B. Igitur excessus rectanguli E D B supra rectangulum E P B æqualis est duobus istis, rectangulo E D P, & D P B. Sed rectangulum E D P addito rectangulo D P B, id est rectangulo sub E S, D P, æquale fit rectangulo S D P. Manifestum est igitur, excessum rectanguli E D B supra E P B, æquari rectangulo S D P. TAB. XXXIV. Fig. 6.

† Est² rursus linea E B, cui ad utrumque terminum auferant² TAB. XXXIV. Fig. 7.

R r 3

ran

* Idem hoc aliter demonstratum reperi apud Pappum, lib. 7. Prop. 24.

† Vide eundem, lib. 7. Prop. 57.

rantur duæ æquales ES , BP , & insuper alia PD . Dico iterum, id quo rectangulum EDB excedit EPB , æquari rectangulo SDP . Rectangulum enim EDB æquale est istis duobus, rectangulo EDP , & rectangulo sub ED , PB ; horum autem EDP rursus æquale est duobus, rectangulo nimirum SDP , & ei quod continetur sub ES , DP , sive rectangulo DPB . Igitur rectangulum EDB istis tribus æquale est rectangulis, SDP , DPB , & rectangulo sub ED , PB ; horum vero duo postrema æquantur rectangulo EPB ; ergo rectangulum EDB æquale est duobus, rectangulo nimirum SDP & EPB , unde apparet excessum rectanguli EDB supra rectangulum EPB æquari rectangulo SDP .

THEOREMA V.

D Atâ portione hyperboles, vel ellipsis vel circuli portione, dimidiâ figurâ non majore; si ad diametrum constituatur triangulus hujusmodi, qui verticem habeat in centro figuræ, & basin portionis basi æqualem & parallelam; eam verò quæ deinceps à vertice ad mediam basin pertingit tantam, ut possit ipsa rectangulum comprehensum lineis, quæ inter portionis basin & terminos diametri figuræ interjiciuntur. Erit magnitudinis, quæ ex portione & præscripto triangulo componitur, centrum gravitatis punctum idem quod est trianguli vertex, centrum nimirum figuræ.

TAB. XXXV.
Fig. 1. 2. 3.

Data sit portio hyperboles, vel ellipsis vel circuli portio dimidiâ figurâ non major, ABC . Diameterejus sit BD , & figuræ diameter BE , in cujus medio centrum figuræ F . Et sumatur FG quæ possit rectangulum BDE , ductâque KGH æquali & parallelâ basi AC , quæque ad G bisariam

nam dividatur, jungantur KF , FH . * Demonstrandum est, quod magnitudinis compositæ ex portione ABC & triangulo KFH , centrum gravitatis est punctum F .

Si non est in F , sit si fieri potest primum ab ea parte puncti F quæ est versus ABC portionem, atque esto punctum L ; constat autem futurum in recta $B DG$, quum in hac sint utraque centra gravitatis portionis & trianguli KFH . Jungantur AB , BC , & quam rationem habet GF ad FL , eam habeat magnitudo composita ex triangulis ABC , KFH ad spatium quoddam M ; & circumscribantur portioni & triangulo KFH figuræ ordinatè, ex parallelogrammis quorum omnium sit eadem latitudo, ita ut duo simul excessus quibus istæ figuræ superant portionem ABC & triangulum KFH , minores sint spatio M . Igitur duorum simul triangulorum ABC , KFH ad dictos duos excessus sive residua major erit ratio quàm ad M , id est quàm GF ad FL ; ac proinde longè major ratio portionis ABC unà cum KFH triangulo ad eadem residua quàm GF ad FL . Sit itaque NF ad FL , sicut portio ABC simul cum triangulo KFH ad duo residua, & cadet terminus N ultra trianguli basin KH . Jam per F ducatur OZ parallela basi AC vel KH ; & duorum quorumcunque parallelogrammorum, quæ in portione & in triangulo KFH æqualiter à diametro distabunt, ut sunt RQ , ΣT , sint centra gravitatis V & X ; per quæ ducatur recta $Z\Lambda\Delta\Omega$, secans lineam OZ in Υ ; & ducatur RP basi AC parallela, abscissæque ad verticem lineæ PB sumatur æqualis, ex altero diametri figuræ termino, ES .

Quoniam igitur ad diametrum figuræ ordinatim sunt applicatæ CD & RP , erit ut rectangulum BDE ad rectangulum BPE , ita quadratum CD ad RP quadratum²; ^{2 21. lib. 2. Con.} verum ut CD ad RP , hoc est, ut HG ad ΨG , ita est HF ad ΣF , & ita $Z\Upsilon$ ad $\Lambda\Upsilon$; igitur ut CD quadratum ad quadratum RP , id est ut rectangulum BDE ad BPE , ita

* Notatu dignum quod KF , FH in hyperbole sunt asymptoti.

ita est quadratum ZY ad ΛY quadratum. Quare & per conversionem rationis, sicut rectangulum BDE ad differentiam rectangulorum BDE , BPE , ita quadratum ZY ad differentiam quadratorum ZY , ΛY . Est autem differentia rectangulorum BDE , BPE , æqualis rectangulo SDP , sicut lemmate præmissio demonstratum est; differentia verò quadratorum ZY , ΛY , æqualis quadrato $Z\Lambda$ & duobus rectangulis $Z\Lambda Y$ 3, sive quod idem est, rectangulis $Z\Lambda X$, $Z\Lambda Y$ bis sumptis, hoc est, duplo rectangulo sub $Z\Lambda$, XY . Itaque sicut est rectangulum BDE ad rectangulum SDP , ita quadratum ZY ad duplum rectangulum sub XY , $Z\Lambda$. quare cum rectangulum BDE quadrato FG æquale sit 4, ideoque & quadrato ZY , erit quoque rectangulum SDP æquale duplo rectangulo sub XY , $Z\Lambda$ 5. Quia verò F punctum dividit BE per medium, suntque æquales BP , ES , etiam FP , FS æquales erunt; unde additâ utrique FD , erit SD æqualis toti $PF D$ id est $\Delta Y \Omega$: sed $\Delta Y \Omega$ dupla est lineæ VY , quia bis continet utramque $Y\Delta$, ΔV in hyperbole, in ellipsi verò & circulo bis utramque $V\Omega$ & ΩY ; ergo & SD dupla VY , ideoque rectangulum SDP æquale duplo rectangulo sub YV , $\Omega\Delta$. Sed idem rectangulum SDP æquale ostensum fuit duplo rectangulo sub XY , $Z\Lambda$; ergo æquale est rectangulum sub YV , $\Omega\Delta$, rectangulo sub XY , $Z\Lambda$. Est itaque YV ad YX , ut ΛZ ad $\Omega\Delta$ 6; verum ut ΛZ ad $\Omega\Delta$, ita est parallelogrammum ΣT ad RQ ; itaque & YV est ad YX ut parallelogrammum ΣT ad RQ parallelogr. Sunt autem puncta X & V centra gravitatis dictorum parallelogrammorum; ergo magnitudinis ex utroque parallelogrammo compositæ centrum gravitatis est punctum Y 7. Eâdem ratione ostendi potest de reliquis omnibus parallelogrammis, quod duorum quorumlibet oppositorum centrum gravitatis est in linea OZ . Ergo totius magnitudinis quæ ex duabus figuris utrimque ordinatè circumscriptis componitur, centr. gravitatis in eadem OZ reperiri necesse est. Sed ejusdem compositæ magnitudinis centrum gravit. est quoque in recta $B DG$,

3 4. lib. 2.
Elem.

4 Ex confir.

5 3. 5. E.
lem.

6 16. 16. 6.
Elem.

7 7. lib. 1.
Archim. de
Equip.

B D G, quoniam in ea sunt centra gravitatis utriusque figuræ circumscriptæ⁸; igitur magnitudinis ex dictis figuris⁸ *Theor. 3. h.* compositæ centrum grav. est ipsum punctum F. Positum autem fuit L punctum centrum gravitatis ejus magnitudinis quæ ex portione A B C & K F H triangulo componitur; igitur magnitudinis reliquæ, compositæ ex duobus residuis, quæ in figuris circumscriptis remanent, erit centr. grav. in producta L F, ubi ea sic terminatur, ut pars adjecta habeat ad F L eandem rationem quam portio A B C simul cum K F H triangulo ad dicta duo residua⁹: is autem terminus est N; itaque N punctum est centrum gravitatis duorum residuorum. Quod fieri nequit; Nam si per N ducatur recta basi K H parallela, erunt ab una parte spatia omnia è quibus utrumque residuum constat. Non est igitur L punctum centrum gravitatis magnitudinis ex portione A B C & K F H triangulo compositæ. Sed neque erit ab altera parte puncti F. Namque hoc si dicatur, planè simili demonstratione eò devenietur ut duorum residuorum quæ demptâ portione A B C & K F H triangulo, in circumscriptis figuris supererunt, centrum gravitatis sit ultra portionem A B C; quod est æquè absurdum. Reliquum est igitur ut sit ipsum punctum F; quod erat ostendendum.

⁹ p. lib. 1.
Archim. de
Equipond.

T H E O R E M A V I.

Omnis hyperboles portio ad triangulum inscriptum, eandem cum ipsa basin habentem eandemque altitudinem, hanc habet rationem; quam subsesquiā altera duarum, lateris transversi & diametri portionis, ad eam quæ ex centro sectionis ducitur ad portionis centrum gravitatis.

Est hyperboles portio, & inscriptus ei, qualem diximus, *TAB. XXXIV.*
triangulus A B C; diameter autem portionis sit B D, & *Fig. 3.*
latus transversum sive diameter sectionis B E, in cujus medio centrum sectionis F. Et ponatur centrum gravitatis in
Tom. II. S s *portione*

portione punctum L. Dico portionem ad inscriptum triangulum A B C eam habere rationem, quam duæ tertiæ totius E D ad F L.

Constituatur enim ad diametrum, ut in præcedentibus, triangulus K F H; scilicet ut quadratum F G æquetur rectangulo E D B, & ut basis K H sit basi A C æqualis & parallela: ejusque trianguli sit centrum gravitatis M, sumptâ nimirum F M æquali duabus tertiis lineæ F G ¹.

¹ 14. lib. 1.
Arch. de
Equip.

Est itaque triangulus K F H ad A B C triangulum, ut F G ad B D: verum ut F G ad B D, ita est E D ad F G, quia quadratum F G æquale est rectangulo E D B; & ut E D ad F G, ita sunt duæ tertiæ E D ad duas tertias F G, id est F M; ergo triangulus K F H ad triangulum A B C, ut duæ tertiæ E D ad F M. Est autem portio hyperboles

² 7. lib. 1.
Archim. de
Equipond.

ad triangulum K F H, ut F M ad F L ², quoniam æquilibrium portionis & trianguli K F H est in puncto F ³, & centra gravitatis singulorum puncta L & M; ex æquali igitur in proportione perturbata, erit portio ad triangulum

³ Theor. 5. h.

⁴ 23. lib. 5.
Elem.

A B C, ut duæ tertiæ lineæ E D ad F L ⁴: quod erat demonstrandum.

THEOREMA VII.

OMnis ellipsis vel circuli portio ad triangulum inscriptum, eandem cum ipsa basin habentem eandemque altitudinem, hanc habet rationem; quam subsesquialtera diametri portionis reliquæ, ad eam quæ ex figuræ centro ducitur ad centrum gravitatis in portione.

TAB. XXXV.
Fig. 4. 5.

Est ellipsis vel circuli portio primùm dimidiâ figurâ non major, & inscriptus ei triangulus A B C, eandem cum portione basin habens, eandemque altitudinem; diameter autem portionis sit B D, quæ producat, & manifestum est quod transibit per centrum figuræ; sit hoc F, & diameter portionis reliquæ D E. Et ponatur centrum gravitatis in portione

tione

Fig. 1.




Fig. 3.




Fig. 2.




Fig. 4.




Fig. 5.




Fig. 6.





Fig. 7.



Fig. 8.



tionem $A B C$ punctum L . Dico igitur portionem ad inscriptum sibi triangulum $A B C$ eam habere rationem, quam duæ tertiæ $E D$ ad $F L$. Constituatur enim ut supra triangulus $K F H$, cujus nimirum basis $K H$ sit basi $A C$ æqualis & parallela, & $F G$ quæ à vertice ad mediam basin pertingit possit rectangulum $B D E$: & centrum gravitatis trianguli $K F H$ sit M punctum, sumptâ scilicet $F M$ æquali duabus tertiis lineæ $F G$ ¹.

¹ 14. lib. 1.
Arch. de
Equip.

Triangulus igitur $K F H$ est ad triangulum $A B C$, ut $F G$ ad $B D$; ut autem $F G$ ad $B D$, sic est $E D$ ad $F G$, quia quadratum $F G$ æquale est $B D E$ rectangulo; & ut $E D$ ad $F G$, sic sunt duæ tertiæ $E D$ ad duas tertias $F G$, id est, ad $F M$. Ergo triangulus $K F H$ ad triangulum $A B C$, sicut duæ tertiæ $E D$ ad $F M$. Portio autem $A B C$ est ad triangulum $K F H$, ut $F M$ ad $F L$ ², quoniam æquilibrium eorum est in F ³, & centra gravitatis singulorum puncta L & M ; Ergo ex æquali in proportione perturbata, erit portio $A B C$ ad $A B C$ triangulum, sicut duæ tertiæ $E D$ ad $F L$ ⁴.

² 7. lib. 1.
Archim. de
Equipond.
³ Theor. 5. lib. 1.

Sit nunc portio $A B C$ dimidiâ figurâ major. Dico eam rursus ad inscriptum triangulum eam habere rationem, quam duæ tertiæ $E D$ ad $F L$.

⁴ 23. lib. 5.
Elem.
TAB. XXXVI.
Fig. 1. 2.

Ponatur enim portionis reliquæ $A E C$ centrum gravitatis H punctum, & jungantur $A E$, $E C$. Igitur per ea quæ jam ostendimus, erit portio $A E C$ ad $A E C$ triangulum, ut duæ tertiæ $B D$ ad $F H$; verum ut triangulus $A E C$ ad triangulum $A B C$, sic est $E D$ ad $B D$, sive duæ tertiæ $E D$ ad duas tertias $B D$; ex æquali igitur in proportione perturbata, erit sicut portio $A E C$ ad triangulum $A B C$, ita duæ tertiæ $E D$ ad $F H$ ⁵. Sed ut portio $A B C$ ad $A E C$ portionem, ita est $F H$ ad $F L$ ⁶, quoniam totius figuræ centrum gravitatis est F , centraque dictarum portionum L & H ; Ergo iterum ex æquali in proportione perturbata, erit portio $A B C$ ad $A B C$ triangulum, ut duæ tertiæ $E D$ ad $F L$. Omnis igitur Ellipsis vel circuli portio &c. Quod erat demonstrandum.

⁵ 23. lib. 5.
Elem.

⁶ 8. lib. 1.
Arch. de
Equipond.

THEOREMA VIII.

IN semicirculo & quolibet circuli sectore, habet arcus ad duas tertias rectæ sibi subtensæ hanc rationem, quam semidiameter ad eam, quæ ex centro ducitur ad sectoris centrum gravitatis.

TAB. XXXVI.
Fig. 3.

Est primùm semicirculus $A B C$, descriptus centro D , sectusque bifariam rectâ $B D$, in qua centrum gravitatis semicirculi sit E . Dico arcum $A B C$ esse ad duas tertias $A C$, sicut $B D$ ad $D E$. Jungantur enim $A B$, $B C$. Igitur, ut semicirculus ad triangulum $A B C$, sic sunt duæ tertiæ $B D$ ad $D E$ ¹, est enim $B D$ æqualis diametro portionis reliquæ. Verùm etiam ut semicirculus, id est, ut triangulus habens basin æqualem arcui $A B C$ & altitudinem $B D$, ad $A B C$ triangulum, ita est arcus $A B C$ ad $A C$ rectam; ergo ut arcus $A B C$ ad $A C$, ita sunt duæ tertiæ $B D$ ad $D E$, & permutando, ut arcus $A B C$ ad duas tertias $B D$, ita $A C$ ad $D E$, sive ita $\frac{2}{3} A C$ ad $\frac{2}{3} D E$, unde rursus permutando, ut arcus $A B C$ ad $\frac{2}{3} A C$, ita $\frac{2}{3} B D$ ad $\frac{2}{3} D E$, sive ita, $B D$ ad $D E$.

TAB. XXXVI.
Fig. 4.

Sit deinde sector $D A B C$, semicirculo minor, bifariam sectus rectâ $D B$, in qua sectoris centrum gravitatis ponatur E punctum, & ducatur subtensa $A C$. Dico rursus, arcum $A B C$ ad duas tertias rectæ $A C$ eam habere rationem, quam $B D$ ad $D E$. Jungantur enim $A B$, $B C$, & totius circuli sit diameter $K D B$, quæ producat in Q , ut fiat $Q F$, ad $B F$, sicut portio $A C B$ ad $A B C$ triangulum, & jungantur $A Q$, $Q C$; erit jam triangulus $A Q C$ portioni $A C B$ æqualis. Ponantur deinde centra gravitatis, G trianguli $A C D$, & H portionis $A C B$; & sicut $D Q$ ad $Q F$, ita sit $H D$ ad $D R$.

Quia igitur sicut portio $A C B$ sive triangulus $A Q C$ ad triangulum $A B C$, id est, ut $Q F$ ad $B F$, ita $\frac{2}{3} K F$ ad $D H$ ³, erit rectangulum sub $Q F$, $D H$, æquale duabus tertiis




Fig. 1.





Fig. 3.







Fig. 2.






Fig. 5.





Fig. 4.



tertiis rectanguli $K F B$ ⁴, id est, duabus tertiis quadrati ^{16. lib. 6. Elem.}
 $A F$; sed idem rectangulum sub $Q F$, $D H$, æquale est re-
 ctangulo $Q D R$, quia ut $Q D$ ad $Q F$, ita fecimus esse
 $D H$ ad $D R$; ergo rectangulum $Q D R$ æquale duabus ter-
 tiis quadrati $A F$, ideoque ut $Q D$ ad $A F$ ita $\frac{2}{3}$ $A F$ ad $D R$
⁵ 16. lib. 6. Elem. sed ut $Q D$ ad $A F$, sic quoque est rectangulum sub $Q D$,
 $A F$, cui æquale quadrilaterum $D A Q C$, id est, sector
 $D A B C$ ad $A F$ quadratum; ergo & sector $D A B C$ ad
 quadratum $A F$, ut $\frac{2}{3}$ $A F$ ad $D R$. Porro quoniam E cen-
 trum gravitatis est totius sectoris, & H centrum grav. por-
 tionis $A C B$, G verò trianguli $A C D$, constat esse, sicut
 triangulus $A C D$ ad $A C B$ portionem sive ad triangulum
 $A Q C$, id est, ut $D F$ ad $F Q$, ita $H E$ ad $E G$ ⁶ 8. lib. 1. Arch. de
 Equipond. convertendo & per compositionem rationis erit ut $D Q$ ad
 $D F$, ita $G H$, ad $H E$. Sed quia fecimus ut $D Q$ ad $Q F$,
 ita $H D$ ad $D R$, erit quoque per conversionem rationis,
 ut $D Q$ ad $D F$, ita $H D$ ad $H R$; ergo $H D$ ad $H R$ ut
 $G H$ ad $H E$; quare & reliqua $G D$ ad reliquam $E R$, ut
 $H D$ ad $H R$ ⁷ 19. lib. 5. Elem. hoc est, ut $D Q$ ad $D F$. Sicut autem $D Q$
 ad $D F$, ita est quadrilaterum $D A Q C$, cui æqualis sector
 $D A B C$ ad $A C D$ triangulum; igitur sector $D A B C$
 ad $A C D$ triangulum ut $G D$ ad $E R$: Est autem $A C D$
 triangulus ad $D F$ quadratum, ut $A F$ ad $D F$, sive ut $\frac{2}{3}$ $A F$
 ad $\frac{2}{3}$ $D F$ id est $D G$. Igitur ex æquali in proportionem perturbata,
 sicut sector $D A B C$ ad quadratum $D F$, ita $\frac{2}{3}$ $A F$ ad $E R$
⁸ 23. lib. 5. Elem. & convertendo, quadratum $D F$ ad sectorem $D A B C$,
 ut $E R$ ad $\frac{2}{3}$ $A F$. Fuit autem ante ostensum, quadratum
 $A F$ esse ad sectorem $D A B C$, ut $D R$ ad $\frac{2}{3}$ $A F$; igitur
 duo simul quadrata, $D F$ & $A F$, sive unum quadratum
 $D A$ ad sectorem $D A B C$ ut dux simul $E R$ & $R D$, id
 est ut tota $E D$ ad $\frac{2}{3}$ $A F$ ⁹ 24. lib. 5. Elem. Est verò etiam quadratum $D A$
 ad $D A B C$ sectorem, sicut linea $D A$ ad arcum $A B$, quia
 nimirum sector $D A B C$ æqualis est rectangulo, basin ha-
 benti æqualem arcui $A B$ & altitudinem $D A$; ergo sicut
 $D A$ ad arcum $A B$, ita $E D$ ad $\frac{2}{3}$ $A F$; & permutando,
 arcus $A B$ ad $\frac{2}{3}$ $A F$, sive arcus $A B C$ ad $\frac{2}{3}$ $A C$, ut $D A$
 vel $B D$ ad $D E$.

TAB. XXXVI.
Fig. 5.

Estoque jam denique sector D A B C semicirculo major, & ponantur ea quæ prius, & perficiatur circulus B A F C, & totius diameter sit B D F, in qua erit quoque centrum grav. sectoris reliqui D A F C¹, quot sit G.

¹ 8. lib. 1.
Arch. de
Equip.


Quia igitur circuli totius centrum gravitatis est D, & duorum sectorum centra grav. E & G, erit sicut sector D A B C, ad sectorem D A F C, id est, sicut arcus A B C ad arcum A F C, ita G D ad D E²: verum ut arcus A F C ad $\frac{2}{3}$ A C, ita est D F ad D G, sicuti modò ostensum est; ergo ex æquali in proportionem perturbata, sicut arcus A B C ad $\frac{2}{3}$ A C, ita erit D F vel B D ad D E³. Constat itaque quod in semicirculo & quolibet circuli sectore &c. quod erat demonstrandum.

² 8. lib. 1.
Arch. de
Equip.

³ 23. lib. 5.
Elem.

E' E' E' T A Σ I Σ
CYCLOMETRIÆ
CLARISSIMI VIRI,
GREGORII à S. VINCENTIO, S. J.

Editæ Anno D. MDCLXVII.



Nte quinquennium circiter Vir eruditissimus & Geometriæ celeberrimus, Gregorius à S. Vincentio, quatuor modos proposuit quadrandi Circulum, unum verò eorum etiam Quadraturæ Hyperboles applicavit: quem cæteris potiore ab ipso existimari ex multis indiciis colligere licet. Unum est hoc ipsum quod duas diversarum figurarum quadraturas per eundem hunc demonstravit; alterum quod evidentior multò sit hic modus quàm reliqui tres; ideoque minus errori obnoxius videri debuerit; nonnullum etiam quod primo eum loco produxit; Et denique hoc maximum est, quod in iis quæ ad lectorem in principio totius operis præfatur, ubi suæ inventionis

Fig. 2.




Fig. 1.




Fig. 3.




Fig. 4.






Fig. 5.





ventionis historiam & progressum paucis exposuit, nullius modi præter hunc unum meminerit. Potuit autem & aliam rationem habuisse tres posteriores quadraturas illic silentio prætereundi, eam videlicet, quod quatuor omnes sciret ex iisdem principiis deductas & demonstratas esse. Sed mihi vel alterutra harum considerationum sufficere visa est, ut persuaderet unam pro omnibus fore discussionem quæ quadraturam primariam infirmatura esset, reliquarum agmen ducentem. Si enim erratum in ea ostenderimus quæ minus obscuritatis habet, non video quâ ratione melior successus expectandus sit in tribus sequentibus, quæ maximâ caligine involvuntur, quasque Auctor ipse vel uni illi posthabere videtur. Principia quæ communia esse omnibus quadraturis dixi, ea sunt nova inventa de Proportionalitatibus Geometricis sive de Proportionum proportionibus, & de Ductibus plani in planum. Quæ quidem prorsus non impugno, nam & solida corpora quæcunque in Geometria considerare licere existimo, & alia omnia adhiberi posse, quæ modo ullo auxilio fore credimus ad investigationem veri. Unum tamen prætermittere nequeo quin dicam, Clar. Virum non satis feliciter quædam inventa in materia Proportionalitatum ad Quadraturam applicasse, atque hinc, meâ opinione, ipsi extitisse erroris causam. Primum omnium id in propof. 39. lib. 10. Oper. Geom. * observaveram. Positis enim numeris fortuitò assumptis, 2, 3, 4, 5; deinde horum quadratis 4, 9, 16, 25; & quadratorum quadratis, 16, 81, 256, 625; videbam duodecim hisce eandem demonstrationem convenire, quæ in dicta prop. 39. scripta est de totidem parallelepipedis. Et quum tamen conclusio nullam idoneam admitteret interpretationem, non dubitabam quin æquè ipsius ac mea argumentatio, quam iisdem verbis formaveram, aliquid absurdi contineret. Posterior autem demonstrationis pars rectè se habebat, ideoque arguebat peccatum in

* In hac Propof. 39. etiam Cartesius paralogismum ostendit Epist. ad Schotenium.

in priori. Sed veritū ne intricata & prolixa hinc nobis disputatio oriretur, ad alias inventiones me converti, & tandem ea sese obtulerunt, quæ paucis hic perscribere constitui. Nulla per hæc propositionum Cl. Viri in controversiam vocabitur; sed contrā multis earum probatis, atque in usum meum conversis, eò rem deducam, ut si quidem non impossibile dicet quadraturam suam ad exitum perducere, & per eam reapse invenire rectilineum circulo æquale, ostendam quò id facillimè impoſterum assequatur. Deinde vestigia ipsius insistentis demonstrabo, quibus hætenus nobis præcessit, iis nequaquam ad optatum finem perveniri posse, sed esse subsistendum ad conclusiones perquam absurdas. Atque ut ad rem veniamus.

TAB. XXXVII.
Fig. 1.

Esto circulus cujus centrum F , diameter CD . Et diviso radio FC bifariam in G , ducantur ipsi ad angulos rectos FE , GH . Dico, datâ ratione segmenti CHG ad $GHEF$ segmentum, dari quoque rationem circuli ad inscriptum sibi hexagonum regulare. Jungantur enim FH , HC , & manifestum est triangulum FHC fore æquilaterum; item quadrantis arcum CE triplum fore arcus HE . Si ergo data sit ratio segmenti CHG ad $GHEF$ segmentum, componendo quoque, data erit ratio quadrantis $FE C$ ad segmentum $GHEF$. Sed data quoque est ratio sectoris FHE ad quadrantem $FE C$, ergo datur quoque ratio segmenti $GHEF$ ad sectorem FHE ; ac proinde dabitur quoque ratio segmenti $GHEF$ ad triangulum FHG ; quare & ratio sectoris FHE ad triangulum FHG data erit. Sed huic rationi eadem est ratio sectoris FHC ad triangulum FCH , (quoniam hæc utriusque præcedentium dupla sunt;) eademque est circuli ratio ad hexagonum regulare sibi inscriptum. Ergo & hanc datam esse apparet: quod erat demonstrandum.

TAB. XXXVII.
Fig. 2. 2.

Suñto nunc lineæ AB , CD , EF , singulæ æquales diametro circuli CD : & super unaquaque harum construantur bina quadrata. Deinde verticibus A & B describantur semiparabolæ AVG , BTH , quarum bases sint quadratorum latera

latera B G, A H. In duobus sequentibus quadratis ducantur diagonii C I, D K. Sed in postremis rursus semiparabolæ describantur E Σ L, F Π M, quarum vertices E & F, axes vero sint quadratorum latera E Ψ , F Ω , & bases Ψ L, Ω M. Porro divisis bifariam singulis lineis quæ ab initio positæ fuerunt, in N, O, P, & medietatibus rursus bifariam in Q, R, S, ducantur per divisionum puncta, quadratorum lateribus parallelæ, T V, X Y; Z Γ , Δ Θ , Π Σ , Λ Ξ .

Ostendit itaque Cl. V. in demonstr. prop. 52. lib. 10. Oper. Geom. & verissimum est, in circulo superiori segmentum C H G ad segmentum G H E F, eandem habere rationem quam habet hîc solidum quod fit ex ductu plani A Y Q in planum A H X Q, ad solidum ortum ex ductu plani Q Y V N in planum Q X T N; sicut enim ille in suo schemate sumit æquales lineas *h i*, *k l*, ita nobis æquales sunt sumptæ in circulo, C G, G F, & hisce pares A Q, Q N.

Atque ut ipsa demonstrandi methodus quoque noscatur, ea hujusmodi est. In prop. 51. lib. 10. ostenditur, solidum quod fit ex ductu semiparabolæ A B G in semipar. A B H, æquari semicylindro, basin habenti semicirculum C E D & altitudinem C D. Deinde in Corollario ejusdem prop. idem quoque singulis partibus quod totis solidis convenire docetur. Nimirum id solidum quod fit ex ductu plani Q Y V N in planum Q X T N, æquatur quoque parti dicti semicylindri quæ insistit segmento G H E F; Itemque solidum ex ductu plani A Y Q in pl. A H X Q, æquatur ejusdem semicylindri parti quæ insistit segmento C H G. Quorum hoc vel ex eo constat, quod alioqui duo ista solida simul sumpta, hoc est, solidum ex ductu plani A V N in pl. A H T N, æquale non esset dimidio ejus quem diximus, semicylindri; & consequenter falsum quoque esset quod in confesso est, nimirum solidum ex ductu semiparab. A B G in semiparab. A B H æquari toti semicylindro. Apparet igitur, quoniam dictæ semicylindri partes eandem inter se rationem

habent quam bases quibus insistant, certum esse quod diximus, segmentum circuli CHG ad $GHEF$, esse ut solidum ex ductu plani $A Y Q$ in pl. $A H X Q$ ad solidum ex ductu plani $Q Y V N$ in pl. $Q X T N$.

Hæc ita enucleatè scribere volui, ne cui ignaro fortasse naturæ demonstrationum quibus Cl. V. utitur, scrupulus restare posset, quod ubi ille in d. prop. 52, lib. 10, duos circuli segmenta considerat, quale ferè est $GHEF$, ego pro altero eorum sumpserim segmentum CHG : Quodque in linea AB ab ipso termino A æquales partes capiam AQ , QN . Ipsum autem Cl. Virum hæc remorari non possunt, neque hîc, neque insequentibus; quia cum in d. prop. 52. & 44, lib. 10. præcipit in linea ab æquales inter se sumi hi , kl , scit hoc nullam limitationem admittere; sicut & in schemate communi prop. 39, lib. 10, ubi vis in linea ab sumitur ik , quæ dividitur in duas æquales im , mk . Idem contingit in prop. sequenti 40.

Revertor autem ad propositum, & constat nunc quidem, si detur Ratio solidi quod fit ex ductu plani $A Y Q$ in pl. $A H X Q$, ad solidum ex ductu plani $Q Y V N$ in pl. $Q X T N$, eo ipso dari quoque rationem segmenti CHG ad segmentum $GHEF$, ac proinde continuò tunc inveniri posse quam rationem circulus habeat ad inscriptum hexagonum regulare.

Vocemus autem brevitatis gratia, id quod fieri diximus ex ductu plani $A Y Q$ in planum $A H X Q$, solidum HY . Item quod fit ex ductu plani $Q Y V N$ in planum $Q X T N$, solidum XV . Similiter quod oritur ex ductu plani $C \odot R$ in planum $CK \Delta R$, vocemus solidum $K \odot$; eâdemque brevitate dicamus solida $\Delta \Gamma$, $M \Xi$, $\Lambda \Sigma$, quibus quæ denotentur jam satis intelligitur.

His sic constitutis, sciendum est, omnem spem & fundamentum perficiendæ Quadraturæ Cl. Viro in eo positum esse, quod existimet rationem solidi HY ad solidum XV (quam unicam tantum desiderari jam admonui) facile inveniri posse, si cognitæ sint duæ rationes hæ, nimirum ratio solidi

$M \Xi$

M Ξ ad sol. $\Lambda \Sigma$, & ratio solidi K Θ ad sol. $\Delta \Gamma$. Sic enim tunc argumentabitur; Nota est ratio solidi M Ξ ad sol. $\Lambda \Sigma$, item ratio solidi K Θ ad sol. $\Delta \Gamma$, ergo notum quoque quoties illa ratio hanc contineat; Quoties autem illa hanc continet toties hæc ipsa, scilicet ratio solidi K Θ ad sol. $\Delta \Gamma$, continet rationem solidi H Y ad X V; ergo & hæc ratio nota erit. Quomodo hæc intelligenda sint paulò inferiùs melius patebit, ubi eandem argumentationem repetemus. Interea certo scio, nihil horum quæ dixi mihi à Cl. V. negatum iri, modò consideret in linea A B, sumptas esse æquales inter se partes A Q, Q N, & hisce pares C R, R O; E S, S P.

Si igitur indicavero ipsi quæ sit ratio solidi M Ξ ad sol. $\Lambda \Sigma$, item quæ sit ratio solidi K Θ ad sol. $\Delta \Gamma$, & ne tum quidem dicere possit quam rationem habeat solidum H Y ad sol. X V, fateatur sane se frustra utramque Quadraturam tentasse, tam Circuli quam Hyperboles. Circuli; quoniam tunc videbit nequaquam procedere Propositionem 44. lib. 10. Oper. Geom. quæ vana & inanis erit, nisi ex notis rationibus solidi M Ξ ad sol. $\Lambda \Sigma$, & solidi K Θ ad sol. $\Delta \Gamma$, innotescat ratio solidi H Y ad sol. X V. Hyperboles vero; quoniam prop. 146. ejusd. lib. 10. cui hæc quadratura innitur, eadem est cum dicta prop. 44. & iisdem verbis Hyperbolæ applicatur.

Sin vero datis istis duabus rationibus invenire posthac poterit rationem solidi H Y ad sol. X V, tum se credat Circulum reverâ quadravisse. Nota enim sic erit ratio segmenti C H G in circulo ad segmentum G H E F, & reliqua facile perficientur.

Dicam autem nunc ipsas Rationes. Et primam quidem, hoc est rationem solidi M Ξ ad sol. $\Lambda \Sigma$, ajo esse eandem quæ numeri 53 ad 203. Alteram vero, rationem solidi K Θ ad sol. $\Delta \Gamma$, eam quæ 5 ad 11. atque horum utrumque infra sum demonstraturus.

Priùs autem quod ab initio promisi etiam ostendam, hisce Rationibus cognitis, tamen rationem sol. H Y ad sol. X V,

per ea quidem quæ nos adhuc docuit V. Cl. inveniri non posse. Etenim inventurus ex datis rationibus, sol. M Ξ ad sol. $\Lambda \Sigma$, & solidi K Θ ad sol. $\Delta \Gamma$, rationem tertiam solidi H Y ad sol. X V, in hunc modum ratiocinabitur, ut videre est ex demonstratione prop. 44. suprâ citatæ, cui hunc casum convenire liquidò constat. Dicit enim, Notæ sunt prima & secunda ratio, (istæ enim sunt 53 ad 203, & 5 ad 11,) ergo notum quoque quoties prima secundam contineat. Sed quoties prima continet secundam, toties secunda continet tertiam, (hoc asserit prop. 40. lib. 10. oper. Geom.) Ergo notum quoque quoties secunda tertiam contineat. Quare cum nota sit secunda, etiam tertia nota erit, ea nimirum quam habet solidum H Y ad sol. X V.

Consequenter hoc nunc definiendum ei incumbet, Quoties Ratio harum prima secundam contineat; hoc est, quoties ratio 53 ad 203, contineat rationem 5 ad 11. Sed enim quo sensu verbum *continere* hîc explicaturus est? Num eo, ut idem significet quod alibi *continere per multiplicationem*? utque ratio 53 ad 203 rationem 5 ad 11. multiplicare dicatur vel bis (hoc est ut illa hujus sit duplicata, ita enim *continere* intelligendum videtur in propositione 40. lib. 10, modo citata) vel ter, vel quater, vel sæpius etiam. Et hoc quidem esse non potest; nam ratio 53 ad 203, rationis 5 ad 11, neque duplicata est neque triplicata vel ulterius multiplex, quum demum ratio 53 ad 256 $\frac{13}{27}$ sit duplicata rationis 5 ad 11.

An igitur verbum *Continere* in eum sensum trahet, quem habet in propositione 125. lib. 8. Oper. Geom.? Vix quidem illud suspicari possum; sed etiamsi vellet rursus inde absurdum consequetur. Nam secundum interpretationem istam; quoties ratio 53 ad 203 continet rationem 5 ad 11, toties hæc ipsa continebit rationem 5075 ad 6413; hoc autem patebit horum numerorum inter se rationis examinanti secundum regulam dictæ propositionis 125. Effet igitur ratio solidi H Y ad sol. X V, hoc est, ratio segmenti circuli ab initio propositi C H G, ad segmentum G H E F, eadem quæ

5075 ad 6413. Quare qualium partium segmentum C H G esset 5075, talium segmentum G H E F esset 6413; & proinde quadrans F C E 11488; & sector F H E (qui quadrantis tertia pars est) $3829\frac{1}{3}$; & triangulum G H F $2583\frac{2}{3}$. Sicut autem sector F H E ad triang. G H F, ita est sector F H C ad triangul. F C H, & ita circulus C D ad inscriptum sibi hexagonum regulare. Ergo quoque qualium partium circulus C D esset $3829\frac{1}{3}$ talium hexagonum inscriptum foret $2583\frac{2}{3}$. Qualium autem hexagonum inscriptum est $2583\frac{2}{3}$, talium hexagonum regulare circumscriptum est $3444\frac{8}{9}$; quoniam hoc inscripti est sesquitertium: Ergo qualium partium circulus C D esset $3829\frac{1}{3}$, talium hexagonum circumscriptum esset $3444\frac{8}{9}$, atque ita esset ipso circulo minus, quod est absurdum.

Manifestum igitur fecimus, ex duabus interpretationibus verbi *Continere*, neutram casui nostro accommodari posse. Aliam autem præter illas nullam in suo opere attulit; non docuit igitur modum determinandi, quoties ratio sol. M Σ ad sol. A Σ contineat rationem sol. K Θ ad solid. Δ Γ , ac proinde nec determinari poterit quoties hæc ratio contineat rationem solidi H Y ad solid. X V. Quare liquet, hanc rationem, ne duabus quidem prioribus istis datis, per inventa Clariff. Viri cognosci posse: ideoque frustra ipsum sperasse hoc modo perficere Circuli quadraturam.

Restat nunc tantum ut manifesta faciam quæ in præcedentibus posita fuere, dixi enim me demonstraturum, quod solidum M Σ esset ad solid. A Σ , ut 53 ad 203: item quod solidum K Θ rationem haberet ad solidum Δ Γ , quam 5 ad 11.

Quoniam autem ad horum primi demonstrationem necessarium est, ut notum habeamus, quæ sit Ratio unguæ Parabolicæ ad Cylindrum suum, qui basi insistit eidem, & eandem habet altitudinem; idcirco hanc Rationem declarantes, Tractatum Clariff. Viri, quem de eadem Ungula, Parte 5. lib. 9. proposuit, uno egregio Theoremate auctiorem reddemus, quod miror ipsum non invenisse, quum ex iis quæ jam

ostenderat facili negotio deducatur, ut jam statim apparebit.

TAB. XXXVII.
Fig. 3.

Repetitâ enim quatenus hîc necesse erit figurâ ipsius, quæ est in propositione 99. lib. 9. Esto Cylindrus Parabolicus, bases oppositas habens parabolas $A B D$, $V C E$; à quo sit abscissa Ungula $A B C D$, eâdem basi & altitudine. Dico Cylindrum ad hanc Ungulam habere rationem duplam sesquialteram, sive quam 5 ad 2.

Transcriptis enim reliquis ex figura eadem, est $F B$ diameter parabolæ $A B D$: & lineæ rectæ $A B$, $B D$. Ductâ porrò $B C$ rectâ in superficie cylindri, sumptâque ejus quartâ parte $C Q$, abscinditur plano $P Q N$ ungula $P Q C N$ & junguntur $C A$, $C D$. Denique toti cylindro adjuncta est pyramis $A D \gamma C$ æqualis parti $B X D E C$, quæ à cylindro abscissa est plano $B D E C$. Et hætenus quidem sufficiet nobis constructionem Cl. V. repetiisse. Demonstravit autem hæc duo quæ sequuntur, sicut videre est in dicta prop. 99. lib. 9. Nimirum quod ungula $A B C D$ est ad ungulam $P Q C N$, sicut 32 ad 1. Item quod hæc ungula $P Q C N$ est ad pyramidem totam $A \gamma D B C$, (quæ composita est ex duabus pyramidibus $A D B C$ & $A D \gamma C$) ut 1 ad 30.

Erit igitur ex æquo ungula $A B C D$ ad pyramidem $A \gamma D B C$ ut 32 ad 30, hoc est, ut 16 ad 15. Porrò cùm parabolæ $A B D$ octava pars sit segmentum $B D X$, erit quoque segmentum solidum $B X D E C$ vel huic æqualis pyramis $A D \gamma C$, octava pars cylindri totius parabolici $A V C E D B$: sed pyramis altera $A D B C$ æquatur duabus octavis sive uni quartæ ejusdem parabolici cylindri; (est enim ipsa tertia pars sui prismatis, quod æquale est tribus quartis cylindri istius, ut ex quadratura parabolæ constat) ergo tota pyramis $A \gamma D B C$ tribus octavis æquatur cylindri parab. $A V C E D B$. Cylindrus igitur parabolicus $A V C E D B$ erit ad pyramidem $A \gamma D B C$, ut 8 ad 3, hoc est, ut 40 ad 15; sed ostensum est eandem pyramidem $A \gamma D B C$ esse ad ungulam $A B C D$ ut 15 ad 16. Igitur
ex

ex æquo erit cylindrus parabolicus $A V C E D B$ ad ungu-
lam $A B C D$ ut 40 ad 16, hoc est, ut 5 ad 2; quod fuit
demonstrandum.

Quæ hîc dixi à Cl. Viro ostensa fuisse, verissima sunt,
ac proinde non est quod de veritate hujus Theorematis du-
bitemus: Cujus aliam quoque demonstr. adferre possem, lon-
ge ab ista diversam, nisi ad sequentia properarem.

Repetitâ igitur parte ultimâ schematis, quod suprâ de-
scripsimus, sit ostendendum, quod solidum $M \Xi$, id est, TAB. XXXVII.
Fig. 2.
quod oritur ex ductu plani $E \Xi S$ in planum $E M \Lambda S$ ad
solidum $\Lambda \Sigma$, id est, quod oritur ex ductu plani $S \Xi \Sigma P$
in planum $S \Lambda \Pi P$, eam habet rationem quam 53 ad 203.
Describatur super $E F$ parabola $E \Pi F$, axem habens $P \Pi$,
quam constat esse quartam partem ipsius $E F$ sive $M E$. Erit
igitur parabola $E \Pi F$ eadem quam V . Cl. in prop. 41. &
42. lib. 10. notat literis $A R B$. Ait autem in dicta prop.
42. & verissimum est, solidum quod producitur ex ductu
planis $E \Sigma L F$ in planum $F \Pi M E$ æquari solido quod fit
ex parabola $E \Pi F$ ducta in se ipsam: sicut illud quoque
quod subjungit in Coroll. 1. nimirum quod solidum ex pla-
no $S \Xi \Sigma P$ in planum $S \Lambda \Pi P$, æquatur solido ex ductu
planis $S \Phi \Pi P$ in se ipsum; unde similiter solidum ex pla-
no $E \Xi S$ in planum $E M \Lambda S$ æquabitur solido ex plano
 $E \Phi S$ in se ipsum ducto.

Oportet itaque ostendere solidum ortum ex plano $E \Phi S$
ad solidum ex plano $S \Phi \Pi P$, utroque in se ipsum ducto,
esse ut 53 ad 203.

Esto ungula parabolica $A E F \Pi$, cujus basis parabola TAB. XXXVII.
Fig. 4.
 $E \Pi F$ repetita sit ex figura præcedenti; eodemque modo
ut istic divisa lineis ΠP , ΦS . Sit autem altitudo ungulæ
 $A \Pi$ dupla diametri basis ΠP . Erit igitur hæc ea ungula,
quam intelligit in prop. dicta 42. lib. 10. ejusdemque coroll.
2. fieri ex ductu parabolæ $E \Pi F$ in se ipsam. Eâdem nimi-
rum consideratione usus quæ est in Scholio propos. 19. lib.
9. Nam alioqui ex ejusmodi ductu potius dicendum esset ge-
minas ungulas produci, singulas altitudine æquales diame-
tro

tro ΠP . Ducto deinde plano per $A \Pi P$, & alio huic parallelo $D \Phi S$ secundum lineam ΦS , erit jam pars ungu-
 læ hisce duobus planis terminata, æqualis solido quod fit ex du-
 ctu plani $S \Phi \Pi P$ in se ipsum; & pars ungu-
 læ $E D S \Phi$, æ-
 qualis ei solido quod fit ex ductu plani $E \Phi S$ in se ipsum.
 Quare nunc demonstrandum erit duntaxat, partem $E D S \Phi$
 esse ad partem $\Phi A P$ ut 53 ad 203, Sit ΦN parallela $E P$,
 & $N C$ parallela ΠA . Ergo quoniam ex proprietate Para-
 boles, $P N$ est $\frac{1}{4} \Pi P$, erit quoque $P C \frac{3}{4} A P$. Verum &
 $S D$ æquatur $\frac{3}{4} A P$, quum sit huic parallela *, sitque pa-
 rābola $E A F$: Itaque junctā $C D$, ea parallela & æqualis
 erit lineis $P S$, $N \Phi$. Ducatur secundum $D C$ planum
 $D B C$ parallelum basi $E \Pi F$, fietque semiparabola $B D C$
 æqualis & similis semiparabolæ $\Pi \Phi N$; & erit $\Phi B N$ di-
 midius cylindrus parabolicus: $D A C B$ verò dimidiata un-
 gula. Hæc autem æquatur sicut antea ostendimus, duabus
 quintis cylindri dimidiati, basin habentis $D B C$ & altitudi-
 nem $B A$. Ergo quum semicylindrus $\Phi B N$ habeat altitu-
 dinem $B \Pi$ triplam ipsius $B A$, erit ungula dimid. $D A C B$
 ad semicyl. $\Phi B N$, ut 2 ad 15, hoc est, ut 8 ad 60.

Junctā porro $\Phi \Pi$, constat semiparabolam $\Pi \Phi N$ ad trian-
 gulum $\Pi \Phi N$ esse ut 4 ad 3; sed triangulus $\Pi \Phi N$ est ad
 rectangulum ΦP ut 1 ad 6, (est enim basis ΠN tertia pars
 ipsius $N P$) hoc est, ut 3 ad 18. Ergo ex æquo erit semi-
 parab. $\Pi \Phi N$ ad rectang. ΦP ut 4 ad 18. Itaque & semi-
 cylindrus $\Phi B N$ est ad parallelepipedum ejusdem altitudinis
 super basi ΦP , ut 4 ad 18. Dicti autem parallelepipedi di-
 midium est prisma $D N S$; ergo semicylindrus $\Phi B N$ est ad
 prisma $D N S$, ut 4 ad 9, hoc est, ut 60 ut 135. Qua-
 lium igitur partium dimidiata ungula $D A C B$ erat 8, ta-
 lium semicylindrus parab. $\Phi B N$ erat 60, (ut suprā osten-
 sum est) taliumque prisma $D N S$ erit 135. Ac proinde so-
 lidum $A \Pi S D$, quod ex istis tribus componitur, erit 203.
 Est autem ungula dimidiata $A D C B$ ad dimidiatam un-
 gulam $E A P \Pi$, ut 1 ad 32, sicut Cl. Vir. demonstravit in
 prop. 95. lib. 9. Ergo qualium partium ungula dimid.

A D C B

$A D C B$ est 8, talium erit dimid. ungula $E A P \Pi$ 256, quoniam ut 1 ad 32, ita est 8 ad 256. Diximus autem partem sol. $A \Pi S D$ esse talium 203. Igitur dim. ungula $E A P \Pi$ est ad partem $A \Pi S D$ ut 256 ad 203; & dividendo pars reliqua $E D S \Phi$ ad partem $A \Pi S D$, ut 53 ad 203; quod erat demonstr. Ostendimus igitur illud quoque solidum, quod supra diximus fieri ex ductu plani $E \Xi S$ in planum $E M \Lambda S$, eam habere rationem ad solidum ortum ex ductu plani $S \Xi \Sigma P$ in planum $S \Lambda \Pi P$, quam 53 ad 203.

Tandem ad alterum eorum quæ demonstrare promissimus accedamus, repetitâque parte mediâ schematis triplicis quod supra descriptum fuit, ostendendum sit; solidum ortum ex ductu plani $C \Theta R$ in planum $C K \Delta R$, ad solidum ex ductu plani $R \Theta \Gamma O$ in planum $R \Delta Z O$ eam habere rationem, quam 5 ad 11. TAB. XXXVII.
Fig. 2.
Supra latus $C D$ trianguli $C D I$, erigatur ad perpendicularum triangulum $C K D$, & jungatur $K I$. Erit jam pyramis $C D I K$ illud solidum quod intelligitur fieri ex ductu trianguli $C D I$ in triangulum $C D K$. Etenim sectâ pyramide plano $A Z O \Gamma$ secundum $O \Gamma$, quod rectum sit ad basin $C D I$, erit sectio quadratum, id est, rectangul. quod sit ex lineis ΓO , $O Z$; eademque sectio dividet pyramidem bifariam. Secta item plano $E \Delta R \Theta$ priori parallelo, secundum lineam $R \Theta$, existet inde rectangulum $E R$, quale continetur lineis ΘR , $R \Delta$. Oportet itaque ostendere, quod solidum $K C R E \Delta$ est ad solidum $\Delta A O \Theta \Delta$, ut 5 ad 11. Fig. 5.

Ducatur secundum $E \Delta$ planum $\Delta E B$ parallelum basi $C D I$; abscindet illud pyramidem $B E \Delta K$ similem toti pyramidi $C I D K$, quæque proinde erit ad hanc in triplicata ratione laterum homologorum $B \Delta$ ad $C D$. Sed $B \Delta$, cum sit æqualis ipsi $C R$, quarta pars est lateris $C D$. Itaque qualium partium pyramis $B E \Delta K$ est unius, talium pyramis $C I D K$ erit 64: & dimidium hujus, hoc est, solidum $K A O C$ erit 32. Qualium autem pyramis $B E \Delta K$ est unius talium quoque prisma $B E R$ est 9; quoniam basin habent communem $B E \Delta$, & prismatis altitudo $B C$ tri-

pla est ad altitudinem pyramidis B K. Ergo solidum K C R E Δ quod ex hisce duobus componitur, erit partium 10, quoniam solidum K A O C est 32. Apparet igitur hoc esse ad illud ut 16 ad 5; ideoque dividendo & convertendo solidum K C R E Δ esse ad solidum Δ A O \odot Δ , ut 5 ad 11: quod erat ostendendum.

F I N I S.







Fig. 2.




Fig. 2.





Fig. 3.




Fig. 4.




Fig. 5.

CHRISTIANI HUGENII,

C O N S T. F.

A D

C. V. FRAN. XAVERIUM

A I N S C O M. S. I.

E P I S T O L A,

Qua diluuntur ea quibus Εξέτασις Cyclometriæ
Gregorii à S^{ro}. Vincentio impugnata fuit.

CHRISTIAN HUGENI

1788

1788


1788

1788

ALISTOL

1788

1788



CHRISTIANI HUGENII,

C O N S T. F.

A D

C. V. FRAN. XAVERIUM

AINSCOM. S. I.

E P I S T O L A.

CL. VIRO D^o. XAVERIO AINSCOM

CHRISTIANUS HUGENIUS S. D.



Iber ille quem non ita pridem tuo nomine huc misit Apelles vester Segerus, tam mihi acceptus fuit, Vir Clariss. quam solent esse ea quorum diutina expectatio desiderium augeat. Jam diu enim intellexeram te Quadraturæ Vincentianæ patrocinium suscepisse, novissimèque & Lovanio & Româ significatum fuerat opus illud jam penè à te ad umbilicum perductum, in quo pars etiam quædam nostræ Exetasi dicata esset. Itaque cum avide totum commentarium tuum evolvi, tum accuratius reliquis illa expendi quæ propius ad me pertinebant. De quibus quid visum fuerit breviter tibi perscribere constitui. Equidem miratus sum, cum me non ultimum inter eos recenseas qui cæteris solidius in examinanda Quadratura vestra versati sint, postea tamen adeo nihili animadversiones omnes meas, omniâque argumenta prædicare, ut quod convellere nituntur, id ne attingant quidem. Nempe ego totâ viâ, totoque, quod ajunt, cœlo erravi, quemque refutare volui, ejus mentem minime sum assecutus. Veruntamen Viri Doctissimi funditus evertisse me commenta vestra pronunciavere, quorum judiciis, etsi vos fortasse non statis, apud intelligentes tamen multo pluris futura reor quam eo-

rum qui vobis de reperta Quadratura gratulantur. E focie-
tate vestra Vir eximius A. Tacquetus, *accurate sibi lectam*
esse multumque probari Exetasin nostram rescripsit, & recte
me urgere autorem Quadraturæ, ut exhibeat, quoties ratio
prima contineat secundam & secunda tertiam, idque nisi præ-
stet, tertiam incognitam explicaturum nunquam; ac proinde
non daturum quadraturam, quæ à notitia tertiæ illius ratio-
nis dependet. Alter item apud vos est Clarissimus Gutschovius, quem passim profiteri scio magnos P. Gregorii conatus nostrâ operâ penitus concidisse. Neque aliter sentit Vir undiquaque Doctissimus & in Academia Oxoniensi Mathematicum Professor J. Wallisius, idque publice testatum fecit in edito nuper subtilissimo opere de Infinitorum Arithmetica. Possemque & alios complures referre quorum pro me facit calculus, ni persuasum haberem in re Geometrica rationibus magis quam autoritate agendum. Neque enim dubito quin dicturus sis, eodem mecum errore ductos qui mihi applaudunt, ipsos quoque nihilo rectius penetrasse sensa auctoris tui. Quare id agam potius, ut procul à me simul atque illis hanc, sive inscitiam, sive oscitantiam culpam amoliar. Prius autem ad alia quoque nonnulla quæ mihi objicis respondendum opinor. Variis allatis conjecturis verisimile reddere conatus eram, ex quatuor quadraturis eam à vobis præferri quæ prima ponitur. Hoc ita refutas, ut, quod ego præcipuum argumentum dixeram, dissimules prætereasque. Verum per me licet ut quo loco vobis visum erit primam quadraturam habeatis. Ego me abunde præstitisse arbitrabor si hanc absurdam esse evincam: cuique hoc planum fecero, eum non puto reliquarum trium confutationem expetiturum, imo, si offeratur, ne lecturum quidem. Etenim quod iisdem omnes principiis innitantur, Proportionalitatum nimirum doctrinæ atque ei quæ est de ductibus plani in planum, tam certum est, ut negari nulla ratione possit. Negas tu tamen hoc, crebroque inculcas, in prima hac quadratura, proportionalitatum consideratione, non uti autorem tuum. Sed miror qua fronte; cum non ignores utique propositionem 12. 39. & 40. libri 10. ex 8^{va} ejusdem libri demonstrari, hanc vero per 114. lib.

lib. 8. qui totus est de Proportionalitatibus.

Porro superfluum me ais operam sumpsisse, cum priores duas corporum rationes numero exhibui, ex quibus tertia vobis definienda erat; illas enim autor operis Geometrici, si credimus, multo antè quàm ego edidissem, imo quàm ipse editus essem, perspectas habuit aliisque demonstravit. Quæso cur non explicuit igitur, nosque ea levavit molestia? Nam certum erat plurimum ad absolvendam quadraturam, si modo absolvi posset, eorum notitiam conferre debere, planèque esse necessariam. Sed vobis cuncta perinde nota dici video quæ cognosci posse aliquâ saltem ratione imaginamini, atque ea quæ liquido comperta fuerint. Itaque ad propos. 43. lib. 10. me remittis, in qua utramque rationem notam fieri asseris. Illa vero non magis ipsas expedit quam propositio postrema ejusdem libri, rationem quæ sit inter circulum & quadratum diametri. Prorsus huic simile est quod de Parabolica ungula respondes. Videlicet jam à triginta annis exploratum habuisse autorem tuum, quænam sit illius ad cylindrum suum proportio. Equidem ex iis quæ jam tradiderat, erui illam posse fassus sum; ipsum vero adhuc cujusmodi foret nescivisse, satis evidens argumentum videbatur, quod eam non expromeret. Neque enim credibile, cujus theorematis gratia duodeviginti propositiones elucubrasset, id tanquam superfluum non esse adscripturum, si tam nullo negotio inveniri posse speraret. Parum intererat utrum propositione illud dignatus fuisset, (quod noluisse eum dicis) an corollario tantum. Sed nec in corollario ratio illa uspiam expressa est. Nam in eo quod adducis, hoc solum legitur, methodum traditam esse qua ratio unguæ ad cylindrum quo continetur, investigari queat, eamque notam fore, si quorundam inter se corporum rationes inventæ fuerint. Atqui & horum corporum rationes, & ex iis quæ sit inter unguam cylindrumque suum analogia, lectoribus disquirenda relinquuntur: idque ipse non nescis. Quare non satis ingenue hic me dissimulationis arguis, ubi ipse contra quam sentias, scribere videaris.

Jam vero de *paluari* errore quem mihi impingis videamus.

mus. Is circa verbum *continere* commissus est, ex quo non recte percepto factum est scilicet, ut, cum Quadraturam vestram oppugnare me crederem, nihil minus egerim, omnesque item, qui me labefecisse eam judicarunt, cæcutierint. Ego significationem duplicem ejus verbi quam in opere Geometrico inveneram, adduxi, tuam, quæ & P. Sarrafæ est, interpretationem, quoniam adhuc ignorabam, præterii. Igitur hic *palmaris* est error meus, quod nec P. Sarrafæ librum, nec tuum Corollarium tum temporis videram. Sed nec fortasse si scivissem explicationem vestram, propterea memorandam duxissem, cum parum adeo ad rem faciat, sitque monstrosa plane atque absona, uti ex adjecto specimine liquet: quantum vero ea promoveritis deinde exponam. Proposition 40. lib. 10. est hujusmodi. *Isdem positis, dico rationem solidi ex R S in X Y ad solidum ex T V in Z &, toties continere rationem solidi ex I K in N O ad solidum ex L M in P Q, quoties hæc ipsa ratio continet rationem solidi ex A B in E F ad solidum ex C D in G H.* Quam propositionem juxta mentem, ut ais, auctoris, (variata tantum phrasi scilicet) sic nobis enarras. *Isdem positis, dico rationem solidi ex R S in X Y ad solidum ex T V in Z &, constitui ex iis rationibus quæ toties multiplicatæ sunt illarum rationum ex quibus constituitur ratio solidi ex I K in N O ad solidum ex L M in P Q, quoties hæc ipsæ rationes multiplicatæ sunt earum ex quibus constituitur ratio solidi ex A B in E F ad solidum ex C D in G H.*

Pulchra vero explanatio! quam quia ego pervidere non valui, sensum convenientem ratiociniis vestris non percepi. At cui hoc in mentem veniret, Mathematicum longe aliud scribere quam intelligi postulet? quisve magis adhuc intricatum sensum theorematibus jam nunc nimium obscuris affingere vellet? Omnes profecto qui vobis controversiam moverunt, haud aliter atque ego, verbum *continere* accepisse nosti, neque ulli hoc incidisse, ut cum de ratione inter duas magnitudines legeret, id ad *partiales* referret, ex quibus *totales* constituerentur. Ecce vero ut præter eos quorum animadversiones ad manus vestras pervenere, eadem plane quæ nobis,

nobis, circa has propositiones & significationem verbi *continere*, opinio fuit Incomparabili Cartesio, quem si minus insignem Geometram quam *Algebristam* fuisse arbitraris, parum ex vero judicas. Ejus ad amicum epistolæ copia mihi facta est, cum jam diu exetasis nostra prodiisset, quâ quoniam non tantum id quod dixi comprobatur, sed & tota insuper ad opus Geometricum P. à S.^o Vincentio pertinet, integram hic adscribere visum est. Gallicè sic habet.

M O N S I E U R.

J' Aygardé vos livres un peu long temps, pource que je desirois en vous les renvoyant, vous rendre compte de la Quadrature du cercle pretendue, & j'avois bien de la peine à me resoudre de feuilletter tout le gros volume qui en traite. En fin j'en ay veu quelque chose & assez ce me semble pour pouvoir dire qu'il ne contient rien de bon qui ne soit facile, & qu'on ne pust escrire tout en une ou deux pages. Le reste n'est qu'un paralogisme touchant la Quadrature du cercle, enveloppé en quantité de propositions qui ne servent qu'à embroüiller la matiere, & sont tressimples & faciles pour la pluspart, bien que la façon dont il les traite, les face paroistre un peu obscures. Pour trouver son paralogisme, j'ai commencé par la 1134^e page, ou il dit: *Nota autem est proportio segmenti LMNK ad segmentum EGHF*, ce qui est faux, & la preuve qu'il en donne est fondée sur la 39^e proposition en la page 1121. du mesme livre, ou il y a une erreur tresmanifeste, qui consiste en ce qu'il veut appliquer à plusieurs quantitez conjointes ce qu'il a prouvé auparavant des mesmes quantitez divisées. Car par exemple, ayant les 4. ordres de proportionnelles

2, 4, 8, 2, 8, 32.

&

2, 6, 18, 2, 10, 50.

bien qu'il soit vray que 8. est à 32. en raison duoblée de ce que 4. est à 8. Et que 18. est aussi à 50. en raison doublée de ce que 6. est à 10. il n'est pas vray pour cela que $8 \div 18$. c'est à dire 26. soit à $32 \div 50$. c'est à dire 82. en raison double de celle qui est entre $4 \div 6$. c'est à dire 10, & $8 \div 10$, c'est à dire 18. Tous ses raisonnements ne sont fondez que sur cette faute, & ce qu'il escrit de

Tom. II.

X x

Pro-

Proportionalitatibus & de Ductibus, nescit qu' à l'embarrasser, & ne me semble d' aucun usage, pour ce que frustra fit per plura quod potest fieri per pauciora.

Quorum latinè hæc est sententia.

Libros tuos retinui diutius, quod remittere eos nolebam quin simul opinionem meam tibi exponerem de nova ista quam venditant circuli Quadratura; vix autem à me ipso impetrare poteram, ut ingentia quibus tractatur volumina eolverem. Tandem tamen nonnulla in iis delikavi, è quibus satis tutò mihi pronunciare posse videor, nihil ibi boni inveniri, quod non captu facile sit; unâque aut alterâ paginâ explicari potuerit. Cætera merum paralogismum de quadratura circuli continent, multis propositionibus implicitum, quæque hoc tantum efficiunt, ut omnia evadant intricatiora. Pleræque vero simplicissimæ sunt & facili ratione constant, licet tractandi methodus obscuriores reddiderit. Paralogismum querere institui, initio factò ad paginam 1134. ubi hoc ait: Nota autem est proportio segmenti LMNK ad segmentum EGHF; quod falsum est, pendet enim hujus demonstratio à propositione 39, pag. 1121. ejusdem libri, ubi manifestus error occurrit, dum pluribus quantitatibus conjunctim applicatur, quod de singulis seorsim fuerat ostensum. Etenim ex. gr. positis quatuor proportionalium ordinibus

2, 4, 8, 2, 8, 32,
 &
 2, 6, 18, 2, 10, 50,

licet verum sit rationem 8. ad 32. duplicatam esse ejus quæ 4. ad 8. itemque rationem 18. ad 50. duplicatam esse ejus quæ 6. ad 10. non tamen idcirco verum est 8 + 18. hoc est, 26. esse ad 32 + 50. hoc est ad 82. in ratione duplicata ejus quæ 4 + 6. hoc est, 10. ad 8 + 10. hoc est, 18. Unicum ei fundamentum hæc vitiosa argumentatio; quæque de Proportionalitatibus scribit & de Ductibus, tantum majoribus ipsum difficultatibus involvunt, neque alicujus usus videntur, siquidem frustra fit per plura quod potest fieri per pauciora.

Vides, Vir Egregie, neque Cartesium, vestrum illud *Hoc est juxta mentem auctoris*, agniturum fuisse, sed potius, quod res est, dicturum, desperatâ causâ hoc vobis effugium quæsitum, ut quadratura vestra ad instar Protei cujusdem aliâ atque aliâ

aliâ assumptâ formâ quantumlibet arctè sese constringentibus elaberetur. Verum age, inspiciamus jam quo rem deducas, posteaquam verbi *continere* novam significationem elicuisti, eâque vetera theoremata tam scitè interpolasti. In Corollario propositionis 40. lib. 10. quò tam sæpe provocas, id unum egisse videris, unas ex aliis difficultates nectendo, ut si quis argumentationis tuæ tenorem confectari cupiat, is defessus abstat priusquam ad finem pervenerit. Ego ad eum usque locum te secutus sum, ubi spatia Y & Z assumi jubes: Inde non ulterius procedendum putavi. Adeo enim manifesto vitio atque ἀγεωμετρησίᾳ ibi laborat constructio tua, ut tibi met ipsi exploratum id esse dubitare nequeam: sed quoniam alia evadendi ratio non occurrebat, sperasti, credo, in tanta obscuritate nemini illud facile animadversum iri. Dein, inquis, *assumantur duo plana Hyperbolica Y & Z, rectis alteri asymptotorum parallelis inclusa*. Nullâ aliâ præcautione assumuntur quam quod rectis alteri asymptotorum parallelis includi ea necesse sit. De magnitudine utriusque aut ratione quam inter se servare debeant nihil præcipis. Igitur quamlibet magnum aut parvum unum quodque eorum abscindi poterit. Mox tamen rationem spatii Y ad Z cum aliis rationibus comparare instituis, quas prius secundum certam determinationem assumpsisti, tibi que hoc demonstrandum proponis, *Rationem totalem planorum X ad T tam esse multiplicem rationis totalis planorum Y ad Z, quàm ratio totalis solidorum GH ad IK multiplicata est rationis totalis solidi LM ad NO*. Quidnam, quæso, absurdius, quam de quantitate ejus rationis aliquid enunciare, quæ prorsus in certa sit ac vaga? Equidem ex hoc solo satis liquere puto, quam frustra primæ Quadraturæ suppetias ferre tentaveris, cum in eo quod præcipuè tibi explicandum erat, tam insigniter delinquas. In tribus reliquis an meliore fortunâ usus sis, si me inquirere oporteat, talentum non meream. Id tamen scito perpetuum adversus vos argumentum fore, quod rationem peripheriæ ad diametrum quam singulis quadraturis datam esse profitemini, ipsi tamen exhibere non potestis; non autor ipse Quadraturæ, non tot ejus discipuli, qui tot jam annis in id incumbunt, ut paucioribus Ilium expugnatum sit. Datam esse rationem, Euclides definivit, cui

possumus æqualem invenire. Quis autem ad vestram illam hoc pertinere credet, quæ irritò labore toto decennio quæsita est? Nam quod sufficere existimatis si modo viam monstraveritis quâ emensâ ad quæsitum perveniatur, obstacula vero, atque innumeras difficultates quibus præsepta est, non removetis, videte cui persuadere possitis, eâ ratione tetragonismi negotium à vobis confectum esse. Illud sanè vos consequi apparet, ut, dum ultra non proceditis, minus expositi sitis ad promiscuos omnium insultus, difficilius etiam à peritioribus oppugnemini, paratioremque habeatis receptum. Facile enim acius instantes proportionum & proportionalitatum vestrarum tenebris involvere potestis, atque efficere ut tandem veluti nox prælium dirimat. Hoc ipsum ne mihi eveniret, cum exetasin Quadraturæ conscriberem, metuebam, atque ut caverem operam dedi; id unum conatus, ut, quatenus fieri posset, autorem ad absurdum compellerem, nimirum ut vel nolle se vel non posse Quadraturam suam absolvere fateretur. Eo fine ignota prius atque informia corpora dimensus sum, exhibitisque prioribus duabus solidorum proportionibus, petii ut inde tertiam eliceret, utpote quam cognitis illis notam dixisset. Ad quas angustias redactum non aliâ ratione defendis, quam expostulando mecum quod auctori tuo modum præscribere præsumam quadrandi circulum, ac jubendo denique ut meminerim *quid & cui* scribam. Ego verò quomodo quadratus fiat circulus, nec didici, nec præscribo; sed hoc urgeo, ut quem ille modum se invenisse contendit, eum reapse utilem & efficacem esse demonstraret. Atque ita, quid scripserim & in quem finem, me non nescivisse, satis jam tibi constare arbitror. Cui vero scripserim, ne hoc quidem puto me oblitum fuisse. Vides autem quam hac in parte longe diversum sonent Cartesii literæ atque Elogia vestra: quorum utris potius subscribendum sit aliorum judicio discerni malim quam meum interponere. Hoc tamen autorem Quadraturæ scire velim, tanto majori eruditionis & candoris opinione apud me futurum, quanto maturius ab errore suo resipiscet. Vale.

Dat. Haga-Com. 2. Oct.
1656.

CHRISTIANI HUGENII,

C O N S T. F.

D E

C I R C U L I


M A G N I T U D I N E

I N V E N T A.

ACCEDUNT EJUSDEM

Problematum quorundam illustrium

Constructiones.



P R Æ F A T I O.



Circa antiquum Tetragonismi problema, quo vel apud Mathematicum ignaros nihil est celebrius, recens operæ pretium nos fecisse rati, & quædam hæcenus compertis meliora ut putamus consecuti, Geometris ea demonstrata impertiri volumus. Namque & studiis eorum profutura arbitramur, & novitate ipsâ ad rerum abditarum investigationem incitamento futura, reputantibus in eo quoque argumento, ubi omnes præidem summâ contentione versati sint, aliqua superfuisse haud indigna diligentiae præmia. Plurimi quidem antehac inventæ Quadraturæ gloriam sibi asserere conati sunt, variaque subinde commenta protulere, falsis vera miscentes. Verum à peritioribus omnia vel eversa fuisse vel contempta scimus, neque aliud adhuc receptum, quo omnis circuli dimensio niteretur, præter unum illud, majorem esse eum inscripto sibi polygono, circumscripto minorem. Nos autem propiorem determinationem nunc exhibemus ostendimusque, quod duobus sumptis polygonis proportionem mediis inter inscriptum circumscriptumque ipsis simile, minoris eorum perimeter circumferentia circuli major existit, reliquum ve-

P R Æ F A T I O.

ro polygonum eâdem proportionem circuli aream exuperat. Et hoc quidem ut inter ea quæ demonstraturi sumus & difficillimum & contemplatione præcipue dignum videatur, alia tamen sunt non accuratiora modò, sed quæ & usu magis probentur; quæ sane hic in antecessum non recensebimus, quippe in sequentibus rectius percipienda. Breuiter tamen quid studiis Geometriæ conferant exposuisse proderit, cum non minimam habeant utilitatis commendationem. Cum igitur duplicem propositi tractationem instituerimus, primum ea tradendo quorum demonstratio consuetis Geometriæ elementis contenta est, deinde centrorum gravitatis quoque considerationem adhibendo: in prioribus quidem illud explicatum reperietur, quomodo non tantum circumferentiæ toti, sed & arcui cui libet dato recta linea æqualis invenienda sit; expeditâ ratione ad Mechanicas constructiones, quæque vel subtilissimas earum minime frustretur. Quomodo item numeros exercentibus peripheriæ ad diametrum ratio, quam Archimedes ex polygonis laterum 96 eruit, per dodecagona sola comprobari queat. Ex polygonis autem laterum 10800, cum iis qui veterem insistant viam vix hi peripheriæ termini existant 62831852 & 62831855, ad diametrum partium 20000000, nostrâ Methodo isti produsse cernentur, 6283185307179584, 6283185307179589; semperque duplicem obtineri verorum characterum numerum, quacunque laterum multitudine polygonæ

P R Æ F A T I O.

gonæ adhibeantur. Quod quidem certâ ratione contingere perspeximus sicuti & quadratum cujusque numeri bis totidem quot latus characteribus plerumque constituitur. At majora etiam compendia centrorum gravitatis proprietas subministrat, & propius quodammodo ad perfectionem insuperabilis problematis per hæc accessisse videmur. Certe ad Archimedeos peripheriæ limites constituendos, solo nunc inscripti trigoni cognito latere indigemus. E sexagintangulo autem inter hosce eam contineri probamus 31415926538 & 31415926533, positâ diametro partium 100000000000, cum solitâ methodo vix isti producantur 3145, 3140. Adeo ut triplus jam & ultra sit verarum hîc notarum numerus, sicut per præcedentia duplus; & perpetuo quidem successu, haud aliter quam in majoribus numeris cubum sui lateris triplum esse animadvertitur. Ergo posthac si qui falsò circumferentiæ magnitudinem definient, per numerosa polygonæ non refutabuntur, sed calculo brevi minimèque intricato, quemque erroris insimulare, quod hætenus ferè soliti sunt, haud facile possint. Ad hæc si quid in subiensarum Canone, quem emendatum haberi quantum referat omnes sciunt, in eo contexendo si quid erit admissum aut aliunde perversum irrepserit, non difficile erit horum ope restituere, cum aliâ nunc ratione ex inscriptis in circulo longitudinem arcuum quibus subtenduntur invenire liceat. Quinimo & omni Canonum auxilio destitutis

P R Æ F A T I O.

ostendimus, quo pacto ex lateribus triangulorum datis angulos eorum investigare queant, ut nunquam duorum secundorum scrupulorum sit à vero dissensus, sæpe ne unius quidem tertii. Et hæc quidem non levia commoda visum iri confidimus. Comperimus autem & Renatum Cartesium, cujus viri inventis cum Philosophia universa tum Matheſis plurimùm illustrata est, nonnulla quæ huc spectent scriptis mandasse. Ea vero defuncto ipso in commentariis reperta feruntur, neque adhuc rescire potuimus quâ industriâ aut eventu hisce manum admo-verit. Willebrordi autem Snellii geometræ eruditi Cyclometricus extat, multo labore conscriptus, quique omnis in his est. Atque ille non exiguam laudem promeritus videretur, si præcipua duo theore-mata, quibus omne id opus velut fundamentis su-perstructum est, demonstrare potuisset. Sed quas ibi pro demonstrationibus haberi postulat, proposi-tum minime comprobant: ipsa vero theoremata, sic-ut in utroque evidenti ratione nos ostendimus, præclaram continent veritatem. Et ea quidem se-quentibus meritò inferenda putavimus, quod cau-sæ eorum à nostris pendeant inventis.

CHRISTIANI HUGENII,

CONST. F.

DE

CIRCULI MAGNITUDE INVENTA.

THEOREMA I. PROPOSITIO I.

SI Circuli portioni, semicirculo minori, triangulum maximum inscribatur, & portionibus reliquis triangula similiter inscribantur, erit triangulum primo descriptum duorum simul quæ in portionibus reliquis descripta sunt minus quam quadruplum.

Esto circuli portio ABC , semicirculo minor, cuius diameter BD ; maximum autem inscriptum sit triangulum ABC , hoc est, quod basin & altitudinem habeat cum portione eandem. Et reliquis duabus portionibus inscribantur triangula item maxima AEB , BFC . Dico triangulum ABC minus esse quam quadruplum triangulorum AEB , BFC simul sumptorum. Jungatur enim EF , quæ secet diametrum portionis in puncto G . Quoniam igitur arcus AB bifariam dividitur in E puncto, erit utraque harum EA , EB , major dimidiâ AB . Quamobrem quadratum AB minus erit quam quadruplum quadrati EB vel EA . Sicut autem quadratum AB ad quadr. EB , ita est DB ad BG longitudine; quia quadratum quidem AB æquale est rectangulo quod à DB & circuli totius diametro continetur, quadratum vero EB æquale rectangulo sub eadem diametro & recta BG . Minor igitur est BD quam quadrupla BG . Sed & AC minor est quam dupla EF , quoniam hæc ipsi AB æquatur. Ergo patet triangulum ABC minus esse quam octuplum tri-

TAB. XXXVIII.
Fig. I.

anguli $E B F$. Huic autem triangulo æquantur singula $A E B$, $B F C$. Ergo utriusque simul triangulum $A B C$ minus erit quam quadruplum. Quod erat ostendendum.

THEOR. II. PROP. II.

Si fuerit circuli portio, semicirculo minor, & super eadem basi triangulum, cujus latera portionem contingant; ducatur autem quæ contingat portionem in vertice: Hæc à triangulo dicto triangulum abscindet majus dimidio maximi trianguli intra portionem descripti.

TAB. XXXVIII.
Fig. 2.

Est circuli portio semicirculo minor $A B C$, cujus vertex B . Et contingant portionem ad terminos basis rectæ $A E$, $C E$, quæ convenient in E : convenient enim quia portio semicirculo minor est. Porro ducatur $F G$, quæ contingat ipsam in vertice B ; & jungantur $A B$, $B C$. Ostendendum est itaque, triangulum $F E G$ majus esse dimidio trianguli $A B C$. Constat triangu-
la $A E C$, $F E G$, item $A F B$, $B G C$ æquicruria esse, dividique $F G$ ad B bifariam. Utraque autem simul $F E$, $E G$, major est quam $F G$; ergo $E F$ major quam $F B$, vel quam $F A$. Tota igitur $A E$ minor quam dupla $F E$. Quare triangulum $F E G$ majus erit quarta parte trianguli $A E C$. Sicut autem $F A$ ad $A E$, ita est altitudo trianguli $A B C$ ad altitudinem trianguli $A E C$, & basis utrique eadem $A C$. Ergo, quum $F A$ sit minor quam subdupla totius $A E$, erit triangulum $A B C$ minus dimidio triangulo $A E C$. Hujus vero quarta parte majus erat triangulum $F E G$. Ergo triangulum $F E G$ majus dimidio trianguli $A B C$. Quod ostendendum fuit.

THEOR. III. PROP. III.

Omnis circuli portio, semicirculo minor, ad maximum triangulum inscriptum majorem rationem habet quam sesquitertiam.

Est

Est Circuli portio, semicirculo minor, cui maximum sit inscriptum triangulum ABC . Dico portionem ad dictum triangulum majorem rationem habere quam quatuor ad tria. Inscribebantur enim & reliquis portionibus duabus maxima triangula ADB , BEC . Itaque minus est triangulum ABC quam illorum simul quadruplum*: ac proinde spatium aliquod adjungi* *per. 1. huj.* potest triangulo ABC , quod una cum ipso minus etiam sit quam quadruplum dictorum simul triangulorum ADB , BEC . Esto itaque eâ ratione adjectum triangulum AFC , ut totum spatium $ABCF$ minus sit quam quadruplum triangulorum ADB , BEC . Et porro in residuis portionibus maxima triangula inscribi intelligantur; itemque in residuis semper, donec portiones quibus postremum inscribentur simul minores sint triangulo ACF , hoc enim fieri potest. Itaque & triangula postremum inscripta simul triangulo ACF minora erunt. Quia autem spatii $ABCF$ quarta parte majora sunt duo simul triangula ADB , BEC . Rursusque quarta horum parte majora triangula quatuor, quæ portionibus reliquis inscribuntur. Et horum quartâ majora similiter, quæ deinceps: atque ita continue, si plura fuerint descripta. Erit propterea spatium ex quadrilatero $ABCF$ & cæteris inscriptis triangulis, & triente eorum, quæ postremo inscripta erunt, compositum, majus quam sesquitertium ipsius quadrilateri $ABCF$. Hoc enim ab Archimede demonstratum est, quod si fuerint spatia quotcunque in ratione quadrupla, ea omnia simul cum triente minimi ad maximum rationem habebunt sesquitertiam. Dividendo itaque, triangula omnia intra portiones ADB , BEC descripta cum triente postremo discriptorum majora erunt tertia parte spatii $ABCF$. Sed triens dictus minor est triente trianguli ACF . Igitur dempto illinc triente postremo inscriptorum; à spatio autem $ABCF$ ablato triangulo AFC , erunt triangula omnia intra portiones ADB , BEC descripta, majora triente trianguli ABC *. Quare componendo, tota figura **33.5. Elem.* rectilinea portioni ABC inscripta major quam sesquitertia trianguli ABC , multoque magis portio ipsa. Quod erat demonstrandum.

THEOR. IV. PROP. IV.

Omnis circuli portio, semicirculo minor, minor est duabus tertiis trianguli eandem cum ipsa basin habentis, & latera portionem contingentia.

TAB. XXXVIII,
Fig. 4.

¶ per. 2. huj.

Est circuli portio, semicirculo minor, $A B C$, & contingant ipsam ad terminos basis rectæ $A D$, $C D$, quæ conveniant in puncto D . Dico Portionem $A B C$ minorem esse duabus tertiis trianguli $A D C$. Ducatur enim $E F$ quæ portionem contingat in vertice B , & inscribatur ipsi triangulum maximum $A B C$. Quum igitur triangulum $E D F$ majus sit dimidio trianguli $A B C$ *, manifestum est ab illo partem abscindi posse, ita ut reliquum tamen majus sit dimidio dicti $A B C$ trianguli. Sit igitur hoc pacto abscissum triangulum $E D G$. Et ducantur porro rectæ $H I$, $K L$, quæ portiones reliquas $A M B$, $B N C$ in verticibus suis contingant, ipsisque portionibus triangula maxima inscribantur. Idemque prorsus circa reliquas portiones fieri intelligatur, donec tandem portiones residuæ simul minores sint quam duplum trianguli $E D G$. Erit igitur inscripta portioni figura quædam rectilinea, atque alia circumscripta. Et quoniam triangulum $E G F$ majus est dimidio trianguli $A B C$; & rursus triangula $H E I$, $K F L$, majora quam dimidia triangulorum $A M B$, $B N C$; idque eadem semper ratione in reliquis locum habet, ut triangula super portionum verticibus constituta, eorum quæ intra portiones ipsas descripta sunt, majora sint quam subdupla: apparet triangula omnia extra portionem posita etiam absque triangulo $E G D$ majora simul esse quam dimidia triangulorum omnium intra portionem descriptorum. Atqui segmentorum in portione reliquorum triangulum quoque $E G D$ majus est quam subduplum. Ergo triangulum $E D F$ simul cum reliquis triangulis, quæ sunt extra portionem, majus erit dimidio portionis totius $A B C$. Quare multo magis spatium à rectis

rectis $A D$, $D C$ & arcu $A B C$ comprehensum majus erit portionis $A B C$ dimidio. Ac proinde triangulum $A D C$ majus quam portionis $A B C$ sesquialterum. Quod erat demonstrandum.

THEOR. V. PROP. V.

Omnis circulus major est pylogono æqualium laterum sibi inscripto & triente excessus quo id polygonum superat aliud inscriptum subduplo laterum numero.

Estō circulus centro C ; sitque ipsi inscriptum polygonum TAB. XXXVIII, Fig. 5. æqualium laterum, quorum unum sit $A B$. Atque alterum item polygonum sit inscriptum, cujus bina latera $A D$, $D B$, subtendat $A B$. Hoc igitur priore polygono majus est. Sit autem excessus trienti æquale H spatium. Dico circulum majorem esse polygono $A D B$ una cum spatio H . Ducantur enim ex centro rectæ $C A$, $C B$. Quoniam igitur portio circuli $A D B$ major est quam sesquitertia trianguli $A D B$ sibi inscripti *; erunt portiones $A D$, $D B$, simul majores triente trianguli $A D B$. Quamobrem & sector $C A B$ major erit utrisque simul quadrilatero $C A D B$ & triente trianguli $A D B$. Sicut autem sector $C A B$ ad circulum totum, ita est quadrilaterum $C D B A$ ad polygonum $A D B$, & ita quoque triens trianguli $A D B$ ad trientem excessus polygoni $A D B$ supra polygonum $A B$. Ergo manifestum est circulum quoque totum majorem fore polygono $A D B$ una cum triente excessus quo polygonum $A D B$ superat polygonum $A B$, hoc est, unà cum spatio H . Quod erat demonstrandum.

THEOR. VI. PROP. VI.

Omnis circulus minor est duabus tertiis polygони æqualium laterum sibi circumscripti & triente polygони similis inscripti.

Estō

TAB. XXXVIII.
Fig. 6.

Estō circulus cujus centrum A , & inscribatur ipsi polygonum lateribus æqualibus, quorum unum sit BC ; & aliud simile circumscribatur FEG , cujus latera circulum contingant ad occursum angulorum polygoni prioris. Dico circulum minorem esse duabus tertiis polygoni FEG simul cum triente polygoni BC . Ducantur namque ex centro rectæ AB , AC . Igitur quoniam super basi portionis BC consistit triangulum $BE C$, cujus latera portionem contingunt, erit ipsa minor duabus tertiis trianguli $BE C$ *. Itaque si triangulo ABC addantur duæ tertiæ trianguli $BE C$, hoc est, duæ tertiæ excessus quadrilateri $ABEC$ supra triangulum ABC , ex utrisque compositum spatium majus erit sectorē circuli ABC . Idem est autem, si triangulo ABC addantur duæ tertiæ excessus dicti, siue addantur duæ tertiæ quadrilateri $ABEC$, contraque auferantur duæ tertiæ trianguli ABC : hinc autem fiunt duæ tertiæ quadrilateri $ABEC$ cum triente trianguli ABC . Ergo apparet sectorē ABC minorem esse duabus tertiis quadrilateri $ABEC$ & triente trianguli ABC . Quare sumptis omnibus quoties sector ABC circulo continetur, totus quoque circulus minor erit duabus tertiis polygoni circumscripti FEG & triente inscripti BC . Quod erat ostendendum.

* per. 4. huj.

THEOR. VII. PROP. VII.

Omnis circuli circumferentia major est perimetro polygoni æqualium laterum sibi inscripti, & triente excessus quo perimenter eadem superat perimetrum alterius polygoni inscripti subduplo laterum numero.

TAB. XXXVIII.
Fig. 7.

Estō circulus AB , centro O , cui inscribatur polygonum æquilaterum ACD , atque alterum duplo laterum numero $AECBDF$. Sitque recta GI æqualis perimetro polygoni $AECBDF$, GH vero æqualis perimetro polygoni

goni $A C D$. Excessus igitur perimetrorum est $H I$; cujus triens $I K$ adjiciatur ipsi $G I$. Dico totâ $G K$ majorem esse circuli $A B$ circumferentiam. Inscribatur enim circulo tertium polygonum æquilaterum $A L E M C$, quod sit duplo numero laterum polygoni $A E C B D F$. Et super lineis $G H$, $H I$, $I K$, triangula constituantur quorum communis vertex N , altitudo autem æqualis semidiametro circuli $A B$. Igitur quoniam $G H$ basis æqualis est perimetro polygoni $A C D$, erit triangulum $G N H$ æquale polygono, cui bis totidem sunt latera, hoc est, polygono $A E C B D F$. Hoc enim patet, ductis ex centro rectis $O A$ & $O E$, quarum hæc secet $A C$ in P . Nam triangulum quidem $A E O$ æquale est triangulo basin habenti $A P$ & altitudinem radii $O E$. Quanta autem pars est triangulum $A E O$ polygoni $A E C B D F$, eadem est recta $A P$ perimetri $A C D$. Itaque polygonum $A E C B D F$ æquabitur triangulo cujus basis æqualis perimetro $A C D$, altitudo autem radio $E O$: hoc est, triangulo $G N H$. Eadem ratione, quoniam basis $G I$ est æqualis polygoni $A E C B D F$ perimetro, & altitudo trianguli $G N I$ æqualis radio circuli, erit triangulum $G N I$ æquale polygono $A L E M C$. Itaque triangulum $H N I$ æquale excessui polygoni $A L E M C$ supra polygonum $A E C B D F$. Trianguli autem $H N I$ subtripulum est ex constr. triangulum $I N K$. Ergo hoc æquale erit dicti excessus trienti. Quare totum triangulum $G N K$ minus erit circulo $A B$ *. Altitudo autem * per s. huj. trianguli æqualis est circuli semidiametro. Ergo evidens est rectam $G K$ totâ circuli circumferentiâ minorem esse. Quod erat ostendendum.

Hinc manifestum est, si à sesquitertio laterum polygoni circulo inscripti auferatur triens laterum polygoni alterius inscripti subduplo laterum numero, reliquum circumferentiâ minus esse. Idem enim est, si perimetro majori addatur $\frac{1}{3}$ excessus quo ipsa superat perimetrum minorem, si addatur $\frac{1}{3}$ perimetri majoris contraque auferatur $\frac{1}{3}$ perimetri minoris. Hinc autem fit sesquitertium majoris perimetri mi-

nus triente minoris. Quare si à sexdecim inscripti dodecagoni lateribus duo latera inscripti hexagoni, hoc est, diameter circuli deducatur, reliqua circuli circumferentiâ minor erit, aut si ab octo dodecagoni lateribus radius deducatur, reliqua minor erit circumferentiæ semisse. Hoc autem ad constructionem mechanicam utile est, quoniam exigua est differentia, sicut postea ostendetur.

Manifestum etiam, in omni arcu qui semicircumferentiâ minor sit, si ad subtenfam addatur triens excessus quo subtensa sinum superat, compositam arcu minorem esse.

THEOR. VIII. PROP. VIII.

Circulo dato, si ad diametri terminum contingens ducatur, ducatur autem & ab opposito diametri termino quæ circumferentiam secet occurratque tangenti ductæ: erunt interceptæ tangentis duæ tertiæ cum triente ejus quæ ab intersectionis puncto diametro ad angulos rectos incidet, simul arcu abscisso adjacente majores.

TAB. XXXVIII.
Fig. 8.

Estō circulus centro A, diametro B C; & ducatur ex C recta quæ circumferentiam contingat C D: huic autem occurrat ducta ab altero diametri termino recta B D, quæ circumferentiam secet in E: sitque E F diametro B C ad angulos rectos. Dico tangentis interceptæ C D duas tertias simul cum triente ipsius E F, arcu E C majores esse. Jungantur enim A E, E C; & ducatur tangens circumferentiam in E puncto, quæ tangenti C D occurrat in G. Erit igitur G E ipsi G C æqualis, itemque D G; nam si centro G circumferentia describatur quæ transeat per puncta C, E, eadem transibit quoque per D punctum, quoniam angulus C E D rectus est. Ostensum autem fuit suprâ, duas tertias quadrilateri A E G C una cum triente trianguli A E C simul majores esse sectore A E C*. Estque quadrilaterum A E G C æquale triangulo basin habenti

* per 6. huj.

benti duplam CG , hoc est, CD , & altitudinem CA : triangulum vero AEC æquale triangulo basin ipsi EF æqualem habenti & altitudinem dictam AC . Itaque apparet duas tertias quadrilateri $AEGC$ simul cum triente trianguli AEC æquari triangulo qui basin habeat compositam ex duabus tertiis CD & triente EF , altitudinem vero radii AC . Quare ejusmodi quoque triangulum majus erit sectore AEC . Unde liquet basin ipsius, hoc est, compositam ex duabus tertiis ipsius CD & triente ipsius EF , majorem esse arcu CE . Quod erat demonstrandum.

THEOR. IX. PROP. IX.

Omnis circuli circumferentia minor est duabus tertiis perimetri polygoni æqualium laterum sibi inscripti & triente perimetri polygoni similis circumscripti.

Esto Circulus cujus A centrum; & inscribatur ei polygonum æquilaterum, cujus latus CD : simileque aliud circumscribatur lateribus ad priora parallelis, quorum unum sit EF . Dico circuli totius circumferentiam minorem esse duabus tertiis ambitus polygoni CD & triente ambitus polygoni EF . Ducatur namque diameter circuli BG , quæ simul inscripti polygoni latus CD medium dividat in H , & circumscripti latus EF in G , (constat autem G fore punctum contactus lateris EF .) Et ponatur HL æqualis ipsi HG , & jungantur AC , BC & producantur, occurrâtque BC lateri EF in K , producta autem AC incidet in E angulum polygoni circumscripti. Quoniam igitur HL æqualis HG , erit BL dupla ipsius AH : Ideoque ut GA ad AH , ita GB ad BL . Major autem est ratio HB ad BL , quam GB ad BH ; quoniam hæ tres sese æqualiter excedunt GB , HB , LB . Itaque major erit ratio GB ad BL , hoc est, GA ad AH , quam duplicata rationis GB ad BH . Sicut autem GA ad AH , ita est EG ad CH ; & sicut GB

TAB. XXXIX.
Fig. 1.

Z z 2 ad

ad B H, ita K G ad C H. Ergo major erit ratio E G ad C H, quam duplicata ejus, quam habet K G ad C H. Quare major ratio E G ad K G, quam K G ad C H. Ideoque duæ simul E G, C H omnino majores duplâ K G. Et sumptis omnium trientibus, erunt trientes utriusque E G & C H simul majores duabus tertiis K G. Quamobrem addito utrimque ipsius C H triente, erit triens E G cum duabus tertiis C H, major duabus tertiis K G cum triente C H. Hisce vero minor etiam est arcus C G *. Igitur duæ tertiæ C H simul cum triente ipsius E G majores omnino sunt eodem arcu C G. Unde sumptis omnibus toties quoties arcus C G circumferentiâ totâ continetur, erunt quoque duæ tertiæ perimetri polygoni C D, cum triente perimetri polygoni E F, majores circuli totius circumferentiâ. Quod fuerat ostendendum.

• *per præced.* Omnis igitur circumferentiæ arcus quadrante minor, minor est sinus sui besse & tangentis triente.

PROBLEMA I. PROP. X.

Peripheriæ ad diametrum rationem invenire quamlibet veræ propinquam.

Minorem esse peripheriæ ad diametrum rationem quam triplam sesquiseptimam: majorem vero quam $3\frac{5}{7}$, Archimedes ostendit inscripto circumscriptoque 96 laterum polygono. Idem verò hic per dodecagona demonstrabimus.

Quia enim latus inscripti circulo dodecagoni majus est partibus 5176 $\frac{3}{8}$, qualium radius continet 10000: duodecim latera proinde, hoc est, perimenter inscripti dodecagoni major erit quam 62116 $\frac{1}{2}$: perimenter autem hexagoni inscripti est radii sextupla, ideoque partium 60000. Igitur dodecagoni perimenter perimetrum hexagoni excedit amplius quam partibus 2116 $\frac{1}{2}$. Quare triens excessus major erit quam 705 $\frac{1}{2}$. Igitur dodecagoni perimenter unâ cum triente excessus, quo perimetrum hexagoni superat, major erit aggregato partium

62116 $\frac{1}{2}$




Fig. 1.




Fig. 2.




Fig. 3.




Fig. 4.




Fig. 5.





Fig. 6.




Fig. 8.





Fig. 7.





62116 $\frac{1}{2}$ & 705 $\frac{1}{2}$, hoc est, partibus 62822. Atque hisce proinde omnino major erit circuli peripheria *. Est autem major ratio 62822 ad 20000, longitudinem diametri, quam 3 $\frac{10}{71}$ ad 1. Ergo omnino etiam peripheriæ ad diametrum ratio major erit. * per 7. huj.

Rursus quoniam latus dodecagoni inscripti minus est partibus 5176 $\frac{2}{3}$. Erunt octo latera, hoc est, $\frac{2}{3}$ perimetri minora quam 41411 $\frac{1}{3}$. Item quia latus dodecagoni circumscripti minus est quam 5359, erunt quatuor latera, hoc est, triens perimetri minor quam 21436. Quamobrem $\frac{2}{3}$ perimetri dodecagoni inscripti cum triente perimetri circumscripti minores erunt quam 62847 $\frac{1}{3}$. Sed istis simul minor etiam est circuli circumferentia *. Ergo hæc ad diametrum omnino minorem habebit rationem, quam 62847 $\frac{1}{3}$ ad 20000; & multo minorem proinde, quam 62857 $\frac{1}{3}$ ad 20000, hoc est, quam triplam sesquiseptimam. Demonstrati itaque sunt termini Rationis peripheriæ ad diametrum, quos Archimedes statuit. Eosdem verò postmodum solius inscripti trigoni æquilateri latere indagato comprobabimus. Porro ut propinquior inveniatur ratio plurium laterum polygoni considerata sunt. Intelligatur igitur circumscriptum circulo polygonum aliudque inscriptum laterum 60. Et præter hæc subduplo numero laterum inscriptum, nempe trigintangulum. * per 9. huj.

Et invenitur quidem latus inscripti sexagintanguli majus partibus 10467191, qualium radius 100000000 & latus trigintanguli minus quam 20905693: cujus dimidium 10452846 $\frac{1}{2}$ est sinus arcus æquantis $\frac{1}{360}$ circumferentiæ. Subtensa autem erat 10467191. Ergo differentia 14344 $\frac{1}{2}$ minor verâ: & triens differentiæ 4781 $\frac{1}{2}$, qui additus ad subtensam 10467191 facit 10471972 $\frac{1}{2}$. Quibus itaque majore est arcus $\frac{1}{360}$ circumferentiæ. Ductis autem 10471972 $\frac{1}{2}$ sexagies fiunt 628318250. Hisce igitur partibus omnino major est circumferentia tota.

Rursus quoniam latus inscripti 60 anguli minus est quam 10467192, erunt duæ tertiæ ipsius minores quam 6978128. Circumscripti autem 60 anguli latus cum sit minus quam 10481556, erit triens ipsius minor quam 3493852. Quibus

additis ad 6978128, fiunt 10471980. Hæ igitur omnino excedunt $\frac{1}{3}$ circumferentiæ, & sexagecuplum ipsarum, hoc est 628318800 majus erit circumferentiâ totâ. Quod si verò polygona adhibeamus laterum 10800, quorum inscripti quidem latus, calculo Ludolphi Colonienfis, Arithmetici nobilis, inventum est partium 58177640912684919 non unâ amplius, subtenditurque duobus scrup. primis; circumscripti autem latus 58177643374063182 non unâ minus. Prætereaque latus polygoni subduplo laterum numero inscripti, quod est 116355276902613523 non unâ minus. Hinc peripheriæ longitudo invenitur major quam partium 6283185307179584; minor autem quam 6283185307179589, qualium radius 1000000000000000. Solitâ autem methodo ex additis inscripti circumscriptique polygoni istius lateribus, invenietur tantum majorem esse peripheriam partibus 62831852, & minorem 62831855. Patet igitur notarum verarum amplius quam duplum numerum esse à nobis inventum. Hoc autem & in præcedentibus ita se habet, semperque evenire necesse est quotcunque laterum polygonis utamur. At per ea, quæ postea trademus, triplum numerum notarum facile obtineri apparebit.

PROBLEMA II. PROP. XI.

Rectam sumere peripheriæ dati circuli æqualem.

Ostensum est superius, quod octo inscripti dodecagoni latera dempto circuli radio minora sunt peripheriâ dimidiâ. In constructione autem ut plurimum defectus animadverti nequit. Nam si quatermillesima diametri pars accedat longitudini sic inventæ, jam dimidiam peripheriam excedet. Quod sic fiet manifestum. Quarum partium radius est 10000, earum latus dodecagoni inscripti circulo est amplius quam $5176\frac{3}{8}$. Unde latera octo majora quam 41411. & dempto radio 10000, erit reliqua major quam 31411. cui si addantur partes 5, hoc est, $\frac{1}{4555}$ diametri, fient jam 31416; quibus minorem esse circumferentiam dimidiam liquet ex præcedentibus. Latus autem

tem dodecagoni inscripti facile invenitur, quia radius peripheriæ sextantem subtendit. Estque hæc ratio accuratior quam si triplâ sesquiseptimâ utamur. Nam secundum eam excedetur $\frac{1}{2}$ peripheriæ longitudo amplius quam $\frac{1}{100}$ diametri.

A L I T E R.

Est dato circulus cujus B C diameter. Dividatur semicircumferentiâ B C bifariam in D. reliqua vero trifariam in E & F. Et jungantur D E, D F, quæ secant diametrum in G & H. Erit trianguli G D H latus alterum una cum basi G H quadrante B D exiguo majus; neque enim excedet $\frac{1}{1000}$ diametri B C. Sciendum est enim fieri D G vel D H duobus inscripti dodecagoni lateribus æquales. G H autem lateri dodecagoni circumscripti. Unde quidem junctas D G & G H majores esse constat quadrante B D. Nam quia per 8. huj. octo latera dodecagoni circulo inscripti cum quatuor lateribus circumscripti majora sunt peripheriâ totâ, ideo sumptâ omnium quartâ parte erunt quoque duo latera inscripti cum latere uno circumscripti majora peripheriæ quadrante. Porro quoniam latus inscripti dodecagoni minus est quam partium 51764 qualium B C 200000: erunt latera duo, hoc est, G D, minor quam 103528. Circumscripti autem dodecagoni latus minus est partibus 53590, ipsa nimirum G H. Itaque junctæ una D G, G H efficiunt minus quam 157118. At quadrantem B D constat ex præcedentibus majorem esse quam 157079. Ergo differentia minor est quam partium 39, cum 40 demum efficiant $\frac{1}{1000}$ diametri B C.

A L I T E R.

Tribus semidiametris addatur $\frac{1}{16}$ lateris inscripti quadrati; composita semicircumferentiæ æquabitur tam propè, ut non $\frac{1}{18000}$ diametri brevior sit. Latus quadrati est majus quam partium 141421 qualium radius 100000, unde quod dictum est facile demonstratur.

Vel

Vel potius sex se midiametris addatur; dicti lateris quadrati inscripti ut habeatur recta æqualis peripheriæ toti.

PROBLEMA III. PROP. XII.

Dato arcui cuicunque rectam æqualem sumere.

TAB. XXXIX.
Fig. 3.

Est dato circumferentiæ arcus CD , primum quadrante minor, cui rectam æqualem sumere oporteat. Dividatur arcus CD bifariam in E , sitque subtensæ CD æqualis recta FG . Duabus vero CE ; ED , quæ subtendunt arcus dimidios, æqualis FH . Et ipsi FH jungatur HI triens excessus GH . Erit tota FI arcui CD æqualis ferè: adeo ut unâ sui particulâ, qualium 1200 continet, aucta, major futura sit, etiamsi arcus CD quadranti æqualis detur. In minoribus autem arcubus minor erit differentia. Nam si fuerit datus non major peripheriæ sextante, linea inventa minus quam $\frac{1}{6000}$ sui parte à vera arcus longitudine deficiet. Et minores quidem esse arcubus rectas eo modo inventas constat ex Theoremate 7. huj. De quantitate autem differentiæ est ostendendum.

Primum itaque ponendo arcum CD quadranti peripheriæ æqualem, erit CD recta, hoc est, FG ; latus quadrati circulo inscripti, & minor proinde quam partium 141422, qualium radius circuli 100000. CE autem vel ED latus inscripti octogoni, ideoque major quam 76536. Est autem duplæ ED æqualis FH . Ergo hæc major quam 153072. Quare excessus GH major quam 11650: Et hujus triens HI major quam 3883. Ideoque tota FI major quam 156955. Arcus autem CD cum quadranti æqualis ponitur, minor est quam 157080. Itaque minus ab hoc discrepat recta FI quam partibus 125, qualium ipsa est 156955. Quæ utique minus efficiunt quam $\frac{1}{1250}$ ipsius FI .

Si vero sextans peripheriæ sit arcus CD , erit recta CD , hoc est, FG , latus hexagoni inscripti, ideoque partium 10000, & CE vel ED latus dodecagoni, ac proinde major

ior quam $5176\frac{3}{4}$. cujus dupla F H major quam $10352\frac{3}{4}$. unde G H major quam $352\frac{3}{4}$; & H I major quam $117\frac{7}{8}$. Tota igitur F I major quam $10470\frac{1}{2}$. Arcus autem C D, sextans peripheriæ, minor est quam 10472 . Ergo deficiunt lineæ F I partium earundem pauciores quam $1\frac{2}{3}$. Quæ non æquant $\frac{1}{255}$ F I. Porro cum arcus quadrante major datus erit, dividendus est in partes æquales 4 vel 6 vel plures, prout accuratiori dimensione uti voluerimus; sed numero pares: Earumque partium subtensis simul sumptis adjungendus est triens excessus quo ipsæ superant aggregatum earum quæ arcubus duplis subtenduntur. Ita namque componetur longitudo arcus totius. Vel hac etiam ratione eadem habebitur, si arcus reliqui ad semicircumferentiam longitudo inveniatur aut supra eandem excessus, aut reliqui ad circumferentiam totam, si dodrante major fuerit datus; eaque longitudo adjungatur vel auferatur à dimidiæ vel totius circumferentiæ longitudine, quam antea invenire docuimus.

THEOR. X. PROP. XIII.

Latus Polygoni æquilateri circulo inscripti, proportionem medium est inter latus polygoni similis circumscripti, & dimidium latus polygoni inscripti sub duplo laterum numero.

IN circulo cujus centrum A, radius A B, sit latus inscripti polygoni æquilateri B C; & latus circumscripti similis polygoni D E ipsi B C parallelum. Ergo producta A B transibit per D, & A C per E. Et si ducatur C F ipsi A B ad angulos rectos, ea erit dimidium latus polygoni inscripti sub duplo numero laterum. Itaque ostendendum est, B C medium esse proportionem inter E D & C F. Ducatur A G, quæ dividat E D bifariam, itaque erit ipsa quoque circuli semidiameter & æqualis A B. Et quoniam est ut E D ad C B, sic D A ad A B, hoc est, D A ad A G; sicut autem D A

TAB. XXXIX.
Fig. 4.

Tom. II. A a a ad

ad $A G$, ita $B C$ ad $C F$, propter triangulos similes $D A G$, $B C F$. Erit proinde ut $E D$ ad $C B$, ita quoque $C B$ ad $C F$. Quod erat demonstrandum.

L E M M A.

TAB. XXXIX.
Fig. 5.

Est lineae $B C$ divisa æqualiter in R , & inæqualiter in F , sitque segmentum majus $F C$, & fiat $B O$ æqualis utrique simul $B C$, $C F$; $B M$ vero utrique $B C$, $C R$. Dico majorem esse rationem $R B$ ad $B F$, quam triplicatam ejus, quam habet $O B$ ad $B M$. Sumatur enim ipsi $O M$ æqualis utraque harum $M L$, $L P$. Quoniam igitur $M O$ ipsi $R F$ æqualis est, (nam hoc ex constructione intelligitur) erit $P O$ tripla ipsius $F R$. Sed & $B M$ tripla est $B R$. Ergo ut $B R$ ad $B M$, ita $F R$ ad $P O$. Et permutando ut $B R$ ad $F R$, sic $B M$ ad $P O$. Major autem est $B O$ quam $B M$. Ergo major erit ratio $B O$ ad $O P$, quam $B R$ ad $R F$: & per conversionem rationis minor $O B$ ad $B P$, quam $R B$ ad $B F$. Porro quoniam æquales sunt $O M$, $M L$, major erit ratio $B O$ ad $O M$, quam $B M$ ad $M L$: & per conversionem rationis minor $O B$ ad $B M$, quam $M B$ ad $B L$. Eodem modo minor adhuc ostendetur ratio $M B$ ad $B L$, quam $L B$ ad $B P$. Itaque omnino ratio triplicata ejus quam habet $O B$ ad $B M$ minor erit quam composita ex rationibus $O B$ ad $B M$, $B M$ ad $B L$, & $B L$ ad $B P$, hoc est, quam ratio $O B$ ad $B P$. Major autem erat $R B$ ad $B F$, quam $O B$ ad $B P$. Ergo omnino major erit ratio $R B$ ad $B F$, quam triplicata rationis $O B$ ad $B M$. Quod erat propositum.

T H E O R. XI. P R O P. XIV.

Omnis circuli circumferentia minor est minore duarum mediarum proportionalium inter perimetros polygonorum similium, quorum alterum ordinate circulo inscriptum sit, alterum circumscriptum.

ptum. Et circulus minor est polygono istis similicujus ambitus majori mediarum æquetur.

Estō circulus $B D$, cujus centrum A . Et inscribatur ei polygonum æquilaterum $B C D L$, simileque circumscribatur lateribus parallelis $H K M N$. Sitque perimetro polygoni $H K M N$ æqualis recta T , perimetro autem $B C D L$ æqualis Z . Et inter Z & T duæ sint mediæ proportionales X & V , quarum X minor. Dico circumferentiam circuli $B D$ minorem esse rectâ X . Et si fiat polygonum in quo Y , cujus perimeter æquetur rectæ V , simile autem sit polygono $B C D L$ aut $H K M N$; Dico circumferentiam $B N$ minorem haberi polygono Y . Ducatur enim diameter circuli $P E$, quæ dividat bifariam latera parallela $B C$, $H K$, inscripti circumscriptique polygoni in R & E ; erit autem E punctum contactus lateris $H K$, & $B C$ secabitur in R ad angulos rectos. Ducatur etiam ex centro recta $A C K$, quæ utriusque polygoni angulos C & K bifariam secet, nam hoc ab eadem recta fieri constat; & jungatur $C E$. Ipsi autem $C E$ ponatur æqualis $C F$; sitque duabus his $C R$, $C F$ tertia proportionalis $C G$. Ergo qualis polygoni inscripti latus est $C E$ sive $C F$, talis circumscripti latus erit $C G$ *. Ideoque duæ tertiæ $C F$ cum triente $C G$ simul majores erunt arcu $E C$ *. Sit autem duabus tertiis $C F$ cum triente $C G$ æqualis recta S . Ergo & hæc major erit arcu $E C$.

Et quoniam se habet $C R$ ad $C F$, ut $C F$ ad $C G$; erit quoque dupla $C R$ una cum $C F$ ad triplam $C R$, hoc est, utraque simul $B C$, $C F$ ad utramque $B C$, $C R$, ut dupla $C F$ una cum $C G$ ad triplam $C F$: vel sumptis horum trientibus, ut $\frac{2}{3} C F$ una cum $\frac{1}{3} C G$ ad $C F$, hoc est, ut S ad $C F$. Quare etiam triplicata ratio ejus quam habet utraque simul $B C$, $C F$ ad utramque $B C$, $C R$ eadem erit triplicatæ rationi S ad $C F$. Major autem est ratio $R B$ ad $B F$ quam triplicata ejus, quam habet utraque simul $B C$, $C F$ ad utramque $B C$, $C R$ *. Ergo major eadem ratio $R B$ ad $B F$ quam triplicata ejus quam habet S ad $C F$,
A a a 2

TAB. XXXIX.
Fig. 6.

* per 13. huj.

* per 9. huj.

* per lemma
præc.

C F,

CF , hoc est, quam cubi S ad cubum CF . Sicut autem RB ad BF , ita est cubus RB ad id quod fit ex quadrato RB in BF . Ergo major quoque ratio cubi RB ad quadratum RB in BF , quam cubi S ad cubum CF . Quadrato autem RB in BF minus est rectangulum sub RB , BG , in FC ; quod sic ostenditur. Quia enim proportionales sunt RC , CF , CG , Erit id quo major mediam excedit, hoc est FG , major quam quo media minimam, hoc est, quam FR . Major autem est FC quam FB . Ergo omnino major erit ratio CF ad FR , quam BF ad FG . Et per conversionem rationis, minor ratio FC ad CR , quam FB ad BG . Et permutando minor FC ad FB , quam CR seu RB ad BG : hoc est, (sumptâ communi altitudine BR) quam quadrati RB ad rectangulum RBG . Unde quod fit ex rectangulo RBG in FC minus erit quam quod ex quadrato RB in FB , uti dictum fuit. Quum itaque major ostensa fuerit ratio cubi RB ad quadratum RB in BF , quam cubi S ad cubum CF ; omnino quoque major erit ratio cubi RB ad solidum sub rectangulo RBG in FC , quam cubi S ad cubum CF . Et permutando major ratio cubi RB ad cubum S , quam rectanguli RBG in FC ad cubum CF ; hoc est, quam rectanguli RBG ad quadratum CF . Est autem quadrato CF æquale rectangulum GCR , hoc est rectangulum sub GC , RB , quia proportionales sunt CR , CF , CG . Itaque major erit ratio cubi RB ad cubum S , quam rectanguli RBG ad rectangulum sub GC , RB , hoc est, quam BG ad GC . Sicut autem BG ad GC , ita RC ad EK . Quia enim est CR ad CG , ut quadratum CR ad quadratum CF seu quadratum CE : ut autem quadratum CR ad quadratum CE , ita est PR ad PE diametrum: Erit idcirco CR ad CG , ut PR ad PE . Unde dupla CR , hoc est, CB ad CG , ut dupla PR ad PE , hoc est, ut PR ad PA . Et dividendo, BG ad GC , ut RA ad AP , seu AE , hoc est, ut RC ad EK , quod dicebamus. Itaque major quoque ratio cubi RB ad cubum S , hoc est, ratio triplicata

RB

R B ad S, quam R C ad E K. Est autem S major ostensa arcu E C. Ergo omnino major erit ratio triplicata R B seu R C ad æqualem arcui E C, quam R C ad E K. Sicut autem R C ad arcum E C, ita est perimeter polygoni B C D L, hoc est, linea Z ad circumferentiam circuli B D; Et sicut R C ad E K, ita perimeter polygoni B C D L ad perimetrum polygoni H K M N, hoc est, ita Z ad T. Ergo major quoque triplicata ratio Z ad circumferentiam totam B D, quam Z ad T. Ratio autem triplicata Z ad X eadem est rationi Z ad T. Itaque major est ratio ipsius Z ad dictam circumferentiam, quam Z ad X. Ac proinde circumferentia minor quam recta X. Quod erat demonstrandum.

Sciendum est autem ipsam X minorem esse duabus tertiis Z & triente T: hoc est, duabus tertiis perimetri polygoni inscripti & triente circumscripti, quibus alioqui minorem esse circuli circumferentiam constat ex præcedentibus. Nam $\frac{2}{3}$ Z cum $\frac{1}{3}$ T æquantur minori duarum mediarum secundum Arithmeticam proportionem, quæ major est minore mediarum secundum proportionem Geometricam.

Jam vero & de polygono Y demonstrabimus, ipsum videlicet circulo B D majus esse. Quia enim polygonum Y habet ad polygonum simile H K M N rationem duplicatam ejus quam perimeter ad perimetrum: perimeter autem polygoni Y æquatur rectæ V, & perim. H K M N ipsi T. habebit proinde polygon. Y ad polyg. H K M N rationem duplicatam ejus quam V ad T, hoc est, eam quam X ad T. Sicut autem polygonum H K M N ad circulum B D, ita est perimeter ipsius polygoni, hoc est, linea T ad circuli B D circumferentiam; quoniam polygonum æquale est triangulo basin habenti perimetro suæ æqualem & altitudinem radii A E, circulus autem æqualis ejusdem altitudinis triangulo cujus basis circumferentiæ æquetur. Ex æquali igitur, erit polygonum Y ad circulum B D sicut X ad circumferentiam B D. Est autem X major ostensa quam B D circumferentia. Ergo & polygonum Y majus erit circulo B D. Quod erat demonstrandum.

Ex his manifestus est Orontii Finei error, qui circumferentiæ quadrantem æqualem minori duarum proportionem mediarum inter inscripti & circumscripti quadrati latera prodidit, circulum vero æqualem quadrato quod fieret à majori.

THEOR. XII. PROP. XV.

SI inter productam circuli diametrum & circumferentiam recta aptetur radio æqualis, & producta circulum secet, occurratque tangenti circulum ad alterum diametri terminum: Intercipiet ea partem tangentis arcu adjacente abscisso majorem.

TAB. XXXIX.
Fig. 7.

Est descriptus circulus centro C , cujus diameter AB . Hæc autem producat versus A , interque ipsam & circumferentiam ponatur ED recta radio AC æqualis. Quæ producta secet circumferentiam in F , occurratque tangenti in G , ei nimirum quæ circulum contingit ad diametri terminum B . Dico tangentem BG majorem esse arcu BF . Ducatur enim per centrum recta HL parallela EG , quæ circumferentiæ occurrat in punctis H , M : tangenti vero BG in L . Et jungatur DH , quæ diametrum secet in K . Similes itaque sunt trianguli EDK , CHK , quoniam angulos ad K æquales habent, & angulum E æqualem angulo C . Sed & latus ED æquale est lateri HC , suntque hæc latera æqualibus angulis subtenfa. Ergo æquale etiam latus DK lateri KH . Itaque CA secat bifariam ipsam DH , itemque arcum DAH . Arcus igitur DH sive huic æqualis FM duplus est ad arcum AH . Ipsi autem AH æqualis est arcus MB . Igitur arcus FB triplus erit ad arcum AH . Porro quoniam HK sinus est arcus HA , ejusdemque tangenti æquatur LB , erunt duæ tertiæ HK & triens LB simul majores arcu AH *. Quare sumptis omnium triplis erit dupla HK , hoc est, HD sive GL una cum LB major arcu AH triplo, hoc est, arcu FB . Apparet igitur totam GB arcu FB majorem esse.

Hoc




Fig. 1.



Fig. 2.




Fig. 4.




Fig. 3.




Fig. 5.




Fig. 6.






Fig. 7.



Hoc Theorema alterum est ex iis quibus Cyclometria Willebrordi Snellii tota innitur, quæque demonstrasse ipse videri voluit, argumentatione usus quæ meram quæsitæ petitionem continet. Sed & alterum subjungemus, quod utile est imprimis & contemplatione dignissimum.

THEOR. XIII. PROP. XVI.

*SI diametro circuli semidiameter in directum adji-
ciatur, & ab adjunctæ termino recta ducatur quæ
circulum secet, occurratque tangenti circulum ad ter-
minum diametri oppositum: Intercipiet ea partem tan-
gentis arcu adjacente abscisso minorem.*

Estō circulus, cujus diameter AB ; quæ producat, & ^{TAB. XL.}
sit AC semidiametro æqualis. Et ducatur recta CL , ^{Fig. 1.}
quæ circumferentiam secundò secet in E ; occurratque tan-
genti in L , ei nimirum quæ circulum contingit in termino
diametri B . Dico interceptam BL arcu BE minorem esse.
Jungantur enim AE , EB , positâque AH ipsi AE æqua-
li ducatur HE & producat, occurratque tangenti in K .
Denique sit EG diametro AB ad angulos rectos, ED ve-
ro tangenti BL . Quoniam igitur isosceles est triangulus
 HAE , erunt anguli inter se æquales H & HEA . Quia
autem angulus AEB rectus est, etiam recto æquales erunt
duo simul HEA , KEB . Verùm duo quoque isti H &
 HKB uni recto æquantur, quoniam in triangulo HKB
rectus est angulus B . Ergo demptis utrimque æqualibus,
hinc nimirum angulo H , inde angulo HEA , relinquen-
tur inter se æquales anguli KEB , HKB . Triangulus
igitur isosceles est KBE , ejusque latera æqualia EB , BK .
Est autem BD æqualis EG . Ergo DK differentia est quâ
 BE excedit EG . Porro quoniam est AG ad AE , ut AE
ad AB , erunt duæ simul AG , AB majores duplâ AE .* ^{*25.5. Elem.}
Ideoque AE , hoc est, AH minor quam dimidia utriusque
simul

simul AG , AB ; hoc est, minor quam CA cum dimidia AG . Quare ablatâ utrimque CA , erit CH minor dimidiâ AG . CA vero dimidiâ AG major est. Ergo si addatur AC ad AG , erit tota CG major quam tripla ipsius CH . Quia autem ut HG ad GE , ita est ED ad DK ; ut autem GE ad GC , ita LD ad DE : Erit ex æquo in proportionem turbata ut HG ad GC , ita LD ad DK . Et per conversionem rationis & dividendo, ut GC ad CH , ita DK ad KL . Ergo etiam DK major quam tripla KL . Erat autem DK excessus ipsius EB supra EG . Ergo KL minor est triente dicti excessus. KB autem æqualis est ipsi EB subtensæ. Ergo KB unâ cum KL , hoc est, tota $per 7. huj.$ LB omnino minor erit arcu BE *. Quod erat demonstrandum.

Perpenso autem Theoremate præcedenti, liquet non posse sumi punctum aliud in producta BA diametro, quod minus à circulo distet quam punctum C , eandemque servet proprietatem, ut nimirum ductâ CL fiat tangens intercepta BL semper minor arcu abscisso BE .

Porro usus hujus Theorematis multiplex est, cum inveniendis triangulorum angulis quorum cognita sint latera, idque citra tabularum opem, tum ut latera ex angulis datis inveniantur, vel cuilibet peripheriæ arcui subtensa assignetur. Quæ omnia à Snellio in Cyclometricis diligenter pertractata sunt.

THEOREMA XIV. PROPOS. XVII.

Portionis circuli centrum gravitatis diametrum portionis ita dividit, ut pars quæ ad verticem reliquâ major sit, minor autem quam ejusdem sesquialtera.

TAB. XL.
Fig. 1.

Esto circuli portio ABC , (ponatur autem semicirculo minor, quoniam cæteræ ad propositum non faciunt) & diameter portionis sit BD , quæ bifariam secetur in E . Itaque
osten-

ostendendum est primò centrum gravitatis portionis $A B$ distare à vertice B ultra punctum E ; nam, quod in diametro situm sit, alibi ostendimus. Ducatur per E recta basi parallela, quæ utrimque circumferentiæ occurrat in punctis F & G . Per quæ ducantur $K I$, $H L$ basi $A C$ ad angulos rectos, atque hæ cum ea, quæ portionem in vertice contingit, constituent rectangulum $K L$. Quoniam igitur portio semicirculo minor est, constat rectanguli dicti dimidium $F L$ contineri intra segmentum $A F G C$, atque insuper spatia quædam $A F I$, $L G C$. Alterum vero rectanguli $K L$ semissem $K G$ complecti segmentum $F B G$ unà cum spatiis $F B K$, $B G H$. Quæ spatia quum sint tota supra rectam $F G$, etiam centrum commune gravitatis eorum supra eandem situm erit. Est autem E punctum in ipsa $F G$ centrum grav. totius rectanguli $K L$. Igitur spatii reliqui $B F I L G B$ centrum grav. erit infra rectam $F G$. Sed & spatiorum $A F I$, $L G C$ commune gravitatis centrum est infra eandem $F G$. Ergo magnitudinis ex spatiis hisce & dicto spatio $B F I L G B$ compositæ, quæ est portio ipsa $A B C$, centrum gravitatis infra lineam $F G$ reperiri necesse est, ideoque infra E punctum.

Eadem verò diameter $B D$ secetur nunc in S , ita ut $B S$ sit sesquialtera reliquæ $S D$. Dico centrum grav. portionis $A B C$ minus distare à vertice B quam punctum S . Sit enim $B D P$ totius circuli diameter. & ducatur per S recta basi parallela quæ circumferentiæ occurrat in F & G . Et parabole intelligatur cujus vertex B , axis $B D$, rectum vero latus æquale $S P$. Et occurrat basi portionis in H & K . Quoniam igitur quadratum $F S$ æquale est rectangulo $B S P$, hoc est, ei quod sub $B S$ & latere recto parabolæ continetur, transibit ea per F punctum, itemque per G . Partes autem lineæ parabolicæ $B F$, $B G$ intra circumferentiam cadent, sed reliquæ $F H$, $G K$ erunt exteriores. Hoc enim ostenditur ductâ inter B & S ordinatim applicatâ $N L$, quæ circumferentiæ occurrat in N , parabolæ autem in M . Nam quia quadratum $N L$ æquale est rectangulo $B L P$, quadratum vero

TAB. XL.
Fig. 3.

M L rectangulo contento lineis B L, S P: rectangulum autem B L P majus eo quod sub B L, S P continetur: erit quadratum N L majus quadrato M L, & N L linea major quam M L. Idem autem continget ubicunque inter B & S aliqua ordinatim applicabitur. Igitur partem circumferentiæ B F totam extra parabolam ferri necesse est, eademque ratione partem B G. Rursus quia rectangulum B D P æquale est quadrato D A; rectangulum verò sub B D, S P contentum quadrato D H; erit H D major quam A D potentiâ, ideoque & longitudine. Idemque eveniet ubicunque inter S, D, ordinatim aliqua applicabitur. Quare partes circumferentiæ F A, itemque G C intra parabolam cadent. Fiunt igitur spatia quædam F N B M, & B Q G, itemque alia H F A, G C K. Quorum hæc cum tota sint infra lineam F G, etiam centrum commune gravitatis eorum infra eandem erit. At parabolicæ portionis H B K centrum grav. est in ipsa F G, nimirum S punctum*. Ergo partis reliquæ A F M B Q G C centrum grav. erit supra rectam F G. Sed supra hanc situm quoque apparet centrum grav. spatiorum F M B N, B Q G, quum tota sint supra ipsam F G. Ergo & spatii ex hisce duobus & A F M B Q G C compositi, hoc est, portionis circuli A B C centrum grav. supra lineam F G reperietur: quumque sit in B D diametro, minus aberit à vertice B quam punctum S. Quod erat ostendendum.

* 8. lib. 2.
Archim. de
Equipond.

THEOR. XV. PROPOS. XVIII.

Circuli portio semicirculo minor ad inscriptum triangulum maximum majorem rationem habet quam sesquitertiam, minorem vero quam diameter portionis reliquæ tripla sesquitertia ad circuli diametrum cum tripla ea, quæ à centro circuli pertingit ad portionis basin.

Sit

SI portio semicirculo minor, cui inscriptum triangulum maximum A B C. Diameter autem portionis sit B D; & ^{TAB. XL. Fig. 4.} diameter circuli à quo portio resecta est, B F, centrum E. Ostendendum est primo, portionis A B C ad triangulum inscriptum majorem esse rationem quam sesquitertiam. Estoque portionis A B C centrum grav. punctum G, & fecetur D F in H, ut sit H D dupla reliquæ H F.

Quoniam igitur F B est dupla E B; D B autem minor quam dupla G B. Erit major ratio F B ad B D, quam E B ad B G. Et per conversionem rationis, minor B F ad F D, quam B E ad E G. Et permutando minor B F ad B E, (quæ proportio dupla est) quam F D ad E G. Igitur F D major est quam dupla E G. Ipsius autem F D duas tertias continet H D. Ergo H D major est quam sesquitertia E G. Sicut autem H D ad E G, ita est portio A B C ad inscriptum sibi triangulum: hoc enim antehac demonstravimus in Theorematis de Hyperboles Ellipsis & Circuli quadratura *. ^{* Vide supra p. 324.} Itaque major est ratio portionis ad inscriptum triangulum A B C quam sesquitertia.

Quod autem ad triangulum A B C portio minorem habeat rationem quam tripla sesquitertia ipsius D F ad diametrum circuli B F unà cum tripla E D, id nunc ostendemus. Secetur diameter portionis in R, ut B R sit sesquialtera reliquæ R D. Ergo cadit R punctum inter G & D * quoniam positum fuit G centrum gravitatis in portione A B C. Quumque portionis ad inscriptum triangulum eadem sit ratio, quæ H D ad E G, ut modo dictum fuit; minor autem sit ratio H D ad E G, quam H D ad E R: Erit propterea minor quoque portionis ad inscriptum triangulum ratio quam H D ad E R, sive quam H D quinquies sumpta ad quintuplam E R. Atqui H D, (cum sit æqualis duabus tertiis D F) quinquies sumpta æquabitur decem tertiis, hoc est, triplæ sesquitertiæ D F. E R verò quæ continet E D & duas quintas ipsius D B, si quinquies sumatur, æquabitur duplæ B D & quintuplæ E D; hoc est, duplæ totius E B atque insuper triplæ E D. Igitur appa-
B b b 2 ret

ret portionem $A B C$ ad inscriptum triangulum minorem habere rationem quam triplam sesquitertiam $D F$ ad duplam $E B$, hoc est, diametrum $B F$, unà cum tripla $E D$. Quod erat demonstrandum.

THEOR. XVI. PROPOS. XIX.

Arcus quilibet semicircumferentiâ minor, major est suâ subtensâ simul & triente differentiæ quâ subtensa sinum excedit. Idem verò minor quam subtensa simul cum ea quæ ad dictum trientem sese habeat, ut quadrupla subtensa juncta sinui ad subtensam duplam cum sinu triplo.

TAB. XL.
Fig. 5.

Esto circulus cujus D centrum, diameter $F B$. Et sit arcus $B A$ semicircumferentiâ minor, cui subtensa ducatur $B A$, sinus autem $A M$: quæ nimirum diametro $F B$ sit ad angulos rectos. Porro ipsi $A M$ sit æqualis recta $G H$, & $G I$ æqualis subtensæ $A B$. Excessus igitur est $H I$; cujus triens $I K$ ipsi $G I$ adjiciatur. Ostendendum est primo, arcum $A B$ totâ $G K$ majorem esse. Hoc autem ex Theoremate 7. est manifestum. At cum ipsi $G I$ additur IO quæ ad $I K$ trientem ipsius $H I$ rationem habeat, quam quadrupla $G I$ una cum $G H$ ad duplam $G I$ cum tripla $G H$. Dico totam $G O$ arcu $A B$ majorem esse. Constituantur enim super lineis $G H$, $H I$, IO , triangula quorum communis vertex sit L , altitudo autem æqualis radio $D B$. Et jungatur $D A$, ducaturque diameter circuli $C E$ quæ rectam $A B$ bifariam dividat in N , arcum vero $A B$ in E . Et jungantur $A E$, $E B$.

Quoniam igitur $O I$ est ad $I K$ ut quadrupla $G I$ unâ cum $G H$ ad duplam $G I$ cum tripla $G H$; sumptis consequentium triplis erit $O I$ ad $I H$ (hæc enim tripla est $I K$), ut quadrupla $G I$ unâ cum $G H$ ad sexcuplam $G I$ cum noncupla $G H$. Et componendo, $O H$ ad $H I$, ut decupla
utrius-

utriusque I G, G H ad sexcuplam I G cum noncupla G H: vel sumptis horum trientibus ut decem tertiæ duarum simul G I, G H ad duplam G I cum tripla G H. Est autem eadem ratio linearum G I ad G H, hoc est, B A ad A M, quæ B D ad D N, propter similes triangulos B A M, B D N. Ergo etiam O H ad H I, ut $\frac{10}{3}$ utriusque simul B D, D N ad duplam B D cum tripla D N; hoc est, ut $\frac{10}{3}$ N C ad diametrum E C cum tripla D N. Hac autem ratione minore est ratio portionis A E B ad A E B triangulum *. * per præced.

Ergo dictæ portionis ad dictum triang. minor quoque ratio quam O H ad H I, hoc est, quam trianguli O H L ad triangulum I H L. Triangulum autem I H L æquale est triangulo A E B. Quod sic ostenditur. Triangulum enim G H L æquale est triangulo D A B, quoniam bases & altitudines reciprocè æquales habent. Similique ratione quoniam G I æqualis est rectæ A B, erit triangulum G I L æquale duobus simul triangulis D A E, D B E, hoc est, quadrilatero D A E B. Itaque triangulum H I L triangulo A E B æquari necesse est, quod dicebamus. Habebit itaque portio A E B ad triangulum sibi inscriptum A E B minorem quoque rationem quam triangulum O H L ad idem triangulum A E B. Quamobrem triangulum O H L portione A E B majus erit. Et totum proinde triangulum O G L majus sectore D A E B. Altitudo autem trianguli G L O æqualis est radio D B. Ergo basis G O major erit arcu A B. Quod erat ostendendum.

Ex his autem manifestum est de tota quoque circumferentia pronunciari posse, quod, *Si circulo inscribantur polygonæ duo æquilatæ, quorum alterum alterius sit duplo laterum numero, & differentiæ perimetrorum triens perimetro polygoni majoris adjungatur, composita ex his circuli circumferentiâ minor erit. Eidem vero majori perimetro si linea addatur quæ ad dictum differentiæ trientem sese habeat, sicut quadrupla perimetri majoris juncta perimetro minori, ad duplam majoris cum tripla minoris, composita circumferentiam circuli excedet.*

PROBLEMA IV. PROPOS. XX.

Circumferentiæ ad diametrum rationem investigare; & ex datis inscriptis in dato circulo invenire longitudinem arcuum quibus illæ subtenduntur.

TAB. XL.
Fig. 6.

Estō circulus centro D , cujus diameter CB , & sit arcus $B A$ sextans circumferentiæ, cui subtenſa ducatur AB , itemque ſinus AM . Poſitâ igitur DB ſemidiametro partium 100000, totidem quoque erit ſubtenſa BA . AM verò partium 86603 non unâ minus, hoc eſt, ſi una pars ſive unitas auferatur ab 86603 fiet minor debito. quippe ſemiſſis lateris trianguli æquilateri circulo inſcripti.

Hinc exceſſus AB ſupra AM fit 13397 vero minor. Cujus triens $4465\frac{2}{3}$ additus ipſi AB 100000, fiunt partes 104465 $\frac{2}{3}$ minores arcu AB . Et hic primus eſt minor terminus, quo poſtea alium vero propiorem inveniemus. Prius autem major quoque terminus ſecundum Theorema præcedens inquirendus eſt.

Tres nimirum ſunt numeri quibus quartum proportionalem invenire oportet. Primus eſt partium duplæ AB & triplæ AM qui erit 459807, vero minor, (nam hoc quoque obſervandum ut minor ſit, idemque in cæteris prout dicetur) ſecundus quadruplæ AB & ſimplæ AM qui 486603 vero maj. Et tertius triens exceſſus AB ſupra AM , 4466 vero major. Itaque quartus proportionalis erit 4727 vero maj. quo addito ad AB 100000 fit 104727, major numero partium,

* per præced. tium, quas continet arcus AB , peripheriæ ſextans. * Jam igitur invenimus longitudinem arcus AB ſecundum minorem majoremque terminum, quorum hic quidem longe propior vero eſt, cum vero proximus ſit 104719.

Sed ex utroque iſtorum alius minor terminus habebitur priore accuratior ſi utamur præcepto ſequenti, quod à diligentiori centrorum gravitatis inſpectione dependet.

In-

Inventorum terminorum differentia sesquitertia jungatur duplæ subtensæ & sinui triplo, & quam rationem habet ex his composita ad triplam sesquitertiam seu $\frac{10}{3}$ utriusque simul, sinus, subtensæque, eandem habeat subtensæ supra sinum excessus ad aliam quandam; Hæc ad sinum addita rectam constituet arcu minorem.

Minor terminus erat 104465 $\frac{2}{3}$. Major 104727. differentia horum est 261 $\frac{1}{3}$. Estque rursus tribus numeris inveniendus quartus proportionalis. Primus est partium duplæ A B & triplæ A M & sesquitertiæ terminorum differentiæ, 460158 vero major. Secundus $\frac{10}{3}$ utriusque simul A B, A M, 622008 vero minor. Tertius denique excessus A B supra A M, 13397 vero min. Quibus quartus proportionalis est 18109 vero min. Hic igitur additus numero partium A M 86602 $\frac{1}{2}$ vero min. fiunt 104711 $\frac{1}{2}$ minores arcu A B. Quare sexcuplum earum, 628269 minus erit circumferentiâ totâ. At quoniam 104727 majores inventæ sunt arcu A B, earum sexcuplum 628362 circumferentiâ majus erit. Itaque circumferentiæ ad diametrum ratio minor est quam 628362, major autem quam 628269 ad 200000. Sive minor quam 314181, major autem quam 314135 ad 100000. Unde constat minorem utique esse quam triplam sesquiseptimam, & majorem quam 3 $\frac{10}{7}$. Quin etiam Longomontani error per hæc refutatur, qui scripsit peripheriam majorem esse partibus 314185 qualium rad. 100000.

Esto nunc arcus A B $\frac{1}{3}$ circumferentiæ, & erit A M, semissis lateris quadrati circulo inscripti, partium 7071068, non unâ minus, qualium radius D B 10000000. A B vero latus octanguli partium 7653668 non unâ majus. Quibus datis ad similitudinem præcedentium invenietur primus minor terminus longitudinis arcus A B 7847868. Deinde major terminus 7854066. Et ex utroque rursus terminus minor accuratior 7853885. Unde constat peripheriæ ad diametrum rationem minorem haberi quam 31416 $\frac{1}{3}$, majorem autem quam 31415 ad 10000.








Et quum terminus major 7854066 à vera, arcus A B longitu-


gitudine minus distet quam partibus 85; (Est enim arcus A B, per ea quæ supra ostendimus, major quam 7853981) partes autem 85 efficiant minus quam duos scrupulos secundos, hoc est, quam $\frac{2}{1296000}$ circumferentiæ, nam tota earundem plures habet quam 60000000: Hinc manifestum est, si trianguli rectanguli angulos quæramus ex datis lateribus, eo modo quo majorem istum terminum paulò antè, nunquam duobus scrupulis secundis aberraturos; etiamsi æqualia inter se fuerint latera circa angulum rectum, veluti hic erant in triangulo D A M.

Si vero ea sit ratio lateris D M ad M A, ut angulus A D M non excedat $\frac{1}{4}$ recti, non unius tertii scrupuli error erit. Posito enim arcu A B $\frac{1}{16}$ circumferentiæ, erit A M semissis lateris octanguli æquilateri circulo inscripti partium 382683433, non unâ minus. A B vero latus sexdecanguli 390180644 non unâ amplius, qualium radius D B 1000000000. Unde primus minor terminus longitudinis arcus A B invenitur partium 392679714. Terminus autem major 392699148. Et ex his minor rursus 392699010. Constat autem ex suprademonstratis arcum A B $\frac{1}{16}$ peripheriæ, majorem esse quam 392699081, quas terminus major superat partibus 67. Hæ autem minus efficiunt uno scrupulo tertio, hoc est, $\frac{1}{7776000}$ totius circumferentiæ, quoniam ea major est utique quam 6000000000.

Porro ex novissimis terminis inventis orietur ratio circumferentiæ ad diametrum minor quam 3141593 $\frac{1}{7}$, major autem quam 3141592 ad 1000000.

Quod si $\frac{1}{20}$ circumferentiæ ponatur arcus A B, seu partium 6 qualium tota 360: Erit A M semissis lateris trigintanguli inscripti partium 10452846326766, non unâ minus, qualium radius 1000000000000000. Et A B latus sexagintanguli inscripti 10467191248588 non unâ amplius. Invenieturque ex his arcus A B secundum primum minorem terminum 10471972889195. Secundum majorem 10471975512584. Et ex his minor alter terminus 10471975511302. Unde efficitur peripheriæ ad diametrum, ratio minor quam
31415926538,






31415926538, major autem quam 31415926533 ad 10000000000.

Quos terminos si ex additis inscriptorum & circumscriptorum polygonorum lateribus inquirendum esset ferè ad laterum quadringenta millia deveniendum. Nam ex sexagintangulo inscripto circumscriptoque hoc tantum probatur, minorem esse rationem peripheriæ ad diametrum quam 3145 ad 1000, majorem autem quam 3140. Adeo ut triplum & amplius verarum notarum numerum nostro ratiocinio productum appareat. Idem vero in ulterioribus polygonis si quis experiatur semper evenire cernet: non ignota nobis ratione, sed quæ longiori explicatione indigeret.

Porro autem quomodo, datis quibuscunque aliis inscriptis, arcuum quibus subtenduntur longitudo per hæc inveniri queat satis puto manifestum. Si enim quadrati inscripti latere majores sunt, longitudo arcus ad semicircumferentiam reliqui inquirenda est, cujus tum quoque subtenfa datur. Sciendum autem & dimidiorum arcuum subtenfas inveniri cum totius arcus subtenfa data est. Atque hæc ratione si bisectionibus uti placebit, poterimus ad omnem subtenfam, arcus ipsius longitudinem quamlibet veræ propinquam non difficulter cognoscere. Utile hoc ad sinuum tabulas examinandas. Imo ad componendas quoque: quia cognitâ arcus alicujus subtenfâ, etiam ejus qui paulò major minorve sit satis accurate definiri potest.





CHRISTIANI HUGENII C. F.

ILLVSTRIVM QVORVNDAM
PROBLEMATVM CONSTRUCTIONES.

P R O B L. I.

*Datam sphæram plano secare, ut portiones
inter se rationem habeant datam.*



Hoc Archimedes problema resolvit lib. 2. de Sphæra & Cylind. Compositionem autem promissam non videtur explicuisse, nisi ipsius est illa quam Eutocius in vetusto quodam libro repertam commentariis suis inseruit. Ea vero paraboles & hyperboles intersectione perficitur, uti & illa cujus Dionysidorus autor est, quæ tamen à priori differt. Præter has tertiam quoque adfert Eutocius è Dioclis de Pyriis libro, quæ hyperboles & ellipsis descriptionem requirit. Nostra autem quam hic conscribemus anguli trisectionem postulat; Et hæc construendi ratio in solidis problematibus quodammodo simplicissima videtur, atque ad usum maxime accommodata.

TAB. XLI.
Fig. 1.

Esto igitur data sphæra cujus centrum M, diameter C A. Et data sit proportio lineæ S ad T majoris ad minorem. Intelligatur secari sphæra plano secundum A C diametrum, sitque maximus in ea circulus C B A D. Et producat utrimque diameter C A, & ponatur semidiametro æqualis utraque harum C H, A E. Et dividatur tota H E in Q, ut sit E Q ad Q H sicut S ad T. Ipsi autem M Q æqualis ponatur ad circumferentiam recta A R. Et ei quæ tertiam partem subtendit arcus A R, æqualis sumatur M N. Et

Et per N punctum ducatur planum $K L$ quod diametro $C A$ sit ad angulos rectos. Dico hoc sphæram sic secare, ut portio cuius A vertex est ad eam cuius vertex C rationem habeat quam S ad T .

Secetur enim sphæra per centrum M plano $B D$ ipsi $K L$ parallelo, & jungantur $K M$, $M L$; & intelligatur conus basin habens circulum factum sectione $K L$, verticem vero M . Et sicut quadratum $C M$ ad quadratum $M N$, ita sit $M N$ ad $N O$ longitudine. Erit igitur per conversionem rationis ut quadratum $C M$ sive quadr. $K M$ ad quadratum $K N$ (est enim quadr. $K N$ excessus quadrati $K M$ supra quadr. $M N$) ita linea $N M$ ad $M O$. Sicut autem quadr. $K M$, hoc est, quadr. $B M$ ad quadr. $K N$, ita est circulus circa diametrum $B D$ ad eum qui circa diametrum $K L$. Ergo quoque ille circulus ad hunc sese habebit ut $N M$ ad $M O$. Ac proinde conus $K M L$ æqualis erit cono cuius basis circulus circa diametrum $B D$, altitudo $M O$ *. Hic
 autem conus ad hemisphæram $B C D$, hoc est, ad conum
 qui basin habeat eundem circulum circa $B D$ diametrum,
 & altitudinem $M H$ *, eam habet rationem quam $M O$ ad
 $M H$. Itaque & conus $K M L$ erit ad hemisphæram $B C D$
 sicut $M O$ ad $M H$. Et invertendo.

Porro autem quoniam hemisphæra $B C D$ est ad sectorem solidum $M K C L$ sicut superficies illius sphærica ad sphæricam huius superficiem *, hoc est, ut $M C$ ad $C N$ †. Erit per conversionem rationis hemisphæra $B C D$ ad partem sui quæ remanet dempto sectore $M K C L$, sicut $C M$ ad $M N$: vel sumptis horum duplis ut $H M$ ad $O Q$. Quod enim $O Q$ dupla sit ipsius $M N$ postea ostendemus. Fuit autem ostensum, quod hemisphæra $B C D$ ad conum $K M L$ sicut $H M$ ad $M O$. Ergo jam hemisphæra $B C D$ ad totam portionem inter plana $B D$, $K L$ contentam erit ut $H M$ ad utramque simul $Q O$, $O M$ *, hoc est, ad $M Q$. Quare & per conversionem rationis, erit hemisphæra $B C D$ ad portionem $K C L$, ut $M H$ ad $H Q$. Et sumptis antecedentium duplis, sphæra tota ad portionem $K C L$ ut $E H$

ad HQ . Et dividendo, portio KAL ad portionem KCL ut EQ ad QH , hoc est ut S ad T . Quod erat faciendum. Quod autem dictum fuit OQ duplam esse ipsius MN , sic fiet manifestum. Quia enim ut quadratum CM ad quadr. MN , ita est MN ad NO longitudine: Est autem QM æqualis subtensæ arcus AR cujus trienti subtenditur MN . Erunt propterea duæ simul QM & NO æquales triplæ MN , uti sequenti lemmate demonstratur. Quamobrem ablata communi ON , erit sola QM æqualis duplæ NM & ipsi MO . Sed eadem QM æqualis est duabus simul his QO , OM , ergo apparet duplam MN æquare ipsi OQ .

L E M M A.

TAB. XLI.
Fig. 2.

SI Circumferentiæ arcus in tria æqualia secetur, tres simul rectæ quæ æqualibus partibus subtenduntur, æquantur subtensæ arcus totius & ei quæ ad subtensam trientis sese habeat, sicut hujus quadratum ad quadratum semidiametri. Arcus sectoris ABC in tria æqualia divisus sit punctis D , E . Et subtendantur partibus rectæ BD , DE , EC ; & toti arcui linea BC . Porro jungantur DA , EA , atque interfecent subtensam BC in punctis G & H . Sitque HF parallela GD .

Quoniam igitur circumferentia BDE dupla est circumferentiæ EC , angulus autem huic insistent EAC ad centrum constitutus, qui vero illi insistit angulus BCE ad circumferentiam. Erit propterea angulus BCE , hoc est, angulus HCE in triangulo HCE æqualis angulo CAE in triangulo CAE . Sed angulus ad E utrique est communis; itaque similes inter se sunt dicti trianguli: Eritque ut AE ad EC ita EC ad EH . Ratio igitur AE ad EH hoc est DE ad EF , duplicata est rationis AE ad EC , ac proinde eadem quæ quadrati AE ad quadr. EC seu quadr. ED . Erit igitur invertendo FE ad ED sicut quadr. ED ad quadr. EA . Quamobrem ostendendum est, tres simul BD , DE , EC æquare subtensæ BC atque

atque ipsi E F. quod sane manifestum est; nam C E est æqualis C H; B D æqualis B G; D E vero utrisque simul G H, & F E. Ergo constat propositum.

Sumpsimus autem arcum B C semicircumferentiâ minorem quoniam in constructione problematis ejusmodi semper invenitur. Nam lemma ad quosvis arcus pertinet, estque in semicircumferentiâ majoribus demonstratio parum diversa.

P R O B L. II.

Cubum invenire dati cubi duplum.

AD hoc imperfectam primò constructionem proponemus ad mechanicen utilem; deinde accuratam subjiciemus, quæ tamen non nisi sæpius tentando perficiatur. Etenim solida problemata omnia vel hoc exigunt vel sectionum conicarum descriptionem.

Sit itaque datus cubus cujus latus A B, oporteatque invenire latus cubi dupli. TAB. XLI.
Fig. 3.

Radio B A semicirculus describatur A F C. Sitque arcus A F semicircumferentiæ triens, C D vero quadrans; & ducantur C F, A D, quarum intersectio ad E punctum. Erit A E latus cubi quæsitum; exiguo tamen excedens, quodque minus sit $\frac{1}{2500}$ sui parte, ut facile numeris explorari potest. Fit enim A E secans anguli p. 37. scr. 30. quæ proinde major est partibus 12600 qualium A F vel A B 10000. Minor autem quam 12605. Itaque cum cubus ex 12600 sit major quam duplus ejus qui ex A B 10000, erit & cubus A E major duplo cubo ex A B. Rursus quia A E major est partibus 12600 erit $\frac{1}{2500}$ A E major part. 6. Tota vero A E minor est quam 12605. Ergo auferendo ab A E partem bis-millesimam sui ipsius reliqua minor erit partibus 12599, tot enim supersunt cum ex 12605 deducuntur 6. Atqui cubus ex 12599 minor est duplo cubo ex 10000. Ergo omnino quoque A E diminuta parte sui bismillesima cubum minorem producet quam sit duplus cubus à latere A B.

Porro ad perfectam constructionem, C F quidem uti pri-

us ducenda est: $A D$ vero sic, ut subtenſa $C D$ æqualis ſit abſciſſæ $E F$. Etenim his poſitis dico cubum $A E$ ejus qui ex $A B$ duplum exiſtere.

Producatur enim $C A$, & ſit ipſi $A E$ æqualis $A G$. Propter triangulos ſimiles igitur eſt $E C$ ad $C D$, hoc eſt, $E F$ ut $E A$ ad $A F$, hoc eſt, ut $G A$ ad $A B$. Et componendo $C F$ ad $F E$ ut $G B$ ad $B A$ ſive $A F$. Et permutando $C F$ ad $G B$ ut $E F$ ad $F A$. Quare ut $C F$ quadratum ad quadr. $G B$, ita quadr. $E F$ ad quadr. $F A$. Et componendo ut quadr. $C F$ & $G B$ ad quadr. $G B$, ita quadr. $E F$ & $F A$ ſimul, hoc eſt, quadr. $E A$ ad quadr. $A F$. Quadr. autem $C F$ & $G B$ ſimul æquantur rectangulo $G C A$ cum quadr. $A G$, quod ſic oſtenditur. Quadratum enim $G B$ æquale eſt rectangulo $C G A$ & quadrato $A B$ ſeu $A F$ *. Quare addito utrimque quadrato $F C$, erunt quadrata $G B$, $F C$ ſimul æqualia rectangulo $C G A$ & quadrato $A C$. Rectangulum autem $C G A$ cum quadrato $A C$ æquatur rectangulo $G C A$ cum quadrato $G A$. Itaque & quadrata $C F$, $G B$ ſimul æqualia ſunt rectangulo $G C A$ cum quadrato $A G$, ſicut diximus. Sicut igitur rectangulum $G C A$ cum quadrato $A G$ ad quadr. $G B$, ita eſt quadr. $E A$ ad quadr. $A F$, hoc eſt, ita quadratum $G A$ ad quadr. $A B$. Et permutando, ut rectangulum $G C A$ cum quadrato $G A$ ad quadratum $G A$ ita quadr. $G B$ ad quadr. $A B$. Dividendo igitur, erit ut rectang. $G C A$ ad quadr. $G A$, ita quadr. $G B$ dempto quadrato $A B$, hoc eſt, rectangulum $C G A$ ad quadr. $A B$. Et permutando rurfus, ut rectang. $G C A$ ad rectang. $C G A$, hoc eſt, ut $C A$ ad $A G$ ita quadratum $G A$ ad quadr. $A B$. Quamobrem quod ſit ex quadrato $G A$ in ipſam $G A$, hoc eſt, cubus $G A$ æquabitur ei quod ſit ex quadrato $A B$ in $A C$, hoc eſt, duplo cubo ex $A B$. Quod erat demonſtrandum.

* 6.2. Elem.

PROBL.

PROBL. III.

Datis duabus rectis duas medias proportionales invenire.

VETERUM Geometrarum ad hoc Problema constructiones complures retulit Eutocius ad lib. 2. Archimedis de Sphæra & Cylindro, at non omnes inventionem diversas, uti recte quoque ipse animadvertit. Heronis enim inventionem secuti videntur Apollonius & Philo Byzantius: quanquam Heronem Apollonio ætate posteriorem nonnulli existiment. Dioclis modum Pappus & Sporus. Nicomedeæ autem constructio præ cæteris subtilis ibidem extat, quam Fr. Viëta paulò aliter concinnatam suo Geometriæ supplemento inferuit. R. Cartesii egregia est & nova per parabolas & circumferentiæ intersectionem, cujus demonstratio legitur in libris Harmonicôn M. Mersenni. Nostræ autem sequentes.

Sit datarum linearum major $A C$, quæ bifariam secetur in E . Minor autem sit $A B$, quæ sic constituatur ut triangulus $E A B$ habeat crura æqualia $A E$, $E B$. Et perficiatur parallelogrammum $C A B D$. Et producantur $A C$, $A B$. Porro applicetur regula ad punctum D , & moveatur quousque positionem habeat $G F$, abscindens nimirum $E F$ æqualem rectæ $E G$; (Hoc autem vel sæpius tentando assequemur, vel descriptâ hyperbole, uti postea ostendetur) Dico inter $A C$, $A B$ medias duas inventas esse $B G$, $C F$. TAB. XLI.
Fig. 4.

Sit enim $E K$ ipsi $A B$ ad angulos rectos. Quia igitur $B E$ æqualis $E A$, dividetur $A B$ in K bifariam: adjecta autem est linea $B G$. Ergo rectangulum $A G B$ cum quadrato ex $K B$, æquabitur quadrato $K G$. Et addito utrimque quadrato $K E$, erit rectangulum $A G B$ unà cum quadratis $B K$, $K E$, hoc est unà cum quadrato $B E$, æquale quadrato $E G$. Similiter quia $A C$ bifariam dividitur in E , & adjecta

jecta est linea CF , erit rectangulum $AF C$ cum quadrato EC æquale quadrato EF . Quadratum autem EF æquale est quadrato EG . Erit igitur rectangulum $AF C$ cum quadrato CE , æquale rectangulo $AG B$ cum quadrato BE . Atqui quadratum CE seu EA æquale est quadrato EB . Ergo & reliquum rectangulum $AF C$ æquale rectangulo $AG B$. Quare sicut FA ad AG ita BG ad CF . Ut autem FA ad AG ita est DB ad BG , & ita quoque FC ad CD . Igitur ut DB , hoc est, AC ad BG ita BG ad FC , & FC ad CD , hoc est, AB . Quod erat dem. Quod autem dictum est, etiam descriptâ hyperbole inveniri quomodo linea FDG ducenda sit, hinc constabit: Factum enim sit, ut EF , EG sint æquales, & sumatur GN æqualis DF . Itaque punctum N est ad hyperbolem quæ describetur per D punctum circa asymptotos FA , AG *. Sed idem punctum N est quoque ad circuli circumferentiam cujus centrum E radius ED : (Hoc enim facile intelligitur quia triangulus $FE G$ est æquicruris, & NG æqualis DF) Itaque datum est punctum N ad intersectionem hyperboles & circumferentiæ dictæ. Sed & D datum est. Datur igitur positione linea FG ducenda per puncta N , D . Et compositio manifesta est.

A L I T E R.

TAB. XLI.
Fig. 5.

Circa diametrum AC majori datarum linearum æqualem circulus describatur & ponatur AB minori datarum æqualis, & perficiatur parallelogrammum AD : productâque AB , ducatur ex centro E recta $E H G$ eâ ratione ut HD , HG sint inter se æquales. Secet autem circumferentiam in L . Dico duabus AC , AB duas medias inventas esse BG , GL .

Producatur enim GE usque ad circumferentiam in K , & jungatur AK , eique parrallela ducatur BO . Similes itaque sunt trianguli $A E K$, $B H O$; & quia AE æqualis $E K$, etiam BH , HO æquales erunt. Sed & HG , HD inter se æquales sunt. Igitur tota OG æqualis BD , hoc est,

est, diametro $A C$ vel $L K$; & ablatâ communi $L O$, relinquentur æquales $L G$, $O K$. Est autem rectangulum $K G L$ æquale rectangulo $A G B$. Ergo ut $K G$ ad $G A$ ita $B G$ ad $G L$. Sed ut $K G$ ad $G A$ ita est $O G$ ad $G B$ & ita reliqua $O K$, hoc est, $L G$ ad $B A$. Ergo ut $O G$, hoc est, $A C$ ad $G B$ ita $B G$ ad $G L$ & $G L$ ad $A B$. Quod erat demonstr. Hujus autem constructionis inventio eandem cum præcedenti originem habet.

A L I T E R.

Sint datæ $A B$ & Q quibus duas medias proportionales invenire opus sit; $A B$ autem quam Q major. TAB. XLI.
Fig. 6.

Dimidiæ Q sumatur æqualis $A F$, & productâ $A B$ utrimque, sit ipsi æqualis $B R$. Erigatur autem ad $A B$ perpendicularis $F C$, & ipsi $R A$ æqualis ponatur $R C$: & jungatur $B C$, & huic parallela ducatur $A E$. Denique applicatâ regulâ ad punctum C , moveatur ea quousque positionem habeat $C D$, faciens $C E$ æqualem $A D$. Dico inter $A B$ & Q duas medias esse $C E$, $E D$.

Jungatur enim $C A$. Igitur quia æquales sunt $R A$, $R C$ & angulus $C F A$ rectus, erit $R A$ ad $A C$ ut $A C$ ad duplam $A F$, hoc est, Q : ac proinde quadratum $A C$ æquale rectangulo sub $R A$ & Q . Quadratum autem $A C$ cum quadrato $A D$ & duplo rectangulo $D A F$, hoc est, sub $D A$ & Q contento, æquatur quadrato $D C$ *. Igitur quadratum $D C$ æquabitur quadrato $D A$ unâ cum rectangulis sub $D A$, Q , & sub $R A$, Q , hoc est, unâ cum rectangulo sub $D R$ & Q . Quadratum autem $D B$ æquale rectangulo $R D A$ & quadrato $A B$ *. Igitur ut quadratum $D B$ ad quadratum $D C$, hoc est, ut quadr. $A B$ ad quadr. $A D$, (est enim ut $D B$ ad $D C$ sic $A B$ ad $E C$ sive $A D$) ita erit rectangulum $R D A$ cum quadrato $A B$ ad rectangulum sub $R D$, Q , cum quadrato $A D$. Quamobrem & rectangulum $R D A$ ad rectangulum sub $R D$, Q , sicut quadr. $A B$ ad quadr. $A D$ *. Est autem ut quadratum $A B$ ad quadr. $A D$, ita $A B$ ad $E D$ longitudine: nam ut $B A$ ad $A D$ * 12. 2. Elem.
* 6. 2. Elem.
* 19. 5. Elem.

sic CE , hoc est, ipsa AD ad ED . Ergo rectangulum RDA ad rectangulum sub RD , Q , hoc est, AD ad Q sicut AB ad ED . Et permutando & invertendo, BA ad AD ut ED ad Q . Atqui ut BA ad AD , hoc est, CE ita CE ad ED . Ergo ut AB ad CE ita CE ad ED , & ED ad Q . Itaque inter AB & Q mediæ proportionales sunt CE , ED . Quod erat ostendendum.

P R O B L. IV.

Quadrato dato & uno latere producto, aptare sub angulo exteriori rectam magnitudine datam quæ ad angulum oppositum pertineat.

TAB. XLI.
Fig. 7.

Est quadratum BA cujus productum sit latus FA . Data verò linea K . Et oporteat ducere rectam BDC , ita ut pars intercepta DC sit datæ K æqualis.

Quadratis ex K & EB sit æquale quadratum EG ; & super BG diametro describatur semicirculus BCG secans rectam FA productam in C , & ducatur BDC . Dico DC æqualem esse ipsi K . Jungantur enim CG , GD ; sitque CH ipsi BG ad angulos rectos.

*47.1. Elem.

* Ex construct.

Quia igitur similes sunt trianguli BED , CHG , & latera BE , CH circa angulos rectos inter se æqualia, erit & latus DB æquale lateri GC , & DE ipsi GH . Sunt autem quadrata DC , CG , hoc est, quadrata DC , CH , & HG æqualia quadrato DG *, hoc est, quadratis GE , ED . Ergo dempto hinc quadrato ED , inde vero quadrato HG ; erunt duo quadrata DC & CH æqualia quadrato EG , hoc est, quadratis ex K & EB *. Quadratum autem EB æquale est quadrato CH . Ergo & reliquum quadratum DC æquabitur K quadrato; & recta DC ipsi K . Quod erat ostendendum.

Demonstratio hæc ab ea diversa est quæ apud Pappum Alex. legitur lib 7. prop. 72. Constructio verò non differt. Cæterum eandem ad casum quoque sequentem pertinere invenimus.

P R O B L.

P R O B L. V.

Dato quadrato, & duobus contiguis lateribus productis, aptare sub angulo interiori rectam magnitudine datam quæ per angulum oppositum transeat. Oportet autem non minorem esse datam quam sit quadrati diameter dupla.

Datum sit quadratum AB , productaque latera AF , AE . TAB. XLI.
Fig. 8.
Data verò linea K , non minor duplâ AB diametro. Et oporteat per angulum B ponere rectam DC ipsi K æqualem.

Si K æqualis fuerit duplæ AB , constructio manifesta est; tunc enim per B ducenda est quæ sit ipsi AB ad angulos rectos, eaque propositum efficiet. Cum verò major erit K quam dupla AB , constructio iisdem verbis præcipitur atque in Problemate præcedenti: & demonstratio quoque est eadem.

Quod autem circumferentia BCG secabit productam AF hinc manifestum est. Etenim quia K major est duplâ diametro AB , erit K quadratum majus octo quadratis EB . Itaque quadratum EG majus quam quadrata novem ex EB ; ac proinde EG major quam tripla EB . Dimidia igitur BG , hoc est, radius descripti semicirculi major quam EB vel BF ; unde necesse est rectam AC secari à circumferentia BCG .

P R O B L. VI.

Rhombo dato, & uno latere producto, aptare sub angulo exteriori lineam magnitudine datam quæ ad oppositum angulum pertineat.

Sit datus rhombus AB , cujus productum latus FA . Data TAB. XLII,
Fig. 1.
autem linea K . Et oporteat ducere rectam $BD C$, ita ut pars intercepta DC sit ipsi K æqualis.

Ducatur diameter AB , & latus BE producat; & quadratis ex K & AB sit æquale quadratum AG . Et super BG

D d d 2

cir-

circumferentiæ portio describatur quæ capiat angulum ipsi BFA æqualem. Secabit ea productum latus FA , ut modo ostendetur. Itaque ad intersectionis punctum C ducatur BC . Dico hujus partem interceptam DC lineæ datæ K æqualem esse. Quod autem circumferentia descripta latus FA productum secabit, sic primum ostenditur. Ducatur AN ita ut sit angulus BAN angulo BFA vel BEA æqualis. Itaque triangulus BAN triangulo BEA similis est, ac proinde isosceles quoque. Quare si super BN circumferentia describatur quæ capiat angulum BFA , ea continget latus FA in A puncto. Sed BG major est quam BN : nam quadratum AG majus est quadrato AN vel AB , cum sit æquale quadratis ex K & AB . Quare AG cadet extra triangulum isoscelem BAN . Itaque manifestum est circumferentiam super BG descriptam capientemque angulum ipsi BFA vel BAN æqualem secare lineam FAC . Esto alterum intersectionis punctum M & jungantur BM , GC , & cadat in BE ex A perpendicularis AL .

Quia igitur quadratum AG æquale est quadratis ex K & AB : atque idem quadratum AG æquale quadratis AB & BG minus duplo rectangulo GBL , hoc est, minus rectangulo GBN ; erit K quadratum æquale quadrato BG minus rectangulo GBN , hoc est, rectangulo BGN . Est autem ut rectangulum BGN ad rectang. BE , GN , ita BG ad BE . Ergo ut BG ad BE ita quoque quadratum K ad rectangulum GN , BE , hoc est, rectangulum GBE minus rectangulo NBE . Est autem rectangulo GBE æquale rectang. CBD , quoniam GB ad BC ut DB ad BE propter triangulos similes GBC , DBE ; habent enim angulum ad B communem, & angulus BCG ipsi BED est æqualis. Item rectangulo NBE æquale est quadratum AB quia propter triangulos similes est NB ad BA ut AB ad BE . Ergo erit GB ad BE ut quadratum K ad rectangulum CBD minus quadrato AB . Est autem rectangulo CBD minus quadr. AB æquale rectangulum DA , AC , quod sic ostenditur. Etenim quia quadrilaterum $CGBM$ est




Fig. 1.




Fig. 2.




Fig. 3.




Fig. 4.




Fig. 8.




Fig. 6.




Fig. 7.





Fig. 5.





est in circulo, sunt anguli CGB & BMC simul duobus rectis æquales. Sed & anguli EDB , ADB . Quorum EDB æqualis angulo CGB propter similitudinem triangulorum GBC , DBE . Ergo & angulus BMC æqualis erit angulo ADB . Trianguli igitur ABM , ABD angulos M & D inter se æquales habent. Verum & angulos ad A , & latus AB commune. Itaque dicti trianguli similes sunt & æquales. Quare AM æqualis AD , & MB æqualis BD , & angulus MBA æqualis ABD . In triangulo igitur MBC angulus B in duo æqualia dividitur à recta BA , ideoque rectang. MBC minus quadrato BA æquatur rectangulo MAC . Sed rectangulo CBM æquale est rectangulum CBD ; & rectangulo MAC æquale rectang. DAC . Igitur rectang. CBD minus quadrato BA æquale rectangulo CAD , uti dictum fuit. Est itaque GB ad BE ut quadr. K ad rectangulum DAC . Sicut autem GB ad BE ita est rectang. GBE , hoc est, rectang. CBD ad quadratum BE . Ergo ut quadratum K ad rectang. DAC ita rectang. CBD ad quadratum BE . Ratio autem rectanguli CBD ad quadr. BE composita est ex ratione DB ad BE , hoc est, DC ad CA , & ex ratione CB ad BE sive BF , hoc est, CD ad DA . Ergo & quadr. K ad rectang. DAC eam habet rationem quæ componitur ex ratione DC ad CA & DC ad DA , hoc est, eam quam quadratum DC ad rectang. DAC . Quamobrem quadr. K . quadrato DC æquale est: Et DC ipsi K longitudine. Quod erat demonstrandum.

PROBL. VII.

Rhombo dato & duobus contiguis lateribus productis, aptare sub angulo interiori rectam magnitudine datam quæ per oppositum angulum transeat. Oportet autem datam non minorem esse quam duplam diametri quæ reliquos duos rhombi angulos conjungit.

TAB. XLII.
Fig. 2.

Sit datus rhombus AB cujus producantur latera AF , AE , data autem sit recta K cui æqualem ponere oporteat CD , per angulum B transeuntem. Ducatur diameter AB , eique ad angulos rectos linea SBR , quæ quidem æqualis erit duplæ diametro FE . Igitur K non minor debet esse quam SR . Si vero æqualis, factum est quod proponebatur. Sed ponatur K major data esse quam SR . Erit jam in schemate hoc prout propositum est constructio eadem, quæ in Problemate præcedenti. Demonstratio autem nonnihil diversa. Etenim hoc primò aliter ostenditur quod circumferentia super BG descripta secatur productam AF . Sit AL ad EB perpendicularis & ducatur ST ut sit angulus BST æqualis angulo EAF vel BFS . Est itaque triangulus BST triangulo BFS similis; (nam & angulos ad B æquales habent:) ac proinde æquicruris etiam triangulus BST . Apparet igitur lineam AS æquari ipsi LB cum dimidia BT . Quare dupla AS æquabitur duplæ LB & toti BT . Sed dupla AS est quadrupla AF vel EB . Ergo quadrupla EB æqualis duplæ LB & BT . Sumptæque communî altitudine BT , erit rectangulum sub quadrupla EB & BT contentum, æquale duplo rectangulo LB T & quadrato BT . Et addito utrimque quadrato BL , erit rectangulum EBT quater cum quadrato LB æquale rectangulo LB T bis cum quadratis BT , BL , hoc est quadrato LT . Quia vero propter triangulos similes est TB ad BS ut BS ad BF five BE , æquale erit rectang. EBT quadrato BS ; & quater sumptum quadrato RS . Itaque quadr. SR cum quadrato LB æquale quadrato LT . Quadratum vero K (quod majus est quam RS quadr.) unà cum eodem quadrato LB æquale est quadrato LG , uti ex constructione manifestum est, quia scilicet quadr. AG æquale positum fuit quadratis ex K & AB . Itaque majus est quadr. LG quam LT , & LG major quam LT , & BG quam BT . Quamobrem circumferentia super BG descripta capax anguli EAF secabit rectam AS ; nam similis circumferentia, si super BT describatur, ea continget ipsam in S puncto, quoniam angulus

gulus B S T ipsi E A F æqualis est triangulusque B S T æquicruris.

Porro quod C D ipsi K æqualis est, sic demonstrabitur. Quia quadratum A G æquale est quadratis ex K & A B: idemque quadratum A G æquale quadratis A B, B G cum duplo rectangulo G B L. Erit propterea quadratum K æquale quadrato B G cum duplo rectangulo G B L. Sicut autem B G ad B E ita est quadratum B G cum duplo rectangulo G B L ad rectangulum G B E cum duplo rectangulo E B L; singula enim ad singula eam habent rationem. Ergo & quadratum K ad rectangulum G B E cum duplo rectangulo E B L ut B G ad B E. Est autem rectangulo G B E æquale rectangulum C B D, quoniam C B ad B G ut E B ad B D, propter triangulos similes C B G, E B D; habent enim angulos ad B æquales & angulum B C G angulo B E D. Item duplo rectangulo E B L æquale est quadratum A B, quia propter triangulos similes ut S A, hoc est, dupla B E ad A B ita A B ad B L. Igitur ut B G ad B E ita erit quadratum K ad rectangulum C B D cum quadrato A B. Sed hisce duobus æquale est rectangulum C A D; quoniam in triangulo C A D angulus A bifariam dividitur à linea A B. Ergo ut B G ad B E ita est quadr. K ad rectangulum C A D. Atque hinc porro eodem modo ut in casu præcedenti concludemus lineam D C ipsi K æqualem esse, repetendo ista: Sicut autem G B ad B E, &c.

Utrumque præcedentium Aliter.

SIt datus rhombus A D B C cujus productum latus TAB. XLII. D B. Et data sit linea G. Oportet ducere rectam A N F, Fig. 3. ut pars intercepta N F sit datæ G æqualis.

Ducatur diameter A B, & quadratis ex G & A B sit æquale quadratum A H, & ducatur H E ipsi B A parallela. Et A E ipsi G ponatur æqualis, eademque producat ad F. Dico N F ipsi G æqualem esse.

Quod autem ad H E poni potest A E ipsi G æqualis, hinc

hinc manifestum est. Etenim quadratum AH majus est quadratis AX & XH , quum sit angulus AXH obtusus. Sed idem quadratum AH æquale ponitur quadratis AB seu HX & G . Itaque quadratum G seu AE majus est quadrato AX . Unde apparet intersectionem E accidere inter puncta H & X .

Producatur BD & ponatur ipsi æqualis DR . & sit RK parallela DA vel BC , eique occurrant productæ FA , BA , HE , in punctis M , Q , K : & jungatur RA , & producatur ad P .

Quoniam igitur DR æqualis est DB , & RQK parallela DA , erit & MA æqualis AN , & QA æqualis AB ; angulus autem BAR rectus, quum sit in semicirculo, nam tres hæ æquales sunt DB , DA , DR . Parallelae autem sunt BQ , HEK , ergo & anguli ad P recti, & erit HP æqualis PK . Est itaque quadratum AH æquale quadrato AE unà cum rectangulo HEK *. Sed idem quadratum AH æquale est etiam quadratis ex G seu AE , & ex AB . Itaque quadr. AB æquale erit rectangulo KEH . Ac propterea KE ad AB ut AB ad EH . Verum ut KE ad AB seu QA ita est EM ad MA : & ut AB ad EH ita AF ad FE . Igitur EM ad MA ut AF ad FE : Et proinde EA ad AM ut EA ad EF . Æqualis est igitur EF ipsi AM ; quare & ipsi AN . Ideoque & FN ipsi AE , hoc est, datæ G . Quod erat demonstrandum.

TAB. XLII.
Fig. 4.

Sit denuo datus rhombus $ADB C$, cujus producta latera BD , BC ; & data sit linea G . Oportet ducere rectam NF transeuntem per angulum A , quæque æqualis sit ipsi G .

Ducatur diameter BA , eique ad angulos rectos RAL . Si igitur G minor detur quam RL , problema construi nequit, uti supra quoque dictum fuit. Si vero æqualis, jam factum est quod quærebatur. Sit igitur G major quam RL . Erit in schemate adjecto, sicut propositum est, constructio & demonstratio eadem quæ in casu præcedenti.

Illud

ILLUST. QUORUND. PROB. CONSTRUCT. 403

Illud autem hic aliter est ostendendum, quod ad lineam $H E$ poni potest $A E$ ipsi G æqualis. Sit $R S$ æqualis $R B$, & jungatur $A S$. Quoniam igitur in triangulo $B A S$ à vertice ad mediam basin ducta est $A R$, erunt quadrata $B R$ & $R A$ simul sumpta, hoc est, quadratum $B A$ cum duplo quadrato $A R$, subdupla quadratorum $B A$, $A S$ *. Itaque ^{* per 122. lib. 7. Pappi.} quadratum $A B$ duplum cum quadruplo quadrato $A R$, hoc est, cum quadrato $R L$, æquabitur quadratis $B A$, $A S$. Quare ablato utrimque quadrato $B A$, erit quadratum $A S$ æquale quadratis $B A$ & $R L$, ac proinde minus quam quadr. $A H$; nam hoc æquale est quadratis $A B$ & G . Est igitur $A S$ minor quam $A H$. Sed major est quam $A R$. Ergo punctum S cadit inter R & H ; angulus enim $A R H$ obtusus est. Major itaque est $R H$ quam $R S$ vel $R B$. Et quum propter triangulos similes sit $R H$ ad $H P$ ut $R B$ ad $B A$, erit quoque $H P$ major quam $B A$; & quadratum $H P$ majus quadrato $A B$. At quadratum $H P$ cum quadrato $P A$ æquatur quadrato $A H$, hoc est, quadratis $B A$ & G . Ergo cum quadratum $H P$ sit majus quadrato $A B$, erit invicem quadr. $P A$ minus quam quadr. G . Patet igitur quod si centro A circumferentia describatur radio $A E$ ipsi G æquali, ea lineam $H E$ secabit.

P R O B L. VIII.

In Conchoide linea invenire confinia flexus contrarii.

Conchoidem intelligimus quam Nicomedes excogitavit; ^{TAB. XLII. Fig. 5.} quâ & angulum divisit trifariam, & duas medias invenit proportionales: Estoque ea $C Q D$, polus G , regula autem $A B$ cujus ope descripta est; quam secet $G Q$ ad angulos rectos. Hæc igitur lineæ proprietas est, ut ductâ ad ipsam rectâ qualibet ex G puncto, pars hujus inter conchoidem & rectam $A B$ intercepta sit ipsi $A Q$ æqualis.

Quum autem appareat partem quandam Conchoidis ut in schemate subjecto $C Q D$ versus polum G cavam esse, lineam

Tom. II.

E e e

verò

verò reliquam in infinitum licet utrimque productam in diversum curvari; quæsitum est qua ratione puncta ea determinari possent ubi contraria flexio initium capit. Et nos quidem ad hoc sequentem invenimus constructionem.

Sit duabus AG , AQ tertia proportionalis AE , sumenda versus G . Et ponatur GF æqualis GE . Porro sit GR ipsi GQ ad angulos rectos, & æqualis duplæ GA . Et describatur parabole RO , cujus vertex sit R axis RG , latus rectum ipsi AG æquale. Centro autem F radio FR circumferentia describatur, quæ parabolam secet in O ; & ducatur OC parallela AB occurratque conchoidi in punctis C , D . Hæc erunt puncta quæsitæ in confinio flexionis contrariæ.

TAB. XLII.
Fig. 6.

Ista autem Universalis est constructio. At quando quadratum ex AQ non majus est quam duplum quadrati AG , arcus trisectione propositum quoque efficiemus. Et diversè quidem prout AQ major vel minor erit quam AG . Etenim si minor, describenda est circumferentia centro A radio AG , in eaque ponenda GK æqualis duplæ GE , inventæ ut priùs. Et rectæ GH quæ subtendit trientem circumferentiæ KHG æqualis sumenda GM , & per M ducenda ut ante D ipsi








TAB. XLII.
Fig. 7.


AB parallela. Cum verò AQ major est quam AG , cæteris ad eundem modum compositis, hæc tantum differentia erit quod arcum KP , qui unà cum arcu GK semicircumferentiam explet, in tria æqualia dividere oportet, & partium unam constituere PH , & subtensæ GH æqualem sumere GM .

Porro planum est Problema cum AG æqualis AQ . Tunc enim GM fit æqualis lateri trigoni ordinati in circulo inscripti. Item cum quadratum AQ duplum est quadrati AG : fit enim GM dupla ipsius GA .

Sed & aliis casibus innumeris planum erit, quorum ii quidem facile discerni poterunt, qui ad anguli trisectionem reducuntur.

F I N I S.





DE
C I R C U L I
ET H Y P E R B O L Æ
QUADRATURA
CONTROVERSIA.



VERA
CIRCULI^{ET} HYPERBOLÆ
QUADRATURA
AUTHORE
JACOBO GREGORIO.

LECTORI GEOMETRÆ
SALUTEM.



Meum aliquando cogitabam, amice Lector, num Analytica cum suis quinque operationibus esset sufficiens, & generalis methodus investigandi omnes quantitatum proportionem, ut in initio suæ Geometriæ affirmare videtur Cartesius; si enim ita esset, possibile foret ejus ope toties decantatam circuli quadraturam exhibere: cumque hæc mente revolverem, facile percepi ex hætenus repertis circuli proprietatibus nullam posse analysin institui tali structuræ inservientem: deinde mihi alias quærenti incidit in mentem hujus secunda, prima enim in circulo vulgo est cognita: ex hisce percepi seriem polygonorum convergentem, cujus terminatio est circuli sector; ubi statim vidi

P R Æ F A T I O

aliquod analysios vestigium. deinde serierum convergentium naturis non solum in facilioribus quibusdam casibus, sed etiam in genere consideratis, & prædictis circuli proprietatibus ad ellipsim & hyperbolam nullo negotio reductis, infallibilis mihi videbatur omnium sectionum conicarum quadratura: dum autem me illuc converti ut polygonorum seriem convergentem terminarem, insuperabilem difficultatem in ejus terminatione invenienda post omnes artis & aleæ conatus deprehendi: Sed animo revolvens analysios officium esse sicut algebræ communis, non solum problemata resolvere, sed etiam eorum impossibilitatem (si opus sit) demonstrare; cumque in primo difficultatem indicibilem expertus essem, ad secundum me converti, quod certe supra votum successit; non enim solius circuli (quam mihi ab initio proposueram) sed omnium sectionum conicarum veram & legitimam in sua proportionum specie quadraturam, & integram proportionis speciem ante incognitam orbi Geometrico patefacio, quam etiam proportionem saltem in relatione ad dimensionem sectionum conicarum ad commensurabilem veræ quam proximam reduco, praxi facili, demonstrabili, & extractione radicis surde solidæ (ni fallor) multo brevior; in omni enim proportionem incommensurabili ad tales approximationes recurrunt Mathematici: ut autem melius concipiamus hujus proportionis naturam, loquamur de proportionem quatenus ortum habet à quinque

ope-

AD LECTOREM.

operationibus analyticis, seu arithmeticae vulgaris, proportio enim nobis notior est in numeris seu in quantitate discreta, quam in continua, neque vereor post Cartesium has operationes in geometriam adducere. Primo itaque sciendum est nos semper nobis proponere quantitates commensurabiles, seu quæ inter se sunt ut numerus ad numerum; proportionem enim incommensurabilem nisi relativè ad commensurabilem nullo modo percipimus, habet enim in se nescio quid infiniti, mentem nostram obtundens & simplicem perceptionem impediens: deinde ex illis quinque operationibus arithmeticiis, duæ sunt tantum simplices, additio & subtractio; multiplicatio enim est composita ex additione, & divisio ex subtractione; & extractio radicum, quæ in genere nihil aliud est quam inventio proportionis commensurabilis, quæ quam proximè accedit ad proportionem analyticam incommensurabilem, componitur ex præcedentibus quatuor; & nostra sexta operatio quæ in genere nihil aliud est quam inventio proportionis commensurabilis, quam proximè accedentis ad nostram proportionem non analyticam, componitur ex prioribus quinque. Advertendum quoque est sicut numeri fracti nunquam procedunt ex integrorum additione, subtractione, multiplicatione, sed tantum ex divisione; & numeri incommensurabiles nunquam procedunt ex commensurabilium additione, subtractione, multiplicatione, divisione, sed tantum ex radicum extractione; ita

P R Æ F A T I O

ita numeros , vel quantitates non analyticas nunquam provenire ex analyticarum additione , subtractione , multiplicatione , divisione , radicum extractione , sed ex sexta hac operatione ; ita ut hæc nostra inventio addat arithmeticæ aliam operationem , & geometriæ aliam rationis speciem , idem enim est (sicut in hoc tractatulo demonstro) rationem circuli ad diametri quadratum in analytica seu illa rationis specie hætenus cognita exhibere , ac rationem inter quadrati latus & ejusdem diametrum in commensurabilibus : verum certè est me hanc demonstrationem integram ad phrasem geometricam non reduxisse , nam ut hoc perficiatur , opus est non parvo volumine de quantitatum analyticarum mutuo inter se relatione & incommensurabilitate in genere , quod miror nullum unquam scripsisse , cum in his tam latè pateant inventionum campi ; nam ex his petenda est demonstratio , quod mesolabium non possit perfici ope regulæ & circini , item quod non semper & quando æquationes affectæ possunt reduci ad puras , item quod necessaria sit ad minimum talis generis curva ad mechanicam talium æquationum resolutionem , cum talibus innumeris , quæ à præstantioribus geometris impossibilia esse deprehenduntur ex analysi , & à rudioribus quotidie & frustra quærantur. Scripsit Euclides decimum suum librum solummodo (nisi in paucis quibusdam propositionibus generalibus) de incommensurabilitate facta ab extractione radice quadratæ ;

A D L E C T O R E M.

ta ; neque quantum scio ab ullo alio tractata est hæc materia, etiamsi geometriæ speculativæ non solum utilissima sit, sed etiam maxime admirabilis; in ipso enim limine admiranda occurrunt theoremata; e. g. Si fuerit progressio geometrica cujus unus terminus fuerit propositæ quantitati commensurabilis longitudine vel potestate quacunque, & alius quilibet, binomium, trinomium, &c. quodcunque, impossibile est duos totius progressionis terminos in infinitum continuatæ esse inter se commensurabiles longitudine vel potestate quacunque: alia multa possem afferre, sed pro commodiore fortassis tempore hæc reservo, satis existimans pro præsentī hæc analyticè demonstrasse; etsi enim analysis assensum adeo violenter non cogat ac geometria, nunquam tamen respuit nec respuere potest geometria, quod probavit semel analysis geometrica. Ex hac inventionē deduco quoque novam sectionem angularium & logarithmorum doctrinam, facilem quidem, in praxi expeditissimam & geometrica demonstratione munitam; hætenus enim logarithmorum constructio prolixissima, conjectura potius quam scientia videbatur, & divisio anguli in partes æquales ultra quinque numero primo numeratas in praxim vix admitti poterat. hæc omnia summa (qua possum) brevitate & perspicuitate demonstrō; neque scrupulosus sum in citationibus, utpote peregrinus, & libris ad tale opus destitutus, te enim suppono in geometricis non mediocriter versatum, alioquin nul-

PRÆFATIO AD LECTOREM.

lum hinc fructum colliges.

DEFINITIONES.

- 1 **S**i in circulo, ellipse vel hyperbola ducantur è centro in ejus perimetrum duæ rectæ, appellamus planum ab illis rectis & perimetri segmento comprehensum, sectorem.
- 2 Si perimetri segmentum inter illas rectas comprehensum à rectis quotcumque subtendatur, ita ut triangula rectilinea (quorum communis vertex est sectionis centrum & bases rectæ subtendentes) sint æqualia; vocamus rectilineum illud ab istis triangulis conflatum, polygonum regulare inscriptum, si sectio conica fuerit circulus vel ellipsis; quod si fuerit hyperbola, vocamus illud rectilineum polygonum regulare circumscriptum.
- 3 Si perimetri segmentum inter illas rectas comprehensum à rectis quotcumque tangatur & à tactibus ad sectionis centrum ducantur rectæ; si inquam omnia trapezia, a tangentibus proximis & rectis ad centrum comprehensa, fuerint æqualia; appello rectilineum ab illis conflatum, polygonum regulare circumscriptum, si sectio conica sit ellipsis vel circulus, & polygonum regulare inscriptum si fuerit hyperbola.
- 4 Si omnes anguli (excepto illo ad sectionis centrum) polygoni regularis à subtendentibus comprehensi insistant
omni-

omnibus contactum punctis polygoni regularis à tangentibus comprehensi, appello hæc polygona complicata.

- 5 Quantitatem dicimus à quantitatibus esse compositam, cum à quantitatibus additione, subtractione, multiplicatione, divisione, radicum extractione, vel quacunque alia imaginabili operatione, fit alia quantitas.
- 6 Quando quantitas componitur ex quantitatibus additione, subtractione, multiplicatione, divisione, radicum extractione; dicimus illam componi analyticè.
- 7 Quando quantitates à quantitatibus inter se commensurabilibus analyticè componi possunt, dicimus illas esse inter se analyticas.
- 8 Si à quantitatibus quocunque A, B, C, D, E, componatur quantitas X, & à quantitatibus F, G, C, D, E, componatur quantitas Z, eadem omnino methodo & iisdem omnino operationibus quibus antè componebatur X, positis quantitatibus F, G, loco quantitatibus A, B, si inquam hoc fiat. dicimus quantitatem X eodem modo componi à quantitatibus A, B, quo Z componitur à quantitatibus F, G.
- 9 Sint duæ quantitates A, B, à quibus componantur duæ aliæ quantitates C, D, quarum differentia sit minor differentia quantitatibus A, B, & eodem modo quo C, componitur à quantitatibus A, B, componatur E à quantitatibus C, D; & eodem modo quo D componitur à quantitatibus A, B, componatur F, à quantitatibus C, D; &

A	B
C	D
E	F
G	H

eodem modo quo E componitur à quantitativibus C, D, vel C à quantitativibus A, B, componatur G à quantitativibus E, F; & eodem modo quo F componitur à quantitativibus C, D, vel D à quantitativibus A, B, componatur H à quantitativibus E, F; atque ita continuetur series: appello hanc seriem, seriem convergentem.

10 Ejus termini juxta se positi nempe A, B, vel C, D, vel E, F, vel G, H, dicuntur termini convergentes.

PETITIONES.

- 1 Petimus quantitates, à quantitativibus datis inter se analyticis analyticè compositas, esse inter se & cum quantitativibus datis analyticas.
- 2 Item quantitates, quæ à quantitativibus datis inter se analyticis non possunt analyticè componi, non esse cum quantitativibus datis analyticas.

Præcedentes petitiones quibusdam fortassis obscuræ videbuntur, sed tamen ex analyseos elementis sunt satis manifestæ.

V E R A

CIRCULI ET HYPERBOLÆ

Q U A D R A T U R A.

Sit circuli, ellipseos vel hyperbolæ segmentum BIP TAB. XLIII. Fig. 1. 2. 3. cujus centrum A : compleatur triangulum ABP , & segmentum in punctis, B, P , tangentes ducantur rectæ BF, PF , se invicem secantes in puncto F ; producat (si opus sit) recta AF segmentum interfecans in puncto I & rectam BP in puncto Q ; deinde jungantur rectæ BI, PI .

PROP. I. THEOREMA.

Dico trapezium $BAP I$ esse medium proportionale inter trapezium $BAP F$, & triangulum BAP .

Quoniam recta AQ ducitur per F concursum duarum rectarum FB, FP , segmentum in punctis B, P , tangentium; igitur recta AQ rectam BP contactuum puncta jungentem bifariam secabit in puncto Q ; & proinde triangulum ABQ est æquale triangulo AQP , & triangulum FBQ triangulo FQP ; & igitur triangulum ABF æquale est triangulo APF ; est ergo triangulum ABF dimidium trapezii $ABFP$: eodem modo probatur triangulum ABI esse dimidium trapezii $ABIP$; & triangulum ABQ est dimidium trianguli ABP : cumque triangula ABF, ABI, ABQ , eandem habeant altitudinem, inter se sunt ut bases, sed eorum bases nempe AF, AI, AQ , sunt continuè proportionales; & igitur ipsa quoque triangula sunt continuè proportionalia; & proinde eorum dupla nimirum trapezia $ABFP, ABIP$, & triangulum ABP sunt continuè proportionalia in ratione AF ad AI , quod demonstrare oportuit.

Fff 3

Du-

Ducatur recta DL segmentum tangens in puncto I , & rectis BF , FP , occurrens in punctis D , L , ita ut compleatur polygonum $ABDL P$.

PROP. II. THEOREMA.

TAB. XLIII.
Fig. 1. 2. 3.

Dico trapezia $ABFP$, $ABIP$ simul, esse ad duplum trapezii $ABIP$, sicut trapezium $ABFP$ ad polygonum $ABDL P$.

Quoniam recta AF , ducta per contactum rectæ DL cum segmento, ducitur etiam per concursum duarum rectarum FB , FP , rectam DL terminantium & segmentum in duobus punctis tangentium; igitur recta DL bifariam secatur in puncto I ; & proinde triangulum FDI æquale est triangulo FIL , at triangulum ABF æquale est triangulo APF ; & igitur trapezium $ABDI$ æquale est trapezio $APLI$; trapezium ergo $APLI$ dimidium est polygoni $ABDL P$. ducatur recta AL : manifestum est ex præcedentis demonstratione triangulum AIL esse æquale triangulo ALP ; sed ut triangulum ALF ad triangulum ALI ita FA ad AI , & ut FA ad AI ita trapezium $ABFP$ ad trapezium $ABIP$; & igitur ut trapezium $ABFP$ ad trapezium $ABIP$; ita triangulum ALF ad triangulum ALI ; & componendo, ut trapezia $ABFP$, $ABIP$ simul, ad trapezium $ABIP$, ita triangulum ALF & triangulum AIL simul, hoc est triangulum AFP , ad triangulum AIL : & consequentes duplicando, ut trapezia $ABFP$, $ABIP$ simul, ad duplum trapezii $ABIP$, ita triangulum AFP , ad trapezium $AILP$: at triangulum AFP est dimidium trapezii $ABFP$, & trapezium $AILP$ est dimidium polygoni $ABDL P$; & igitur ut trapezia $ABFP$, $ABIP$ simul, ad duplum trapezii $ABIP$, ita trapezium $ABFP$ ad polygonum $ABDL P$, quod demonstrare oportuit.

PROP.

PROP. III. THEOREMA.

Dico triangulum BAP , & *trapezium* $ABIP$ *simul*, TAB. XLIII.
Fig. 1. 2. 3.
esse ad trapezium $ABIP$, *ut duplum trapezii*
 $ABIP$ *ad polygonum* $ABDLP$.

In antecedente demonstratum est trapezia $ABFP$, $ABIP$ simul, esse ad duplum trapezii $ABIP$, sicut trapezium $ABFP$ ad polygonum $ABDLP$: & permutando trapezia $ABFP$, $ABIP$ simul, sunt ad trapezium $ABFP$, ut duplum trapezii $ABIP$ ad polygonum $ABDLP$. & quoniam trapezium $ABFP$, trapezium $ABIP$ & triangulum ABP , sunt continuè proportionalia; erit trapezium $ABIP$ ad trapezium $ABFP$, ut triangulum ABP ad trapezium $ABIP$; & componendo, ut trapezia $ABIP$, $ABFP$ simul, ad trapezium $ABFP$, ita triangulum ABP & trapezium $ABIP$ simul, ad trapezium $ABIP$: erat autem, ut trapezia $ABIP$, $ABFP$, simul, ad trapezium $ABFP$, ita duplum trapezii $ABIP$ ad polygonum $ABDLP$; & igitur ut triangulum ABP & trapezium $ABIP$ simul, ad trapezium $ABIP$, ita duplum trapezii $ABIP$ ad polygonum $ABDLP$; quod demonstrare oportuit.

Producantur (si opus sit) rectæ AD , AL , segmentum secantes in punctis E & O , & rectas BI , IP , in H & M : deinde jungantur rectæ BE , EI , IO , OP , ut compleatur polygonum $ABEIO P$.

PROP. IV. THEOREMA.

Dico polygonum $ABEIO P$ *esse medium proportionale inter polygonum* $ABDLP$
& *trapezium* $ABIP$.

TAB. XLIII.
Fig. 1. 2. 3.

Ex hujus prima manifestum est trapezium $AILP$, trapezium $AIO P$ & triangulum AIP esse continuè pro-

proportionalia, & ex prædictis fatis facile colligi potest trapezium $A I L P$ esse dimidium polygoni $A B D L P$ & trapezium $A I O P$ esse dimidium polygoni $A B E I O P$ & triangulum $A I P$ esse dimidium trapezii $A B I P$: & proinde terminos duplicando, polygonum $A B D L P$, polygonum $A B E I O P$ & trapezium $A B I P$ sunt continuè proportionalia, quod demonstrare oportuit.

Ducantur rectæ $C G$, $K N$, segmentum tangentes in punctis E , O , & rectis $D L$, $D B$, $L P$, occurrentes in punctis C , G , K , N , ut compleatur polygonum $A B C G K N P$.

PROP. V. THEOREMA.

TAB. XLIII.
Fig. 1. 2. 3.

Dico trapezium $A B I P$ & polygonum $A B E I O P$ simul, esse ad polygonum $A B E I O P$, ut duplum polygoni $A B E I O P$ ad polygonum $A B C G K N P$.

Ex hujus tertia manifestum est triangulum $A B I$ & trapezium $A B E I$ simul, esse ad trapezium $A B E I$, ut duplum trapezii $A B E I$ ad polygonum $A B C G I$: & ex prædictis facile concludi potest triangulum $A B I$ esse dimidium trapezii $A B I P$, & trapezium $A B E I$ esse dimidium polygoni $A B E I O P$, & polygonum $A B C G I$ esse dimidium polygoni $A B C G K N P$; & proinde terminos duplicando, trapezium $A B I P$ & polygonum $A B E I O P$ simul, erunt ad polygonum $A B E I O P$ ut duplum polygoni $A B E I O P$ ad polygonum $A B C G K N P$, quod demonstrandum erat.

Hinc facile colligi potest polygonum $A B C G K N P$ esse medium harmonicum inter polygona $A B E I O P$, $A B D L P$, quod hic admonuisse sufficiat, in sequentibus enim demonstrabitur.

SCHO.

S C H O L I U M.

Duæ præcedentes propositiones eodem modo demonstrari possunt de duobus quibuscunque polygonis complicatis loco polygonorum complicatorum ABIP, ABDLP; polygonum enim à tangentibus comprehensum tot continet æqualia trapezia, quot continet polygonum à subtendentibus comprehensum æqualia triangula: atque hinc evidens est has polygonorum analogias ita se habere in infinitum, ducendo nimirum rectas AN, AK, AG, AC, per puncta R, T, S, V, & adhuc alia & alia polygona intra & extra semper scribendo: notandum nos appellare hanc polygonorum inscriptionem & circumscriptionem, inscriptionem & circumscriptionem subduplam, ex prædictis patet (si ponatur triangulum ABP \equiv^a , & trapezium ABFP \equiv^b) trapezium ABI P esse vq^{ab} & polygonum ABDLP \equiv^{2ab} :

eodem modo posito trapezio ABIP \equiv^c , & ^{a + vqab} polygono ABDLP \equiv^d , erit polygonum AB E I O P $\equiv vq^{cd}$ & polygonum ABCGKNP \equiv^{2cd} , _{c + vqcd,} ita ut evidens sit hanc

polygonorum seriem esse convergentem; atque in infinitum illam continuando, manifestum est tandem exhiberi quantitatem sectori circulari, elliptico vel hyperbolico AB E I O P æqualem; differentia enim polygonorum complicatorum in seriei continuatione semper diminuitur, ita ut omni exhibita quantitate fieri possit minor, ut in sequentis theorematis Scholio demonstrabimus: si igitur prædicta polygonorum series terminari posset, hoc est, si inveniretur ultimum illud polygonum inscriptum (si ita loqui liceat) æquale ultimo illi polygono circumscripto, daretur infallibiliter circuli & hyperbolæ quadratura: sed quoniam difficile est, & in geometria omnino fortasse inauditum tales series terminare; præmittendæ sunt quædam propositiones è quibus inveniri possint hujusmodi aliquot serierum terminationes, & tandem (si

fieri possit) generalis methodus inveniendi omnium serierum convergentium terminationes.

PROP. VI. THEOREMATA.

TAB. XLIII.
Fig. 1. 2. 3.

Dico differentiam inter triangulum ABP & trapezium ABFP majorem esse duplo differentiæ inter trapezium ABIP & polygonum ABDLP.

Sit triangulum ABP, A; trapezium ABFP, B; trapezium ABIP, C, & polygonum ABDLP, D: quoniam A est ad C ut C ad B, igitur ut differentia inter A & C ad A, ita differentia inter C & B ad C; & permutando, ut differentia inter A & C ad differentiam inter C & B ita A ad C; & componendo, ut differentia inter A & C & differentia inter C & B simul, hoc est differentia inter A & B, ad differentiam inter C & B, ita A + C ad C; sed ut A + C ad C ita 2 C ad D, & ideo differentia inter A & B est ad differentiam inter C & B ut 2 C ad D. quoniam A + C est ad C ut 2 C ad D, erit permutando ut A + C ad 2 C ita C ad D; & dividendo, ut differentia inter A & C ad 2 C ita differentia inter C & D ad D; & permutando, differentia inter A & C est ad differentiam inter C & D ut 2 C ad D; sed demonstratum est differentiam inter A & B esse ad differentiam inter C & B ut 2 C ad D; & proinde differentia inter A & B est ad differentiam inter C & B, ut differentia inter A & C ad differentiam inter C & D; sed differentia inter A & B est major differentia inter C & B, & ideo differentia inter A & C est major differentia inter C & D: & prædictam analogiam permutando, differentia inter A & B est ad differentiam inter A & C, ut differentia inter C & B ad differentiam inter C & D; at differentia inter A & B est major differentia inter A & C, & ideo differentia inter C & B est major differentia inter C & D; atque differentia inter A & B æqualis est differentiis, inter A & C, inter C & B; cumque earum utraque sit major differentia inter

ter C & D, manifestum est differentiam inter A & B majorem esse duplo differentiæ inter C & D, hoc est differentiam inter triangulum A B P & trapezium A B F P majorem esse duplo differentiæ inter trapezium A B I P, & polygonum A B D L P, quod demonstrare oportuit.

SCHOLIUM.

Eodem prorsus modo demonstratur differentiam inter trapezium A B I P & polygonum A B D L P majorem esse duplo differentiæ inter polygonum A B E I O P & polygonum A B C G K N P. denique eodem modo demonstrari potest hic differentiarum excessus in subdupla nostra polygonorum complicatorum descriptione in infinitum; differentia enim priorum nempe inscripti & circumscripti major semper erit duplo differentiæ immediatè sequentium nimirum inscripti quoque & circumscripti, & proinde aufertur majus quam dimidium a priorum differentia ut fiat differentia immediatè sequentium; & igitur continuando subduplam polygonorum descriptionem, inveniri possunt duo polygona complicata, quorum differentia sit minor qualibet exhibita quantitate, ut in præcedentis Scholio assumpsimus.

Sint duæ quantitates indefinitæ ^a minor ^b major, sintque datæ duæ rationes majoris inæqualitatis ^c ad ^d, & ^c ad ^e; deinde sit ut ^c ad ^d ita ^b - ^a ad $\frac{bd - ad}{c}$ cui addatur quantitas ^a ut

fiat $\frac{ca + bd - ad}{c}$, quæ quantitas ponatur immediate sub ^a: fiatque

ut ^c ad ^e ita ^b - ^a ad $\frac{bc - ac}{c}$, quæ quantitas subtrahatur ex ^b &

relictum nempe $\frac{bc - bc + ac}{c}$ ponatur sub ^b. continuetur de-

inde series convergens cujus primi termini convergentes sunt ^a, ^b, ^c ^d ^e $\frac{ca + bd - ad}{c}$ $\frac{bc - bc + ac}{c}$

& secundi termini convergentes $\frac{ca + bd - ad}{c}$, $\frac{bc - bc + ac}{c}$. manifestum est terminum $\frac{ca + bd - ad}{c}$ majorem esse

esse termino a , quoniam termino a additur $\frac{bd - ad}{c}$ ut fiat terminus $\frac{ca + bd - ad}{c}$: manifestum quoque est terminum $\frac{ca + bd - ad}{c}$ minorem esse termino b , quoniam differentia inter a & b est ad differentiam inter a & $\frac{ca + bd - ad}{c}$ in ratione majoris inæqualitatis: evidens quoque est terminum $\frac{bc - be + ae}{c}$ minorem esse termino b . quoniam ex b subtrahitur $\frac{be - ae}{c}$ ut fiat $\frac{bc - be + ae}{c}$; manifestum etiam est terminum $\frac{bc - be + ae}{c}$ majorem esse termino a , quoniam differentia inter a & b est ad differentiam inter $\frac{bc - be + ae}{c}$ & b in ratione majoris inæqualitatis: evidens igitur est differentiam inter terminos convergentes a & b majorem esse differentiâ inter terminos convergentes $\frac{ca + bd - ad}{c}$ & $\frac{bc - be + ae}{c}$.

sed quoniam termini convergentes a & b ponuntur indefiniti, possunt a & b sumi loco quorumlibet terminorum convergentium totius hujus seriei; & positis a & b pro terminis hujus seriei convergentibus quibuscunque, sequitur necessario ex seriei compositione $\frac{ca + bd - ad}{c}$, $\frac{bc - be + ae}{c}$ esse terminos conver-

gentes immediatè sequentes: cumque differentia terminorum a & b major sit differentia terminorum $\frac{ca + bd - ad}{c}$ & $\frac{bc - be + ae}{c}$,

evidens est differentiam terminorum convergentium priorum semper esse majorem differentia terminorum convergentium immediatè sequentium; & igitur quò magis continuatur hæc series convergens eò minor fit differentia terminorum convergentium: & quoniam hæc differentiarum diminutio semper fit proportionaliter nempe in ratione $b - a$ ad $\frac{bc - be + ae - ca - bd + ad}{c}$,

igitur possunt inveniri hujus seriei termini convergentes quorum differentia sit omni exhibita quantitate minor; & igitur imaginando hanc seriem in infinitum continuari, possumus imaginari ultimos terminos convergentes esse æquales, quos

quos terminos æquales appellamus seriei terminationem.

PROP. VII. PROBLEMA.

Oportet prædictæ seriei terminationem invenire.

Ut huic problemati satisfiat, oportet primò invenire quantitatem quæ eodem modo componitur ex terminis convergentibus ^a, ^b, quo ex terminis convergentibus $\frac{ca + bd - ad}{c}$, $\frac{bc - be + ae}{c}$, hoc autem facile fit hoc modo: inveniatur

quantitas quæ multiplicata in ^a & addita ^b multiplicata in quantitatem datam ^m, eandem quantitatem facit ac si multiplicaretur in $\frac{ca + bd - ad}{c}$ & adderetur $\frac{bc - be + ae}{c}$ multiplicata etiam

in eandem quantitatem datam ^m. sit quantitas illa ^z, & proinde $za + bm$ æquatur $\frac{zca + zbd - zad + mbc - mbe + mae}{c}$, & æquatione

reducta invenitur $\frac{z - mae - mbe}{ad - bd}$; quæ quantitas sive multiplicata in ^a & addita ^m, sive multiplicata in $\frac{ca + bd - ad}{c}$ & addita

$\frac{mbc - mbe + mae}{c}$ efficit eandem in utroque casu quantitatem nempe

$\frac{mae - mbae + mbad - mbbd}{cd - bd}$: & proinde prædicta quantitas eodem modo

componitur ex terminis convergentibus ^a, ^b, quo componitur ex terminis convergentibus $\frac{ca + bd - ad}{c}$, $\frac{bc - be + ae}{c}$. atque ^a

& ^b quoniam sunt quantitates indefinitæ possunt esse quilibet totius seriei termini convergentes, modò termini convergentes immediatè sequentes sint $\frac{ca + bd - ad}{c}$ & $\frac{bc - be + ae}{c}$, &

proinde quantitas $\frac{mae - mbae + mbad - mbbd}{cd - bd}$ eodem modo componi-

tur ex quibuslibet totius seriei terminis convergentibus quo componitur ex terminis convergentibus ^a, ^b; & igitur præ-

dicta quantitas eodem etiam modo componitur ex ultimis ejus terminis convergentibus, qui æquales sunt: fit ultimus ille terminus x qui multiplicatus in $\frac{mae - mbe}{ad - bd}$ & in m efficit xm & $\frac{xmae - xmbe}{ad - bd}$, quorum factorum summa nempe $\frac{xmae - xmbe + xmad - xmbd}{ad - bd}$ æquatur $\frac{mae - mbe + mbad - mbbd}{ad - bd}$ & æquatione reducta invenitur x seu seriei terminatio $\frac{a - b + b^2 - b^3}{a - b + ad - bd}$, quam invenire oportuit.

Ne minus exercitatis obscurum videatur hoc problema, illud in numeris illustrabimus: fit $c = 7, d = 2, e = 3, a = 28, b = 42$, erunt secundi termini convergentes $32, 36$, tertii $33\frac{1}{7}, 34\frac{2}{7}$, & ejus terminatio $33\frac{3}{5}$.

Neminem moveat, quod (etiamsi a sit minor quam b) $\frac{ca + bd - ad}{c}$ possit esse major quam $\frac{bc - be + ae}{c}$, analyticè enim major à minore potest subtrahi, cujus tamen exemplum non gravabimus exhibere, fit $c = 7, d = 5, e = 4, a = 28, b = 42$; erunt secundi termini convergentes $38, 34$, & tertii $35\frac{1}{7}, 36\frac{2}{7}$, ejusque terminatio $35\frac{7}{9}$.

Animadvertendum est hujus problematis solutionem eodem modo se habere, etiamsi loco a ponatur cyphra seu merum nihil, Ex. Gr; fit $c = 8, d = 3, e = 4, a = 0, b = 24$; erunt secundi termini convergentes $9, 12$, & tertii $10\frac{1}{8}, 10\frac{1}{2}$, & seriei terminatio $10\frac{2}{7}$.

Harum etiam serierum terminationes possunt inveniri ex Gregorii à S. Vincentio lib. de progress. geometrica, etiamsi methodo longe ab hac diversa.

PROP. VIII. PROBLEMA.

Sint duæ quantitates datæ A, B, & ratio quælibet data C ad D: oportet invenire aliam quantitatem, ut ratio ejus ad A sit multiplicata rationis B ad A in ratione C ad D.

Sit primò ratio C ad D commensurabilis, sitque inter C & D communis mensura E; & quoties E continetur in D toties sit ratio F ad A submultiplicata rationis B ad A; & quoties E continetur in C toties sit ratio G ad A multiplicata rationis F ad A: dico G esse quantitatem illam quæsitam. ratio G ad A est multiplicata rationis F ad A in ratione C ad E, & ratio F ad A est multiplicata rationis B ad A in ratione E ad D; & igitur ex æqualitate, ratio G ad A est multiplicata rationis B ad A in ratione C ad D, quod demonstrare oportuit.

EDC AFBG

Quod si ratio C ad D sit incommensurabilis, geometricam hujus problematis praxim esse impossibilem mihi persuadeo; approximatione tamen fieri potest, assumendo rationem commensurabilem ejus loco, quæ quàm proximè ad illam accedat.

Sit series convergens, cujus primi termini convergentes sint A, B, secundi C, D, tertii E, F; sintque secundi termini ita facti à primis, ut ratio B majoris ad A minorem sit multiplicata rationis C ad A in ratione data majoris inæqualitatis M ad N, & ut ratio B ad A sit multiplicata rationis D ad A in ratione data majoris inæqualitatis M ad O: sintque tertii termini eodem modo facti ex secundis quo secundi facti sunt ex primis; atque ita continuetur series.

	G H	A B
N	I K	C D
M	R S	E F
O	T V	X Y
	L	Z

PROP.

PROP. IX. PROBLEMA.

Oportet prædictæ seriei terminationem invenire.

Ponatur G cyphra seu nihil hoc est exponens rationis æqualitatis, seu rationis A ad A ; sitque H ad libitum exponens rationis B ad A : sit ut M ad N ita differentia inter G & H , hoc est ipsa H vel exponens rationis B ad A ad excessum quo I superat G hoc est ipsam I , sed ut M ad N ita ratio B ad A est multiplicata rationis C ad A ; & igitur Excessus quo I superat G hoc est ipsa I est exponens rationis C ad A . sit ut M ad O ita differentia inter G & H hoc est H ad excessum quo K superat G hoc est ipsam K , sed ut M ad O ita ratio B ad A est multiplicata rationis D ad A , cumque H sit exponens rationis B ad A , erit K exponens rationis D ad A : si igitur I sit exponens rationis C ad A & K exponens rationis D ad A ; erit excessus quo K superat I exponens rationis D ad C . deinde sit ut M ad N ita excessus quo K superat I seu exponens rationis D ad C ad excessum quo R superat I , sed ut M ad N ita ex seriei compositione ratio D ad C est multiplicata rationis E ad C , atque excessus quo K superat I est exponens rationis D ad C ; & proinde excessus quo R superat I est exponens rationis E ad C , atque I est exponens rationis C ad A , & proinde R est exponens rationis E ad A . deinde sit ut M ad O ita excessus quo K superat I ad excessum quo S superat I , sed ut M ad O ita ex seriei compositione ratio D ad C est multiplicata rationis F ad C , cumque excessus quo K superat I sit exponens rationis D ad C ; erit excessus quo S superat I exponens rationis F ad C , atque I est exponens rationis C ad A , & proinde S est exponens rationis F ad A : cum igitur R sit exponens E ad A & S exponens rationis F ad A ; erit excessus quo S superat R exponens rationis F ad E : & utramque seriem continuando, demonstratur ut antè T esse exponentem rationis X ad A , & V esse expo-

exponentem rationis Y ad A ; denique semper demonstrabitur terminos convergentes seriei exponentium esse exponentes rationum, terminorum convergentium seriei propositæ ad primam seriei quantitatem A , modò utriusque seriei termini convergentes sint in eodem ab initio ordine: & proinde terminatio seriei exponentium per hujus 7 inventa, quæ Ex: Gr: sit L , erit exponens rationis, terminationis seriei propositæ ad primum terminum A : inveniatur igitur ratio Z ad A quæ sit multiplicata rationis datæ B ad A in ratione data L ad H ; eritque Z terminatio quæsitæ, quam invenire oportuit.

Ad hoc problema in numeris illustrandum sit M 4, N 2, O 1, A 6, B 10; erunt secundi termini convergentes V_{q60} , V_{q92160} , tertii termini convergentes $V_{q997776000}$, $V_{q999100776960000000}$, & seriei terminatio V_{c360} .

Aliud exemplum, sit M 6, N 2, O 3, A 5, B 10; erunt secundi termini convergentes V_{c250} , V_{q50} , tertii termini convergentes $V_{qcc488281250000000}$, $V_{q9c7812500000}$, & seriei terminatio V_{i2500} . hætenus terminavimus omnes series convergentes quæ fieri possunt vel à sola proportionem arithmetica vel a sola proportionem geometrica, nunc vero methodum aggredimur, cujus ope omnium serierum convergentium terminationes (si modò sint in rerum natura) inveniri possunt.

PROP. X. PROBLEMA.

Ex data quantitate, eodem modo composita à duobus terminis convergentibus cujuscunque seriei convergentis, quo componitur ex terminis convergentibus ejusdem seriei immediatè sequentibus; seriei propositæ terminationem invenire.

Sit series convergens, cujus duo termini convergentes quicunque sint a, b , & termini convergentes immediatè
 Tom. II. H h h sc.

sequentes v_{gab} , $\frac{aa}{v_{gab}}$ summa terminorum convergentium $a + b$

multiplicata in terminum convergentem primum a efficit $aa + ab$: & summa terminorum convergentium immediate sequentium nempe $v_{gab} + \frac{aa}{v_{gab}}$ multiplicata in primum terminum

convergentem v_{gab} efficit etiam $aa + ab$; ex his invenienda sit seriei propositæ terminatio. manifestum est quantitatem $aa + ab$ eodem modo fieri à terminis convergentibus a, b , quo à terminis convergentibus immediatè sequentibus v_{gab} , $\frac{aa}{v_{gab}}$ & quo-

niam quantitates a, b , indefinitæ ponuntur pro quibuslibet totius seriei terminis convergentibus, evidens est summam quorumcunque terminorum convergentium propositæ seriei multiplicatam in primum terminum convergentem efficere quantitatem æqualem illi, quæ fit à summa terminorum convergentium immediatè sequentium multiplicata etiam in primum suum terminum convergentem; cumque duo termini convergentes duos terminos convergentes semper immediatè sequuntur, manifestum est summam duorum quorumlibet terminorum convergentium multiplicatam in primum semper efficere eandem quantitatem nempe $aa + ab$, atque ultimi termini convergentes sunt æquales, & proinde sit ultimus ille terminus seu seriei terminatio z , quæ sibi addita & in summam multiplicata efficit $z + zz$, quæ quantitas debet esse æqualis quantitati $aa + ab$, & æquatione resoluta dabitur z seu seriei terminatio $\sqrt[2]{aa + ab}$, quam invenire oportuit.

Et proinde ad inveniendam cujuscunque seriei convergentis terminationem; opus est solummodo invenire quantitatem eodem modo compositam ex terminis convergentibus primis, quo componitur eadem quantitas ex terminis convergentibus secundis.

CONSECTARIUM.

Quoniam non refert in problemate five termini convergentes a, b , sint primi, secundi, vel tertii &c; manifestum est omnes

omnes seriei convergentis terminationem eodem modo esse compositam ex terminis convergentibus primis quo ex terminis convergentibus secundis, tertiis, vel quartis, &c.

PROP. XI. THEOREMA.

Dico sectorem circuli, ellipseos vel hyperbolæ ABIP TAB. XLIII. Fig. 1. 2. 3.
non esse compositum analyticè à triangulo
ABP & trapezio ABFP.

Ponatur triangulum ABP^a & trapezium ABFP^b: manifestum est ex prædictis trapezium ABIP esse v_{gab} & polygonum ABDLP $\frac{2ab}{a + v_{gab}}$, item sectorem ABIP esse

hujus seriei convergentis terminationem. ut ex seriei terminis auferantur signa radices & fractionis, pro ^a & ^b primis seriei terminis convergentibus, hoc est pro triangulo ABP & trapezio ABFP ponantur $a^3 + a^2b$ & $ab^2 + b^3$; eruntque secundi seriei termini convergentes, hoc est trapezium ABIP & polygonum ABDLP, $ba^2 + b^2a$ & $2b^2a$, dico seriei convergentis (cujus primi termini convergentes sunt $a^3 + a^2b$, $ab^2 + b^3$ & secundi sunt $ba^2 + b^2a$, $2b^2a$) terminationem non esse compositam analyticè a terminis $a^3 + a^2b$, $ab^2 + b^3$: si enim componatur prædicta terminatio analyticè a terminis convergentibus $a^3 + a^2b$, $ab^2 + b^3$; componetur etiam eadem terminatio analyticè & eodem omnino modo à terminis convergentibus $ba^2 + b^2a$, $2b^2a$; & proinde eadem quantitas, nempe prædicta terminatio, eodem modo componitur analyticè ex terminis $a^3 + a^2b$, $ab^2 + b^3$, quo componitur ex terminis $ba^2 + b^2a$, $2b^2a$,

sed nulla quantitas potest $a^3 + a^2b$ $ab^2 + b^3$.

eodem modo analyticè componi ex terminis $a^3 + a^2b$, $ba^2 + b^2a$ $2b^2a$

$ab^2 + b^3$, quo componitur ex terminis $ba^2 + b^2a$, $2b^2a$, quod sic demonstro. si analyticè componeretur quantitas ex terminis $a^3 + a^2b$, $ab^2 + b^3$,

eodem modo, quo analyticè componitur eadem quantitas ex terminis $ba^2 + b^2a$, $2b^2a$; addendo, subtrahendo, multiplicando & dividendo terminos $a^3 + a^2b$, $ab^2 + b^3$ & radices ex factis extrahendo, eadem fieret quantitas ac si eodem modo adderentur, subducerentur, multiplicarentur & dividerentur termini $ba^2 + b^2a$, $2b^2a$, & radices eadem ex factis extraherentur, sed posterius fieri non potest, ergo nec prius; minorem sic probo, si eadem fieret quantitas ex additione, subtractione, multiplicatione, divisione & radicum extractione terminorum $a^3 + a^2b$, $ab^2 + b^3$, quæ fieret ex eadem additione, subtractione, multiplicatione, divisione & radicum extractione terminorum $ba^2 + b^2a$, $2b^2a$; tunc addendo æquales quantitates terminis $a^3 + a^2b$, $ba^2 + b^2a$, vel ab illis five ipsorum factis æquales quantitates subducendo, vel illos five ipsorum factos æqualibus quantitatibus multiplicando vel dividendo, vel denique illos five ipsorum factos eodem modo in se multiplicando, vel ex iisdem easdem radices extrahendo, hasce analyticas operationes aliquo modo mutando, reiterando vel utrumque vel neutrum faciendo, fieri possent duo ultima producta, nempe unum à termino $ab^2 + b^3$, & alterum à termino $2b^2a$; ita ut ultimum productum ex termino $a^3 + a^2b$ cum ultimo producto ex termino $ab^2 + b^3$ additum, subductum, multiplicatum, divisum, & ex facto radice aliqua extracta (hasce analyticas operationes aliquo modo mutando, reiterando vel utrumque vel neutrum faciendo) eandem efficiat quantitatem quam efficit ultimum productum ex termino $ba^2 + b^2a$ cum ultimo producto ex termino $2b^2a$ eodem omnino modo additum, subductum, multiplicatum, divisum, & ex facto eadem etiam radice extracta, hasce analyticas operationes eodem omnino modo mutando, reiterando vel utrumque vel neutrum faciendo; sed posterius est absurdum ergò & prius: sequela majoris patet ex octava definitione hujus, minorem sic probo, in termino $a^3 + a^2b$ reperitur potestas ipsius a nempe a^3 , quæ est altior ulla potestate ejusdem a in termino $ba^2 + b^2a$; & proinde terminos $a^3 + a^2b$, $ba^2 + b^2a$, cum

æqua-

æqualibus quantitatibus addendo, subtrahendo, multiplicando, dividendo, &c: sicut superius dictum est, semper manet potestas ipsius a in ultimo producto ex termino $a^3 + a^2b$ altior potestate ulla ipsius a in ultimo producto termini $ba^2 + b^2a$, quoniam illos cum æqualibus quantitatibus addendo, subtrahendo, &c, semper manent in factis eadem potestates, & illos in se eodem modo multiplicando semper magis elevatur altior potestas in termino $a^3 + a^2b$ quam elevatur depressior potestas in termino $ba^2 + b^2a$, & ex illis easdem radices extrahendo, ubi a fuerat elevatior in potestate erit etiam elevatior in radice: & quoniam eadem reperitur altissima potestas ipsius a in termino $ab^2 + b^3$ quæ reperitur in termino $2b^2a$, demonstratur ut antè altissimam potestatem ipsius a in ultimo producto ex termino $ab^2 + b^3$ eandem esse cum altissima potestate ipsius a in ultimo producto ex termino $2b^2a$: in ultimo igitur producto termini $a^3 + a^2b$ reperitur altior potestas ipsius a quam in ultimo producto termini $ba^2 + b^2a$, & in ultimo producto termini $ab^2 + b^3$ altissima potestas ipsius a eadem est cum altissima potestate ipsius a in ultimo producto termini $2b^2a$; & igitur ultima producta ex terminis $a^3 + a^2b$, $ab^2 + b^3$, eodem modo inter se addita, subducta, multiplicata, divisa, &c. semper efficient quantitatem, in qua reperitur altior potestas ipsius a quam ulla quæ reperiri potest in quantitate facta ex eadem prorsus additione, subductione, multiplicatione, divisione, &c, productorum à terminis $ba^2 + b^2a$, $2b^2a$; quoniam altior potestas cum altera potestate semper altiore facit potestatem quam depressior potestas cum eadem altera potestate; & igitur istæ duæ quantitates non possunt esse indefinitè æquales, cum reperiatur altior potestas ipsius a in una quam in altera: atque hinc evidens est quod sector circuli, ellipseos vel hyperbolæ $ABIP$ non possit componi analyticè à triangulo ABP & trapezio $ABFP$, quod demonstrandum erat.

Ut autem evidentius fiat propositum, aliam demonstrationem breviorē faciliorem & ex alio medio petitam hic sub-

jungo: quantitas non potest componi analyticè ex terminis $a^3 + a^2b$, $ab^2 + b^3$, eodem modo quo componitur eadem quantitas ex terminis $ba^2 + b^2a$, $2b^2a$; quoniam addendo, subtrahendo, multiplicando, dividendo duo binomia $a^3 + a^2b$, $ab^2 + b^3$ & radices ex ultimo facto extrahendo, plura fiunt nomina in ultimo producto, quam si eodem modo adderentur, subducerentur, multiplicarentur, dividerentur, binomium $ba^2 + b^2a$ & simplex quantitas $2b^2a$, & eadem quoque radices ex facto extraherentur; & si plura sint nomina in uno producto quam in altero, impossibile est ut sint indefinitè æqualia, quod est propositum, reliqua enim ex priore demonstratione haberi possunt.

S C H O L I U M.

Obscurum fortassis videbitur hoc theorema ob multas inusitatas in geometria voces quas hic adhibere oportet, & ob multa supposita lemmata, quæ demonstrare pigebat, quoniam cuivis analytæ vel prima lectione sunt obvia, ex natura enim operationum analyticarum omnino dependent.

Locus hic requirit ut aliquid dicam de proportionem inter triangulum ABP & sectorem $ABIP$; quod ut fiat, advertendum est verissimum philosophorum axioma, nempe omnem nostram cognitionem à sensu ortum habere: inter proportionem enim, sola commensurabilis sensu attingitur & perfectè ab humana mente intelligitur; incommensurabilis enim à mathematicis solummodo adhuc contemplatur, quatenus commensurabilis cujusdam rationis est subduplicata, subtriplicata, &c. vel ex talium additione, subductione, &c. genita: hoc est, quantitas quæ quantitati propositæ est incommensurabilis ex eo solummodo ab humana mente contemplatur, quod ex aliquot quantitatum cognitarum & propositæ quantitati commensurabilium additione, subductione, multiplicatione, divisione & radicum extractione componi possit: at ex hæcenus demonstratis manifestum est sectorem $ABIP$ non posse componi ex additione, subductione, multiplicatione,

tione, divisione, & radicum extractione trianguli ABP & trapezii $ABFP$: triangulum autem ABP & trapezium $ABFP$ supponimus esse quantitates inter se analyticas; & proinde sector $ABIP$ illis analytica esse non potest, hoc est ex quantitatum ipsis ABP , $ABFP$ analyticarum additione, subtractione, multiplicatione, divisione & radicum extractione componi non potest; & proinde ex hoc capite nulla potest exhiberi ratio inter triangulum ABP & sectorem $ABIP$, cum evidens sit illam non esse analyticam. sed dicet fortè aliquis rationem inter triangulum ABP & sectorem $ABIP$ omnifariam variari posse; & proinde posse esse inter se in ratione qualibet data sive analytica sive etiam commensurabili: respondeo hoc esse verissimum, sed in hoc casu ratio inter triangulum ABP & trapezium $ABFP$ non erit analytica; & proinde ex dato circulo ellipse vel hyperbola nunquam dabitur in analyticis triangulum ABP , quod ex prædictis clarissimè patet. etiamsi ex prædicto capite non possimus comprehendere rationem inter triangulum ABP & sectorem $ABIP$, possumus tamen ejus aliquam habere cognitionem; ex eo quod sector $ABIP$ sit terminatio seriei convergentis datæ; & ex hac consideratione possibile est invenire quantitatem datæ commensurabilem cujus differentia à sectore $ABIP$ minor fuerit quacunque quantitate proposita, ad hoc enim semper recurrendum est, cum de quantitatibus quibuscunque incommensurabilibus tractant practici, & in hac nostra approximatione praxis non erit operosior quam in multis aliis etiam quantitatum analyticarum approximationibus, immo multo brevior, facilior & paratior erit illis Vietæ sectionibus angularibus, quæ tamen summæ matheseos utilitati in praxem reducuntur. non video ergo quare circuli quadratura diutius æstimetur ignorari: cum enim demonstratum sit rationem circuli ad diametri quadratum non esse analyticam, vanum certè erit & ineptum illam sicut talem imposterum quærere: at rejectis quantitatibus analyticis, vix credo ullam posse esse notioem hisce nostrarum serierum convergentium terminationibus, sicut ex sequentibus plenissimè apparebit.

PROP.

PROP. XII. THEOREMA.

TAB. XLIII.
Fig. 1. 2. 3.

Sit trapezium ABIP, A; polygonum ABEIOP, C; polygonum ABCGKNP, D; & polygonum ABDLP, B. dico D esse medium harmonicum inter C & B. ex hujus 4, $A:C::C:B$, & componendo $A+C:C::C+B:B$, sed ex hujus 5, $A+C:C::2C:D$, & ideo $C+B:B::2C:D$, & permutando $B+C:2C::B:D$, & dividendo, differentia inter B & C est ad 2 C, ut differentia inter B & D ad D, & permutando differentia inter B & C est ad differentiam inter B & D ut 2 C ad D, hoc est, ut $C+B$ ad B, & dividendo, differentia inter D & C est ad differentiam inter B & D ut C ad B; & proinde D est medium harmonicum inter C & B, quod demonstrare oportuit.

Hæc propositio eodem modo locum habet in omnibus polygonis complicatis, ut patet ex scholio 5 hujus.

PROP. XIII. THEOREMA.

Inter duas quantitates A, B, sit media arithmetica C, media geometrica D & media harmonica E. dico C, D, E, esse continuè proportionales. quoniam A, E, B, sunt in ratione harmonica; erit differentia inter A & E ad differentiam inter E & B ut A ad B; & componendo erit differentia inter A & B ad differentiam inter E & B, ut $A+B$ ad B; deinde permutando & componendo $2A:A+B::E:B$, sed $2A$ est duplum ipsius A & $A+B$ duplum ipsius C; & ideo $A:C::E:B$; & proinde $CE=AB$, & $AB=DD$, ideoque $CE=DD$; & igitur $C:D::D:E$, quod demonstrare oportuit.

PROP.

PROP. XIV. THEOREMA.

Sint duo polygona complicata A, B, nempe A intra circuli vel ellipseos sectorem & B extra: continuetur series convergens horum polygonorum complicatorum secundum nostram methodum subduplam descriptorum, ita ut polygona intra circulum sint A, C, E, &c, & extra circulum B, D, F, &c; dico $A + E$ minorem esse quam $2C$: ex prædictis manifestæ sunt sequentes analogiæ; prima quoniam A, C, B, sunt continue proportionales; & secunda quoniam $C - A : B - C :: A : C$ C, D, B, sunt harmonice proportionales: & proinde excessus C supra A, hoc est $C - A$, est ad excessum D supra C seu $D - C$ in ratione composita ex proportionibus A ad C & ex proportionibus $A + C$ ad A, hoc est in ratione $A + C$ ad C; at $A + C$ est major quam C, & ideo excessus C supra A est major quam excessus D supra C; est autem D major quam E, & proinde excessus C supra A multò major est quam excessus E supra C; est igitur $A + E$ minor quam $2C$; quod demonstrare oportuit.

PROP. XV. THEOREMA.

Iisdem positis: dico excessum C supra A minorem esse quadruplo excessum E supra C. ex prædictis manifestæ sunt sequentes tres analogiæ, prima quoniam A, C, B, sunt continue proportionales; secunda, quoniam C, D, B, sunt harmonice proportionales; & tertia, quoniam C, E, D, sunt continue proportionales; & ideo excessus C supra A (hoc est) $C - A$ est ad excessum E supra C seu $E - C$, ut $AC + EC + AE + CC$ ad CC ; at B ma-

$$\begin{array}{l}
 C - A : B - C :: A : C \\
 B - C : D - C :: A + C : A \\
 D - C : E - C :: E + C : C
 \end{array}$$

jor est quam E, & ideo AB seu CC major est quam AE, & igitur AE + CC minor est quam 2 CC: atque AC + EC est ad 2 CC ut A + E ad 2 C, sed A + E minor est quam 2 C; & ideo AC + EC minor est quam 2 CC; proinde AC + EC + AE + CC minor est quam 4 CC; & igitur C - A minor est quadruplo ipsius E - C, quod demonstrare oportuit.

PROP. XVI. THEOREMA.

Sint duo Polygona complicata A, B; nempe A extra hyperbolæ sectionem & B intra: Continuetur series convergens horum polygonorum complicatorum secundum nostram methodum subduplam descriptorum, ita ut polygona extra hyperbolem sint A, C, E, &c. & intra hyperbolem B, D, F &c; Dico A + E majorem esse quam 2 C. ex prædictis manifestæ sunt sequentes duæ Analogiæ, prima quoniam A, C, B, sunt continue proportionales; & secunda, quoniam C, D, B, sunt harmonicè proportionales; & proinde excessus A supra C, $A - C : C - B :: A : C$ hoc est $A - C$, est ad excessum $C - B : C - D :: A + C : A$ C supra D seu $C - D$; In ratione composita ex proportionibus A ad C & ex proportionibus A + C ad A hoc est in ratione A + C ad C, at A + C est major quam C & ideo excessus A supra C est major excessu C supra D, est autem E major quam D; & proinde excessus A supra C multo major est excessu C supra E; manifestum est igitur A + E majorem esse quam 2 C, quod demonstrare oportuit.

P R O P.

PROP. XVII. THEOREMA.

Isdem positis : dico excessum A supra C majorem esse
 quadruplo excessus C supra E. ex prædictis manifestæ
 sunt sequentes tres analogiæ ; prima, quoniam A, C, B, sunt
 continuè proportionales ; secunda, quoniam C, D, B, sunt
 harmonicè proportionales ; & tertia, quoniam C, E, D, sunt
 continuè proportionales ; & ideo excessus A supra C, hoc est
 $A - C$, est ad excessum C supra E, hoc est $C - E$ in ratio-
 ne composita ex proportionibus
 A ad C , $A + C$ ad A & $E + C$ ad C , $A - C : C - E :: A : C$
 & ideo $A - C$ est ad $C - E$, $C - B : C - D :: A + C : CA$
 ut $A : C + E : C + A : E + C : C$ ad $C - D : C - E :: E + C : C$
 CC ; at B minor est quam E,
 & ideo AB, seu CC minor est quam AE ; & igitur AE +
 CC major est quam 2 CC. atque $A : C + E : C$ est ad 2 CC ut
 $A + E$ ad 2 C ; sed $A + E$ major est quam duo C, & ideo
 $A : C + E : C$ major est quam 2 CC ; & proinde $A : C + E : C + A : E$
 $+ CC$ major est quam 4 CC ; & igitur $A - C$ major est qua-
 druplo ipsius $C - E$, quod demonstrare oportuit.

PROP. XVIII. THEOREMA.

Sint duæ quantitates inæquales ; A
 minor, B major, C media geome-
 trica, D media arithmetica. dico D
 majorem esse quam C, quoniam B, C,
 A, sunt continuè proportionales ; erit divi-
 dendo ; permutando, & componendo ; ut excessus B supra A
 ad excessum C supra A, ita $A + C$ ad A, atque $A + C$ major est
 duplo ipsius A ; & proinde excessus B supra A major est duplo
 excessus C supra A ; sed excessus B supra A duplus est excessus
 D supra A, & ideo excessus D supra A major est excessu C

supra A; est igitur D major quam C, quod demonstrare oportuit.

PROP. XIX. THEOREMA.

Iisdem positis; sit inter A & B media harmonica E. dico C maiorem esse quam E. ex hujus 13, D est ad C ut C ad E, sed D major est quam C; & ideo C major est quam E, quod demonstrare oportuit.

CONSECTARIUM.

Ex duabus præcedentibus manifestum est D maiorem esse quam E, hoc est mediam arithmeticam inter duas quantitates inæquales maiorem esse media harmonica inter easdem.

PROP. XX. THEOREMA.

Sint duo polygona complicata A, B, nempe A intra circuli vel ellipseos sectorem, B extra. continuetur series convergens horum polygonorum complicatorum secundum methodum nostram subduplam descriptorum;

A	B	A
C	D	C
E	F	G
K	L	H
Z		X

ita ut polygona intra circulum sint A, C, E, K, &c, & extra circulum B, D, F, L, &c; sitque seriei convergentis terminatio seu circuli vel ellipseos sector Z. dico Z maiorem esse quam C una cum triente excessus C supra A. sit excessus G supra C quarta pars excessus C supra A, & excessus H supra G quarta pars excessus G supra C; continueturque hæc series in infinitum, ut ejus terminatio sit X. Excessus C supra A minor est quadruplo excessus E supra C; & ideo excessus E supra C major est excessu G supra C, est ergo E major quam G. deinde excessus E supra C minor est quadruplo excessus K supra E, & ideo excessus G supra C multo minor est quadruplo excessus K supra E, est igitur excessus

cessus K supra E major excessu H supra G; cumque E major sit quam G, manifestum est K majorem esse quam H: eodem prorsus modo demonstratur in omni serierum A, C, E, A, C, G, continuatione, terminum quemcunque seriei A, C, E, majorem esse quam idem numero terminus seriei A, C, G; & ideo terminatio seriei A, C, E, nempe Z major erit terminatione seriei A, C, G, nempe X, at ex Archimedis quadratura parabolæ constat X æqualem esse ipsi C una cum triente excessus C supra A, & proinde Z eadem major est, quod demonstrare oportuit.

PROP. XXI. THEOREMA.

Isdem positis quæ supra; dico Z seu sectorem circuli vel ellipseos minorem esse quam major duarum mediarum continuè proportionalium arithmeticè inter A & B. inter A & B sit media Arithmetica G, & inter G & B sit media Arithmetica H; item inter G & H sit media Arithmetica M, & inter M & H sit media Arithmetica N; continueturque hæc series convergens A B, G H, M N, O P, in infinitum, ut fiat ejus terminatio X. satis patet ex prædictis G majorem esse quam C, atque H media Arithmetica inter G & B major est media harmonica inter easdem G, B; media autem harmonica inter G & B major est quam D media harmonica inter C & B, quoniam G major est quam C; & ideo media Arithmetica inter G & B, hoc est H, major est quam D media harmonica inter C & B. eodem modo M media arithmetica inter G & H major est media geometrica inter easdem G & H: & quoniam G est major quam C, & H quam D; media geometrica inter G & H major est quam E media geometrica inter C & D; & proinde M major est quam E. deinde N media arithmetica inter M & H major est media harmonica inter easdem, & quoniam H major est quam D & M quam E, media harmonica inter M & H major est quam F media harmonica inter E & D; & ideo N

A B	A B
C D	G H
E F	M N
K L	O P
Z	X

eadem F major est. eadem modo utramque seriem in infinitum continuando, semper demonstratur terminum quemlibet seriei AB, CD , minorem esse quam idem numero terminus seriei AB, GH ; & igitur terminatio seriei AB, CD , nempe Z minor erit terminatione seriei AB, GH , nempe X ; atque ex hujus 7, terminatio seriei AB, GH , seu X æqualis est majori duarum mediarum arithmetice continuè proportionalium inter A & B , & ideo Z eadem minor est, quod demonstrandum erat.

PROP. XXII. THEOREMA.

Iisdem positis quæ supra; dico Z seu sectorem circuli vel ellipseos minorem esse quam major duarum mediarum geometricè continuè proportionalium inter A & B . inter A & B sit media geometrica G , & inter G & B sit media geometrica H ; Item inter G & H media Geometrica M , & inter M & H media Geometrica N ; continueturque hæc series convergens AB, GH, MN, OP , &c., in infinitum, ut fiat ejus terminatio X . satis patet ex prædictis C & G esse inter se æquales, item H majorem esse quam D ; atque ob hanc rationem M media Geometrica inter G & H major est quam E media geometrica inter G & D . deinde N media Geometrica inter M & H major est media harmonica inter easdem; & quoniam M major est quam E & H major quam D , erit media harmonica inter M & H major quam F media harmonica inter E & D ; & ideo N media Geometrica inter M & H major erit quam F . eadem methodo utramque seriem in infinitum continuando semper demonstratur terminum quemlibet seriei AB, CD , minorem esse quam idem numero terminus seriei AB, GH ; & igitur terminatio seriei AB, CD , nempe Z minor erit terminatione seriei AB, GH , nempe X ; atque ex hujus 9 terminatio seriei AB, GH , seu X , æqualis est majori duarum mediarum Geometricè continuè proportionalium inter A & B ; & ideo Z eadem minor est, quod demonstrare oportuit.

SCHO.

S C H O L I U M.

Non opus est ut hic demonstrem majorem duarum mediarum arithmetice continuè proportionalium inter duas inæquales quantitates majorem esse quam major duarum mediarum Geometricè continuè proportionalium inter easdem, & igitur hujus propositionis approximationem præcedentis esse exactiorem, quod etsi fiat; præcedente tamen ob facilitatem potius utimur.

PROP. XXIII. THEOREMA.

Sint duo polygona complicata A, B, nempe A extra hyperbolæ sectorem, B intra. continuetur series convergens horum polygonorum complicatorum secundum methodum nostram subduplam descriptorum, ita ut polygona extra hyperbolam sint A, C, E, K, &c, & intra hyperbolam B, D, F, L, &c; Sitque seriei convergentis terminatio seu hyperbolæ sector Z. dico Z majorem esse quam C dempto triente excessus A supra C. sit excessus C supra G quarta pars excessus A supra C, & excessus G supra H quarta pars excessus C supra G, continueturque hæc series in infinitum ut ejus terminatio sit X. excessus A supra C major est quadruplo excessus C supra E, & ideo excessus C supra E minor est excessu C supra G, est ergo E major quam G. Deinde excessus C supra E major est quadruplo excessus E supra K, & ideo excessus C supra G multò major est quadruplo excessu E supra K, & igitur excessus G supra H major est excessu E supra K; cumque E major sit quam G, manifestum est K etiam majorem esse quam H: eodem prorsus modo demonstratur in omni serierum A, C, E, K; A, C, G, H, continuatione, terminum quemcumque seriei A, C, E, majorem esse quam idem numero terminus seriei A, C,

A	B	A
C	D	C
E	F	G
K	L	H
Z		X

C, G; & ideo terminatio seriei A, C, E, nempe Z, major erit terminatione seriei A, C, G, nempe X; at ex Archimedis quadratura parabolæ constat X æqualem esse ipsi C dempto triente excessus A supra C, & proinde Z eadem major est, quod demonstrare oportuit.

PROP. XXIV. THEOREMA.

Iisdem positis; dico Z seu sectorem hyperbolæ minorem esse quam minor duarum mediarum arithmetice continuè proportionalium inter A & B. Inter A & B sit media arithmetica G, & inter G & B sit media Arithmetica

A	B	A	B
C	D	G	H
E	F	M	N
K	L	O	P
Z		X	

H, Item inter G & H sit media Arithmetica M, & inter M & H sit media Arithmetica N: continueturque hæc series convergens A B, G H, M N, O P, in infinitum, ut fiat ejus terminatio X. satis patet ex prædictis G majorem esse quam C; atque H media arithmetica inter G & B major est media harmonica inter easdem G & B; media autem harmonica inter G & B; major est media harmonica inter C & B, nempe D, quoniam G major est quam C; & ideo media Arithmetica inter G & B nempe H major est quam D media harmonica inter C & B eodem modo M media Arithmetica inter G & H major est media geometrica inter easdem G & H; & quoniam G est major quam C & H quam D, media geometrica inter G & H major est quam E media geometrica inter C & D; & proinde M major est quam E. Deinde N media Arithmetica inter M & H major est media harmonica inter easdem; & quoniam H major est quam D & M quam E, media harmonica inter M & H major est quam F media harmonica inter E & D; & ideo N eadem F major est. eodem modo utramque seriem in infinitum continuando, semper demonstratur terminum quemlibet seriei A B, C D, minorem esse quam idem numero terminum seriei A B, G H; & igitur terminatio seriei A B, C D, nempe Z, minor erit terminatione seriei A B, G H,

GH, nempe X; atque ex hujus 7 terminatio seriei AB, GH, nempe X, æqualis est minori duarum mediarum arithmetice continuè proportionalium inter A & B, & ideo Z eadem minor est, quod demonstrare oportuit.

PROP. XXV. THEOREMA.

Iisdem positis; dico Z seu sectorem hyperbolæ minorem esse quam minor duarum mediarum geometricè continuè proportionalium inter A & B.

Inter A & B sit media geometrica G, & inter G & B media geometrica H;

Item inter G & H media geometrica M, & inter M & H media geometrica N; continueturque hæc series convergens AB, GH, MN, OP, &c. in infinitum ut fiat ejus terminatio X. satis patet ex prædictis C & G esse inter se æquales, & H majorem esse quam D; atque ob hanc rationem M media geometrica inter G & H major est quam E media geometrica inter C & D. Deinde N media geometrica inter M & H major est media harmonica inter easdem; & quoniam M major est quam E & H quam D, erit media harmonica inter M & H major quam F media harmonica inter E & D; proinde N media geometrica inter M & H major erit quam F. eadem methodo utramque seriem in infinitum continuando, semper demonstratur terminum quemlibet seriei AB, CD, minorem esse quam idem numero terminus seriei AB, GH; & igitur terminatio seriei AB, CD, nempe Z minor erit quam terminatio seriei AB, GH, nempe X; atque ex hujus 9 terminatio seriei AB, GH, seu X, æqualis est minori duarum mediarum geometricè continuè proportionalium inter A & B; & ideo Z eadem minor est, quod demonstrare oportuit.

A	B	A	B
C	D	G	H
E	F	M	N
K	L	O	P
Z		X	

Ex dictis manifestum est hanc approximationem exactiorem esse illa, in antecedenti propositione, demonstrata, etiamsi hæc sit paulò laboriosior. sed non dissimulandum est duas posse esse series æquales terminationes habentes, ita

ut semper quilibet terminus unius seriei sit major quam idem numero terminus alterius seriei; sed in talibus seriebus quò longius producantur, eò minor est eorundem numero terminorum differentia: sed è contra nostræ series quò longius producantur, eò magis differunt iidem numero termini, sicut facillimè demonstrari potest.

Experientia observo differentiam inter secundam duarum mediarum arithmetice proportionalium & secundam duarum mediarum geometricè proportionalium semper esse multò majorem differentia inter secundam duarum mediarum geometricè proportionalium & sectorem circuli, ellipseos vel hyperbolæ; quod notatu dignum existimo, hinc enim colligitur sectorem differre vix ultra unitatem à secunda duarum mediarum arithmetice continuè proportionalium, quando medium arithmeticum non excedit medium geometricum ultra unitatem, quod summopere notandum, nam ex hoc evidens est approximationem audacter esse adhibendam, quando ita continuatur series ut medietas prima notarum sit eadem in utroque termino convergente, quod experientia etiam evincit; nunquam enim in hoc casu differt sector unitate à secunda duarum mediarum arithmetice continuè proportionalium.

Est etiam alia approximatio omnium brevissima & maximè admiranda, etiamsi mihi non contingat illam demonstratione geometrica munire; nempe si primus notarum triens in utroque termino convergente sit eadem, sector circuli, ellipseos vel hyperbolæ semper differt infra unitatem à maximo quatuor arithmetice continuè proportionalium inter terminos nostræ approximationis.

PROP. XXVI. THEOREMA.

TAB. XLIII.
fig. 4

Sit hyperbola quæcunque $C F N$ cujus centrum A , asymptota $A B, A O$; sitque ejus sector $A F G L$ cum triangulo circumscripto $A F L$: asymptotorum uni $A B$ parallellæ ducantur rectæ $F D, I M$; & compleantur parallelogramma $E D M K$.

FDMK, PLMD. dico triangulum A F L esse medium arithmeticum inter parallelogramma FDMK, PLMD. Gregorius à S. Vincentio in Lib. de Hyperbola demonstrat triangulum A F L esse æquale trapezio DFLM, sed manifestum est trapezium DFLM esse medium arithmeticum inter parallelogramma FDMK, PLMD; & ideo patet propositum.

PROP. XXVII. THEOREMA.

Iisdem positis: ducatur AI rectam FL bifariam dividens in TAB. XLVIII. fig. 4.
 I & hyperbolam intersecans in puncto G, fiatque trapezium sectori circumscriptum A F G L, quod dico esse medium geometricum inter parallelogramma FDMK, PLMD. ex demonstratis Gregorii à S. Vincentio evidens est trapezium A F G L æquale esse rectilineo D F G L M. & quoniam A G I recta secatur rectam FL bifariam in I, ex ejusdem Gregorii à S. Vincentio Lib. de hyperbola, manifestum est rectas LM, GH, FD, esse continuè proportionales in eadem ratione cum tribus continuè proportionalibus AD, AH, AM. asymptoto AO per punctum G ducatur parallela recta RGS rectis FD, MK, occurrens in punctis R, S: quoniam rectæ FD, GH, LM, sunt continuè proportionales, erit dividendo & permutando FR ad SL ut GH ad LM: & quoniam rectæ MA, HA, DA, sunt continuè proportionales, erit etiam dividendo & permutando MH ad HD hoc est SG ad GR ut HA ad DA, vel ut GH ad LM; & proinde FR est ad SL ut SG ad GR, cumque anguli FRG, GSL, sint æquales ob parallelas FR, SL, erunt triangula FRG, GLS, æqualia; & proinde parallelogrammum RDMS æquale est rectilineo D F G L M seu trapezio A F G L; sed parallelogrammum RDMS est medium geometricum inter parallelogramma PDML, FDMK, quoniam eandem habentia altitudinem eorum bases nempe LM, SM, KM, sunt continuè proportionales; & ideo trapezium A F G L est medium geometricum.

metricum inter parallelogramma PDML, FDMK, quod demonstrare oportuit.

PROP. XXVIII. THEOREMA.

TAB. XLIII.
Fig. 4.

Iisdem positis ducantur rectæ FE, LE, hyperbolam tangentes in punctis F, L, ut compleatur trapezium AFEL, quod dico esse medium harmonicum inter parallelogramma PDML, FDMK: triangulum AFL, trapezium AFG L, & medium harmonicum inter parallelogramma PDML, FDMK, sunt continuè proportionalia, quoniam triangulum AFL est medium arithmeticum & trapezium AFG L medium geometricum inter eadem parallelogramma, ut patet ex hujus 13; sed triangulum AFL, trapezium AFG L, & trapezium AFEL sunt continuè proportionalia ex hujus 1; & proinde trapezium AFEL est medium harmonicum inter parallelogramma PDML, FDMK, quod demonstrare oportuit.

PROP. XXIX. PROBLEMA.

Dato circulo æquale invenire quadratum.

Sit quadratum circulo circumscriptum 4000000000000000;
erit ergo eidem inscriptum 2000000000000000, inter quæ quadrata sit medium geometricum 2828427124746190 octagonum nempe intra circulum: deinde inter octagonum intra circulum & quadratum extra sit medium harmonicum, quod levi labore invenitur dividendoduplum quadrati octagoni intra circulum seu duplum rectanguli à quadratis intra & extra circulum per summam quadrati & octagoni intra; eritque inventum medium harmonicum, octagonum circumscriptum, nempe 3313708498984760. continuetur hæc series convergens polygonorum complicatorum donec prima medietas notarum sit eadem in utroque termino
con-

ET HYPERBOLÆ QUADRATURA. 447

convergente, nimirum usque ad polygona laterum 16384; inscriptum enim est 3141592576586860 & circumscriptum 3141592692091258; non consideratur nota ultima, quoniam in divisionibus & radicum extractionibus semper à vera quantitate paululum aberramus, quod ultimam notam imperfectam plerumque reddit. adhibeatur deinde approximatio in hujus 20 & 21 demonstrata, & invenientur termini intra quos est vera circuli mensura, posito diametri quadrato 4000000000000000, 3141592653589789 minor circulo & 3141592653589792 eodem major, & proinde non latet circuli mensura, quam invenire oportuit. polygonorum seriem hic appono.

	Intra circulum	extra circulum
4	2000000000000000	4000000000000000
8	2828427124746190	3313708498984760
16	3061467458920718	3182597878074527
32	3121445152258051	3151724907429255
64	3136548490545938	3144118385245904
128	3140331156954752	3142223629942456
256	3141277250932772	3141750369168965
512	3141513801144299	3141632080703181
1024	3141572940367090	3141602510256808
2048	3141587725277158	3141595117749588
4096	3141591421543029	3141593269613390
8192	3141592345578073	3141592807595664
16384	3141592576586860	3141592692091258

Circulus intra sequentes terminos consistit :

3141592653589789 3141592653589792

eodem omnino modo reperitur rectilineum æquale cuicunque sectori circulari vel elliptico ex cognito triangulo inscripto & trapezio circumscripto.

PROP. XXX. PROBLEMA.

*Ex dato sinu invenire arcum.*TAB. XLIII.
fig. 5.






Sit arcus circuli $A E$ descriptus ex centro B . hujus arcus datur radius nempe $A B$ & sinus nempe $A D$: oportet invenire quam proportionem habet ipse arcus ad integram circuli circumferentiam. sit arcus chorda $A E$ & ejus semissis tangens $A C$ vel $C E$. ex quadrato radii $A B$ auferatur quadratum sinus $A D$ & relinquetur quadratum sinus complementi $B D$, datur igitur $B D$; & ideo datur area trianguli rectanguli $A B D$; datur quoque area trianguli $A B E$ nempe rectangulum sinus dati $A D$ in semissem radii $B E$. deinde fiat ut summa triangulorum $A B D$, $A B E$, ad triangulum $A B E$ ita duplum trianguli $A B E$ ad trapezium $A B E C$, ut constat ex hujus 5. & ex dato triangulo inscripto $A B E$ & trapezio circumscripto $A B E C$, inveniatur per præcedentem sector ipse $A B E$, qui ad circulum integrum datum quæsitam habet proportionem arcus $A E$ ad totam circumferentiam, quam invenire oportuit.

PROP. XXXI. PROBLEMA.

*Ex dato arcu invenire sinum.*TAB. XLIII.
fig. 5.

Ex dato arcu manifestum est dari sectoris aream; hoc igitur sectore dato consideretur ex quot notis arithmeti-
 cæ constat sinus totus: deinde sumatur sectoris dati talis pars aliquota nempe sector $A B E$, ut trianguli inscripti $A B E$ & trapezii circumscripti $A B E C$ toties multiplicia, quoties sector datus multiplex est sectoris $A B E$, concordent in tot notis arithmeti-
 cæ quot continet radix quadrata sinus totius; hoc enim facile fieri potest ex speculatione tabellæ hujus 29: non enim requiritur in hoc praxis præcisa, nam nihil refert etiam si in magnis radiis discrepantia sit notarum aliquot. Sectoris
 cogni-

pezium $L I K M$ esse medium arithmeticum inter prædicta rectangula; hoc est 4950000000000000000000000000. inveniantur inter rectangula $L N K M$, $Q I K M$, medium geometricum 28460498941515413987990042 quod erit pentagonum spatio hyperbolico $L I K M$ regulariter circumscriptum. Sitque ut trapezium $L I K M$ unà cum dicto pentagono circumscripto ad dictum pentagonum, ita duplum dicti pentagoni ad hexagonum spatio hyperbolico $L I K M$ regulariter inscriptum, nempe 20779754131836628160009835; quod hexagonum erit polygonum complicatum cum prædicto pentagono; quæ duo rectilinea efficiant primos seriei terminos convergentes: inter quæ sit medium geometricum cujus quadrati duplum dividatur per idem medium geometricum unà cum majori termino seu pentagono circumscripto; eruntque medium geometricum & quotus, secundi termini convergentes: atque ita continuetur series hæc convergens polygonorum complicatorum, donec medietas prima notarum eadem sit in utroque termino convergente, nempe ad terminum vigesimum; polygonum enim circumscriptum est 23025850929958961534173864, & inscriptum 23025850929931203593181124: adhibeatur deinde approximatio in hujus 23 & 24 demonstrata, & invenientur termini intra quos consistit vera spatii hyperbolici $L I K M$ mensura, nempe 23025850929940456240178681, minor spatio, & 23025850929940456240178704 eodem major, & ideo non later spatii mensura, quam invenire oportuit: totam polygonorum seriem hic appono unà cum numero rectarum curvam hyperbolicam subtendentium in unoquoque polygono circumscripto.



Extra hyperbolam		Intra hyperbolam	
2	28460498941515413987990042		20779754131836628160009835
4	24318761696971474416609403		22410399968461612921314879
8	23345088913234727934949897		22868197570682058351436953
16	23105412906351426185065096		22986193244865462241217428
32	23045725982658962868047234		23015921117139340153267671
64	23030818728479610745741910		23023367512879647736902891
128	23027092819292183214705676		23025230015404383009313933
256	23026161398510805910921810		23025695697539046352276636
512	23025928546847571901068394		23025812121604634087915779
1024	23025870334152518169052273		23025841227841783762272302
2048	23025855780992551911165543		23025848504414868310197241
4096	23025852142703422669729927		23025850323559001769499206
8192	23025851233131194254554390		23025850778345089029496888
16384	23025851005738140519209367		23025850892041614212944994
32768	2302585094889877295901163		23025850920465745719335070
65536	23025850934677811503232115		23025850927571778609090592
131072	23025850931124795055887228		23025850929348286832351848
262144	23025850930236540944102405		23025850929792413888218560
524288	23025850930014477416159412		23025850929903445652188450
1048576	23025850929958961534173864		23025850929931203593181124
	hyperbolæ sector intra sequentes terminos consistit		
	23025850929940456240178681		23025850929940456240178704

Potest igitur absque periculo erroris sumi sequens numerus pro hyperbolæ sectore, cujus numeri multiplices usque ad decem, divisionis facilitandæ gratia in compositione logarithmorum, hic subicimus; in magnis namque divisionibus præstat uti repetita divisoris multiplicium subtractione quam ordinaria divisione, ut constat expertis arithmeticis.

Manifestum est hoc problema eodem ferè modo posse resolvi, etiamsi asymptota AO, AK, non sint constituta ad angulum rectum: nos autem ita supposuimus, ut facilius & paratior esset problematis usus in doctrina logarithmica, quam primò invenit nobilissimus noster Neperus, & quam nos (ni fallor) ad summum perfectionis fastigium nunc elevamus.

1	23025850929940456240178700
2	46051701859880912480357400
3	69077552789821368720536100
4	92103403719761824960714800
5	115129254649702281200893500
6	138155105579642737441072200
7	161180956509583193681250900
8	184206807439523649921429600
9	207232658369464106161608300
10	230258509299404562401787000

PROP. XXXIII. PROBLEMA.

Propositi cujuscunque numeri logarithmum invenire.

TAB. XLIV.
fig. 1.

Eisdem positis quæ in antecedente, manifestum est, posita IK unitate, ML esse decem: posita ergo IK unitate sit GH asymptoto quoque AO parallela numerus propositus, cujus desideratur logarithmus. manifestum est ex data recta GH dari KF, & ex præcedenti dari etiam spatium hyperbolicum GIKH, quod spatium hyperbolicum dico esse logarithmum numeri propositi GH, posito spatio hyperbolico LIKM logarithmo numeri denarii: est enim (ex Gregorio à S. Vincentio) spatium GHKI in eadem ratione ad spatium LMKI, in qua ratio GH ad IK est multiplicata rationis LM ad IK; sed ratio GH ad IK est multiplicata

ratio--

rationis LM ad IK in eadem ratione qua numerus GH est multiplicatus numeri LM, quoniam idem est consequens in utraque ratione; & proinde spatium GIKH est in eadem ratione ad spatium LIKM, in qua numerus GH est multiplicatus numeri LM; & ideo (quoniam ex hypothese spatium LIKM est logarithmus numeri LM seu denarii) erit spatium GIKH logarithmus numeri propositi GH, quoniam hæc est logarithmorum essentialis proprietas, ut sint inter se in eadem directa ratione, in qua eorum numeri sunt unus alterius multiplicati: at ponitur communiter logarithmus numeri denarii ad arbitrium unitas cum numero quodam cyphrarum: si igitur fiat, ut spatium LIKM ad spatium GIKH, ita arbitrarius denarii logarithmus ad alium numerum; erit inventus ille numerus, logarithmus numeri propositi GH, quem invenire oportuit.

S C H O L I U M.

PRaxis prædicti problematis prolixa est & laboriosa; & proinde, ut abbrevietur labor noster in compositione tabulæ logarithmorum; sciendum est nos solummodo laborare in inventione logarithmorum, numerorum primorum; numerorum enim compositorum logarithmi ex primorum additione & subtractione nullo negotio invenientur. sed ut numerorum primorum logarithmi facilius invenientur, ordine progrediendum est à prioribus ad posteriores, nempe à 10 cujus logarithmus est arbitrarius ad 2 numerum omnium primum, & à 10 & 2 ad 3, item à 10, 2 & 3 ad 7, item à 10, 2, 3 & 7 ad 11, & sic deinceps. deinde inveniendi sunt duo numeri compositi parum inter se differentes, quorum unus compositus est ex numeris logarithmos cognitos habentibus, & ideo logarithmum datum habens, alter autem numerus compositus est ex solo numero primo (cujus quæritur logarithmus) vel ex illo unà cum aliis numeris logarithmos cognitos habentibus. deinde applicentur hi numeri compositi

(qui exempli gratia sint GH, EF) in hyperbola asymptoto OA paralleli; & inveniatur spatium hyperbolicum $EGHF$ per hujus 32, quod breviter, fit quoniam GH, EF , parum inter se differunt. ex suppositione, unius numeri, exempli gratia GH , datur logarithmus, & proinde datur ejus logarithmi ratio ad logarithmum denarii arbitrarium, quæ eadem est (ex hactenus demonstratis) cum ratione spatii hyperbolici $G I K H$ ad spatium hyperbolicum $L I K M$, datur autem ex hujus 32 spatium $L I K M$; & ideo innotescit quoque spatium $I K H G$, cumque detur spatium $EGHF$, innotescit quoque $E I K F$; & proinde datur logarithmus numeri compositi EF ; cumque ex suppositione dentur logarithmi omnium numerorum numerum EF componentium, excepto numero illo primo cujus logarithmus desideratur, dabitur quoque illius numeri primi logarithmus, quem invenire oportuit. Exempli gratia, propositum sit invenire logarithmum numeri binarii, supposito arbitrario numeri denarii logarithmo, unitate cum 25 cyphris. duo numeri compositi parum inter se differentes sunt 1000 & 1024; numeri 1000 datur logarithmus, nempe triplum spatii 23025850929940-456240178700 in antecedente inventi, posito scilicet illo spatio numeri denarii logarithmo arbitrario; numeri 1024 ignoratur logarithmus, est enim compositus ex solo numero primo 2, nempe ejus decies multiplicatus est. applicentur hi numeri compositi in hyperbola, ut dictum est; sitque GH 1000, EF 1024: sed quoniam IK unitas est 10000000000000, erit GH 1000000000000000 & EF 1024000000000000, & per hujus 32 inveniatur spatium $EGHF$ 237165266173-160421183067 (seriem convergentem hic appono,

	Extra hyperbolam	Intra hyperbolam
2	237170824512628449899917	237162487062045867846886
4	237166655750699903737556	237164571388054419219371
8	237165613567087322970403	237165092476425954356426
16	237165353021613523599438	237165222748948181485250
32	237165287885271907848389	237165255317105572320456
64	237165271601188181041012	237165263459146597159038
	hyperbolæ sector intra sequentes terminos consistit	
	237165266173160272103220	237165266173160458453029

Sit inter hos terminos maximus quatuor continuè arithmeticè proportionalium 237165266173160421183067; qui proinde erit verus hyperbolæ sector in notarum numero proposito, quoniam primus triens notarum idem est in utroque termino convergente.

ET HYPERBOLÆ QUADRATURA.

457

- 13 123200 factus ex 7, 11, 25⁽²⁾ 5, 64⁽⁶⁾ 2.
123201 factus ex 169⁽²⁾ 13 & 729⁽⁶⁾ 3
- 17 2600 factus ex 13, 8⁽³⁾ 2 & 25⁽²⁾ 5
2601 factus ex 9⁽²⁾ 3 & 289⁽²⁾ 17
- 19 28899 factus ex 169⁽²⁾ 13, 9⁽²⁾ 3 & 19
28900 factus ex 100⁽²⁾ 10 & 289⁽²⁾ 17
- 23 25920 factus ex 10, 32⁽⁵⁾ 2 & 81⁽⁴⁾ 3.
25921 factus ex 49⁽²⁾ 7 & 529⁽²⁾ 23
- 29 613088 factus ex 17, 23, 32⁽⁵⁾ 2, & 49⁽²⁾ 7
613089 factus ex 729⁽⁶⁾ 3 & 841⁽²⁾ 29
- 31 116280 factus ex 10, 17, 19, 4⁽²⁾ 2, & 9⁽²⁾ 3
116281 factus ex 121⁽²⁾ 11 & 961⁽²⁾ 31
- 37 165648 factus ex 3, 7, 17, 29, & 16⁽⁴⁾ 2
165649 factus ex 121⁽²⁾ 11 & 1369⁽²⁾ 37
- 41 1413720 factus ex 7, 10, 11, 17, 4⁽²⁾ 2 & 27⁽³⁾ 3
1413721 factus ex 1681⁽²⁾ 41 & 841⁽²⁾ 29
- 43 978120 factus ex 10, 11, 13, 19, 4⁽²⁾ 2, 9⁽²⁾ 3
978121 factus ex 529⁽²⁾ 23 & 1849⁽²⁾ 43
- 47 664848 factus ex 7, 13, 32⁽⁵⁾ 2 & 729⁽⁶⁾ 3
664849 factus ex 961⁽²⁾ 31 & 2209⁽²⁾ 47
- 53 3059000 factus ex 7, 19, 23, 8, ⁽³⁾ 2, & 125⁽³⁾ 5
3059001 factus ex, 9⁽²⁾ 3, 121, ⁽²⁾ 11 & 2809⁽²⁾ 53
- 57 5851560 factus ex 3, 5, 13, 31, & 121⁽²⁾ 11
5851561 factus ex 1681⁽²⁾ 41 & 3481⁽²⁾ 59
- 61 3575880 factus ex 5, 7, 11, 43, 8⁽³⁾ 2 & 27⁽³⁾ 3
3575881 factus ex 961⁽²⁾ 31 & 3721⁽²⁾ 61
- 67 1620528 factus ex 3, 13, 16⁽⁴⁾ 2 & 49⁽²⁾ 7
1620529 factus ex 361⁽²⁾ 19 & 4489⁽²⁾ 67

711

- 71 2016399 factus ex 3, 11, 29, 43 & 49⁽²⁾ 7
 2016400 factus ex 16⁽⁴⁾ 2, 25⁽²⁾ 5 & 5041⁽²⁾ 71
- 73 5116644 factus ex 4⁽²⁾ 2, 9⁽²⁾ 3, 169⁽²⁾ 13, & 841⁽²⁾ 29
 5116645 factus ex 7, 17, 19, 31, 73
- 79 5997600 factus ex 17, 32⁽⁵⁾ 2, 9⁽²⁾ 3, 25⁽²⁾ 5 & 49⁽²⁾ 7
 5997601 factus ex 961⁽²⁾ 31 & 6241⁽²⁾ 79
- 83 1164240 factus ex 5, 11, 49⁽²⁾ 7, 16⁽⁴⁾ 2, 27⁽³⁾ 3
 1164241 factus ex 169⁽²⁾ 13 & 6889⁽²⁾ 83
- 89 2859480 factus ex 5, 47, 8⁽³⁾ 2, 169⁽²⁾ 13 & 9⁽²⁾ 3
 2859481 factus ex 361⁽²⁾ 19 & 7921⁽²⁾ 89
- 97 1138488 factus ex 3, 13, 41, 89, & 8⁽³⁾ 2
 1138489 factus ex 121⁽²⁾ 11 & 9409⁽²⁾ 97

Pro numeris primis inter 100 & 1000 fit hæc regula: ante numerum primum cujus logarithmus quæritur, sumantur immediatè duo numeri proximi, & post eum numerus immediatè sequens, qui tres numeri cum illo primo sunt quatuor numeri in suo naturali ordine se invicem sequentes; deinde multiplicetur primus numerus in cubum tertii & quartus in cubum secundi, eritque factorum differentia æqualis summæ primi & quarti vel secundi & tertii, ut facile demonstrari potest; istique numeri facti habent ad minimum sex notas primas omnino easdem, & proinde parum inter se differunt; atque omnium horum quatuor numerorum (excepto tertii) logarithmi cognoscuntur ex ipsa progrediendi methodo, & ideo ad nostram abbreviationem sunt idonei. in numeris ultra 1000 non opus est tanto apparatu, quoniam rectangulum numerorum, inter quos immediatè comprehenditur numerus primus cujus quæritur logarithmus, unitate solummodo deficit à quadrato numeri primi; eorumque ideo primæ sex notæ ad minimum sunt eadem; atque primi & tertii dantur logarithmi, & ideo ad nostrum institutum sunt idonei.

PROP. XXXIV. PROBLEMA.

*Ex dato logorithmo invenire ejus
numerum.*

Ex demonstratis manifestum est hoc problema idem esse TAB. XLIV.
fig. 1. ac si quis proponeret; ex dato spatio hyperbolico, & una recta uni asymptotorum parallela illud comprehendente, alteram invenire idem spatium comprehendentem, & eidem asymptoto parallelam. Consideretur ex quot notis arithmetice constet logorithmus denarii arbitrarius; & sumatur logorithmi vel spatii dati talis pars aliquota nempe spatium LIKM, ut pentagoni spatio LIKM regulariter circumscripti, & hexagoni eidem regulariter inscripti toties multiplicia, quoties spatium datum multiplex est spatii LIKM, concordent in tot notis arithmetice, quot continet radix quadrata logorithmi arbitrarii; hoc enim facile fieri potest ex inspectione tabellæ 32 hujus: datur ergo spatii LIKM mensura & recta IK unitas ex suppositione. Sit LM, z ; sicut in hujus 32 datur pentagonum spatio LIKM regulariter circumscriptum & hexagonum eidem regulariter inscriptum, inter quæ spatium datum LIKM est secundarum mediarum arithmetice continuè proportionalium; & ideo duplum hexagoni una cum pentagono æquatur triplo spatii, cujus æquationis resolutio manifestat ignotam z seu numerum LM, cujus toties multiplicatus, quoties spatium LIKM est submultiplex spatii vel logorithmi dati, est numerus quæsitus, quem invenire oportuit.

Hoc problema idem est cum hujus 8, sed aliter generalius & methodo plerumque minus operosa hic resolutum.

PROP. XXXV. PROBLEMA.

*Rectâ per datum punctum in diametro ductâ ,
semicirculum in ratione data dividere.*

TAB. XLIV.
fig. 2.

Sit semicirculus ADG , cujus diameter AG , centrum E , punctum in diametro datum B . supponatur factum quod jubetur; sitque recta BD semicirculum dividens in ratione data: quoniam datur semicirculi mensura & ratio in qua dividitur, igitur datur ejus portio nempe DBG . Sit recta BD , z : ex datis rectis BD , BE , ED , innotescunt triangula DEB , DEF , DEG : deinde sit ut DEF una cum DEG ad DEG ita duplum DEG ad trapezium circumscriptum $DEGH$: & positis primis terminis convergentibus DEG , $DEGH$ continuetur series convergens polygonorum complicatorum, secundum circuli proprietates læpius repetitas, donec conveniens fuerit approximationem adhibere ita ut exhibeatur sector DEG , qui una cum triangulo DBE æquatur portioni DBG cognitæ, cujus æquationis resolutio manifestat ignotam quantitatem z seu rectam BD : reliqua patent.

Idem problema eodem omnino modo resolvitur in ellipse, hyperbola vel earum sectore dato.

S C H O L I U M.

Si quis prædictorum problematum mechanicam desideret praxim; non difficile erit calculum, approximationem, & æquationis resolutionem secundum vulgatas Geometriæ practicæ regulas quodammodo imitari, multa talia problemata possem hic resolvere ope analysios & nostræ serierum convergentium doctrinæ, quæ antea impossibilia æstimabantur: sed dicet fortè aliquis has resolutiones non esse geometricas; respondeo, si per geometricum intelligatur praxis ope

ope solius regulæ & circini peracta, hanc in his non solum esse impossibilem sed etiam in omnibus problematis quæ ad æquationem quadraticam reduci non possunt, sicut facile demonstrari posset; & si per geometricum intelligatur reductio problematis ad æquationem analyticam, omnia hæc problemata sunt geometricè impossibilia, cum ex hic demonstratis, manifestum sit talem reductionem fieri non posse: si verò per geometricum intelligatur methodus omnium possibilibum simplicissima; invenietur fortasse post maturam considerationem omnia prædicta problemata esse geometricissime resoluta, diligenter animadvertendum totam serierum convergentium doctrinam posse etiam nullo negotio applicari seriebus simplicibus. Sit enim series A, B, C, D, E, &c. talis naturæ ut tertius terminus C eodem modo componatur ex primo & secundo A, B, quo quartus D componitur ex secundo & tertio B, C, & quintus E ex tertio & quarto C, D, & sic deinceps in infinitum; sitque differentia antecedentium A, B, major semper differentia immediatè sequentium B, C; supponamus hanc seriem ita in infinitum continuari donec duorum terminorum immediate se invicem sequentium nulla sit differentia, sitque unus ex illis terminis z , quem seriei terminationem appellamus: dico z eodem modo componi ex A & B quo ex B & C vel C & D; demonstratio vix differt ab hujus ro & ejus consecutario: hac ratione si ponatur triangulum, sectori circulari vel elliptico inscriptum, vel sectori hyperbolico circumscriptum a, & trapezium, sectori circulari vel elliptico regulariter inscriptum vel hyperbolico regulariter circumscriptum b; erit hexagonum sectori circulari vel elliptico regulariter inscriptum vel hyperbolico regulariter circumscriptum $Vq \frac{2 b_3}{a + b_3}$ & proinde sector circuli, ellipseos vel hyperbolæ eodem modo componitur ex a & b quo ex b & $Vq \frac{2 b_3}{a + b_3}$; atque hinc etiam demonstrari potest, quod ratio inter sectorem & ejus triangulum datum non sit analytica, secundum

tenorem hujus II: possem quoque adhuc alia methodo particulari demonstrare arcum circulare non habere rationem analyticam ad suam chordam datam: sed plura non addo, geometras interim pro scientiæ incremento admonens, me reperisse in quibusdam figuris (quas Cartesius secundi generis appellat) tres focos, seu tria puncta, à quibus ductarum in quodlibet curvæ punctum rectarum summa vel differentia semper est eadem: unde mihi verisimile videtur sicut omnis curvæ primi generis duos habent focos vel reales vel imaginarios, ita omnes secundi generis habere tres, omnes tertii quatuor, & sic in infinitum: quæ certè speculatio scrutatu dignissima est, esset enim admiranda figurarum geometricarum proprietas, & mechanicæ omnium æquationum praxi utilissima.

F I N I S.



I I.

HUGENII
OBSERVATIONES
IN LIBRUM
JACOBI GREGORII,
DE VERA CIRCULI ET HYPERBOLÆ
QUADRATURA.

D^{mus} Hugenius rogatus à Societate quæ Parisiis suos habebat conventus (1668) in Bibliotheca Regia, ut vellet hunc librum examinare, societati retulit se multos errores observasse in demonstratione, qua Auctor contendit impossibilitatem quadraturæ Circuli & Hyperboles probare.

I. in 11^a. Propositione, in qua auctor contendit Circuli quadraturam analytice impossibilem demonstrare, hæc habentur *Si terminatio magnitudinum propositarum analytice componatur a primis terminis $a^3 + a^2b + ab^2 + b^3$, componetur etiam analyticè. Et eodem omnino modo a secundis terminis $ba^2 + bba + 2.b^2a$. sed licet id verum sit quando terminatio inventa est per Methodum, quam indicat, non potest generalis inde deduci conclusio. nisi ponamus, non posse inveniri, nisi per ejus Methodum, terminationem seriei Magnitudinum, quas appellat convergentes, vel si aliâ methodo inveniatur illam etiam per suam methodum inveniri posse quod non demonstravit.*

II. Autor immediate post addit; *nullam quantitatem posse*
Mmm 31 eo

eodem modo analytice componi e terminis $a^3 + aab$, $abb + b^3$ quo componitur e terminis $aab + bba$, $2 bba$. Hæc nihilominus invenitur per eandem methodum quam indicat in 7. Propositione. Methodus autem hæc est. Primo quærenda est quantitas perquam si multiplices $a^3 + aab$, & producto addas productum $abb + b^3$ multiplicati per datam quantitatem m , summa æqualis sit summæ duorum aliorum productorum, unius $aab + bba$ multiplicati per eandem quantitatem quæsitam, alterius $2 bba$ multiplicati per datam quantitatem m . Ponamus igitur quantitatem illam æqualem z , erit $a^3 z + aabz + abbm + b^3 m = aabz + bba z + 2 bbam$; & $z = \frac{bbm}{aa + ab}$: Et certum est, sive multiplicetur $\frac{bbm}{aa + ab}$ per $a^3 + aab$ & addatur $abb + b^3$ multiplicatum per m , sive eadem illa quantitas multiplicetur per $aab + bba$ & addatur $2 bbam$, semper prodire eandem quantitatem $2 abbm + b^3 m$, & consequenter ultimam hanc quantitatem componi eodem modo e primis & secundis terminis progressionis convergentis propositæ, quod Autor fieri posse negavit.

III°. Datâ autem hac quantitate $2 abbm + bbbm$, si hac utamur ad quærendam terminationem progressionis propositæ, juxta methodum ab auctore indicatam in 7 propositione, & in 10, reperietur $= \frac{3 aab_3 + ab_4 + 2 a_3 bb}{bb + ab + aa}$; & posito $a = 1$ & $b = 2$, illa terminatio, quæ designat in eo casu sectorem circuli continentem $\frac{1}{3}$ totius circuli, erit $= \frac{48}{7}$; & primus terminus progressionis $a^3 + aab$, qui designat $\frac{1}{3}$ trianguli æquilateri inscripti in eodem Circulo, erit æqualis 3; ita ut proportio circuli ad triangulum æquilaterum inscriptum sit ut $\frac{48}{7}$ ad 3, id est 16 ad 7. a vero nihilominus omnes has proportiones aberrare facile patet.

IV°. Si examinemus, cur terminatio aliquando occurrat vera per methodum Autoris, ut in 7 Propositione, interdum verò non; reperiemus id ex eo oriri quod problema 10^m Pro-

Propositionis non bene sit solutum; Non enim sufficit, ut inveniatur terminatio progressionis convergentis, invenisse quantitatem compositam eodem modo e primis & secundis terminis; nam talis solutio tantum locum habet quando quantitas illa detegitur, non investigatâ quantitate quæ dicitur z in 7 Propositione; vel quum eadem quantitas non componitur ex ulla quantitate quæ datur in terminis progressionis, ut in 7^a. Propositione, ubi $z = \frac{me}{a}$; nam Autor sumendo $z = \frac{mae-mbe}{ad-bd}$ non videtur observasse, divisionem posse fieri per $a-b$.

In exemplo propositionis 10, non quæritur quantitas z , sed z appellatur ipsa terminatio; & in transitu notandum est exemplum illud allatum esse citra propositum nam progressio, cujus primi termini sunt a, b , & secundi & Vab , $\frac{aa}{Vab}$ non est progressio convergens, neque habet terminationem, quamvis autor illam inveniatur.

Quod attinet ad methodum, quam Autor proposuit ad appropinquandum per numeros ad dimensionem Circuli; D^{ns} Hugenius dixit sibi videri se quid magis accuratum dedisse in libro cui titulus est *de Circuli magnitudine*, edito 1654. Addidit illa, quæ Gregorius habet de dimensione Hyperbolæ & ratione quam habet cum Logarithmis, bona quidem esse sed minime nova membri societatis, cum possint recordari, se ipsis idem jam proposuisse, regulamque ad inveniendos logarithmos, jamdudum actis eorum insertam esse. Se etiam non credere illud novum videri regiæ societati Anglicanæ, cum qua jam ante plures annos communicavit methodum ad invenienda pondera aëris in diversis altitudinibus supra terram, quæ fundamentum in hac ipsâ Hyperbolæ dimensionem habet.

Hæc autem est methodus, quam D^{ns} Hugenius proposuit ad inveniendum per logarithmos dimensionem Spatii Hyperbolici contenti inter Curvam & unam ex Asymptotis & duas lineas paralelas ad alteram Asymptoton, data ratione quam
in-

inter se habent duæ hæ lineæ. Si logarithmus differentiæ logarithmorum horum numerorum semper addatur ad 0, 36221, 56868, summa erit logarithmus numeri partium, quas continet Spatium Hyperbolicum, illarum quarum 1.0000000000 continet parallelogrammum Hyperbolæ, id est illud, quod est contentum a duabus lineis ductis ex uno Hyperbolæ puncto, & quarum quævis parallela est uni ex Asymptotis; Exempli gratia si parallelæ, quæ includunt spatium Hyperbolicum sint inter se ut 36 ad 5 operatio hoc pacto fiet.

1, 5563025008 Logarithmus 36.


0, 6989700043 Logar. 5.

0, 8573324965. Differentia.

9, 9331492856 Logar. Differentiæ.

0, 36221 56868 Logar. qui semper additur.

10, 2953649724; Logar. cujus numerus facit contentum in Spatio Hyperbolico, quod hic est 1.9740810180.



III.

DOMINI GREGORII RESPONSUM

A D

ANIMADVERSIONES

DOMINI HUGENII,
IN EJUS LIBRUM, DE VERA CIRCULI
ET HYPERBOLÆ QUADRATURA.



Dea quæ dicit D. Hugenius contra meam Circ. & Hyperb. Quadraturam, ingenuè fateor (cum illa scriberem) me non animadvertisse exemplum in prop. 10. non esse seriem convergentem ex-
pe-

perientiam enim feci solummodo de primis & secundis terminis, non considerando tertios cum primis coincidere, nam ratiociniis insistebam, de exemplis parum sollicitus. Ut autem appareat in hoc nihil contineri contra nostram Doctrinam, agendum hoc loco 10: *prop.* totidem verbis, sed cum legitimo exemplo repetamus.

PROP. X. PROBLEMA.

Ex data quantitate eodem modo composita à duobus terminis convergentibus cujuscunque seriei convergentis, quo componitur ex terminis convergentibus ejusdem seriei immediate sequentibus; seriei propositæ terminationem invenire.

Sit series convergens, cujus duo termini convergentes quicunque sint a , b , & termini convergentes immediatè sequentes $\frac{2ab}{a+b}$, $\frac{a+b}{2}$, termini priores inter se multiplicati efficiunt eandem ab , item sequentes inter se multiplicati efficiunt eandem ab ; ex his invenienda sit propositæ seriei terminatio. Manifestum est, quantitatem ab eodem modo fieri à terminis convergentibus a , b , quo à terminis convergentibus immediatè sequentibus $\frac{2ab}{a+b}$, $\frac{a+b}{2}$; & quoniam quantitates a , b , indefinitè ponuntur pro quibuslibet totius seriei terminis convergentibus, evidens est, duos quoscunque terminos convergentes propositæ seriei inter se multiplicatos idem efficere productum, quod faciunt termini immediatè sequentes etiam inter se multiplicati; cumque duo termini convergentes duos terminos convergentes semper immediatè sequantur, manifestum est, duos quoscunque terminos convergentes inter se multiplicatos idem semper efficere productum, nempe ab ; atque ultimi termini convergentes sunt æquales, & proinde sit ultimus ille terminus, seu seriei terminatio Z , quæ in se ipsam multiplicata facit

$Z^2 = a b$; est igitur Z . seu seriei terminatio $r^2 a b$, quam invenire oportuit: & proinde ad inveniendam cujuscunque seriei convergentis terminationem opus est solummodo invenire quantitatem eodem modo compositam ex terminis convergentibus primis, quo componitur eadem quantitas ex terminis convergentibus secundis.

C O N S E C T A R I U M.

Quoniam non refert in Problemate, sive termini convergentes, a, b, sint primi, secundi vel tertii, &c. manifestum est, omnis seriei convergentis terminationem eodem modo esse compositam ex terminis convergentibus primis, quo ex secundis, tertiis, &c.

Si quis aliud Exemplum desideret, sint primi termini a, b ; secundi $r^7 a^5 b^2, r^2 a b$, quantitas eodem modo composita &c. est $a^7 b^4$ & seriei terminatio $r^{11} a^7 b^4$: videat *Hugenius*, duo exempla legitima hic adducta inquisitionem *Septimæ* non admittere; ope tamen *prop. decimæ* (supposita tertia illa quantitate) facilè resolvuntur, neque ullo modo consecutarium respuunt, quod solummodo esse momenti satis sit indicasse; plura autem exempla desideranti millena afferam.

Ad primam *Hugenii* objectionem quod spectat, miror eum non considerasse præcedens *consecutarium*, ubi illa, quæ desiderat, evidenter deduco ex *prop. 10*. At agnoscit hoc verum esse in illis seriebus, quæ ope nostræ methodi terminantur: velim certè ut assignet mihi Nobilissimus Vir seriem aliquam convergentem cum sua terminatione, quæ consecutarium nostrum respuat; vel si eam assignare non possit, solidam dubitandi rationem tantum desidero. Ut autem funditus evertatur hæc objectio, sequentem exhibeo demonstrationem Geometricam.

Sit

Sit A. Polygonum regulare sectori *inscriptum*. B eidem simile *circumscriptum*; continetur series convergens polygonorum &c. ut sit ejus terminatio seu circuli sector Z: sit X eodem modo composita à terminis C, D, quo Z à terminis A, B; dico Z & X esse indefinitè æquales; si non sint indefinitè æquales, sit inter illas indefinita differentia a , & continuetur series convergens in terminos convergentes I, K, ita ut eorum differentia sit minor quam a ; hoc enim absque dubio concipi potest, etiamsi hic omnes quantitates sint indefinitæ, quoniam definitis quantitatibus A, B, definitur etiam a , sed adhuc restat K-I quantitas indeterminata in infinitum decrescens. Manifestum est, *scilicet* Z esse indefinitè minorem quam K, & majorem quam I: item quoniam Z eodem modo componitur ex quantitatibus A, B, quo X. è quantitatibus C, D, & Z indefinitè minor est quam K & major quam I, patet ex Proprietatibus serierum convergentium, X etiam esse indefinitè majorem quàm I, & minorem quàm K (est enim revera indefinitè major quàm L & minor quam M) & proinde sunt quatuor quantitates indefinitæ, quarum maxima & minima sunt I, K, intermediæ autem Z & X, & ideo differentia extremarum K-I major est quàm a differentia mediarum, quod est absurdum, ponitur enim minor; quantitates ergò Z & X non sunt indefinitè inæquales, & ideo sunt indefinitè æquales, quod demonstrandum erat. Manifestum est hanc demonstrationem eodem modo applicabilem esse omni seriei convergenti.

In objectionibus 2, 3, & 4, contra suas ipsius imaginationes argumentatur *Hugenius*: Ego enim satis dilucidè affirmo in *Scholio proposit. 5.* & in *sine prop. 9.* Septimam & nonam propositionem esse Particularem, unamquamque suo casui; item in *Prop. decima* (quàm ergo pro generali substituo) evidenter suppono, & non quæro, illam quantitatem eo modo compositam ex primis, quo ex secundis terminis convergentibus; satis enim scio, talem methodum genera-

lem esse impossibile. Sed omnium maxime admiror, Clarissimum Virum non animadvertisse in 8. *definitione*, Quantitates C, D, E, compositionem ingredientibus, semper esse easdem, nempe definitas & invariabiles, ipsos autem terminos A, B; esse indefinitos & variabiles, nimirum in F, G, & infinitos alios: at quis est qui non videt *Hugenii*

$\frac{b^2 m}{a^2 + ba}$ non minus esse indefinitam, quam sunt ipsi termini?

Deinde in *Proœmio nostræ Geometriæ partis universalis*, sic dico. *Alii objiciunt contra prop. II. ita: si addatur a³ termino a³ + a²b & termino. ba² + b²a, enervetur vis utriusque demonstrationis. Respondeo, a³ esse quantitatem indefinitam, & alias quantitates indefinitas præter ipsos terminos convergentes compositionem non posse ingredi, quod analystam latere non potest: Eodem modo respondeo Hugenio*

nio $\frac{bbm}{a^2 + ab}$ esse quantitatem indefinitam, & ideo compositionem non posse ingredi: Si autem mihi objiciat, in *septima*

me credidisse, $\frac{mae - mbe}{ad - bd}$ fuisse quantitatem indefinitam; Re-

spondeo, etiamsi divisio per *a-b* à me satis inconsideratè neglecta sit, apertè tamen constat, me hoc cognovisse, ex diversitate methodorum, quibus utor in *septima* & *decima*, quippe illa *particulari*, in qua quantitatem illam quæro, & hac *generali*, in qua illam suppono; nulla enim alia ratio hujus diversitatis excogitari potest; quod etiam ex ipsis *septima* & *decima* est manifestum; cum appellem semper terminos convergentes quantitates indefinitas, hoc ipso satis significans, nullas alias quantitates indefinitas calculo inesse.

Semper credidi in rebus scientificis verba ita candidè esse explicanda (si modo possibile sit) ut discursus nullum includat absurdum; at *Hugenius* satis percipit, discursum nihil continere absurdi, modò nulla quantitas indefinita præter ipsos terminos compositionem ingrediatur; judicat tamen absque omni ratione, me contrarium existimasse; libenter enim optarem *Hugenium* assignasse locum, ubi assero, illam in-

qui-

quisitionem Septimæ esse universalem. Dico igitur & declaro me intelligere, nullam quantitatem indefinitam præter ipsos terminos convergentes compositionem posse ingredi. Atque ita corruunt tres ultimæ *Hugenii* sive diversæ objectiones, sive ejusdem portiones, nescio enim, quare in tot partes dividatur.

Præcedentibus perceptis, evidentissimum est, *Circuli*, *Ellipseos*, vel *Hyperbolæ* sectorem esse terminationem seriei convergentis, cujus primi termini $a^3 + a^2b$, $ab^2 + b^3$, & secundi $ba^2 + b^2a$, $2b^2a$ * & proinde Sectorem eodem modo componi ex primis terminis quo ex secundis *, atque evidens est, nullam dari quantitatem eodem modo analyticè compositam ex primis terminis quo ex secundis, quoniam primos eodem modo analyticè tractando quo secundos, semper restat altior potestas ipsius a in primorum producto, quam in producto secundorum; de hoc (si non credatur) fiat experientia, & constabit non solum assertionis veritas, sed etiam ejusdem demonstratio; quando autem altior est ejusdem potestas in una quantitate quàm in altera, nulla datur indefinita æquatio, de qua hic tantum loquimur, hoc est, ut (positis a , b , ad libitum,) æqualitas semper rite procedat. Atque hæc est summa non solum propositionis undecimæ sed etiam totius nostræ *Circ. & Hyp. Quadraturæ*, ab *Hugenio* adhuc intactæ. Gratias tamen ago nobilissimo viro, quod meas qualescunque lucubrationes examinare dignatus est, hinc enim mihi data est occasio illas fusius explicandi & confirmandi. Num *Hugeniana* methodus circulum mensurandi mea sit præcisior, experientiæ relinquo judicandum; quod autem nostra, *Hyperbolam quadrandi*, illi etiam innotuerat, de hoc nihil habeo quod dicam, nisi quod mihi gratuler, inventa mea ipso *Hugenio* non æstimari indigna.

* Schol. 5.

* Conf. 10.

IV.

EXCERPTA EX LITERIS

Dⁿⁱ. HUGENII

DE RESPONSO, QUOD

D^{nus}. GREGORIUSDEDIT AD EXAMEN LIBRI, CUI TITULUS EST,
VERA CIRCULI ET HYPERBOLÆ QUADRATURA.

In circuli quadraturam inquirentes Geometræ, varia & quidem pulcherrima detexere, ideo ne utili exercitio destituantur adversus Gregorium defendere constitui, quadraturam hanc detegi posse; neque huc usque responsionem hanc distulissem, nisi occasione controversiæ nostræ examen suscepissem exactissimum de proxima Circuli & Hyperboles Quadratura: in quo me interpellarunt sæpe alia impedimenta.

Dico nunc primo; Quod spectat impossibilitatem analyticam quadraturæ illarum figurarum, tantum abesse etiam post supplementum demonstrationum, quod D^{nus} Gregorius dedit, impossibilitatem hanc bene probatam esse, ut adhuc dum incertum maneat, num Circulus & quadratum diametri ejus sint incommensurabilia, id est an non horum ratio per numeros possit exprimi; quod etiam applicari potest portioni determinatæ Hyperboles & figuræ huic inscriptæ. Quod ut demonstremus sufficit observasse; quod xi ejus **Propositio** & supplementum nil probent quando in ejus serie convergente determinantur quantitates *a* & *b* per numeros rationales vel surdos; quoniam tunc terminatio etiam poterit esse numerus quidam similis; & contrarium per illam propositionem demonstrari non potest.

terit, quoniam tunc ignotum erit, quomodo terminatio composita sit ex primis & secundis terminis. E. G. Si a sit 1 & b , 2 quomodo probabitur per XI. ejus Propositionem, terminationem non esse $\frac{7}{3}$. Ut ergo concludatur, rationem Circu-

li. ad quadratum diametri ejus non esse analyticam, demonstrari non solum debet, quod sector Circuli non sit analyticus indefinite ad figuram suam inscriptam, licet illa demonstratio non careat suâ pulchritudine, sed quod illud etiam verum sit *in omni casu definito*.

Dico præterea, si quantitates a & b maneant indeterminatæ, terminationem forte reduci ad æquationem ex iis, quarum radices dari nequeunt; & contrarium probari per XI. ejus Propositionem, neque per Supplementum, non poterit, nihilominus si illa terminatio reducta sit ad quandam æquationem ejus naturæ, crederem Quadraturam Geometricè esse inventam per intersectionem quarundam linearum curvarum, quæ in Geometriâ admittuntur.

Non inhærebo in aliis objectionibus, quas proposui; Dicam tantum, has, sicuti locum amplius non habent post correctionem Dn. Gregorii, ita antea firmo fundamento nixas fuisse; quoniam ommissa divisione necessariâ per a & b in tot locis propositionis VII. poterat præsumi illum non novisse talem divisionem esse possibilem, & consequenter illum credidisse, in compositione de qua agitur indefinitas admitti debere quantitates.

Transeo igitur ad comparisonem nostrarum methodorum pro dimensione Circuli proxima: Certum est, primas ejus approximationes quarum fundamentum sunt ipsius propositiones XX, & XXI. easdem esse cum iis, quas dedi in tractatu *de Circuli magnitudine*; ubi demonstravi eadem illa Theoremata, scil. si Polygonum in Circulo inscriptum sit a ; & Polygonum simul circumscriptum sit d : contentum Circuli minus esse quam $\frac{1}{3}a + \frac{2}{3}d$ *, sed majus quam $\frac{1}{3}c$ -

$\frac{1}{3}a$ *, posito c pro Polygono inscripto quod duplo majorem habeat laterum numerum quam a vel d . Quidquid hic dico

&

* Vide supra
pag. 361.
pr. VI.
* Vide ibid.
prop. V.

& in sequentibus dicam de Circulo debet intelligi pariter de sectore Circuli.

Præter hanc approximationem D. Gregorius aliam proponit in fine suæ xxv Propositionis, quam admirandam dicit, cujus demonstrationem se ignorare fatetur; hæc est, inter duos terminos, statim memoratos $\frac{1}{3} a + \frac{2}{3} d$ & $\frac{4}{3} c - \frac{1}{3} a$, inventis quatuor mediis quantitatibus in proportionem Arithmetica, asserit maximam harum quantitarum adeo Circuli magnitudini vicinam esse, ut, si in numeris, qui designant Polygona similia a & d ; prima notarum triens sit eadem, error ad unitatem non pertingat.

Sed invenio hanc approximationem in Circulo veram non esse licet in Hyperbola locum habeat, &, dum in hac utimur maxima quatuor mediarum Arithmeticarum proportionalium, minimam pro approximatione Circuli adhibendam esse.

Ita minima quatuor mediarum proportionalium inter terminos dictos primæ approximationis erit $\frac{16c + 2d - 3a}{15}$, uti facile est videre per Calculum; & probare possum non solum experiëntiâ, sed & per demonstrationem quantitatem hanc, positis numeris quorum prima notarum triens eadem est, exprimentibus polygonis a & d , a vera Circuli magnitudine non aberrare nisi in duabus ultimis notis, & plerumque in omnibus notis & ulterius cum vera magnitudine conincidere, quam tamen semper superat, cum e contrario maxima quatuor Mediarum, qua utitur D^{us} Gregorius in Hyperbola deficiat.

Inveni præterea, approximationem hanc pro Circulo non æque accuratam esse, ac est illa quam dedi in Tractatu de *Circuli magnitudine*, juxta quam, quando a , c & d designant eadem Polygona, ac supra, terminus excedens contentum Circuli

* vide supra p. 383. in fine. est $a + \frac{10cc - 10aa}{6c + 9a}$ Neque demonstratio difficilis est, quoniam si neges illum terminum esse minorem ideoque magis exactum

Etum quam præcedentem $\frac{16c + 2d - 3a}{15}$, sequetur, cubum $c - a$ non fore majorem nihilo, & c non majorem quam a contra hypothesin, uti facile videre est per calculum analyticum, observando quod d sit $= \frac{cc}{a}$.

Possunt etiam a & c sumi pro circumferentiis Polygonorum inscriptorum, quorum unum subduplum laterum habet numerum; Et tum terminus $a + \frac{10cc - 10aa}{6c + 9a}$ est longitudo circumferentiæ Circuli, aut arcus sectoris parum admodum excedens, ut si notarum triens in a & c sit eadem, error dari non poterit nisi in ultima nota, & sæpius nequidem in quatuor vel quinque notis sequentibus ultra illas quæ dantur in numeris a vel c .

Sed & ut illi, qui contemplationes has negligunt, tamen quid commodi ex nostra controversiâ capiant, addam hic Geometricam constructionem ex ultimâ approximatione deductam qua invenitur longitudo arcus Circuli dati adeo acurata quam ad usum desideratur.


Sit arcus Circuli, qui non excedat semicircumferentiam ^{TAB. XLIV, fig. 3.} ABC , cujus subtenfa sit AC ; dividat hanc ut & arcum in duas partes æquales linea BD .

Ducta subtenfa AB sumantur ejus $\frac{2}{3}$ & ponantur ab A ad E in producta lineâ CD ; tum diminuta DE decimâ parte EF , ducatur FB , & tandem ipsi perpendicularis BG . Erit linea AG æqualis arcui AB , vel dupla linea æqualis arcui ABC , quæ tam parum excedet, ut tunc etiam, quum arcus erit æqualis semicircumferentiæ Circuli excessus non sit $\frac{1}{1400}$. longitudinis; sed si tantum sit $\frac{1}{3}$ circumferentiæ, differentia non erit

$\frac{1}{13000}$, si autem arcus tantum sit pars quarta circumferentiæ error non erit $\frac{1}{90000}$ longitudinis.

Possẽm hic addere approximationem & constructionem omnino similem pro quadratura Hyperboles, paulo magis accedentem ad veram quam media Arithmetica Dⁿⁱ. Grego-

rii, de qua superius dixi, sed vereretur, ne nimium hoc scriptum producerem, & certus sum præterea, post illa, quæ D^{us}. Mercator nuper feliciter invenit de illa quadratura, & correctionem Dⁿⁱ. Wallisii, inventa nostra hac de re parum esse consideranda.



V.

EXCERPTA EX EPISTOLA

D. JACOBI GREGORII,

CONTINENTE QUASDAM EJUS CONSIDERATIONES,
SUPER EPISTOLA

D. HUGENII,

IMPRESSA IN VINDICATIONEM EXAMINIS
SUI LIBRI, DE VERA CIRCULI ET HYPERBOLÆ QUADRATURA.



x duobus argumentis, quibus conatur Nob. D. *Hugenius* doctrinam meam evertere, primo quidem, responsionis fundamentum dedi in *Proem.* ad *Geometr. partem universalem*; alterum autem provenit solummodo à *Prop. II.* non recte, opinor, ab *Hugenio* intellecta, quam tandem admittit post correctiones (ut inquit) à me factas. Ut autem, simul cum resolutione Objectionum, omnem evertam dubitandi rationem, ex admissa *Prop. II.* in forma probare conabor Syllogistica, Nullam esse rationem analyticam inter Circulum & Diametri Quadratum: Præter Modum quippe & figuram nil deest in hætenus à me publicatis, quin

quin id integrè demonstretur; quæ interim forma rarò à Geometris exigitur. Dico itaque;

Si daretur ratio Analytica (seu ratio notis Analyticis exprimenda) inter Circulum & Diametri Quadratum, tunc Circulus analyticè componeretur ex Quadratis; inscripto & circumscripto. Sed posterius est absurdum E. Sequela Majoris sic probatur;

Quantitas quæsitæ & determinata invenitur ex quantitatibus quibuscunque eam determinantibus, in ea ratione, seu relatione, quam habet quantitas determinata ad dictas quantitates determinantes. Sed Quadratum inscriptum & circumscriptum Circulum determinat, idemque ex illis Circulus daretur in ea relatione, quam habet ad Diametri Quadratum vel ejus semissem, h. e. si esset ratio analytica inter Circulum & diametri Quadratum; Ex dictis quantitatibus determinantibus *analyticè* componeretur Circulus. Ex dictis enim quantitatibus omnia analyticè componi possunt, quæ ad ea rationem habent analyticam.

Secundi Syllogismi *Minor* est evidentissima. *Major* autem est axioma ab omnibus Geometris tacitè admissum.

Minor Syllogismi prioris sic probatur.

Eodem modo componitur Circulus ex Quadrato inscripto & circumscripto, quo componitur Quadrans Circuli ex Triangulo inscripto & Trapezio vel potius Quadrato circumscripto. Sed ex II. *Prop.* Quadrans Circuli seu sector non potest componi analyticè ex Triangulo inscripto & Quadrilatero circumscripto. E.

Major est evidens. At poterit fortassè distingui *Minor*, dicendo; *Prop.* II. veram esse in Methodo indefinita; sed posse esse falsam in methodis Particularibus. At insto. Omnis methodus indefinita in methodos seu casus Particulares est resolvable. Sed hæc methodus indefinita, nempe quod sector sit terminatio datæ serie convergentis, in nullam particulararem resolvi potest. Nulla igitur datûr hic methodus particularis. *Major* patet, quia quantitates æquales in se mutuo sunt resolvable. *Minorem* ita probo; Si hæc Methodus

indefinita resolvetur in aliquam particularem, resolutio fieret vel ab Analyfi *speciosa* vel *numerosa*. Sed neutrum dici potest. E. *Major* patet ex sufficiente enumeratione. *Minor* sic probatur: Non ab Analyfi *speciosa*, quoniam hæc Methodus *indefinita* ad eam est irreducibilis, ut patet ex Prop. II. Non à *Numerosa*, quæ hic est interminabilis, proindeque invariabilis.

In hanc ultimam distinctionem resolvitur 1. objectio *Hugenii*. Velim enim Nobiliss. Virum considerare, omnem plenam Problematis solutionem esse *indefinitam*. Nam Methodi *particulares*, cum sint *infinitæ*, exhiberi omnes nequeunt; neque dirigi possunt à tenore Problematis quippe illis omnibus communi: Ideoque requiritur Methodus *Generalis* seu Indefinita, Particularium directrix. Agnosco utique Methodos Particulares casu sæpe inveniri absque ope Generalis; attamen fatendum est Geometris, nullam esse; nec posse fieri Methodum Particularem, in quam resolubilis non sit Methodus indefinita. Si igitur Methodus Indefinita omni resolutioni sit impervia (ut in Prop. II. est demonstratum) eodem modo omnes Particulares resolutionem etiam respuent; proindeque tam Definita, quam Indefinita nullam compositionem agnoscit. Talis enim Compositio, qualis Resolutio.

Etiam si prædicta, meo quidem iudicio, adundè sufficiant, ne tamen ullus relinquatur cavillationi locus, II^{ma} nostram Prop. etiam in *Definitis* hic demonstrabimus. Sit ergò B Polygonum intra Circuli sectorem, 2 B Polygonum circumscriptum & priori simile; sufficit enim Polygonorum proportionem definire, ut Theorema definitè demonstretur. Continuetur series convergens ut sit ejus terminatio. B 2B
seu Circuli Sector Z. Dico, Z non posse com- C D
poni *analyticè* ex Polygonis *definitis* B, 2 B. Si E F
fieri potest, componatur Z Analytice ex Poly- G H
gonis Definitis B, 2 B. sintque duæ quantitates Z
Indefinitæ *a* & *x*, è quibus componatur *m* eo- *a* *x*

dem

dem modo, quo Z . componitur à quantitatibus B , $2B$; Item eodem modo componatur n ex quantitatibus Vax , $\frac{2ax}{a \uparrow Vax}$: quantitates m , n , non sunt indefinite æquales ex *prop.* 11. Si igitur inter m & n fingatur æquatio; a manente quantitate indefinita, æquatio inter m & n tot habebit radices seu quantitates, in quas resolvitur x , quot quantitarum, inter se diversas rationes habentium, binarii sunt in rerum natura, quæ vices quantitarum a , x , subire possunt, h. e. quæ eandem quantitatem *Analyticè* ex se ipsis componit eodem modo, quo eandem quantitas componitur ex ipsarum media Geometrica Vax , & ex media Harmonica inter dictam mediam Geometricam & x , nempe $\frac{2ax}{a \uparrow Vax}$, ita ut compositio sit eodem modo quo Z componitur ex B & $2B$, atque ex Consecutario *Prop.* 10. omnes quantitarum binarii, rationes quoque diversas inter se habentium, B $2B$, CD , EF , GH , &c. in infinitum, possunt supplere vices quantitarum a , x , quoniam Z eodem modo componitur ex B $2B$, quo ex CD , EF , vel GH , &c. & proinde æquatio inter m & n radices habet numero infinitas. Sed omnis æquatio habet ad summum tot radices, quot habet dimensiones; & proinde æquatio inter m & n dimensiones habet numero infinitas, quod est absurdum; ideoque Z seu Circuli Sector non potest analyticè componi ex Polygonis definitis B , $2B$. quod demonstrandum erat. Hinc manifestum est, Terminationem cujuslibet seriei convergentis, si non possit componi ex terminis convergentibus *indefinitè*, nec posse componi *definitè*; adeoque evanescit simul cum nostra distinctione Objectione *Hugenii* prima.

Idem in Objectione sua secunda non videtur advertisse, me non solum in *Prop.* 11. sed etiam in toto meo Tractatulo intelligere per Extractionem radicum, Resolutionem omnium potestatum sive purarum sive affectarum; omnium quippe eadem est ratio, neque ulla imaginabilis est in demonstratione diversitas, sive Sector supponatur Radix ali-

cujus potestatis puræ, sive affectæ ad puram irreducibilis. Nam si Sector eodem modo fiat ex primis terminis convergentibus, quo ex secundis (ut in *Consect. Prop. 10.* est demonstratum) etiam omnes ejus potestates sive puræ, sive quocunque modo affectæ eodem modo componitur è primis, quo è secundis terminis convergentibus, quæ (in Analyticis exhibitæ) erunt æquales quantitates eodem modo Analyticè compolitæ ex primis, quo ex secundis terminis convergentibus; quod est absurdum, nempe contra *Prop. 11.* admissam. Sensus igitur integer *Prop. 11.* est Hoc Problema (*E datis duobus polygonis complicatis, invenire Sectorem sive Circularem sive Hyperbolicum ab illis determinatum*) non potest reduci ad ullam æquationem Analyticam.

In comparatione *Hugeniana* inter nostras methodos, agnosco, meas approximationes *prop. 20. & 21.* easdem esse cum *Hugenianis*, sed methodo mihi peculiari demonstratas. At meam approximationem in fine *prop. 25.* non percipere videtur *Hugenius*; aliam interim sibi fingit: hanc primò meam non esse probat, deinde tamen eam cum sua comparat, victoriæque potitur. Sed lentè hic festinandum.

Sit *a* Polygonum, Circulo vel sectori inscriptum, *c* Polygonum inscriptum duplo plura habens latera, *d* autem sit Polygonum circumscriptum simile ipsi *c*. Ex 20. *prop.* Sector est major quam $\frac{4c-a}{3}$; & ex 21. Sector est minor quam

$\frac{2d+c}{3}$, inter quos terminos sit maximus quatuor continuè

proportionalium $\frac{8d+2c-a}{15}$, nempe nostra approximatior; quam rigidissimis *Hugenii* censuris subjicio. Hallucinatur autem *Hugenius*, quod Polygona *a* & *d* similia sumeret, cum debeant esse *c* & *d*, quæ duplò plura habent latera. Ne autem dicat, factam esse à me correctionem, consideret hanc approximationem non solum verbis *prop. 25.* sed & praxi *prop. 30.* esse consonam, ubi approximationem *prop. 21.* ex ultimis similibus Polygonis construo: ridiculum enim esset, illam è penultimis minus præcisam dare, cum eadem

opera detur magis præcisa ex ultimis. At miror, cum *Hugenius* incidisset in meam *Hyperbolæ* approximationem, quod eam non potuerit *Circulo* applicare; Nam in *Hyperbola* absque dubio 24. *prop.* approximationem ex ultimis similibus polygonis construxit: Omnis enim ad *Circulum* approximatō ex polygonis deducta, *Hyperbolæ* est etiam applicabilis, & vice versa. Sed hoc non videtur animadvertisse *Hugenius*; alioqui in fine suarum Animadversionum non promitteret talem Hyperbolicam approximationem, de cujus applicatione ad *Circulum* nihil dicit. Quæ autem illic affirmat (si de semet loquitur in plurali) transeant; si verò etiam de me adeo fidenter sibi persuadeat, falli ipsum putem, cum hæc eadem quadratura, de qua loquitur, antequam ab eo videretur, ad laboris dimidium à me sit reducta.

Ne autem *Hugenii* praxis geometrica minus peritis videatur nostram superasse, ex nostra approximatione, ab *Hugenio* rejecta, sequentem praxin exhibebo.

In fig. *Hugeniana* sit $AC = A$, $ABC = B$, sitque $A \dagger B : B :: 2B : C$; eritque $\frac{8C \dagger 8B - A}{15}$ major, quam arcus ABC ; differentia autem, in semi-circumferentia minor erit quàm ipsius $\frac{1}{3500}$, in triente minor quam ipsius $\frac{1}{49000}$, & in quadrante minor quam ipsius $\frac{1}{300000}$. Sed quoniam præcedens approximatō major est quàm arcus, aliam addamus eodem minorem. Sit $A : B :: B : D$; $\frac{12C \dagger 4B - D}{15}$ minor erit quam arcus ABC ; differentia autem in semi-circumferentia minor erit quam ipsius $\frac{1}{1000}$, & in quadrante minor quam ipsius $\frac{1}{60000}$, inter has approximationes sit maxima, penultima sex continuè Arithmeticè proportionalium, quæ minor erit quàm arcus, differentia autem in semi-circumferentia minor erit quam ejusdem $\frac{1}{13900}$, & in quadrante

mi-

minor quam ejusdem $\frac{1}{3000000}$. Sed hæc levia mihi videntur, cum possim Approximationes exhibere, quæ ab ipsa semi-circumferentia differant minori intervallo, quam quælibet ejus pars assignata, neque nobis amplius apparent hæc mirabilia, cum demonstratio solida innotescat. Ad reliqua ab *Hugenio* publicata, cum à meo instituto sint aliena, nihil dico, nisi quod ipsa Hugonii dicta (non obstante exactissima sua, ut ait, materiæ hujus examinatione) à meæ *Appendiculæ* factis ni fallor, longè superentur. Vale. *Decemb. 15. 1668.*

Figura *Hugonii* hæc est, quam ipse hoc sensu, licet Gallicè, sic explicat. Sit Arcus Circuli, qui non excedat semicircumferentiam, $A B C$, cujus subtenfa sit $A C$, & dividantur ambo in partes æquales per lineam $B D$. Ducta subtenfa $A B$, capias inde $\frac{2}{3}$, easque jungas inde ab A ad E in linea $C A$ protracta. Dein, resecta lineæ $D E$ parte decima $E F$, ducas $F B$, & tandem $B G$, ipsi perpendicularem: & habebis lineam $A G$ æqualem Arcui $A B C$, cujus excessus tantillus erit, ut etiam tunc, quando hic arcus æqualis erit semi-circumferentiæ Circuli, futura non sit differentia $\frac{1}{1400}$ suæ longitudinis; at quando non est nisi tertiæ partis circumferentiæ, differentia non erit $\frac{1}{13000}$; & si non sit nisi quartæ partis, non differet nisi $\frac{1}{90000}$, suæ longitudinis.

F I N I S.

CHRIS.

CHRISTIANI HUGENII
GEOMETRICA
V A R I A.

Tom. II.

Ppp

I.

CONSTRUCTIO LOCI AD HYPERBOLAM PER ASYMPTOTOS.

In æquatione loci ad hyperbolam, si neutra indeterminatarum linearum in seipsam ducta inveniatur, TAB. XLIV. fig. 4. 5. 6. 2. velut si sit $xy = bb$; vel $xy = cx.bb$; (literis x & y lineas indeterminatas AB , BC significantibus, quæ in dato angulo sibi mutuò sint applicatæ, quarumque altera, ut AB , positione data intelligitur, & in ea datum punctum A) constructio per asymptotorum inventionem faciliè absolvitur, ut ostensum est à *Fl. de Beaune* in Notis ad Geometriam Cartesii. Cum verò habetur xx vel yy in æquatione, vel utrumque nihilominus ad asymptotos rem deduci posse, & quidem brevius quàm ad diametri laterumque recti & transversi inventionem, ostendemus hoc modo.

Sit æquatio ejusmodi reducta, $y = l. \frac{nx}{z} \sqrt{mm.ox} + \frac{ppxx}{gg}$

semper enim ad hos terminos reduci potest, nempe ut y altera linearum indeterminatarum, quæ applicata est ad positionem datam, sola ab una parte æquationis habeatur, ab altera verò non plures termini quàm hîc inveniantur; nam sæpe pauciores etiam esse possunt, cum soli necessarii sint $+ \frac{ppxx}{gg}$ cum alterutro horum mm vel ox .

^{gg}Quum angulus ABC datus sit, ducatur per A punctum linea XY quæ sit rectæ BC parallela, & in ea accipiat AI æqualis l , idque ad partes BC , si habeatur $+ l$ in æquatione, in contrarias verò si habeatur $- l$, & agatur IK pa-

rallera AB. Si verò non habeatur omnino l , recta IK in AB incidere intelligenda est.

Deinde sicut x ad n , quæ ratio data, ita sit IK ad libitum sumpta, ad KL; quæ ipsi AI parallela ducenda est, sumendaque hoc pacto, ut puncta KL sita sint quo ordine AI, si habeatur $\dagger \frac{nx}{z}$, at contrà si habeatur $-\frac{nx}{z}$, & ducatur recta per IL; si verò desit $\frac{nx}{z}$, eadem est IL & IK.

Porro ut p ad g , ita sit $\frac{1}{2}o$ ad singulas IX, IY sumendas in recta AI; atque ita quoque IX ad IV sumendam in IK ad partes AB si habeatur $-ox$, aut in contrarias si habeatur $\dagger ox$; & sit VM parallela AI, occurratque rectæ IL in M: erit jam M centrum hyperbolæ quæsitæ; asymptoti vero, rectæ per MX, MY ductæ.

Si vero non habeatur ox in æquatione, erit I centrum hyperbolæ; sumptisque IX, IY ad libitum sed inter se æqualibus, inventisque inde punctis V & M, ut ante, ducentur asymptoti per I parallelæ ipsis MX, MY.

Jam porro si habeatur $\dagger mm$, puncta S & R, per quæ hyperbola vel oppositæ sectiones transire debent, invenientur sumendo in recta AI à puncto I, singulas IS, IR æquales m : unde jam hyperbola data erit ac describi poterit, in qua BC erit ordinatim applicata ad diametrum, si $\frac{1}{2}og$ ma-

jor quam m ; sin verò $\frac{1}{2}og$ minor quam m , erit BC parallela diametro hyperbolæ ad quam est C punctum, ut hic casu secundo. Quod si forte punctum S incidat in X, locus puncti C, erunt ipsæ asymptoti. Si verò non habeatur mm , erit ipsum I punctum in hyperbola quæsitæ.

At si habeatur $-mm$, accommodanda est intra angulum XMI recta GN parallela IX, quæque possit quadrata ab IX & IS, vel tantum ipsi IS æqualis, si non habeatur ox ;

ox ; eritque punctum N in hyperbola quaesita, quæ proinde rursus data erit.

Sumpta enim in casu primo $AB = x$ ad arbitrium, eique applicata $BC = y$ in angulo dato, quæ ad hyperbolam inventam terminetur, ostendendum sit quod

$$y = l - \frac{nx}{z} + \sqrt{mm - ox + \frac{ppxx}{gg}}$$

DEMONSTRATIO.

Occurrat BC utrinque si opus sit producta, asymptotis in O & Q. Ex constructione est IX vel IY = $\frac{\frac{1}{2}og}{p}$,

IV = $\frac{\frac{1}{2}ogg}{pp}$, Ratio verò data IK ad KL, eadem nempe quæ z ad n. Sed & angulus IKL datus est. Ergo & ratio IK ad IL, quæ sit ea quæ z ad a. Ergo quia ut IK

ad IL ita IV ad IM, erit IM = $\frac{\frac{1}{2}aogg}{zpp}$. Ut autem IM ad

IX, hoc est ut $\frac{\frac{1}{2}aogg}{zpp}$ ad $\frac{\frac{1}{2}go}{p}$, sive ut ag ad pz, ita ML,

sive MI minus IL, hoc est, $\frac{\frac{1}{2}aogg}{zpp} - \frac{ax}{z}$ ad LO vel LQ;

quæ itaque erit $\frac{\frac{1}{2}og}{p} - \frac{px}{g}$. Porro quia BK = l, & LK = $\frac{nx}{z}$,

erit BL = $l - \frac{nx}{z}$, quâ ablatâ à BC = y, fit LC = $y - l + \frac{nx}{z}$.

Propter hyperbolam verò erit rectangulum QCO æquale rectangulo YSX. Sed rectangulum QCO æquale est quadrato LO minus quadrato LC, hoc est quadrato ab

$\frac{\frac{1}{2}go}{p} - \frac{px}{g}$ minus quadrato ab $y - l + \frac{nx}{z}$: quorum quadra-

torum differentia est $\frac{\frac{1}{4}gg^{00}}{pp} - ox + \frac{ppxx}{gg} - yy + 2ly - ll$
 $+ \frac{2nxy}{z} + \frac{2lnx}{z} - \frac{nnxx}{zz}$. Ergo hæc æquatur rectangulo
 YSX, hoc est quadrato IX minus quadrato IS, hoc est
 $\frac{\frac{1}{4}gg^{00}}{pp} - mm$; quia $IX = \frac{\frac{1}{2}g^0}{p}$ & $IS = m$. In qua æqua-
 tione deleto utrinque $\frac{\frac{1}{4}gg^{00}}{pp}$, invenietur $y = l - \frac{nx}{z} +$
 $\sqrt{mm - ox + \frac{ppxx}{gg}}$, ut oportebat.

fig.

In Secundo casu rectangulum QCO æquatur quadrato
 LC minus quadrato LO; & rectangulum YSX quadrato
 IS minus quadrato IX. Unde rursus valor Y idem qui ca-
 su primo invenietur.

fig. 6.

Sit tertius casus quo habeatur $-mm$, sitque æquatio $y = l$
 $- \frac{nx}{z} + \sqrt{-mm + ox + \frac{ppxx}{gg}}$, producta GN. occurrat al-
 teri asymptoto in D. Hic jam eadem ratione qua prius, ap-
 parebit LO vel LQ esse $\frac{\frac{1}{2}g^0}{p} + \frac{px}{g}$, & $LC = y + \frac{nx}{z} - l$.
 Et propter hyperbolam erit rectangulum QCO = rectan-
 gulo DNG seu quadrato NG, hoc est $\frac{\frac{1}{4}gg^{00}}{pp} + mm$, quia
 $XI = \frac{\frac{1}{2}g^0}{p}$, & $IS = m$, quorum quadratis æquale fecimus
 quadratum GN. Rectangulum autem QCO æquatur qua-
 drato LO minus quadrato LC, hoc est $\frac{\frac{1}{4}gg^{00}}{pp} + ox + \frac{ppxx}{gg}$
 $- yy - \frac{2nxy}{z} - \frac{nnxx}{zz} + 2ly + \frac{2nlx}{z} - ll$. Ergo hoc
 æquale $\frac{\frac{1}{4}gg^{00}}{pp} + mm$. In qua æquatione deleto rursus utrin-
 que

que $\frac{\frac{1}{2}ggoo}{pp}$, invenitur $y = l - \frac{nx}{z} + \sqrt{mm + ox + \frac{ppxx}{gg}}$
 Eademque est demonstrandi ratio in casu quarto, & aliis fig. 7;
 quibusvis, habita ratione signorum + & -.

Cum non habetur $\frac{nx}{z}$ in æquatione, puncta M & V unum
 sunt, tunc vero si $p = g$, hoc est si habeatur + xx pro
 $\frac{ppxx}{gg}$, erunt semper asymptoti sibi mutuò ad angulos rectos,
 quia ut p ad g , ita fecimus $\frac{1}{2}o$ ad IX & ad IY, & ita IX
 ad IV; fiunt enim jam æquales IX, IY, IV, & singulæ =
 $\frac{1}{2}o$, unde punctum V est in semicirculo super XY & proin-
 de angulus XVY rectus. Item quia $IM = \frac{\frac{1}{2}aogg}{zpp}$, patet
 quod si $ag = zp$, hoc est si g ad p ut z ad a , tunc erit
 $IM = \frac{\frac{1}{2}og}{p}$, ac proinde æqualis ipsi IX & IY quæ etiam erant
 $\frac{\frac{1}{2}og}{p}$. Adeoque hoc casu erunt asymptoti sibi mutuo ad angu-
 los rectos; cum rursus punctum M sit futurum in circumfe-
 rentia circuli descripti super XY centro I.

DEMONSTRATIO

REGULÆ

DE








MAXIMIS ET MINIMIS.

Ad investiganda Maxima & Minima in Geometricis quæstionibus, regulam certam primus, quod sciam, Fermatius adhibuit: cujus originem ab ipso non traditam cum exquirerem, inveni simul quo pacto ea ipsa regula ad mirabilem brevitatem perducı possent, utque inde eadem illa existeret quam postea vir amplissimus Joh. Huddenius dederat, tanquam partem regulæ suæ generalioris atque elegantissimæ, quæ ab alio prorsus principio pendet. Hæc à Fr. Schoteno edita est unâ cum Cârtesianis de Geometria libris. Fermatianæ autem regulæ examen quod institui est hujusmodi.

TAB. XLV.
fig. 1.

Quoties Maximum aut Minimum in problemate aliquo determinandum proponitur, certum est utrinque æqualitatis casum existere: ut si data sit positione recta ED & puncta A , B , oporteatque invenire in ED punctum C , unde ductis CA , CB , quadrata earum simul sumpta, sint minima quæ esse possint; necesse est ab utraque parte puncti C , esse puncta G & F , à quibus ducendo rectas GA , GB ; FA , FB oriatur summa quadratorum GA , GB æqualis summæ quadratorum FA , FB , & utraque summa major quadratis CA , CB simul sumptis.

Ut igitur inveniam punctum C , unde ductis CA , CB fiat summa quadratorum ab ipsis omnium minima; ductis AE , BD perpendicularibus in ED , quarum AE dicatur a ; BD , b ; intervallum verò E, D , c : fingo primùm GF , differentiam dua-



duarum EG , EF æqualem datæ lineæ quæ vocetur e ; & quæro quanta futura sit EG , quam appello x , ut quadrata GA , GB simul sumpta æquantur quadratis FA , FB .

Itaque quia $AE = a$, & $EG = x$, erit quadratum $AG = aa + xx$. Et quia $GD = c - x$, & $DB = b$, erit quadratum $GB = bb + cc - 2cx + xx$, unde quadrata AG , GB simul sumpta fient $= aa + bb + cc - 2cx + 2xx$, qui dicantur termini priores; idque similiter in quovis alio problemate intelligendum, ubi maximum aut minimum inquiritur. Rursus autem quia $EF = x + e$, si ubique in summa quadratorum inventa substituam $x + e$ pro x , & quadratum ab $x + e$ pro xx , adque ita deinceps si altior potestas ipsius x reperiatur, certum est exorituram summam quadratorum FA , FB , quæ quidem erit $aa + bb + cc - 2cx - 2ce + 2xx + 4ex + 2ee$, æquanda summæ quadratorum AG , GB , dicantur autem hi termini posteriores.

Itaque erit $aa + bb + cc - 2cx + 2xx = aa + bb + cc - 2cx - 2ce + 2xx + 4ex + 2ee$. Ex qua æquatione prodibit valor EG five x , quando GF five e certæ magnitudinis lineam refert.

Ponendo autem e infinitè parvam, apparebit ex eadem æquatione quanta futura sit EG , cum ipsi EF æqualis est, adeoque habebitur determinatio quæsitæ puncti C , unde ductæ CA , CB faciant summam quadratorum minimam; nempe sublatis primùm, si quæ sunt, fractionibus, (quæ in hoc exemplo nullæ sunt) delentur termini qui utrinque idem habentur, quales sunt necessariò omnes quibus litera e admixta non est; idque facile est intelligere, cum dixerimus posteriores terminos ex prioribus describi, ponendo $x + e$ vel potestatem ejus, quoties invenitur x vel potestas ejus aliqua in prioribus. Deinde omnes termini per e dividuntur, quibusque post eam divisionem adhuc unum e aut plura inesse inveniuntur, ii delentur, quippe cum quantitates infinitè parvas contineant respectu cæterorum terminorum quibus nullum ampliùs inest e . Ex quibus denique solis invenitur quantitas x quæsitæ in casu determina-

tionis proposito; & hæc est ratio methodi Fermatianæ, quâ in compendium redactâ hanc aliam inveni, cujus partes duæ sunt. Nam primò,

„Quando termini, quos maximum aut minimum designa-
 „re volumus, nullam fractionem habent, in cujus deno-
 „minatore quantitas incognita quæsitâ continetur; multi-
 „plicandus est terminus quisque per numerum dimensionum,
 „quem in illo habet quantitas incognita, omiſſis terminis iis
 „in quibus incognita quantitas non reperitur; omniaque illa
 „producta æquanda nihilo.

Ita in exemplo proposito, ubi termini priores in-
 venti sunt $aa + bb + cc - 2cx + 2xx$, summam
 duorum quadratorum continentes, quam volo esse mi-
 nimam; tantummodo hujusmodi instituenda erit multipli-
 catio,

$$\frac{aa + bb + cc - 2cx + 2xx}{\begin{array}{cc} \text{I} & 2 \end{array}}$$

Ex qua orientur termini æquandi nihilo $- 2cx + 4xx = 0$;

$$\text{Unde fit} \quad \frac{1}{2}c = x.$$

Ita quoque si priores termini sint $3ax^3 - bx^3 - \frac{2bba^2}{2c}x + ab^2$,

multiplicatio erit hujusmodi $\frac{3}{3} \quad \frac{3}{3} \quad \frac{\text{I}}{\text{I}}$

$$\text{Unde termini æquandi nihilo} \quad 9ax^3 - 3bx^3 - \frac{2bba^2}{3c}x = 0$$

$$\frac{9axx - 3bxx - \frac{2bba^2}{3c}}{\quad} = 0.$$

Hujus compendii ratio ut intelligatur, sciendum primò,
 quoniam termini posteriores ex prioribus describuntur, po-
 nendo tantum ubique $x + e$ pro x , necessariò omnes ter-
 minos priores etiam in posterioribus reperiri; ideoque illos
 nihil

nihil opus esse describi, cum utrobique mox delendi forent, atque adeo illos tantum scribendos in quibus unum e vel plura insunt, ut in exemplo nostro $- 2ce + 4ex + 2ee$; eosque æquandos nihilo. Sed etiam illos quibus plura quam unum e inerunt, scribi frustra apparet, cum divisione facta per e delendos postea constet, ut paulò ante diximus. Itaque nulli præterea ab initio describendi inter terminos posteriores quam quibus inerit e simplex.

Hi autem termini ex terminis prioribus facillè deducuntur, cum constet nihil aliud esse quam secundos terminos potestatum ab $x + e$, quia cæteri omnes plura quam unum e vel nullum habent. Adeo ut ubicunque in prioribus terminis habetur x , scribendum sit in posterioribus e ; & ubi habetur xx in prioribus, ponendum $2ex$ in posterioribus; & ubi x^3 in prioribus, in posterioribus $3exx$, atque ita deinceps. Dicti autem termini secundi cujusque potestatis $x + e$ ex ipsa potestate x facillè describuntur mutando unum x in e , & præponendo numerum dimensionum ipsius x , ita enim ab xx fit $2ex$, & ab x^3 , $3exx$; atque in cæteris pari modo. Itaque ex terminis prioribus in quibus x , quos solos considerandos esse patuit, facillè etiam termini posteriores, ii quos nihilo adæquandos diximus, describuntur; multiplicando tantum singulos in numerum dimensionum quas in ipsis habet x . Nam mutare unum x in e ne quidem opus est, cum eodem redeat, sive omnes postea per e sive per x dividantur, & ex his quidem aperta est ratio compendii ad primam partem regulæ pertinentis: nunc ad alteram veniamus quæ est hujusmodi.

„Si termini quos maximum aut minimum designare volumus fractiones habeant in quarum denominatore occurrat quantitas incognita, delendæ primùm sunt quantitates cognitæ si quæ adsint; deinde si reliquæ quantitates non habeant eundem denominatorem, eò reducendæ sunt. Tunc termini singuli numeratorem fractionis constituentes, ducendi in terminos singulos denominatoris, productaque singula multipla sumenda secundum numerum quo dimen-

„fiones quantitatis incognitæ in termino numeratoris differ-
 „runt à dimensionibus ejusdem incognitæ quantitatis in ter-
 „mino denominatoris. Signa autem affectionis productis
 „singulis præponenda qualia lex multiplicationis exigit, quo-
 „ties dimensiones quantitatis incognitæ plures sunt in termi-
 „no numeratoris quam in termino denominatoris: at quo-
 „ties contra evenit, contraria quoque signa productis præ-
 „ponenda; quæ denique omnia æquanda nihilo.

Sint, exempli gratiâ, inventi termini priores, quos maxi-
 mum designare velimus, isti $\frac{bx^3 - ccxx - 2bccx}{bcc + x^3}$, ubi nul-

la est quantitas cognita. Hic ergo, secundum regulam, multi-
 plico terminos omnes numeratoris primum per bcc , prioris-
 que producti ex bx^3 in bcc , scribo triplum, quia bx^3 ha-
 bet tres dimensiones quantitatis incognitæ x , bcc verò
 nullam. Secundi producti ex $-ccxx$ in bcc scribo duplum,
 propterea quod in $-ccxx$ duæ sunt dimensiones x , & in
 bcc nulla. Tertium verò productum ex $-2bccx$ in bcc scri-
 bo simplex, quia in $-2bccx$ & bcc differentia dimensionum
 x est unitas. Tribus autem hisce productis vera signa af-
 fectionis adscribo, quoniam dimensiones x in terminis nu-
 meratoris excedunt eas quæ in termino bcc , quippe quæ
 nullæ sunt, ita ut tria hæc producta sint

$$3bbccx^3 - 2bc^4xx - 2bbc^4x.$$

Jam porrò terminos omnes eosdem numeratoris duco in x^3 ,
 terminum alterum denominatoris, primumque productum ex
 bx^3 in x^3 scribere omitto, sive per 0 multiplico, quoniam
 eadem dimensiones utrobique sunt ipsius x , ideoque diffe-
 rentia nulla. Secundum autem productum ex $-ccxx$ in
 x^3 scribo simplex, quia in his terminis differentia dimensio-
 num x est unitas. At tertium productum ex $-2bccx$ in
 x^3 scribo duplum, quia differentia dimensionum x in his est
 2. Signa verò affectionis productis hisce duobus adscribo
 contraria iis quæ requireret lex multiplicationis, eo quod di-
 men-

mensiones x pauciores sunt utrobique in terminis numerato-
 ris quam in x^3 , termino denominatoris.

Itaque producta bina erunt hæc $\dagger ccx^5 \dagger 4bccx^4$; quæ ad-
 dita tribus præcedentibus

$$\dagger 3bbccx^3 - 2bc^4xx - 2bbc^2x^4,$$

faciunt summam æquandam nihilo

$$ccx^5 \dagger 4bccx^4 \dagger 3bbccx^3 - 2bc^4xx - 2bbc^2x^4 = 0;$$

qua æquatione divisa per $ccbxx \dagger ccxx$, fit $x^3 \dagger 3bxx - 2bcc = 0$.

Quomodo autem ad hæc perventum sit uno exemplo rur-
 sus explicabimus, ex quo eandem in omnibus cæteris ratio-
 nem esse intelligetur. Videamus igitur priores terminos quos

modò proposueram, nempe $\frac{bx^3 - ccxx - 2bccx}{bcc \dagger x^3}$; ex qui-

bus si alios quibuscum eos comparem, ut initio factum est,
 describere velim, ponendo ubique $x \dagger e$ ubi est x ; video
 quidem primò omnes illos in posterioribus terminis posse ne-
 gligi in quibus plura quam unum e inerit, quia semper ex iis
 quantitates orientur in quibus plura uno e inerunt, quæque
 proinde delendæ tandem erunt, ob causam in superioribus
 traditam.

Itaque erunt termini priores æquandi posterioribus

$$bx^3 - ccxx - 2bccx,$$

$$\frac{bx^3 - ccxx - 2bccx}{bcc \dagger x^3} = \frac{\dagger 3bexx - 2ccex - 2bcce}{bcc \dagger x^3 \dagger 3exx}$$

qui nempe ex prioribus hac lege descripti sunt, ut ubicun-
 que est x vel potestas ejus in prioribus, ibi ponatur $x \dagger e$
 vel potestatis $x \dagger e$ duo priores termini; quoniam scimus
 in cæteris plura quam unum e contineri.

Jam verò porrò, quia termini in quibus nullum e in nu-
 meratore ac denominatore priorum ac posteriorum termi-
 norum, iidem planè reperiuntur, patet multiplicationes al-
 ternas eorum terminorum denominatoris in terminos nu-

meratoris partis alterius *e* carentes, omitti posse, cum quantitates inde ortæ eadem utrinque essent futuræ ideoque delendæ. Quare in terminis posterioribus ii tantum ab initio scribendi erant in quibus unum *e*, omissis omnibus reliquis, ut æquatio hîc futura sit ista

$$\frac{bx^3 - ccxx - 2bccx}{bcc + x^3} = \frac{3bexx - 2ccex - 2bce}{3exx}.$$

Hîc jam multiplicationes alternæ per denominatores instituendæ essent ad tollendas fractiones. Verum examinando diligentius quænam futura sint harum multiplicationum producta, aliud adhuc compendium inveniemus, & nec scribendos quidem omnino esse terminos posteriores: quia enim describuntur ex prioribus mutato *x* in *e*, præpositoque numero dimensionum ipsius *x*, non difficile est colligere ex solis terminis prioribus quænam futura sint ista omnia producta.

Ita quoniam propter $- ccxx$ in prioribus, habetur $- 2ccex$ in posterioribus; & propter x^3 in denominatore priorum, in posteriorum denominatore est $3exx$; facile perspicitur utraque producta ex $- ccxx$ in $3exx$ & ex $- 2ccex$ in x^3 , quæ sunt $- 3ccex^4$ & $- 2ccex^4$, easdem literas habitura, sed diversos numeros præpositos 3 & 2, idque inde fieri quòd in termino $ccxx$ unam dimensionem minus habeat *x* quam in termino x^3 . Itaque & auferendo postea ex utraque parte æquationis, $- 2ccex^4$, apparet superfuturum $- ccex^4$ à parte terminorum priorum. Quare ab initio hoc sciri potest, multiplicando tantum in terminis prioribus $- ccxx$ numeratoris in x^3 denominatoris, unumque *x* in *e* mutando, ac productum simplex scribendo; quia differentia dimensionum *x* in istis duobus terminis est unitas.

Eadem ratione producta ex $- 2bccx$ in $3exx$, & ex $- 2bce$ in x^3 , quæ easdem literas habent, sunt enim $- 6bccex^3$ & $- 2bccex^3$, habebunt numeros præpositos diver-

versos, propterea quod in $- 2bccx$ una tantum est dimensio x ; at in x^3 tres, unde ablato ex utraque parte æquationis $- 2bccex^3$, scio superfuturum à parte terminorum priorum $- 4bccex^3$: quod rursus ab initio cognosci potuit, quia eadem quantitas oritur, multiplicando $- 2bccx$ numeratoris terminorum priorum, in x^3 denominatoris, mutandoque unum x in e , & productum multiplicando per 2, quæ est differentia dimensionum x in terminis $- 2bccx$ & x^3 .

At quoniam in bx^3 & in x^3 eadem est dimensio x , sequetur producta ex bx^3 in $3exx$, & ex $3bexx$ in x^3 , tum literas easdem, tum eosdem numeros præpositos habitura, ideoque sese mutuo sublatura, ut proinde multiplicatio illa omitti possit.

Atque hujusmodi animadversionibus inventum est quod in regula præcipitur, terminos singulos numeratoris in singulos denominatoris terminos esse ducendos, productaque quælibet multipla sumenda secundum differentiam dimensionum quantitatis incognitæ in terminis binis qui in se mutuò ducuntur. Nam quod non præcipitur unum x in e mutandum, id hanc rationem habet, quod non referat utrum postea per e an per x omnes termini dividantur.

Quod vero si signa affectionis vera productis singulis præponenda dicuntur, quoties dimensiones x plures sunt in numeratore quam in denominatore, id quoque ex jam dictis intelligetur; uti consequenter etiam hoc quod contraria signa sunt adponenda, quoties dimensionum numerus contra se habet. Velut hîc, productum ex bx^3 in bcc scribendum est cum signo $-$ præposito numero 3, ut fiat $- 3bbccx^3$, quia nempe propter bx^3 scimus in posterioribus terminis fore $3bexx$; quod ductum in bcc faciet $+ 3bbccexx$, sed translatus in partem priorem æquationis, fiet $- 3bbccexx$; sive, non mutato x in e , $- 3bbccx^3$.

Quod denique in regula habetur, quoties in prioribus terminis priusquam ad eundem denominatorem reducantur, quantitates cognitæ occurrunt eas primum omnium delendas,


id

id ex hoc sequenti exemplo intelligetur rectè præcipi. Sint enim reperti termini priores, quos maximum aut minimum designare oporteat, isti $\frac{x^3}{2a - x} - 2vx + xx + vv$;

ubi vv quantitatem cognitam significet: id igitur delendum esse ut appareat, videamus quid futurum sit si non deleatur. Nempe ut ad eundem denominatorem cum cæteris omnibus reducatur, ducendum erit vv in $2a - x$, fietque

inde $\frac{2avv - xvv}{2a - x}$ in terminis prioribus. Propter quos in terminis posterioribus, secundum superius, explicata scribetur $\frac{-evv}{-e}$, adeoque multiplicatione alternatim utrinque per

denominatores instituta, ducendum erit hinc $2a - x$ in $-evv$; inde $-e$ in $2avv - xvv$. Ex quibus multiplicationibus eisdem utrinque terminos oriri necesse est, cum utrobique eadem hæc tria in se mutuo ducantur $2a - x$ in $-e$ in vv , qui proinde termini se se mutuo sublaturi essent, eoque frustra scriberentur; ac proinde liquet tuto deleri posse ab initio quantitatem vv , idemque quod in hoc exemplo accidit, necessario quoque in quibuslibet aliis contingere, diligenter intuenti manifestum erit.



III.

R E G U L A

Ad inveniendas Tangentes linearum curvarum.

Idem *Fermatius* linearum curvarum Tangentes regula sibi peculiari inquirebat, quam *Cartesius* suspicabatur non satis ipsum intelligere quo fundamento niteretur; ut ex epistolis ejus hac de re scriptis apparet. Sanè in *Fermatii* operibus post mortem editis, nec bene expositus est regulæ usus, nec demonstrationem ullam adjectam habet. *Cartesium* vero in his quas dixi literis, rationem ejus aliquatenus assecutum invenio, nec tamen tam perspicuè eam explicuisse quam
per

per hæc quæ nunc trademus fiet, quæ jam olim, multò ante istas literas vulgatas conscripsimus.

Præcipuum vero operæ pretium tunc fuit compendiosa hujusce regulæ contractio, quam, quoad potui, prosecutus, tandem in ipsas illas insignes Huddeni, Slusique regulas desinere inveni, quas mihi Viri hi Clarissimi uterque ferè eodem tempore exhibuerant: an vero hac eadem viâ an aliâ in illas inciderint nondum mihi compertum.

Sit data linea curva ut BC , quæ cognitam relationem habeat ad rectam aliquam positione datam AF ; ac proinde applicatâ è puncto quolibet curvæ, ut B , rectâ BF , in dato angulo BFA , datoque in recta AF puncto A , certa æquatione relatio quæ est inter AF & FB expressa habeatur. Exempli gratiâ, appellando AF , x ; FB , y , sit æquatio $x^3 = xya - y^3$, ubi a lineam quandam datam significare censenda est. TAB. XLV.
fig. 2.

Quod si jam ad punctum B tangens ducenda sit BE , quæ occurrat rectæ AF in E , voceturque FE , z , ejus longitudo per hanc regulam Fermatianæ regulæ compendiarium, invenietur, ex sola æquatione data.

Translatis terminis omnibus æquationis datæ ad unam æquationis partem, qui proinde æquales sunt nihilo, multiplicentur primò termini singuli, in quibus reperitur y , per numerum dimensionum quas in ipsis habet y , atque ea erit quantitas dividenda. Deinde similiter termini singuli in quibus x , multiplicentur per numerum dimensionum quas in ipsis habet x , & è singulis unum x tollatur; atque hæc quantitas pro diviso- re erit subscribenda quantitati dividendæ jam inventæ. Quo facto habebitur quantitas æqualis z sive FE . Signa autem $+$ & $-$ eadem ubique retinenda sunt; atque etiam si forte quantitas divisoris, vel dividenda, vel utraque minor nihilo sive negata sit, tamen tanquam adfirmatæ sunt considerandæ: hoc tantum observando, ut cum altera adfirmata est, altera negata, tunc FE sumatur versus punctum A , cum verò utraque vel adfirmata est vel negata, ut tunc sumatur FE in partem contrariam.

In curvâ proposita cujus æquatio $x^3 + y^3 - axy = 0$, fiet secundum hanc regulam dividenda quantitas $3y^3 - axy$, divisor verò $3xx - ay$; ideoque $z = \frac{3y^3 - axy}{3xx - ay}$, quæ est longitudo cognita, cum dentur x, y & a .

TAB. XLV.
fig. 3.

Esto item alia curva ABH, cujus æquatio $axx - x^3 - qgy = 0$, posito scilicet a & q esse lineas datas, AF vero $= x$, FB $= y$. Sit BE tangens, & FE dicatur ut ante, z . Hic fiet secundum regulam, dividenda quantitas $- qgy$; divisor autem $2ax - 3xx$; unde $z = \frac{- qgy}{2ax - 3xx}$ Ubi cum

dividenda quantitas sit negata, si fuerit etiam divisor minor nihilo, hoc est si $2a$ minor quam $3x$, erit z sive fe sumenda in partem ab A averfam. Si vero $2a$ major quam $3x$, sumenda erit FE versus A, ex præcepto regulæ.

TAB. XLV.
fig. 4.

Horum vero rationem, ipsiusque regulæ & compendii quò reducta est, originem ut explicemus, proponatur ut ante curva BC, ad cujus punctum B tangens ducenda sit.

Intelligatur primum recta EBD, quæ non tangat curvam sed eam secet in B, atque item in aliò puncto D, ipsi B proximo; rectæ autem AG occurrat in E; & ab utrisque punctis B, D ducantur ad rectam AG, iisdem angulis inclinatæ BF, DG; & sit AF $= x$, FB $= y$, sicut antea; ponaturque etiam FG data esse, quæ sit e , quæratunque FE $= z$.

Est itaque sicut EF ad FB, hoc est, sicut z ad y , ita EG, hoc est, $z + e$ ad GD; quæ erit $y + \frac{ey}{z}$; & hoc quidem in qualibet curva ita se habere manifestum est.

Nunc porrò consideretur æquatio naturam curvæ continens, ex. gr. illa superius proposita $x^3 + y^3 - xya = 0$, ubi a rectam longitudine datam, velut AH significabat; & patet, cum punctum D in curva ponatur, debere eodem modo

duas AG, GD, hoc est $x + e$ & $y + \frac{ey}{z}$ ad se mutuo referri

atque

atque AF, FB, hoc est x & y . Nempe si in æquatione proposita pro x substituatur ubique $x + e$, & pro y , ubique $y + \frac{ey}{z}$, debet æquatio hinc formata terminos omnes habere æquales nihilo; hoc est

$$x^3 + [3exx] + 3eex + e^3 + y^3 + \left[\frac{3ey^3}{z}\right] + \frac{3eey^3}{zz} + \frac{e^3y^3}{z^3} = 0.$$

$$- axy - [aey] - \left[\frac{aeyx}{z}\right] - \frac{aee y}{z}$$

In hac autem æquatione constat necessario terminos prioris æquationis, ex qua formata est, contineri debere, nempe $x^3 + y^3 - axy$: qui cum sint æquales nihilo ex proprietate curvæ, idcirco his in æquatione deletis, necesse est etiam reliquos nihilo æquari, in quibus singulis manifestum quoque est vel unum e vel plura reperiri, ideoque omnes per e dividi posse. Qui autem post hanc divisionem non amplius habebunt e , eos, neglectis reliquis, scio nihilo æquari debere, quantitatemque lineæ z sive FE ostensuros, si nempe BE jam tanquam tangens consideretur, ideoque FG, seu e , infinitè parva. Nam termini in quibus adhuc e superest, etiam quantitates infinite parvas sive omnino evanescentes continebunt. Et his quidem hætenus Fermatianæ regulæ origo ac ratio declaratur: nunc porro ostendemus quomodo eadem ad tantam brevitatem perducta sit. Video itaque ex æquatione totâ novissimâ, tantum eos terminos scribi neces-

se esse quibus inest e simplex, velut hic $3exx + \frac{3ey^3}{z} - aey - \frac{aeyx}{z} = 0$. Qui termini quomodo facili negotio ex datis æquationis terminis $x^3 + y^3 - axy = 0$, describi possint, deinceps explicandum. Et primò quidem apparet $3exx + \frac{3ey^3}{z}$ nihil aliud esse quam secundos terminos cuborum ab

$x + e$ & $ab y + \frac{e}{z}$ ideo scriptos quia in æquatione habentur cubi ab x & y . Nam reliqui omnes termini cuborum, ut & quarumvis aliarum potestatem ab $x + e$, & ab $y + \frac{ey}{z}$, vel plura quam unum e habent, vel nullum; ideoque, ut jam diximus, frustra scriberentur. Eâdem itaque ratione, si aliæ potestates ab x vel y essent in æquatione propositæ, scribendi forent in æquatione alterâ termini secundi tantum similia potestatum ab $x + e$ & ab $y + \frac{ey}{z}$. Notandumque secundos hosce terminos, ex ipsis datis potestatibus ab x & y , certa ratione confici; nempe ex potestate quavis x , velut x^3 , mutando unum x in e , & præponendo numerum dimensionum ipsius x : ita hîc fit $3exx$. Ex potestate y verò ducendo eam in $\frac{e}{z}$ præponendoque similiter numerum dimensionum ipsius y : ita hîc ab y^3 fit $\frac{3y^3e}{z}$. Quorum quidem rationem ex potestatum formatione intelligere facillimum est.

Porro propter xy in termino æquationis — axy , facile quoque apparet quid in æquatione secunda scribendum sit. Cum enim substituendum sit pro xy productum ab $x + e$ in $y + \frac{ey}{z}$, sed ea tantum scribenda in quibus unum e , ideo de duobus $x + e$ tantum e ducemus in y , & tantum x in $\frac{ey}{z}$; adeoque fient $ey + \frac{exy}{z}$; quibus in a ductis, præpositoque signo —, quia habetur — axy , existet — $ae y - \frac{aexy}{z}$, sicut suprà.

Sic

Sic quoque si in æquatione proposita haberetur $xxxy^3$; sumerem propter xx duos priores terminos quadrati ab $x + e$, nempe $xx + 2ex$; & propter y^3 duos priores terminos cubi ab $y + \frac{ey}{z}$, nempe $y^3 + \frac{3ey^3}{z}$; quorum productum pro $xxxy^3$ surrogandum. Sed etiam hîc de duobus $xx + 2ex$ tantum xx ducendum in $\frac{3ey^3}{z}$, tantumque $2ex$ in y^3 (nam cætera vel plura quàm unum e vel nullum haberent) adeo ut fiat $\frac{3exxy^3}{z} + 2exy^3$.

Atque ex his animadvertere licet, semper utrumque horum terminorum describi posse ex dato termino, qui hic $xxxy^3$, alterum quidem mutato uno x in e , & præponendo numerum dimensionum ipsius; ita enim fit $2exy^3$: alterum verò ducendo datum terminum in $\frac{e}{z}$, præponendoque simili-

ter numerum dimensionum ipsius y ; ita enim fit $\frac{3exxy^3}{z}$.

Cumque hac eadem immutatione, paulo ante, etiam secundos terminos potestatum ab $x + e$ & ab $y + \frac{ey}{z}$ ex potestatibus x & y æquationis datæ describi ostensum sit, manifestum jam est à singulis terminis æquationis datæ, in quibus x vel potestas ejus, describi prædicta methodo in secunda æquatione totidem terminos in quibus non est z ; à singulis verò in quibus y vel potestas ejus, describi totidem terminos, dicta etiam methodo, quarum fractionis denominator sit z ; nec alibi hanc literam in secunda æquatione repertum iri.

Hoc igitur cognito, quo pacto ex æquatione quavis proposita, velut hîc $x^3 + y^3 - axy = 0$, alia describenda sit, ut hîc $3exx + \frac{3ey^3}{z} - aey - \frac{aeyx}{z} = 0$, animadverto porro, si termi-

ni divisi per z ad alteram partem æquationis transferantur, ductisque omnibus in z , divisio deinde fiat per terminos in quibus initio non erat z , existere tunc ipsam quantitatem z ab una æquationis parte; uti hîc fiet $z = - \frac{3ey^3 + aeyx}{3exx - aey}$.

Atque hinc intelligo ad consequendam quantitatem z , ponendos tantum eos terminos æquationis secundæ, qui descripti sunt ex terminis æquationis primæ in quibus y , sublato tantum denominatore z , mutatisque signis $+$ & $-$. Deinde dividendo istos terminos per eos qui descripti sunt ex terminis æquationis primæ in quibus x . Porro ex omnibus, tam divisis quàm dividendis, patet rejici posse e , adeo ut in hoc

exemplo fiat $z = - \frac{y^3 3 + ayx}{3xx - ay}$. Itaque rejicitur $\frac{e}{z}$ ex

terminis qui descripti sunt ab iis qui habent y . Sic autem descriptos eos superius diximus ut ducerentur in idem

$\frac{e}{z}$, præponereturque numerus dimensionum y . Itaque nihil requiri apparet ad terminos hosce (quatenus ad definendam quantitatem z hic adhibentur) ex terminis æquationis primæ, in quibus y , describendos, quam ut præponamus tantum iis numerum dimensionum quas in ipsis habet y , signaque $+$ & $-$ invertamus. Sic nempe ab $y^3 - axy$, describetur $- 3y^3 + axy$. A terminis verò qui descripti sunt à terminis æquationis primæ in quibus x , cum tantum e hîc rejiciendum patuerit, cumque hos ita prius descriptos dixerimus ut unum x mutaretur in e , præponereturque numerus dimensionum ipsius x ; apparet eos, quatenus hic ad constituendum divisorum adhibentur, sic tantum describi opus esse ex terminis propositæ æquationis in quibus x , ut præponatur iis numerus dimensionum ipsius x , ac deinde unum x auferatur. Sic nempe ab $x^3 - axy$ describetur $3xx - axy$; & dempto ubique x uno, fiet $3xx - ay$. Atque ex his ratio regulæ ab initio positæ manifesta est. Nam quod signa $+$ & $-$ in terminis qui describuntur ab iis in quibus y , hîc immutanda diximus, in regulâ
verò

verò nulla omnino immutanda, id eodem redire liquet cùm quantitatem negatam, sive minorem nihilo, tanquam affirmatam considerandam ibi dixerimus. Ut autem ratio observationis ibidem adjectæ, in utram partem linea FE accipienda sit, intelligatur, repetemus figuram in principio positam, TAB. XLV. ubi vidimus AG esse $x + e$, EG vero $z + e$; unde fiebat GD fig. 5.

$+ y + \frac{ey}{z}$. Si autem tangens ab altera parte lineæ BF cadere

intelligatur, velut be , atque hæc primùm curvam secare fingatur, ut ibi factum est in d , ducaturque dg parallela bf ; fiet ponendo rursus $fg = e$, $fe = z$, ut Ag quidem fiat $x + e$,

sed eg erit $z - e$, unde $gd = y - \frac{ey}{z}$. Atque hinc porrò facile est perspicere æquationem secundam, quæ ex proposita æquatione, $x^3 + y^3 - axy = 0$ describitur, hoc casu fore

$3exx - \frac{3ey^3}{z} - aey + \frac{aeyx}{z} = 0$, termini ut nempe qui per

z dividuntur, habeant signa contraria iis quæ habebant in æquatione descripta casu priori, quæ erat $3exx +$

$\frac{3ey^3}{z} - aey - \frac{aeyx}{z}$. Ex hac verò priori sequitur, quando

quantitas $3exx - aey$, sive quando $3xx - ay$ (quæ divisorem constituit secundum regulam) fuerit minor nihilo, sive ne-

gata, tunc quantitatem reliquam $\frac{3ey^3}{z} - \frac{aeyx}{z}$; sive etiam

$3y^3 - ayx$ (quæ quantitatem dividendam secundum regulam constituit) esse affirmatam, aut cum illa est affirmata, hanc esse negatam; quia omnes simul æquationis termini æquantur ni-

hilo. At contra ex illa æquatione $3exx - \frac{3ey^3}{z} - aey +$

$\frac{aeyx}{z} = 0$, sequitur, quando quantitas $3exx - aey$, sive

$3xx - ay$, fuerit negata, tunc reliquam $-\frac{3ey^3}{z} + \frac{aeyx}{z}$,

sive

sive etiam $-3y^3 + ayx$ esse affirmatam, ac proinde $3y^3 - ayx$ esse negatam: aut quando $3xx - ay$ fuerit affirmata, tunc $-3y^3 + ayx$ esse negatam; ac proinde $3y^3 - ayx$ esse affirmatam. Per hæc itaque apparet ex quantitatibus per regulam in-

ventis, quæ erant $\frac{3y^3 - ayx}{3xx - ay} = z$ judicari posse ad utrum ca-

sum constructio tangentis pertineat; nempe excomperta dissimilitudine affectionis in divisore & dividendo, sequi ad priorem casum eam pertinere, hoc est z , sive FE, accipiendam esse versus A: ex similitudine vero eorum affectionis sequi ad contrariam partem sumendam.

TAB. XLV.
fig. 6.







Potest autem quantitas z sive FE per regulam inventa, nonnunquam ad simpliciores terminos reduci ope æquationis datæ, quæ naturam curvæ continet: velut in hac curva AC, axem habente AD, verticem A, cujusque ea est proprietas ut, si à puncto C in eâ sumpta, applicetur ordinatim CD, fiat productum ex cubo BD (est autem B punctum in axe extra curvam datam) in quadratum DA æquale cubo quadrato DC. Sive ponendo BA = a , BD = x , DC = y , fiat æquatio curvæ naturam continens, ista $x^5 - 2ax^4 + aax^3 - y^5 = 0$. Hic ponendo CG esse tangentem, quæ occurrat axi in G, vocandoque GD, z , fit secundum regulam $z = \frac{-5y^5}{5x^4 - 8ax^3 + 3aaxx}$.


Quia autem ex datâ æquatione est $y^5 = x^5 - 2ax^4 + aax^3$, restituyendo pro $5y$ id quod ipsi æquale est, fiet $z = \frac{-5x^5 + 10ax^4 - 5aax^3}{5x^4 - 8ax^3 + 3aaxx}$; sive dividendo per xx , erit $z = \frac{-5x^3 + 10aax - 5aax}{5xx - 8ax + 3aa}$. Et rursus, dividendo hanc fractionem

per $x - a$, habebitur $z = \frac{-5xx + 5ax}{5x - 3a}$. Quod significat

faciendum ut sicut BD quinquies sumpta minus BA ter, sive ut BA bis unâ cum AD quinquies ad AD quinquies, ita BD ad DG; atque ita GC tacturam in C curvam AC.

IV.





IV.

CHRISTIANI HUGENII
EPISTOLA

D E

CURVIS QUIBUSDAM PECULIARIBUS.

Mitto tibi constructionem Problematis, quod sine dubio Geometris placebit, si id cum ipsis communicare velis, cum pulcherrimum sit, & singulæ quædam contineat: accepi hoc a Marchione de l'Hospital, quem ex specimine hoc & variis aliis, inter summos nostri ævi Geometras referendum puto. Hac etiam occasione ad te mitto quasdam ex posterioribus, super rebus fere similibus, contemplationibus nostris.

Problema March. est; Invenire lineam rectam æqualem datæ portioni lineæ logarithmicæ. Ut hujus inveniat solutionem, sagaciter utitur *Calculo differentiali* celeberrimi Leibnitii, & reducit problema ad quadraturam curvæ, cujus æquatio est, $a^6 = aaxxy + y^4xx$; positis x & y indeterminatis, quæ angulum rectum efficiunt; Hanc quadraturam ostendit dependere à quadraturâ Hyperboles; quæ datur, ut notum est, positâ logarithmicâ descriptâ; constructio autem huc redit. Sit logarithmica indefinita ACD , a-TAB. XLVI. symptos LO , subtangens constans data a , & portio curvæ^{fig. I.} sit CD , cui æqualem rectam invenire oportet.

Duc DL , CO perpendiculares ad asymptoton, CE perpendicularem ad DL , & fac LT in asymptoto æqualem subtangenti a , & ductis rectis TD , TE , fiat $TV = TD$ & $TI = TE$:

Tom. II.

Sff

$\equiv TE$: tunc jungere VD , ductâque ipsi parallelâ IK , e puncto K , ubi occurrit ipsi DL , duc parallelam asymptoto KA , secantem DV in F , CO in X , & Logarithmicam in A . Tum rectæ AX & FK simul sumtæ erunt æquales curvæ CD .

Solutio hujus Problematis, prout ego invenio, potest etiam reduci ad quadraturam curvæ, cujus Æquatio est $a^4 = xxyy - aayy$, quæ, ut & altera, dependet à quadratura Hyperboles, uti possem satis facile demonstrare; sed constructio à modo descripta non differt.

TAB. XLVI.
fig. 2.

Nescio, an multæ lineæ curvæ hanc habeant proprietatem ut ipsarum longitudines per ipsas curvas mensurari queant; interim ecce unam, quam haud ita pridem inveni, dignam, ut videbis, quæ & ob alia etiam notetur; Est curva $AXKO$ extensa in infinitum secundum rectam DN , quæ est ejus asymptos, ad quam AD , tangens ad verticem A , insistit perpendicularis; curvæ princeps & simplicissima proprietas est, ut omnis tangens inter punctum contactus & asymptoton, ut KN , sit æqualis lineæ AD ; curva pariter extenditur ad alteram partem hujus perpendicularis AD . Ut invenias rectam lineam æqualem portioni hujus curvæ datæ a vertice A , ut AK (sic enim invenies alias portiones quascunque) duc KP perpendicularem ad AD , & descripto arcu circuli PQ , qui habeat centrum D & radium DP , quære in AB parallelâ Asymptoto punctum B , quod sit centrum circumferentiæ circuli, quæ transit per A & tangit arcum PQ , quod facile est; porro ductâ rectâ BD , sume in illâ $DY = DA$, & e puncto Y duc parallelam Asymptoto usque ad curvam in X , tunc YX erit æqualis curvæ AK ; Et natura hujus lineæ talis est, ut si sumas tot proportionales quot volueris, in recta AD , incipiendo a D , ut DS , DI , DP & ducas applicatas SR , IO , PK : partes interceptæ curvæ, ut RO , OK , omnes sint æquales.

Ad quadraturam Hyperboles quoque inservit curvâ hæc; nam eadem recta YX facit cum AD rectangulum æquale spatio Hyperbolico $ADEV$, terminato lineis AD , EV perpendicu-

dicularibus ad FDE, unam ex Asymptotis, & quæ sunt inter se in ratione AD ad DP, si Hyperbola AV sit æquilatera & quadratum ejus ad angulum Asymptoton sit ADFH; unde reciproce patet, quomodo queant & inveniri puncta hujus curvæ positâ quadraturâ Hyperboles.

Habet illa adhuc alias notabiles affectiones, quales sunt, quod spatium infinitum, inter curvam, Asymptoton, & rectam

AD, sit æquale $\frac{1}{4}$ circuli cujus radius est AD: quod soli-

dum infinitum, quod producit hoc spatium rotando cir-

ca Asymptoton, sit æquale $\frac{1}{4}$ sphæræ ejusdem radii; quod

superficies ejus solidi infiniti, sine basi, sit æqualis circulo, cujus radius est diagonalis quadrati ex AD.

Non autem propter ea qua huc usque proposui de hac curva hic egi, sed quia simplici Machinâ describi potest, quo reducitur Hyperbola ad quadratum, quod mihi visum est Geometrarum consideratione dignum.

Constructio Machinæ nititur in dictâ Tangentis proprietate & principio vel lege motus; scilicet, si in plano horizontali detur punctum, quod suo pondere vel alio modo aliquantulum resistit, junctum extremitati fili vel vectis inflexilis, cujus altera extremitas movetur, punctum illud describet curvam, cujus Tangens semper erit filum vel vectis. In instrumento vel machinâ, de qua dixi, movenda est extremitas D fili vel vectis DA juxta lineam rectam DN, & cavendum ut cuspis in extremitate altera A hærens erecta maneat dum interim premetur in planum horizontale, potius elaterio quam pondere, quoniam sic curva AK describitur sine errore sensibili, licet planum non sit exacte horizontale; Et detegitur, an habeat veram figuram reducendo extremitatem vectis N per eandem rectam ND; quoniam requiritur, ut cuspis regrediatur ex K in A, per eandem viam.

Si hæc descriptio, quæ per leges Mechanicæ est acurata posset haberi pro Geometricâ, eodem modo ut de-

scriptiones sectionum Conicarum, quæ fiunt per instrumenta, haberemus inde & quadraturam Hyperboles & perfectam constructionem omnium Problematum, quæ ad hanc quadraturam reducuntur; ut inter alia sunt, determinatio punctorum *Catenariæ*, & logarithmi. Si enim BY sit $= AC$, quæ sumitur in axe *Catenariæ*, id est $DB = DC$ applicata ejus CG erit $= YX$; & eadem quoque YX est logarithmus rationis quam habet AD ad PD ; id est, æqualis est distantia duarum linearum AD, PD , vel aliarum duarum quarumcunque, quæ eandem habent rationem, ordinarum perpendicularium ad Asymptoton lineæ logarithmicæ, quæ habet DA pro Subtangente universali, unde possunt inveniri logarithmi tabularum, prout demonstravi in additione ad *dissertationem de causa gravitatis*. Leibnitius, qui primus initium fecit reductionis curvæ *Catenariæ* ad leges Geometriæ, ipsam illam lineam ope veræ *Catenæ* tenuissimæ formatam, dixit inferre posse inventioni logarithmorum, vel quadraturæ Hyperboles; licet ad id cognita requiratur (ut quidem ipse noverat) longitudo rectæ, quam vocat curvæ Parametrum, cujus inventionem non demonstrat. Ita ut nostra quadratrix in his usibus præferenda videatur, quia post descriptionem Parameter ejus, quæ est universalis ejus Tangens, datur.

Sed quoniam hæc materia me perduxit ad considerationem *Catenariæ* quæ elegantissimis hujus temporis Geometrarum inquisitionibus occasionem præbuit, libet hic addere quam inveni peculiarem satis methodum qua hæc delineatur curva, quod est omnium difficillimum inter ea quæ de hac sibi inquirenda proposuere Mathematici. Inter illa, quæ inferenda dedi in actis Lipsiensibus cum pulcris & eruditis Leibnitii & Bernoullii inventis, dixi, me reduxisse constructionem vel inventionem punctorum hujus lineæ ad quadraturam curvæ, cujus æquatio est $a^4 = aaxx + yyxx$ *; & me cognovisse, hanc quadraturam dependere à cognitione summæ secantium arcuum circuli, quæ æqualiter crescerent *per minima*; quæ summa jam dudum reducta fuerat ad quadraturam

* Vide supra
pag. 292.

ram Hyperboles per Jac. Gregorium in exercitationibus suis Geometricis; ubi inde deducit solutionem problematis longitudinum, datis vento & latitudinum differentiâ, quod novum credidit Leibnitius, & quod à Gregorio traditum tunc temporis non recordabar. Leibnitius & Bernoullius, ut cenſeo, pervenerunt ad Catenariæ Conſtructionem ope Curvæ, quam poſterior illorum habet in 1^e. Figurarum quas exhibet ad ſolvendum hoc Problema; nam Leibnitius mihi ſcripſit, ſe etiam ad eandem perveniſſe; Et invenio eandem cum illâ de qua ante, cujus æquatio eſt $a^4 = xxxy - aayy$, cujus quadratura, ut dixi, dependet à quadraturâ Hyperboles: licet nondum concipere potuerim, quomodo calculus illos perduxerit ad hanc lineam. Sed tranſeo ad meam conſtructionem, quæ abſque conſideratione aliûs lineæ curvæ, dat puncta Catenariæ per dimensionem lineæ Parabolicæ.

Primum fundamentum totius inquisitionis reſpectu hujus lineæ eſt hoc; Si habeas catenam compoſitam ex variis ponderibus æqualibus filo appenſis, ut BCDEF ſemper trium interſtitiorum ſe mutuo ſequentium duæ lineæ extremæ, ut CD, FE continuatæ ſibi mutuo occurrunt in linea IH perpendiculari ad Horizontem, quæ dividit interſtitium medium in duas partes æquales. Conſiderando porro catenam ita compoſitam à ponderibus connexis ad æquales diſtantias, quas ponimus infinite exiguas, & diſpoſitis, ita, ut interſtitium infimum BC ſit horizonti parallelum, ſi ſuper quovis alio interſtitio concipiamus triangula rectangula CDK, DEL, quorum unum latus ſit horizontale, videbimus, quod ab infimo initium faciendo anguli DCK, EDL, FEM, tales ſint, ut illorum Tangentes æqualiter creſcant, ut numeri 1, 2, 3, 4, id quod demonſtratu facile eſt ex dicto principio, licet forſitan eo non perveniſſemus ſine calculo Algebraico.

Si porro concipiamus partes æquales catenæ CDEFG extenſas in recta horizontali in COPQR, & ex prima diſiſione O ductam OS, quæ concurrat cum perpendiculari CS,

S ſi 3

ita

TAB. XLVL
fig. 3.

ita ut angulus COS sit æqualis angulo CDO , si deinde ducantur aliæ rectæ SP, SQ, SR ; triangula SCO, SCP, SCQ, SCR erunt necessario similia COD, DLE, EMF, FNG , quoniam SCO est simile ipsi COD per constructionem, & aliorum CSP, CSQ &c. tangentes æqualiter crescunt.

Si porro ducas CT, OV, PX &c. perpendiculares ad SO, SP, SQ evidens est, triangula CTO, OVP, PXQ &c. æqualia esse & similia triangulis COD, DLE, EMF &c. eodem ordine sumendo: unde concluditur, si spatia CD, DE &c. sint infinite parva, ut & partes CO, OP &c., id est si CG sit curva catenæ, & CR æqualis ejus longitudini, tum summa TO, VP, XQ &c. erit æqualis summæ perpendicularem KD, LE, MF &c. id est rectæ $G\Sigma$ vel axi ϕC (nam spatium BC tum pro nihilo habetur) & summa CT, OV, PX erit æqualis summæ CK, DL, EM &c. id est applicatæ $G\phi$.

Describendo autem centro S arcum CZ usque ad ultimam secantium SR facile patet, summam infinite parvarum TO, VP, XQ æqualem esse rectæ ZR ; consequenter, si ponamus quod $SC\phi$ sit axis Catenæ, & linea CS certæ longitudinis, & quod $C\phi$ sit æqualis ZR excessui secantis cujusvis SR supra radium SC , & quod applicata ϕG sit æqualis summæ omnium CT, OV, PX &c. usque ad illam, quæ cadit in SR , punctum G erit in curva catenæ, cujus longitudo CG erit æqualis rectæ CR : sed quæritur summa infinitarum CT, OV, PX &c. quam obtineo hâc consideratione, quod anguli SOV, SPX, SQY possint haberi pro rectis, utpote quorum differentia cum recto est infinite exigua, & quod tum lineæ OV, PX , productæ utrinque, ut & $R\Omega$ perpendicularis ad SR , fiant tangentes Parabolæ $C\Omega$, cujus vertex est C , axis CS , focus S , & in qua SC est pars quarta Parametri; quarum tangentium quævis secatur in duas partes æqualiter per CR , ita ut una dimidia pars pertingat ad axem, altera ad punctum contactus, sic $\Delta\Omega$ secta est in R , quæ facile demonstrantur. Hinc porro intelligo ex E-

volu-

volutione linearum curvarum, de qua locutus sum in *Horologio oscillatorio*, quod summa omnium QY, PX, OV, CT , debeat esse æqualis excessui curvæ Parabolicæ ΩC supra rectam ΩR ; id quod Geometræ satis facile intelligent, licet in demonstrando non inhæream, quum non constituerim hic demonstrationes scribere, sed tantum indicare viam, quâ ad inventionem pervenis.

Data ergo Catenariæ Parametro SC , si sumas in axe punctum quodcunque Φ , & centro S radio $S\Phi$ describas arcum circuli, qui secat CR tangentem ad verticem in R ; tangente $R\Omega$ ductâ ad Parabolam dictam e puncto R , & subtractâ hac ex longitudine curvæ suæ $C\Omega$ quam ponimus posse mensurari, quod reliquum est, erit recta applicata ΦG , & sic per eandem Parabolam invenes tot puncta in illâ curvâ, quot volueris; nisi hanc constructionem ad Leibnitium initio Septembris 1691.

Potest porro in transitu notari, quod curva GC (sumendo semper numerum interstitiorum infinitum, & ideo punctum C ac si foret in axe & vertex) erit æqualis rectæ CR ; & quod dimensio spatii curvi quoque facile demonstretur, perficiendo rectangulum $RCS\Theta$ & producendo perpendiculares GN, FM &c. usque ad $S\Theta$ in Λ, r &c.: patet enim triangulum SQY esse semissem rectanguli $F\Lambda$, basin & altitudinem eandem habentis, & pariter triangulum SPX semissem rectanguli Er & sic porro de aliis. Et consequenter triangulum SCR æquale dimidio spatii $SCGA$. Possem ita paucis demonstrare fundamenta omnium quæ de hac lineâ curvâ detecta sunt; sed hæc spectant ad Leibnitium & Bernoullium, utpote hujus inventionis magis participes, quos rogatos oportet, ut in bonum publicum laborem hunc in se suscipiant.

Finem scripto huic imposuisssem, nisi nuperrime literas à Marchione de l'Hospital accepißsem, ubi quum duo notabilia hac de materia memorat, non possum quin paucis de iis loquar; primum spectat ad constructionem & plures proprietates lineæ curvæ D^ni de Beaune, quam Cartesius in Ep. 79. 3 vol. dicit ipsi inveniendam propositam per datam Tangen-

Tangentis proprietatem; Problema, quod mihi apparuit difficillimum. Solutio Marchionis exstat in 34. Diario Parisiensi anni ultimi, quare hanc hic non trado.

TAB. XLVI.
fig. 4.

Alterum est ejus responsum de aliâ curvâ valde cognitâ, & quam Cartesius aliter adhuc consideravit, ut & Huddenius eo tempore, quo negotia Reip. non impediabant, quominus vacaret studiis. Curva in fig. 4. exhibetur, folium ABCH circumscribit & utrimque sese extendit juxta Asymptoton EFG. Æquatio ejus est $x^3 + y^3 = xyn$ si AD ponatur x in recta, quæ cum diametro CA format angulum 45 graduum; perpendicularis DB, vel DH, vel DK, y , & n recta data. Cum ipsi indicassem, me invenisse quadraturam hujus curvæ, & quod contentum folii ABCH esset $= \frac{1}{6}nn$ id est $\frac{1}{6}$ quadrati diametri AC; quod spatium infinitum inter Asymptoton & ambo curvæ brachia etiam ejusdem magnitudinis essent; & quod quadratura generalis segmentorum exprimeretur per unicum terminum; ille invenit veram illam quadraturam generalem. Scilicet quod contentum segmentorum AH vel AK exprimatur per $\frac{nnx}{6y}$

& segmenti AB per $\frac{nyy}{6x}$; sed ulterius mihi affirmat se eo pervenisse per tres diversas vias; quod miror, cum persuasum habeam me non parum profecisse unicam detegendo.



V.

PROBLEMA AB ERUDITIS SOLVENDUM:

A

JOHANNES BERNOULLIO

IN ACTIS LIPSIENSIBUS

ANNI MDCXCI.

PROPOSITUM.



Quæritur, qualis sit curva ABC , quæ hanc habet ^{TAB. XLVI. fig. 5.} proprietatem, ut, ducta ubicunque tangente BD terminata ab axe AE , portio ejus abscissa AD sit ad tangentem BD in ratione constante M ad N .

Problema hoc solutu dignum est, & facile Mathematicorum applicationem meretur. In quacunque enim ratione sit M ad N , curva ABC semper eadem facilitate motu quodam continuo describi potest, non obstante, quod curva pro ratione M ad N magis vel minus composita evadat; in casu quippe rationis æqualitatis illico patet, curvam ABC esse circulum: in reliquis si M ad N est ut numerus ad numerum, erit quidem curva geometrica, secus autem transcendentalis est. Quæritur generalis determinatio puncti in curva.

VI.

C. H. Z. DE PROBLEMA TE
 BERNOUULLIANO
 IN
 ACTIS LIPSIENSIBUS
 PROPOSITO.

Legans inprimis esse hoc Problema, cum ex iis quæ Clarissimus inventor de eo prodidit, tum ex solutione & commentatione fraterna manifestum est. A quo investigando cum propter insignem difficultatem, quæ statim sese offerebat, abstinere statuerim (neque enim omnibus perquirendis, quæ à Viris eruditis exercitii gratia proponuntur, incumbere necesse existimo, aut assequendis parem me profiteor) non desit tamen quasi invitum compellere recurrens identidem quæsi non vulgaris idea, donec tandem quod desiderabam obtinui. Inventa nimirum *æquatione differentiali*, in qua ex altera parte erat elementum trapezii hyperbolici, ab asymptoto perpendicularibus intercepti; ab altera elementum spatii curvilinei, quod itidem ad trapezium hyperbolicum reduci posset. Quod apertius exponerem, nisi relinquendam etiamnum aliis putarem inquirendi voluptatem. Inde eo rem deducebam, ut trapezium ejusmodi hyperbolicum secandum esset aut augendum secundum rationem datam. Quod cum per medias aut continue pro-

portionales fieri possit, ubi ratio tangentis ad abscissam est ea quæ numeri ad numerum, hinc apparuit curvam quæsitam tunc iis accensendam quæ geometricæ vocantur, alias esse ex heterogeneis; ac tamen constructionem dari posita lineæ logarithmicæ descriptione, quam quidem hic adducerem, nisi viderem haud difficulter ex ipsa Jacobi Bernoullii doctissima simul brevissimaque solutione omnia erui posse, ut jam ab aliis occupatam dubitem.

Colligitur vero ex his illud animadversione dignum, nempe quodocunque in investigatione curvarum ex tangentibus aut subtangentibus ejus, ad similes ei, quam dixi, æquationes pervenietur, aut in quibus habeatur utrinque elementum spatii ad trapezium hyperbolicum reductibilis; tunc idem hoc, quod mirabile hic accidit, eventurum, ut curvæ geometricæ diversorum generum graduumque existant, si hyperbolarum ad quas devenitur rectangula quæ in asymptotis, sint commensurabilia. Præterea observanda venit in hoc problemate inusitata ac singularis analysis via, quæ ad alia multa in hac Tangentium doctrina aditum aperit, ut egregie jam animadvertit Vir Celeberrimus *calculi differentialis* inventor, sine quo vix esset, ut ad hæc geometriæ subtilitates admitteremur. Porro quod ad curvarum, de quibus agitur, designationem in plano attinet, possem, si operæ pretium esset, alios modos ac fortasse commodiores indicare quam qui a Cl. Bernoullio præscribitur, atque etiam docere qua ratione optime peragatur descriptio nostræ quadratricis hyperbolæ, quæ inter *Trajectorias* (ita enim vocari possunt) simplicissima censenda est, cum ad eam filis nihil opus sit, sed bacillo tantum utrimque cuspidem lateri infixam habente, quo fit ut & regressu explorari possit quam recte exarata sit. Sed his supersedendum arbitror, donec insignis usus aliquis harum linearum in lucem proferatur. Interim aliam quandam utilissimam cur-

vam nuper mihi repertam Geometræ sciant, cujus opera horologiis æqualis motus conciliatur, atque ejusmodi ut maris agitatione nequaquam turbari aut imminui queat; quod in pendulis nostris hætenus usurpatis non satis caveri potuit. Adeo ut nova ac certior spes nunc affulgeat perficiendi Longitudinum inventi. Curva hæc formatur,

aabbcddeeeefiiiiillmmmmnnorrffttuux.




VII.

C. H. Z. CONSTRUCTIO
UNIVERSALIS PROBLEMATIS

A

CLARISSIMO VIRO
JOH. BERNOULLIO
PROPOSITI.

TAB. XLVI.
fig. 6.



Um in *actis Lipsiensibus* Constructionem hanc me reperisse significarem, mense Octobri anno 1693, edenda tamen ea supersedi quod futurum putabam, ut vel ab Auctore ipso, vel Clarissimo Viro fratre ejus, vel alio quopiam, non multum ab-
fimi-

similis brevi in lucem mitteretur; ac subverebar etiam, ne actum agerem. Quoniam vero nusquam adhuc comparuit, & est inter eas quæ dari possint quodammodo simplicissima, non videtur absque ea diutius relinquendum tam eximium problema. Est autem hujusmodi. In recta AB sit datum punctum A , & oporteat invenire curvam AFC talem, ut tangens ejusquævis CD abscindat a recta AB partem AD , quæ ad ipsam CD habeat rationem datam lineæ C ad L .







Constructio: sicut C ad L , ita quælibet AE , in recta AB assumpta ad EF ipsi perpendicularem: & per F punctum ponatur ducta Logarithmica quæcunque cujus asymptotos sit AB , ad quam illa accedat versus A . Deinde ab A versus E accepta distantia qualibet AD , sit ut C ad L , sive ut AE ad EF , ita AD ad aliam DH ; quæ tanquam radio, centroque D , describatur Circuli circumferentia HC ; ac præterea applicetur ad Logarithmicam recta IG asymptoto perpendicularis, ipsique DH æqualis. Jam sicut L ad duplum C , ita fiat IE ad EK , sumendam in asymptoto in partem alterutram, nihil enim refert, & applicetur rursus ad Logarithmicam recta KL . Utque duæ simul KL , EF ad earum differentiam, ita sit DH ad DB ; quæ sumenda versus A punctum, si AD major sit quam AE ; at in contrariam, si minor. Denique erigatur ad asymptoton perpendicularis BC ; ea secabit circumferentiam HC in puncto C , quod erit in curva quæsitæ AFC . Tangit autem hanc recta EF in F .


Porro animadversione dignum est, non simplicem esse curvaturam lineæ hujus cum C major est quam L , sed ex duabus eam tunc componi, ex uno quodam puncto exeuntibus, ut CFA , CM ; quarum

hæc in infinitum progreditur. In puncto autem extremo C , recta ex A educta occurrit curvæ utrique ad angulos rectos, ac proportionales sunt DA , DC , DB .

F I N I S.







CHRISTIANI HUGENII

O P E R A

ASTRONOMICA.

T O M U S T E R T I U S .

Tomi tertii contenta.

DE SATURNI LUNA OBSERVATIO NOVA.	521.
SYSTEMA SATURNIUM, five de causis mirandorum SATURNI Phænomenon; & Comite ejus Planeta novo.	527.
EUSTACHII DE DIVINIS SEPTEMPEDANI BREVIS ANNOTATIO in Systema Saturnium Christiani Hugonii.	597.
BREVIS ASSERTIO SYSTEMATIS SATURNII SUI.	619.
DE SATURNI ANNULO OBSERVATIONES.	635.
ΚΟΣΜΟΘΕΩΡΟΣ, five de Terris Cœlestibus, earumque ornatu, CONJECTURÆ.	641.

CHRISTIANI HUGENII
DE
SATURNI LUNA
OBSERVATIO NOVA.

Tom. III.

Ttt 4

CHRISTIANI HUGENII

SATURNILLUNA

ORSELVATIO NOVA



CHRISTIANI HUGENII
DE
SATURNI
LUNA
OBSERVATIO NOVA.



ANNO millesimo sexcentesimo quinquagesimo quinto, Mensis Martii die quinto & vicesimo, Saturni planetam per tubum dioptricum aspectans, animadverti præter ansas sive brachia quæ utrimque illi cohærent, stellulam quandam ab occasu adstantem, tribus circiter scrupulis remotam, eratque disposita secundum eam quæ per utraque brachia ducta fuisset rectam. Et cum subdubitarem nunquid fortasse planeta esset ejus generis, quales circa Jovem quatuor

Tom. III.

VVV

cir-

circumferuntur, locum Saturni stellulæque & positum utriusque ad aliam quandam quæ tantumdem fere, sed in contrarias partes, à Saturno dissita erat annotavi; ex inerrantium numero hanc potius quam illam fore ratus, quod ab ea quam dixi recta linea deflectebat. Neque me fefellit opinio. Postridie enim repetita observatione, eam quæ ad occasum spectabat stellam eodem ad Saturnum situ, eodemque quo prius intervallo sejunctamprehendi; alteram verò ad duplam ferè prioris distantiam recessisse. Unde hanc quidem è fixis unam esse, atque à Saturno tum temporis retrogradiente longius relictam, illam autem simul cum eo progressam, comitem ipsi adesse intelligere mihi visus sum. Sequentium verò dierum observationibus omnis dubitatio sublata est. Namque ab eo tempore per tres continuos menses, quoties serenitas aëris patiebatur, novum planetam notavi, ostendique amicis, nunc dextrum Saturno nunc sinistrum; redactisque in commentarios observationibus, sexto decimo die periodum explere cognovi. Digressio summa tribus scrupulis paulo minor visa est, ad quam ubi pervenit maximè fit conspicuus: at cum Saturno appropinquat ante aut ponè transiens biduo propter splendorem ejus delitescit. Tempus verò sexdecim dierum tam exactè circuitum planetæ metitur, ut cum annus jam & amplius à primis observationibus effluxerit, nihil adhuc aut abundare aut deficereprehendatur, quoque loco prædicimus ibi sese in cœlo sistat. Scio ante annos complures Ant. Mariam de Rheita non unum, sed senos jam Saturno erroneos attribuisse. Verum æquè circa hos, quàm circa alios illos quinque, quos præter Mediceos Jovi circumposuerat, deceptum fuisse, inde perspicitur, quod cum meliori Telescopio sese uti Clar. Vir Joh. Hevelius demonstret, nullum tamen Saturno utut diligentissimè sæpissimeque inspecto comitatum adesse

fe

se senferit. Hoc enim ultrò fatetur. Præter Rheitam verò nemo quod sciam simile quid de Saturno prodidit. Nam gemini illi quos Galilæus detexerat laterones longè aliud esse deprehensi sunt quàm prima specie videbantur. Quid tamèn sint in incerto est, neque adhuc pronunciare audent Astronomi. Cæterùm mihi novum Saturniæ lunæ phænomenon ad hæc quoque viam aperuit, tandemque causam rescivimus, cur interdum inter binas veluti ansas Saturnus medius teneatur, alias recta quasi brachia protendat, tum nonnunquam omnibus amissis rotundus inveniatur, qualis anno 1642. spectatus fuit, jamque rursus trimestri spatio perstitit. Et harum quidem vicissitudinum tempora in futurum definire non erit difficile si duorum adhuc mensium observationibus attendere licuerit, quæ videndum an hypothese nostræ consentiant. Expectamus enim ut sub finem Aprilis, si non ante, brachia Saturno renascantur, non curva illa, cujusmodi à Franc. Fontana & Hevelio depicta cernuntur, sed secundum lineam rectam utrimque prominentia, si quis melioris notæ perspicillo intueatur. Nam vulgaria si adhibeat binos orbiculos referent, sicuti Galilæo primum sese obtulere. Nostrum, quo Saturni affeclam reperimus, quinquagies diametrum rei visæ multiplicat, duodenos pedes æquans: cui postea duplum longitudine construximus, multiplicatione centupla. Cum autem longiora etiam hisce Telescopia, utpote triginta & quadraginta pedum ab aliis fabricari dicantur, aliquid aut vitris vitii inesse, aut hæc eadem non debita proportionem mutuò respondere credibile est. Neque enim alias hucusque aciem eorum effugisset novus Saturni satelles.

Observationes præterito præsentique anno collectas, quibus periodus ipsius demonstratur, tunc unà editurum cum integrum Saturni systema perfecimus. Cujus interea summam sequenti grypho consignare visum

est, ut si quis fortasse idem se invenisse existimet, spatium habeat ad expromendum, neque à nobis ille aut nos ab illo mutuati dicamur.

aaaaaaaaacccccdeeeeeghiiiiillllmmnnnnnnnn
nnoooooppqrrstttttuuuuu.

Hagæ-Com. 5. Mart. 1656.



CHRISTIANI HUGENII
ZULICHEMII, CONST. F.
S Y S T E M A
SATURNIUM,
S I V E
DE CAUSIS MIRANDORUM SATURNI
PHÆNOMENON;
E T
COMITE EJUS
PLANETA NOVO.

SERENISSIMO PRINCIPI
 L E O P O L D O
 A B H E T R U R I A

Christianus Hugenus S.D.

REs in cælo remotissimas, extraque hominum conspectum positas, nisi cum ab arte sibi auxilium adsciscunt, hoc opusculo persequor, Princeps Serenissime, nec dubito quin multis nimia diligentia versatus dicar in his quæ tam parum ad nos attinere arbitrantur, cum eorum quæ hîc coram & in propinquo nobis sita sunt, plurima investigatu digna supersint. Verum hi parum attendere videntur, quanto præstet cæteris omnibus sublimium rerum consideratio, quamque hoc ipsum præclarum sit, ad tam longe distitas naturæ partes contemplationem mitti; quæ licet visu obscuræ & exiles, reipsa tamen illustres multoque maximæ existunt. Nam si quod procul absunt, ideo parum ad nos pertinere illas putemus, indigni profecto sumus mente rationis particeps, qua facile immensa cæli spatia transcendimus, indigni etiam egregio illo, nec unquam satis laudato, propagandæ visionis invento, quo ad astrorum regionem ipso quoque oculorum sensu pertingimus.

Cu-

Cujus quidem inventi beneficio ad longinqua Saturni regna propius nunc quam antehac quisquam adivi, & usque eò progressus sum, ut vasti adeo itineris, pars una centesima tantummodo reliqua fuerit: quam si quo pacto superare potuissem, quot qualiaque, dii boni, narranda haberem! Nunc autem ea perscribo quæ ex intervallo isto notare oculis valui, quæque & ipsa miranda esse & relatu dignissima nemo diffitebitur. Quem enim non admiratio capiet, ubi Saturnum annulo circumdatum ac velut corona redimitum viderit? atque hanc eam formam esse, quæ, cum perpetuo eadem sit, diversas tamen facies induat, & pertinaciter hætenus conjecturas Astronomorum frustretur. At neque hoc minus novum atque inopinabile omnium auribus accidisset, Planetam aliquem non antea visum in cælo repertum esse, nisi novitatis gratiam stellæ Medicæ abstulissent. Verum hic noster Saturni accola, quo diutius latuit, majorique molimine ad terram deducendus fuit, eo magis deprehenso gaudendum est: quodque unus hætenus desideratus, cumulum nunc tandem errantium stellarum explet, numerumque earum duodenarium; quo majorem posthac repertum non iri, prope est ut confirmare audeam. Certè jam majoribus illis ac primariis, inter quos Tellus hæc reponenda est, æquales multitudine minores existunt, & utrique illo, quem perfectum dicimus, numero continentur, ut consilio summi opificis modus hic præ-

præfinitus videri possit. Cæterum multiplicem contemplandi materiam, Philosophorum ingeniis circa hæc cælestia corpora exorituram, quibus veluti nova accessione mundum auximus, non persequar. Unum hoc inanimadversum eos præterire nolim; nempe quam non leve argumentum ad austruendum pulcherrimum illum mundi universi ordinem, qui à Copernico nomen habet, Saturnius hic mundus adferat: si enim gravatè olim isti systemati assentientibus, scrupulum demere potuerunt quaternæ circa Jovem repertæ Lunæ; manifestius utique nunc eos convincet unica illa circa Saturnum oberrans, atque ob hoc ipsum quod unica est, nostratis Lunæ similitudinem magis exprimens: ut omittam nunc aliam quoque Saturnii globi cum hoc nostro cognationem, quam in simili axium utriusque inclinatione invenient Astronomiæ periti. Quæ sanè cum mecum reputo, fieri non posse videtur, ut veritatem hisce in rebus tam feliciter repertam, tamque manifestis indiciis fultam, ulla ætas obliterare valeat, quamdiu modo observationum Galilæi aut nostrarum aliqua memoria supererit. Hæc igitur ut ab oblivione vindicarem, utque deficientibus forsitan olim organis quibus easdem repetere liceat, esset tamen unde aliquando extitisse probari posset, hac qualicunque scriptione publicandas censui, omnibusque impertiendas. Quod autem Celsitudini Tuæ commentarium hunc inscripserim, feci id non una ratione. Namque in

primis celebritatem claritatemque ei non exiguam ab Illustrissimo nomine tuo acquiri posse credidi; cujus cum per orbem universum, quàm modo aliquis virtuti aut humanitati locus est, latè fama pervaserit, librum hunc tibi nuncupare, hoc est velut in edito cunctisque conspicuo loco eum deponere. Deinde nec ignorabam quantum momenti accessurum esset invento illi nostro, quo perplexa Saturni mysteria exponere conatus sum, si exactissimo tuo judicio illud probari contingeret: quod utinam non frustra speraverim. Sed ante omnia occasionem aliquam me invenisse gavissus sum, neque omittebam duxi, qua palam commemorarem quantum tibi, Princeps Celsissime, artes disciplinæque optimæ, & in his Mathematicæ præsertim debeant, quod contra invalescentem indies barbariem patronum iis ac defensorem te præstas, quodque familiariter eas colendo, ac velut in contubernium tuum admittendo, plurimum dignitatis ipsis concilias: quod denique præstantissimorum ex omni antiquitate Autorum scriptis in vitam revocatis easdem promotes ac locupletas. Nempe ad hæc facienda, & illustria majorum tuorum exempla & innata virtus & egregia animi tui propensio te impellunt. nos autem ad quos optimæ hujus tuæ voluntatis curæque utilitas pervenit, grato animo illa agnoscere & prædicare æquum est. Hagæ Comitum. 5. Julii. Anno 1659.

NICO-

NICOLAUS HEINSIUS, D. F.
AD AUCTOREM SYSTEMATIS.

L *Audibus Hugeni pars addite magna paternis,
Quem totum Vranie vindicat una sibi.*

In cunis placiti reptare per avia cæli,

Astra tibi puero volvere ludus erat:

Astra minus patriis non trita penatibus olim;

Cognita natali non minus astra solo.

Jamque eadem populis mirantibus astra recludis,

Perspicua ingenii lumine facta tui.

Qualis sidereo radiatus in æthere Titan

Oppositam nocti spargit ubique facem.

Ardue stellantis salve metator Olympi,

Qui superâ nobis das regione frui:

Per quem, discussâ dubiæ caligine mentis,

Inserimur liquido cominus ora polo.

Devocat in terras, magico sine carmine, Lunam

Æqua Syracosio cui manus arte seni.

Ecce Jovis genitor tenebroso carcere per te

Et fugit, & lætam rursus oberrat humum.

Macte ausis studioque; Deos qui vindice chartâ

Asseris: inventi qui facis astra tui.

Nunc sua Saturno cum vincula demseris ipsi;

Sæcla tuum terris aurea munus eunt.

IN IDEM SATURNI SYSTEMA.

O Mnia qui magni dispexit sidera Mundi,
 Viderat hæc oculo debiliore Conon.
 Attigit illa Conon miris adjutus ab alis,
 Attigit, & visu nobiliore, meus.
 Perque vias Lunæ, per, qua Cyllenius errat,
 Volvitur & Veneri Martia flamma comes;
 Quique nitet famulos inter tot Jupiter ignes;
 Lumina falcigeri misit ad astra Dei:
 Et didicit vario quare mutabilis ore,
 Ludat in obscurâ mobilitate Senex:
 Quod frontem diadema premat, quo, Circulus illi
 Aureus, infaustum cingat honore caput:
 Quæ noctes ibi Luna regat, quæque, æmula nostræ,
 Expleat amissum Cynthia luce diem.
 Nec satis hæc vidisse sibi miracula, testes
 Convocat, & visis quærit ubique novis.
 Noluit hæc nostros fugerent arcana nepotes,
 Ignaros cæli nec sinit esse sui.
 Ampla satis Juveni est, ut debita gloria, merces,
 Vocibus innumeris quam sua fama sonet;
 Gloria sideribus quam convenit esse coævam,
 Et tantum Cælo commoriente mori.

CONST. HUGENIUS. C. F.

CHRISTIANI HUGENII

ZULICHÆMII, CONST. F.

SYSTEMA SATURNIUM.

QUM ad cælestium contemplationem tubos opticos, nobilissimum Belgicæ nostræ inventum, Galileus admovisset, celeberrimaque illa Planetarum phænomena mortalibus primus aperuisset; in his, ea quæ de Saturni stella prodidit, vel præcipuè admiratione digna fuisse videntur. Nam cætera quidem, etsi suspicienda meritò ac magni facienda, non tamen ejusmodi erant, ut, quibus de causis talia cernerentur, enixè quærendum esset. Saturni vero mutabiles figuræ novum quoddam & reconditum naturæ artificium præferebant, cujus certè rationem neque Galileo ipsi, neque tanto post tempore Astronomorum cuiquam (pace eorum dixerim) divinare contigit. Hunc primò non simplici orbe lucentem, sed veluti tergeminum conspexerat, binis stellis minoribus mediæ majori proximè utrinque adjectis. Eâque formâ triennio fere absque ulla mutatione perseverante, certò sibi persuaserat, quales Jovi quatuor, tales duos comites Saturno obtigisse, nullo tamen motu præditos, eoque simili positu semper lateribus hæsueros. Verùm sententiam mutare coactus est, solitario Saturno prodeunte, ac priore satellitio penitus destituto. Quod cum admirabundus vidisset & causam rei conjectura assequi tentaret, de reditus tempore, quo prior illa phasis restitui deberet, nonnulla vaticinatus est. Sed neque hæc ita tunc successisse quemadmodum speraverat deprehensum est, nec gemina modò aspectus diversitate Saturnum contentum esse. Etenim aliæ deinceps mirabiles ac prodigiosæ formæ appa-

Xxx 3

rue.

ruerunt, quas primùm à Josepho Blancano & Francisco Fontana descriptas novimus; adeo quidem insolita specie, ut multis oculorum ludibria censerentur, imaginesque vitris potius quam cælo hærentes: donec pluribus eadem videntibus, haud vano indicio proditas fuisse constitit.

Igitur ipse quoque ad hæc cæli miracula conspicienda magno desiderio actus; cum non nisi vulgaria suppetere perspicilla, quinum aut senum pedum longitudine; artem eam qua vitra in hosce usus figurantur quanta potui cum cura diligentiaque excolere aggressus sum, nec piguit ipsummet operi manus admovisse; quoad multis superatis difficultatibus (nam plures in recessu hæc ars habet quam prima fronte præferre videatur) ea denique vitra mihi effeci, per quæ ad hæc scribenda præbitum est argumentum. Continuo enim ad Saturnum telescopia dirigens, aliam ibi rerum faciem reperi, quàm plerisque antehac fuerat credita. Nam quæ vicinæ illi hærebant appendices, eas non sane geminos planetas, sed quidvis potius aliud esse, diversum vero ab his unumque numero planetam, majori intervallo à Saturno remotum, diebus sexdecim circa eum ambire apparuit; & hunc quidem omnibus antehac sæculis ignoratum. De qua nova nostra observatione tribus abhinc annis Astronomos certiores feci, prudenti consilio obsecutus viri Illustris, ingenioque juxta ac virtute conspicui, Joh. Capelani. Huic enim, uti & Gassendo aliisque, cum Lutetiæ Parisiorum agens, de Saturni comite à me viso narraffem, multas ob causas censuit, non reticendum tam gratum omnibus futurum nuncium, quoad illud quod meditabar integrum Saturni Systema perscripffem. Itaque anno 1656 die 5 Martii, de Saturni Luna (ita enim novam stellam nec immerito appellavimus) observationem emisi*, atque unà hypothefin quæ causam reliquorum Saturni phænomenon contineret; sed hanc confuso elementorum quibus scribebatur ordine, quo tantum, non ignorasse nos eam illo jam tempore, testatum esset, alique etiam ad vulganda quæ commenti essent hoc pacto invitarentur, neque sibi præreptam quererentur inventionis gloriam. Deinceps

* Vide supra
pag. 523.

vero rogatu ejusdem Viri eximii, solvi quoque hunc literarium gryphum, totamque hypothesein summam illi exposui: unde jam ad plures forsitan nostra de Saturni phasibus sententia manaverit. Sed pleniorē utique tractationem postulat mira & insolens circa hunc planetam naturæ fabrica, neque expectare debemus ut vel à nobis relatis, vel ad explicanda phænomena adsumtis, fidem omnes habeant, nisi & hæc rationum momentis, & illa observationum testimonio adstructa viderint. Quamobrem horum utrumque nunc præstare nobis propositum est. Ac primò quæ ad comitis planetæ motum periodumque spectant accuratè, quantum fieri poterit, ex observatis definiemus, motusque ejus tabulas condemus. Deinde ipsius Saturni phasēs singulas suis causis assignabimus, ita ut futuras quoque inde prænoscere in promptu sit.

Sed antequam observationes exhibeamus, de telescopiis nostris quibus cælo eas deduximus, pauca referre expediet, ut sciant hinc, qui comitem Saturni, mirabilesque Planetæ ipsius figuras intueri cupiunt, qualibus ad hoc turbis vitrisque indigeant; utque suos si quos habent, possint cum nostris contendere. Primus quem adhibuimus duodenos pedes non excedebat, duobus convexis vitris instructus, quorum id quod oculo vicinum erat, radios parallelos cogebat ad trium paulo minus pollicum, sive unciarum pedis Rhe-
*Telescopio-
rum nostro-
rum descri-
ptio.*
 nolandici distantiam. Eo planetam novum & deteximus primū, & per aliquot menses observavimus, nec non formam eam Saturni, quæ à nemine adhuc percepta fuerat, quamque postea describemus, licet non prorsus erroris expertem. Inde verò duplicata priori longitudine, simul duplo propiores sideribus facti sumus, multoque meliùs faciliùsque phænomena omnia adnotavimus. Et hi quidem tubi 23 pedum, è ferri bractea constructi sunt, habentque ab altera parte vitrum insertum, cujus latitudo ad quatuor pollices, sed in quo non major pateat circulus quam diametro duorum pollicum cum triente. Ab altera parte, quæ nimirum oculo admovetur, bina sunt vitra minora, 1½ pollicem diametro

æquantia, juncta invicem, quæque hoc pacto æquipollent convexo colligenti radios parallelos ad intervallum unciarum 3, aut paulo etiam angustius. Ex quo sanè majoris vitri excellentia æstimanda est, tam breve convexum perferre valentis: quoniam quanto minori de sphaera id fuerit, tanto res visæ magis ampliantur. Illud enim in Dioptricis nostris demonstratum invenietur, speciei per tubum visæ ad eam quæ nudo oculo percipitur, hanc secundum diametrum esse rationem; quæ distantia foci in exteriori vitro ad illam, quæ in interiori sive oculari vitro est, foci distantiam. Centuplam itaque fere rationem hanc in perspicillis nostris esse constat, cum Galileana non ultra trigecuplam processerint. Nam quantitatem incrementi eodem modo nos atque ille æstimamus; nempe ut tanto major res quæque per tubos quam nudo visu conspici dicatur, quanto majori angulo ad oculum extrema ejus deferuntur, sive quanto latior ejus imago in fundo oculi depingitur.

*Quantum
his res visa
amplientur.*

*Augmentum
telescopio per-
ceptum quo-
modo æstima-
tur.*

*Alia ejusdem
falsa æstima-
tio.*

Est autem & alia æstimandi augmenti ratio, sed parum ex vero, cum absque ulla anguli consideratione apparentem perspicillo alicujus rei magnitudinem determinamus; velut cum Jovis orbem circello duorum aut trium digitorum latitudine æqualem nobis cerni putamus. At enim cum idem circulus, trium puta digitorum diametro, major minorve necessario appareat, pro diversa sui ab oculo distantia, nonne etiam adjiciendum sit, quanto ex intervallo conspectus circulus disco Jovis æqualis cernatur? Profectò nisi hoc addatur, nihil certi ea comparatione designari videtur. Et tamen ratio subest cur magis una quæpiam quam alia magnitudo imagini visæ tribuatur, & quidem à pluribus sæpe spectatoribus eadem. Verùm de his aliàs fortasse. In præsentia illud ostendisse suffecerit, fallacem omnino esse hoc modo initam æstimationem. Idque primùm inde liquet, quod Lunâ aut signo aliquo cælesti, velut Orione, prope horizontem conspecto, idem longè majus visus judicet, quam ubi altè jam ac supra verticem penè adstiterit, cum tamen hîc nihilo minori angulo illud comprehendi certum sit. In his autem quæ telescopio in-

intuemur major adhuc error contingit. nam cum, exempli gratia, vel triplo latior secundum diametrum appareat Jupiter, oculo altero per telescopium nostrum spectatus, quam Luna oculo altero vacuo, atque adeo utrâque hac specie, in unum convenire jussâ, iatè à Jove Luna contegatur; nihilo minus cum seorsim Jupiter inspicitur, trium circiter digitorum latitudinem plerisque spectatoribus æquare tantummodo existimatur. quanquam aliquos repererim qui disco Lunari æqualem faciebant, atque ita tertiam partem saltem tribuebant ejus quæ reipsa apparet amplitudinis. Quamobrem de multiplicatione telescopii malè hoc modo inquirei certum est. Fiet autem rectè Galilei methodo, quam in Sidereo nuntio tradidit; vel, quia hæc in prægrandibus telescopiis difficultatem habet, inquirendo foci distantias in singulis vitris, easque inter se comparando. Qua ratione diximus centuplum fere augmentum tuborum nostrorum reperiri.

Cæterum libenter intellecturos credo qui hæc legent, quæ-<sup>Quantum circa plane-
tas ceteros &
fixas obser-
vata.</sup> lia etiam eorum ope de reliquis præter Saturnum planetis fixisque stellis observaverimus: de quibus breviter ergo hæc habeant. In primis sæpe illud quæсивimus, num aliqui etiam apud Venerem, Martem aut Mercurium comites circumferrentur, ubi tamen nullos unquam reperimus. Apud Jovem autem quatuor neque amplius. Qui quidem semper ac facilè telescopio nostro patent, nisi cum disco suo aut umbra Jupiter aliquem abscondit. Inde verò quamprimum rursus emergere incipiunt fiunt conspicui, imò priusquam toti exierint, ut non semel me vidisse memini. Porro quæ in Jove zonæ<sup>In Jovis disco zona
candicans.</sup> seu fasciæ quibusdam animadversæ sunt, non semper eâdem formâ præditæ; has ego & qui mecum observarunt perspicuè sæpe animadvertimus reliquo Jovis corpore magis lucidas, cum tamen alii obscuriores asserant; quibus forsitan interjectum spatium inter binas zonas lucidiores pro una obscuriore fuerit. Atque anno quidem 1656, multo majori in-<sup>TAB.
XLVII.
fig. 1. 2.</sup> tervallo, quam sequentibus tribus, illas à se mutuo distare comperimus, sicut in adjunctis delineationibus videre est. Qua ex instabilitate non malè forsan colligemus, ad instar

nubium nostrarum, vapores quosdam vicinum Jovi ætherem insidere, qui nunc his nunc illis climatis crebri magis confertique exoriantur.

*In Marte
zona ob-
scura.
TAB.
XLVII.
fig. 3.*

In Marte quoque cingulum ejusmodi unicum anno 1656 deprehendi, latum admodum, mediâque disci partem ofuscans, quemadmodum figura adjecta demonstrat. Insuper discum planetæ hujus parte aliqua deficientem vidi aliquoties, & in Venere phasēs omnes quales Lunæ. Verùm hæc minoribus etiam telescopiis alii notarunt.

*Fixarum
diametri
nulla la-
titudine.*

Fixarum autem diametros etiam maximè splendidarum nulla unquam latitudine cernere potui, sed tantum minimi puncti instar, quoties vitris usus sum fuligine leviter infectis ad auferendos radios. At ex Hevelii consilio, quod in egregio ejus extat opere Selenographico, exterius vitrum contingens, ita ut exiguum tantum foramen relinquatur, aliquam magnitudinem præ se ferre illas vidi; quam proinde non stellarum propriam esse, sed ex aliqua visus fallacia nasci arbitror. Nam nostra quidem illa methodus, trans fumum, quo lens proxima oculo tincta est, stellas inspiciendi, certa est omnique erroris suspitione carens; atque ita planetas quoque nimia luce radiantes, solemque ipsum intueri solemus. Foramine autem exiguo majorem lucis partem excludendo, non tolli penitus circumfusus sideribus radios, sed in orbem minorem satisque perfectè circinatum eos cogi opinor, qui imprudentibus pro ipsius stellæ corpore imponat.

*Phænomenon
non in
Orione no-
vum.*

*TAB.
XLVII.
fig. 4.*

Unum verò circa fixas phænomenon relatu dignum occurrit, à nemine hucusque, quod sciam, animadversum, nec quidem nisi grandibus hisce telescopiis rectè observandum. In Orionis ense tres stellæ ab Astronomis reponuntur inter se proximæ. Harum mediam Anno 1656 fortè per tubum inspicienti mihi, pro stella una duodecim (quod quidem minimè novum) sese obtulerunt; eo positu quem subjecta figura expressimus.

Ex his autem tres illæ pene inter se contiguæ, cumque his aliæ quatuor, velut trans nebulam lucebant, ita ut spa-
tium

tium circa ipsas, qua forma hîc conspicitur, multo illustrius appareret reliquo omni cælo; quod cum apprime serenum esset ac cerneretur nigerrimum, velut hiatu quodam interruptum videbatur, per quem in plagam magis lucidam esset prospectus. Idem verò in hanc usque diem nihil immutata facie sæpiùs atque eodem loco conspexi; adeo ut perpetuam illic sedem habere credibile sit hoc quidquid est portenti; cui certè simile aliud nusquam apud reliquas fixas potui animadvertere. Nam cæteræ nebulosæ olim existimatæ, atque ipsa via lactea, perspicillo inspectæ, nullas nebulas habere comperiuntur, neque aliud esse quam plurium stellarum congeries & frequentia.

In Lunæ facie autem quàm multa, diligentissimis quibusque observatoribus præterita, tubis nostris detegantur, non referam; quandoquidem schemate ad hoc descripto opus esset, eoque amplissimo. Quem laborem hactenus non suscepimus, credimusque exiturum in immensum, si montium omnium eminentias & anfractus, qua multitudine nobis videntur, depingere conemur. Itaque ad Saturni observationes pergo, de quibus sciendum est, priores omnes, usque ad eam quam 19 Febr. Anno 1656 annotavimus, tubo 12 pedum peractas esse, reliquas pedum 23. Uterque autem everso situ visibile referebant, ideoque schemata omnia, non ut primùm descripta fuerant, hîc expressimus, sed supera inferis, dextra sinistris permutavimus, ut vera pateret dispositio.

Die igitur, secundum Calendarium Gregorianum, 25 Martii, Anno 1655, circa horam 8 vespertinam, Saturnum conspexi cum brachiis utrinque secundum rectam lineam extensis; tribusque fere scrupulis ab eo distantem occasum versus stellulam quandam exiguam *a*, sic sitam, ut si per brachium utrumque recta duceretur, ea in illam incurreret, aut certè pauxillo tantum inferior transiret. Alteraque item versus orientem stellula *b* aderat, paulo longius à Saturno remota, & brachiorum lineâ multo inferior. Et hac quidem prima vice suspicatus sum stellam *a* Saturnum comitari, quo-

niam alias quoque vicinam illi animadverteram, similique fere positu.

TAB. XLVII.
fig. 6.

Porro brachia Saturni recta quidem utrinque extensa cernebantur, sed versus extremas cuspides crassiora paulo quam qua parte Saturni disco cohærebant, qualia sequens schema exhibet.

TAB. XLIX.
fig. 6.

Eâque formâ usque ad occasum Heliacum Saturnus perstitit. Cæterum cum post phasin rotundam Anni 1656 brachia denuo recepisset, eadem quidem illa forma reversa est duodecempedali tubo spectanda: sed tunc majori tubo 23 pedum adhibito alteram hanc figuram veriore esse patuit; unde antea quoque talem extitisse credibile fiebat, quæ tamen minori telescopio perfectè conspici nequisset. At lineam illam obscuram, brachia utraque conjungentem, ac tota tamen infra se relinquentem, etiam 12 pedum telescopio notavimus.

TAB. XLVII.
fig. 7.

Die sequenti, nempe 26 Martii stella *a* eodem modo eademque qua prius distantia juxta Saturnum collocata erat, *b* verò duplo quam ante remotior. Unde, quum distantia inter se stellarum *a* & *b* major esset effecta, sequebatur vel utramque vel alteram saltem erraticam esse. Et stellam quidem *a* necessario talem judicavi, quoniam Saturnum eo tempore retrogradum esse noveram; itaque oportebat cum Saturno illam in eandem plagam delatam esse, quum alioqui propinquior multo fieri debuisset. Altera vero *b*, quominus fixa censeretur nihil obstabat, imo prorsus ita existimari consentaneum erat, cum una die tantum ab illa Saturnus recessisset, quantum motus ejus postulabat. Neque verò aliter se rem habuisse sequentes observationes ostendunt.

TAB.
XLVIII.
fig. 1.

Martii 27: stella *a* Saturno propior facta erat: *b* verò adhuc longius recesserat.

Inde nubili dies intercesserunt usque ad 3 Apr. quo die fixam *b* non amplius annotavi, sed stellula *a* migraverat ad Saturni latus Orientale, rursusque fere 3 scrupulis distabat. *fig. 2.*

Quinque diebus sequentibus, rursus ut ante impeditæ observationes.

9 Apr.




Fig. 5.

25. Mart. 1655.



* a

b *


Fig. 7.

26. Mart.



* a

b *



9 Apr. denuo ad occidentem situs erat comes *a* sicut 27^{TAB. XLVIII. fig. 3.} Martii, fixaque altera *c* à parte orientali Saturno admodum propinqua animadvertebatur, uno circiter scrup. distans, lineaque brachiorum, uti præcedens, inferior.

10 Apr. Saturnus à fixa *c* longius abscesserat, & comes à Saturno. *fig. 4.*

Diebus duobus sequentibus aucta fuit continuè distantia stellæ *c*, comitis *a* eadem fere mansit. Nempe

11 Apr. hic positus fuit. *fig. 5.*

12 Apr. talis. *fig. 6.*

13 Apr. comes videri nequirit, quoniam & Saturno propior factus erat, & Luna adventabat. Fixa *c* ulterius semper recedebat, sed lentiore passu. *fig. 7.*

14 & 15 Apr. comes non apparuit ob viciniam Saturni.

16. Cælum nubilum.

17. Comes ad ortum situs erat, distans fere 3 scrup. stella vero *c* longius abierat, semper tamen oculis notata; Ac postea quidem eadem ad Saturnum reversa est, ut sequentes observationes docebunt. *fig. 8.*

18. Apr. comes situm mutasse non videbatur.

19. Apr. paulo propius ad Saturnum accesserat. *fig. 9.*

20. Apr. magis appropinquaverat. *fig. 10.*

21. Apr. Adhuc magis; cernebaturque ansarum lineâ paulo superior. *fig. 11.*

29 Apr. Occidentalior Saturno comes factus erat, ac tantundem distabat quantum 21. Apr. *fig. 12.*

Ultima Apr. Comes prope Saturnum delituit.

3 Maji, in quem diem institio Saturni incidit, comes in maxima ab eo distantia videbatur, orientem versus. *fig. 13.*

Diebus insequentibus usque ad 27 Maii, ejusmodi positus fuit qualem exhibent schemata subjecta.

6. Maji. *fig. 14.*

7. Maji. *fig. 15.*

10. Maji. *fig. 16.*

11. Maji. *fig. 17.*

12. Maji. *fig. 18.*

14. Maji. *fig. 19.*

15. Maji. ægre conspectus comes propter instans plenilunium. *fig. 20.*

17. Maji, Comes non apparuit.

18. Maji. *fig. 21.*

19. Maji. *fig. 22.*

20. Maji. *fig. 23.*

27. Maji, Comes occidentem versus in maxima à Saturno distantia reperiēbatur. Saturnus autem jam rursus ad stellam *c* superius notatam appropinquare cœperat, remotus circiter 10 scrup. Ita verò nunc posita hæc erat, ut linea brachiorum Saturni continuata subter eam ferretur, cum die 10 Apr. supra transiisset. Sed & Saturni ipsius semita, uti ex sequenti observatione liquebit, stellâ *c* inferior hac vice fuit, quæ priori illius applicatione superior contigerat. *fig. 24.*

Ultima Maji, Saturnus stellam *c* jam præterierat; comes ad occasum situs erat, sed aliquanto propior quam die 27. *fig. 25.*

13 Jun. Ultima fuit ante occasum Heliacum observatio, comes in maxima distantia cernebatur, Saturno occidenta-
lior. *fig. 26.*

*Saturnus
brachiorum
expers in-
ventus.*

Postquam ex radiis Solaribus Saturnus emerisset Anno 1656. Jan. 16, hora 12, primùm à me observatus est, cum ad hoc usque tempus peregre abfuissem. Inveni autem brachiis suis spoliatum penitus, & comitem ad orientem situm, in maxima fere distantia. *fig. 27.*

TAB. LI.
fig. 4.

Rotundum autem Saturnum, sub finem Novembris, aliqui jam observaverant; eâque formâ perstitit usque dum rursus radios Solis subiret.

TAB.
XLVIII.
fig. 28.

19 Febr. tubo 23 pedum primùm usus sum, comitemque Saturno propinquum reperi, ubi priori telescopio ægre potuisset animadverti.

16 Martii, circa octavam adhuc propiorem Saturno comitem vidi, ad orientem spectantem, uti observatione superiori. *fig. 29.*

30 Martii, hora 8, pari propinquitate, sed ad alteram partem comes stabat. *fig. 30.*

18 Apr.

18 Apr. ad ortum situs erat comes in maxima distantia. *fig. 31.*

17 Jun. hora 9½ ultimò ea vice observatus fuit Saturnus, satellite versus occidentem adstante, & mediocriter remoto. *fig. 32.*

Hiscæ autem observationibus omnibus quandiu Saturnus rotundus apparuit, transversa illa linea, cæteris disci partibus paulo obscurior, ex æquo medium ejus discum secabat, eratque ad satellitem directæ. Et hac quidem observatione 17 Junii habita, primùm animadverti motum Saturni, eum scilicet quo propter telluris vertiginem cum cælo pariter quotidie circumferri putatur, secundum eandem illam incedere lineam.

Eodem Anno 1656, Octobris die 13, manè hora 6, rursus Saturnus videri cœpit, cui jam brachia erant renata; ^{*Brachia Saturno renata.*} ferius quidem quàm in observatione edita prædixeram, verùm ^{*TAB. LI. fig. 5.*} haud aliâ formâ, quæ nimirum eadem planè fuit atque anno præcedenti: licet melius nunc cujusmodi esset discerneretur, ob adhibitos tubos præstantiores.

Fascia autem illa seu zona obscurior, paulò inferior brachiorum linea nunc apparebat, cum anno 1655 superior fuisset. Eratque Saturni motus, quo cum cælo corripì videbatur, secundum hujus zonæ ductum, ac proinde secundum rectam quoque lineam per utraque brachia protensam, ac semper postea quotquot observationibus idem inquirere libuit, eodem modo rem sese habere comperi. Comes conspicì hac vice nequìt, forte an ob ingruentem Solis exortum, aëremque crassiores prope horizontem.

Die autem 19 Oct. hora 6 mat. apparuit comes Saturno ^{*TAB. XLVIII. fig. 33.*} occidentalior, vix mediocri distantia absistens, quæ diebus sequentibus duobus aucta est continuè.

21 Oct. hora eâdem, erat comes in distantia maxima occidentali. *fig. 34.*

25 Oct. hora 6 mat. non apparuit comes.

9 Nov. hora 5½ mat. propinquus Saturno comes existerat, occidentalis rursus, ac lineâ ansarum paulo superior. *fig. 35.*

26 Nov. hora 6½ mat. comes latuit. Brachia verò paulo
 la-

latiora evaserant, & quâ Saturno junguntur, minus intensa luce quàm versus extremas cuspides lucebant, & hac fere specie ad occasum usque Heliacum Saturnus permansit.

27 Nov. hora 6 mat. satelles ægre conspiciebatur, ad orientem situs, & brachiorum linea superior. *fig.* 36.

16 Dec. 6 mat. videbatur satelles in maxima distantia orientali. *fig.* 37.

Anno 1657, 5 Jan. hora 12½ comes latebat.

18 Jan. hora 12, erat in mediocri distantia, orientem spectans. *fig.* 38.

A Saturno autem polum versus dimidio circiter gradu distabat fixa 3 magnitudinis, quæ est in ventre Leonis, longitudine respondens Virginis gr. 4. 5'. cum latit. borea gr. 2. 49'.

22 Martii hor. 7½ vesp. comes in maxima distantia orientali, & ansarum linea paulo superior; linea obscura non satis erat conspicua.

Scripsit mihi Hevelius se quoque pridie hujus diei comitem Saturni observasse ad orientem situm in maxima distantia, quod satis bene cum nostra hac observatione convenit.

29 Martii hora 7½ comes erat in mediocri distantia occidentem versus, & in eadem cum brachiis recta. *fig.* 39.

30 Martii, comes in maxima distantia occidentali. *fig.* 40.

Qua vespera Hevelius quoque ad eandem partem sibi conspectum asserit, sed difficulter, unde fortasse de distantia minus recte judicaverit, nam 1½ scrupulo tantum abfuisse à Saturno scribit.

18 Maji, comitem mecum observavit Bullialdus occidentalioreni Saturno, & in mediocri distantia. *fig.* 41.

19 Maji, proximus Saturno adstabat comes occidentem versus, vix ansarum linea superior. *fig.* 42.

*Brachia
Saturni in
ansas muta-
ri coepta.
TAB. XLIX.
fig. 7.*

Anno eodem 1657. 17 Dec. hora 5½ manè, quo die primum post ortum Heliacum Saturnum observavi, comes mediocriter distabat orientem versus, eratque ansarum lineâ superior. *fig.* 43. Brachia verò prope Saturni discum adaper-
ta ac bifida inveniebam, qualia ante non videram, lineâ quoque obscurâ versus inferiora ulterius promotâ.

Et

Et hac quidem figurâ permanfit, donec rursus radiis folis occultaretur.

18 Dec. comes erat in maxima distantia, orientem spectans, & in ipsa ansarum linea. *Tab. XLVIII. fig. 44.*

22 Dec. h. 6½ mat. comes non apparuit.

27 Dec. h. 6½ mat. comes occidentem versus in maxima fere distantia situs erat, & ansarum linea paulo altior. *fig. 45.*

Anno 1658. 24 Febr. h. 10, comes videri nequirit.

1 Mart. h. 10, idem comitis situs erat qui 27 Dec.

11 Martii, h. 10, comes difficile conspiciebatur, quippe propinquus admodum Saturno. Orientem spectabat, eratque ansarum linea aliquanto inferior, & quasi sub Saturno transiturus. *fig. 46.*

16 Mart. h. 10 quantum poterat à Saturno comes recesserat occidentem versus, vixque erat ansarum linea superior. *fig. 47.*

23 Martii, in contrariam partem pene tantundem distabat, lineâ ansarum rursus paulo superior. *fig. 48.*

3 Apr. paulo remotior erat à Saturno comes, quam 11 Martii, & occiduum latus tenebat, lineaque ansarum sublimior cernebatur. *fig. 49.*

Anno eodem 1658. 10 Nov. hor. 6½ mat. postquam Helice ortus esset Saturnus, jam latius aperiri ansæ videbantur, quanquam ob humilitatem sideris, surgentesque vapores, & auroræ claritatem non admodum distincte poterant discerni: comes occidentem versus adstabat, remotus ut cum maximè, ansarum linea nonnihil tamen superior. *fig. 50.*

16 Jan. anno 1659. hora 5½ mane, comes ad occidentem denuo situs erat, non longe à Saturno distans, linea autem ansarum integra fere Saturni diametro superior. *fig. 51.*

12 Febr. 6 mat. tantundem infra lineam ansarum descenderat, occidentalis rursus. *fig. 52.*

Forma verò ansarum distincte hac vice percipi potuit, quam TAB. LI. fig. 6. figura hæc exhibet; atque ea ad ultimam usque harum observationum talis extitit.

24 Febr. hora dimidia post mediam noctem, comes erat in mediocri distantia, orientem versus, rectâ ansarum paulo

lo inferior. *Tab. XLVIII. fig. 53.*

25 Febr. horâ eadem orientalis denuo comes cernebatur, una Saturni diametro ab ipso remotus. *fig. 54.*

Comes infra Saturnum transire visus.

14 Martii, hora 12, comes recta fere infra Saturnum observatus, unius circiter diametri longitudine distans; paulum tamen versus occidentem declinabat. *fig. 55.*

16 Martii, hora 11, ad latus occiduum positus erat, fere in maxima distantia, inferiorque paulo eâ quæ per ansas ducitur. *fig. 56.*

Idem supra Saturnum transiens.

21 Martii, hora 11, rursus ad eandem partem consistebat comes, motu latitudinis integra Saturni diametro supra ansarum lineam elatus; longitudinis motu tantum dimidia diametro distans. *fig. 57.*

22 Martii, horæ quadrante ante undecimam; rursus integra diametro superior erat rectâ ansarum, ac fere supra orientalis ansæ extremam cuspidem collocatus. *fig. 58.*

26 Martii, hora 10½ comes in maxima distantia videbatur; quam accuratè hac vice dimensus, inveni inter comitem centrumque Saturni intervallum trium scrupulorum primorum, 16 secundorum. *fig. 59.*

Hucusque observationes, & plures quidem quam necesse fuerat, recensui; rem gratam tamen iis me facturum ratus, qui triennio isto simul forsitan mecum novo Planetæ observando vacaverint; quibus procul dubio jucundum erit consensum mutuum suarum cum nostris observationibus deprehendere. Jam enim & Hevelius Gedani eum conspiceri ante biennium cœpit, ut supra quoque retuli, & in Anglia D. Paulus Nelius eques cum Clarissimo Wrennio ipso jam Anno 1655, sibi animadversum quandoque asserunt, nec tamen Planetam esse cognovisse donec à nobis essent admoniti. Nunc quo pacto periodum ejus investigaverim, quæque porro ad illam pertinent expediam.

Luna Saturni. periodus.

Pensitatis priorum aliquot mensium observationibus, cum circiter 16 dierum spatio Saturnum à Luna sua ambiri comperissem; nam quo loco animadversa fuerat 25 Mart. 1655, ad eum sexto decimo inde die rediisse visa est, 10 nimirum

Apr.




























































Apr. Itemque eodem anno die 3 & 19 Apr. idem situs fue-^{TAB. LI,}
 rat deprehensus; nec non 13 & 29 ejusdem mensis. Hisce^{fig. 3.}
 igitur animadversis, circulum descripsi orbitam comitis refe-
 rentem, in cujus centro Saturnus esset, atque in partes 16
 distribui, uti Schema subiectum exhibet. In eo comitem,
 secundum signorum ordinem, circumduxi; nulla tum qui-
 dem observatione ut ita statuerem cogente, sed quod in
 eam partem Luna quoque nostra & Jovis comites deferren-
 tur. Postmodum autem stabilita hypothesi, qua phænomena
 ansarum explicantur, patuit recte ita hunc motum me
 constitui. Porro in hoc circulo locum comitis quærendo
 quo in prima nostra observatione stetit, sæpiusque eun-
 dem retractando, ut observationibus per id tempus habitis
 congruerent etiam reliqua loca in circulo comiti assignata; ita
 demum commodissimè representari omnia visum est, si pri-
 ma observatione, nempe 25 Mart. 1655, ad numerum 12
 comes reponeretur, 3 partibus cum dimidia, qualium 16 cir-
 cumferentia continet à loco perigæo B remotus; nam dia-
 metrum AB ad visum nostrum vergere ponimus, & utrasque
 hujus epicyclii apsides determinare. Fuerit igitur 26 Mart.
 ad num. 13, Saturni comes: & 27 Mart. ad num. 14, & 3
 Apr. ad num. 5, atque ita deinceps iis orbitæ locis quæ ob-
 servatis primi anni exactè satis conveniunt, quanquam ali-
 quid subinde addendum auferendumve 16 dierum periodo
 existimaverim. Cum autem scirem etiam orbitæ terrestris,
 qua nos circa Solem ferimur, ipsiusque Saturni motus ratio-
 nem habendam esse, si accuratè comitis periodum definire
 vellem, proinde sequenti methodo eam deinceps investigavi.

Bina tempora quæsi quibus in apogæo vel perigæo co-^{Eadem perio-}
 mes versatus esset; quorum alterum inveni 14 Martii, anno^{dus accura-}
 1659, vesperi circa horam octavam. Quia enim hora noctis^{tius supputa-}
 12 tantum prætergressus erat locum perigæi quantum ex ob-^{ta.}
 servatione illo tempore habita apparet, oportet eum circiter
 octavam in perigæo ipso fuisse. Alterum similem comitis si-
 tum colligo contigisse die 23 Martii, anno 1656, hora iti-
 dem octava post meridiem. Etenim quia die 16 & 30 ejus-

dem mensis hora 8 p. m. æquali spatio à Saturno remotus apparuit, quibus diebus circa partem suæ orbitæ superiorem versatum constat, sequitur 16 Martii medium locum eum tenuisse inter puncta 1 & 2 circuli modò descripti; 30 verò Martii medium fuisse inter puncta 15 & 16; quoniam 14 dierum intervallum est. Ac proinde necessario perigæus fuit die 23 Mart. post meridiem circa horam octavam.

TAB. XLIX.
fig. 1.

Cognitis hisce temporibus describo circulum ABC, qui Saturni orbitam designet, itemque GF orbitam Telluris, in cuius centro Sol. Saturni locum sumo ad diem 23 Martii 1656, hora 8 post mer. fuisse in A; quo tanquam centro describo comitis orbitam DEL; Tellurem vero eo tempore fuisse in G. Locus itaque comitis erat in D, ubi recta GA circulum comitis intersecat, siquidem perigæum fuisse constat. Rursus posito ad diem 14 Martii 1659 hora 8. post mer. loco Saturni in B, tellure vero in F; necesse est comitem fuisse in H, ubi recta FB secat circulum ejus NHK. Est autem temporis intervallum inter 23 Martii 1656, & 14 Martii 1659, dierum 1086, quibus Saturnus ab A progressus est ad B: Comitem vero spatio dierum 16 circuitum unum absolvere scio, atque insuper exiguum quid, quod in annis tribus circuitum integrum conficere nequeat. Quum igitur divisus diebus 1086 per 16 fiant 67, atque aliquot dies abundant, apparet 68 circuitus integros nostri respectu comitem peregrisse, quia in H rursus perigæus fuit. Sit BK parallela AG. Si igitur 14 Mart. 1659, comes non in H sed in K positus fuisset; sequeretur eum hisce 1086 diebus sexagies octies orbitam suam decurrisse fixarum respectu, hoc est, totidem menses periodicos, sive sidereos potius, Saturni incolis præbuisse. Nam quando rectæ AD, BK secundum quas ex Saturno comes prospicitur, inter se parallelæ sunt, eundem inter fixas locum illis obtinere cernitur. Nunc verò insuper arcum KH emensus est, qui totidem est graduum quot apparenti motu Saturnus inter prædicta duo tempora transivit; quoniam angulus HBK æqualis est ei quem constituunt rectæ FB, GA, motus apparentis indices;

Fig. 1.  *a *b 27. Mart. 1655.		Fig. 2. a*  3. Apr.		Fig. 3.  *a c* 9. Apr.	
Fig. 4.  *a *c 10. Apr.		Fig. 5.  *a c* 11. Apr.		Fig. 6.  *a c* 12. Apr.	
Fig. 7.  *c 13. Apr.		Fig. 8. a*  17. Apr.		Fig. 9. *  19. Apr.	
Fig. 10. *  20. Apr.		Fig. 11. *  21. Apr.			
Fig. 12.  *	Fig. 13. * 	Fig. 14. * 	Fig. 15. * 	Fig. 16.  *	Fig. 17.  *
29. Apr.	3. Maii.	6. Maii.	7. Maii.	10. Maii.	11. Maii.
Fig. 18.  *					
12. Maii.					
Fig. 19.  *	Fig. 20.  *	Fig. 21. * 	Fig. 22. * 	Fig. 23. * 	Fig. 24. *c  a*
14. Maii.	15. Maii.	18. Maii.	19. Maii.	20. Maii.	27. Maii.
c*					
Fig. 25. 31. Maii.  a*	Fig. 26.  *	Fig. 27. * 	Fig. 28. * 	Fig. 29. * 	Fig. 30.  *
13. Iun.	16. Ian. 1656.	19. Febr.	16. Mart.	30. Mart.	18. Apr.
Fig. 31. * 					
18. Apr.					
Fig. 32.  *	Fig. 33.  *	Fig. 34.  *	Fig. 35.  *	Fig. 36. * 	Fig. 37. * 
17. Iun.	19. Oct.	21. Oct.	9. Nov.	27. Nov.	16. Dec.
Fig. 38. * 					
18. Ian. 1657.					
Fig. 39.  *	Fig. 40. 	Fig. 41. * 	Fig. 42.  *	Fig. 43. * 	Fig. 44. * 
29. Mart.	30. Mart.	18. Maii.	19. Maii.	17. Dec.	18. Dec.
Fig. 45.  *					
27. Dec.					
Fig. 46. * 	Fig. 47.  *	Fig. 48. * 	Fig. 49. * 	Fig. 50.  *	Fig. 51.  *
11. Mart. 1658.	16. Mart.	23. Mart.	3. Apr.	10. Nov.	16. Ian. 1659.
Fig. 52.  *					
12. Febr.					
Fig. 53. * 	Fig. 54.  *	Fig. 55. 	Fig. 56.  *	Fig. 57. * 	Fig. 58. * 
24. Febr.	25. Febr.	14. Mart.	16. Mart.	21. Mart.	22. Mart.
Fig. 59. * 					
26. Mart.					

ces; isque motus ex Ephemeridibus invenitur fuisse gr. 40, 48'. Sic itaque colligo; si diebus 1086 absolvit periodos 68, atque insuper gr. 40, 48', hoc est gr. 24520, 48', quantum ergo die una? Prodeuntque gr. 22, 34', 44", qui motus comitis diurnus est respectu fixarum. Ad mensis fiderei longitudinem inveniendam ita calculum instituo; si gr. 24520, 48' percurrit diebus 1086, quot dies impendat gradibus 360? fiunt dies 15, horæ 22, scr. 39. spatium quo ad eandem fixam Saturni incolis Luna sua revertitur.

Deinde medium motum diurnum à sole (qui minor est motu quo respectu fixarum comes progreditur, ut in nostra quoque Luna evenire novimus) ita reperio; Saturni motum medium diurnum qui 2 est minutorum, aufero ab invento motu diurno respectu fixarum gr. 22, 34', 44". unde supersunt gr. 22, 32', 44", diurnus motus à Sole. Atque hinc facile quoque mensis Synodici Saturnicolarum media longi- *Mensis Saturnicolarum vera longitudo.* tudo computatur. Nempe si gr. 22, 32', 44", uno die percurruntur, quot igitur diebus gr. 360? Fiuntque dies 15, horæ 23, scr. 13. Reliquis duntaxat 47 scrupulis ad dies 16. Atque illud etiam medium tempus est quo nostri respectu ad apogæum suum Saturni comes revertitur, sive intra quod cum Saturno bis conjungitur.

Cæterum quia ex motu comitis illud præcipue investigari meretur, quo pacto ad datum quodvis tempus situs ejus apud Saturnum exhiberi possit; ostendemus nunc brevissimam ad hoc calculi rationem, sequentium tabularum ope absolvendam; in quibus motum comitis æqualem qualis ex Saturno fixarum respectu appareret, proponimus. Hunc autem diurnum adsumsimus gr. 22, 34', 44", sicut modo inventus fuit. Etsi enim expertus sum, iterato eodem examine adhibitisque aliis duobus temporibus quibus comes fuit apogæus aut perigæus, aliquot secundis scrupulis majorem interdum minoremve eundem motum reperiri, istum tamen medium quodammodo inter alios retineri posse ratus sum, post plures abhinc elapsos annos facile emendandum. Nam & inæqualitas puto aliqua, & eccentricitas, quemadmodum in Luna nostra, ita circa hanc quoque, diligenti observatione olim deprehendi poterit.

Tabula motus æqualis Lunæ Saturniæ in orbita sua respectu fixarum.

In Annis Julianis.

	Gr.	Min.
1	321	18
2	282	35
3	243	53
4	227	45
5	189	3
6	150	21
7	111	38
8	95	31
9	56	48
10	18	6
11	339	24
12	323	16
13	284	34
14	245	51
15	207	9
16	191	2
17	152	19
18	113	37
19	74	55
20	58	47

In Diebus.

	Gr.	Min.
1	22	35
2	45	9
3	67	44
4	90	19
5	112	54
6	135	28
7	158	3
8	180	38
9	203	13
10	225	47
11	248	22
12	270	57
13	293	32
14	316	6
15	338	41
16	1	16
17	23	50
18	46	25
19	69	0
20	91	35
21	114	9
22	136	4
23	159	19
24	181	54
25	204	28
26	227	3
27	249	38
28	272	13
29	294	47
30	317	22

In Horis.

	Gr.	Min.
1	0	56
2	1	53
3	2	49
4	3	46
5	4	42
6	5	39
7	6	35
8	7	32
9	8	28
10	9	24
11	10	21
12	11	17
13	12	14
14	13	10
15	14	7
16	15	3
17	16	0
18	16	56
19	17	52
20	18	49
21	19	45
22	20	42
23	21	38
24	22	35

In Mensibus anni Juliani incuntibus.

	Gr.	Min.
Janu.	0	0
Febr.	339	57
Mart.	252	9
April	232	6
Maji	189	28
Junii	169	25
Julii	126	47
Aug.	106	43
Sept.	86	40
Octo.	44	2
Nov.	23	59
Dec.	341	21

Primo Jan. anno 1653, meridie, distantia Lunæ Saturniæ ab apogeo erat gr. 274. 21'. Saturni locus apparens, eodem tempore in Ω gr. 11. 41.

Si fuerit datus annus intercalaris, post Februarium unus dies, eoque & unius diei motus addendus est.

Harum

Harum tabularum auxilio primùm Epocham, quæ præcederet omnes observationes nostras, constitui diem 1 Jan. meridie, anno 1653. Nempe ex eo, quod 14 Martii, 1659, hora 8 pom. in perigæo Saturni Luna versaretur, collegi retrorsum numerando, ad prædictam diem 1 Jan. 1653, abfuisse illam ab apogæi loco gr. ^{Locus Lunæ Saturniæ} 274, 21'. Jam vero ut ad quodlibet datum tempus, e- ^{quomodo} pocha posterius, inveniatur ejus ab apogæo distantia, ^{supputetur;} (namque hinc facile deinde perspicere est quam propinqua Saturno apparitura sit) *addendus est ad motum Epochæ, motus comitis usque ad tempus datum, ex tabulis collectus; hinc auferendus Saturni motus apparens per idem temporis intervallum, qui ex Ephemeridibus cognoscitur; reliquum erit distantia comitis ab apogæo quæsitæ.* Ut si datum fuerit tempus dies 25 Martii, anno 1655, hora 8 pom. quæ prima nostra fuit observatio: Motus Epochæ, sive distantia Lunæ Saturniæ ab apogæo tempore Epochæ, quæ est gr. 274, 21', addita ad motum ejusdem Lunæ inde ab Epochæ ad tempus datum, colligit gr. 278, 31'; Hinc ablato Saturni motu apparente per idem tempus, qui invenitur gr. 22, 58', relinquuntur gr. 255, 33', distantia Lunæ Saturni ab apogæo, quæ inveniendæ erat. Unde apparet in circulo (Tab. LI. fig. 3.), ubi A apogæi locum referebat, fere ad numerum 12 illam constituisse, eoque in maxima propemodum distantia visam, uti revera contigit. Calculum autem subjicimus qui sic ordinatur..

	<i>Gra.</i>	<i>Mi.</i>		<i>G. M.</i>
Motus Epochæ,	274	21	h Locus app. 25	
Anni 2	282	35	Mart. 1655,	4 39 ¹¹ / ₁₂
Martii 1	252	9	h Locus app. tem-	
Dies 24	181	54	pore Epochæ,	11 41 ¹ / ₂
Horæ 8	7	32		
			Restat h motus	
			apparens,	22 58
Summa	278	31		
Motus Saturni apparens	22	58		

Reliquum 255 33 distantia Lunæ Saturni
ab apogæo.

*Ejus calculi
comprobatio.
TAB. XLIX.
fig. 1.*

Ut verò constet methodi ratio, intelligatur in superiori diagrammate, Saturnus die 1 Jan. 1653 positus fuisse in A, terra in G, Luna Saturni in E, gradibus 274, 21' ab apogæo L. Rursusque 25 Martii 1655, Saturnus ponatur in B, terra in F, Luna Saturni in M: sitque BN parallela AL. Quoniam igitur Lunæ motus periodicus inter bina illa tempora, additus motui Epochæ, hoc est, arcui LDE graduum 274, 21', efficit gr. 278, 31'; erit idcirco arcus NKM hoc graduum numero. Distantia autem Lunæ Saturniæ ab apogæo est arcus OKM, qui ut cognoscatur, auferendus est ab arcu NKM arcus NO. Ergo cum arcus NO totidem sit graduum atque angulus quem constituunt rectæ OF, LG; hujus autem quantitas definiatur apparenti Saturni motu inter duo prædicta tempora; apparet nos rectè ab inventis gr. 278, 31', hoc est ab arcu NKM, subtraxisse Saturni motum apparentem gr. 22, 58' (quippe æqualem arcui NO) ad consequendum arcum OKM, gr. 255, 33', distantiam nempe Lunæ Saturni ab apogæo.

Nondum hic locus est explicandi alium quendam hujus lunulæ motum in latitudinem, observationibus aliquot præcedentibus jam sese prodere incipientem; quo nempe ab linea recta per ansarum extrema transeunte plerumque exorbitat, apparetque circa Saturnum ellipsin percurrere, interdum quidem satis latam, alias verò angustiore, & rotundo

do Saturno lucente, in rectam lineam abeuntem. Etsi enim, ad verum lunulæ situm respectu Saturni determinandum, hujus quoque motus ratio est habenda, cum tamen causæ ejus cum cæterorum phænomenon causis prorsus conjunctæ sint, simul cum illis atque una opera exponendum censeo.

Illam igitur Systematis hujus partem alteram nunc aggredior, in qua formæ Saturni instabilis atque à se ipsa discrepantis ratio reddenda, tum qua periodo singulæ mutationes contingant dicendum est. Harum aliquas quæ nobis sese obtulere supra exhibui; sed ex parte tantummodo periodi complectuntur. Ideoque ut omnem phænomenon diversitatem ab iis quas dicemus causis pendere constet, aliorum quoque temporum observationes examinare necesse erit, quas à 40 atque amplius annis complures scriptis prodiderunt. At verò cum Saturni figuras omnes quas nobis delinearunt oculis lustro, eas multiplices adeo ac prodigiosas invenio, ut si qua hypothesis comminiscenda foret quâ cunctis fieret satis, nemo non, ut opinor, in ea excogitanda operam lusurus sit: cum nulla tam crebræ atque enormis transformationis causa esse possit, nisi ponatur ipsam Saturnii corporis molem identidem aliam atque aliam faciem induere, quod ab omni verisimilitudine est alienum. Quamobrem delectus adhibendus est observatis illorum, & inquirendum quænam ex iis fidem mereantur, quæve contra ut suspecta rejicienda sint. Quo in examine illud concedi nobis postulamus, ut quoniam Saturni comitem primi perspicillis nostris deteximus, ac quoties libet clarè intuemur, præferantur propterea nostra hæc illis quibus alii ad stellam eandem nequaquam pertingere potuere, licet quotidie Saturno observando intenti: eoque nostræ etiam circa formam planetæ observationes veriores habeantur, quoties eodem tempore nobis atque illis diversæ phasēs animadversæ fuerint. Adjuncta itaque tabella omnes eas exhibet quas ex variis auctoribus descripsimus.

Ac prima quidem harum formarum est quam Galilæus ad-

Tom. III.

Aaaa

Ha singula
examinan-
no. ~~ur.~~

TAB. LII.
fig. 1.

notavit anno 1610, in qua triceps Saturnus spectatur, minoribus duobus orbiculis majori utrinque adjacentibus. Hanc alii quoque permulti viderunt, aut certè se vidisse crediderunt. Nam si grandiores tubos adhibuissent atque optimis vitris instructos, haud dubiè pro triplici hac globulorum facie eadem sese illis obtulisset quam nobis diximus anno 1655, ac rursus anno insequenti, die 13 Oct. visam. Hoc enim inde colligimus quod dum illis bini ad latera globuli apparent, nobis porrecta in longitudinem brachia tubi nostri referunt; uti contigit eo ipso anno 1655, mense Aprili ac Majo, quo tempore trisphærica illa figura Ricciolo Helioque observata fuit. Etenim quo certius constet ob perspicillorum parvitatem talem hanc cerni, experimur nobis quoque, quoties breviori perspicillo, quinùm puta aut senùm pedum, Saturnum aspiciamus, binos globulos dictorum loco brachiorum apparere; etiam illâ anni 1658 jam existente phasi.

Quænam autem fallacis imaginis causa sit facile perspicitur. Quippe enim quum circa extremas cuspides amplio-rem lucem brachia hæc sive alæ emittant, quam qua parte medio Saturni disco adhærent, ubi semper umbræ aliquid intercedit, non modo cum manifesto jam bifida evaserunt, velut anno 1658, sed antea quoque ut anno 1657; non mirum est lucem illam intensiorem, debiliori interjecta, penitus à medio orbe separatam videri. Neque item rotundam ex oblonga fieri mirandum est, cum idem accadat omni figuræ eminus, nec satis distinctè ob exilitatem, perceptæ, atque eo magis quo fuerit lucidior. Itaque plane constat telescopiorum culpa phasin hanc vitiatam esse, licet observatores bona fide eam tradiderint.

TAB. LII.
fig. 2.

Quæ sequitur hanc nihilo melius se habet, à Scheinero observata anno 1614. Atque equidem dubito, perfectioribusne an deterioribus perspicillis, quam qui præcedentem dederunt, hancprehenderit. Quoniam hætenus quidem ad veram magis accedit, quod affixas Saturno auriculas exhibet; at contra in eo aberrat, quod plus justo earum contra-

tra-

trahat longitudinem. Hæc autem phasis tum sibi ipsi tum superiori fidem derogat, alterutram certe haud veram fuisse arguit; quoniam eodem tempore, anno nimirum 1614, altera à Scheinero, altera à Galilæo aliisque observata perhibetur. Ut proinde dubitandum non sit, quin & hæc similis extiterit et quam nos anno 1657 vel 1658 in commentaria retulimus. Neque aliud de tertia hujus tabellæ existimandum TAB. XLII.
fig. 3. est, quæ Ricciolo secunda ponitur, quamque anno 1640 & 1643 observatam scribit. Veritati tamen propior hæc videri potest, quod pro orbiculis oblongas atque olivæ similes figuras habeat.

Quarta est quam in locum trisphæricæ formæ Hevelius adsumpsit in libro *de Saturni nativa facie*; ubi secundum leges hypotheseos lux afferit talem quandoque cerni debere, quæ tamen ex visus hallucinatione in trisphæricam degeneret. Quanquam mihi ne istiusmodi quidem forma satis convenire hypothesei illius videatur, ut postea ostendemus. fig. 4.

Ejusdem Hevelii etiam quinta est, cui similem Gassendus fig. 5. edidit. Et hæc quidem satis prope cum nostra illa anni 1658 consentit, nisi quod partes brachiorum tenuiores, qua medio disco adnectuntur utriusque tubi non sint affecuti.

Idemque in 6 & 7 contigit, quæ ambæ ab Hevelio quoque traduntur, similes iis quas circa eadem tempora Ricciolus observavit, nimirum anno 1648, 1649 & 1650, quæ hic octavo nonoque loco exhibentur. Neque alia re differunt, fig. 6. 7. quàm quod medius orbis Hevelio nonnihil oblongus apparuit, cum Ricciolo rotundus fuerit: quodque hic connexas anfas cum inter se tum Saturno ipsi spectaverit, quæ Hevelio pauxillo à contactu abesse visæ sint. Verum ipse Hevelius causam cur separatæ videantur visus imbecillitati adscribit, cum alioqui reipsa cohærere eas Saturno statuatur. fig. 8. 9.

Tales autem & Eustachius de Divinis notavit anno 1646, fig. 10. 1647 & 1648, à quo editum schema ad num. 10 hic exhibuimus. Isque cum præstantissimus perspicillorum artifex habeatur, credibile est omnium emendatissimè nativam Saturni faciem nobis descripsisse, nisi quod umbras illas quæ in

schemate apparent, de suo, ut opinor, adjecit.

TAB. LII.
Fig. II.

Porro ab hisce figuris non multum recedit ea quæ à Fr. Fontana vulgata fuit, undecima tabellæ nostræ. Quam quidem & Ricciolus anno 1646 sibi visam scribit. Sed minus bonis telescopiis tunc usum crediderim, quam quibus modo dictas octavam nonamque detexit. Siquidem eodem anno 1646 septimam formam se vidisse testatur Hevelius, cui potius hic standum est. Nam Fontanæ observationes quominus in dubium vocare verear facit, quod etiam olim magis monstrosas formas Martis publicavit, veluti trilateræ cujusdam rupis, ac rursus aliter cum nigra in medio orbe macula; quæ nos cum aliis multis fabulosa comperimus. Hæc tamen, quam in Saturno prodidit formæ diversitatem, neque magna est, ut dixi, neque miranda.

Fig. 12. 13.

Plus negotii posteriores duæ, duodecima decimatertiaque, exhibituræ videntur: quarum priorem præter Blancanum etiam Gassendus prodidit; reliquam Ricciolus, aliunde tamen acceptam, nobis impertiit. Mirabilis præsertim illa Gassendi apparet. Verumtamen si bene perpendatur, facile est intelligere, quo pacto ab nona figura hæc defluxerit. Nam si tantum in locum rotundarum lacunarum, lunatæ substituantur, cornibus sese mutuo respicientibus, jam profecto nona illa existeret, quam Ricciolus adnotavit. Nihil mirum autem Gassendo ac Blancano, cum non magnis perspicillis uterentur, rotundas potius eas maculas quam lunularum forma apparuisse, siquidem partes harum acuminatas distinctè percipere illis negatum fuit. Tertiadecima denique quam Ricciolus à Fontana, itemque ab aliis Romæ visam memorat, anno 1644 & 1645: eam quoque pro octava ac nona suppositam esse certum est, vel etiam pro septima quam Hevelius prodidit. Non solum enim Ricciolus hanc sibi unquam oblatam negat, solas octavam, nonamque cum ansis se vidisse affirmans: sed & eodem anno 1645 Heveliano telescopio septima illa conspecta fuit. Nempe ansas Saturno conjungi rectè hîc Fontana animadvertit; sed cum præcipuus earum splendor à parte gibba procederet, orbicularem ibi figuram constituere visus est. Non

Non adscripsi phasibus hisce eam qua Saturnus ellipsis formâ conspectus dicitur, absque illis comitibus brachiisve; quoniam satis constat ob exilitatem telescopiorum, in ipso inventi hujus exortu, talem apparuisse; postquam verò ad majorem perfectionem eadem adducta sint, neminem amplius solitarium Saturnum vidisse nisi simul & rotundus fuerit.

Omisi etiam phænomenon aliud à nonnullis quidem relatum, sed vanum proculdubio atque à sola imaginatione profectum: quo nempe alterum quandoque Saturni sive comitem sive ansam altera minorem deprehendi asserunt. Ego vero existimo non tam ab indiscreta perceptione phasin hanc enasci (cur enim hanc ansam potius quam illam minorem dicerent?) quam quod ubi hypothesein quispiam commentus fuerit, ex qua talem prodire necesse sit, facile sibi ipsi imponat, quodque cupit evenire credat. Itaque viro eximio J. Hodiernæ qui ad nos è Sicilia Systema suum Saturnium, de quo pluribus mox agemus, misit, accidisse reor. Hic enim anno 1655 & sub finem anni insequentis, orientalem globulum reliquo minorem sibi apparuisse scribit, quum tamen eodem tempore, nobis inspectantibus, eadem utrique magnitudo, claritas ac figura adfuerit, non quidem orbicularis, sed rectâ in longitudinem utrinque à Saturni disco procedens. Quin etiam frustra causam hujusce rei ex hypothesei sua adducere Hevelius laborat, quum planè contrarium ex ea sequatur, perpetua videlicet utriusque ansæ æqualitas. Nam cum faciem Saturni nativam ejusmodi fingat, qualis superioris tabellæ ad numerum septimum exhibetur, utrâque scilicet ansâ pari formâ ac magnitudine corpori medio annexâ, non sinunt ullæ optidorum leges, ut qualicumque hujus corporis conversione, aliter una atque alia ansa sese videntam nobis præbeat. Nobis, inquam, in tam immensa positis distantia. Cum enim 3000 fere diametris Saturni maximis ab eo remoti simus, quo pacto existimat vir Clar. nos percepturos discrimen angulorum quibus propior remotiorque ansa spectari debeat?

Æquè parum rationi consentaneum est quod, ob eandem

*alteram ci-
tius ad me-
dium Satur-
ni corpus ap-
plicari.*

*Hevelii hy-
pothesis circa
ansas Satur-
ni examina-
tur.*

TAB. LII.
fig. 7.

illam distantiae differentiam, unam ansarum citius quam alteram cum medio disco coalescere posse existimat. Hoc enim, admissa licet Heveliana hypothesi, atque etiamsi centuplo præstantiores tubos haberemus, nequaquam tamen nobis visu deprehendere liceret. Cæterum & hujus sententiam viri solertissimi, quo certè nemo hac tempestate majori animo atque industria rem promovet Astronomicam, pluribus exponere, & aliorum insuper de propria Saturni forma opiniones, priusquam nostram adferamus, recensere placet, quas post editam de Luna Saturni observationem omnes accepimus. Hevelius igitur, in eo libro quem peculiarem huic argumento dicavit, causas phænomenon redditurus, sphæroidis oblongi figuram medio corpori Saturni tribuit, cui ab utroque latere appendices istæ, ut jam dixi, brachiorum sive ansarum forma, firmiter adhæreant, quemadmodum supra 7 loco expressimus. Porro simul cum Saturno hæc ansas, spatio 30 circiter annorum, circa minorem sphæroidis axem converti facit, qui quidem axis plano orbitæ Saturni sit ad angulos rectos. Enimverò his positis septimæ quidem superioris figuræ phasin nec non rotundam quoque representari certum est: ut nimirum in duobus eclipticæ locis oppositis ansata hac facie Saturnus appariturus sit, aliisque rursus duobus rotundus ansisque prorsus exutus. Quinimo & sexta ac quodammodo quinta quoque exhiberi possent, nisi quod conjunctæ cum medio disco ansæ videri debebant. Sed quarta phasis nequaquam ab eadem forma proficisci poterit. Nam cum ponatur Saturnus cum annexis sibi ansis, qualem 7 figura ostendit, rectus consistere ad planum eccentrici sui, atque ita perpetuo manere, licet circa axem proprium vertatur; eveniet quidem ea conversione, ut paulatim arctius ad medium orbem ansæ applicentur, veruntamen semper geminas lunas referent ejusdem cum dicto orbe altitudinis, minimeque in tam compressas formas abibunt. Nam quod hoc efficere posse declinationem Saturni orbitæ ab ecliptica Vir Cl. censet (ita enim mihi respondit cum difficultatem hanc ei movissem) si diligentius rem expendat in-

intelliget fieri non posse, cum Saturni orbita tantum 3 gradibus ab eclipticæ plano recedat, ut inde anfarum figuris ulla nobis percipienda mutatio adveniat. Cæterum nec veram quidem esse hanc quartam phasin superius indicavimus, sed cum hæc, sive trisphærica potius, minoribus telescopiis cernitur, nostris prægrandibus illam comparere quam adnotavimus anno 1655 & 1657. Quæ cum adhuc minus Hevelianæ hypothesei conveniat, clarius demonstrat illam scopum non attigisse. Neque sanè vel rotundæ phasis phænomena satis congruunt præstitutis ab Hevelio limitibus; ut patet non tantum ex prædictione ejus, eventu refutata, quæ ferebat rotundam phasin anni 1656 continuatum iri ulque in Mensem Septembrem anni 1657, cum tamen jam inde à 13 Oct. 1656, anfas Saturnus recuperaverit, neque postea amiserit; sed & ex Galilæi observatis circa rotundam phasin anni 1612. Solstitio enim hujus anni, Saturnus gr. 18, 22'. ✕ obtinens, tricorpor adhuc Galilæo apparuit, quum per tabulas Hevelii debuisset rotundus observari, ac vicissim 1 Dec. ejusdem anni 1612, cum versaretur in gr. 11, 27'. ✕ rotundus Galilæo repertus est, quo loco Hevelius trisphæricum expectasset.

Alteram hypothesein, ingenio suo acutissimo dignam, *Cause phæ-*
 summus Geometra E. Robervallius nobis exposuit. *nomen n Sa-*
 Quæ quidem Saturnum perinde ut cæteros planetas rotundum sta- *turni à Ro-*
 tuit; egredi autem è Zona ejus torrida, hoc est, quæ re- *bervallio ex-*
 ctiores solis radios excipit, vapores quosdam non admo- *cogitata.*
 dum spissos, qui procul à superficie ejus in sublime evolantes, undique illum ambiant, præterquam polos versus, ubi fortassis intensum frigus eos à sole attrahi prohibeat. Hi si quando omne spatium complent à Saturno ad usque extremam ipsorum regionem, elliptica forma, inquit, eum videri faciunt. Cum vero minus densi exoriuntur, interque eos ac Saturnum locus ingens medius relinquitur, ob tenuitatem solares radios non reflectunt, nisi inde ubi magis conferti iisdem opponuntur; quod nostri respectu necesse est fieri in partibus à medio disco Saturni remotioribus. Ubi
 pro-

proinde ansarum formam ex ea reflexione produci oportet, illasque inter ac Saturnum spatia utrinque obscura vel certè minus lucida intercedere. At quoties nullæ prorsus hujusmodi exhalationes ascendunt, rotundus planeta spectabitur.

Equidem rectè hoc consideravit vir sagacissimus esse aliquid quod æqualiter undique Saturnum circumdaret; suadente scilicet periodo Lunæ Saturniæ dierum 16, etiam ipsum circa axem suum, & breviori tempore, conversiones facere; ex quibus conversionibus intra paucos dies diversas phases nasci oporteret, nisi undique eodem modo materia quædam circumposita esset. Nec dissimili collectione usi fuëramus dum nostrum Systema effingeremus, ut postea dicetur. Verumtamen ex illa sua hypothese neque phasis nostra anni 1655 & 1657, satis commodè exponitur, neque certis Saturni orbitæ locis phases quæque peculiare sunt, quod tamen ita se habere observationes omnes evincunt, & rotundi Saturni inprimis. Hæ enim in duobus oppositis Eclipticæ locis accidere animadvertæ sunt, contraque in iis qui quadrante hinc distant, ansæ quam maximè expansæ: cum tamen causa non appareat cur aliis quidem orbitæ partibus nullos vapores Sol è Saturno, aliis maximam eorum copiam extracturus sit. Deinde vapores isti, nescio quam bene, at multum certè dissimiles nostris hisce qui terram ambiunt ponuntur, tum quod immenso spatio, prout hi solent, à Saturno ascendant, tum quod versus polos paucissimi aut nulli sint, cum circa terræ polos plures contra atque altiores existant quam circa Zonam torridam. De elliptica autem forma Saturni diximus supra, eam revera nunquam talem cerni, ut proinde causam ejus adferre superfluum fuerit.

Hodierna Siculi circa eadem phænomena opinio.

Nunc verò tuam quoque Hodierna doctissime sententiam excutiamus, quam novo nuncio meo de Saturni Luna & promisso Systemate excitatus, subito publicam fecisti. Meretur tuus ille in hæc studia non vulgaris amor, ut melioris notæ telescopia tibi suppeditentur, qui qualibuscunque etiam instructus, non cessas in cælum quæ licet eniti, summum-

nunquam illum planetarum, formarum varietate omnes frustrantem, certis legibus astringere aggressus es. At ille te quoque ut opinor delusit. Nam si posthac ea facie se tibi offerat, qua mihi anno 1655 & 1657 apparuit, vel ea quod quæ successit anno 1658, cognosces utique has non quadrare illi quod tibi finxisti corpori. Sphæroidi nimirum, cuiusmodi aut ovum aut prunum est, sed magis etiam oblongo quam Hevelianum illud, similem Saturnum imaginaris; in quo binæ utrinque sint maculæ lucis expertes, quales in tabula superiori phasis octava exhibet, quæ nobis interstitia illa inter ansas Saturni mediumque ejus discum referant. In-
TAB. XLIX.
fig. 6. 7.
TAB. LII.
fig. 8.
de conversiones hujus corporis circa axem, eadem periodo qua & Hevelius, definis; & rotundum tunc videri asseris, cum longior sphæroidis axis ad nos dirigitur, ideoque bis hoc accidere annorum 30. decursu. Verum enim cum prorsus rotundus ac orbe integro lucens appareat Saturnus, quoties brachiis suis nudatus est, expendendum tibi amplius relinquo, qua ratione lacunas quasdam expleas quas à maculis illis nigris superfuturas rectè ipse prævidisti. Præterea & phases illas te considerare velim quas hæc tua hypothesis non potest non producere, nec à quoquam tamen observatæ perhibentur. Quas ut facilius omnes coram inspicias, ovum aut aliud quod eam formam habeat, istis maculis ornatum, tibi proponito, atque ita ut Saturnum converti vis circumducito; videbis non pauca in tuo hoc Saturno phænomena quæ cælestis Saturnus nunquam exhibuit, atque alia rursus, quæ inesse huic certo tibi affirmare audeo, non videbis, ipsèque de Systemate tuo statues.

Quod autem rei veritatem neque tu neque illi viri egregii, quorum antea opiniones recensui, affecuti sitis, minimè mirandum est, aut vobis imputandum, utpote ad quos falsa plurima pro veris phænomenis delata sint; alia vero quæ de Saturno citra visus fallaciam observantur, non pervenerint. Quæ si nobiscum aspicere vobis contigisset, eadem inde quæ nos de nativa Planetæ forma collecturos fuisse credibile est. Me vero præter phases illas synceriores, etiam Lunæ Satur-

niæ motus jam inde à principio animadversus, non parum hîc adjuvit; siquidem ex hujus circa Saturnum gyratione, prima mihi spes de constituenda hypothese affulsit. Quæcujusmodi sit deinceps explicare aggredior.

*Nostri hypo-
thesis qua
ratione exco-
gitata.*

Quum ergo 16 dierum periodo circumferri Saturno planetam novum comperissem, haud dubiè minori etiam temporis spatio Saturnum in sese super axem suum revolvi arbitratus sum. Namque antea quoque, in eo cum Tellure hac nostra cæteris primariis Planetis convenire, semper credidi, quod singuli in se ipsis rotentur, atque ita tota eorum superficies lumine solis per vices gaudeat. Quin imo in universum ita cum magnis Mundi corporibus comparatum esse, ut illa quibus alia minora circumferuntur, ipsa quoque in medio posita minori tempore circumeant. Ita enim Solem diebus 26 circiter in se redire maculæ ejus declarant: circa Solem vero Planetarum singuli, inter quos Tellus quoque reponenda est, prout quisque remotior est ita tardius cursum conficiunt. Rursus Tellus hæc diurno spatio gyrat, quam Luna menstruo motu ambit. Jovis autem Planetæ quatuor minores, hoc est, totidem Lunæ circumstant, eadem hac lege, ut propiores quæ sunt, celeriore cursu ferantur. Unde Jupiter quidem breviori forsitan tempore quam 24 horarum converti censendus est, cum citima ei lunularum minus biduo impendat. Quæ omnia cum pridem cognovissem, Saturno quoque jam tum similem motum inesse judicabam. De celeritate autem periodi, comitis sui observatio me certiore fecit. Qui cum 16 diebus orbitam expleat, Saturnum in centro orbitæ situm, multo frequentius circumagi arguit. Jam verò & hoc credibile videbatur, omnem cælestem materiam, Saturnum inter comitemque ejus interjectam, eidem motui obnoxiam esse, hoc pacto ut quo Saturno propinquior est, eo magis ad ipsiusmet celeritatem accedat. Unde illud sequebatur denique, etiam appendices sive brachia Saturni, vel medio globoso corpori conjuncta atque affixa, simul cum eo volvi, vel, intervallo aliquo discreta, non multò tamen lentiorum periodum sortita esse.

Fi-

Figura porro brachiorum, dum hæc circa motum eorum mente agitabam, ejusmodi apparebat, qualis in superioribus observationibus anni 1655 expressa est. Nempe medium Saturni corpus omnino rotundum erat, brachia vero utrinque secundum eandem rectam lineam protendebantur, velut si axe quodam medius planeta trajiceretur, quanquam tubo illo 12 pedum quo tunc utebar, utraque versus extremas ^{TAB. XLVII, fig. 6.} cuspides paulo crassiora clarioraque videbantur, quam ubi mediæ sphaeræ cohærebant, ut indicat figura. Quum itaque quotidie eandem hanc speciem præ se ferret, intellexi id alia ratione fieri non posse, siquidem tam brevis esset Saturni eorumque quæ illi cohærent circuitus, nisi ut globus Saturni à corpore alio æqualiter undique cinctus poneretur, atque ita annulus quidam medium eum ambiret. ^{Annulo Saturnum circum-} Hinc enim, quacunque celeritate circumvolveretur, eandem semper faciem nobis oblatum iri, si nimirum axis ad istius annuli planum erectus esset. ^{gi.}

Et sic quidem ei quæ per id tempus aderat phasi causa sua constabat. Ergo deinceps expendere cœpi anne reliquæ etiam, quæ de Saturno ferebantur, eidem annulo imputari possent. Hoc autem non tardè successit ex animadversa, per frequentes observationes, brachiorum Saturni ad eclipticam obliquitate. Cum enim lineam rectam, secundum quam utrinque ea extabant, non sequi ductum eclipticæ, sed interfecare eam angulo 20 partibus majore comperissem, statui proinde planum annuli quem imaginatus eram tali circum ^{Eum ad E-} ter angulo ad eclipticæ planum inclinari. Perpetua videli- ^{cliptica pla-} cet constantique inclinatione, quemadmodum in tellure hac ^{num oblique} nostra plano æquatoris contingere notum est. Hinc autem ^{positum esse.} necessario illud sequebatur, ut diversis aspectibus nunc ellipsin satis latam, nunc eandem strictiorem, nonnunquam denique & rectam lineam idem annulus nobis exhiberet. Quod autem ansæ effingerentur, intellexi id inde fieri, quod non arctè Saturni globo annulus cohæreat, sed pari interstitio undique ab eo removeatur. Quibus proinde sic ordinatis, ac præterea adsumpta ea quam dixi annuli inclinatio-

ne, omnes mirabiles Saturni facies sicut mox demonstrabitur, eo referri posse inveni. Et hæc ea ipsa hypothesis est quam anno 1656 die 25 Martii permixtis literis una cum observatione Saturniæ Lunæ edidimus *.

* vide supra
pag. 523.

* vide pag.
526,

Erant enim Literæ a a a a a a c c c c c d e e e e e g h i i i i i i i
l l l l m m n n n n n n n n n o o o o p p q r r s t t t t t u u u u u *; quæ
suis locis repositæ hoc significant, *Annulo cingitur, tenui,
plano, nusquam cohærente, ad eclipticam inclinato.* Latitudinem vero spatii inter anulum globumque Saturni interjecti, æquare ipsius annuli latitudinem vel excedere etiam, figura Saturni ab aliis observata, certiusque deinde quæ mihi ipsi conspecta fuit, edocuit: maximamque item annuli diametrum eam circiter rationem habere ad diametrum Saturni quæ est 9 ad 4. Ut vera proinde forma sit ejusmodi qualem apposito schemate adumbravimus.

TAB. XLIX.
fig. 2.

Occurritur iis
qua de an-
nulo objici
possent.

Cæterum obiter hic iis respondendum censeo, quibus novum nimis ac fortasse absolum videbitur, quod non tantum alicui cælestium corporum figuram ejusmodi tribuam, cui similis in nullo hætenus eorum deprehensa est, cum contra pro certo creditum fuerit, ac veluti naturali ratione constitutum, solam iis sphæricam convenire, sed & quod anulum hunc solidum ac permanentem (talem enim arbitror) Saturno ita circumponam, ut nullis compagibus retinaculisve ei cohæreat, ac nihilominus æqualem ab omni parte distantiam servet, unaque cum Saturno motu velocissimo transferatur. Hos autem reputare illud oportet, non ex mera inventione atque arbitrio meo hanc me fingere hypothesein, sicut Astronomi suos epicyclos, nusquam in cælo apparentes; sed oculorum sensu, quo nempe reliquarum rerum omnium figuras dignoscimus, hunc quoque anulum satis evidenter me percipere. Neque verò causam esse cur corpus aliquod inter cælestia hac forma præditum existere nequeat, quæ si non sphærica at saltem rotunda est, atque ejusmodi ut motum circa centrum æquè commodè atque ipsa sphærica suscipiat. Nam minus utique mirandum, hujusmodi figuram tali corpori tributam, quam inconcinnam
quam-

quampiam minimèque tornatilem. Porro quum certo satis colligi posse videatur, ob similitudinem ac cognationem magnam quæ Saturno cum Tellure nostra intercedit, illum perinde ut hæc in medio sui vorticis situm esse, centrumque ejus versus omnia naturâ suâ tendere quæ illic gravia habentur; inde necessario quoque efficitur, annulum istum omnibus sui partibus æqualivi ad centrum nitentem, hoc ipso ita consistere, ut undiquaque pari intervallo à centro absit. Planè sicuti quidam contemplati sunt, quod si continuum fornicem per totum terrarum ambitum exstrui possibile esset, is absque ullo fulcimine semet ipsum esset sustentaturus. Ergo tale quid in Saturno reipsa effectum esse ne protinus absurdum credant, sed suspiciant potius infinitam naturæ potentiam & majestatem, quæ subinde nova suorum operum specimina in lucem promens, plura etiam superesse admonet. Verum ad propositum jam revertamur.

Diximus brachiorum lineam anno 1655 eclipticæ occurrere visam angulo partium plus minus 20. Quod cum præcipuè faciat ad phænomena ex hypothese nostra deducenda, antequam ad illa accedamus, ita se habere ex observationibus ostendendum est.

*Saturni major diameter
Æquatori
parallela
ostenditur.*

Cum igitur 25 Martii, anno 1655, Saturni in A positi ad stellam fixam B ea fuerit constitutio quæ hîc adnotata est, ut constet ex superioribus observationibus; die autem sequenti sicut in D & B, tertioque item die sicut in C & B, ita ut quotidie linea ansarum producta altius supra stellam B ascenderet; hinc perspicuum fit viam Planetæ A C nequaquam congruere directioni ansarum, sed diversam ferri angulo A C E, quem 20. gr. majorem invenio. Eo autem tempore nihil admodum mutabatur latitudo Saturni apprens, unde constat viam A C eclipticæ parallelam fuisse; ac proinde eodem illo 20 gr. angulo etiam ab ecliptica lineam ansarum deflexisse.

TAB. XLIX.
fig. 3.

Rursus 9 Apr. & tribus sequentibus continuè diebus ad aliam fixam C talis annotatus fuit Saturni positus qualis in L, M, N, O cernitur. Ubi similiter apparet, lineam an-

TAB. XLIX.
fig. 4.

farum OP, Saturni tramitem LO secare angulo LOP, qui 20 plus minus graduum deprehenditur. Eclipticam verò vel eclipticæ parallelam lineam RQ, angulo PQR, paulo etiam majore quam LOP, quoniam decrescebat per eos dies Saturni latitudo, quæ borea erat.

TAB. XLIX.
fig. 5.

Denique cum post stationem Saturnus ad fixam eandem C revertisset, factusque esset australior, die 27 Maji, eo positu juxta hanc adstabat quo hîc ad S designatus est. Die vero Maji postrema, eo qui ad T. Ita ut hic quoque linea SV, quæ secundum brachia ducitur, interfecet ST, quam quatrIduo illo Saturnus permeaverat, angulo VST, 20 gradus exiguo superante. Eclipticam vero vel eclipticæ parallelam XY, paulo minore angulo SXY, quoniam minuebatur adhuc continuè Planetæ latitudo, etsi directus jam incedebat.

Et his quidem intellectis, inclinatio brachiorum Saturni ad eclipticam, in dubium vocari amplius nequit, etsi, fateor, non admodum accuratè quanta sit hoc modo definiri possit. Si tamen 21 graduum per id tempus apparuisse ponatur, quantam ferè adductæ observationes comprobant, ac porro ad locum Saturni, qui tunc fuit, attendamus, inveniemus æquatori planè parallela brachia extitisse. Cum enim circa 3 gr. Virginis Saturnus versaretur, ubi parallelus æquatoris eclipticam interfecat angulo gr. 21. quo angulo etiam brachiorum linea illam interfecabat; manifestum est hanc secundum dictum parallelum atque adeo secundum ipsum æquatorem incedere debuisse.

Cæterum alio nunc irrefragabili argumento eandem hanc brachiorum inclinationem, & cum æquatore circulo parallelissimum confirmabimus. Suprà in observationum Historia ad diem 13 Octob. anni 1656, adnotatum est, motum Saturni, quo cum cælo quotidie defertur, secundum ipsam anfarum lineam procedere nobis visum; non ea die tantum, sed quotiescunque exinde idem inquirere libuit: inquiretur autem hoc modo. Telescopio ad Saturnum obverso, eo-que intra tubi aperturam, quam hic refert circulus AB, recepto, ita ut primùm in extremo margine consistat, vergat-
que

TAB. L.
fig. 1.

que linea brachiorum ad aperturæ centrum, immotum inde tubum sistimus, quo ita manente, mox totam tubi capacitatem A B percurrere Saturnus conspicitur, motu qui cælo tribuitur abreptus, atque exire ad partem oppositam B, quo tendebat brachiorum linea. Quoniam ergo Saturnus, hoc motu suo, circulum æquatori parallelum percurrit, cujus circuli pars est linea A B, manifesto patet brachiorum lineam æquatori quoque parallelam extendi. Hujus vero rei periculum facere licet quoties Saturni observandi facultas datur, neque alia certiori ratione directionem ansarum investigari posse credimus. Non defuere tamen qui diversimode idem examen instituerunt, quorum observationes sententiam hanc nostram comprobant. Nam Galilæus quidem ipse, qui primus phænomeni hujus indicium fecit, non omnino eclipticæ parallelam lineam, in qua Saturni comites positi essent, sibi visam scribit, sed evidenter ab ea deflectere; & fortasse, inquit, æquatori parallela est.

Post hunc vero quicumque rem examinaverunt, omnes hanc ejus conjecturam nequaquam aberrasse ostendunt, & in his Astronomi insignes Gassendus, Bullialdus & Ricciolus; quorum hic stellarum fixarum ope (alia tamen methodo quam qua modo nos usi sumus) non semel illum ansarum cum æquatore parallelismum liquido sibi compertum demonstrat.

Clarissimus tamen Hevelius, suis observationibus confusus, quæ cujusmodi fuerint non indicat, diversam hinc opinionem tuetur, contenditque excentrico Saturni parallelam esse brachiorum inclinationem, ut proinde eclipticæ quoque ferè conveniat, non amplius unquam quam $2\frac{1}{2}$ gr. deflectens: & hoc quidem cum circa nodos intersectionis Saturnus versatur. Quo fiet ut cum in Libræ & Arietis gr. 20, ubi limites statuuntur, positus fuerit, prorsus eclipticam sequatur brachiorum dispositio. At circa hæc loca maximam omnium inclinationem nostræ & aliorum observationes produnt, nam nostræ quidem, Saturno prope libræ signum atque in ipso signo versante, habitæ sunt; aliorum vero quædam cum

*Hevelii de
inclinatione
ansarum
contraria
opinio.*

*Ricciolus sibi
contrarius.
lib. 7. Al-
mag. novi.*

cum non procul ab opposito limite distaret. Ergo quod & plurium autoritas & propria experientia confirmat, haud cunctanter hac in re amplectemur: Neque vero dubito, quum certam semperque obviam observandi methodum tradiderim, quin ea adhibita vir veri amantissimus priorem sententiam volens abdicaturus sit. Illud utique nobiscum novit, frustra sive hunc sive alium quemlibet observandi modum, ad dirimendam inter nos hanc litem, usurpari, quando circa signa Cancrì vel Capricorni Saturnus commoratur, quoniam ibi discerni nequit utrum æquatori an eclipticæ parallela sit quæ per ansas ducitur, eò quod in his locis parallelus æquatoris eclipticam non interfecet sed tangat. Quamobrem miror etiam quo pacto Ricciolus, observationem Grimaldi adferens anno 1650, 18 Martii habitam, quæ probat eo tempore hanc ansarum lineam eclipticæ obliquam incidisse, non animadverterit contrarium ejus quod intenderat illa observatione evinci: si enim tunc, Saturno prope initium Cancrì agente, non erat eclipticæ parallela ansarum linea, ne quidem æquatori parallela fuerit, ut constat ex modo dictis. Semper autem æquatori parallelam cerni, & aliis multis observationibus docuit, & hac ipsa ostendere voluit. Ergo & experientiæ propriæ & sententiæ suæ, quam veram esse demonstravimus, planè hîc adversatur. Grimaldi autem observatio, quanquam alioqui in hoc negotio versatissimi atque experientissimi, vitio aliquo laborare censenda est; in qua forsitan priore fixa à Saturno contexta, vel ob fulgorem cerni prohibita, aliam deinde telescopio detexerit prius non animadversam, proque eadem illa habuerit. Nos verò, cum parallelam æquatori brachiorum lineam esse indubitatis rationibus satis jam adstruxerimus, deinceps ad annuli nostri hypothesein hunc ejus situm applicemus, indeque phænomenon causas singulas derivari doceamus.

*Ultior hy-
potheseos no-
stra expla-
natio.*

TAB. L.
fig. 2.

Estoque Saturni orbita, quam 30 circiter annis ille emetitur, ABCD; & in eodem plano (nam exiguæ declinationis gr. $2\frac{1}{2}$ non hic rationem habebimus) circulus FE, orbem magnum sive telluris orbitam referens, quam

an-

annuo spatio cum illa nos obimus: inque hujus centro G consistat Sol. Jam sicuti axem terra habet semper sibi parallelum, circa quem in sese volvitur, ita Saturnus quoque habere ponatur, qui sit ad annuli sibi circumdati planum erectus. Adeo ut circa unum eundemque axem gyrentur & corpus Saturni sphaericum, & annulus, & in eodem annuli plano positus Saturni comes sive Luna. Intelligatur autem Saturni hic axis axi terræ circiter æquidistans. Unde & planum annuli plano æquatoris nostri parallelum erit, ac proinde angulo partium $23\frac{1}{2}$ ad planum eclipticæ inclinabitur. Nam sic constituendum esse inde intelleximus quod ansarum Saturni inclinatio æquatori parallela deprehendatur, ut modo demonstratum fuit.

Nobis itaque in circulo EF circumlatis, varias annuli hujus, à Sole pariter cum Saturno illustrati figuras cerni debere perspicuum est, prout nimirum nunc has nunc illas orbitæ suæ partes Saturnus peragrabat. Nam eodem quidem orbitæ loco, quacunque tandem celeritate super axem suum converti dicatur, diversas phases non exhibebit, quoniam ea conversione situm annuli, nostri respectu, nihil immutat, sed ita demum si in eccentrico suo sive orbita spatio aliquo progressus fuerit. Cumque triginta fere annis ad loca eadem revertatur, hinc necessario intra id tempus omnium phasium vicissitudinem conspici necesse erit, atque alias quidem bis, alias quater: quas singulas nunc expendemus.

Primò itaque duos orbitæ locos esse liquet è diametro oppositos, velut A & C, in quibus Saturnus constitutus latissimas, maximeque omnium diductas ansas exhibeat; cum nimirum à plano per centra Telluris & Saturni actò, atque ad orbitæ Saturniæ planum erecto, annuli quoque planum ad angulos rectos secatur, eoque viginti trium circiter partium angulo supra planum annuli visus noster attollitur.

Cujus phaseos vera proinde forma, secundum ea quæ supra circa annulum definivimus, ejusmodi erit qualis hîc de-

Tom. III.

Cccc

linea-

Causa phaseos ansarum latissimarum.

TAB. L.
fig. 3.

lineata cernitur, majori ellipsis diametro ad minorem se habente fere ut 5 ad 2. Atque hæc ea figura est quam ab Hevelio, Ricciolo, & Eustachio de Divinis, anno 1648, 1649, & 1650 inspectatam fuisse diximus. Cujus itaque locum, hinc inter signa π & ♄ , inde inter \rightarrow & ♄ constitui oportere certum est, quandoquidem istis annis signum π Saturnus peragrabat & in ♄ signum transibat. Postea verò accuratius hunc locum latissimè ansarum phasæos inquirentes ostendemus eum cadere in $20'$ gr. π & \rightarrow .

Clavior Saturnus propter ansas cernitur.

Illud vero manifestum est, Saturnum, quoties hanc præfert speciem, multo lucidiorem sese intuentibus ostendere debere, quam dum nullis brachiis auctus est: quum tantundem luminis fere ab hisce emanet, quantum ab toto interiore disco. Atque ita semper quo propius versus Cancræ & Capricorni signa accesserit, eo majorem, aut certè splendidiorem, etiam absque telescopio appariturum; quippe annuli ellipsis semper latius se pandente, ut in sequentibus declarabitur.

Luna Saturniæ motus apparens ellipticus.

Sed & aliud circa hanc phasim observandum occurrit, motus nimirum insolens Saturnii comitis, qui quidem motus observationibus anni 1659 adnotari jam cæpit, verum hac latissimâ ansarum phasi existente, omnium evidentissimè ut sese prodat necesse est. Etenim quum eodem plano & annulus Saturni & comitis orbita contineantur, aut certè parum diversis; constat simul cum annulo etiam orbitam hanc latissimam omnium ellipsin nobis explicaturam: eoque futurum ut comes apparente motu altè supra Saturnum atque infra transire conspiciatur, ita ut corpore ejus vel radius nimium propinquis nequaquam nobis occultetur, quemadmodum aliàs accidere solet. Atque ea quidem ellipsis quam tali motu describere hisce in locis cernetur, longitudinem latitudinis suæ duplam sesqui alteram habere invenietur, sicut & annuli, quam diximus, ellipsis latissima. Verum recedente hinc Saturno sensim angustior ipsa quoque evadet, quippe annuli ellipsi semper similis, adeo ut primum fulgore planetæ transitus comitis conspici prohibeatur, deinde corporis

ris

ris ipsius Saturni ante vel pone comitem objectu. Ita namque observationes anni 1655 & 1657, quo tempore exilia & quam maximè compressa brachia erant, ostendunt comitem etiam in ea recta tunc perpetuo apparuisse quæ per utrumque illorum extendebatur.

Et hac quidem in re dissidet Saturniæ Lunæ cursus ab eo qui in nostrate Luna animadvertitur; siquidem hæc non æquatoris nostri sed magis eclipticæ plano obnoxia est, à quo quinque tantummodo partibus exorbitat.

Verum ad Saturni phases revertamur: quo posito ad H ^{Quomodo} vel I, vel ex adverso ad O vel P, paulo angustiores jam ^{ansarum ex-} annuli ellipsin, eadem tamen qua prius longitudine nobis ^{tudo sensim} aspici oportet, quum supra planum annuli minus altè hoc ^{contrahatur.} situ visus noster efferatur. Unde illa phasis exorietur quæ in tabellæ LII. serie octava posita est; vel, minus accuratè perspicere valentibus, ea quæ sexta est efficietur. ^{TAB. L. fig. 2.}

Rursum autem eum ad K aut L Saturnus pervenit, vel ad loca hisce opposita N & M, magis adhuc contrahi apparet minorem ellipsis diametrum, quippe magis ex obliquo inspectam. Ut jam ea Saturni facies proditura sit quam nos anno 1658 observavimus (T. XLIX. fig. 7.); quæ minus bonis telescopiis excepta degeneravit in illam quæ quinta in tabella LII. recensetur; pejoribus etiam in trisphæricam.

Deinde cum penè quadrante circuli à latissimæ phaseos ^{Quomodo} loco Saturnus remotus invenitur, velut in Q & R, vel S ^{patula vide-} & T; usque eo ellipsis annuli constringitur, ut si quæ adhuc ^{ri ansæ de-} rima supersit visui pervia, ea tamen propter exilitatem & reliqui corporis splendorem conspici nequeat; ac proinde Saturni forma ejusmodi appareat qualem anno 1655 & 1657 nos spectasse supra meminimus (T. XLIX. fig. 6. T. LI. fig. 5), quæ quomodo aliis omnibus hætenus telescopiorum culpâ trisphærica existimata sit, antea quoque ostensum est.







Sola dehinc rotunda phasis explicanda restat; ad quam priusquam transeam, de inclinatione magnæ Saturni diametri, sive ansarum lineæ, ut supra eam vocavi, pauca adnotanda sunt.


*Maiorem
Saturni dia-
metrum ne-
cessario æ-
quatori pa-
rallelam
semper vi-
deri.*

Ajo itaque in omnibus prædictarum phasium, posito, ut hætenus iecimus, parallelum esse annuli planum plano æquatoris, necessario fieri ut major diameter Saturni, sive ellipseos eius cui annulus assimilatur, semper æquatori circulo parallela spectetur, planè quemadmodum revera contingere nostris aliorumque observationibus supra probavimus. Quum enim visus noster respectu cælestium in centro æquatoris circuli, atque adeo in plano ejus collocatus sit, cui plano planum annuli parallelum ponitur, necesse est maximam longitudinem annularis ellipseos eidem æquatori circulo parallelam extendi: eâdem prorsus ratione, quâ, si in aëre plano terræ parallelum circum suspendamus, oculo nostro altiore, indeque passibus aliquot retro abistamus, major diameter ellipseos quam suspensus circum visui offert Horizontis circulo æqui distare comperietur. Hoc enim proculdubio eventurum, cuivis vel citra experimentum intelligitur.

*Revera ta-
men mini-
mum quid
nonnun-
quam aber-
rare.*

Esse autem annuli planum plano æquatoris omnimodis parallelum, etsi observationibus, quas quidem expendimus hætenus, minimè repugnantibus statuere licuit; exiguum tamen quid deesse, quo minus omnino perfectus sit eorum parallelismus, alia ratione deprehenditur. Etenim si prorsus inter se parallela forent utraque plana, sequeretur ut cum in pr. γ & α Saturnus spectaretur, omnium arctissima annuli ellipseos, & quasi recta linea existeret, latissima verò in pr. ϵ & ψ . Atqui arctissimam annuli phasium in gr. $20\frac{1}{2}$ α & κ cadere invenimus, ut in sequentibus demonstrabitur, ac proinde latissimam in gr. $20\frac{1}{2}$ π & η . Non igitur exactè parallela esse plana annuli & æquatoris hinc patuit, ideoque nec semper revera parallelam, licet ita videatur, magnam Saturni diametrum æquatori circulo fore. Quæsitoque per sphaerica triangula, quibus in locis & quanta sit maxima inclinatio, inveni eam gr. 4 8'. quando Saturnus in gr. 25, 15'. π & η versatur. Tali nimirum angulo, nec unquam majori, antarum linea circum æquatori parallelum per Saturnum transeuntem iis in locis interfecabit; qui cum sit adeo exiguus,





guus, vix puto observabilis erit: aliis autem locis multo minus. Nam iis quidem quæ quadrante Zodiaci inde absunt, nempe cum gr. 25.15'. π aut \times Saturnus obtinebit, prorsus parallela æquatori eadem ansarum linea conspicietur. Eclipticæ vero parallela fiet Saturno gr. 20½ π aut \rightarrow tenente: quippe quam in locis per quadrantem circuli inde distantibus, nempe in gr. 20½ π & \times , maximo angulo interfecat. Hunc autem maximum angulum quo linea ansarum eclipticam interfecat esse circiter gr. 23½ observationibus anni 1655, 1656 & 1657 apparuit, talemque ad ista supputanda adsumsimus. Fortasse autem, longo sæculorum lapsu, sensim omnia hæc loca mutari continget, simili quodam motu Saturni globum inclinante atque in Tellure nostra est is qui præcessionem æquinoctiorum efficit: atque ita phasium quoque omnium loca transferri necesse erit. Hoc vero non tam facile in cæteris phasibus quam in rotunda patefcet, ad cuius considerationem deinceps veniendum.

Schema itaque repetenti manifestum est Saturnum in-
 tegro orbitæ suæ circuitu non posse non ad eum locum bis ^{Rotunda phasicos causas.} pervenire, (esto in B & D) ubi planum annuli recta ad nos dirigatur, productumque in oculos nostros incurrat. Quod quidem in locis è diametro oppositis contingeret, inque iisdem perpetuò, si ex Sole Saturni motum prospiceremus; at nunc propter motum Terræ in sua orbita annum, nonnulla oritur inæqualitas. Annulo igitur secundum latus inspecto, nec nisi rectam lineam referente, quum neutra planarum ejus superficierum appareat, ad nihilum rediguntur brachia ac prorsus intereunt, solo rotundo Saturni corpore quod intueamur reliquo. Cujus phænomeni primum testem Galilæum supra commemoravimus, qui anno 1612 simplicem hanc Saturni formam observaverit. Inde verò post annos 30 Gassendum aliosque complures; ac nos etiam denique anno 1656. Verum enim si hunc tantum annuli positi ansæ evanescerent, nequaquam tanto tempore perstare rotunda phasis posset atque observationes testantur, toto enim semestri rotundus Saturnus spectatus fuit. Quamobrem por-

ro quærendum est quæ causa, præter eam quam jam attulimus, anfas quandoque cerni prohibeat: est autem quæ sequitur manifestissima.

Frequenter nimirum evenire constat Saturno circa locos modo dictos B vel D commorante, ut tum hujusce tum Solis respectu ita positi simus, ut si produci planum annuli intelligatur, id inter nos ac Solem transiturum sit: velut in schemate, cum Saturnus prope D consistit, nos autem cum Tellure in E. Quo fit ut illam annuli superficiem quæ solis radiis illuminatur conspiciere nequeamus, sed alteram tantummodo quæ tunc umbræ vices patitur. Nulla itaque ne hîc quidem brachia Saturno annulus præstat, sed oculis nostris ereptus orbem ac solitarium relinquit. Atque hæc causa ad continuos quinque aut sex menses rotundæ phasi interdum sufficit, uti postea accuratius docebimus.

*Quid sit in
Saturni disco
Zona nigri-
cans.*

At non immerito dubitari possit, cur & hîc & præcedenti quoque annuli positu cum planum ejus rectâ ad nos vergit, non saltem exterior ejus limbus à Sole illustratus appareat: quid enim dicemus? anne tam tenue esse totum annuli corpus, ut licet revera splendeat extrema ejus margo, exilior tamen ipsa sit quam quæ nostris telescopiis percipi possit? Nequaquam: verum res eadem quæ causam hanc prætexi vetat, eadem veram causam quoque haud dubiè suppeditat: fascia nimirum illa reliquo Saturni disco obscurior, quam & rotundo illo apparente, & rursus brachiis aucto, nobis visam narravimus. Hæc ita comparatum esse exteriorem illum annuli ambitum evincit, ut aliqua quidem crassitudine præditus sit, verum ejus naturæ, ut solis lumen, vel nihil prorsus, vel certè leviter admodum reflectat. Quia enim in Saturno etiam brachiis prædito tractus iste nigricans animadvertitur, nempe cum superficiem annuli eandem quæ à Sole illustratur despiciamus; quo positu nulla ejus regio obumbrata oculis nostris obversa est; sequitur nigredinem illam ex alia causa manare non posse, nisi quod ejuscemodi quadam materia annuli margo cooperta sit, quæ non perinde ut reliqua ejus superficies reperiendo lumini sit idonea.

nea. Sic in lunari quoque disco maculas aliquas, cæteris partibus multo obscuriores, cernimus; quæ quidem non planè omni luce defectæ apparent, verùm si æquè procul ac Saturnus à Sole distarent, ubi tantum centesimam partem ejus, quod nunc accipiunt, luminis ab illo mutuarentur, credibile est penitus nobis invisibiles fore, nisi quatenus lucidioribus undique terminantur; præsertim si tenuem modo lineam, ut Saturnii annuli margo, constituerent. Alioqui vel illud forsitan dici possit, materiam quandam aquæ similem, aut certè lævi & splendida superficie præditam, extrema annuli præcingere, quæ unico tantum veluti puncto Solis radios reflectens, nequaquam nobis conspicua erit, ut rationibus opticis clarum est.

Sed quæ ad rotundam phasim attinent ulterius etiam expendamus, in qua plura animadvertenda supersunt. Diximus paulò ante, tunc eam potissimum existere, cum productum annuli planum inter nos Solemque medium transit. Hoc verò quando contingat, quo pacto cognoscere possimus, atque ex Astronomicis tabulis definire, deinceps explicandum est. Sit itaque denuo Saturni orbita ABC , Telluris annua DEF , locus solis L . TAB. I.
fig. 4.

Jam quia positum fuit, Saturni axem, qui ad annuli planum erectus est, semper sibi parallelum ferri, sequitur communem quoque planorum annuli & orbitæ intersectionem uni cuidam lineæ semper fore parallelam. Esto ea linea per Solem ducta AC , quæ proinde in cælo locum Saturni æquinocriorum designabit. Posito igitur Saturno in H , Tellure verò in D , utroque ad partem eandem rectæ AC , verum ita ut minus ab ea Saturnus quam Tellus distet: necessario intersectionis linea planorum annuli & orbitæ Saturni HM , quæ nimirum ex H parallela ducitur AC inter Solem L , Terramque in D positam excurret, ac propterea annuli quoque planum manifestò inter utrumque medium incedet. Quod ubi contingit, rotundæ phasi locum esse demonstravimus. Contra verò, cum Saturnus quidem ac Tellus ad eandem partem rectæ AC consistunt, verum ita
ut

ut illa propius ad eam accedat, ut cum ille est in N, hæc in F: vel cum diverſas partes reſpectu AC obtinent, velut cum Saturnus eſt in N, Tellus in f; utroque caſu linea interſectionis annuli atque orbitæ Saturni, ut hic NQ, quæ nimirum ipſi AC æquidiftans acta eſt, Terram Solemque ab eadem parte habebit. Unde intelligitur, utrovis poſitu eandem annuli ſuperficiem à Sole & nobis aſpici: quod requiri jam ſupra advertimus, ut brachia Saturni aut anlæ apparere poſſint. Quanquam ne ſic quidem ſemper cernuntur, uti poſtea manifeſtum fiet.

*Saturnus
quando ne-
ceſſario ro-
tundus ſpe-
ctari debeat.*

Hi autem diverſi ſitus ut ex tabulis Aſtronomiſis parvo negotio cognoſcantur, indeque rotunda phaſis, quatenus ab hac cauſa pendet, prædici poſſit, ſciendum eſt, quancunque Saturni locus apparens locutque ex Sole ſive eccentricus, diverſas partes obtinent ejus loci quem inter fixas designat recta AC, (quam in gr. $20\frac{1}{2}$ m & x incidere poſt hæc oſtendemus) id ejuſmodi ſitum Saturni ac Telluris indicare qualis in H & D, ut nimirum ab eadem parte ambo reperiantur rectæ AC, atque propior huic Saturnus conſiſtat; eoque tunc rotundam phaſin conſpiciendam dari. Illo enim poſito, ſit Saturnus in H. Primùm itaque dico ab hac parte lineæ AC etiam Tellurem conſiſtere. Etenim ſi ad alteram partem ſita eſſe dicatur, velut in P; liquet rectam ex P ad H ductam & verſus fixas porro continuatam, quæ locum Saturni apparentem, itemque rectam LH, quæ producta locum ejus ex Sole demonſtrat, ab eadem parte puncti æquinoctiorum, quod LA producta inter fixas determinat, utraque ea loca exhibituras; contra quàm poſitum fuerat. Eſt ergo Tellus neceſſario ab eadem parte lineæ AC, qua Saturnus H. Eſto jam ea alicubi puta in D. Quoniam igitur DH ad fixas protracta locum Saturni apparentem designat, LH vero, uti diximus, locum ejus eccentricum, inter quæ loca intercedere ponitur locus æquinoctiorum quò tendit LA, neceſſe eſt rectam DH tandem ipſam LA interſecare, ideoque punctum D, locum videlicet Telluris, amplius diſtare à linea AC quam punctum H in quo Saturnus.

mus. Constat itaque quando locus Saturni apparens & eccentricus ad partes diversas cadent loci æquinoctiorum, necessario tunc Tellurem cum Saturno ab eadem parte rectæ AC inventum iri, atque ita ut minus ab ea Saturnus removeatur. At vero quoties apparens locus Saturni itemque eccentricus ab eadem parte habentur rectæ AC , sive loci æquinoctiorum Saturni, inde certo colligi ajo, Tellurem ac Saturnum ita positos esse uti in F & N . Nempe ut vel diversas ad partes ipsius AC collocati sint, vel ad easdem quidem, sed ita ut Saturnus amplius ab ea quam Tellus distet. Ideoque, secundum ante demonstrata, eandem annuli superficiem quæ à Sole illustratur oculis quoque nostris obversam esse. Nam cum LN producta ostendat inter fixas locum Saturni excentricum; FN vero locum ejus apparentem, ac uterque cadere ponatur in partem eandem loci illius quem inter fixas exhibet LC : manifestum est rectam FN ab N porro productam neque secare debere neque parallelam esse rectæ LC , sed semper ab ea magis recedere. Quare necessario punctum F vel propinquius erit rectæ AC quam punctum N , si sint ambo ad eandem partem dictæ lineæ; vel N ad istam, F ad illam partem situm erit. Quod probandum erat.



Denique advertendum etiam, quando vel Saturni locus ex Sole, vel apparens locus incidit in alterutrum æquinoctiorum, quæ determinat producta AC , nempe in gr. $20\frac{1}{2}^\circ$ æ vel æ , necessario quoque rotundam phasin exoriri. Si enim locus ex Sole inibi reperiatur, hoc est, si Saturnus occupet punctum A vel C , tunc planum annuli protractum per Solem transire liquet: unde sequitur neutram annuli superficiem tunc luce aliqua perfundi. Rursus vero cum locus ejus apparens incidit in dictos æquinoctii locos, hoc est, quando recta à Tellure ad Saturnum extensa parallela incidit ipsi AC ; velut cum Saturnus situs est in O , tellus in f , eo positu productum annuli planum oculo nostro occurrere constat, quoniam communis ejus intersectio cum plano orbitæ Saturni ipsa est Of recta: Unde fit ut neutram superfi-


ciem annuli, etiam si altera jam illarum Solis radiis splendeat, conspiciere possimus.

Nunc illud videamus, quemnam Eclipticæ locum teneat
*Quanam Saturnicolis
 sint loca
 æquinoctiorum.* recta A C Saturni æquinoctiorum linea: quam quidem in
 m° & x° gr. $20\frac{1}{2}$ cadere diximus, verum qua ratione id ex ob-
 servationibus collegerimus declarandum est.

Saturnum brachiis carentem ac prorsus rotundum spectavimus à Mense Decembri anni 1655, usque in Jun. 1656. Quæ phasis ex ea causa, quam modo retulimus, tanto tempore durare potuit, si linea A C eum ipsum locum obtinere ponatur quem & Saturnus tenebat tunc cum Soli esset oppositus, hoc est, m° gr. 20. Hinc enim fieri debuit ut toto illo tempore Saturnus ac Tellus ab eadem parte lineæ A C simul consisterent, atque ita quidem ut Saturnus ei vicinior esset; semel autem eodem momento, nempe oppositionis tempore, in ipsa A C reperirentur: unde non nisi rotunda phasis potuit existere, sicut ex prædictis intelligitur.

Cæterum uti non admodum verisimile est (etsi fieri potuerit) eo ipso tempore oppositionem illam contigisse cum Saturnus in æquinoctii sui linea A C situs esset, ita non verebimur hanc lineam dimidio gradu emovere loco illo, atque in gr. $20\frac{1}{2}$ m° eam transferre; quum hoc posito melius satisfiat aliis rotundæ figuræ observationibus, anni 1642 & 1612, ac nihilo secius nostra illa anni 1656 conciliari quæat, ut ex sequentibus liquebit. Posita itaque A C in gr. $20\frac{1}{2}$ m° & x° sequitur rotundam phasim, ab usque principio Augusti anno 1642, ad Febr. 1643, continuè perseverasse, prorsus quemadmodum à Gassendo aliisque fuit adnotatum. Erat enim ineunte Augusto locus Saturni eccentricus in 20° gr. x , hoc est, dimidio gradu præcedebat locum æquinoctii: at locus apparens in 24° gr. x , atque ita gr. $3\frac{1}{2}$ eundem æquinoctii locum transierat. Quare superficiem annuli illuminatam Gassendus nequaquam conspiciere potuit, sed eam quæ tenebris tegebatur sibi obversam habuit. Et sic quidem locus Saturni apparens eccentricusque perpetuo diversis in partibus loci æquinoctiorum perstiterunt usque ad initium fere Febr.





Febr. 1643, unde non nisi rotunda forma prodire potuit, ut antea demonstratum est.

Idem quoque phænomenon anno 1627, proculdubio sese obtulit, sed observatorum penuria an supinitate præterit inobservatum; cum nemo, quod sciam, prodiderit, utrum Saturnus eo anno cum globulis apparuerit an secus.

Anno autem 1612, à Galilæo primo omnium rotunda facie animadversus est. Scribit is ad Marc. Velferum Epistola de Solaribus maculis 3. circa solstitium quidem illius anni, tricorpore adhuc Saturnum sibi visum, inde verò, cum duobus mensibus atque amplius telescopio eum inspicere omisisset, ut qui nullam formæ mutationem animo præfageret, postea nihil minus cogitanti solitarium oblatum, talemque deinceps in illam usque diem, quæ prima Decembris erat, permanisse. Quæ quidem observatio hætenus hypothesei nostræ consentit, ut si eo transitu lineæ A C rotundus apparere Saturnus debuerit, id hoc anno neque alio accidere fuerit necesse. Sed cum per totum hunc annum Saturni locus, quæ apparens, quæ eccentricus, ab eadem parte manserit loci æquinoctiorum, sive \times gradus $20\frac{1}{2}$; videbatur ex præcedentibus colligendum, salvis brachiis suis eum præterlabi potuisse, quod tamen contra evenit. Et sexto quidem Septembr. dicti anni 1612, quo tempore jam rotundum Galilæus reperit, erat ejus locus ex Sole simul & apparens, in gr. 14, 44' \times . Hoc est g. 5. 46' citra locum æquinoctii sui. Adeo ut solares radii atque ii qui à visu terricolarum fluebant in eandem annuli Saturnii superficiem inciderent: non tamen angulo g. 5. 46' desuper in planum ejus directi, sed gr. 2. 15' duntaxat. Hic enim elevationis angulus, ut hoc obiter adnotemus, sic se habet ad illum gr. 5. 46', quo Planetæ locus distat ab æquinoctio suo, quemadmodum apud nos declinatio Solis ad ejusdem ab æquinoctio distantiam. Quandoquidem non aliud respectu Saturni est planum annuli sui, atque nobis est planum æquatoris, similique etiam angulo ad eclipticæ planum inclinatur. Proinde cum cognita est distantia loci Saturni eccentrici ab æquinoctio suo,

si scire libeat quali angulo Solis radii in superficiem annuli deferantur; quærendum in tabula declinationis Eclipticæ, qualis apud Astronomos in usu est, quanta sit declinatio loci alicujus qui tantundem à princ. Arietis absit. Ea enim est ipse angulus quæsitus. Ac simili quoque ratione cum data erit distantia loci Saturni apparentis ab æquinoctio suo, hoc est, à gr. $20\frac{1}{2}$ ♁ aut ♋, invenire licebit quonam angulo desuper planum annuli nos inspectemus; qualemque propterea ellipsin ille nobis exhibere debeat. Ex eadem nimirum tabula capiendo declinationem huic distantie à pr. Arietis respondentem, quæ declinatio rursus hîc quæsitum angulum æquat. Quorum demonstrationem adferre operæ pretium non est, quippe quam Astronomiæ periti facile perspicient.

Illud verò videndum, qui evenerit ut visu nostro ac Sole simul supra planum annuli plus quam 2. gr. altis, nullum tamen brachiorum apud Saturnum vestigium apparuerit. Anne hæc fortasse causa fuit quod ellipsis annuli, tam oblique inspecta ut magis tenuissimæ lineæ similitudinem præferret, exiliorem lucem emittebat quam quæ Galilæi tubo percipi posset. Hoc quidem non improbable videri queat, nisi eodem tubo, circa solstitium ejusdem anni 1612, brachia Saturni sive bini illi, ut tum putabant, satellites Galilæo animadversis fuissent, quo tempore Saturnus observabatur circa gr. 18, ♋. hoc est gr. $2\frac{1}{2}$ ab æquinoctio suo remotus, ideoque visus noster vix uno gradu plano annuli superior. Etenim si hoc positu brachia cerni potuere, multo clarius cerni debuissent tunc cum gr. 2. 15' supra idem planum visus extolleretur, initio nimirum Septembr. magisque etiam 14. Nov. ejusdem anni 1612, tempore stationis Saturni, quia tunc gr. 11. 10' ♋ tenebat, eoque gr. 9. 20' ab æquinoctio suo aberat; adeo ut angulo gr. 3. 42' radii visus in planum annuli descenderent. Atqui hîc, vel certe circa hæc loca brachiorum experts mansit, quum satis utique diligentem ac intentum observationibus Galilæum fuisse per eos dies credibile sit, qui rotundæ phaseos miraculo nuper esset excitatus.

Ita

Itaque in tenuitatem brachiorum, cur ea penitus latuerint causa conferri non potest. At neque transponendo amplius Saturni æquinoctiorum locum, quicquam proficimus; ne quidem si mobilem statuamus lento quodam progressu, ad similitudinem nostrorum æquinoctiorum, quæ sensim in præcedentia referuntur. Quamobrem non aliam hujus rei causam esse crediderim quam quæ nunc dicetur.

Certum est cognitæque experientiæ, superficiem quamlibet ab eodem lumine plus minusve illustrari, prout directis vel obliquis radius exposita est: quod & à Galilæo, dialogo I. de Mundi systemate, optimè est demonstratum. Quamobrem cum exiguo admodum angulo supra annuli Saturnii planum Sol attollitur, puta gradus unius vel duorum vel etiam duorum cum dimidio, hoc est, cum Saturni locus eccentricus non ultra gr. 6. ab æquinoctio suo aberit, etiam prætenui tantum luce annuli superficies à Sole impertietur. Hanc autem, ita leviter splendens, verisimile est à meris tenebris nos discernere non posse, præsertim Saturnii globi vicino fulgore præpeditos; eoque ansas tunc nullas animadverti. Qua tamen in re illud ante omnia statuere necesse est, superficiem annuli non esse asperam montibusque obstitam, veluti maxima ex parte Lunæ nostræ est superficies: sed æqualem planamque velut in iis Lunæ regionibus, quas nonnulli maria esse ob insignem planiciem arbitrati sunt.

Alioqui enim, sicut Luna plena circa disci sui extrema, ubi tamen obliquos Solis radios excipit, nihilo languidiori lumine quam versus medias partes cernitur, scilicet quia illic tota montosa atque aspera est, ita annuli quoque superficies si simili natura prædita foret, non secus obliquè incidentibus radiis quam directis splenderet. Quamobrem necessario plana, uti diximus, censenda est. Atque hinc jam intelligere licet cur Galilæo à Mense Septembri anni 1612. usque in Febr. 1613, quoad nempe Heliacè Saturnus occideret, nullæ circa eum ansæ conspicerentur. Quia nempe inde à Septembri continuè locus Saturni eccentricus ad æquinoctii locum appropinquavit, eoque altitudo Solis supra an-

nuli planum, quam initio Sept. tantum gr. $2.15'$, fuisse diximus, simul imminuta est. Pari ratione nec Gassendus brachia ulla percipere potuit mense Febr. anni 1643. et si tunc quoque Sol oculusque observantis eandem annuli superficiem intuebantur; scilicet quia Saturni locus eccentricus in gr. $26. \times$ inveniebatur, hoc est $5\frac{1}{2}$ gr. à loco æquinoctii, eoque altitudo Solis supra annuli superficiem tantum g. $2.11'$. Denique & anno 1656, mensis Martii diebus aliquot, quibus similiter eadem annuli superficies ad nos Solemque spectabat, multo minus brachiorum ullum vestigium apparere debuit, quod nunquam dimidio gr. supra planum annuli Sol attolleretur. Nam reliquo tempore fulsionis illius, diversas partes loci æquinoctiorum locus Saturni ex Sole atque observatus locus obtinebant, unde ex superius allata causa brachiorum expertem cerni oportuit.

Neque verò magis conspicuum nobis anulum fieri credendum est, si altius supra planum ejus oculus attollatur, Sole tamen ex obliquo tantum radiis suis eum perstringente, quemadmodum contigit dicta Saturni statione ad 14 Nov. 1612; quippe quo tempore Sol gradu $1.36'$ supra planum annuli ascenderat, visus autem noster gr. $3.53'$. Idem enim in quacunque plana superficie experiri licet, in quam si à latere radii luminis incidant, non apparebit illustrior quocunque in loco visus statuatur, sed tum demum, si radios à lumine rectiores accipiat. Uti contra quoque si amplius ad lumen obversa directiusque illuminata fuerit, non refert quàm obliquè in eam radii visus incidant, sed undecunque spectata æque lucida apparebit. Atque ita fit ut cum Sol paulo altius supra planum annuli sese extulit, tribus puta gradibus aut paulo amplius; visu licet nostro non nisi uno gradu extante; splendere jam nunc annulus incipiat, Saturnoque brachia adnascantur. Sicut anno 1612. circa solstitium accidit, Saturno ex Sole circa gr. $12. \times$, hoc est, gr. $8\frac{1}{2}$ ab æquinoctio suo agente, ac proinde Solis altitudine supra planum annuli graduum $3.23'$: Galilæi verò oculo vix uno gr. supra idem planum elevato. Videbatur enim Satur-

nus

nus in gr. 18. \times , hoc est $2\frac{1}{2}$ gr. à loco æquinoctii, quæ distantia dat declinationem gr. unius.

Ut igitur secundum hæc de rotunda phasi iudicium feras ^{Saturnus} ^{brachiorum} ^{expers fuisse} ^{rus quo modo cognoscitur.} illud in primis respicere oportet, quod gradibus ab æquinoctio suo, hoc est, à gr. $20\frac{1}{2}$ π vel \times , Saturni locus eccentricus absit. Ac mihi quidem phænomena antecedentia expendenti, videtur ita statuendum, ut quoties non amplius quam 6 gr. circiter in alterutram partem, à dictis locis Saturni locus ex Sole distabit, nunquam brachia ejus conspici queant, quicumque demum oculi nostri situs fuerit; hoc est, nulla ducta ratione Saturni loci apparentis. Quod tamen ita accipiendum est, si perspicillis non melioribus quam quibus Galilæus & Gassendus usi sunt Saturnus inspicatur. Nam si nostris similia adhibeantur, forsitan jam in illa 6 graduum distantia tenue quoddam brachiorum exordium percipi possit. Certè anno 1656, 13. Oct. renata illa vidimus, cum Saturni locus ex Sole tantum gradibus 6. 46. æquinoctii sui punctum prætergressus esset. Erant autem æquè conspicua ferè atque ante phasim rotundam, anno 1655. At ii qui minoribus telescopiis eum tunc observabant, ut Joh. Hodier-na, penè adhuc rotundum repererunt: ait enim is, tantum tenuissimos quosdam veluti radios utrinque è lateribus Saturnum vibrare visum. Quamobrem nostris telescopiis fortasse arctiores paulò prædicti limites sumendi sint; quod tamen minimum quid erit, sequentiumque annorum experientiâ definiendum.

Rursus cum amplius 9. gradib. vel forsan supra 8. gr. solum, ab æquinoctiis suis sive $20\frac{1}{2}$ gr. π aut \times locus Saturni eccentricus distare invenietur, jam inde brachiis ansive præditum dicemus: nullâ ne hic quidem apparentis loci consideratione, quoniam hinc jam apparens locus & eccentricus ab eadem parte loci æquinoctialis habentur; ac propterea eadem annuli superficies, per ea quæ supra demonstrata sunt, Soli & visui nostro obversa est, idque ita ut Sol plus tribus gr. supra ipsam elevatus sit, visus vero noster ut minimum gr. uno: quo fit ut brachia saltem tenuia animadverti debeant.

Act.

At cum nondum gr. 8 aut 9, plus verò quam senis, eccentricus locus Saturni à $20\frac{1}{2}$ gr. m aut x aberit, videtur etiam apparens locus expendendus esse, nempe circa quadratum quem vocant Saturni cum Sole aspectum. Fieri enim poterit ut non ultra gradus unius semissem locus apparens ab æquinoctii loco remotus sit, ideoque visus noster tantum $12'$ super annuli superficiem exurgat; quæ cum à Sole simul debiliter illuminetur, vix puto se videndam præbebit. Quum autem duo contingant quadrati aspectus singulis Saturni fulsionibus, priori eorum ita demum illud quod diximus perpendere opus erit, si locus planetæ ex Sole præcedat gr. $20\frac{1}{2}$ m aut x , posteriori verò non nisi sequatur. Nam si secus fuerit jam certo brachiis auctus cernetur.

Et sic quidem quod maximè perplexum in toto hoc negotio inerat, nulla dissimulata difficultate, pertractavimus. Illud enim inquirere voluimus an certis locis rotunda phasis alligari posset, ita ut omnibus huc usque observatis fieret satis. Quod & præstitimus tandem, etsi arctis adeo limitibus circumscripti, ut nè minimum quidem ultra citrave ab iis discedere salvis apparentiis licuerit. Simul verò hoc operæ pretium fecimus, quod de futuris Saturni phasibus haud dubia prænuntiare in posterum licebit. Etenim si modo tabularum Astronomicarum ope inveniatur, quo tempore Saturni locus ex sole sive eccentricus, cadat in gr. 20, $30'$ m vel x ; senis mensibus qui id tempus præcedunt totidemque sequentibus brachia nulla percipi posse manifestum erit; quoniam scilicet in menses singulos gradu uno Planetæ locus ex Sole promovetur. Præterquam quod aliquando uno etiam atque altero mense citius rotunda phasis existet, aliquando tanto diutius videri perseverabit; si nempe quadrante cæli per id tempus Saturnum à Sole distare contingat, locusque Planetæ eccentricus, ea qua diximus lege, præcedat vel sequatur m aut x gr. 20. $30'$.

Secundùm hæc igitur, quoniam in gr. 20, $30'$ x incidit locus eccentricus die 12. Jan. 1672", existimo anno 1671 & 1672 Saturnum brachiis cariturum; non toto utriusque anni tem-

tempore, sed hoc pacto, ut mensibus quidem Aprili, Ma-^{Quibus tem-}
 jo, Junioque anni 1671, nondum iis spoliatus cernatur, sed^{poribus ro-}
 tenuia etiamnum utrinque extent qualia sub finem anni 1656^{tunda phasis}
 observavimus. Julio autem aut Augusto gracilescant pror-^{reversura sic}
 sus tandemque dispareant & rotundum Saturnum relinquant.
 Quo vultu non tantum ad Heliacum occasum usque conspi-
 ciendus erit, hoc est usque ad finem Februarii anni 1672;
 sed eundem quoque exoriens rursus mense Aprili referet, nec
 amittet nisi Julio mense aut Augusto. Circa hoc enim tem-
 pus ad crescere denuo brachia cernentur, ac paulatim eviden-
 tiora fieri; tandemque etiam singula prope medium Saturni
 orbem bifida evadent, quemadmodum ab anno 1656 dein-
 cept augeri ea vidimus.

Manebunt autem ad annum usque 1685, quando rursus
 evanescentia spectare continget, nempe circa Martii ini-
 tium. Inde rotundus planeta observabitur per annum inte-
 grum, excepto eo tempore quo propter Solem delitescit.
 Adeo ut mense Martio sequentis anni 1686 brachia demum
 recuperaturus sit, sed tenui tantum incremento quandiu illa
 vice visendus erit. Locum Saturni ex Sole reperio in gr.
 20½^m die secunda Sept. anni 1685, unde prædictas vicissitu-
 dines consequi necesse erat.

Rursus verò anno 1701, 15 Jun. redit Saturni locus ex
 Sole ad X gr. 20, 30'. Unde circa finem anni 1700, princi-
 piumque 1701, priusquam Heliace occidat, rotundus luce-
 bit, ac porro quoque ubi jam ex Solis radiis emerferit, ea
 facie permanebit ad initium usque anni 1702: à quo tempo-
 re ad occasum usque Heliacum tenuia fortasse brachia cerni
 poterunt. Absque dubio autem, mense Majo ejusdem an-
 ni, cum denuo observari cœperit, restituta invenientur.

Atque ita porro singulis quatuordecim aut quindecim an-
 nis, nimirum bis ad singulas Saturni in sua orbita revolutio-
 nes, rotunda forma conspicienda dabitur; neque enim un-
 quam æquinoctii sui locos transire quin brachia amittat po-
 test. Ac facile quidem accurata mutationum ejusmodi tem-
 pora vestigiis nostris insistendo, quilibet in posterum præfi-

niet, certiusque etiam ubi renascentes Saturni anfas conspexerit.

Cæterum ad eos observandos, quos hic adnotavimus, alatae formæ ad rotundam transitus, Astronomos omnes intentos esse cupimus. In quorum prædictione si à veritate aut nihil aut pauxillum tantum aberrasse nos invenient, tum procul dubio causas quoque horum phænomenon germanas qualesque revera sunt sibi explicitas credant. Sin longè hallucinati fuerimus, adeo ut brachiis præditus planeta cernatur, quo tempore ex sententia nostra vel maximè iis carere deberet; indicio id erit, quædam circa rotundam phasin accidere nobis nondum satis perspecta, nec ulli mortalium forsitan pervidenda. Nec tamen annuli propterea hypothesin rejiciendam existiment, quandiu reliquis quæ circa anfas animadvertentur ad amissim, uti hætenus, consentiet.

Quando latissima omnium anfas apparitura sint.

Porro in hisce ansatis Saturni phasibus, cum nulla adeo subita mutatio locum habeat, ideo nec tempora singularum tam accuratè ut in rotunda distinguere necesse fuit; sed in universum scire sufficit, phasin ansatarum latissimam medio tempore inter duas rotundas incidere; ut proinde circa annum 1663 & 1664 illa reversura sit; iterumque anno 1678 & 1679; ac postea anno 1693. Reliquis enim inter istos intercedentibus annis, tanto angustior annuli ellipsis cerneatur, quanto magis rotundæ phaseos tempus imminebit. Et hætenus quidem eorum quæ circa Saturnum observantur causas ac tempora digessimus.

Nunc fortasse haud alienum proposito videatur, si quemadmodum ex nostra hac statione hucusque systema ejus contemplati sumus, ita ad ipsius Saturni globum deinceps cogitationem transferamus, atque illud dispiciamus, qualis inde universi facies, quænam futura sint intervalla annorum mensium ac dierum, quæve æstatis hyemisque vicissitudo, ac præsertim qualia ob annulum planetæ circumdatum contingere eum inhabitantibus necesse sit: ut nonnunquam longo tempore aliquos conspectu Solis privet, aliàs rursus noturnas tenebras imminuat, arcus lucidi specie horizonti illo-

lorum superflans. Verum eo labore supersedere rectius arbitror, tum quod Astronomiæ gnaris singula hæc expendere, sibi que ob oculos ponere, non sit difficile futurum; tum quod in his ipsis multi sint, (ut alios mittam) quibus otiosa & inanis ejusmodi disquisitio videretur; ac tanto quidem magis, quanto absurdius putant ut animantia aliqua ratione prædita Saturnum ac reliquos Planetarum incolere credamus.

De magnitudine autem Saturni ejusque à terris distantia operæ pretium videtur ut sententiam nostram his subjiciamus, siquidem & alio modo illas inquisivimus quam quo fieri solet, & aliquanto aliter de utraque statuimus. Nempe sphaerulam illam annulo cinctam quam sub exiguis modò lineamentis spectavimus, diametrum quindecies circiter majorem habere, quam nostra hæc in qua degimus terra, putandum est; abesse autem à nobis, cum proxima est, terræ diametris 100344; cum longissimè distat, 122000. Quæ quidem sequenti ratiocinio nituntur.

*De Saturni
magnitudine
& à terris
distantia.*

Docuit nos novo suo ac divinitus invento systemate Copernicus, quamnam inter se proportionem servant singulorum à Sole Planetarum distantia, apparentes vero eorundem diametri quanto aliæ aliis majores sint telescopii ope innotescit. Collatis ergo invicem rationibus utrisque, tum distantia tum magnitudinis apparentis, vera inde planetarum ad se mutuo, nec non ad Solem magnitudo cognoscitur. Et ad Saturnum quod attinet, primùm annuli ejus diameter, quum in minima à nobis distantia comprehendatur angulo sexaginta & octo scrupulorum secundorum; talem enim ad summum reperimus; cumque minima hæc Saturni distantia ad mediocrem Solis distantiam sit fere octupla; sequitur, si tam propinquus nobis fieret Saturnus quam Sol in distantia mediocri, apparituram tunc annuli diametrum octuplam ejus quæ nunc apparet, hoc est 9', 4". Solis autem diameter in media distantia est 30', 30". Ergo revera ea erit proportio diametri annuli Saturnii ad diametrum Solis quæ 9', 4", ad 30', 30", hoc est, fere quæ 11 ad 37. Diameter verò Sa-

*Quanta ap-
pareat major
Saturni dia-
meter.*

turni ipsius, quam superius diximus ad annuli diametrum se habere ut 4 ad 9, hoc est fere ut 5 ad 11, ad diametrum Solis erit paulo minor quam 5 ad 37.

Quanta vero sit Saturni diameter ad Telluris diametrum collata haud æque certo definiri potest. Astronomi ita hoc investigant, ut primò intervallum inter terram ac Solem ad certum terrestrium diametrorum numerum revocent, inde quæsitam magnitudinum rationem eliciant. At in illo Solis terræque taxando intervallo nimium quantum inter se dissentiunt; nec mirum, quum nulla adhuc tolerabilis methodus ad dimetiendum hoc spatium reperta sit. Nam sive per Eclipses sive per Lunæ dichotomias id deprehendere conentur, facile ostendi queat inanem operam sumi. Quare mihi quidem unica illa, quam dicam, ratio reliqua esse videtur, qua saltem verisimiliter de Planetarum omnium ad terram magnitudine ac distantia statui possit. Telescopio diametri Planetarum apparentes explorentur; ex his singulorum deinceps ad Solem comparata magnitudo investigetur, ut de Saturno modo exemplum dedimus; omnibusque perpensis, ea Telluris ad cæteros assumatur magnitudo, quæ totius systematis ordini aptæque dispositioni quàm maxime congruere videbitur. Ita cum proportio diametrorum Telluris ac reliquorum Planetarum ad Solis diametrum constituta fuerit, constetque insuper quot suis diametris Sol à nobis distet, ex angulo videlicet quem subtendit diameter ejus apparens, jam terræ quoque ad Solem magnitudo nota erit; atque unà Solis distantia, tum à terra tum à cæteris Planetis, Terræ diametris æstimabitur. Hanc itaque nunc viam ingredi placet, ideoque sicut Saturnum cum Sole modo comparavimus, ita de reliquis quoque simile examen instituemus.

*Jovis terris
proximi dia-
meter appa-
rens quanta
observetur.*

Jovis diameter, cum proximè nobis adest, sexaginta quatuor secunda scrupula comprehendere mihi videtur; quumque hæc ejus distantia ad mediam Solis distantiam sit ut 26 ad 5, hinc si fiat ut 5 ad 26 ita 64" ad aliud, invenientur 5, 35", amplitudo anguli quem obtineret Jovis diameter si tam propinquus nobis fieri intelligatur atque Sol in distantia

me-

mediocri. Sol autem hîc apparet diametro 30', 30". Ergo Jovialis diametri ad Solarem hæc proportio erit quæ 5', 35" ad 30', 30", hoc est paulo major quam 1 ad 5½.

Accuratè etiam diametrum Veneris dimensus sum, ea ^{Veneris dia-} quam postmodum exponam methodo, invenique cum ter- ^{meter appa-} ris proxima est, non majorem fore quam octoginta quinque ^{rens.} secundorum scrupulorum. Est autem distantia hæc Veneris perigææ ad mediam Solis à Tellure distantiam circiter ut 21 ad 82. Ergo si apud Solem Venus consisteret appareret ejus diameter duntaxat 21", 46". Unde constat ita esse diametrum Veneris ad Solis diametrum ut 21", 46" ad 30', 30", hoc est ut 1 ad 84.

At Martis diametrum terris proximi non excedere 30" de- ^{Martis dia-} prehendi, etsi observatione non tam exacta quam qua in Sa- ^{meter.} turno, Jove & Venere usus sum, quippe cujus rationem novissimo Martis ad Tellurem accessu nondum inveneram. Unde quum distantia Martis minima sit ad mediocrem Solis ut 15 ad 41; colligitur ratio diametri Martis ad diametrum Solis ea circiter quæ 1 ad 166. Mars itaque duplo minor Venere secundum diametrum hac ratione efficitur. Atque adeo manifestum est in Planetis non ubique eum servari ordinem, ut qui remotiores à Sole sunt iidem quoque majori sint mole: nam & Jovis sphæra Saturno sine annulo major inventa est. Quo fit ut minus liquido de Terræ ad cæteros Planetas proportionem æstimatio iniri possit. Nam si pro ratione ordinis magnitudines essent attributæ, ut Saturnus Jove major esset, Jupiter Marte, hic Venere, hæc Mercurio; inde quidem penè certo colligere liceret, Telluris magnitudinem esse inter Martem Veneremque mediam. Cum verò in aliquibus contrarium deprehendatur, non æquè quid sequendum sit apparet. Veruntamen ut quatenus fieri potest totius systematis concinnitas observetur, id nunc quoque maximè consentaneum videtur, ut sicut loco media Terra est inter Martem & Venerem, ita quoque sit magnitudine. Martis diametrum diximus diametri Solis esse $\frac{1}{166}$; Veneris vero diametrum $\frac{1}{84}$. Inter utramque mediam igitur terræ dia-

metrum ponendo fiet ea $\frac{1}{11}$ diametri Solis. Hujus autem $\frac{5}{7}$ diametro Saturni æquales repertæ sunt; ergo Saturni diameter Telluris diametrum continebit quindecies, diameter vero annuli Saturnii eandem Telluris diametrum circiter trigies & quater. Unde eximia horum corporum magnitudo cognoscitur; quæ sane omnem ab aliis hætenus traditam facile exuperat.

Hinc verò & intervallum inter Terram ac Solem necessario omnium existimatione majus conflabitur. Si enim diameter terræ diametri Solis $\frac{1}{11}$ continet; Solis autem diameter suæ à nobis mediæ distantia $\frac{1}{113}$ æquat, uti sequitur ex eo quod diameter ejus observetur 30', 30"; erit certè Terræ diameter $\frac{1}{12573}$ distantia quæ est inter ipsam ac Solem. Deinde cum Saturni minima distantia sit ad mediam Solis distantiam ferme octupla, hinc Saturni, cum Terræ proximas est, distantia habebitur diametrorum terrestrium 100344; cum verò plurimum aberit, circiter 122000.

Fateor equidem lubrica eatenus ratione hæc niti, quatenus nimirum Terræ magnitudinem inter Martem Veneremque mediam adsumimus, nullo nisi verisimilitudinis argumento: adeoque vel millenis aliquot Terræ diametris facile à veritate aberrari potuisse. Verùm ut jam duplo majora minorave quam reipsa sunt intervalla ista definiverimus, aut triplo etiam; non tamen parum videri debet hætenus saltem mensuram eorum comprehendisse, quum alia nulla ratio suppetat qua non vel decuplo major error timendus sit. Ita enim omnino existimo. Ad reliquum verò calculum quod attinget, quo Planetarum diametros Solis diametro comparavimus, sciendum est nihil in eo conjecturæ tribui, sed ex iis quæ data sunt certa ratione illum procedere. Atque adeo positis iis Planetarum diametris apparentibus quas à nobis

Diametri Solis ad Planetarum diametros ratio.

observatas diximus; non posse non Solis diametrum ad diametrum annuli Saturno circumdati sese habere ut 37 ad 11; ad diametrum vero Saturni ipsius, ut 37 ad 5; ad Jovis diametrum ut 11 ad 2; ad Martis ut 166 ad 1; ad Veneris ut 84 ad 1. De Mercurio non definiam priusquam ritè eum dimen-

mensus fuero; quod hætenus non successit, cum ob exilitatem sideris, tum quod horizonti plerumque vicinum invenitur, ubi vapores è Terra surgentes tremula quadam refractione figuram ejus præciso ambitu terminari non sinunt. Patet autem & Saturnii globi diametrum ad diametrum Jovis rationem habere quam 55 ad 74: diametrum vero Martis continere amplius quam vices & bis, ad Veneris diametrum esse ut 34 ad 3. Jovis item diametrum diametri Martis amplius quam trigecuplam esse; diametri vero Veneris amplius quam quindecuplam; ac denique Martis diam. ad diametrum Veneris circiter subduplam. Quæ omnes proportionēs ratæ fixæque permanent, quantacunque distantia Solem inter ac Tellurem statuatur, si modo apparentes diametri quales tradidimus retineantur. Hæc autem quo modo observaverimus denique dicendum est, atque eo magis quod longè ab aliorum sententia alicubi recedamus: veluti cum Veneris diametrum triplo minorem asserimus quam à Ricciolo definita est, qui tamen summa cura circa hæc versatus videtur. Notum igitur artificium est hujusmodi.

Locus quidam est intra tubos qui Solis convexis vitris instructi sunt, circiter altero tanto amplius quam convexum oculare ab oculo distans; quo in loco si quid intra tubi cavitatem visui objiciatur, quantumvis subtile aut exiguum, id distinctè prorsus ambituque exquisitè terminato conspicitur, atque ita pro ratione latitudinis suæ partem aliquam rei lucidæ, velut Lunæ per telescopium spectatæ, visui subducit. Exacta loci determinatio, his quibus nullo vitio visus laborat, in focum convexi ocularis cadit; myopi aliquanto propinquius punctum accipiendum est, contraque, qui tantum à longinquo clare vident, paulo remotius; quod experientia protinus docere potest. Hic igitur si primò annulus statuatur cum foramine paulo angustiore quam sit vitrum ipsum oculo proximum, eo tota tubi apertura, sive spatium circulare quod uno obtutu in cælo detegitur, præcisâ circumferentiâ descriptum habetur. Cujus spatii diameter, quot scrupula comprehendat, aliquo pacto inquirendum est, atque optimè qui-

Ratio observandi Planetarum diametros apparentes accuratissima.

quidem ex transitu sideris alicujus, cujus tempus numeretur vibrationibus perpendiculi, vel ope Horologii nostri oscillatorii nuper inventi, telescopio interim immoto manente. Scimus enim 4 scrupulis horariis unum cæli gradum & exiguum quid amplius transire: ideoque si verbi gratia numerentur scrupula secunda 69 interea dum stella quædam fixa totam telescopii capacitatem emetitur, argumento id erit $17\frac{1}{2}$ scrupula prima, telescopii hujusmodi apertura comprehendendi, sicut nostro evenit. Quo invento virgulam unam atque alteram ex ære aliave materia parare oportet, decresciente paulatim latitudine, tubumque perforare utrinque circa locum illum paulo ante memoratum, quo possint in ipso ejus puncto virgulæ transversæ ante oculum obtendi. Cum igitur Planetæ alicujus diametrum metiri cupimus, adhibitâ eo quo diximus loco virgulâ, notandum est quænam hujus latitudo totum Planetam contegere possit. Eâ enim latitudine acuto deinde circino acceptâ, atque ad totius foraminis amplitudinem collatâ, Planetæ diameter apparens facili ratiocinio innotescet. Sic die 29 Dec. 1658 diametro Veneris invenimus convenire virgulam cujus latitudo æquabat $\frac{1}{2}$ totius foraminis: est autem hoc, uti diximus, $17'$, $15''$. Ergo Veneris diameter erat $51''$, $45'''$. Distantia autem Planetæ ad minimam suam à Terris distantiam se habebat circiter ut 27 ad 16, ergo diameter ejus terris proximæ efficitur $87''$, $20'''$. Rursus anno 1659, 8 Mart. hora 6 mat. Veneris diametrum observavimus quæ æquabat $\frac{4}{7}$ aperturæ telescopii. Ideoque erat $61''$, $30'''$. Distantia autem eo tempore ad minimam Veneris à terris distantiam se habebat ut 430 ad 316, ergo diameter ejus maxima fit $83''$, $40'''$. Sed & alias eadem methodo semper tantum paulo majorem minoremve invenimus, nam sæpius examen hoc repetivimus, atque ex omnibus medium quid sumentes, $85''$ pro maxima Veneris diametro supra statuimus. Hanc autem Ricciolus $4'$, $8''$, taxavit, atque adeo triplo quam nos majorem existimat, sed procul dubio nuda illa oculi æstimatione, qua hîc usus est, in tantum deceptus fuit. Nam Saturni Jovisque diametros, quas methodo cer-

*Diameter
Veneris ob-
servata.*

tiori, appulso nimirum ad fixas investigavit, eadem fere qua & nos amplitudine definiit, paullum tantum excedens: Saturni enim maximam 72" continere asserit, Jovis item maximam 68", quæ mihi sunt 68" & 64". Certum autem est non magis in Venere, quam in Jove aut Saturno dimetiendis, errori obnoxiam esse rationem nostram. Et Veneris quidem diametrum Hevelius quoque, ad Lunæ maculas instituta comparatione, tantum 82" se invenisse testatur cum circa perigæum versaretur, unde diameter ejus maxima non multum sanè nostram superabit. Porro illud in methodo à nobis tradita commodissimum accidit, quod nec Lunæ, nec sideris cuiusquam conjunctionem, cum eo quem metiri volumus planeta, opperiri necesse est, sed omni tempore ejus usus conceditur. Nec ad planetarum tantum diametros pertinet, sed ad lunares quoque maculas accuratè describendas, comitumque Jovialium distantias accipiendas rectissimè adhibebitur. Ad planetarum autem diametros longis atque optimæ notæ telescopiis opus esse sciendum est. Nec negligendum in Venere ac Mercurio, ut fuligine leviter inficiatur lens oculo proxima, quo perfectius planetæ ambitus circum terminetur.

F I N I S.

EUSTACHII DE DIVINIS SEPTEMPEDANI

BREVIS ANNOTATIO

IN

SYSTEMA SATURNIUM

CHRISTIANI HUGENII.

AD

SERENISSIMUM PRINCIPEM

L E O P O L D U M

Magni Ducis HETRVRIÆ Fratrem.

REVIEWS AND

ANALYSIS OF THE

REVIEWS AND

IN

SYSTEMA SATURNIUM

OF THE

AND

REMARKS ON THE

OF THE

OF THE

EUSTACHII DE DIVINIS SEPTEMPEDANI

BREVIS ANNOTATIO

IN

SYSTEMA SATURNIUM

CRISTIANI HUGENII.

SERENISSIME PRINCEPS

Non ita pridem Christiani Hugonii liber de Saturnio systemate Celsitudini tuæ Serenissimæ inscriptus in meas manus incidit, in quo, & de me unum quidpiam, & de re ipsa nonnulla esse comperi, quæ cum veritate minùs consentiant. Nollèm literatos homines, quibus telescopii majoris copia non est, in errorem induci; cum jam alioquin satis proclives sint ad excipiendam credulis auribus, vel oculis eam rerum cœlestium novitatem, quæ hactenus incompetæ orbi fuerunt: Accedit, quod libelli auctor eam diligentiam à se adhibitam esse attestatur, quæ certè quispiam majorem in illo non desideret; quod revera non parvi ponderis est, ad captandam hominum credulitatem, erroremque in eorum animos insinuandum. Itaque meum esse duxi, tum ea, quæ mihi afficta sunt; tum ea, quæ cœteris omnibus errandi occasionem facile præbere possent, brevi hoc & publico scripto refellere; brevi quidem, ne plus æquo legentibus molestum sit; publico verò, ne privati Hugonii errores publici fiant; aut si jam publici facti sunt, ne quid

inde respublica literaria detrimenti capiat, ut publicè à me configantur. Quia vero Hugenius tuis auspiciis libellum suum vulgavit, iisdem ego potiori jure brevem hanc discussionem in publicam lucem prodire volui, qui tot nominibus Cellitudini tuæ Serenissimæ, totique plusquam regiæ Mediceorum familiæ obstrictus sum.

Tria igitur in hac scriptione præstabo; primò enim affictam mihi fraudem amoliar; aliquot deinde Auctoris errores indicabo, ea tamen styli moderatione, quæ & Christianum, & ingenuum, ne dicam, EUGENIUM, hominem deceat: cum demum Auctor scripserit pag. 1. phænomeni Saturni rationem & causam nec Galilæo, nec Astronomorum cuiquam compertam fuisse, eamque dumtaxat explicari posse, inserta Saturnio globo splendentis annuli corona, ne Jovi, quem astra Medicea jure coronant, detrahi corona & jam olim exauctorato Saturno restitui videatur, Fabriani systematis rudimentum quoddam breviter exponam, in quo, adducta Saturni phænomena ea facilitate explicantur, qua, nescio, an major excogitari possit; in ea scilicet terræ quiescentis hypothese; quam catholici Astronomi amplecti dumtaxat & contra Heterodoxos Aristarchos tueri debent. Cæterum illa omnia, quæ à me scribentur, æquissimæ tuæ censuræ, ac recto judicio subiecta esse velim; nec abs re, opinor, cum te literati omnes, ut Mecænatem; & politiorum operum artifices, ut singularem patronum colant; sed ad rem venio.

Primo igitur loco Hugenius, antequam systema Saturnium aggrediatur, præmittit sui telescopii descriptionem; cum enim, ut ipse ait, alia perspicilla non essent, nisi quinque aut sex pedes longa, serio & maximo studio ad longiora fabricanda animum & manum applicuit: sed advertere potuit ac debuit, in illa observatione mea Saturni, quam ipse refert, mentionem à me factam fuisse telescopiorum variæ longitudinis, quæ ad prædictas observationes adhibueram, scilicet 15. 24. & 36. palmorum; multa autem hujusmodi fabricavi; Illustrissimus Eques Dighby, vir ut nobili genere, ita ingenio perspicacissimo & omni doctrinæ genere conspicuus sex, cum

Ro-

Roma discessit, secum detulit; unum Thomas Paggi nobilis Anglus; Taurinum alterum missum est; Fabritius Guastaferus Romanus, vir consuetudine & amicitia mihi conjunctissimus, rerumque optimarum studiosissimus, unum habuit; Bononiam unum misi ad Illustrissimum Comitem Carolum Antonium Manzinum, virum sanè rerum istarum peritissimum, doctorem eximium; cujus Dioptricam in dies expectamus, in qua haud dubiè ea legemus, quæ multi hæctenus desiderarunt: Unum etiam fabricavi Illustrissimo D. Caramueli Campaniæ Episcopo; omitto alia; nihil enim aliud jam à multis annis ago.

Tum describit telescopium à se fabricatum, longum pedes Rhénolandicos 23. qui si reducantur ad palmos Romanos, quos adhibent architecti, faciunt palmos 31. uncias 4. Vitri objectivi (sic vulgò vocant) orbis apertus diametrum habet pollicum 2. cum triente: seu palmi Romani unc. 3. scrupul. 1. Vitrum oculare ex duobus invicem unitis constans, lenti æquivalet, & radios, parallelos colligit, ac projicit in focum, distantem pollic. 3. prædicti pedis, id est, uncias 4. scrup. 2. palmi Romani: inde porrò deducit Hugenius, vitrum suum objectivum exquisitum esse, cum sit patiens lentis adeo acutæ, ut vocant, & ad veras Saturni observationes, ejusmodi tubos, & vitra adhiberi vult.

Hæc facilè omittere Hugenius potuisset; nec enim his regulis opus erat, cum longè ante fabricata fuerint telescopia, quæ tum longitudine, tum vitrorum figura, tum operis perfectione Hugenianis minimè cedunt; adhibui aliquando tubum 36. palmos longum, ac proinde longiorem Hugeniano palmis 4. unc. 8. orbis autem aperti diameter fuit unc. 4. scrup. 2. sed sublatis 2. illis scrup. propter longitudinis differentiam 4. scilicet palm. unc. 8. restat diameter orbis mei vitri, major diametro orbis vitri Hugeniani unc. 1. ac proinde vel hoc nomine, meum telescopium Hugeniano præferendum, ex vulgari & ab omnibus accepta regula; cum scilicet majoris aperturæ, ut sic loquar, vitrum objectivum patiens sit.

Præ-

Præterea frustra omnino duo vitra in vitrum oculare utrinque convexum conjunxit; cum unica lens sufficiat: Ego lentem in prædictis observationibus adhibui, radios parallelos colligentem, & projicientem in focum distantem unc. 3. scrup. 2. sed hæc distantia minor est distantia projectionis Hugénianæ unc. 1. igitur lens mea acutior: licet tubi mei longitudo major sit; & cum ex hoc telescopia censeantur, ut optimè ipse observat; inde certè pari jure deduco, meum telescopium præstantius esse; idque triplici nomine. Primò, quia longius est. Secundò, quia vitrum objectivum habet majoris aperturæ patiens. Tertiò quia lentem acutiorem sustinet.

Hugénius pagina libelli 37. de me ita scribit. *Tales autem* (Saturni scilicet anfas) *Eustachius de Divinis notavit annis 1646. 1647. 1648. à quo editum Schema ad numerum 10. hic exhibuimus; isque cum præstantissimus perspicillo- rum artifex habeatur, credibile est, omnium emendatissimè Saturni faciem descripsisse, nisi quod umbras illas, quæ in schemate apparent, de suo, ut opinor, adjecit.* Est fanè, quod multas illi gratias habeam, pro iis laudibus, quas mihi ignoto homini ac minimè cogitanti aspersit; sed quid hoc est, *de meo adjecisse*, nisi hominibus imposuisse? Si enim de meo est, fictum est, nec re ipsa talem Saturnum exhibui, qualem observavi; quia de meo umbras illas adjeci, quas in Saturno non vidi, nec videre potui, cum revera in Saturno non sint; fabula igitur est, fictio est; immo in re tanta pro luculenta fraude haberi debet, cum inde homines in errorem facilè inducantur. At si umbras de meo adjeci, Hugénius ejusdem criminis reus est, qui passim, ut suum annulum Saturno injectum melius exprimeret, longe majores umbras adjecit: sed profecto neuter adjecit de suo; ut enim globus, corpus scilicet solidum, in plano describatur; aliquid umbræ accersendum est, quo figura solida exprimitur & appareat, alioquin merus circulus evadet: Quis vel tyro in arte graphica hoc nescit? Umbras scilicet accersendas esse ad figuras solidas designandas. Umbram igitur de meo

TAB. LII.
fig. 10.

meo non adjeci, sed globum in plano descripsi, qui tamen sine umbræ beneficio describi non potuit; Umbra enim facit, ut reliquum figuræ quasi extare, ac prominere videatur; in quo uno stereometria ab ichnographia discrepat: aut fortè dicere voluit, cavitatem ansulæ Saturniæ nigriore, quàm par sit, umbra, à me fuisse foedatam: cum tamen ejusdem cum reliquo cælo coloris esse videatur; sed pace illius dixerim; quotquot ansarum cavitates vidimus, nigriores reliquo cælo, & magis atras aspeximus, neque hoc telescopii vitio quisquam tribuat; nempe si revera ansæ illæ vacuæ sunt, & ad ipsum cælum radii visorii per illas trajecti terminantur, ejusdem cum cælo coloris erunt, quocumque tandem telescopio aspiciantur. Itaque, quod mihi Hugenius pro sua humanitate, præstantissimi artificis elogium attribuit, ut me præstantissimum esse non admitto, ita pro iis laudibus, quæ in me non quadrant, gratias, ut jam dixi, habeo; quia tamen unde altiùs extollit, inde profundius deprimit, dum fabricati à me telescopii fidelem usum desiderat, utpote quod Saturnios satellites ea forma, eoque vultu non exhibeat, quo revera exhibendi essent, ad alterum caput venio, in quo luculenter ostendam, Hugenum in nonnullis hallucinatum esse, quod an perspicillis ab eo fabrefactis tribuendum sit, an verò auctoris fictioni, alius fortè dubitaret; ego sanè doctissimi hominis candori nihil detractum velim, quare haud dubiè telescopii vitio, quidquid erroris admisit, tribuendum esse judico: leges porro, quas vitris suis pag. 3. & 4. præscripsit, sufficiat supra indicasse.

Constat verò auctorem duobus telescopiis usum fuisse, in traditis observationibus; primum fuit 12. pedum, vel palmorum 16. more Romano paulò plus, duobus convexis instructum; alterum 23. pedum, de quo supra; In hoc, ejus dictis standum esse puto: Ego tamen, ut dixi, longius telescopium adhibui, scilicet triginta sex palmorum; quare non dubitarim, quin Saturnum mihi æquè perspicuè exhibeat; præsertim cum vitra satis accuratè, & diligenter elaborari, tornari, formari, lævigari à me soleant: si Hugeniani tele-

scopii mihi copia fieret, facilis comparatio institui posset, quam certè ab ipso Hugenio institui posse, nihil vetat; cum enim per totam Europam perspicilla à me fabrefacta, distracta jam & quasi disseminata fuerint, in ejus manus facilè venire potuerunt: rem narro, quæ mihi ante aliquot dies, accidit; Jam unus, vel alter annus elapsus est, ex quo R. P. Antonius Maria de Reitha Bononiam veniens, telescopium, quod secum habebat, 24. palmorum, mirificè prædicabat, afferebatque, nullum ejusdem longitudinis in Italia esse, quod suo non cederet; hujus rei certior factus ab Illustrissimo Comite Car. Ant. Manzino viro, ut dicam iterum, rerum istarum peritissimo, & curiosissimo, ad eum misi, ut ipse petierat, telescopium ejusdem longitudinis, utrumque æqualium virium, & ejusdem bonitatis repertum est; hæc jam penè mihi exciderant, cum ecce Illustrissimus Dominus de Monconis, nobilis Lugdunensis, vir, tum ingenio, tum genere plerisque notus, incogitanti mihi, postridie cinerum adfuit; post solita urbanitatis officia, cum inter colloquendum, de perspicillis mentio facta esset, non habeo ampliùs, inquit, tuum illud telescopum 24. palmorum, illudque sanè optimum, quod ante aliquot annos Lugdunum ad me ignotum licèt hominem miseras; illud enim bonus P. Reitha suis precibus à me extorsit; mecum igitur, inquam, pugnavi, ejusdemque parentis liberos quasi hostes inter se commisi; in risum prorupimus ambo; non tamen est, quod aliquis hoc vitio vertat Patri Reithæ, qui pro suo candore ultro fatebatur, præfatum telescopium non à se, sed ab alio elaboratum fuisse: Scripsi hæc, ut vel inde constet, fieri potuisse, ut aliquod ex meis telescopiis in manus Hugonii veniret, ad comparisonem instituendam; dum id fiat, facilè mihi persuadebo, nihil esse, cur mea Hugenianis primas deferant; ac proinde supposita eadem longitudine, æquè clare, & fideliter Saturnios satelites exhiberi à meis, ac ab Hugenianis.

His præmissis; constanter asserit Hugenius, pag. 547. & 556. Saturni satelites nunquam ab eo sejunctos figura sphærica videri, quales prima figura ab eo excusa, & à me recusa.

sa exhibet; quod tamen falsum esse, omni asseveratione affirmo, cum anno 1657. cœptis observationibus die 30 Junii, & septies, vel octies, ad vigesimum usque Julii repetitis, adhibito ad hunc finem telescopia triginta sex palmorum, accuratissimè fabrefacto, prædictos satellites figura sphaerica tornatos à Saturni globo omnino sejunctos observarim, quales prima figura Hugonii illos repræsentat, & quales jam antè Galilæus viderat, idem observavi anno proximè sequenti, telescopia 24. palmorum usus; adfuerunt testes omni exceptione majores; præ cæteris, vir clarissimus Alphonsus Borrelli, Magni Etruriæ Ducis insignis Mathematicus, & Geometra, typorum gloria orbi satis notus: neque hæc contradicendi studio à me adstrui, quisquam sibi persuadeat; quo enim tempore, hos satellites sphaericos à Saturni globo, modico quidem, sed quod sensu, adhibita telescopia opera, percipi poterat, intervallo disjunctos vidi, nunquam mihi persuadere potuissim, aliquem fore, qui sejunctos unquam videri posse negaret; Dico igitur, disjunctos à me visos fuisse; negat Hugonius disjunctos videri posse; produco testes omni exceptione majores, qui una mecum viderunt; Utri quæso habenda fides? Sejunctos videri posse contendo, cum reipsa sejunctos viderim, adductis testibus omni exceptione majoribus; negat Hugonius, videri posse; quia scilicet nunquam ipse vidit; sed alii viderunt; negat tamen videri posse; adsunt & jurant testes; illos ejurat, & fidem alienis telescopiis detrahit; perperam quidem, meo judicio; nempe breviori telescopia discerni non poterant, licet revera disjuncti essent: igitur cum eos sejunctos viderim meo telescopia, ideo necessaria consecutionis vi deduco, hoc perfectius, & melius esse; nec enim longitudo æqualis, immo, nec major defuit; nec accurata operantis manus vel artificis diligentia desiderata est. Telescopia igitur Hugonii, longius licet, breviorum vitio laboravit, cum illius opera, sejunctos distinctè videre non potuerit, quo vitio, ut dixi, breviora perspicilla laborant; falsum enim est, quod habet pag. 35. breviori telescopia 8. circiter palmorum sejunctos, longiore

verò 16. palmorum conjunctos videri, nempe, ut dixi, potiore jure, sejuncti, majore telescopio, conjuncti verò, minore viderentur; cum verò suo minore sejunctos viderit, majore verò ad instar brachiorum, hinc inde adnatorum extantes, perspicuum majoris telescopii vitium est, cujus operâ radii minùs accuratè projiciuntur, & ut vulgò dicimus, inepta fit terminatio. Telescopium igitur Hugenianum meo primas deferat, oportet; quo scilicet ea distinctè vidi, quæ ille suo distinctè videre non potuit.

At non me latet causa qua fiat, ut Hugenius obstinatè neget, sejunctos videri posse; commentus est ipse hypothesim annuli Saturni globum cingentis, cujus operâ, illas phases explicare conatur, quæ in hoc planeta observatæ fuere: ut autem suæ opinioni, vel suo commento consulat, illud profectò ipsi negandum fuit, quo semel admissio commentitia illa hypothesis penitus corruebat; si enim annulus Saturnum ambit, nunquam sejuncti satellites videri queunt: pari modo fingit, præfatas ansarum vacuitates ejusdem cum reliquo cælo coloris esse, ut suæ hypothesi consulat; supposito enim illo annulo in iis vacuitatibus, nihil nisi cælum videtur; at revera, ut jam suprâ dixi, nigriores illæ apparent, ex quo Hugeniana hypothesis corrui. Ut igitur suam illam opinionem indemnem servaret, ea removenda esse putavit, quæ si adessent, illius opinionis falsitas manifesta evaderet: & hæc sibi persuasit, nobis tamen minimè persuasurus, qui rem secus esse, oculari demonstratione prorsus evicimus.

Alterum est quod Hugenius vel finxit, vel leviter sibi persuasit, quod tamen ejusdem furfuris est; dicit enim, fasciam quandam nigricantem in Saturni globo videri, quæ quidem ex æquo medium discum secat, quando solus Saturni globus suo satellitio destitutus apparet; ubi verò satellites adsunt, modò suprâ, modò infra brachiorum lineam fascia videtur; sed hoc etiam merum figmentum est ab auctore excogitatum, ut annulo suo consuleret; nam cum ipsi opponeretur, admissio semel hoc annulo nunquam Saturnum videri posse, vel ansulis, vel brachiis destitutum, quod tamen omnibus ob-

fer-

servationibus repugnat; nempe ubi planum annuli directè in oculos incidit, annulus appareret ad instar zonæ rectæ, æqualis diametro annuli, ac proinde majoris diametro Saturni; igitur ad instar brachiorum duæ appendices hinc inde Saturnio globo adhærerent: cum igitur hac difficultate, & hoc nodo insolubili annularis illa hypothesis laboraret; finxit illius auctor, extimam annuli superficiem ineptam esse ad luminis repercussionem, ac proinde fasciam illam nigricantem inde ortum ducere, & ob penuriam luminis repercussi, extantes illas appendices sub aspectum nostrum non cadere: Hæc habet pag. 542. 545. 576. Aliam causam subnectit pag. 585. ab obliquitate radiorum illapforum petitam, qua fiat ut pars annuli ad nos obversa obliquè dumtaxat illuminata non videatur; immo hoc alterum addit, superficiem annuli ad nos obversam minimè à Sole illuminari; ac proinde mirum non esse, quod minimè videri possit; omiseram, quæ habet pag. 551. de Saturnicolis.

Cuncta hæc facilè diffiantur; nunquam enim fasciam illam nigricantem, quamvis exquisito telescopio usus videre potui; nemo unquam præter illum observavit; nec tamen telescopia nostra Hugenianis deteriora esse crediderim; fictitia igitur censenda est illa fascia, aut certè vitrorum vitio tribuenda: quod autem dicit, extimam illam annuli superficiem ad lumen reflectendum ineptam esse, vel ex eo falsum esse constat, quod in Saturni disco partes omnes æquali lumine perfusæ videantur: Nulla igitur pars ad nos obversa ad luminis reflexionem inepta est. Præterea demus ita esse, & fasciam illam paulò obscuriorem in Saturni disco videri; nihil tamen obstaret, quin brachia eodem lumine perspicua essent; id est extrema segmenta apparentis zonæ; in quam annulus hoc situ aspectus projicitur, extantia, & excurrentia hinc inde extra Saturnium globum, viderentur, eodem licèt nigricante colore diluta. Ad obliquitatem illapforum radiorum perperam confugit; alioquin in cæteris planetis eadem ratio militaret; nempe fieri non potest, quin major pars superficiæ convexæ, obliquum radiorum solarium illa-

psum excipiat. Id demum, quod subneētit, superficiem annuli ad nos obversam à sole aliquando non illuminari, ex regulis opticis omnino refellitur; supposita scilicet maxima illa Saturni distantia, nec non solis diametro longè majore, quo fiat, ut superficies Saturni ad nos obversa semper illuminetur; hinc totus Saturni discus semper apparet. De Saturniculis nihil est, quod dicam, risu potius, quàm argumentis hoc commentum refellitur; accedit, quòd catholicis dogmatis adversatur, quæ homines tantùm illos agnoscunt, qui ab Adamo duxerunt ortum.

Nonnulla etiam falsa admiscuit, ut pag. 539. ubi dicit fascias Jovis lucidiores esse reliquo disco; cùm tamen obscuriores certò videantur: Item globo Martis latiore fasciam sub obscuram obduci; nihil tale unquam observatum est; deinde nunquam Saturnum vidimus ea forma, quam illi tribuit pag. 542. 545. tractum illum cæli circa Oriona, illustriorem esse vidimus, cum iis stellis splendentibus, quas ipse recenset. Multa etiam de Saturni phasibus statuit, ex paucorum annorum observationibus, quæ pro certis habere non possum, donec subsequētiū annorum observationibus congruant; nempe ipse observationes suas primum cœpit 25. Martii anno 1655. easque ad 19. Februarii anni 1656. breviorē tamen telescopio usus, 12. pedes longo perduxit; ac proinde minùs fideles censendas, ut ipse ultrò fatetur. Standum igitur observationibus deinceps ab eo factis, ac repetitis identidem, adhibito longiore tubo, 23. circiter pedum, perductisque ad 26. Martii anno 1659. Si aliquæ essent ab eo notatæ à 30. Junii ad 20. Julii anno 1657. viderem utrùm meis consentirent; sed nullas toto illo tempore factas invenio; an fortè paucæ illæ observationes sufficient ad certum quid statuendum? præsertim cum toto illo, quo factæ sunt, temporis intervallo, vix Saturnus 38. gradus confecerit, traductus scilicet à 20 grad. Virginis ad 28. Libræ; an fortè inquam modicus ille arcus decursus sufficiet ad certam & indubitatam hypothesim statuendam? Statuit autem, ansas magis apertas, & patentes videri, Saturno existente

in grad. 20, 36. Gemin. & in opposito 20. 36. Sagitt. Sphæricum verò sine ansis, & satellitio in grad. 20. 36. Pisc. Itemque in 20. 36. Virg. quod sanè utrùm futurum sit, sequentes anni docebunt. Ipse hæctenus in 20. Virg. observavit, in aliis punctis non vidit, nec est, quod aliorum observationes adducat, quibus fidem omnem detraxit, ac proinde illi suffragari non debent. Unum, quod habet, omittere statueram; sed quandoquidem in mentem venit, saltem indicabo; dicit enim, Saturni globum circumagi quodam vertiginis motu; sed hoc tantummodo divinat, non probat; licèt enim Sol hoc vertiginis motu gaudeat, quod probari solet ex maculis: inde tamen nemo rectè deducat, hunc motum reliquis planetis competere. Hoc ii præsertim insinua- re & inculcare non cessant, qui globo terraqueo motum ad- struunt; sed frustra, cùm Lunam hoc vertiginis motu non agi, certissimum sit: quod certe non dico, quasi hic verti- ginis motus in Saturno alicujus momenti sit, quod ad rem hanc pertineat, ultrò enim fateor fieri posse ut prædicto mo- tu agatur: dico tamen, ex observationibus huc usque factis haberi non posse.

Quia verò nemini suam laudem ereptam velim, admitto & osculor alia multa ab Hugenio tradita, cum veritati appri- mè consentiant. 1. planum illud, in quo videntur esse satel- lites, æquatoris plano parallelum rectè judicat: hoc jam in- dicarat cum aliis Galilæus; & facilè crediderim, licèt autor nullam hujus rei rationem adducat. 2. Anfas illas hinc inde semper æquales esse contendit; jure quidem: licèt enim for- tè aliquando altera longior visa sit, alterius tamen cujuscumque per accidens adjuncti extrinsecus, accessio illa facta est. 3. vult, Lunam quandam esse Saturniam, (sic enim vocat, li- cèt propriè loquendo Luna non sit, cùm circa Saturnum suum orbem non agat) supremum scilicet omnium satellitem, ad instar stellulæ sæpe à se observatum, modò ad ortum, modò ad occasum, modò conjunctum Saturno, cujus pri- mus ille inspector fuit, in quo sanè maximam laudem mere- tur: ego quidem cùm jam anno 1657. de hoc aliquid inau-
diis-

diissem à clarissimo viro Michaelè Angelo Riccio, eodemque nobilissimo hujus temporis Geometra: Eundem sæpe observavi à 30. Junii ad 20. Julii, scilicet die 30. Junii hora 2. noctis juxta horologium Italicum, id est 2. horis cum dimidia post solis occasum, illum observavi ad ortum Saturni; item 2. Julii, 4. 9. 12. eadem hora, die 14. non apparuit; die 20 ad occasum visus est. Ad prædictas observationes adhibui telescopium 36. palmorum. Cur verò ab aliis Luna illa Saturnia observata non fuerit ante Hugenum, non quidem telescopiorum vitio, sed vel inadvertentiæ, vel nimis ejusdem à Saturno distantiae, vel parvitati, vel conjunctioni tribuendum est. 4. Ansa Saturni nunquam mihi visæ sunt una vice acutiores, alia obtusiores; majores tamen seu latiores aliquando esse comperi. Quod autem sæpè ac sæpius inculcat, prædicta omnia explicari non posse, nisi annulus ab eo excogitatus Saturni globum circumdet, pace illius dixerim, à veritate alienum est; non desunt alii modi, quibus res ista facili designatione exponatur: præ cæteris, mihi satis arridet illa systematis Saturnii ratio, quam P. Honoratus Fabri Societatis Jesu vir mihi maxima familiaritate conjunctus excogitavit, cujus breve schema subijcio.

Supponit. I. terram immobilem in centro mundi, circa quam cælestes globi suos gyros agunt; hanc enim sententiam mordicus defendit, ut catholicis decretis, sacris literis, observatis phænomenis, ac rectæ rationi probè consentientem. II. Motum realem Saturni æqualem esse, apparentem verò inæqualem; abhorret enim hominis intellectus, ut vel ipse Copernicus prudenter monet, à reali motuum inæqualitate. III. Supponit, motu æquali, æqualibus temporibus, æqualia spatia decurri, reali scilicet, seu recta, seu curva; ac proinde majorem orbem tardius, minorem citius, eodem motu describi. IV. Supponit, motum circularem diurnum ab ortu ad occasum. V. motum rectum ab apogæo versus perigæum, & vicissim; acceleratum quidem, ab utroque termino ad mediocrem distantiam, quæ lineam apogæum, & perigæum connectentem bifariam secat; retardatum verò à mediocri distantia

tia ad utrumque terminum; hunc autem primum motum rectum vocat. VI. Supponit alium motum rectum, secundum scilicet, ac declinationis ab Austro ad Boream, & vicissim; fines porro diversi sunt in diversis planetis, pro diversa declinatione maxima cujuslibet planetæ; est etiam hic motus eodem modo acceleratus, & retardatus, quo prior; & mediocris distantia est in æquatore: ex his tribus motibus, Saturni motus componitur; vel potius est motus quidam simplex circulari affinis, prædictis duabus determinationibus instructus; vel, ut ajunt Scholastici, modificatus; primus motus brevior est; secundus diuturnior; cujus sanè discriminis causam affert. Sed ut rude aliquod schema exhibeam, omisso secundo motu recto, sit centrum mundi B. hic terram collocat immobilem. Sit G B distantia Saturni apogæi; B O distantia perigæi; B P distantia mediocris, Saturnus circum, vel orbem radio G B tardius percurrit, quàm Stella vel punctum primi mobilis, cui respondet; citius verò percurrit orbem radio B O, & æquè citò radio B A minore mediocris distantia B P. His præmissis, sit Saturnus in apogæo G, respondens puncto C primi mobilis, vel initio arietis v. g. & supponatur punctum C per S. describere suum circum, motu diurno; item Saturnus in G suum, per R, scilicet versùs occasum; punctum C citius absolvit suum gyrum, quàm Saturnus; igitur Saturnum à tergo relinquit, versùs ortum, scilicet in aliquo puncto curvæ G H; nempe primo motu recto, à circulo apogæi L R sensim descendit ad circum perigæi Z X, donec tandem multis orbibus actis, perveniat in H, & respondeat puncto E primi mobilis, v. g. 20. gradui Arietis: toto illo tempore, moveri dicitur in consequentia; id est, juxta seriem signorum, initio quidem, motu accelerato; & sub finem, retardato; in H stare videtur: hîc enim æquè citò ac punctum E suum gyrum agit: Quia verò adhuc descendit versùs perigæum, decurrit deinceps suos orbis citius, quàm puncta primi mobilis, quibus respondet; ac proinde illa relinquit à tergo, versùs ortum ab H quidem, ad perigæum I: ab I verò, ad K; hinc videtur regredi ab E ad

TAB. LI.
fig. I.

D, quæ sunt puncta primi mobilis; idque motu retardato, circa H & K, id est, circa puncta stationum, accelerato verò, hinc inde circa I. hinc duplex statio, in punctis scilicet E & D. hinc regressio, vel motus retrogradus brevior directo; quia radius circuli æquè diuturni (sic eum vocat, quem planeta æquè citò conficit, ac punctum primi mobilis suum) est brevior, radio mediocris distantiae B P. ex his sequitur latitudinis mutatio singulis ferè diebus: sed hæc rudi Minerva descripsisse sufficiat; ex quibus omnia Saturni phænomena, nullo ferè negotio, per causas physicas explicat. Jam ad satellites Saturni orationem converto. Quinque Fabrius agnoscit; minimus & supremus omnium est quem Hugenus, primus opinor, sub aspectum hominum adduxit, quemque, ut dixi, ab illustrissimo, & doctissimo Riccio certior factus, adhibito 36. palmorum telescopio, an. 1657. per multos dies, mense Julio conspexi, ortivum modò, mox occiduum; dicta autem die non comparuit, quia conjunctus Saturno erat. Hic ergo supra Saturnum est, & dum in perigæo versatur, citiùs suum orbem absolvit, quàm Saturnus suum, quando est in apogæo, tardiùs; & æquè citò in mediocri distantia, æquè ab utroque terminò distante: hinc aliquando Saturnus illum à tergo relinquit; aliquando ille Saturnum; hinc aliquando ortivus, aliquando occiduus, aliquando latet in conjunctione; à conjunctione apogæi, semper ortivus; à conjunctione perigæi, semper occiduus; quid plura? in Mediceis appositam analogiam habemus.

TAB. LI.
fig. 2.

Alii quatuor inferiores sunt, Saturno licèt superiores, quorum systema sic Fabrius explicat: Sit centrum terræ, & mundi A, Saturni diameter G C, centrum B, ducta censeatur recta A B P; sint duo N H, S D, in maxima digressionem N H ortiva; S D occidua, hinc inde æquali; in qua sit illorum statio; & mediocris distantia A I; hoc loco, diametros dumtaxat pro globis exhibeo: tendat autem N H versùs perigæum; & S D, versùs apogæum, pari gressu, & paribus intervallis, ita ut hic apogæum, & ille perigæum simul attingant; istud est inter B I, illud verò inter I O. tunc
uter-

uterque simul erit in conjunctione; alter perigæi, alter apogæi, sed paulò post N H à perigæo ascendit ad maximam digressionem occiduam S D, & S D ab apogæo descendit ad maximam digressionem ortivam N H; atque ita deinceps, repetitis ac reciprocis recursibus: idem prorsus dictum sit de duobus K L, K E, quorum mediocris distantia communis est in O; perigæum commune inter O I; apogæum supra O, æquè distans; maxima digressio ortiva K L, occidua R E; est autem digressio istorum, qui superiores sunt, major digressionem illorum, quos inferiores esse supponit; superiores appellat lucidos, inferiores obscuros; lucidi constant ex materia aptissima ad repercussionem luminis; obscuri verò, ex ineptissima, ad eundem finem; nec difficile fuit auctori naturæ, hujusmodi materiam invenire, cum etiam in hoc sublunari tractu hujusmodi habeamus: mediocris distantia in utrisque ab apogæo, & perigæo æquè distat: vult etiam idem Fabrius, quinque satellites ejusdem esse cum Saturno declinationis, ac proinde semper in eodem plano esse æquatori parallelo: quod facilè obtinetur, modò ab initio eandem declinationem habuerint, eundemque simul inierint declinationis motum, in eodem semper plano æquatori parallelo sit: nec est, quod quisquam miretur, quinque satellites Saturno adesse, cum Jovi quatuor adsint, Soli duo, Terræ unus, Marti fortè tres, quis scit, nondum explorati; quia à Martis globo longius digrediuntur, quàm Medicei à Jove; non tamen tam longè, quàm Venus aut Mercurius à Sole; vult demum, obscuros citiùs suam revolutionem absolvere, & lucidos tardiùs; cujus rei analogiam habemus in Venere, & Mercurio.

His positis, omnes Saturni phasæ, omnia phænomena facilè omnino explicantur. Solus Saturni globus suis satellitibus aliquando destitutus apparet, scilicet figura sphærica; nec enim alia cælestibus corporibus indita est: hujus phænomeni ratio ex eo petitur, quòd duo lucidi (de primo enim omnium supremo hoc loco non agitur) vel sint conjuncti, id

H h h h 2

est,

est, alter in apogæo, alter in perigæo, vel ab obscuris penitus tecti, etiam extra conjunctionem:

II. Duo lucidi aliquando videntur à globo Saturni omnino sejuncti, & figuram phæricam præferentes; hoc ipsum toties accidit, quoties duo obscuri in conjunctione versantur, alter scilicet in apogæo, alter in perigæo, & lucidi hinc inde digressi.

III. Aliquando lucidi apparent, quasi lucidæ ansulæ essent, vel Lunæ falcatæ; hoc evenit quando obscuri sunt quidem interpositi, non tamen integrum lucidorum discum tegunt.

TAB. LII.

IV. Hinc modò plus, modò minùs disci lucidi ab obscuris tegitur; unde diversa phasis, & diversa figura; neque hoc telescopii vitio Hugenus tribuere debuit, cùm alioqui optima ab authoribus, quos citat, adhibita fuerint; Galilæo scilicet, Scheinero, Ricciolo, Hevelio, Gassendo, quorum figuræ ab Hugenio excusæ, in hac hypothese, nullo negotio demonstrari possunt; undecima tamen inter alias Fontanæ fabulas referenda est; decima tertia, quæ caret auctore, modò tantulùm reformetur, fortè suo modo explicari posset, in aliquo casu; septima Hevelii fictitia est; sphæroidem esse putavit, sed hæc figura cælestibus globis minimè competit; nisi fortè dicamus Saturnum ellipticum videri, quando obscuris in conjunctione statutis, lucidi tantulùm à conjunctione recedunt, tunc autem ansulæ non apparent.

V. Verisimile est, obscuros æquales esse lucidis; nihil enim probat, vel majores, vel minores esse, æquales igitur censendi sunt, dum aliquid probet inæqualitatem; immò potius æqualitas ex ipsis phasibus persuadetur, quartæ scilicet figuræ, quintæ, sextæ, octavæ &c. Arcus enim falcis lucidæ, cavus scilicet, & convexus æqualium circulorum esse videntur.

VI. Linea, vel diameter ansas lucidas connectens, quæ per medium globi Saturnii centrum duci videtur, est semper

per in plano parallelo plano æquatoris; quia cùm satellites Saturni ejusdem semper sint cum eo declinationis & motu semper æquali in aliquo parallelo moveantur, motus enim diurnus ab ortu ad occasum in aliquo parallelo fieri censetur, quid mirum, si linea eorum centra connectens in eo plano sit, quod plano æquatoris parallelum est; dixi, *quæ per centrum Saturni duci videtur*, quia revera licet Saturno superiores sint, oculus tamen judicat, ejusdem altitudinis esse; ac proinde in eadem linea cum Saturno.

VII. Licet supremi satellitis motus ab Hugenio definitus sit, utpote qui 16. circiter dierum spatio absolvatur, quanquam observationes à me factæ tantulùm refragantur; non tamen huc usque quatuor inferiorum motus, vel ab eo, vel ab alio quopiam definitus est, qui tamen ex futuris observationibus haberi posset.

VIII. Turbinatio Saturni, vel illius annuli fictitii nulla observatione probatur, ut jam indicavi; licet enim sol hoc vertiginis motu agatur circa suum centrum, ut evincitur ex illius maculis; aliis tamen planetis nulla hujusmodi, vel alia quæpiam probatio suffragatur.

IX. Illa brachia oblonga quæ Hugenius Saturno annexa observavit annis 1655. & 1656. sunt omnino fictitia, & vitio telescopii tribuenda: cur enim alii non observassent? præsertim cùm telescopium ad hunc finem ab eo adhibitum brevius esset, ac proinde non melioris conditionis quàm alia.

X. Figuræ ab illo excusæ, & rejectæ facilè explicari possunt in hac Fabriana hypothese: 1^a quidem lucidis in maxima digressione, & obscuris in conjunctione existentibus; 2^a verò, lucidis tangentibus Saturni globum, & obscuris in conjunctione positis; 4^a lucidis in maxima digressione positis, & obscuris tantulùm extantibus; ita ut modicam lucidorum portionem tegant; 3^a. eadem est cum 4^a. sed telescopii vitio, in mucronem ivit, cùm in con-

vexum ire debuisset; 5^a, & 6^a. lucidis non totis extantibus, & majori ex parte tectis ab obscuris, tunc enim restat quasi falcula, differt autem 5^a à 6^a secundum plus, & minus; 7^a, ut dixi, fictitia est; cum Saturnus sphærois non sit, nisi fortè eo modo, quem supra num. 4. exposui; 8^a lucidis inter maximam digressionem, & Saturni globum existentibus, tectisque ex parte, à minore portione obscurorum; tunc enim falces majores sunt; latiores quidem, quò propius ad maximam digressionem accedunt; angustiores verò, quo Saturnio globo propiores fiunt; 9^a & 10^a ab octava tantummodo differunt, secundum plus, & minus; sunt enim multæ combinationes; quas habes in duobus circulis sese invicem secantibus; tres ultimas fictitias reputo; nisi fortè 12^a ad 10, reducatur itemque 13^a de qua infra.

XI. Ansa una non longiùs extenditur, quàm alia; hinc æqualis est utriusque lucidi digressio; quia uterque communi apogæo & perigæo gaudet, & æquali motu movetur; item obscuri eodem apogæo & perigæo gaudent; ex his, perfecta ansarum & brachiorum æqualitas necessariò sequitur.

XII. Ansulæ videntur, quando portio lucidorum ab obscuris tegitur; nempe sunt quædam quasi aperturæ nigræ, quas lucida corona cingit; hæ sunt ansulæ; brachia verò, quando lucidi tangunt globum Saturni, obscuris in conjunctione existentibus.

XIII. Ansulæ eò longiùs porriguntur quo propius lucidi ad maximam digressionem accedunt; obscuris scilicet lucidorum partem tegentibus.

XIV. Ansulæ eò patentiores sunt, quò major obscurorum portio extra Saturnum extat, lucidis in maxima digressionem constitutis; angustiores verò, cum minor obscurorum portio extat.

XV. Ansulæ latiores sunt, quando minor obscurorum portio tegit lucidos, in maxima digressionem positos.

XVI.

XVI. Anfularum brachia ad ipsum usque Saturni globum excurrunt, quando minor obscurorum portio lucidos tegit.

XVII. Anfulæ à Saturni globo sunt prorsus avulsæ atque sejunctæ, quando major obscurorum portio lucidos tegit.

XVIII. Anfulæ sensim contrahuntur, quando à digressionem lucidi recedunt, & obscuri ad digressionem accedunt.

XIX. Quando anfulæ latiores & majores sunt, ipse Saturni globus illustrior apparet, quia lumina quasi communi quodam nisu & illapsu oculum feriunt; sic multi ignes seorsim positi, actione quadam communi, plus calefaciunt, ac proinde majoris lucis vim diffundunt.

XX. Anfulæ sensim dilatantur & augentur, quando lucidi ad maximam digressionem accedunt, & ab illa obscuri recedunt.

XXI. Primus ille Saturni comes sub Saturno aliquando ponitur ab Hugenio, qui vult, illum circa Saturnum moveri; hoc tamen veritati repugnat; si enim sub Saturno esset, prædictas anfularum phasēs omnino turbaret: Idem dico de Mediceis, seu Jovialibus; igitur & Jovialia supra Jovem, & Saturnia supra Saturnum collocata fuere.

XXII. Si quando accidat, ut primus ille Saturni comes extremitati alterius anfulæ adhærere videatur; nihil enim obstat, talem illius positionem esse posse; hæc anfula paulò alterâ longior esse videbitur.

XXIII. Immo si casu aliquo stellula quæpiam alterius anfulæ extremitati adhæreat. Figuræ 13^a. phasis aliquo modo salvabitur, modò ansarum forma emendetur; hæc enim trigona non est, sed convexa; ut jam dixi, de 3^a. figura: omitto alia, quæ ex his facilè deducuntur.

HÆC sunt, Serenissime Princeps, quæ de Hugeniano Systemate tibi inscripto ad te scribenda, & ne probandi

mo-

modum desiderares, telescopium triginta sex palmos longum, unâ mittendum esse putavi; ut & rationes nostras, ingenii, quo ad stuporem polles, & observationes, oculorum acie, accedente telescopii operâ, explorare valeas: facilè, ni fallor, judicabis, utri potiùs habenda fides sit; & an nostra telescopia Huguenianis deteriora sint: quidquid sit, si hæc opella mea tibi grata acciderit, faciam aliquando ut aliquid majoris momenti ad perennem observationis meæ testificationem Serenissimo tuo nomini inscribatur.

F I N I S.



CHRISTIANI HUGENII ZULICHEMII
BREVIS ASSERTIO
SYSTEMATIS
SATURNII
SUI,

AD SERENISSIMUM PRINCIPEM
LEOPOLDUM AB HETRURIA.

CHRISTIANI HUGENII ZULICHEMII
 BREVIS ASSERTIO
 SYSTEMATIS
 SATURNII
 SUI,

AD SERENISSIMUM PRINCIPEM
 LEOPOLDUM AB HETRURIA.

SERENISSIME PRINCEPS,



Vidiſti quæ adverſus ſyſtema meum Saturnium Romæ ſunt edita, utque ſub uno nomine gemini mihi adverſarii exorti ſint. Eſſi enim Euſtachius de Divinis libelli iſtius Annotatio- num autor inſcribitur, eum tamen adjutum fuiſſe opera P. Honorati Fabrii nec Celf. T. ignorat, & ego, hoc agi, jam pridem ab amicis fueram ad- monitus. Credideram hoc ipſo futurum ut ſubtiliora quæ- dam, non mihi præviſa, éque profundiore Aſtronomiæ ſi- nu depromta, objicerentur; tum vero ea civilitate & vere- cundia, quæ viro humanioribus ſtudiis dedito conveniret. Sed omnino ſpe deceptus ſum, cum nihil aliud quam obſer- vationes meas temere impugnari videam, quas pleraſque in- dubium vocant, præterque veritatem mihi conſictas eſſe ſa-

tis apertè criminantur. Facile autem, ut spero, tam indignam à me suspicionem repellam, nec multis ad hoc opus esse, coram C. T. causam agenti, existimo, cujus summa æquitas cum pari iudicii perspicacitate conjuncta est.

Primus præcipuusque adversariorum conatus est, ut vitra sua tubosque opticos nihilo meis inferiores esse demonstrent; quod ubi egregiè se confecisse arbitrantur, inde porro, nihil me in cælo deprehendere potuisse, quod non & ipsi viderint, concludunt. Quod si autem phænomena ipsa Saturni, quæ adduxi, vera non sunt, vana utique & Hypothesis erit, quæ visorum eorum quæ nusquam sunt causas exponere suscepi.

Telescopiorum suorum comparisonem cum nostris instituere aliquatenus ut possent effeci, tradita accuratissima meorum descriptione; veruntamen quod præcipuum est omnium, præstantia vitrorum quæ ab exacta formatione proficiscitur, hanc scire debent nulla descriptione, sed effectu demum ipso probari posse: Ideoque etsi & longiores paulo nostris tubos, & vitra amplius patentia fabricarint, non idcirco meliora ex his telescopia sese composuisse existiment. Oportet nempe, quæ pari bonitate cum nostris futura sunt, ut & longitudine illis æquentur, & vitrorum non minore apertura gaudeant; at non ideo quæcunque sic se habuerint, eâdem virtute polent, aut illis æquiparanda sunt.

Ut igitur reipsa & effectu concedere nostris Diviniana telescopia comprobem, certissimum argumentum mihi petere posse videor à Saturnio illo comite sive luna, quæ sexdecim dierum spatio circa eum revolvitur. Hanc primum omnium mihi conspectam esse liquet, neque id Eustachius cum sibi succenturiato P. Fabio denegat. Quod autem nec aliis nec sibi antea animadversa fuerit, in causa fuisse ait *vel inadvertentiam, vel nimiam comitis à Saturno distantiam, vel parvitatem, vel conjunctionem*. Sed vana effugia hæc esse quis non videt? Cum enim jam ab anno 1646 & ultra fortè Saturni phases deligenter respicere cœperit, telescopio è convexis vitris composito, quo semper Saturnum simul & co-
mi-

mitem hunc, licet triplo longius recederet comprehendi necesse erat, quænam illa fuit *inadvertentia* qua fiebat ut nunquam ei in oculos incurreret? cur non eadem mihi quoque illum subducebat, nihilo magis admonito? Quin etiam hinc patet non bene prætexi magnam à Saturno distantiam, cum quoties ad hunc respiceret, simul ante oculos sese sisteret comes ejus. Et sanè distantia illa vix tria prima scrupula excedit, cum Medicei planetæ omnes longius à Jove evagentur, extimus etiam scrupulis quatuordecim. Parvitas ergo illum occulit. At hoc idem est quasi fateatur suis illum organis detegi nequissè: certe enim nimium exilis erat, at mihi nequaquam.

Postea tamen edita observatione mea, cum à Clarissimo Viro Mich. Angelo Riccio esset admonitus, vidissè se stellulam hanc affirmat, indicans etiam quo ad Saturnum situ, & quoties illam observaverit. Verum cum diligentius hæc observationes examino, invenio profecto non optima fide eas commemorari; sed adeo misere vereri Eustachium ne bonitatem nostrorum telescopiorum non affecutus putetur, ut quæ nunquam in cælo vidit, aut per rerum naturam videre potuit, tamen sibi visa incogitanter asserat. Quod ut appareat, periodus primò Saturnii comitis expendatur, quam 16. circiter dierum esse, ex observationibus meis, toto triennio continuatis (nisi & has confixissè dicar) manifestum feci: sed esto tantum ea veræ proxima sit, quoniam suas observationes *tantulum refragari* Eustachius scribit. Die igitur 30. Junii, anno 1657. horis 2½, post solis occasum, item sequentibus diebus 2, 4, 9, 12, Julii, ad partem orientalem Saturni animadvertum sibi comitem ait; 14° non apparuisse. Die 20 ad occasum fuisse situm; utrum in maxima, mediocri, an minima distantia apparuerit nusquam addit. Certe equidem tribus prioribus harum observationum, ad occasum revera positus erat, ut ex tabulis colligo. Sed putemus inversionis telescopii rationem non habuisse Eustachium, atque ita sicut ei videbatur, si tamen visus est, orientem spectasse comitem rectè dixerit. At die 9 & 12 Julii, quibus

sibi orientalem itidem apparuisse asserit, omnino ad occasum transierat, ac rursus 20. Jul. ad latus orientale, cum Eustachius ab occiduo sibi repertum scribat.

TAB. LI.
fig. 3.

In figura apposita clarius hoc liquebit; in qua circulus A B orbitam Lunæ Saturniæ exhibet, in 16 partes divisam, ipsaque A B rectam ad nos obversam. Die igitur 30 Jun. 1657, hora 10 vesp. invenio locum comitis grad. 207. 16' ab apogæo A, methodo scilicet ea quam in Syllimate Saturnio tradidi. unde prope num. 10 constitisse debuit, paulo tantum ceterior. Atque hinc porro in singulos dies singulas circuli partes numerando; sequitur die 2 Jul. ad num. 12. progressum esse. Item 4. Jul. ad num. 14. Inde post dies 5, nempe 9 Jul. ad num. 3. Ac porro 12 Jul. ad num. 6. Et denique 14 Jul. ad num. 8. qua die recte divinavit conjunctum Saturno fuisse. Reliquis verò plane infelicitè. Si enim ad num. 10, 12, 14, orientalis spectatus fuit, necessario ad num. 3 & 6 occidentalis factus est. Nec quidem ulla ratione ad num. 14 & 6, qui è diametro sibi oppositi sunt, idem latus Saturni obtinere poterat, uti Eustachii observationes postulant. Denique cum 20 Jul. ad num. 14 reverterit, ubi & die 4 Jul. inveniebatur, quomodo evenit quæso, ut, qui tunc ad orientem, idem nunc, quamvis eodem loco, ad occidentem comparuerit? Etiam si mea periodus vera non esset, quænam tamen illa Eustachii fuerit ostendi mihi velim, paululum discrepans, qua sua hæc visa tueatur. Debuerat sane hîc, si usquam, Fabrius illi opem tulisse; saltemque perpendisse an stare ullo modo istæ observationes possent: aut, si nobis imponere vellet, quotlibet duntaxat novas è tabulis meis concinnasse. Nam quas nunc adferunt, facile nimis deprehenditur, ideo tantum productas fuisse, ne nihil vidisse existimentur.

Credo & fasciam nigricantem in Saturni disco, liquido sibi conspici dixisset Eustachius, ni Fabio visum fuisset eam nimium hypothese meæ annulari favere. Cum autem ne optimis quidem suis perspicillis eam cerni affirmet, hinc quoque quanto illa meis deteriora sint perspicuum fit. Nam ne
mihi

mihi phænomenon illud confictum credatur, idem & in Anglia pridem observari cœpisse sciendum est; ut liquet ex literis Viri Clar. Joh. Wallisii, Oxonia ad me datis 22. Dec. 1658. quibus inter alia hæc scribit. *Monebam etiam eisdem literis* (nempe datis 29. Maji, 1656) *de Saturni fascia quam jam ante observaverat D. Ball, & sciscitabar num tu eandem conspexeras*, &c. Eam porro fasciam à 5. Febr. 1656 ad 2. Jul. quo tempore rotundus Saturnus absque ansis apparuit, medium Planetæ discum secare D. Ball. adnotavit, ut in schemate ad me misso expressa est. Atque ita mihi quoque fuerat eo tempore observata, ut cernitur pag. 544 systematis Saturnii, quam figuram hîc repeto. Postmodum ^{TAB. LI. fig. 4.} tamen renatis Saturni ansis cum difficillimè conspici eadem fascia cœpisset, minus rectè quoque à D. Ball, quantum ad situm attinet, depicta est. At in mearum observationum adversariis, die 26 Nov. 1656, & alias adscriptum invenio, lineam obscuram fuisse evidentissimam, eo nempe positu qui pag. 545, System. Saturnii memoratur. Neque id monere neglexissem, observationes eas recensens, si quicquam profuturum putassém apud illos qui me data opera lectores fallere voluisse suspicarentur. Difficillimè autem, ut dixi, tractus hic obscurus deinceps cerni cœpit, imo vix jam amplius animadverti potest; quod & systemati meo consentaneum est, quippe magnâ jam annuli Saturnii inclinatione; ad quam accedit, quod & ansarum splendor, duplo quam alias lucidiorem Saturnum efficiens, oculorum aciem nunc magis impedit.

Qualia igitur sint Diviniana telescopia cum nostris collata, ex his quæ dicta sunt, cuilibet manifestum opinor. Eadem verò & Anglicanis viliora esse alia præterea ratione ostendam, quo minus dubitetur phænomena ea vera esse, quæ pariter cum Anglis ego observavi. Nam & illa quæ ad anfasas Saturni phases attinent, testimonio illorum confirmatus sum. Vir quidam nobilis ex Gallia, eruditus, acerrimique ingenii, qui Romæ telescopia apud artificem istum viderat, hoc ipso anno 1660, super iis hæc ad me scribit. *Il*

me.

me monstra les plus beaux de ses telescopes, qui passent au de la de 30 pieds; & nous les comparames avec un de ceux de la methode du Chevalier Neal, qu' on a envoye au Cardinal Ghisi; il n' a garde de ne tirer l' avantage de son costé, mais sans mentir il se trompe lourdement.

Et meliora igitur Romanis esse, illa quæ ex Anglia deportata erant, judicat is qui coram comparationem utrorumque instituit, & Eustachium tamen obstinate hoc pernegare testatur, adeo ut si jam mea Romam deferam, nihil apud illum quidem sim profecturus. Quid autem huic homini facias, aut quis hæc videns non merito existimet, usque adeo privati compendii cura eum duci, ut quid verum sit discernere aut non possit aut nolit?

TAB. LI.
fig. 5.



Non ægre nunc fidem habitum iri spero, tum mihi tum Anglis simul observatoribus, qui anno 1657 oblonga Saturni brachia disco utrinque conjuncta spectavimus, qualia exhibet figura Systematis mei pag. 545. quam hîc repono; non autem binorum orbiculorum formâ à medio disco disjunctorum, ut Eustachius de illa eodem tempore vidisse dejerat.

Adderem hîc schema quod mihi à D. Ball, suprâ memorato, advenit; nisi planè simile esset huic nostro, hoc uno tantillum duntaxat abludens, quod brachia illa ubique paulo crassiora ille referat.

TAB. LI.
fig. 6.

Eam vero formam à 5. Nov. 1656, ad 9. Jul. 1657 sibi apparuisse scribit. Apertis autem brachiis, qualis pag. 547. Systematis mei & hîc repræsentatur, talem à 9. Nov. 1657 ad 7. Jun. 1658, idem observator depingit, simillima prorsus figura, nisi quod ad positum zonæ obscuræ attinet, de quo dixi suprâ. Ac denique à 3. Jan. 1659 ad 17. Jun. ejusdem anni, ansis paulo latius adhuc apertis. Et hæc quidem ille, ignarus adhuc meæ hypotheseos, ne ob præconceptam opinionem aliquid indulgisse sibi existimetur. Neque ego aliter ista quam se revera habent referre auderem, cum redarguere me, si fallam, auctori observationum in promptu sit.

Quænam igitur illa sunt Eustachii perspicilla palmorum 24, quibus rotundi globuli rectorum loco brachiorum cernebantur?





tur? Imo etiam loco anſarum jam adapertarum, quales in ſyſtemate meo pag. 546. Etenim & anno 1658 globulos tantum ſibi viſos ait, quales in Fig. 1. iſtarum tredecim tabellæ LII. Quid teſtes citat qui ſecum iſta obſervaverint? Quos equidem fide digniſſimos eſſe cenſeo, quæque viderint ingenuè faſſuros, ſed eo ipſo mihi videntur de teleſcopiorum illius vitio & ineptitudine teſtimonium perhibere. Mallem aliquos adduxiſſet qui ſecum Saturni comitem obſervaffent.

Globulorum formâ mihi quoque brachia apparuiſſe dixeram, quoties 5 aut 6 pedum tubos adhibuiſſem. Hiſce igitur rectiſſime ea, atque uti debent, mihi cerni arbitratur; cum vero oblonga ac Saturni diſco affixa, tubo 23 pedum referuntur, falſa imagine me deludi, idque teleſcopii culpa contingere. Nimirum perſuadere mihi vult exigua illa omnium maximis præferenda eſſe, quaſi ne hoc quidem diſcernere adhuc didicerim. Sed jam ſatis ſuperque, quid de meis teleſcopiis obſervationibuſque, quidque de Eufſtachianis exiſtimandum ſit, me oſendiſſe arbitror. Nec tamen quæ dixi in damnum illius cedere velim, ſed potius ſtimulos addere, quò magis magiſque incumbens, ſua ipſius primo, deinde & noſtra teleſcopia ſuperet. Adeo enim non invideo hiſ qui artem adeo egregiam promovere nituntur, ut decreverim etiam cuncta quæ circa eam mihi comperta ſunt, ſed & præcipue quæ ad theoriâ Dioptrices ſpectant, propediem in lucem emittere: quod vel ideo mihi faciendum video, ut de veritate obſervatorum quæ in Saturni ſyſtemate protuli, plures inquirere poſſint, monſtrata arte qua ſibi paria noſtris perſpicilla parent.

Cæterum unicum etiamnum diſcutiendum reſtat Eufſtachii phænomenon, quo vel ſolo Syſtema meum univerſum corruere dicitur. Eſt autem ruruſ de genere eorum quæ non tantum non extant, ſed ne quidem per rerum naturam apparere ullo modo poſſunt: quod, ſi non vitrarius artifex, at P. Fabriuſ certè animadvertere debuerat. Ajunt ſpatia illa bina, cavitare anſarum intercepta, nigriora reliquo cælo in-

veniri; cum contra, ex hypothefi mea, cælum ipsum fit quod trans aperturas eas conspicitur. Ego vero quæram ex Fabrio, qui fiat ut cælum omne, cum vel interdiu vel noctu aspicitur, non planè tenebrofum nigerrimumque appareat. Fate-ri cogetur in cauffa effe vapores illos five atmosphæram Ter-ræ circumfusam, quæ interdiu quidem à Sole, noctu verò à Luna aut stellis illustretur. Atque adeo si vapores ii auferan-tur, planè nigrum appariturum effe cælum, æquè ac spatia illa, Saturni ansis inclusa. Atqui tota atmosphære illustratæ crassitudo tam inter nos ac Saturnum, quam inter nos nigrum-que cæli convexum interjecta est; ergo illius interpositu æque multum de Saturniarum macularum nigredine, atque de illa quæ cælum obtinet decedere necesse est; ac proinde eæ ma-culæ nihilo obscuriores reliquo æthere apparere possunt. Quod si igitur nihilominus hoc sibi videri pertendant, fa-teantur oportet visus quadam fallacia id contingere, vicino forsitan splendore Saturni, ansarumque suarum, paulo ob-scuriore spatia illa reddente, quam absque eo apparitura ef-sent. Quanquam mihi nunquam id evenit: quinimo ejus con-trarium quodammodo fieri animadverti. Dum enim ansæ exigua tantum adhuc rima paterent, veluti circa 26. Nov. 1656, contigisse nullus dubito, nondum nigræ lacunæ distin-cte cerni poterant, sed tantum tenuiori luce, illa brachiorum pars, quæ disco Saturni proxima erat, perfusa videbatur. Qua eadem ratione & fascia in Saturno, de qua suprà, paulò tan-tum obscurior reliquo ejus disco cernitur, quia nempe licèt revera nigra satis vel etiam nigerrima sit, est tamen tenuissi-ma, unde & latior simul justo & dilutior spectatur.

Atque hinc apparet, frustra etiam adversus hypothefin meam objici, quod per eam nunquam Saturnus rotundus si-ne brachiis videri possit; quia nempe exiguam saltem lucem in extrema annuli ora reliquisse videbar, qua futurum sit ut non penitus visum effugiat annulus, quanquam à latere inspe-ctus nec brachia proinde in totum aboleantur. Nunc enim sciant nihil obstare quo minus omnem lucem margini annula-ri adimam, neque hoc absurdum in rerum natura statui Fa-brius

brius contendet, esse nimirum materiam aliquam quæ radios solares omnino non reflectat, quippe qui de quatuor novis, quos fingit, Saturni satellitibus, duos atros, ac per se invisibiles, nullisque solis radiis illustrandos, reliquos vero splendidos esse imaginetur. Verum hypothesim illam jucundissimam postea videbimus; sunt enim alia etiam prius ventilanda quibus nostra oppugnatur.

Dixi planam annuli superficiem, eam quæ nobis obversa est, aliquando à Sole averfam non illuminari, unde nimirum nec cerni nobis tunc possit, ac proinde nullas Saturno ansulas præstet. Quod cum certissima ratione fieri demonstraverim, adversarii mei breviter atque uno verbo negant, opticique regulis refelli dicunt. Quomodo tamen? Ponendo scilicet & Saturni distantiam & Solis diametrum longe quam ego majores, quo fiat ut superficies dicti annuli, ad nos spectans, semper quoque à Sole lumen accipiat. Atqui ego & distantiam illam & diametrum (nam una alia expendet) multo majores exhibui in Systemate meo quam alius quisquam omnium Astronomorum. Nam cum Ptolemæus & Copernicus diametrum Solis, tantum 5 Terræ diametris taxent; Aristarchus & Bullialdus 7; Ricciolus 33; Wendelinus, quo pluribus nemo, 64; ipse III dedi, nec sine ratione ut puto. Et Fabio tamen parcus fuisse videor, qui Solem longe majorem etiam fieri vult, ne stare hypothesis mea possit, utque merito hanc Optices ignorantiam mihi impegisse videatur. Cum ipse interim vel Optices vel Astronomiæ usque adeo imperitus sit, ut non advertat, licet centies millies majorem quam ego Solis diametrum statuatur, ac simul planetariorum orbium amplitudinem eadem proportionem adaugeat, tamen diametrum illam, ex Saturno conspectam, non nisi 3 circiter scrupulorum fore; atque etiam si tanta illinc appareret quanta nobis in Terra positis, tamen illa quam dedi demonstratione evinci, superficiem annuli ad nos versam, aliquando Solis lumine non illustrari, propterea quod planum annuli productum, inter nos Solemque transeat. Nam si hoc fieri quandoque neget, oportet statuatur diametrum Solis, (quod ridiculum est) ipsius

magni orbis diametri, in quo circa Solem Tellus defertur, saltem duabus quintis partibus æqualem esse. Hoc enim ita esse facile ostendere possem, sed Astronomi ex demonstratione mea pag. 570. haud ægre deducunt. Nam si planum annuli plano eclipticæ foret ad rectos angulos, non duas quintas sed integram orbis magni diametrum dicerem, duæ quintæ autem oriuntur ex inclinatione graduum $23\frac{1}{2}$ quanta est dictorum planorum.

Invenio vero & Graphices inscitiam mihi objici, quia nempe umbras quasdam, quas in schemate Saturni num. 10. Eustachius depinxit, alioqui non fuero reprehensurus. Eum enim accersivisse quidem illas, sed necessario, contendunt, ut sphæræ formam exprimeret; quia videlicet incertum absque iis futurum fuerit, an convexus Saturnus, an planus esset. Atque ego proinde ineptus, qui *de suo* eas umbras Eustachium addidisse dixerim, quas ille ex arte, atque ita flagitante rei natura descripserit. Sed enim joculari hîc libet. Nempe cum temere citra ullam demonstrationem me statuisse arguant, Saturnum circa axem suum converti, rogo nunc illos unde tam certo compererint, Saturni medium corpus globosum esse? Non enim observatio ulla puto hoc docuit, sed colligunt tantum ex analogia quadam inter hunc & alia quædam cælestia corpora, sicut & ego de conversione circa axem. Quid igitur necessario umbras ad globum repræsentandum accersere opus erat? Verum dissimulare mihi videntur, quasi non advertant, non adeo me de medii corporis umbra sensisse, quàm de illa quam ellipticæ figuræ, binas ansas efficienti, tribuit. Huic enim ea lege umbras adjecit, ut annulum ellipticum, non planum sed rotundum, similemque serpenti caudam devoranti, exprimat; nescio enim quomodo melius formam eam designem. Deinde & hoc umbræ suæ artificio præstitit, ut totus iste annulus post globum Saturni positus videatur. Qua ex re sibi ipsi forte Eustachius absurdam aliquam Saturni formam commentus est, vel aliis certe comminiscendi ansam præbere potuit. Mihi autem, de umbra illa temere addita, necessario admonendi erant le-

ctores; quia si vera esset, refellebat hypothefin meam, cum alioqui ichema Eustachianum, si sine umbris consideraretur, plurimum illam confirmaret. Sed & me ejusdem criminis teneri ajunt, quod passim umbras majores quam revera sint adjiciam. Nescio equidem quas dicant; semel enim Saturni globo annuloque umbras addidi, at non tanquam ita observassem, sed explicandæ hypotheseos causa, ut nempe appareret quo pacto annulum Saturno circumdedissem.

Quod si fasciam in disco ejus observatam, uti & illas quas in Jovē & Marte exhibui, nigriores quàm in cælo spectantur, ob oculos poni dixissent, non ivissem inficias. Fateor enim ultro cælatoris culpa hoc accidisse; ac in Marte præsertim zonam longe diluriorem, imprimis circa margines, pingendam fuisse. Quam neque perpetuo ibi spectari opinor, sed, ut Joviales fasciæ, mutabilem formam habere, sicut postremis in Marte observationibus didici; de quibus alias fortasse plura. Nihil autem ejusmodi mihi visum in utroque hoc planeta, Eustachius non alio argumento probat quàm cætera omnia, nempe quia ipse non viderit.

Quod Systemati Copernicano Systema meum Saturnium adaptaverim, nemo, ut opinor, jure me reprehenderit. Attamen cum Catholicis omnibus Fabrius illo interdicit, miror quod non vel hoc solo nomine rejicienda esse omnia commenta mea pronuntiet. Sed videbat, credo, facile in locum Copernicani Systematis Tychonicum me substituerē posse. Utrum enim adhibeam parum admodum interest ad phænomena quod attinet. Sed rei veritas haud aliter quam Copernicum sequendo explicatur; cujus sententiam non parum quoque nostrum Saturni Systema commendat.

Non intelligo autem qui tam confidenter, hanc de Terra mota opinionem, tantum ab heterodoxis Aristarchis tenendam Fabrius asseveret. Quoties enim de ea cum Catholicis (Romanis nempe) sermones conféro, profitentur illi se nequaquam decretis in contrarium latis teneri, sive ea à Cardinalibus, sive ab ipso summo Pontifice profecta fuerint. Quibus videlicet non tantum tribuunt in explicando sacra-

rum literarum sensu, ut etiam de controversiis quæ, ut vocant, facti sunt, necessario iis standum sit: ac plane, quietem Telluris rationibus potius adstruendam, quàm diplomatistis sancendam, existimant. Quin etiam in Gallia passim Systema Copernici non tanquam hypothesein, sed ut liquida veritatem propugnari certum est, idque ab ipsis Ecclesiasticis, & Sacerdotibus, qui voluminibus totis publice doctrinam eam tradunt, nihil, quod sciam, Roma contradicente. Quæ omnia perpendens, pridem credidi præter Astronomiæ ignaros, imperitamque multitudinem, tantum adhuc Cleanthes aliquos, in quibus & Fabrius, antiquo errori adhærescere, vique irrita Telluris motui obniti.

Cæterum cum mordicus, ut ait, hoc propositum teneat, ac planetas reliquos proinde nullo modo Terræ assimilandos putet, nihil mirum est, nec ferre eum potuisse Saturnicolarum ullam mentionem fieri. Ubi tamen injuria me culpat. Nam non ita de illis disserui, ut esse aliquos affirmarem, aut, rationibus adductis, verisimile id esse evincerem. Quin imo abstinere me dixi plura scribere de Astronomia, qualis incolentibus Saturnum futura esset, eo quod absurdum nimis plerique arbitrentur homines in planetis degere; qui proinde frustra me investigare dicturi essent, quid ii observent, qui in rerum natura non sunt. Cum autem, in periodo Lunæ Saturniæ computanda, menses Saturnicolarum nominavi, nihil novum aut insolitum Astronomis feci, quibus nihil frequentius est, quam ut in Sole aut Luna aliquem existere imaginentur, qui inde astrorum motus speculetur. Non erat itaque quod commentum hoc de Saturnicolis me ibi proposuisse Fabrius culparet. Quanquam etsi secus foret, neque primus ego hoc prodidissē, neque ridiculum adeo, apud Philosophos quidem, quam ille existimat. Verum præter institutum ad ista non digrediar. Vocat me Fabriani Systematis contemplatio, illius nempe quo, postquam meum diruit, phænomena circa Saturnum commodè exponi posse confidit. Nam priora illa, quibus Saturni ipsius motum novis legibus ordinare aggreditur, nihil huc pertinent, neque examinare










ea operæ pretium fuerit. Miror tamen quid in Tychonica hypothefi illi displicuerit, ut novam à fundamentis extruere in animum induceret: quam quidem vereor ut Astronomi satis percipere, nedum probare queant.

At nec illa quæ ad phafes Saturni pertinet, ullo modo clarior eft, prætereaque ab omni ratione & verifimilitudine tam longè remota, ut nesciam an refutari à me opus habeat. Cui enim imponet quæfo bellum iftud commentum de quatuor globulis Saturno proximis, quorum bini lumine folis splendent, binialii radios prorfus non reflectunt, fed natura fua funt obfcuriffimi. Videor mihi circulatorium quendam calculorum ludum videre, alios ibi albos, alios nigros eſſe, nunc hos, nunc illos oſtendi abſcondique viciffim. Tale quid enim præ ſe fert mirabilis illa hypothefis. Quidni verò circulos ſaltem in ſchemate ſuo expreſſit, quos nova hæc Planetarum ſoboles obeunt? Quos circulos non Saturnum in centro habere cerneremus, nec quidem minorem à maiore includi, fed poſt tergum Planetæ binos ex ordine jacere, in quorum utroque duo iſtorum ſatellitum ita currerent, ut nunquam alter alterum aſſequeretur, fed è diametro ſemper diſtarent. Rectè, ni fallor, mentem Fabrii intellexi, ſi minus, admone-
 ri cupio, fuit enim nonnihil divinandum. Quum autem, his poſitis, phaſin 1, 4, 8, 9, tabellæ ſuæ, facile explicari dicat, TAB. LIII
 ſcire velim quo pacto Planetæ novi ex minimis maximi fiant. Nam in 1 & 4 Figura, diametrum ne quidem dimidiam habent medii Saturnii corporis, cum in Figura 8, & 9, vel æquales huic, vel majores etiam eſſe neceſſe ſit. Deinde ipſius Euftachii obſervata phaſis in Figura 10, quomodo ex hac hypothefi deducetur? Cum neque rotunda corpora ellipticos arcus facere poſſint, & nigri Planetæ minores candidis hîc eſſe debeant, contra quam poſitum fuit: æquales enim inter ſe, poſt aliquantam deliberationem, ſtatuuntur: Quænam porro ſit novorum Planetarum periodus non jam exigam, nondum enim repertam eſſe ait. Sed vereor ut aliqua eſſe poſſit. Nam trium quidem annorum ſpatio, quorum primus 1646, unam illam Figuram 10 ſibi apparuiſſe Euftachius affirmat, in ta-
 bel-

bella quadam, Serenissimo Magno Duci Hetruriæ, Fratri T. C. dicata; unde oportet nihil motos fuisse interea satellites, quod quidem animadverti posset. Postea vero aliis tribus annis, 1655 nempe, cum duobus insequentibus, in tantum progressi fuere, ut medio horum annorum rotundus Saturnus spectatus sit, extremis vero utrisque cum binis ad latera orbibus, interstitio aliquo à medio corpore disjunctis. Utinam ridiculi Systematis inventori pœna constituta sit, ut motuum istorum anomalias investigare teneatur. Piget vero me ultra in his immorari: sed tamen pauca pro meo illo Saturni comite dicere cogor. Hunc, quia videbatur aliquid in Systemate suo turbaturus, supra Saturnum Fabrius relegavit, ita nimirum ut totus quem percurrit circulus, Planetâ superior jaceat. Sed immerito prorsus; ego enim cautionem me dabo, nihil eum ansatis illis phasibus occursum suo nociturum, cum pusillus adeo sit, ut ne quidem, cum prope ad Saturnum accedit, conspici queat: raro etiam, nec nisi cum rotundus est Saturnus, inter discum ejus & nos transeat, idque semidiurno spatio. Sinat itaque in sua illum manere orbita, unâque Mediceos Planetas in vias suas, à Magno olim Galilæo circa Jovem attributas, restituat, quos nullam omnino ob causam, quam quidem aut ipse adducit, aut ego animadvertere possum, loco suo similiter expulit.

Jamque percensui, ni fallor, Princeps Serenissime, omnia quæ adversus me Eustachius de Divinis, seu potius P. Fabrius conquirit, quæve ad suam hypothesein stabilendam commentus est, quæ quum animo reputo, nulla sane invenio, quibus non pro me sibi eruditi responsuri fuerint, aut venturi temporis experientia. Interim pauca hæc reposuisse non me pœnitet, quia, licet artificem illum merito neglexisse tacendo videri poteram, non idem fortasse contra alterum, quem ferunt alicujus nominis esse adversarium, valiturum erat silentium; utique quum satis omnibus constet pleraque ab hoc fuisse supeditata, multique, non tam quid, quam à quo sit objectum, respiciant. De cætero rogo C. T. ut, qua usus sum in disputando, libertatem boni consulat: Idque ita, si & provocatus in arenam hanc descendi, & justæ defensionis terminos nusquam tamen excessi.

F I N I S.





1824

CHRISTIANI HUGENII

DE

SATURNI ANNULO

OBSERVATIONES.

Tom. III

LIII

SATURNI ANNULO

OBSERVATIONES

CHRISTIANI HUGENII

DE

SATURNI ANNULO
OBSERVATIONES.

I.

Observationes in Saturnum Parisiis habitæ in Bibliotheca Regia.


Nno 1668, 17 Aug., hora 11 vespertina Dⁿⁱ Hugenius & Picart observarunt Planetam Saturnum ope telescopiorum 21 pedum & invenerunt figuram ejus talem qualem hic exhibemus, globo in medio manifeste excedente supra & infra ovalem quod vix dum anno præcedenti erat conspicuum. TAB. LI.
fig. 2.

Mensurarunt diversimode inclinationem magnæ diametri Ovalis ad æquatorem, quæ inventa est circiter 9 graduum, licet eo tempore tantum debuerit esse 4 graduum, secundum illa, quæ D. Hugenius dixit in Systemate Saturni, planum annuli, qui circumdat globum Planetæ cum plano Eclipticæ tantum efficere angulum 23. gr. 36; sed cum ultima hæc observatio, & similes aliæ hujus anni & præcedentis, magis exactæ sint & habitæ tempore magis opportuno ad mensurandam obliquitatem, illis, quæ fundamentum fuere memoratæ determinationis, D^{us} Hugenius invenit, loco 23 gr. 36 angulum plani Annularis & Eclipticæ esse circiter 31 ^{vera annuli} graduum; & hoc posito, non solum formam, quam jam ha- ^{inclinatio.}

bet Saturnus, sed & omnes illas, quas observarunt Astronomi ab illo tempore a quo veras observare potuere, congruere perfecte cum hypothese annuli, & peculiariter observationem Dⁿⁱ Campani, Anni 1664 initio Julii, quam ipse publici juris fecit, in quo magna Ovalis diameter duplicatæ minori diametro æqualis est.

Phasis rotunda.

Quod autem ad rotundam Saturni Phasin attinet, non potest nisi parum admodum tempus hujus mutari, ex memorata mutata inclinatione ita ut D^{us} Hugenius adhuc dum phasin hanc rotundam expectet anno 1671, in quo æstate ansas amittere inchoabit, quas nisi post annum circiter recuperabit, juxta illa quæ tradidit in Systemate Saturni.



II.

Excerpta ex literis D. Hugeni, Academiæ regię scientiarum socii, ad auctorem Diarii Eruditorum de figura Planetæ Saturni.

Brachia Saturno renata.



Um Saturnus abdicaverit figuram suam rotundam postquam hoc anno 1672 ex radiis solaribus emerfit, uti anno præcedenti prædixeram, & cum illi brachia sint renata, ultima mutatio non minus meretur, ut in Diariis vestris notetur, quam quædam aliæ præcedentes, quarum ibidem mentionem fecisti.

Umbra in disco Saturni.

Ultimum in conjunctione cum Sole fuit Planeta hic 12 Martii præterito, in 22 gr. 35 min. Piscium; magna autem obliquitas hujus loci Zodiaci ad nostrum horizontem, quando oritur, in causa fuit quo minus tribus mensibus, aurora prohibende, videretur; nam 5 Junii tantum D^{us} Cassini primum illum potuit observare, cum brachia Saturni jam facta essent adeo clara & ampla, ut inde colligi debuerit, jam à longo tempore fuisse instaurata; Observabat etiam in disco Saturni parvam umbram ad latus septentrionale brachiorum, pari-

riter ac exhibui in Systemate Saturni Tab. XLIX. *fig. 6.*; quod, æque ac instaurata brachia, congruit cum iis quæ statui in illo Systemate de annulo, quo cingitur Saturnus. Sed quoniam hæc hypothesis præcipue confirmatur observationibus, quas ultimo anno fecimus, quarum quædam nondum cum publico communicatæ fuere, ut mihi veniam concedas rogo has nunc memorare, cum annotationibus, quas ad eas feci.

Anno 1671 Saturnus apparuit rotundus sine brachiis aut ansis uti prædixi ante annos 14, quum publici juris feci meum Systema, licet id acciderit duobus mensibus prius quam expectaveram, scilicet in fine mensis Maji. Percepta deinde est quædam interruptio figuræ rotundæ, quam non prævidi, & quam difficulter admodum prævidere potuissem, quia Saturnum tantum observaram per unicum annum, cum hæc vaticinarer. Sed nosti, quam primum intellexerim, brachia rediisse, quod D^{us} Cassini observavit 11 & 14 Augusti, me affirmasse illa certo certius brevi iterum peritura, quod quoque verum repertum est; nam 4 Novembris brachia Saturni erant adeo obscura, ut dubitarem an quidem iterum apparerent, licet D^{us} Cassini affirmet se illa percepisse ultimâ vice 13 mensis sequentis Decembris, post quod tempus figura rotunda duravit, donec Saturnus in radios Solares se abscondit.

Hæc ultima brachiorum Eclipsis præcipue veritatem meæ *Saturnus rotundus.* hypotheseos probat; facile enim patet quam difficile fuisset secundam prævidere mutationem; priori adeo vicinam, nisi illius veram causam perspectam habuissem; præterquam quod modus, quo brachia secunda vice ablata fuere is ipse sit, quem statui in meo Systemate. Vidimus enim illa pedetentim deficere à claritate suâ, licet semper manserint satis ampla; quod erat certum indicium, radios solis valde oblique illustrare superficiem annuli Saturni, quæ ad nos conversa erat, quam tandem non amplius illustrarunt sed quidem oppositam. In præcedenti apparitione figuræ rotundæ, à fine Maji usque ad 14 Augusti, brachia latebant, non quia non illustrabantur, sed quia visus noster, parum admodum

vel omnino nihil elevatus erat supra superficiem annuli, quem Sol intuebatur.

*Linea æqui-
noctialis an-
nuli.*

Hæc omnia tantum illis scripta sunt, qui cum cura examinarunt, quæ tradidi in Systemate Saturni : & pro iis adhuc addo, quantum attinet ad lineam æquinoctialem vel rotundæ apparitionis Saturni, quæ linea formatur interfectione annuli & plani orbitæ planetæ, me nullis cogi observationibus, ad situm illius mutandum quem in Systemate Saturni præscripsi in $20\frac{1}{2}$ gr. Piscium & Libræ. Quoties Saturnus è Sole visus perveniet ad illa Zodiaci loca, rotundus apparebit, etiam quando ab hisce tantum duobus gradibus removeretur; nam ex observationibus anni ultimi percepi ita restringendos esse limites quos 6 graduum statueram, ut satis facerem quibusdam Galilæi & Gassendi observationibus, quorum Telescopia minoris notæ fuerant, quam credere ausus eram. Juxta ultimas hæc limitationes minus apparitiones formæ rotundæ Saturni durabunt quam ipse olim prædixi; ita ut anno 1685 non initio mensis Martii, sed mense Julio, brachia amittet Saturnus prope finem apparitionis suæ, & illa recuperabit sequenti mense Novembri; pariter 1701 non poterit videri rotundus, nisi mense Junio, initio suæ apparitionis, & mense Augusto brachia ejus incipient renasci.

Antequam finem huic scripto imponam, hic addam, Tabulam, quam dedi pro motu parvæ Lunæ, vel stellæ, quæ comitatur Saturnum, & circa illum volvitur 47 minutis minus quam 16 diebus, huc usque repertam esse adeo observationibus congruam, ut nondum videre queam, sitne quidpiam addendum vel detrahendum.

F I N I S.

CHRISTIANI HUGENII
ΚΟΣΜΟΘΕΩΡΟΣ,

SIVE

De Terris Coelestibus, earumque ornatu,

CONJECTURÆ

AD

CONTANTINUM HUGENIUM,

Fratrem:

GULIELMO III. MAGNÆ BRITANNIÆ REGI,
A. SECRETIS.

Horat. Epist. 6. lib. I.

*Hunc solem, & stellas, & decedentia certis
Tempora momentis, sunt qui formidine nulla
Imbuti spectent: quid censes munera terræ
Quid maris extremos Arabas ditantis & Indos?
Ludicra quid, plausus, & amici dona Quiritis,
Quo spectanda modo, quo sensu credis & ore?*

BENEVOLO LECTORI

SALUTEM.



Libellus hicce jam ad umbilicum deductus, & prælo destinatus erat, cum maximo rei literariæ damno. Illustrem ejus Auctorem primum morbus, dein mors occupavit. Qui tamen ut in lucem prodiret, cavit, ultima voluntate fratrem, ad quem scriptus est, rogans, hujus ut edendi curam suscipere vellet. Cui rei Nobilissimo Viro innumere occupationibus & peregrinationibus, utpote qui Magnæ Britanniae Regi ad res Batavas à secretis esset, distracto vacare non licuit, nisi anno ferme post Auctoris obitum. Qua re, intercedente deinde etiam Typothetarum mora, factum est, ut cum editioni jam omnia pararentur, & hic Vir fato cesserit, adeoque & Parente & eo, qui post parentis obitum ejus vicem gerebat, & ad quem destinatus erat, destitutus fuerit hic Libellus. Eadem tamen, qua ab Auctore conscriptus erat, ratione, eademque ad fratrem, licet jam defunctum, inscriptione, (Re-

ligio enim fuit quidquam immutare) prodit in publicum, non dubia spe, fore, ut eruditi, sicut reliqua omnia Auctoris, sic & ultimum hunc ejus factum benigne accipiant. Demonstrationes equidem Mathematicas non invenient ubique, neque enim res patitur, sed, quo in his rebus nihil ultra desiderari jure posse videtur, verisimiles & ingeniosas conjecturas. Quæ ex cælorum notitia depromi potuerunt, ea hic videbunt ratione demonstrata; quæ ex iis non patent, ex cælestium corporum cum tellure nostra affinitate solerter conjecta. Verum hujus quid sit, ex ipso Auctore commodius perspicias. Vale.

CHRISTIANI HUGENII COSMOTHEOROS,

SIVE

De Terris Cœlestibus, earumque ornatu,
Conjecturæ.

A D

CONSTANTINUM HUGENIUM,

Fratrem.

LIBER I.



Ieri vix potest, Frater optime, si quis cum Copernico sentiat, Terramque, quam incolimus, è Planetarum numero unum esse existimet, qui circa Solem circumferantur, ab eoque lucem omnem accipiant; quin interdum cogitet haud a ratione alienum esse ut, quemadmodum noster hic Globus, ita cæteri quoque isti, cultu ornatuque, ac fortasse habitatoribus non vacent. Præsertim si ad ea quoque respiciat quæ post Copernici tempora in cœlo deprehensa sunt; Comites nempe stellarum Jovis & Saturni, Lunæ montes camposque, & alia multa; quibus non solum veritas inventi ab illo systematis, sed & similitudo ac cognatio, Terram inter & Planetarum corpora, magnopere confirmatur. Itaque & nobis, cum prælongis Telescopiis sidera unà speculareretur; quod jam per multos annos, propter occupationes tuas & continuam fere absentiam,

Mmm 2

tiam,

*Fuisse qui
Planetis in-
colas tribue-
runt, sed ni-
hil præterea
de iis inqui-
sivisse.*

tiam, non licuit; sæpius ea de re sermones habitos memini. Qualia vero essent, quæ in istis regionibus extarent Naturæ opera, id ne sperandum quidem esse ut unquam sciri possit, frustra proinde quæri, certo credebamus. Neque vero aut a priscis Philosophis, aut a recentioribus quidquam ejusmodi tentatum fuisse comperi. Nam inter illos quidem, jam ab ipso Astronomiæ exortu, cum primum Sphæricam esse Terræ formam intellectum est, eamque undique æthere cingi, fuere qui auderent alios esse in sideribus mundos, imo innumerabiles dicere. Posteriores vero, ut Cardinalis Cusanus, Brunus, Keplerus, qui & Tychonem Braheum idem sensisse scribit, Planetis quidem incolas suos tribuerunt; Cusanus & Brunus etiam Soli, & stellis inerrantibus: nihil tamen ulterius aut hi aut illi quæsisisse inveniuntur; neque etiam nuperus auctor Gallicus dialogi ingeniosi de Mundorum multitudine. Tantum fabulas quasdam de Lunæ populis nonnulli contexuerunt, animi causâ, Lucianicis, quas nosti, haud multo verisimiliores. Nam & Keplerianas his annuero, quibus ille in somnio Astronomico ludere voluit. Mihi vero, qui tot viris egregiis nequaquam me perspicaciorum esse existimo, sed eo feliciorem, quod post illos tantum non omnes, natus sim; cum ab aliquo tempore diligentius ista meditari cœpissim, visum est non prorsus obseptas esse, de rebus tam procul dissitis, inquirendi vias, sed verisimilibus conjecturis abunde materiam præberi. Quas conjecturas meas, prout sese subinde obtulerunt, in adversariis annotatas, nunc in ordinem redigere, tibi exponere volui; atque aliquid etiam adjicere de Sole, Stellisque inerrantibus, & mundi magnitudine, cujus particula quædam minima est totius Systematis nostri complexus. Et hæc quidem, pro solito tuo res superas cognoscendi studio, libenter te lecturum arbitror. Mihi certe scribere ea jucundum fuit; utque sæpe aliàs, ita nunc, velut in re ipsa, verum esse expertus sum illud Archytæ; *Si quis in cælum ascendisset, naturamque mundi & pluchritudinem siderum perspexisset, insuavem illam admirationem ei futuram*,
(quæ

(quæ alioqui jucundissima fuisset) nisi aliquem cui nar-
ret habuisset. Utinam vero hæc nostra narrare non omni-
bus possem, sed præter te lectores arbitrato meo deligere li-
ceret, qui nec Astronomicæ scientiæ, nec Philosophiæ me-
lioris rudes essent; quibus facile conatus hosce probatum iri,
nec, propter novitatem, defensione opus habituros confi-
derem. Quia vero & in imperitiorum manus venturos pro-
video, & fortasse quorundam severiora judicia subituros,
puto non abs re fore ut utrorumque reprehensiones jam
hinc repellere coner.

Atque erunt quidem, qui cum Geometriam aut Mathe-
maticas nunquam attigerint, omnino vanum ac ridiculum Occurritur
objectionibus
imperito-
rum. hoc inceptum nostrum censebunt. Incredibile enim iis vi-
detur, ut Siderum distantias, aut quæ sit magnitudo eorum,
metiri possimus. Tum vero motum huic Terræ aut falso
adscribi existimant, aut nequaquam adhuc probatum esse.
Quare nihil mirum, si, quæ talibus fundamentis exstruun-
tur, pro somniis nugisque sint habituri. Quid vero his di-
cemus, nisi aliter sensuros si disciplinis istis, naturæque re-
rum contemplandæ, operam dedissent. Hoc vero longe
plurimis non licuisse scimus, vel quod ad ea parum ingenio
comparati essent, vel quod unde discerent non haberent,
vel denique quod suis, aut reipublicæ curandis negotiis, alio
vocarentur. Itaque nihil eos reprehendimus; sed, si dili-
gentiam in his rebus nostram condemnandam putabunt, ad
magis idoneos judices provocamus.

Erunt alii qui ea, quæ verisimilia esse ostendere conati Conjecturas
hasce S. Scri-
pturis non
adversari. sumus, Sacris Literis adversari prædicent, cum de Terris
animalibusque, atque etiam ratione præditis, nos differere
animadvertent; de quorum origine, aut quod omnino in
rerum natura extent, nihil illic traditum sit, sed ea potius
ex quibus contrarium sequatur. Tantum enim de Tellure
hac, cum suis animantibus, herbisque, & homine omnium
domino commemorari. Quibus respondeo, quod & ante
me alii, satis apparere non de omnibus iis, quæ Deus crea-
vit, particulatim nos edoceri eum voluisse. Itaque cum vel

Siderum vel Terræ nomine, in prima Genesi, etiam Planetæ, qui præter Solem Lunamque sunt, comprehendantur; atque etiam Jovis & Saturni Comites; posse non tantum plures alios utriusque generis includi, sed & res innumeras quas in superficie eorum summo opifici collocare placuerit. Porro non nescire eos quo pacto interpretandum sit, quod dicitur omnia propter hominem condita esse; neque eo significari, ut a pluribus jam est animadversum, tot ingentia corpora stellarum, quas partim videmus, partim nec vidissemus quidem unquam, si Telescopiorum auxilium defuisset, nostræ utilitatis aut contemplationis gratia fuisse condita; quia id absurde diceretur. Quare cum operum Dei magna pars extra conspectum hominum sit posita, neque ad eos pertinere videatur, haud alienum esse opinari, aliquos extare, qui illa propius aspiciant & admirentur.

*Inquisitio-
nem horum
ut nimis cu-
riosam repre-
bendi non
debere.*

Sed dicent fortasse, cum de his ipse supremus auctor nihil amplius docuerit aut revelarit, credendum esse sibi scientiam eorum reservasse, ac proinde temere, & curiose nimis de iis inquire. At nimium ipsos sibi sumere ajo, si definire velint, quousque homines investigando progredi debeant, diligentiaque eorum modum statuere; ac si terminos, quos hic Deus præscripsit, certo cognitos haberent; aut in hominum potestate esset illos prætergredi. Et sane, si talibus scrupulis retenti fuissent qui ante nos vixerunt, adhuc ignorari potuisset quænam Telluris esset figura, aut quæ magnitudo, & num aliqua Americæ regio. Item an Solis radiis Luna illustraretur, quibusve ex causis aut hæc aut ille deficerent; ac pleraque alia, quæ Astronomorum laboribus repertisque accepta referimus. Quid enim tam absconditum & inaccessum videbatur, quam quæ de rebus cœlestibus in aperta luce nunc posita sunt? Ex quo intelligitur industriam mentisque acumen hominibus data esse, quibus paulatim rerum naturalium cognitionem consequerentur, neque esse cur conari desinamus & ulteriora inquire. Attamen reconditiora illa, quibus hic præcipue insistimus, scimus non esse ejusmodi, ut quærendo penitus investigari possint. Itaque nihil veluti cer-

certum affirmamus, (quî possimus enim?) sed conjecturis tantum agimus, quarum de verisimilitudine suo cuique arbitratu judicare liberum sit. Quod si quis irritam igitur, & inanem in his operam nos ponere dicat, de rebus iis conjecturas prodendo, de quibus ipsi fateamur nihil certi unquam comprehendi posse: respondebo totum Physices studium, quatenus in causis rerum eruendis versatur, eadem ratione fore improbandum; *ubi verisimilia invenisse laus summa est, & indagatio ipsa rerum, tum maximarum, tum occultissimarum, habet oblectationem.* Sed verisimilium multi sunt gradus, alii aliis veritati propiores, in quo diligenter æstimando præcipuus iudicii usus vertitur.

Ut vero mihi videtur, non tantum res ad cognitionem maximas hic indagamus, sed quarum contemplatio studiis quoque sapientiæ multum conducatur. Expedit nimirum ut, velut extra Tellurem hanc positi, procul eam intueamur, quæramusque, an sola sit in quam omnem ornatum natura contulerit. Ita enim rectius quid sit, quoque loco habenda, intelligere poterimus: quemadmodum qui longinquas regiones obeunt, de patriæ suæ rebus verius judicare solent, quam qui nunquam inde se moverunt. Nec sane ille magnopere admirabitur quæcunque hic vulgo maxima habentur, qui, rationibus nostris aliquid tribuens, multitudinem Terrarum nostræ similium, similiterque incolis suis frequentatarum, sibi proposuerit. Deum vero, tantarum rerum effectorem, quî poterit idem non valde suspicere & venerari? cujus providentiam, sapientiamque mirabilem, passim hic assertam inveniet, contra falsas opiniones eorum, qui vel ex fortuito corpusculorum concursu ortam esse Terram, vel omni principio eam carere dixerunt. Sed jam ad propositum.

Et quoniam maximum sumetur argumentum, ad ea quæ instituimus probanda, ex ordinatione Planetarum Copernicea, quodque inter eos Tellus hæc haud dubie numeratur; bina schemata hic initio describo, quorum alterum orbes eorum, circa Solem dispositos, continet, veris proportio-

ni-

Conjecturas non esse vanas, quia non plane certa.

Ad sapientiam & pietatem facere, qua hic tractantur.

TAB. LIV.
fig. I.

TAB. LV.
fig. 1.

*Copernici sy-
stema expo-
nitur.*

TAB. LIV.
fig. 1.

nibus expressos; simile illi quod in Automato nostro sæpius conspexisti: alterum rationes magnitudinum ostendit, quibus corpora Planetarum inter se, & ad Solem, comparantur; quod in eodem Automato adjectum est. In priore punctum medium Sol est; à quo deinceps, noto omnibus ordine, sunt orbitæ Mercurii, Veneris, Telluris, cum superaddita via Lunæ; tum Martis, Jovis, & Saturni: ac circa Jovem, Saturnumque circelli Comitum; illius quatuor, hujus quinque. Quos circellos, cum eo, qui Lunæ nostræ dicatus est, longe majores hic poni sciendum, quam pro ratione ad Planetarum primariorum orbitas; ne, ob parvitatem, penitus visum effugerent. Orbitalium vero quanta reipsa sit vastitas inde intelligere licet, quod distantia a Sole ad Terram, decem vel duodecim millia Terræ diametrorum continet: de qua mensura pluribus postea agetur. Omnes porro in eodem fere plano sitæ sunt; ut proinde non multum discedant ab eo in quo Tellus circumit, quod Eclipticæ planum vocatur. Hoc vero oblique secatur ab axe Telluris, in quo illa volvitur horis viginti quatuor, respectu Solis: isque axis, nisi quod mutationem lentissimam subit, quam norunt Astronomi, sibi ipsi parallelus manet, dum ipsa circa Solem defertur; ex quo dierum noctiumque oriuntur vices, itemque temporum anni commutationes, ut passim docent eorum libri. Unde & tempora periodorum, quibus circuitus suos Planeta quisque peragit, huc transcribo. Nempe Saturni, annorum 29, dierum 174, horarum 5. Jovis annorum 11, dierum 317, horarum 15. Martis proxime dierum 687. Telluris dierum 365½. Veneris dierum 224, hor. 18. Mercurii dierum 88.

*Copernici
doctrinam
qua rationes
confirmant.*

Hic est ille, notissimus jam, cælestium corporum ordo, a Copernico repertus, idemque naturæ simplicitati convenientissimus. Hunc si quis convellere aut improbare contendat; is discat primum, ex demonstrationibus Astronomorum, quanto in hac descriptione melius faciliusque omnium eorum, quæ circa motum siderum animadvertuntur, ratio reddatur, quam in Ptolemaico aut Tychonis systemate. Cog-
no-

noscat etiam, ex singulari Kepleri observatione, quomodo Planetarum, interque eos Telluris, a Sole distantiae temporibus periodorum, quas retuli, certa quadam proportionem respondeant; quam postea Jovis quoque & Saturni Comites, horum respectu, servare deprehensum est. Intelligat quam contra motus naturam quiddam comminiscendum sit, quo demonstretur cur stella Polaris, in extrema cauda minoris Ursæ, exiguo nunc circulo moveatur, duobus gradibus & tertia parte à Polo distans; cum ante annos mille octingentos viginti, ætate nempe Hipparchi, duodecim gradibus, 24 scrupulis, ab eodem Polo abfuerit: post aliquot vero sæcula, ad 45 gradus inde recessura sit, & post annorum viginti quinque millia, eodem quo nunc est, reversura. Ut proinde cælum totum, si circumrotari dicatur, super alio atque alio axe id faciat necesse sit, quod est absurdissimum; cum in Copernici hypothese nihil sit explicatu facilius. Denique expendat omnia illa, quibus, ad argumenta Copernico objici solita, Galilæus, Gassendus, Keplerus, alique plurimi responderunt. Quorum rationibus ita sublati sunt qui supererant scrupuli, ut omnes nunc Astronomi, nisi tardiore sint ingenio, aut hominum imperio obnoxiam credulitatem habeant, motum Telluri, locumque inter Planetas, absque dubitatione decernant.

In altero, quod dixi, schemate, ita horum globi cum Sole oculis subjiciuntur, ac si juxta se positi essent. Atque hic rationem diametrorum, ad Solis diametrum, eam secutus sum, quam tradidi in libro de Saturni Phænomenis. Nempè Annuli Saturnii eam quæ 11. ad 37; Globi inclusi, ad eandem Solis diametrum fere, quæ 5 ad 37; Jovis, quæ 2 ad 11; Martis, quæ 1 ad 166; Telluris, quæ 1 ad 111; Veneris, quæ 1 ad 84; quibus nunc addo Mercurii, quæ est 1 ad 290 ex Hevelii observatione Anno 1661 habita; cum in Solis disco Mercurius conspiceretur, nostro tamen, non illius calculo.

Quomodo autem hæ nostræ magnitudinum rationes inventæ sint, tum ex cognita proportionem distantiarum à Sole, tum

Micrometris præstare lamellas virgulasve tenues.

ex mensura Diametrorum, Telescopiis capta, eo, quem dixi, libro ostendi: neque adhuc video cur multum, ab iis quas tunc definivi, recedam; etsi nihil eis deesse non contenderim. Nam quod multi existimant, in metiendis apparentibus diametris, præstare lamellis nostris usum Micrometrorum quæ vocant, quibus fila tenuissima in foco Lentis majoris prætenduntur, nondum iis assentiri possum, sed aptiores esse lamellas virgulasve tenues arbitror, quas eo loco objiciendas docueram. Ex quo istud Micrometrorum inventum, itemque Telescopii ad organa Astronomica adaptatio, non multo post emanavit: non sine laude tamen eorum, qui in perficiendo tam utili invento elaborarunt.

Solem Planetis multo majorem esse.

Cæterum, in hac planetarum comparatione, notanda est ingens Solis magnitudo, cum interioribus quatuor Planetis collata; utque hi Saturno quoque, ac Jove, longe longeque minores sint. Nam considerandum, non ordine crescere eorum corpora cum distantiiis a Sole; quippe cum multo major sit Veneris, quam Martis, globus.

Tellurem Planetis, & hos Telluri recte assimilari.

His de utroque Diagrammate expositis, nemo, ut puto, jam non videt, quam clare ex priore, in quo systematis est typus, sequatur, eodem genere, cum cæteris quinque Planetis, Tellurem hanc nostram contineri. Nam vel ipsi circulorum positus hoc testantur. Atqui præterea constat, telescopiorum observationibus, & globosa esse omnium corpora, itidem ut Telluris, & à Sole splendorem similiter eos mutuari. Ac denique in hoc quoque ei similes esse, quod in se ipsis circum proprios axes volvantur: quis enim de cæteris dubitet, cum in Jove & Marte hoc certo compertum sit? Sicut autem Tellus Lunam comitem habet, ita Jupiter & Saturnus suas. Quid igitur tam probabile est, cum in his tot rebus Telluri cum Planetis illis primariis intercedat similitudo, quam non minori quoque dignitate & pulchritudine eos esse, nihiloque minus ornatos cultosque: aut quænam cur hoc aliter se habeat ratio excogitari potest?

Ex similitudine in hisce recte argumenta peti.

Sane si cui, in dissecti canis corpore, viscera ostenderentur, cor, stomachus, pulmones, intestina; tum venæ, arte-

te-

teriæ, nervi; etiam si nunquam animalis corpus apertum conspexisset; vix dubitaret, quin similis quædam fabrica, ac partium varietas, in bove, porco, cæterisque bestiis inesset. Nec si unius, ex Saturni aut Jovis Comitibus, naturam cognitam haberemus, non eadem fere quæ in illo, in cæteris quoque reperiri putaremus? Similiterque ex uno quoque Cometa, si quidnam esset perspicui posset, eandem omnium rationem esse statueremus. Itaque plurimum ponderis habet illa ex similitudine petita, & à rebus visis ad non visas producta ratio. Quam proinde sequentes, ex Planeta uno, quem coram aspicimus, de reliquis ejusdem generis rectè conjecturam faciemus.

Ac primùm quidem, non aliter quam Tellus nostra, soli-^{Planetas} do corpore eos constare existimabimus. Deinde prorsus^{solidos esse &} etiam verisimile censebimus, adesse globis eorum id quod^{gravitate pollere,} gravitatem appellamus; cujus vi corpora quæque, in superficie eorum hærentia, premant eam; aut, si dimoveantur, ex omni parte velut attracta recidant. Quod ex ipsa quoque globi forma liquet, cum hæc ex conatu corporum, ad centrum unum tendentium, generetur. Imo jam, certo quodam ratiocinio, colligere didicimus, quanto majus minusve in Jove ac Saturno, quam apud nos, gravitatis momentum esse debeat. Qua de re, deque auctore ejus, in Diatriba de Causis gravium diximus.

Nunc vero ulterius quærere pergamus, quibus gradibus ad penitiora quædam, de statu ornatuque Terrarum istarum, cognoscenda perveniri possit. Ac primùm quam verisimile sit herbas, & animalia in earum superficie existere, æque ac in Tellure nostra. Nemo negabit puto, & formam & vi-^{Nec deesse} tam, & crescendi generandique rationem, in stirpibus ani-^{illis anima-} mantibusque majus quid esse, magisque mirandum quàm corpora vitâ carentia, quantumvis mole conspicua sint; velut montes, rupes, maria. Patet etiam in utroque illo viventium genere, multo aliter longeque expressius, cerni Divinæ providentiæ intelligentiæque præstantiam. Cum

enim quæ in Terra, imo quæ in Cælo quoque aspicimus, aliquis Democriti, aut etiam Cartesii sectator, ita se explanaturum profiteri possit, ut tantum atomis & motu horum indigeat; in herbis tamen & animalibus frustra erit, nec de primo eorum exortu quidquam verisimile adferet; cum nimis manifesto appareat, nunquam vago, ac fortuito corpusculorum motu, talia quædam prodire potuisse: quippe in quibus omnia ad certum finem egregie apta accommodataque cernantur; cum summa prudentia, & legum naturæ, ipsiusque Geometriæ, cognitione exquisita, quemadmodum in sequentibus sæpius ostendetur: ut jam omittamus illa in progignendo miracula. Quod si igitur in Planetis nihil aliud quàm vastæ solitudines, corporaque inertia, & vita carentia reperiantur; atque absint ea in quibus clarissime certissimeque Architecti supremi sapientia elucescit; haud dubiè multum dignitate & pulchritudine concedent Telluri nostræ: quod, ut jam dixi, rationi adversatur.

*Ut nec plan-
tas.*

Non igitur sic; sed erunt & ibi corpora quædam motu prædita, seseque ipsa moventia, neque his quæ in Terra sunt ignobiliora; adeoque erunt animantia. His autem positis, jam de herbis quoque fere necessario concedendum est; ut sit aliquid quo illa alantur. Omnia verò hæc non aliter quam in superficie Planetariorum globorum existere, dubitari non potest; cum calore Solis gaudere ac foveri debeant; cujus radiis, non secus quam Tellus nostra, expositi sint.

Sed dicet aliquis, celerius quàm par est, hic nos progredi. Nam, ut non negetur res aliquas in Planetarum superficie reperiri, quæ ibi crescant & moveantur, Deoque auctore, non minus quam nostra hæc, dignæ sint; longè diversam tamen earum posse esse naturam, ut nec materia, nec crescendi more, nec extrinseca forma, aut internis partibus, quidquam iis, quæ apud nos sunt, simile habeant: ac talia sint denique, ut nihil ejusmodi in mentem homini venire possit. Hoc igitur jam quæramus quam sit verisimile; & an non potius credendum sit, non tantam esse diversitatem quan-

quanta existimetur. Favet eorum sententiæ, qui omnia alia illic imaginantur, quod Natura videatur varietatem plerumque, & plurimis in rebus, sectari; quodque Conditoris potentia hoc ipso magis declaretur. Sed cogitare debent, non esse hominum arbitrio definiendum quàm magna ista sit varietas ac dissimilitudo. Neque, quia possit esse immensa, resque illæ ab intellectu, & comprehensione nostra penitus remotæ, idcirco necesse esse, ut reipsa tales existant. Quamvis enim similia omnia iis quæ apud nos sunt, finxisset Deus in cæteris Planetis; nihilo minor esset spectatoribus eorum, si qui sunt, admiratio, quam si plurimum distarent: cum, quid in aliis effectum sit, nullo modo possint cognoscere. Potuisset in terris Americæ, aliisque longè remotis, aliqua creasse viventia, quæ his nostris nihil simile haberent; neque id fecit tamen. Nam formarum quidem diversitatem aliquam esse voluit, quibus animalia herbæque nostræ à transmarinis illis, dissiderent, sed & in his ipsis formis, inque crescendi & generandi modis, multa utrisque convenire fecit. Habent enim & illic animalia pedes, alas; atque intus cor, pulmones, intestina, vulvas; cum hæc omnia in unoquoque genere illorum, ac nostratium quoque, planè diversa ratione ordinari potuerint, ab infinitæ solertiæ opifice. Non igitur omnem varietatem quam poterat in rebus creatis, earum auctor exhibuit, nec proinde argumento illi, quod a Naturæ novandi studio petitur, tantum tribuendum est, ut omnem, qui in cæteris Planetis est, ornatum ab eo, qui in Terra nostra conspicitur, prorsus alienum putemus. At contra credibile est, inter ea quæ in superficie istorum globorum generantur, quæque apud nos sunt, præcipuam esse differentiam, quæ ex majori, minorive, eorum a Sole, caloris vitæque fonte, distantia oriatur. Propter quam tamen magis materiam, quam formam rerum, variari necesse sit.

Ad materiam vero quod attinet qualiumcunque stirpium, atque animantium, quæ Planetas exornant, etsi qualis sit cogitatione assequi nequeamus, illud tamen vix dubitari potest, quin ex elemento humido, uti nostra omnia, crescant &

*Aquas a
Planetis non
abesse.*

alantur. Nihil enim aliter gigni posse omnes fere Philosophi arbitrantur; & fuere inter præcipuos, qui ex aqua omnium rerum originem esse dicerent. Etenim, sicca & arida quæ sunt, motu carent: absque motu vero nihil corporibus, quo augeantur, accedere posse manifestum est. At liquidorum particulæ, & inter se continue moventur, & facile sese ubique insinuant; quo fit, ut non tantum seipsas, sed & alias diversæ naturæ, quas secum vehunt, crescentibus apponere aptæ sint. Ita enim, aquæ affluxu, & herbas adolescere, foliisque & fructibus augeri, & lapides ex arena concreescere cernimus. Itemque metalla & crystallos, gemmasque incrementa inde capere satis constat, etsi in his obscurius id animadvertitur, propter lentissimos progressus; quodque sæpe non in iis, quibus enatæ sint, locis cavitatibusque reperiantur; pervetustis, ut videtur, Terræ ruinis convulsionibusque disjectæ. Sed aquæ elementum a Planetis non abesse, verisimiles quoque conjecturæ suppetunt, ex telescopiorum observationibus. Apparent enim in Jove tractus quidam reliquo disco obscuriores, iique non eadem semper forma permanentes, quod nubium proprium est. Maculæ vero, quæ immutabiliter globo ejus inhærere conspiciuntur, sæpe longo tempore obtectæ manent, nubibus videlicet illis interceptæ, è quibus deinde rursus emergant. Atque etiam nubes in medio Jovis disco exoriri quandoque annotatum fuit, & maculas quasdam minores existere, reliquo corpore magis lucidas, neque eas diu superesse; quas Cassinus ex nivibus esse conjectabat, cacumina montium insidentibus. Mihi non improbabile videtur, terræ regiones candidiores esse, superfluis nubibus plerumque occultatas, ac nonnunquam ab iis liberatas.

Apparent, etiam in Marte, lucis & obscuritatis discrimina, ex quibus conversio ejus ad Solem, viginti quatuor horis cum 40 scrupulis primis, absolvi reperta est; nubes tamen nondum fuerunt animadversæ, idcirco quod multò minor cernitur quam Jupiter; etiam cum maximè ad Tellurem appropinquat. Præterquam quod & intensior Martis lux, utpote

a propiore Sole accepta, intuentibus impedimento est. Eademque lux magis etiam obstat in Venere. Sed si Tellus ac Jupiter nubes aquasque habent, vix dubitandum est quin & in cæteris inveniantur Planetis. Nec tamen nostræ prorsus <sup>Nostræ tam-
men non
prorsus simi-
les.</sup> similes esse aquas istas dixerim; etsi liquidæ ut sint, ad usus quos præstare debent, requiritur; ut verò perspicuæ, ad pulchritudinem. Nostra enim hæc, in Jove & Saturno, continuo gelu astringeretur, propter magnam Solis distantiam. Itaque putandum est naturam earum, quæ in Planetis sunt, ad suam quamque regionem attemperatam esse; ut in Jove quidem ac Saturno difficilius in glaciem vertantur, in Venere verò, ac Mercurio, minus facile in vapores abeant. In omnibus autem attractum a Sole humorem, subsidere rursus, & unde venit reverti, necesse est, ne penitus aridum Solum relinquatur. Non cadet autem nisi in guttas densatus; quod eveniet, sicuti apud nos, cum in frigidiorum locum ascenderit ex inferiore calidiorum ob terræ viciniam.

Habemus igitur in globis illis campos Solis radiis expósitos, pluviisque aut rore irrigatos, in quibus si quid enascatur; ut fieri debere utilitatis & ornatus gratia diximus; id eodem quo apud nos modo fieri verisimile est: cum nec aliter fere, nec melius possit. Ut nempe radicibus suis solo adhæreat, simulque harum fibrarum humorem inde combibat. Neque vero satis ornata mihi esse terræ istæ videbuntur, nisi stirpes quædam habeant alte excrecentes, quæque adeo arbores, aut arborum instar, fiant: quandoquidem hæc maximum, ac, <sup>Nec alia
ratione illic
nasci & pro-
pagari stirpes
quam apud
nos.</sup> præter aquas, unicum sunt ornamentum, quod Natura terris largiri possit. Quæ quantum amoenitatis & gratiæ afferant facile unusquisque secum existimat. Ut omittam jam materiæ ex arboribus opportunissimum ad omnia usum. Porro vix aliter quoque propagari stirpes, aut perennare posse existimo, quam producendis seminibus. Cum unica fere hæc ratio videatur, eademque tam mirabilis, ut non solius Telluris nostræ gratia inventa sit. Denique nihil vetat, ut, quemadmodum in diversis hujus terræ regionibus, ita in istis quoque longè remotis, idem in iis quæ ad stirpes attinent, Natura secuta sit. Ne-

*Idem & de
animalibus
verum esse.*

Neque vero dispar ratio est in animalibus; cur non & pascendi, & generandi, modus similis putetur in Planetis ei qui est apud nos. Quia nempe universa terræ hujus animalia, sive quadrupedum generis, aut volucrum, aut natantia, aut reptilia, ipsaque insecta, idem naturæ præscriptum sequuntur. Vescuntur enim vel herbis, fructibusque, vel ipsis animantibus, quæ inde nutrita fuere: omniumque generatio per conjunctionem maris & fœminæ, perque fœcunditatem ovorum (nam & hæc ubique animadvertitur) peragitur. Nam hoc quidem certum est, fieri non posse ut, vel herbæ, vel animantia quæ illic sunt, sine propagatione generis sui esse perseverent; quia vel fortuitis casibus interire ea ac deficere contingeret; cum herbæ stirpesque humida materia consent, eoque etiam exarescere debeant; animalia mollibus flexilibusque membris, nec, ut silices, duris. Quod si in his alias nascendi vias comminiscamur, velut ex arboribus; quemadmodum diu creditum est, ex harum genere quodam in Britannia anates nasci, apparet quàm id à ratione abhorreat, propter summam, quæ lignum inter carnesque est, differentiam. Vel si animalia ex limo terræ existere putemus, velut de muribus in Ægypto multi prodiderunt, quis, naturæ paulo intelligentior, non videt hoc alienum esse institutis ejus? aut quis non existimet multò magis convenire Dei magnitudini ac sapientiæ, ut semel omnis generis animantia creaverit, inque Terrarum orbem certo modo, (quem nemo hominum adhuc divinare potuit) imposuerit, quam ut perpetuo novis ex terra producendis vacare necesse habeat? Quibus alendis, educandisque, abesset quoque prorsus parentum cura ac charitas, quam necessaria quadam ratione, omni animalium nostrorum generi, insitam, ingenitamque novimus. Sed hæc quæ ad propagationem attinent, etsi fortasse aliter sese habeant, hoc tamen rationibus superius adductis satis probatum est, & stirpes & animalia in Planetarum terris inveniri, ne scilicet sint hac nostra viliores. Quod cum ita sit, tum quoque, ne minus, quam nostra Tellus, istæ aliæ ornatae sint, necesse est, ut non minor sit,
in

in utroque genere illo, quàm apud nos varietas. Quanam vero hæc esse potest? Equidem cum, in omni animantium nostrorum genere, cogito quibus modis moveantur; omnia video eo reduci, ut vel pedibus ingrediantur binis, quaternisve; insecta senis, vel etiam centenis; vel ut in aëre volent, alarum mirabili vi & moderamine; vel sine pedibus reptent; vel flexu corporum vehementi, aut etiam pedum percussu, in aqua sibi viam aperiant. Præter hos incedendi modos, vix videtur alius dari, aut omnino mente concipi posse. Ergo quæ in Planetis extant animantia, uno aliquo ex his utentur; aut quædam pluribus etiam, quemadmodum apud nos aves amphibix; quæ & pedibus incedunt, & nant in aquis, & in aëre volitant: & crocodili & hippopotami, inter terrestria, & aquatica, medii generis. Nulla autem præter hæc vita cogitari posse videtur. Quid enim esse possit, in quo animantia existant, præter tellurem solidam, aut Elementum liquidum, quale aquæ nostræ, aut multo liquidius, quale aër; aut illis similia. Posset enim esse aër multo, quàm apud nos densior, graviorque; eoque ad volandum accommodatior, neque tamen minus perspicuus. Possent etiam liquidorum plura genera, alia aliis superinducta esse. Velut si, super mare, incumbere cogitetur alia quæpiam materia, quæ decuplo levior sit aqua, centuplo gravior aëre; ac sua quidem superficie extrinsecus terminata, sed ut extra eam, terræ partes solidæ emineant. Sed non est, cur plura hujusmodi in cæteris Planetis, quàm in nostro, inveniri putemus, & si inveniantur, non tamen aliis modis ibi animalia moveri poterunt. Cæterum quod ad varias eorum formas attinet; cum videamus in variis terræ regionibus miram adeo ac multiplicem diversitatem; inveniri-que in America quæ frustra alibi quæras; magna ratio est ut nullam earum formarum, quæ in Planetis extant, imaginando assequi nos posse credamus. Quanquam si omnes istos movendi modos cogitemus, quos hic recensui, nihil mirum esset non magis differre aliquod istorum animalium à nostra-

te quoque, quam nostra discrepant inter se. Ea dico quibus minimum est similitudinis.

*Summam
animalium
apud nos va-
rietatem esse.*

Quam varia porro sint genera eorum in Planetis ita optime colligemus, si ad ea quæ apud nos sunt, miramque in iis formarum diversitatem, animum advertamus. Planè enim verisimile est, non minori numero occurruras, si quis ad Jovis, aut Veneris globum cominus spectandum admitteretur. Percurramus verò (nam de omnibus dicere longum esset) majores nostrorum animalium differentias, vel formâ, vel proprietate aliqua singulari notabiles; idque in terrestribus, aquatilibus, volucris. Cogitemus quæ sit inter equum, elephantum, leonem, cervum, camelum, porcum, simiam, histricum, testudinem, chamæleontem, dissimilitudo; quanta in aquaticis, cetum inter & phocam, raïam, lucium, anguillam, sepiam, polypum, crocodilum, piscem volentem, torpedinem, cancrum, ostream, muricem. In avium genere quantum discrimen, aquilæ, struthiocameli, pavonis, cygni, noctuæ, vespertilionis. Reptilia pro uno tantum genere censemus. At in insectis formicas spectemus, araneos, muscas, papiliones; & miram horum naturam, quod ex vermibus volatilia evadant. In omnibus vero his, scimus quàm magnus præterea sit numerus minus diffidentium.

Nec minorem in Planetis.

At quantuscunque sit, nihilo minorem esse in unoquoque reliquorum Planetarum putandum est. Quamvis vero de figura istorum animalium frustra per conjecturas quærat, tamen de vita eorum generatim jam aliquid assecuti videmur; & de sensibus erit in sequentibus quod dicamus.

Idem in stirpibus locum habere.

Sicuti verò animantium, ita stirpium quoque & arborum nostrarum præcipuæ differentiæ expendi possunt. Velut quæ in abiete, quercu, palma, vite, ficu; tum ea quæ nuces, Cocos dictas, generat arbore; itemque alia apud Indos, è cujus ramis radices novæ pullulant, inque terram demittuntur. Item, in herbis, gramen, papaver, brassica, hederæ, pepones, ficus Indica foliis crassis, sine caule, succrescentibus,

bus, aloë. In quibus rursus ea quam scimus, minus dissimilium est copia. Ad hæc propagandi viæ variæ inspiciantur; velut ex feminibus, nucleis, taleis, insitione, bulbis. Quibus omnibus nihilo pauciora, aut minus miranda, in Planetarum terris reperiri, existimandum sit.

Sed quod in hac disquisitione præcipuum est, plurimamque jucunditatem habet, nondum attigisse mihi videor; quamdiu nullos in terris illis spectatores posui, qui tot rebus ^{In Planetis esse animantia, quæ ratione utantur.} creatis fruantur, pulchritudinemque, & varietatem earum, admirentur. Et video quidem, neminem fere eorum, quibus vel leviter hæc meditari contigit, dubitasse quin spectatores aliqui in Planetis collocandi sint: non quidem homines nobis similes, sed animantia tamen ratione utentia. Nempe iis visum est, qualemcunque terrarum istarum ornatum, velut frustra, nulloque fine aut consilio, fore procreatum, si non hoc propositum fuisset, ut ab aliquo cerneretur, qui intelligere ejus elegantiam posset, fructumque simul percipere, & summi opificis admirari sapientiam. Ego vero non hoc præcipuum argumentum habeo, cur animal rationis particeps Planetas incolere existimem. Quid si enim dicamus ipsum Deum spectare quæ effecit; (alia quidem ratione quam nos, sed videre eum quis dubitet qui oculos fabricatus est;) iisque delectari, neque præterea quidquam requiri. Nonne enim ob hoc ipsum & homines condidit, & quicquid continet mundus universus? Itaque quod præcipue me movet, ut rationabile animal in Planetis non deesse credam, hoc est, quod nimia Terræ nostræ præ cæteris illis esset præstantia ac nobilitas, si sola animal haberet tam longe cæteris omnibus animalibus, nedum stirpibus præcellens; in quo inest divinum quiddam; quo cognoscit, intelligit, res innumeras memoria complectitur, veri expendendi judicandique capax est, cujus denique gratia quicquid terra progenerat paratum esse videtur. Omnia enim in usus suos vertit. Lignis, lapidibus, metallis, domos exstruit; Avibus, piscibus, pecore & herbis vescitur; Aquæ & ventorum commodis ad navigandum utitur; ex florum odore pulchrisque coloribus

voluptatem percipit. Si nullum in Planetis est ejusmodi animal, quid esse queat, quod tanti æstimandum sit, quove is defectus pensetur? Pone in Jove majorem multo animantium varietatem; plures arbores, herbas, metalla: nihil erit in omnibus his, ob quæ tantum dignitatis accedat isti mundo, ac nostro propter humani ingenii mirabilem naturam. Hic si me judicium fallit, fateor me pretia rerum æstimare nescire.

*Non ob stare
hominum
vitia quo mi-
nus decorem
terra conci-
liant.*

Nec dicat aliquis, tantum malorum ac vitiorum eidem humano generi inesse, ut merito dubitari possit, an, tale quodpiam animal Planetariis mundis tribuendo, dignitas iis ornamentumque, an his contraria accessura sint. Primum namque non impediunt vitia, majori hominum parti insita, quin ii qui virtutem, ac rectum rationis usum sectantur, tanquam pulcherrimum quid præstantissimumque censendi sint. Præterea credibile est, ipsa illa animi vitia, magnæ hominum parti, non sine summo consilio data esse. Cum enim Dei voluntate ac providentia talis sit Tellus, ejusque incolæ, quales cernimus; absurdum enim foret existimare omnia hæc alia facta esse, quam ille voluerit, sciveritque futura; putandum est utique non frustra multiplicem adeo animorum diversitatem mortalibus esse insitam; sed malorum cum bonis misturam, quæque inde eveniunt infortunia, bella, calamitates, eo fine accedere, ut necessitate urgente stimulosque admovente, ingenia excitentur, exerceanturque, dum quærimus ea quibus ab hostibus nos tutemur, quibusve machinis telisque eos persequamur: Utque paupertatem ac miseriam depellere conantes, varias artes exquiramus, naturamque scrutemur, ex cujus cognitione deinde auctoris potentiam prudentiamque admirari necesse sit; quas forsan alias pari stupore ac bestię præteriissemus. Nec enim dubitandum est, si in continua pace, omniumque rerum affluentia homines ætatem agerent, fieri posse ut admodum diu, non aliter fere quam bruta animalia, victuri sint; omnis scientiæ expertes, pluriumque commodorum ignari, quibus melius jucundiusque vita transigitur. Careremus mirifica illa scri-

ben-

bendi arte, nisi summa in commerciis bellisque necessitas eam extudisset. Huic artem navigandi, huic ferendi debemus, maximamque partem cæterorum quibus fruimur inventorum; itemque naturæ arcana fere omnia, inter experendum reperta. Ita ea ipsa propter quæ inculanda rationis facultas videbatur, possunt dici ad perficiendam exacuendamque eam plurimum prodesse. Nam & virtutes ipsæ, fortitudo animi, & constantia, vix aliter quam in periculis rebusque adversis apparere possunt.

Quod si igitur genus animalium rationabile in cæteris Planetis esse cogitemus, quod virtutibus vitiisque fere iisdem atque homines præditum sit, id tanti esse existimandum est, ut absque iis, longè quàm Tellus hæc nostra viliores futuri sint.

Positis vero ejusmodi Planetarum incolis ratione utentibus, quæri adhuc potest, anne idem illic, atque apud nos, sit hoc quod rationem vocamus. Quod quidem ita esse omnino dicendum videtur, neque aliter fieri posse; sive usum rationis in his consideremus quæ ad mores & æquitatem pertinent, sive in iis quæ spectant ad principia & fundamenta scientiarum. Etenim ratio apud nos est, quæ sensum justitiæ, honesti, laudis, clementiæ, gratitudinis ingenerat, mala ac bona in universum discernere docet: quæque ad hæc animum disciplinæ, multorumque inventorum capacem reddit. Exstaretne alibi diversa ab hac ratio? censere-turque injustum aut scelestum in Jove aut Marte, quod apud nos justum ac præclarum habetur? Certè nec veri simile est, nec omnino possibile. Cum enim rationis, qualem hic agnoscimus, ductu opus sit ad tuendam vitam ac societatem (nam & hanc apud Planeticolas reperiri ostendemus) si contraria ejus decretis statuantur, sequetur ruina ac subversio eorum, quibus ejusmodi mens perversa contigisset. At conservatio, ut videmus, rerum conditori ubique proposita est. Verum utut affectiones animi à nobis aliquatenus diversæ sint apud istos longinquarum terrarum habitatores, puta in his quæ ad amicitiam, iram, odium, honestatem, verecun-

*Nec ratio-
nem in Pla-
netarum in-
colis à nostra
diversam
esse.*

diam, decorem attinent; non tamen dubitari potest, quin in veri investigandi studio, judicandis rationum consequentiis, ac præsertim in ratiociniis, quæ ad quantitatem ac magnitudinem spectant, circa quæ Geometria versatur, (si quid habent ejusmodi, quod mox inquiremus) non, inquam, dubitari potest, quin prorsus similis sit, eademque via ingrediatur illorum ac nostra ratio; quodque apud nos verum est, idem sit in cæteris Planetis. Etsi vis ac facultas in his rebus major minorve illorum incolis fortasse quam nobis contigerit.

*Nec deesse
illis sensus.*

Nec visum.

Sed jam nimis longè provectum me esse sentio. Antè enim dispiciendum erat de sensibus corporeis istorum in Planetis agentium, quibus si carerent, vix jam aut vitam, ut animalia, sortiti esse videri possint, aut habere, in quo rationis usum exerceant. Puto autem ostendi posse probabilibus argumentis & bruta animantia, & quibus ratio inest; convenire, in his quæ ad sensus attinent, cum iis quæ terram hanc incolunt. Primùm namque si cogitemus quid sit in animalibus videndi potestas, absque qua neque pascendi ratio esset, nec pericula vitandi, nec denique vita alia quam talparum aut lumbricorum; prorsus necesse esse intelligemus ut, ubi sunt animalia his præstantiora, ibi & visu prædita sint. Cum nihil ad vitam vel conservandam, vel exornandam æque conducat. Quod si vero inspiciamus mirabilem lucis naturam, stupendùmque artificium, quò ad eam fruendam oculi comparati sunt, facile cognoscemus, perceptionem rerum procul distantium, cum circumscriptione formarum, discrimen intervallorum, non alio modo, quam qui ex visu sit, institui posse. Non enim potest hic sensus, imo nec alius quicumque eorum quos novimus, existere, quam ex motu extrinsecus adveniente. Qui motus, ut alibi explicuimus, in efficiendo visu, à Sole proficiscitur, aut stellis inerrantibus, aut igne; quorum particulæ celerrima agitatione concitæ, circumfusam cælestem materiam continue pulsan, impelluntque; qui impulsus a proximis ad longe distitas citissime propagetur, fere eo modo quo sonus per aërem. Absque hoc motu, materiaque ætheris

ris qui intermedia cæli spatia complet, nec Solem nec stellas cernere possemus; neque etiam alia quæ propiora sunt corpora; cum ab his ad nos idem ille motus repercussus pervenire debeat. Hic, oculorum sensu perceptus, lux appellatur. Inque eo sensu mirabile est ante omnia, quo pacto ad tantam subtilitatem perducî potuerit, ut minimâ cælestis materiæ commotiunculâ afficeretur, simulque qua ex parte illa oriretur perciperet. Tum quomodo nihil sese mutuo impediant innumeri ejusmodi pulsuum processus, sphæricæque superficies, aliæ alias trajicientes. Hæc omnia tam mira ac subtili ratione constituta sunt, ut nec minimam eorum partem hominum ingenia excogitare potuissent, cum vix etiam quomodo sese habeant comprehendere queant. Quid enim tam mirabile, quam particulam corporis quandam ita fabricatam esse; ut ejus opera animal sentiat procul positorum corporum figuram, positum, motum quemlibet, distantiam; idque etiam cum colorum varietate, quo distinctius ea dignoscet. Oculi vero præter hæc artificiosissima constructio, quæ perfectam rerum extra positarum picturam in cava choroïdis superficie imprimere apta est, omnem profecto admirationem superat, neque est in quo manifestius Geometriæ artem Deus exercuerit. Atque hæc non tantum solertia summa inventa & fabricata sunt, sed & videntur esse ejusmodi, si quis propius attendat, ut non alia ratione perfici potuerint quàm hac quam cernimus. Nam neque lux aliter, quàm communicato motu per materiam cælestem, res longo intervallo remotas sensibus nostris offerre poterat; nec oculorum artificio ullum aliud par dari ad distinctè referendas rerum imagines. Ut valde eos falli arbitrer, siqui hæc eadem multis modis ordinari potuisse contendere audeant. Quare omnino credibile est utrumque istud eodem modo se habere in Planetarum regionibus atque hic; neque aliam esse iis, quæ illic habitant animantibus, videndi rationem. Habebunt igitur oculos; atque etiam binos minimum, quò possint rerum ante pedes positarum distantias percipere, sine quo vix tutò ingredi licet. Et hæc quidem ad vitæ usum neces-

*Non audi-
tum,*

*Nec per quem
sonus perfe-
ratur aërem,*

cessario tribuenda sunt animantibus Planetarum universis fe-
re. Quæ vero ratione & mente prædita sunt, cum alias
quoque ex visu utilitates capere possint, tantò magis con-
sentaneum est ut tam præclaro munere donata sint. Nos
enim colorum pulchritudinem, formarum elegantiam, ac
concinnitatem visu percipimus; legimus, scribimus, cælum
& astra contemplamur, eorumque cursus, magnitudinesque
metimur; quæ quatenus ad Planetarum incolas quoque per-
tineant, paulo post videbimus. Nunc illud prius quæra-
mus an cæteros quoque sensus nostros iis contigisse verifi-
mile sit. Ac de auditu quidem multa suadent, ut cunctis,
quæ illic sunt, animalibus eum inesse credamus. Prodest
enim plurimum ad vitam à periculis tutandam; cum sonitu
ac fragore sæpe imminens infortunium cognoscatur; præser-
tim noctu atque in tenebris, cum oculorum auxilium ere-
ptum est. Videmus præterea ut animalia pleraque vocis so-
no sui similia advocent, multaque inter se significant, nobis
quidem parum intellecta, sed plura fortasse quam putamus.
Apud ea vero quæ ratione utuntur, si cogitemus quam mi-
rabilis sit vocis & auditus oportunitas, vix credibile videbi-
tur tam utilem sensum, tantumque loquendi artificium, hu-
jus Terræ nostræ, ac nostri tantum causa fuisse inventum.
Quomodo enim illis non multum desit ad vitæ commoda,
& felicitatem nostræ similem, qui tanto beneficio carent:
aut quamam alia re pensari hoc possit? Quod si porro consi-
deremus, quam pulchre, quamque industrie natura hoc ef-
fecerit, ut idem ille aër, cujus respiratione vivimus, cujus
flatu navigamus, qui, ut volare queant, avibus præstat; ut,
inquam, idem ille ad exprimendum proferendumque sonum
comparatus sit; sonus verò ad formandum, auribusque in-
gerendum sermonem; vix credemus insignem hunc aëris
usum, in terris istis longinquis eam neglexisse? Esse enim
illic aërem qui terris incumbat, vix dubitari potest, cum nu-
bes in Jove apparere dixerimus. Sicut enim hæ ex aquæ
guttulis minimis constant, ita ex particulis aquæ seorsim vo-
litantibus magna ex parte formatur aër ille qui propius ter-
ram

ram circumdat. Quem Planetarum globis adesse etiam hoc suadet, quod respirandi ratio, qua vita sustentatur omnium quæ hic habemus animantium, videtur omnino ex universalioribus illis naturæ institutis esse, velut nutriri ex fructibus terræ.

De sensibus autem reliquis animalium ut dicere pergam, *Nec tactum*, eum sanè qui ex tactu oritur, necessitate summa datum esse apparet omnibus iis quæ molli flexilique pelle teguntur, quò à lædentibus caveant refugiantque; cum absque eo vulnera, plagas, contusionesque crebras acceptura fuerint. In quo tam provida natura fuit, ut, ne minimam quidem pellis particulam, doloris sensu vacare voluerit. Itaque hanc facultatem, tam necessariam ad conservandam animalium incolumitatem, omnino credibile est etiam planetas inhabitantibus inditam esse.

Odoratum vero ac gustum quis non videt necessaria esse *Nec odoratum, nec gustum.* pascentibus, quo conducibilia a noxiis, nihilve profuturis dignoscant. Itaque si herbis, feminibus, aut fortasse carnibus quoque in regionibus istis animalia alantur; etiam his sensibus, tam ad cavendum, appetendumque necessariis, credibile est ea non destitui.

Scio à nonnullis fuisse quæsitum, an non alii præter eos quinque quos diximus, naturâ dari potuerint. Quod quidem si concedatur, forsan dubitandum sit animalium planetariorum sensus longè alios esse ac nostratum. Nec sanè obflare quidquam videtur quo minus alii extare possint percipiendi modi: attamen cum perpendimus ad quos vitæ usus *Nec horum sensus longe alios esse ac nostratum.* unusquisque eorum, quos habemus, comparati sint; non videtur saltem alius quisquam necessarius adjungi potuisse. Nempe effecit providentia ut & propinqua, & longius remota, qualia essent oculis sentiremus. Rursus ut non visa, sive a tergo, sive in tenebris, auditus exciperet. Item ut quæ nec oculi nec aures adesse nunciarent, alius tamen sensus qui in naribus est præsentiret, idque in canibus mirabili ut scimus subtilitate. Postremo effecit ut quæ quatuor istos sensus effugerent, quò minus in corpus impacta nocere possint,

sint, tactu perciperentur. Ita omnibus modis salutis conser-
vationique animalium consuluit, nec quidquam amplius addi
aut desiderari posse videtur; ut proinde planetarum incolis
vix aliud nisi superfluum largitura fuerit.

Cum autem ex singulis sensibus, præter utilitatem, volu-
ptas aliqua ad homines perveniat; velut ex gustatu in cibis;
ex odoratu in floribus & aromatis; ex visu in contemplanda
pulchritudine formarum, & colorum; ex auditu harmonico-
rum sonorum; ex tactu in rebus venereis, (nisi peculiaris
quidam sensus hic dicendus est) animalibus verò cæteris ex
quibusdam horum; nonne dicemus hæc naturæ munera fere
eodem modo reliquorum Planetarum incolis distributa esse.

*Ut nec volu-
ptatem ex iis
artam.*

Certe id quidem ratio postulare videtur. Sive enim cogite-
mus, quanto in universum, propter hæc, jucundior feli-
ciorque vita reddatur, non debemus maximum ejus bonum
nostræ Telluris habitatoribus alcribere, cæteras tenentibus
denegare, quasi res nostræ rebus illorum multò præferendæ
sint. Sive ad voluptates, quæ in cibis capiendis, & in con-
junctione utriusque sexus contingunt, attendamus, intellige-
mus hæc esse necessaria quædam veluti providæ naturæ jussa,
tacitè cogentis ad conservandum, propagandumque animan-
tium genus: vel etiam, in bestiis quidem, fortasse genus
ipsum propagari, ut utraque illa jucunditate fruatur, ut
proinde, utroque nomine, in cæteris Planetis eadem repe-
riri consentaneum sit. Equidem cum hæc omnia quanti sint,
quantamque utilitatem habeant, considero; quamque admi-
rabile sit, tale quid, quale est voluptas, in rerum natura
existere; omnino adducor ut credam, non soli Telluri no-
stræ, quæ de minoribus planetis unus est, rem tantam ob-
tigisse. Et hæc quidem de voluptatibus iis quæ sensus cor-
poreos afficiunt, rationis facultatem aut nihil, aut leviter
tantum. Sunt autem homini, præter istas, aliæ quoque;
quæ mente tantum, & rationis sensu percipiuntur; aliæ cum
lætitiis conjunctæ; aliæ seriæ, neque ideo minoris faciendæ;
velut quæ ex oblectatione scientiarum, inventorum, veri-
que cognitione oriuntur; de quibus omnibus, an ad alio-
rum

rum quoque planetarum incolas pertineant, in sequentibus dicendi locus erit.

Superfunt alia nunc expendenda quæ in terris illis similia esse rebus nostris verisimile sit. De Elementis terræ, aëris, & aquæ, vidimus jam quàm probabile sit ea in Planetis cæteris non deesse. Videamus & de igne, qui apud nos quidem non tam Elementum esse dicendus est, quam motus quidam concitatissimus particularum à certis corporibus abreptarum. Hoc verò, quidquid est, etiam Planetarum incolis datum esse, multa sunt quæ verisimiliter probent. ^{Ignem quoque Planetis communem esse.} Primum quòd non tam in Terra hac, quàm in Sole, ignis sedes collocata videatur; ac sicut, calore Solis, herbæ & animalia hic crescunt ac foveantur, ita quoque haud dubie in cæteris fiat Planetis. Cum autem intensior calor ignem generet, credibile est illic quoque, ac præsertim in Soli propinquioribus, eosdem aut majoris caloris gradus existere, eorumque vi ignem. Deinde videmus quam multis modis excitetur, velut colligendis Solis radiis, percussu pelvium aut speculorum; ferri & silicis collisione; lignorum attritu mutuo; herbæ non bene siccæ congestis acervis; ex fulmine; ex montium terræque sulphureæ incendiis. Quare mirum esset, non aliquo ex istis omnibus, in Planetarum terris, eum accendi. Cogitemus deinde quanta apud nos sit ignis utilitas, quantaque necessitas. Hujus enim beneficio frigoris incommoda depellimus in iis regionibus, ubi calor Solis minus viget propter radiorum obliquitatem, atque ita efficimus ne magna Terrarum pars inculta inhabitataque maneat; quod in omnibus Planetarum globis, sive æstatis hyemisque vicissitudines sentiant, sive perpetuo fruantur æquinoctio, æque necessarium est remedium; quoniam & in his, loca polis viciniora, parum juvari Solis calore certum est. Eodem igne nocti lucem inducimus, diemque velut alterum creamus, quo non parum temporis vitæ adjicitur. Itaque ob hæc omnia prorsus verisimile est tanta re non solos Telluris incolas frui, sed omnibus Planetis communiter esse concessam.

*Magnitudi-
nem corpo-
rum in Pla-
netis existen-
tium ex Pla-
netarum
magnitudine
non recte
conijci.*

Porro quæri potest de animalibus, tam ratione utentibus quàm brutis; atque etiam de stirpibus arboribusque; an, quæ isthic nascuntur, nostris magnitudine respondeant. Nam si hæc ipsorum globorum mole natura metiatur, essent in Jove ac Saturno animalia quædam decies aut quindecies altiora Elephantis, aut tantundem longitudine balænas nostras superantia. Tum illa quæ ratione prædita sunt, gigantum corpora haberent nostris comparata. Qua quidem in re nihil video quod vel mirum sit, vel fieri nequeat. Nulla tamen ratione cogimur ut re ipsa id ita esse credamus; quandoquidem in multis rebus apparet non iis mensuræ regulis naturam se obstrinxisse quæ nostra opinione convenientiores videbantur. Veluti quod ipsorum globorum Planetariorum moles nequaquam pro distantia eorum a Sole constituta sit, cum Mars manifesto minor sit Venere, etsi remotior: cumque conversio Jovis, super axe suo, 10 horis peragatur; Telluris vero, tantò minoris, impendat horas 24. Posset vero dubitari, cum proportionem in his ita negligat Natura, an non fortasse pumiliones quidam sint incolæ Planetarum, aut ranis muribusve non majores. Sed ostendam postea cur id nequaquam consentaneum putandum sit.

*In Planetis
ut in Terra
varia esse
animalia
quibus ratio
competat.*

Aliud quoque dubium exoriri posset, utrum genus unum tantum animalium quæ rationem sortita sint, an plura in Planetis singulis reperiantur, & num dispari rationis vi. Ac profecto tale quid in Terra hac nostra contigisse cernimus. Non de iis nunc dico quæ figuram hominum præferunt; (etsi de his quoque id non absurde dici possit): sed si quorundam è bestiarum genere, sensum intellectumque spectemus; veluti canum, simiarum, castorum, elephantorum; imo & avium quarundam, & apicularum, ea talia sunt, ut nequaquam solum genus hominum rationis particeps dicendum videatur. Apparet enim quoddam hujus instar in istis omnibus, quod, absque ulla institutione aut experientia, iis inesse deprehenditur.

*Et inter ea
Homini-
bus
similia.*

Attamen dubitari nequit quin longè præcellat hominum intelligentia & ingenium, quippe innumeris rebus aptum, con-

consilii ad futura capax, præteritorum memoria infinita præditum. Quod ingens præstantiæ discrimen si perpendamus, credemus non sine ratione, in cæteris quoque planetis, unum quoddam genus prætulisse naturam; atque eo magis, quod si plura forent eadem ingenii sagacitate, possent nocere sibi invicem, ac de possessionibus & imperio inter se contendere; quod nunc quoque faciunt nimis frequenter, licet unius generis sint, quæ in Terra hac dominantur. Verum hæc utcunque se habeant, de iis nunc agamus terrarum istarum animalibus, quæ maximè cæteris ratione antecellunt; quæramusque an sciri possit, quibus in rebus ejus usum impendant, & an habeant etiam artes scientiasque suas, velut nos in hoc nostro planeta. Quod quidem, inter ea quæ ad naturam eorum attinent, præcipuè expendi meretur. Sed, quo melius id fiat, paulò altius exordiendum est, vitæque & studia hominum attentius inspicienda.

Ac videtur quidem quatenus providendis procurandisque rebus tantum necessariis homines intenti sunt, ut nempe ab aëris injuriis tuti habitent; ut mœnibus inclusi ab inimicis sibi caveant, ut leges condant ad secure ac tranquille vivendum, ut liberos educent; victum illis, sibi que parent; in his omnibus inquam nihil magnum admodum habere videtur rationis nostræ usus, cujus causa nos brutis animantibus anteferamus. Namque hæc pleraque istorum facilius simpliciusque efficiunt; aliquibus nihil opus habent. Quin imo & virtutis, justitiæque sensus, propter quem paulo ante excellere mentem humanam dicebamus; itemque amicitiae, gratitudinis, honesti; quid aliud efficiunt, nisi ut vel vitiis hominum obsistatur, vel vita tranquilla & mutuarum injuriarum expers præstetur; quod bestiis sponte ac naturæ ductu contigit. Jam si curas multiplices, animi ægritudines, concupiscentiam, mortis metum, quæ omnia rationem illam nostram comitantur, ante oculos ponamus; eaque cum vita parabili, quieta & innocua bestiarum comparemus; videri possint harum plurimæ, ac præsertim ex avium genere, jucundius agere, & meliore quam homines sorte frui. Nam

*Humanam
rationem præ
illa bruto-
rum præcipue
eminere in
contempla-
tione natura.*

quod ad voluptates corporis attinet, haud dubie iis æque ac nos afficiuntur, quicquid contradicant novi quidam philosophi; qui sensum omnem ita auferunt reliquis præter hominem animantibus, ut pro meris automatis aut neurospastis ea haberi velint; quorum absurdæ, crudelique sententiæ, miror quenquam accedere posse; præsertim cum & voce & verberibus fugiendis, & re omni contrarium bestię ipsæ significent. Imo vix dubito, quin miro pulchroque illo per aëra lapsu aves sese delectari sentiant; magis etiam sensuræ si intelligerent quantopere lentus ac humilis noster incessus ipsarum pernecitate, sublimique volatu superetur. Quid igitur est in quo potissimum eminet humanæ rationis usus, facitque ut antecellamus cæteris animantibus? Nihil æquè putato ac contemplatio naturæ, Deique operum; tum cultura scientiarum, quibus consequimur ut eorum præstantiam, magnitudinemque aliqua ex parte cognoscamus. Absque enim disciplinis quid esset contemplatio? quamque multum interest inter eos qui Solis pulchritudinem, utilitatemque, & cælum sideribus ornatum otiose intuentur, aliosque doctiores qui cursus istorum omnium scrutantur: quomodo affixæ, quæ dicuntur, stellæ à vagis differant, quæque causa sit diversarum anni tempestatum intelligunt: qui denique subtili ratiocinio magnitudinem Solis ac Planetarum, simulque distantiam eorum metiuntur; quantumque item inter eos qui animalium varios motus agilitatemque mirantur, & hos qui fabricam omnium membrorum, artificiosissimamque compagem, architecturamque in iis speculantur? Quod si igitur Planetæ reliqui dignitate non cedunt Telluri nostræ, ut in superioribus principii fundamentique loco posuimus; oportet ibi animalia existere, quæ non solum naturæ opera spectent & admirentur, sed quorum ratio in examinandis, intelligendisque iis occupetur, nec minora quam nos consecu-

*Hinc Planeta-
rum incol-
las scientias
excolere, &
inter eas,
Astrono-
miam.*

ta sit. Itaque non tantum sidera intuentur, sed & Astronomiæ scientiam excolunt; neque aliud obstat quo minus hoc verisimile credamus, quam superba illa nostrarum rerum æstimatio, quæ difficulter sane deponitur. Scio tamen futu-

ros,

ros, qui dicant nimis audacter nos ista Planetarum incolis tribuere: multorum quippe verisimilium accumulatione huc esse perventum; quorum si unum quodpiam contra se habeat, quam positum sit, cadat, velut in vitiosa ædificatione, omne quod superstruximus. Sed scire eos velim, hoc quod de Astronomiæ studio diximus, omissis fere omnibus hætenus adductis confirmari potuisse, atque inde initium fieri. Postquam enim positum fuit Terram hanc inter Planetas esse habendam, neque iis dignitate aut ornatu præferendam; quis dicere audeat in ea sola reperiri, qui spectaculo Naturæ, quod unum pulcherrimum ac magnificentissimum est, fruantur? aut inter eos quibus hoc contigit, nos unos esse quibus cæli arcana penitus perfectiusque perspecta sint? Ecce igitur & hac breviori via comprobata in Planetis Astronomiæ cognitio, ex qua & animal rationis compos, & pleraque alia quæ præcessere, illis inesse consequebatur. Adeo ut, ad priora confirmanda, hæc quoque novissima argumentatio conducat. Quò vero magis probabile fiat, saltem in superioribus Planetis, Jove ac Saturno, Astronomiæ notitiam non deesse, considerandum est, quod si homines ad sidera observanda impulit, ut credi par est, admiratio & pavor in defectibus Solis & Lunæ, multo magis, in utroque hoc Planeta, ea ratio valere debuit, propter cotidianas fere Lunarum, crebrasque Solis, quæ illic contingunt, eclipses. Ut si quis æquè ignorare ponatur quid rerum in Planetis omnibus geratur, multo verisimilius dicturus sit Astronomiam in majoribus illis duobus, quàm in hoc nostro, vigere.

Posita autem apud Planeticolas hujus scientiæ cognitione & usu, quam multa hinc præterea consequuntur quæ de vita statuque eorum reliquo, præter jam dicta, novas conjecturas afferant?

Primùm enim nulla observatio fiderum, ad motus eorum investigandos, absque organis institui potest; sive ea è metallo, sive è ligno aliave solida materia fabricata sint. Quod ut fiat, nec fabrorum instrumento, serra, ascia, dolabra, mal-

*Et quæ ei usque
serviunt ar-
tes mechanicae.*

*Ut & Geo-
metriam,
Arithmeti-
cam,*

*Et scribendi
artem.*

malleo, lima, carere possunt; neque hæc habere absque usu ferri aut æque duri cujuscumque metalli. Sed & circuli arcus in partes æquales divisi, aut lineæ rectæ in inæquales, in istis organis requiruntur. Atque hic jam Geometriæ & numerorum ratio arcessenda est. Sed ante omnia quoque necesse est ut observationum memoria ad posteros transmittatur; ut tempora & Epochæ annotentur; quæ sine scripto non videntur explicari posse. Oportet igitur ut & suam scribendi artem habeant, multum fortasse dissimilem nostræ, qua fere omnes populi utuntur, sed quæ vix ingeniosior, aut ad discendum facilior esse queat. Quis enim non videt longe eam præferendam esse Sinarum innumeris characteribus, multoque magis funiculorum nodis, aut pictis imaginibus, quæ apud barbaros Mexicanos Peruvianosque in usu erant. Omnium quidem Regionum homines aliquam scribendi, aut quoquo modo annotandi, artem quæsiuisse videmus: quò minus mirum sit, si & Planetarum incolæ, necessitate coacti, eam reppererint, ac deinde ad Astronomiæ aliarumque disciplinarum studia adhibuerint. Necessitas vero scripturæ in rebus Astronomicis etiam ea re cognoscitur, quod cum hypothésibus variis, siderum motus, quasi divinandi sint; eæque hypotheses priores in sequentibus corrigendæ, prout observatis & Geometriæ ratiociniis vitia earum coarguuntur; nihil horum posteris tradi potest, nisi literis consignatum, figurisque expositum.

Opticam.

Postquam vero omnia hæc jam iis concesserimus, longe etiamnum præstantior perfectiorque apud nos erit siderum scientia; vel propter agnitam systematis universi verissimam formam, vel propter usum telescopiorum, quibus Planetarum corpora, magnitudinesque & varias formas intuemur; superficiei lunaris montes, montiumque umbras; stellarum ingentem multitudinem, aliaque plura non alias videnda, percipimus. Ut fere necesse sit, nisi rursus nobis tanquam hac parte felicioribus blandiri volumus, etiam illam cognitionis rerum cælestium consummationem Planeticis tribuere; itemque videndi aciem, quæ vel nostram longe exu-
ret,

ret, vel lentium vitrearum, aut speculorum adminiculo sicut nostra, adjuvetur. Quod tamen dicere vereor, ne quis, ex hoc uno audacius asserto, cætera omnia æstimanda putet, ac risu digna clamitet.

At non sine ratione, ut videtur, objiciet quispiam, Planetarios nostros fortasse omni subtiliore scientia destitui, quemadmodum Americanæ gentes, priusquam ad illas Europei penetraissent. Quas si respicimus, itemque in Africa, Asiaque permultas æque barbaras, videbitur hoc tantum summo opifici propositum fuisse, ut vita fruantur homines, naturæque bonis & voluptatibus contenti sint, grato animo omnium datorem colentes; scientiarum vero inquisitionem præter naturam paucos aliquos affectasse. Talia vero dicentibus non deest quod responderi possit. Prævidit enim certe Deus hominum ingenia eo esse processura, ut res cælestes scrutarentur; ut artes vitæ utiles reperirent; maria quoque navigarent, metalla effoderent. Possetne enim horum quidquam præter mentem infinitæ illius intelligentiæ contingere? Quod si prævidit, etiam hominum generi ea destinata sunt, nec poterunt artium & doctrinarum studia, quasi præter naturam essent, existimari, quæ in ipsa natura indaganda occupantur. Præsertim cum tanta illa cupiditas amorque sciendi non possint censerī frustra hominum animis infixæ esse. Instabunt vero rursus dicentque, de fiderali scientia potissimum, si ad hanc quoque homines nati sunt, cur tam pauci ad eam attendunt? Primum enim ex quatuor Orbis partibus, sola fere est Europa, in qua Astronomiæ studia excolantur. Nam Astrologiam divinatricem futurorum, quæ non scientia, sed miserum quoddam ac sæpe noxium delirium est, ne nominandam quidem hic arbitror. At in Europæ Nationibus non unus è centum millibus hæc studia amplectitur aut addiscere curat. Tum ad tempus quod attinet, multa sæcula effluxisse dicent, antequam aut Astronomiæ, aut Geometriæ, sine qua illa disci non potest, ulla rudimenta innotescerent. Sciri enim quo tempore in Ægypto & Græcia primum exortæ fuerint. Ac recte quoque adjicient non adhuc octoginta annos præterisse,

Has scientias homini præter naturam non esse.

se, ex quo verus ac simplex Planetarum motus, rejectis Epicyclorum figmentis, repertus sit; atque ita demum Astronomia cum naturæ cognitione conjuncta. Hisce ut occurratur, addam ad superius responsum, quod à divina providentia petebatur, dubitari non posse, quin ea conditione homines nati sint, ut multo temporis decursu paulatim artes disciplinaeque eruant; nullam enim harum iis ingenitam esse, aut subito à Deo infusam, & has de quibus nunc agimus, omnium esse difficillimas remotissimasque: ut magis mirum sit unquam incipere eas potuisse, quam tam tarde fuisse inspectas. Pauci fateor singulis ætatibus has curant, aut ad se pertinere existimant: sed si multorum sæculorum tempora cogitentur, non exiguus fiet illorum Numerus; quos, quemadmodum sibi videntur, reliquis beatiore esse quis negaverit? Denique paucorum industria in his rebus exerceri satis erat, cum inventorum utilitas ad nationes totas gentesque longe porrigeretur. Cum igitur hujus Terræ incolis, etsi paucis tantum, ad ea percipienda ingenium & aptitudo contigerit; nihiloque putandi sint cæterorum planetarum habitatoribus præstantiores felicioresve; manet profecto, quam inveneramus, verisimilitudo, ut etiam apud illos reperiantur qui cognitione Astronomiæ non careant. Nunc ad alia pergamus quæ inde consequi, necesse est.

*Planetícolas
manus habere,*

Ostendimus quomodo unà cum hac scientia, non solum Geometria & Arithmetice, sed & Mechanicæ artes, instrumentaque incolis Planetarum concedenda sint. Hic verò jam sponte obvenit ut quæramus, quo pacto instrumentis illis, Machinisque, & ad sidera observanda organis uti possint, aut quomodo literas ducere; quæ omnia nos manuum opera exequimur. Itaque necessario & manus habebunt, vel aliud quodpiam, quod vicem earum fungi possit, membrum. In quibus hominum generi tantum esse præsidii existimabat è veteribus Philosophis quidam, ut in iis causam reponeret omnis eorum sapientiæ. Qui, ut puto, hoc sensit, absque manuum opera homines ad cultum animi, rerumque cognitionem non fuisse perventuros. Et vere quidem

dem ille. Finge enim pro manibus datas fuisse ungulas, ut equis & bobus; nunquam nec oppida nec domos, licet ratione instructi, ædificassent. Nihil de quo loquerentur habuissent, nisi de iis quæ ad pabulum, aut ad conjugium, aut sui tutelam attinent. Omni scientia, omnique rerum memoria caruissent: Denique à bestiis parum abfuisse. Quodnam porro instrumentum æque accommodatum ac manus esse possit ad innumera illa ad quæ nobis usui sunt, obcunda? Elephanti proboscide mirabiliter utuntur, qua & amplecti quidvis & projicere, minutioraque quævis è solo tollere norunt: unde & manus eorum pars illa dicta est, cum reipsa sit in longum productus nasus. Rostro quoque aves pleræque nidos exstruunt, alimentaue congerunt. Sed harum nihil est quod non manuum oportunitati longè concedat. Et est sane, tam illarum quam brachiorum, mirabilis quædam machinatio; ut protendi, reduci, inque omnem partem moveri possint. Tum mirâ industriâ instituti digitorum ac pollicis articuli, ut nervorum attractu quælibet prehendant, firmiterque contineant. Ut omittam sensum illum, in extremis digitis, exquisitissimæ subtilitatis; quo vel in tenebris pleraque corpora internoscimus. Patet itaque aut manus brachiaque, aut aliud quid eorum loco, quod vix æque aptum excogitari potest, Planetarum populis datum esse, ne non solum nobis, sed & simiarum & sciurorum generi, plus indulgisse hac in re natura existimetur.

De pedibus vero minus etiam dubitabitur, si repetamus ea ^{Et pedes:} quæ supra disseruimus de vario animalium incessu, qui non videtur aliis modis, quam quos ibi recensuimus, cogitari posse. Inter eos vero non est, qui tam bene Planeticolis ratione præditi conveniat, quam quo & nos utamur. Nisi forte & volandi facultatem in aliquibus Globorum istorum acceperunt. Quod minus probabile tamen propter vitam in societate degendam, de qua postea dicemus.

Non caret autem verisimilitudine, erectos oculos, vul- ^{Erectos oculos, vul-} tumque ad sidera contemplanda iis contigisse, quandoqui- ^{tumque,} dem hoc in hominum corpore providentiâ divinâ sic institu-

*Nec tamen
hinc sequi
eorum for-
mam nostra
plane simi-
lem,*

tum videtur, & a Philosophis merito celebrari solet. De reliquorum vero membrorum positu, si sapientiam artificis laude dignam censemus, quod oculos in suprema corporis parte collocaverit; sordidiora vero membra procul inde, atque a conspectu quodammodo removerit; nonne putandum est eadem fere observasse illum in formandis istorum procul habitantium corporibus? Nec enim propterea dicimus figuram nostræ similem iis tribuisse. Est enim infinita quædam animo concipienda formarum possibilium varietas, qua & singulæ quæque partes istorum corporum à nostris differre queant, & totorum exterior interiorque œconomia. Cernimus quam aprè & commodè animalium nostrorum quædam lana aut pilis vestiantur; alia elegantius etiam plumis pennisque. Quidni isti in Planetis, quos rationis participes diximus, aliqua simili ratione tecti sint? propter quod meliori quidem conditione bestię, quam homines, apud nos esse videntur. Nisi hoc eo fine sic constitutum fuit, ut ipsa nuditas necessitatem hominibus imponeret quærendi ac fabricandi varia operimentorum genera, atque hinc etiam ingenii exercendi materia existeret. Et apparet sane, ex hac necessitate, non minimam commerciorum, artificiorumque mechanicorum occasionem nasci. Sed & propterea forsannudos homines natura produxit, ut pro arbitrio suo tenuius densiusve amicti incedere possint; atque ita ad quasvis terrarum oras inhabitandas sese componere. Alia vero major hac, quam diximus, differentia intelligi posset inter corpora Planetariorum ac nostra; cum animalia quædam ita à natura formata reperiantur, ut veluti ossa extrinsecus habeant, carnes introrsum, atque ossibus inclusas, qualia sunt cancri, astacique, & fere etiam testudines. Attamen hanc membrorum compagem, & in paucis vilioribus tantum illa secuta est, & Planetarum incolis, quo minus eam tribuam, facit, quod subtili varioque digitorum ulu carituri essent, quo tam valde eos opus habere ostensum fuit: nam absurda specie non multum alioqui moverer.

*Quo minus
quidam ca-*

Etenim omnino cavendum est ab errore vulgi, cum ani-
mum

mum rationis capacem non alio in corpore, quam nostris si- ^{tionis capax}
 mili habitare posse sibi persuadet. Ex quo factum est, ut ^{etiam alii}
 populi penè omnes, atque etiam Philosophi quidam, humanam ^{forma inha-}
 formam diis adscripserint; Imo ut, à simili persuasione, cui- ^{bitet, nihil}
 dam Christianorum sectæ nomen inditum fuerit. Hoc vero ^{impedire.}
 non nisi ab hominum imbecillitate & præjudicata opinione
 proficisci quis non videt? uti illud quoque, quod eximia
 quædam pulchritudo humani corporis esse putatur: cum ta-
 men ab opinione & assuetudine id totum quoque pendeat,
 affectuque eo, quem cunctis animalibus natura provida in-
 generavit; ut sui similibus maxime caperentur. Illa verò
 tantum possunt, ut non sine horrore aliquo animal homini
 multum dissimile conspectum iri credam, in quo rationis &
 sermonis usus reperiretur. Nam si tale solummodo singa-
 mus aut pingamus, quod, cætera homini simile, collum
 quadruplo longius habeat, vel oculos rotundos duploque
 amplius distantes; continuo ex figuræ nascuntur, quas non
 possimus intuentes non averfari, quamvis ratio deformitatis
 nulla reddi queat.

Dixi in superioribus cum de magnitudine agerem incolæ- ^{Planeticolas}
 rum qui in Planetis sunt, verisimile videri non esse eos val- ^{nobis vel æ-}
 de exiguos nobiscum comparatos. Suadet enim hoc primò, ^{quales vel}
 quod probabile sit, sicut corpora hominum se habent ad Tel- ^{maiores esse.}
 luris magnitudinem, ut peragrarè universam possint, atque
 ita formam molemq̃ ejus cognoscere; eodem modo
 & in cæteris Planetis incolisque eorum rationalibus or-
 dinatum esse; nisi hac in re, quæ sane magna est, nos
 ipsis rursus præferre velimus. Deinde cum siderum scien-
 tiam & observationes apud eos exerceri ostenderimus, se-
 quitur ut & corpora nacti sint lignis metallisque tractan-
 dis, inque instrumenta machinasque adaptandis, idonea.
 Quæ & eo præstabiliora sunt quo ampliora. Ac sane si
 homunciones quosdam, muribus non majores, cogite-
 mus, non possent ii siderum animadversiones, quales re-
 quiruntur, instituere; nec instrumenta ad eas parare, aut
 disponere. Itaque omnino vel æquales nobis ponendos esse

existimo, vel majores, ac præsertim in Jove, Saturnoque, quorum Globi tanto Tellurem nostram superant.

Eos in societate vivere.

Porro quia, ut diximus, astronomiæ studium sine annotatione observatorum non potest procedere, ars vero scribendi non nisi in societate ratione utentium, & cogentibus vitæ necessitatibus, inveniri potuit; neque magis ars fabrorum aut fusoria; sequitur ex eo (quod supra dicebam) & societates coli apud Planetarum indigenas, ac mutuas operas eos inter se præstare; adeoque hac parte similitudinem magnam ibi esse nostratium rerum. Quamobrem & certas stabilesque sedes potius quam ambulatoriam vitam iis convenire dicendum est. Quid igitur? an & cætera sociali vitæ propria habebunt? leges; Magistratus, tecta, urbes, mercaturas aut rerum permutationes? Certe equidem apud barbaros Americæ & insularum populos, cum primum ad eos perventum est, eadem hæc fere jam in usu erant. At non propterea negaverim aliter ista in Planetis cæteris se habere posse quam apud nos; cum ex iis quædam sint quæ abesse queant à societate animalium ratione præditorum; eoque tantum excogitata, ne ratione male utamur & cum aliorum injuria, itaque societas solvatur. Possunt enim in aliis istis globis in ea rerum abundantia versari, ut nihil alieni appetant, rapiantve. Possunt ea esse æquitate, ut pacem perpetuo colant, nec sibi invicem insidientur, aut mortem inferant; imò ut neque oderint nec irascantur; quod si esset, multo quàm nos feliciores putandi sint. Sed verisimilius est, ut quemadmodum apud nos, sic ibi quoque bonis mala, sapientiæ stultitia, paci bellum misceatur, nec desit egestas artium magistra. Quia & ex his utilitatem aliquam proficisci antea ostendimus; &, si nulla esset, tamen nec præferendi res illorum rebus nostris causam habemus.

Colloquiorum jucunditate frui.

Quod autem nunc dicam, audacius, scio, videbitur; nec tamen probabilitate caret. Nempe, si in societate (quod jam penè obtinuimus) vivant gentes Planetarum; etiam, præter commoda inde provenientia, voluptate aliqua tali eas affici, quali nos, ex congressibus colloquiisque amicorum,

amo-

amoribus, jocos, spectaculis. Hoc, inquam, probabile est, quia si nihil horum Planeticolis concedamus, sed semper eos feriò, ac sine omni hilaritate, aut animi remissione agere putemus; ingens vitæ condimentum, quoque vix illa carere possit, iis adempturi simus, atque ita nostram hanc beatiorē facturi; contra quam ratio postulat.

De reliquis vero occupationibus & studiis illorum ut porro inquiramus; videndum est quænam istorum, præter ea quæ jam diximus, cum nostris aliquam similitudinem habere probabile sit. Domos sibi eos construere, ideo vel maxime credere libet, quod & pluvias in terris illis cadere ostendimus. Sequebatur enim hoc ex eo, quod in Jovis Planeta nubium quidam mutabiles tractus cernuntur; vapores, aquamque haud dubie continentes: quam aliunde quoque illic non deesse argumentis adstruebamus. Erunt ergo & imbres & venti, quia attractum à Sole humorem recidere in terram necesse est; & calore soluti vapores ventorum causa sunt; quorum flatus ex illa nubium Jovialium mutabili facie cognoscitur. Adversus hoc ergo, ut noctes tuto & quiete transigant (habent enim & noctes & somnum proinde, uti nos) munire se eos, casasque ac tuguria ædificare, aut specus effodere, verisimile est. Atque eo magis quod omne genus animalium, apud nos, exceptis piscibus, ad sui tutelam hæc molitur. Cur vero casas & tuguria, & non domos amplas & magnificas Planetarum habitatoribus exstrui credamus, nisi quod non possumus res nostras non præ omnibus pulchras perfectasque putare. Qui autem nos? Nempe in globulo illo vitam agentes, qui non decies millesimam partem globorum Saturni aut Jovis æquet, si corporum moles inter se conferantur. Nulla equidem ratio adferri potest cur non Architecturæ elegantiam, symmetriamque, æque cognitam habeant in istis cæterisque Planetis, ac nos in nostro: nec cur non palatia, turre, pyramidesque alicubi nostris multo altiores sumptuosioresque, nec minori concinnitate exædificent. Cumque multiplex sit hominum in his rebus industria; ut in cædendis lapidibus, coquenda calce & late-

ri-

ribus; cum ferro, plumbo, vitro utantur, atque ad ornam-
tum auro quoque; his omnibus nihilo inferiora illis haberi
virisimile est.

*Navigare,
adeoque
artes, quæ eo
faciunt ex-
colere.*

Si vero divisa est illis, sicuti nobis, Globi sui superficies,
ut pars terram, pars maria contineat; uti ex supra memora-
tis Jovis observationibus colligi potest, quia nubes vix ali-
ter quam ex maris amplis tractibus enascerentur; permagna
ratio est ut & navigare eos putemus. Cum alioqui etiam rem
tantam, tamque utilem, nostræ Telluris Globo soli non abs-
que arrogantia ascripturi simus. Præsertim verò in Jovis Sa-
turnique maribus commoda esset navigatio propter Lunarum
plurium utrobique copiam; quarum ductu longitudinum men-
suram, quam vocant, quæ nobis non contigit, facile con-
sequi possint. Quod si navium usum habent, quam multa
præterea habebunt quæ ad eas pertinent; Vela, anchoras,
funes, trochleas, gubernacula; & horum usum peculiarem
quemadmodum nos; ut vento penè contrario navigetur, in
contrarias vero partes eodem vento facillime. Nec fortasse
nauticæ pyxidis invento carebunt; siquidem motus materiæ
magneticæ, quæ terræ globum continue pervadit, est ejusmo-
di quid, ut cæteris quoque planetis convenire censerî possit.
Mechanicæ quidem scientia, & Astronomiæ, in re navali
necessario requiritur, atque adeo utriusque harum magistra
Geometria, de qua jam ante aliquid attigimus.

*Ut & Geo-
metriam.*

Existimo autem, etiam si nec ad istas artes nec ad alias quas-
dam respiciamus, in quibus vel necessitas vel occasio Geo-
metriæ inveniendæ initium fecerit, non deesse rationes, qui-
bus verisimile fiat ejus notitiam Planetarum incolis obtigisse.
Sive enim cognitionis ipsius pretium ac dignitas spectetur, in
qua singularis quidam intelligentiæ est usus, ac certa indu-
bitataque veri comprehensio, quanta in nullis rebus discipli-
nisve aliis reperitur: sive quod est ejusmodi natura sua, ac
talìa ejus axiomata & effata, ut quocunque loco & tempe-
re, aut quibuscunque in mundis extet, prorsus eadem ubi-
que esse debeat; videtur omnino non solis Telluris nostræ
incolis res talis parata aut oblata esse. Quid quod figuras
Geo-

Geometricas, velut circulos, triangula, polygona, sphæras, multis modis natura ipsa oculis objicit, ad variasque eorum proprietates indagandas quasi invitat; in quarum contemplatione, etiam extra utilitatem omnem, summa est oblectatio. Quis enim non admiratur, cum discit ea quæ de circulo in Elementis Euclideis, & Apollonii locis Planis docentur? aut quæ de sphæræ superficie & quadratura Parabolæ Archimedes prodidit, aut recentiorum subtilissima inventa? Quorum omnium eadem, & ad discendum æque exposita, est veritas in Saturno, ac Jove, atque apud nos, & ex iisdem simplicissimis principiis pendens, quo facilius credi potest pulcherrimi jucundissimique studii in illis ac cæteris planetis aliquos participes esse: Etsi præcipue hoc suadet utilitas quæ ex eo in omnem vitam emanat. Quod si jam eo usque rei Geometricæ peritos qui in Planetis sunt dicerem, ut & Tabulas Sinuum, & Logarithmos, & calculum Analyticum invenerint; absona ac pene ridicula proferre viderer. Nec tamen quidquam obstat quin horum aliquid reperisse potuerint, aut aliquando reperturi sint; atque etiam his nostris fortasse majora. Non debemus enim, ut jam sæpe diximus, præferre nos ipsos ac res nostras rebus Planeticolarum.

Cæterum illud quod uniusmodi & æternum in Geometrica scientia inesse animadvertimus, similiter quoque in Harmonicis inveniri certum est; cum consonantiæ omnes constanti mensura ac proportionem constituentur; omnis vero phtongorum ordo, omnisque cantus delectatio, etiam vocis singulæ, in consonantiis fundata sit. Quo fit ut *Musicam;* apud omnes gentes eadem tonorum intervalla canantur, sive per gradus continuos, sive saltu vox progrediatur. Imo animal quoddam in terris Americæ reperiri fide digni auctores narrant, quod sex musicos tonos deinceps voce exprimat: Ut appareat ipsam naturam immutabili ratione eos præscribere. Quandoquidem igitur quæ huc spectant, certa quoque & unica, & necessaria ratione sese habent, verisimile est, non minus quam Geometriæ,

etiam Musicæ oblectationem ad plures quam ad nos pertinere. Positis enim aliis terris atque animalibus ratione & auditu pollentibus, cur tantum his nostris contigisset ea voluptas, quæ sola ex sono percipi potest? Nescio equidem quantum apud alios valiturum sit argumentum, quod hic ab unitate, & immutabili natura istarum artium petimus; mihi non leve aut contemnendum videtur, nec multum ei cedere, quo in superioribus usus sum, cum videndi facultatem Planetariis animalibus convenire docui.

Porro si tonis harmonicis & cantu delectentur, vix quoque fieri potest quin & instrumenta quædam musica repere-
rint; quoniam & casu in hujusmodi inventa incidere contingit: velut chordis valide contentis, aëris sono, canna-
rum aut cicutarum sibilo. A quibus initiis, sicuti ad testu-
dines, citharas, tibias, & organa polyplectra nos perve-
nimus, ita illi quoque non minus elegantia excogitare po-
tuerint. Sed quemadmodum certi definitique licet sint to-
ni, cantusque intervalla, tamen apud diversos populos
alium atque alium esse canendi morem ac normam videmus;
ut olim apud Dores, Phrygas, Lydos; nostra ætate apud
Gallos, Italos, Persas: ita fieri potest ut ab omnibus his
longius abeat Planetariorum Harmonice, quamvis illorum
auribus gratissima. Cur vero nostra rudiores opinemur
nulla ratio est; neque etiam cur non & chromaticis sonis,
& quibusdam Enarmoniis utantur? cum hemitonia quoque
natura suppeditet, certisque proportionibus definiat. Imo
ne minus affecuti sint hisce in rebus quam nos, etiam plu-
rium vocum aut chordarum concentus, artificiosaque per-
missio, & dissonantium tonorum, & tritoni, & diapente
diminutæ usus iis fortasse concedendus sit. Scio vix ali-
quam verisimilitudinem apud multos hæc habitura, ac mi-
norem etiam, si æque doctos dicamus in Jove aut Venere
incolentes, ac sunt ii qui in Gallia, Italiave plurimum hac
arte excellunt. Et tamen fieri potest ut vel illis peritiores
sint, ac præcipue in parte Theoretica hujus artis ea perspe-
xerint, quæ apud nostrates hosce parum hætenus intelle-

*Qua tamen
à nostra di-
versa esse
posset.*

Et

Sta sunt. Si enim ex nostris Musicis quæras, cur consonantia diapente post aliam similem vitiose ponatur, dicent alii nimiam dulcedinem devitari, quæ ex gratissimæ consonantiæ iteratione nascatur: alii varietatem in harmonicis sequendam esse. Hæc enim præcipui artis auctores, cumque iis Cartesius, adferunt. At Jovis aut Veneris incolæ forsan veriore hanc causam demonstrabit, quod à Diapente ad aliam deinceps pergendo, tale quid fiat, ac si re-^{Cur consonantia diapente post aliam similem vitiose ponatur?} pente toni statum immutemus; cum Diapente, unâ cum interjecto ditoni sono, (qui si desit, mente suppletur) toni speciem certo constituat: hujusmodi vero subita commutatio auribus merito injucunda inconditaque judicetur; cum etiam in universum ea plerumque durior accidat, (præterquam in transitu) quæ fit à tribus sonis consonis, ad trium aliorum harmoniam, nullo priorum manente. Sciet etiam ille idem fortasse, quod nemo adhuc animadvertit nostrorum hominum, cur in nullo vocis unius, pluriumve cantu, tonus servari possit in eadem altitudine ac tenore, nisi consonantia intervalla pleraque ultro, ac nemine advertente, ita temperentur, ut à perfectione summa nonnihil desciscant. Et cur optimum sit hoc temperamentum in chordarum systemate, cum ex Diapente quarta pars commatis ubique deceditur. Quod idem absque sensibili discrimine effici ex divisione Diapason in partes æquales 31, indeque Cyclum quendam Harmonicum in se redeuntem existere, non ita pridem ostendimus. Quod tamen Planetarum incolæ si perspexerunt, etiam Logarithmorum numeri iis noti esse debebunt.

At de Tono vocis temperando quod dixi, probatio-^{Demonstratio temperamenti in tono vocis adhibendi.} nem habet non difficilem; quam hic adjungimus, quandoquidem jam aliquid præter somnia nostra venditare cœpinus. Ajo itaque, si quis canat deinceps sonos, quos Musici notant Literis C, F, D, G, C, per intervalla consona, omnino perfecta, alternis voce ascendens descendensque; jam posteriorem hunc sonum C, toto Commate, quod vocant, inferiorem fore C priore, unde cani cœ-

pit. Quia nempe ex rationibus intervallorum istorum perfectis, quæ sunt 4. ad 3, 5. ad 6, 4. ad 3, 2. ad 3, componitur ratio 160 ad 162, hoc est 80 ad 81, quæ est Commatis. Ut proinde, si novies idem hic cantus repetatur, jam propemodum tono majore, cujus ratio 8. ad 9. descendisse vocem, tonoque excidisse oporteat. Hoc verò nequaquam patitur aurium sensus, sed toni ab initio sumpti meminit, eodemque revertitur. Itaque cogimur, occulto quodam temperamento uti, intervallaque ista canere imperfecta; ex quo multo minor oritur offensio. Atque hujusmodi moderatione fere ubique cantus indiget; uti colligendis rationibus, quemadmodum hic fecimus, facile cognoscitur. Et hæc quidem in gratiam artis illius studiosorum, nec Geometriæ rudium exponere placuit. Nunc eo unde discessimus revertimur.

Diximus de artibus inventisque quibusdam quæ nobiscum communia habere Planeticolas verisimile sit; præter quæ etiam alia exstare illic necesse est, sive ad usus & commoda vitæ facientia sive ad delectationem. Hæc vero quam multa sint; quantique facienda; ita optime rationem inibimus, si plurima illa, quæ apud nos reperiuntur, recensere & ob oculos ponere libuerit.

Exposui supra animantium fruticumque apud nos genera quæ plurimum inter se figuris differrent: præter quæ, minus dissimilium; ingens copia reperiatur: dixique nihilo pauciora utriusque generis, ut longe diversa, in Planetarum terris exstare putandum. Nunc etiam illud videamus, quæ utilitas quæve commoda, tum ex animalibus, tum ex herbis arboribusque ad nos perveniant; ac prorsus verisimile existimemus non minora ex iis, quæ illic terrarum inveniuntur, ad incolas ipsarum redundare.

*Recensentur
commoda
qua ad nos
perveniant
ex animalibus,
herbis,
arboribus.*

Hic vero operæpretium est ut quæ sint divitiæ nostræ inspiciamus, quæ multæ magnæque sunt. Nam, præterquam quod alimenta nobis arborum fructus herbæque suppeditent; illæ pomis, nucibus; hæc seminibus, foliis, radicibus; quodque plurimorum ex his in medicina usus est;

pe-

petitur ex arboribus materia qua domos navesque fabricamus. Et lino vestes paramus, excogitatis nendi & texendi artificiis. Ex cannabe, spartove, fila ac funiculos torquemus; ex filis vela ac retia conficimus, ex funiculis rudentes & funes anchorarios. Florum porro odoribus coloribusque oblectamur; & quamvis sint etiam qui nares offendant, & noxiæ quædam herbæ inveniantur, tamen in iis sæpe boni quid delitescit; vel fortassè hoc egit natura ut comparatione mali bona magis emerent: quod multis in rebus secuta videtur. Quanta vero ex animalibus est utilitas? Oves lanam ad vestitum præbent, vacæ lac; utræque carnes ad vescendum. Asinis, camelis, equis, ad portandas sarcinas utimur. His etiam ut nos vel inscensi vehant, vel curribus juncti pertrahant. Ubi egregium illud rotarum inventum occurrit, quod libenter Planetarum quoque habitatoribus adscriberem, cum jam in societate eos vivere & domos ædificare pene evicerim. Utrum vero etiam animalibus pro cibo utantur, an Pythagoræ simile dogma sequantur, non habeo quod affirmem. Apparet quidem hoc homini datum esse, ut omnibus iis alatur quæ vel in terra vel in aquis nascuntur, si quid nutrimenti contineant; ut herbis, pomis, lacte, ovibus, melle, piscibus, volucrum quadrupedumque plurimorum carnibus. In quo mirum sane videri potest, animal illud rationis compos ita esse comparatum, ut cum multorum aliorum pernicie cædeque vivat. Nec tamen naturæ præscripto contrarium hoc esse putandum est, cum placuisse ei videamus ut leones, lupi, aliaque rapacia, pecudes & infirmiora quælibet pabuli loco habeant: aquilæ columbas leporesque prædentur: Piscium permulti pisciculos se minores devorent. Quin & canum varia genera ad venandum nobis largita est, ut quæ pedibus nostris persequi nequiremus, illorum celeritate ac sagacitate consequeremur. Præter omnem vero istam ex viventibus herbisque utilitatem, hanc quoque delectationem ex iis nos capere voluit rerum conditor, ut varias eorum formas na-

turasque & generandi vias contemplaremur; in quibus infinita quædam varietas ac mirabilia multa insunt, quæ apud naturæ scriptores celebrantur. Imo in ipsis insectis quis non miratur apium cellulas hexagonas, aranearum telas; tum bombycum involucria, ex quibus incredibili industria delicatissimam vestem conficimus, eaque copiâ ut naves totæ ea onerentur. Atque hæc quidem de herbarum animantiumque genere, quatenus homini profunt, summam retulisse sufficiat.

Ex Metallis, Cogitetur jam porro quanta sit ejus solertia in reperendis, effodiendis, explorandis metallis; itemque in fundendis, repurgandis, miscendis. Quanta in tenuandis auri laminis, aut hydrargyro resolvendis, ut parvo impendio, quæcunque voluerimus, auri splendorem coloremque induant. Quam mira ac multiplex sit ferri utilitas; quam quæ ignorarunt nationes, eæ omnium ferè mechanicarum artium rudes vixerunt, proque armis, tantum arcus, clavas, fudesque habuerunt. Nos vero & pulverem ex sulphure & nitro mistum habemus, variosque ejus usus, qui an plus juvet an noceat merito dubitari potest. Videbatur enim mira ejus vi, simulque artificiosa muniendorum oppidorum arte, certius præsidium inventum esse, quam priscis temporibus fuerit, adversus hostiles impetus: sed & horum ex eo simul violentiam crevisse videmus, & fortitudini viribusque in præliis multo minus nunc locum esse quam tunc fuerit. Quod enim olim Imperator Græcus dixisse fertur, *Periisse Virtutem* cum Catapultarum, ac Balistarum inventa exorirentur, idem nunc majori jure queri possumus; ac maxime Bombis, quos vocant, repertis; quos non mœnibus, nec situ oppida arcēve repellere possunt, sed quamvis validæ disjiciuntur, ac solo æquantur. Ut, vel ob hoc unum, melius homines ejus pulveris invento carituros fuisse dicendum sit. Nec tamen propterea prætereundum fuit in commemorandis nostræ Telluris repertis, cum verisimile sit, etiam in cæteris Planetis, noxia artificia quædam cum bonis emeruisse.

Au-

Auspiciator est aquæ & aëris apud nos usus: quo & na-
 vigandi ratio constat, & vires comparantur, quibus, nullo
 labore nostro, molas machinasque versamus. At hæ quam
 multiplices, quamque ad varias res adhibentur? Nam & fru-
 menta iis comminimus, & olea exprimimus, & ligna seca-
 mus, & pannos tundendo densamus; & chartis materiam
 conterimus; quarum aliàs quoque pulcherrimum est inven-
 tum, cum ex vilissimis linteorum scrutis, tam pulchra folio-
 rum candidissimorum copia paretur. His addatur jam præ-
 clarum illud typographiæ inventum, cuius opera artes omnes
 reliquæ; non servantur tantum, sed & comparantur multo
 quam ante facilius. Item sculpendi pingendique peritia, a
 parvis rudibusque initiis eo progressa, ut nihil elegantius ab
 hominum ingenio profectum esse videatur. Ponatur & vi-
 tri excoquendi scientia, atque in tot formas ducendi facili-
 tas. Tum speculorum vitreorum politura, hydrargyrique
 super ea inductio. Ac præcipue quoque vitri usus mirabi-
 lis, in pervidenda rerum natura, post telescopii microscopii-
 que inventa. Recenseantur etiam horologiorum auto-
 matôn fabricæ; aliorum tam exilium, ut gestanti nihil in-
 commodent; aliorum tam exquisita æqualitate tempus me-
 tientium, ut nihil supra optari possit, quibus utrisque inven-
 ta nostra plurimum profuere.

*Ex aqua, &
 aëre, variis
 que artifi-
 ciis;*

Multa addere possem de multiplici doctrina & rerum na-
 turæ cognitione quam præter Geometriæ Astronomiæque
 scientias consecuti sumus, atque ea pleraque nostra ætate:
 velut de gravitate aëris ac vi qua compressus resilit. De sin-
 gularibus Chymicorum experimentis; è quibus liquores in-
 flammabiles, nuperque ultro lucentes, ac levi tractatione ar-
 dentes, prodierunt. De sanguinis circuitu per arterias ve-
 nasque, qui antea intelligebatur, nuper vero & oculis usur-
 pari cœpit, adhibito microscopio, in piscium quorundam
 caudis extremis. Item de generatione animalium, quod in-
 ventum est nulla nisi ex similium semine nasci; idque de her-
 bis quoque verum esse. Quodque in semine marium repe-
 riuntur animalculorum myriades vivacissimorum, quæ ipsam
 ani-

*Ex iis, quæ
 nostra ætate
 inventa
 sunt.*

animantium sobolem esse verisimillimum sit: res mirabilis, atque ab omni ævo incognita.

*Ille omnia
verisimiliter
non extare
in Planetis,
sed aliis æque
dignis repen-
di.*

Jam vero postquam hæc omnia accumulavimus Telluris incolarum inventa, putemus fieri quidem posse, ut quædam eorum etiam apud Planetarios extent; credibile tamen esse maximam partem eorum illis ignorari. At iis quæ non habent rependendis æque multa, pulchraque & utilia, admiratione digna iis tributa esse oportet. Quancquam igitur ibi terrarum aliquos ratione præditos, & Geometras, & Musicos reperiri probabilibus argumentis ostenderimus, & in societate communitateque viventes, & manibus pedibusque instructos, tectisque & mœnibus munitos: non tamen dubitandum est, quin & formæ, & rerum quas agunt novitate, mirabile supra quam dici possit futurum sit spectaculum, si quis Mercurius, aut potens Genius eò nos deducat. Sed cum ejus itineris conficiendi spes omnis adempta sit, id unum tamen, quod possumus investigare non pigebit; qualis nempe cælestium rerum facies sese offerat, in unoquoque istorum globorum vitam agentibus, cum ad eam hoc quoque pertineat. Simul vero & de præstantia cujusque, tum ob magnitudinem, tum ob adjunctum comitum lunarum numerum, quædam scitu digna referemus, ac stellarum denique inerrantium incredibilem distantiam nova ratione indagabimus. Sed à longa attentaque meditatione requiescemus hic paulum, finemque huic Libro imponemus.



CHRISTIANI HUGENII COSMOTHEOROS,

SIVE

De Terris Cœlestibus, earumque ornatu,
Conjecturæ.

AD

CONSTANTINUM HUGENIUM,

Fratrem.

LIBER II.

CUm ante annos complures Librum Athanasii Kircheri, qui *Iter Ecstaticum* inscribitur, evolverem; in quo de Natura Siderum, rebusque in Planetarum superficie extantibus, differitur; mirabar nihil illic adferri eorum quæ mihi jam ab illo tempore circa hæc, tanquam valde probabilia, occurrerent: sed longè alia tradi, inania pleraque, & à ratione aliena. Quod magis etiam intellexi, cum conscriptis superioribus idem opus denuo percurrerem. Jamque visum est aliquid esse conjecturas nostras, ac ponderis nonnihil iis accedere, si cum Kircherianis conferantur. Quod ut judicari possit, utque appareat quàm de his rebus frustra philosophari conentur, qui fundamenta unica verisimilitudinis, quibus usi sumus, rejiciunt; non abs re erit de opere illo quædam annotasse.

Is igitur Vir optimus; Genio quodam duce; per cæli ^{Kircheri iter} ^{extaticum} ^{sp-} ^{examina-}

Tom. III.

Sfff

spatia, stellasque se circumferri fingens, partim ea quæ ex Astronomorum scriptis hauserat, partim quæ ipse de Planetarum terris meditatus erat, ac vulgo probari posse putabat, quasi visa enarrat. Antequam verò iter longinquum ingre-
diatur, hæc duo tanquam certo tenenda statuit sancitque; nullum videlicet Telluri motum esse tribuendum; tum nihil in Planetarum globis Deum extare voluisse, quod vita aut sensu præditum sit, adeoque nec herbas quidem. Itaque, relicto Copernici systemate, Tychonicum sibi quod sequatur deligit. Sed cum stellas inerrantes pro totidem Solibus habeat, iisque singulis suos Planetas circumponat; hoc ipso (quod an senserit nescio) infinita numero jam exoriuntur ei Copernicea systemata. Quæ quidem perabsurdè, præter sibi proprios motus, universa circum Tellurem nostram, viginti quatuor horis, immani celeritate converti facit. Cumque horum maximam partem fateatur extra hominum conspectum esse remotam, in hoc quoque incidit incommodum, ut frustra tot Soles lucere dicendi sint, frustra que calorem suum impertiri tot globis Telluri similibus, elementaque eadem, (ita enim vult) & cætera omnia habentibus, præter stirpes & animalia. Atque hinc porro ad alia magis absona delabitur. Nam quia ne Planetarum quidem, qui nostro systemate continentur, alium ullum reperit usum, ad diu explosas Astrologorum ineptias se convertit; & hoc fine tot tantasque corporum moles conditas esse vult, ut influxu eorum vario, certisque legibus temperato, mundi universitas conservetur, incolumisque perduret: utque præterea in hominum animos iidem influxus vires suas exercean. Itaque, in Astrologicæ artis gratiam, in Veneris Planeta jucundam pulchramque rerum faciem sibi oblatam narrat; cum luce blanda, undis dulciter fluctuantibus, odoribus suavissimis, atque undique fulgentibus crystallis. In Jove auras salubres, ac suaveolentes, aquas limpidissimas, terras argentei splendoris. Quò nimirum, ab influxu hujus utriusque sideris, fausta ac salutaria omnia in Terram hominesque deriventur; ut vel pulchros & amabiles, vel ad prudentiam & gravitatem

tem propensos reddat. In Mercurio nescio quid serenum vividumque, unde ingenium ac solertia nascentibus insinuetur. At in Marte omnia tetra, exitialia, fætida, piceas flammæ, fumosque se vidisse memorat. In Saturno tristitia, horrenda, squallida, caliginosa; ut ex his Planetis, (nescio quare Apotelesmaticis omnibus invisis) influxus maligni infestique mundo ac mortalibus eveniant; nisi tamen benigniorum illorum radiis corrigi ac mitigari eos contingat. Hæc nempe & his similia Genio illi cælesti comes adhærens discit. Quem & serio respondere facit cum interrogatur, anne aquis, quæ in Veneris Planeta fluunt, Hebræus aut Paganus quispiam, eo delatus, ritè baptizari queat. Eodem quoque docente Magistro, intelligit cælum stelliferum non esse ex materia solida conflatum, sed liquidum prorsus, in quo stellæ Soleve innumeri longè latèque spargantur; nusquam alligati, (& hætenus rectè) quique omnes diei spatio vastissimos, ut dixi, circuitus peragant. Quo in motu, si talis foret, non advertit quanta vi illi undique diffugituri sint, ob motum circularem tam immensæ celeritatis. Sed ne sic avolent, inque spatia infinita recedant, Intelligentiæ motrices, credo, impediunt. Etenim unicuique stellæ fixæ, imo & Planetæ, Intelligentias aut Angelos suos adjungit, qui impellant eos, cursumque moderentur. In quo Doctorum quorundam turbam sequitur, qui vanissimum Aristotelis commentum inconsideratè, invitaque ratione, adoptarunt. Istos verò beatos Genios labore tanto Copernicus liberat, folius Terræ inducto motu; cujus sanè necessitatem, vel ex hoc uno, omnes vident, nisi qui ultrò, ac volentes, cæcutiunt. Equidem cogitavi nonnunquam, meliora à Kircherò expectari potuisse, si, quæ sentiebat, liberè exponere ausus fuisset. Sed cum hoc non auderet, nescio cur non in totum illo argumento abstinere maluerit. Sed hunc celeberrimum scriptorem jam omittamus: & quandoquidem nil veriti sumus, conjecturis nostris, spectatores in Planetis ponere, adeamus nunc, uti propositum fuerat,

singulos; & quinam sint anni eorum, qui dies, quæ denique Astronomia, deinceps consideremus.

*Apparens
qualis sit
constitutio
Solis & Pla-
netarum in
Mercurio.*

Itaque, ut ab intimo, & Soli viciniore incipiam, scimus Mercurium triplo propius circiter quam Tellurem nostram ad ingens illud sidus accedere. Cui consequens est ut triplo quoque majus id conspiciant ejus incolæ, ratione diametri, lumen vero & calorem ejus sentiant noncuplo quam nos majorem. Nobis proinde intolerabilem, quique accensurus sit siccitas herbas, fœnum stramenque, qualia apud nos crescunt. At nihil impedit ita comparata esse, quæ ibi vivunt animantia, ut optatam temperiem in ardore illo experiantur. Herbas vero esse ea natura, ut multo magis vim caloris perferant. Nec mirum esset istos Mercurii indigenas putare non ferendo frigore nos urgeri, luceque frui exigua, qui tanto longius a Sole absumus. Sicut nos de Saturni colonis facile nobis persuademus. Non deest verò dubitandi ratio, cum à calore vita pendeat, isque corpori mentique vigorem alacritatemque præstet; an non, propter Solis viciniam, Hermopolitæ illi nobis ingenio præstare putandi sint? Sed quò minus huic causæ tribuam facit, quod calidissimas terræ nostræ regiones sortitos, Africæ, Brasiliæque populos, nec sapientia nec industria æquare videmus temperatiorum tractuum incolas; ut vel ex eo perspicitur, quod in omnium scientiarum ac fere artium ignoratione versentur: cum nec nauticæ rei, qui circum littora incolunt, nisi per exiguam notitiam habeant. Nollem quoque Jovicolis, Saturnicolisque hebetes, plumbeasque mentes, intelligentiamve tribuere nostra minorem, propterea quod tanto longius a Sole remoti vivunt; cum uterque globus iste tam præstanti sit magnitudine, tantoque comitatu stipatus feratur. Qualis porro sit Mercurialibus Astronomia, utque cæteros Planetas certis temporibus Soli oppositos spectent, ex figura systematis, priore libro exposita, perfacile est intelligere. Atque his oppositionum temporibus Venerem ac Tellurem præcipuo splendore illic effulgere necesse est. Nam cum

adeo

deo lucida nobis Venus appareat, quo tempore tenuem nascentis Lunæ faciem refert; oportet eam sextuplo aut amplius clariorem cerni, cum Soli opponitur, ex Mercurii Globo pleno orbe spectatam, & minore quoque intervallo distantem: atque ita tunc non parum dispellere nocturnas tenebras gentibus istis, Lunæ auxilio carentibus. Quænam sint denique apud eos dierum spatia, & an varias anni tempestates experiantur, incompertum est hætenus, quod ignoretur an axem diurnæ conversionis ad orbem, quo circa Solem defertur, obliquum habeat, & quanto tempore conversio ea peragatur. Neque enim dubitari debet de diebus noctibusque eorum cum in Tellure, Marte, Jove ac Saturno hæc vicissitudo certò cognoscatur. Anni vero spatium vix quartam partem nostri æquare illic constat.

In Veneris globo positus, eadem fere in cælo apparere necesse est quæ de Mercurio diximus, nisi quod hunc nunquam videt Soli oppositum, cum non nisi 38 circiter gradibus ab eo recedat. Sol vero illis major apparet quam nobis, diametro fescupla, orbe plus quam duplo; quo & bis tantum caloris lucisque præbere cum oportet. Itaque propius ad nostræ temperiæ Tellus ista accedit. At annus mensibus nostris septem cum dimidio fere finitur. Noctu verò globus hic noster, in locis Soli oppositis, multo lucidior Veneri apparere debet quàm unquam nobis appareat Venus; ac tunc Lunam quoque, perpetuum comitem nostrum, facile conspiciunt, si modo oculos habent nostris non imbecilliores. Sæpe autem in Venere miratus sum, cum tubis longioribus, pedum 45, aut 60, eam inspicerem Terræ propinquam; Lunæque semiplenæ similem, aut jam in cornua curvari incipienti; prorsus æquabili splendore superficiem ejus perfundi: ut vix dicere audeam, aliquid maculæ simile, in ea me animadvertisse; cujusmodi in Jove & Marte manifestè notantur, licet orbe multo minore sese offerentibus. Si enim maria ac terras habet Veneris globus, obscuriores nobis maris tractus conspici deberent; terrarum vero clariiores; sicuti ex præaltis rupibus inspectum desuper ma-

*Qualis in
Venere.*

re, non perinde, ac adjacentes terræ, lucidum apparet. Credebam nimium Veneris fulgorem in causa esse, quo minus diversitas lucis animadverti posset. Sed cum fumo incissem vitrum oculo proximum, ad auferendam partem radiorum, nihilo minus æqualis in tota superficie lux visa est. An igitur nulla ibi maria, an Solis lucem magis quam apud nos aquæ, aut minus terræ reperiunt? an potius, (quod credibilius mihi videtur) densior ibi, quam in Jove aut Marte, Vaporum regio à Sole illustrata, Venerisque globum circundans, omnem fere illam quam videmus lucem ad nos remittit, vixque subjectorum sibi marium terrarumque discrimen percipi finit? Nam certum est nostram quoque atmosphæram, si Tellurem procul intueri daretur, plurimum obstituram luce sua, quo minus terræ marisque tam diversa claritas apparere posset, quam quæ cernitur ex edito scopulo despicienti. Eadem ratione qua Lunæ quoque maculas interdum minus aperte quam noctu animadverti sinunt vapores iidem; quoniam tunc quoque inter illam oculosque nostros interpositi, Solisque luce illustres, visui officiant: noctu non item.

In Marte.

At in Marte reliquis disci partibus obscuriores, ut jam dixi, maculæ notantur. Ex quarum recursibus pridem fuit observatum dies noctesque illic iisdem fere quibus apud nos intervallis reverti. Hyemem vero æstatemque exiguo discrimine incolæ sentiunt, eo quod axis diurnæ conversionis paulum duntaxat ad orbitam Planetæ inclinatur, ut ex motu macularum intellectum est. Qui autem ex globo illo Tellurem nostram intuentur, eodem modo fere, ac Venus nobis, apparere iis debet, formasque lunaribus similes ostendere, si telescopio spectetur; nec ultra gradus 48 à Sole evagari; in cuius disco etiam conspici quandoque possit, uti & Veneris Mercuriique corpuscula. Et hoc quidem nunquam aliàs; Venus raro iis apparere debet, uti nobis Mercurius. Terræ vero solum in Marte nigriore materia constare verisimile est, quàm in Jove, aut etiam Luna nostra; eoque fieri ut rubicundior Mars spectetur, nec, pro ratione intervalli quo

quo à Sole abest, lucem remittat. Minor verò est globus ejus quam stellæ Veneris, licet à Sole longius distans, ut jam supra animadvertimus. Nec Lunam habet ullam comitem; atque in eo Telluri nostræ, quemadmodum & Venus & Mercurius, dignitate impar videtur. Lux vero Solis, calorque, Marticolis duplo atque interdum triplo quam nobis minor sentitur; nullo tamen, ut credimus, ipsorum incommodo.

Quod si Tellus hæc, propter adjunctam ei Lunam, præstare cæteris Planetis, quos huc usque percurri, dicenda est; nam magnitudine nec cedit iis multum, nec superat; quantopere & his tribus, & Telluri ipsi, anteponenda erunt sidera Jovis & Saturni. In quibus sive globorum molem consideremus longissimè omnium istorum corpuscula excedentem; sive Lunarum quibus ambiuntur multitudinem, prorsus verisimile fit has duas primarias habendas esse Tellures, inter eas quæ circa Solem sunt: præ quibus reliquæ quatuor sint minimum quidpiam, ac nequaquam cum iis comparandæ. Quanta enim sit differentia, quò rectius animo concipiatur, subjicere hic placuit, secundum proportionem veras, aut non multum à veris abeuntes, tum Tellurem nostram, cum circumjecta Lunæ orbita, ipsoque in ea Lunæ globulo; tum Jovis ac Saturni systemata: Illud quaternis, hoc quinis Lunis exornatum; quarum quæque in sua itidem orbita ponuntur. Joviales Galilæo deberi notum est; quæ quanto animi gaudio primum illi animadvertæ sint, facile quivis secum reputet. Saturniarum una nobis obtigit, quæ cæteris clarior est, & ab extrema proxima. Quam Anno 1655 telescopio nostro non ultra duodecim pedes longo, primi deprehendimus. Reliquæ diligentissimis Dominici Cassini observationibus patuerunt, vitreis orbibus utenti à Jos. Campano expolitis, primum 36 pedum; deinde totidem supra centenos. Tertiam enim quintamque vidimus Anno 1672, ipso monstrante Cassino, & postea sæpius. Primam, cum secunda, sibi repertas significavit, missis literis, Anno 1684. Hæ vero difficilimè cernuntur, certoque affirmare nequeo mihi conspectas

Jovem &
Saturnum
reliquis Plan-
etis longe
præstare,
tam magni-
tudine,
quam Luna-
rum multi-
tudine.

TAB. LIII.

hactenus. Nec propterea quidquam vereor Clarissimo Vi-
ro fidem habere, atque has quoque Saturno socias adscribe-
re. Imo præter harum numerum alias quoque, vel unam
vel plures, latere suspicari licet; nec deest ratio. Cum enim,
inter extremas duas, spatium amplius pateat quàm pro di-
stantiis cæterarum; posset hoc insidere sextus satelles: vel
etiam, ultra quintum, alii circumvagari, qui propter ob-
scuritatem nondum sint visi: cum ille ipse quintus, tan-
tùm in orbitæ suæ parte quæ ad occidentem spectat, cernat-
ur, in reliqua nunquam appareat; cujus rei causam satis in-
tellectu facilem postea adferemus.

Fortasse autem, ubi ad signa Borea Saturnus revertetur,
altèque supra horizontem attolletur, (nam, quo tempore
hæc scribimus, maximè deprimitur) aliquid circa hæc novi
observare continget, si quis tuas tunc lentes, Frater opti-
me, ad Telescopia pedum 170. & 210. paratas, sideribus
applicet: quibus majores, formæque perfectioris, nullas ha-
ctenus extare arbitror. Quanquam enim cælo nondum eas
admovimus, vel propter moliendi difficultatem, vel quod
discessus tuus studia hæc nostra conatusque interruptit: omni-
tamen vitio eas carere certi sumus, post experimenta illa fa-
cilia, quæ in ambulacris suburbanis sub noctem institueba-
mus; inspectis procul literis, quibus appositum erat lumen.
Quorum equidem lubens reminiscor, simulque jucundi la-
boris nostri, quem, in elaborandis expoliendisque vitreis
hujusmodi discis, impendere unà solebamus; excogitatis no-
vis artificiis machinisque, semperque ulteriora agitantes. Sed
redeo ad diagrammata ante descripta, de quibus aliqua di-
cenda supererant.

*Proportio
diametro-
rum tum
Jovis, tum
orbitalium
satellitum
ejus, ad or-
bitam Luna
circa Ter-
ram.*

Feci in iis Jovialis globi diametrum duarum circiter ter-
tiarum ejus distantiae quæ inter nos nostramque Lunam in-
terjacet; quandoquidem plus quàm vices diametrum Terræ
diameter Jovis continet; Luna autem distat à Terræ diame-
tris hujus triginta. Orbitam vero comitis Jovis extremi ad
nostræ Lunæ orbitam posui sicut $8\frac{1}{2}$ ad 1, quoniam ejusmodi
inter eas proportio re ipsa reperitur. Et hi quidem comi-

tes,

tes, five Lunæ singulæ, non videntur Tellure nostra minores esse, ut ex umbris earum in Jovis disco sæpe observatis, probari potest. Sunt autem (ut hoc quoque addamus) ^{Tempora periodorum comitum Jovialium.} periodorum tempora sub Ecliptica, apud Cassinum, intimi Jovialium dies 1, horæ 18, 28', 36". Secundi dies 3, horæ 13. 13'. 52". Tertiï dies 7. horæ 3. 59'. 40". Quarti dies 16, horæ 18. 5'. 6". Distantiæ à centro Jovis, comitis intimi $2\frac{1}{2}$. Jovis diametrorum. Secundi $4\frac{1}{2}$. Tertiï $7\frac{1}{2}$. Quarti $12\frac{2}{3}$. In Saturniis periodica tempora, intimi, dies 1, horæ 21, 18', 31". Secundi dies 2, horæ 17, 41', 27". Tertiï dies 4, horæ 13. 47', 16". Quarti dies 15, horæ 22, 41', 11". Quinti dies 79, horæ 7, 53'. 57". Distantiæ à centro Saturni, diametris Annuli dimensæ, Comitæ intimi, $\frac{32}{45}$. Secundi $1\frac{1}{4}$. Tertiï $1\frac{3}{4}$. Quarti 4, quæ mihi erat $3\frac{1}{2}$. Quinti 12. omnia magnis laboribus vigiliisque reperta.

Ecquis jam systemata hæc inspiciens, atque inter se conferens, non stupet ad magnitudinem, ingentemque paratum duorum præ exiguo tenuique Telluris nostræ? aut cui nunc in mentem venire potest in hac una Sôlem ambientium, omnem ornatum, omnia animalia, omnes qui cœlestia mirantur inveniri; in illis vero nihil imposuisse rerum conditorem; nec alio fine tam vastas corporum moles creasse, quam ut lucem eorum nos homunculi intueremur, cursumque forsitan inquireremus?

Credo equidem futuros qui falsa aut incerta esse dicant, quæ de magnitudine cœlestium spatiorum nobis hic sumuntur. Scio enim quam difficulter quisquam adducatur, qui orbis Terrarum spatia mirari assueverit, inque eo tot populos, urbes, imperia; ut alibi exstare credat quorum collatione hoc totum tam sit exiguum quam hæ figuræ demonstrant. ^{De hac proportioni magnitudinis consistere ex recentiorum observationibus.} Atqui ex summorum hujus ætatis Astronomorum scriptis ea hausimus, ex quibus istæ systematum inter se rationes consequantur. Si enim Terra à Sole decem vel undecim mille diametris suis distat, ut Cassinus in Gallia, apud Anglos Flamstedius colligunt, parallaxium in Marte subtilissimis observationibus usi; cum nos quoque probabili conjectura,

duodecim mille diametros invenerimus; erunt & istæ orbium magnitudines inter se ferè quales hic descripsimus.

*Quanam sit
Solis appa-
rens magni-
tudo & lux
in Jove, &
qui cognosci
queat.*

Sed de Jove dicere pergamus, ex quo Sol spectatus diametrum quintuplo quam apud nos minorem habet; ut proinde lucis calorisque illic pars tantum vigesima quinta sentiri possit. Sed ea lux nequaquam debilis putanda est, idque ostendit insignis Jovis per noctem claritas. Tum quod in Solis Eclipsibus quæ nobis contingunt, etiamsi nec vigesima quinta pars disci ejus supersit, ut me videre memini, non admodum sentiatur obscuratio. Si vero experimento inquirere libeat quanta sit illa in Jove Solis lux, sumatur tubus certæ longitudinis, isque parte altera obturetur, impositâ lamellâ in cujus medio foramen sit rotundum, ea latitudine quæ ad tubi longitudinem se habeat ut subtensa 6 scrupulorum primorum ad radium, hoc est fere ut 1 ad 570. Deinde ad Solem tubus obvertatur, radiique ejus per foramen ingressi excipiantur parte opposita, in chartæ candidæ folium; nec aliunde eo lux incidere possit. Hi radii imaginem Solis circulo referent, cujus claritas erit eadem quæ serenis diebus percipitur à Jovis incolis. Remotâ autem chartâ, si eodem loco oculus ponatur, videbit hic Solem ea magnitudine ac splendore, qui in Jovis globo consistenti appareret.

*Idem in
Saturno.*

Quod si in eodem tubo foramen duplo angustiori diametro statuatur, incidet in chartam, aut in oculum, lux ejusmodi qualis ad Saturnicolas pervenit. Quæ cum centesima tantum pars sit nostræ quam a Sole accipimus, tamen per tenebras noctis Saturnum satis lucidum nobis ostendit. In utroque vero Planetarum istorum, si nubilos quandoque dies habent, malignam tunc lucem esse oportet, si nostris oculis judicanda sit; at illorum habitatoribus talem haud dubiè, ut nihil de tenuitate ejus querantur. Sicut in noctuis, vesperilionibusque utilior gratiorque est crepusculi lux, aut quæ in ipsa nocte relinquitur, quam quæ diei tempore aërem terramque illustrat.

*In Jove dies
esse horarum
quinque.*

In Jove porro dierum spatia, quinque tantum horas nostrates æquare, ac noctes tantundem, admiratione non caret,

5

4

Annu

Sat.

lus

2

3

4

3

2

1

Jup.

Tellus

Luna

Tet, propter tantam illius globi præ nostro magnitudinem. Et ex hoc nimirum intelligitur naturam haudquaquam ea in re servasse rationem quæ est secundum globorum molem, aut eorum distantiam à Sole; cum etiam in Marte dies sint fere nostris pares. At in annorum longitudine, hoc est, tempore circuitus circa Solem, certam omnino distantiarum, quibus ab illo Planetæ absunt, rationem habuit. Sunt enim ut harum cubi, ita quadrata temporum periodicorum, ut primus advertit Keplerus. Idque in comitibus Jovis & Saturni eodem modo se habere inventum est. Cum itaque anni & dierum tempora in Jove à nostris multum diversa sunt, tum dies hoc nomine etiam differunt, quod eadem semper sint longitudine. Perpetuo enim illic fruuntur æquinoctio, quoniam axem motus diurni Jupiter rectum ferme habet ad planum itineris sui circa Solem, nec ut Tellus obliquum; ut telescopiorum observationibus constat. Frigidiores autem & ibi sunt regiones quæ polis viciniore propter radiorum Solis obliquitatem; at longas noctes non patiuntur, sicut quæ sunt prope polos Terræ; sed tenebras lucisque habent, ut dixi, horarum quinque, ubique & semper. Ac nobis quidem haud sanè placeret tanta dierum brevitās, meliusque nobiscum agi putamus quod plus quam duplo longioribus utimur. Nulla tamen ratione, nisi quoniam potiora ducere solemus ea quibus assuevimus.

Planetarum unum Saturnum ex Jove vident; cum cæteri nimium Soli vicini sint; ipseque Mars ab eo non ultra 18 gr. digrediatur. Ex quaternis vero quas habent Lunis, quin multò plus commodi capiant, quàm nos ex unica nostra, negare non possumus, vel eo solo quod perrarò illunes noctes experiantur. Si verò & maria sua navigant, de quo supra dictum fuit, egregiè cursus regere earum auxilio possunt. Ut præteream spectaculi jucunditatem ex variis earum conjunctionibus, Eclipsibusque, quas quotidie intuentur.

Eadem porrò commoda ac spectacula, imò etiam majora, Saturnicolis evenire necesse est, cum ob quinque Lunarum numerum; tum ob mirabiles Annuli aspectus, nocte dieque

iis obversantes. Sed totam eorum Astronomiam, sicut in cæteris fecimus Planetis, exponere oportet.

*Planeticolis
stellas fixas
eodem modo
apparere, ac
nobis,*

Atque hic primum illud annotabimus, quod de omnibus dici poterat, sed hic magis mirandum est, stellas inerrantes è Saturno iisdem planè figuris, eademque luminis diversitate distinctas, atque apud nos spectari: idque ob immanem earum distantiam, de qua postea dicetur. Ad quam nempe illa, quam viginti quinque annis globus à tormento emissus pervaderet, perexigua censenda sit.

Eadem igitur signa Orionis, Ursæ, Leonis, & reliqua, Astronomi illic contemplantur; at non circum eosdem polos ac nobis sese convertentia, sed qui unicuique Planetæ diversas cœli partes obtineant.

*Qualis sit
Planetarum
aspectus, die-
rum ratio in
Saturno.*

Sicut autem Jovis incolis solus Saturnus è primariis Planetis cernitur, ita Saturnicolis solus spectatur Jupiter; qui idem illis est quod nobis Venus, nec nili 37 circiter grad. à Sole recedit. Quantam verò habeant dierum longitudinem, certò cognosci nequit. Sed, ex comitis intimi distantia ac periodo, exque eorum comparatione cum intimo Jovialium, verisimile fit non longiores esse dies illas quam sint in Jove; quas decem horarum esse diximus, aut paulo minus. Sed, cum hæ æqualiter in lucem ac tenebras dividantur, Saturnicolarum insignem inæqualitatem atque etiam majorem quam nos perpetiuntur, majusque etiam æstatis & hyemis discrimen; propter inclinationem axis globi Saturnii ad planum orbitæ suæ, quæ est partium 31; cum noster Terræ axis tantum 23 & dimidiæ obliquitatem habeat. Hæc eadem declinatio in Saturno, Lunas ejus longe evagari facit à Solis via, vel quam pro hac illi habent: atque etiam causa est, cur nunquam Lunas suas pleno orbe lucentes conspiciant; nisi æquinoctiorum tempore; quæ triginta annis nostris bis ibi contingunt. Idem denique axis positus phænomena varia, ac mirabilia, Planetæ ejus incolis præbet; quæ ut intelligi possint, totius Saturni cum Annulo figuram hic rursus describemus: in qua, sicut jam olim definivimus, cum mirum hunc fornicem è tenebris primum erueremus, inter diame-

tros

tros annuli globique ea erit ratio, quæ 9 ad 4. Vacuumque spatium inter utrumque interjectum, eandem quam annulus latitudinem habebit. Crassitudinem autem hujus exiguam esse, observationes comprobant, quæ tamen ratione diametri, non nimia erit, etiamsi sexcenta milliaria Germanica efficere putetur.

Sit igitur secundum hæc Saturni globus cujus poli A, B. TAB. LIV. fig. 2. Annuli diameter G N, obliquè inspecti, ita ut Ellipsin angustiore circumferentia sua referat. Sunt igitur circa polos *Qualis sit Annuli aspectus in Saturno.* utrosque portiones superficiei, arcibus C A D; E B F, 54 partium, definitæ, quas qui incolunt (nisi frigus forsan inhabitabiles reddit) nunquam Annulum conspiciere possint. Ex reliqua omni superficie vident eum annis continuis quatuordecim, mensibus novem: quod est ipsis anni spatium dimidium. Altero dimidio absconditur. Quocirca, qui habitant in zona amplissima inter circulum polarem CD, & TV, æquatori annuloque subjacentem, quandiu superficiem annuli ipsis obversam Sol illuminat, vident media nocte portionem ejus K G L, arcus lucidi forma, qui utrimque ab horizonte exurgit, sed medius interrumpitur umbra globi Saturnii partem G H tegente plerumque ad extremum usque marginem. Post mediam verò noctem umbra eadem paulatim in partem dextram movetur, spectatori in hemisphærio boreo agenti; in sinistram verò, si in opposito versetur. Evanescitque matutino tempore, manente tamen arcus specie, quem tota die cernere possint, sed tenuius lucentem quam nobis Luna nostra interdiu conspicitur. Siquidem sua illis est atmosphæra, sive aër a Sole splendescens, ut probabile esse superius ostendimus. Nam si nihil tale haberent, non aliter interdiu quam noctu & annulum & Lunas suas, stellasque inerrantes lucere viderent. Annuli porro spectaculum, hoc quoque pulchrius esse oportet, quod eum in sese converti, ex maculis quibusdam, aut inæquali splendore animadvertunt. Neque enim ex tanta propinquitate hoc notari non potest, cum vel è Tellure nostra inæqualis claritas, in superficie annuli, appareat; quæ limbo exteriori, quàm

interiore, minor est. Simul autem, dum globi umbra in Annuli partem GH projicitur, etiam annuli umbra obscurat globi partem circa PF , quæ alioqui Solis luce frueretur. Ut proinde semper Zona quædam sit $PYEF$, nunc latior, nunc angustior, cujus incolæ multo tempore conspectu Solis, annulique simul, priventur; qui tunc quoque stellarum partem aliquam illis aufert. Quod certè miraculi instar videri necesse est; intercepto Sole, in profundam noctem incidentibus; nec quid eam efficiat videntibus. Quo tempore Lunarum solo lumine se solantur. Altera anni parte dimidia, cum oppositam annuli superficiem Sol illustrat, eodem modo, luce fruitur hemisphærium TBV , quo prius $TA V$; & hoc vicissim tunc longas illas eclipses patitur. Sola æquinoctiorum sunt tempora, Sole in ipsum productum annuli planum incidente, cum lumine destitutus vix Saturniculis apparere potest; quando nec nostris percipitur dioptris. Tenente nimirum Saturno, ex Sole viso, gradum Virginis, aut Piscium, vicesimum primum cum dimidio; quemadmodum in Saturnio systemate olim exposuimus. Ubi ratio quoque redditur eorum, quos diximus, exortuum Solis super Annuli planum, toto Saturnii anni decursu.

Apposui in schemate hoc, juxta Saturnum, Terræ nostræ, Lunæque globos, servata magnitudinum vera ratione; ut rursus intelligatur, quam exigua sit habitatio nostra, ad Saturni sphaeram annulumque collata; quod continue cogitationi infixum habere expedit. Imaginem vero Saturniæ noctis, geminis annuli lucentis arcubus adversis, & quinque Lunis ornatae, sibi quisque formare ex jam dictis poterit. Et de primi quidem ordinis Planetis, hæc fere erant quæ dicenda habebam.

Supereft ut de Lunis quoque Saturno ac Iovi additis, ac præcipuè de nostra, quæramus, tam quæ ad phænomena astronomica attinent, quam quæ ad ornatum in earum superficie reperiendum, ac præsertim an aliquem esse probabile sit; quod hætenus facere distulimus.

*De Luna
pauciora con-
jici posse.*

Ac videtur quidem, cum tam propinquus nobis sit Lunæ glo-

Fig. 1.






Fig. 2





globus; telescopioque utentibus multa particularim conspicienda præbeat; plura quoque ac probabiliora de universa natura ejus, quàm de Planetarum cæterorum conjici posse, tanto quippe remotiorum. Sed contra evenit ut vix quidquam de Lunæ rebus dicendum reperiam, nimirum quia ejus generis Planetam nullum coram intueri contigit; cum in primariis illis aliter hoc sese habeat. Sunt enim, ut jam satis constat, generis ejusdem ac Tellus nostra, in qua, quid rerum geratur, quidve exstet, propè intuemur, eoque de cæteris similia quædam conjectandi ratio suppetit.

Illud vero sine omni dubitatione statuere possumus, ejusdem naturæ, ac Luna nostra, esse illas, quæ Jovem ac Saturnum comitari dictæ sunt, siquidem eodem prorsus modo primarios hosce Planetas circummeunt, simulque cum illis circum Solem feruntur, perinde ac cum Tellure Luna. Sed & aliam utrobique similitudinem intercedere postea videbimus. Quamobrem si quid de Lunæ statu conjicere possimus, (possumus autem pauca admodum) idem in quatuor illis circa Jovem, & in quinque Saturniis haud multo aliter se habere putandum erit. Illud semper menti infixum tenendo, non esse illas viliores aut minorem ornatu excultas.

Illud igitur in Luna nostra apparet, etiam minoribus per-
spicillis trium quatuorve pedum longitudine, plurimis montium tractibus, rursusque planis vallibus latissimis, superficiem ejus divisam esse. Cernuntur enim montium umbræ ea parte quam a Sole averfam habent; ac frequenter jugo in circulum fere composito inclusæ valles quædam minores animadvertuntur; quarum medio monticuli, unus pluresve rursus eminent. Ex qua vallium rotunditate argumentum sumebat Keplerus, Lunicularum, cum ratione operantium, immensas has esse molitiones. Sed hoc incredibile prorsus, tum ob nimiam earum magnitudinem; tum quod facile naturalibus causis cavitates ejusmodi orbiculares formari possint. Marium vero similitudinem illic nullam, (etsi & ille, & alii plerique omnes contra sentiunt) reperio. Nam regiones planæ ingentes, quæ montosis multo obscuriores sunt; quasque

Satellitum Saturni & Jovis eandem ac Luna rationem esse.

Lunam montibus & vallibus distinctam esse.

Carere verè mari.

que vulgo pro maribus haberi video, & oceanorum nomini-
bus insigniri; in his ipsis, longiori telescopio inspectis, ca-
vitates exiguas inesse comperio rotundas, umbris intus ca-
dentibus; quod maris superficiei convenire nequit: tum ipsi
campi illi latiores non prorsus æquabilem superficiem præfe-
runt, cum diligentius eas intuemur. Quocirca maria esse
non possunt, sed materia constare debent minus candicante,
Fluviis, quàm quæ est in partibus asperioribus: in quibus rursus quæ-
dam vividiori lumine cæteris præcellunt. Nulli quoque flu-
vii in Luna inesse videntur. Non enim effugerent aciem
Nubibus, perspicillorum nostrorum; saltem si inter montes aut ripas
præaltas, ut nostri plerique, laberentur. Sed neque nubes
ullæ sunt unde pluvix generentur ad suppeditandum fluviis
humorem. Si enim essent, videremus eas nunc has nunc il-
las Lunæ regiones obtegere, ac visui nostro subducere, quod
nequaquam contigit, sed perpetua apparet serenitas.

*Aëre &
aqua.*

Porro nec aëre aut atmosphæra Lunam cingi, qualis cir-
cum Tellurem hanc ambit, manifestum est. Quia si qua ta-
lis existeret, non posset extrema Lunæ ora tam præcise cir-
cumscripta spectari, quam subeunte stella aliqua sæpe ani-
madversa est; sed evanida quadam luce, ac velut lanugine
finiretur, ut omittam vapores atmosphære nostræ maximam
partem ex aquæ particulis constare; ac proinde, ubi nulla
sunt maria aut fluvii, non esse unde eorum copia sursum e-
ducatur. Hæc igitur insignis differentia quæ Lunam inter
Terramque nostram reperitur, omnem fere aditum conje-
cturis obstruit. Nam si maria amnesque inesse cernerentur,
haud leve argumentum esset cæterum quoque Terræ ornatum
ei convenire, veramque adeo esse Xenophanis opinionem,
qui habitari in Luna dicebat, eamque Terram esse multarum
urbium & montium. Nunc vero in solo arido, & omnis
aquæ experte, non videntur neque herbæ, neque animantia
existare posse, cum omnibus istis humor materiam & alimen-
ta præstare debeat.

*Hinc de ani-
mantibus &
serpibus in-*

Anne igitur credendum, tantæ magnitudinis globum in
hoc conditum esse ut noctu nobis lucem tenuem largiatur,
aut

aut æstus maris cieat? Nemo erit qui pulcherrimo inde spectaculo fruatur Telluris nostræ in se revolutæ, & nunc cum Europa Africam, nunc Asiam, nunc Americam ostentantis; nunc plene, nunc dimidio orbe lucentis? Omnes item quæ Jovem ac Saturnum circumstant Lunæ, æquè inutiles vacuæque ferentur? Non habeo equidem quod dicam, cum nulla ab re simili conjectura suppetat. Magis tamen probabile videtur ob corporum præstantiam, aliquid in superficie eorum geri, aliquid crescere ac vivere, qualecunque tandem id sit, & quantumlibet à rebus nostris diversum. Posset forsan stirpium animaliumque ibi vitam aliud quid, aquæ nostræ dissimile, sustentare. Posset exiguus humor in terra, non æque ac nostra, aquam combibente, sufficere radiis Solis, unde rorem educerent, alendis herbis arboribusque idoneum. Quod idem Plutarcho in mentem venisse video in eo qui de Facie in orbe Lunæ est dialogo. Nam neque apud nos, nisi summa maris superficie, ac tenui veluti pellicula opus esset, ad humorem terris, satisque suppeditandum, quem Solis vis elicuisset, quique in rorem tantum, non vero in nubes condensaretur. Sed hæc admodum leves sunt conjecturæ aut suspensiones potius, nec aliud habemus ex quo de Lunæ nostræ, atque etiam reliquarum natura aliquid colligamus. Omnium enim, uti diximus, eadem putanda est; idque præter adductam superius rationem, etiam hac alia confirmatur, quod sicuti Luna nostra eandem perpetuò faciem ad nos obversam habet, ita & illæ Joviales ac Saturniæ ad suos Planetas primarios. Mirum videatur hoc sciri potuisse; at non erat difficilis conjectura, postquam, ut paulo ante dixi, animadvertum fuit extremam Saturniarum tunc solum conspici, cum Planetæ huic ad occidentem posita est; ab oriente vero semper eam latere. Facile enim perspicitur id inde evenire, quod magna sui parte obscuriorem superficiem habeat hæc Luna; quæ pars obscurior cum ad nos conversa est, tunc cerni nequeat præ luminis tenuitate. Cumque semper in orbitæ suæ latere quod orientem spectat obscurata reperitur, in altero nunquam, manifestum indicium est eandem

*certiorem
conjecturam
esse.*

Jovis ac Saturni Lunas, non secus ac nostram Telluri, eandem partem suo Planetæ obvertere.

globuli regionem semper Saturnum respicere, quoniam ex eo illud contingere necesse est. Quis vero jam dubitet, cum & illius omnium remotissimæ & nostræ Lunæ facies semper eadem ex primario Planeta suo spectetur, quin idem in cæteris, quæ circa Jovem ac Saturnum volvuntur, natura effecerit? Causa vero quare id fiat vix aliunde peti potest, quam quod densior ponderosiorque materia sit Lunarum omnium parte ea, quâ semper à Planetis suis averſæ sunt. Sic enim ea ipsa pars majore vi à centro circuitus recedere contendet: cum alioqui, ex motus legibus, eadem semper facies non ad Planetam, sed ad fixas stellas easdem, continue obverti debuerit.

*Luna incolis
si qui sint,
qualis appa-
ritura sit ca-
lorum consti-
tutio, die-
rum ratio,
&c.*

Porro ex hoc positu Lunarum ad Planetas suos mira quædam spectacula evenire necesse est eas habitantibus, qui an sint aliqui, ut jam apparuit, multo incertissimum est; sed quasi essent ponantur. Satis erit autem de nostræ Lunæ indigenis dixisse. His igitur sic in duo hemisphæria globus ejus dividitur, ut qui alterum incolunt, semper Telluris nostræ conspectu fruantur, qui reliquum, semper eo careant. Nisi quod quidam, circa confinia utriusque agentes, amittant eum per vices ac recuperent. Cernunt autem Gæoscopi illi Tellurem in æthere pendentem multo majorem quam quanta nobis Luna apparet, quippe ferè quadruplo ampliore diametro. Sed illud mirabile, quod nocte dieque eodem cœli loco velut immobilem perpetuo hæere vident; alii recta supra caput defixam, alii certa altitudine ab horizonte distantem, quidam & in ipso horizonte sitam: atque interea convertentem se circum axem suum, regionesque quas continet universas deinceps ostendentem horarum viginti quatuor spatium, atque eas quoque proinde (quod utinam videre liceret) quæ ad utrumque polum nobis incolis adhuc incognitæ manent. Præterea & lumine crescentem eam vident & immutatam menstrua periodo, atque ita per vices plenam, dimidiatam, inque cornua tenuatam, eadem formarum varietate quam Lunæ globus nobis exhibet. Sed lucem à Tellure nostra accipiunt quindecuplo majorem quam nos ab illa. Adeo
ut,

ut, in hæmisphærio meliore, ad nos obverso noctes insigniter claras habeant; nec tamen cum claritate illa ullus ad eos calor manare potest, etsi hoc aliter Keplero visum est. Sol verò semel illis oritur singulis mensibus nostris, semelque occidit, atque ita dies noctesque, quindecuplo quam nos longiores habent, at inter se æquales perpetuo æquinoctio. Qua dierum longitudine, quandoquidem non amplius ab illis quam à nobis Sol abest, necesse esset eos, quibus altè supra horizontem ascendit, æstu incommodo torreri, si corpora eorum perinde ac nostra afficiantur. Ascendit autem maximè iis qui circa confinia hemisphæriorum, quæ diximus, incolunt, qui vero inde procul distant, ac circa regiones habitant polis Lunæ suppositas, non magis ob longos istos dies calebunt, quam qui circa Islandiam aut novam Zemblam æstivo tempore cetos piscantur; qui persæpe frigora ingentia, ipsius solstitii tempore, ac trium licet mensium diebus, experiuntur. Sunt autem poli Lunæ, quos circum stellæ fixæ converti cernuntur in ea habitantibus, nequaquam iidem qui nobis, neque etiam cum Eclipticæ polis conveniunt, sed his circumferuntur, quinque gradibus semper distantes, idque periodo annorum novendecim. Anni autem spatium idem illic quod nobis; quod motu fixarum metiuntur ac reversione earum ad Solem. Idque iis perfacile est, cum diei tempore, non minus quam noctu, stellas conspiciunt, nihil impediante Solis claritate; quoniam, ut supra ostensum est, nullam vaporum sphæram habent; sine qua & nos interdum cælum sideribus plenum aspiceremus. Nec vero nubes quæ ullæ unquam obstant observantibus, adeo ut cursus Planetarum melius quàm nos investigare possint; sed tamen difficilior multò verum systema reperire. Quoniam incipientibus stare Terra sua videri debuit, in quo eos longius quàm nos error abduxit.

Hæc omnia vero ad Jovis & Saturni Lunas referuntur, quibus idem quod nobis Tellus est, sui sunt primarii Planetæ. Singula autem diei noctisque spatia simul sumpta, cuiusque Lunæ periodus metitur, quas supra annotavimus. *Quod ad Jovis & Saturni Lunas facile transferre est.*

Quo fit ut Saturni quintam incolentibus, cujus periodus dierum nostrorum erat 80, eveniant sui dies noctesque nostris quadraginta æquales. Iisdem vero, propter Saturni revolutionem tricennalem, fiunt æstates hyemesque singulæ annorum nostrorum quindecim. Itaque tum propter tam longa frigora, tamque longos somnos vigiliæque; etiamsi nil aliud esset, plane aliam quam apud nos vitam illic fore manifestum est.

Explicuimus igitur hætenus, quæ ad Planetas primarios secundariosque Solem circundantes spectant. Hinc vero priusquam ad Solem ipsum & stellas fixas, tertium nempe genus coelestium corporum, pergamus, operæ pretium videtur, ut magnitudinem, ac magnificentiam totius Solaris mundi, aliqua ratione, atque evidentius quam hætenus factum sit, exprimamus. Quod quidem schemate in foliis hifce descripto haudquaquam possumus, propter parvitatem corporum Planetariorum ad vastissimas orbitas suas collatorum. Sed verbis supplebitur quod descriptione perfici nequit. Itaque repetitâ figurâ quam superioris libri initio posuimus, cogitetur ei similis ac proportionem respondens, sed quæ descripta sit in amplissima politissimaque areæ cujusdam planitie, cujus extremus circulus, Saturni orbem referens, trecentos sexaginta pedes semidiametro contineat. In cujus deinde circumferentia globus Saturni cum suo ponatur Anulo, quantus in figura altera cernitur, ubi Solis & Planetarum sunt corpora. Cæterique similiter globi in sua quifque orbita collocentur; inque medio omnium Sol qua magnitudine ibi designatur, quatuor nempe pollicum diametro. Ita Telluris circuitus, quem *magnum orbem* vocant Astro-nomi, semidiametrum sortietur pedum triginta & sex. In quo Tellus ipsa milii grano non major circumferri cogitanda est; eique comes Luna, vix punctum visibile superans, in circello paulo plus quam duos pollices lato; velut in adscripto hic diagrammate. In quo linea A B circumferentiæ partem refert ejus, quam diximus, Telluris orbitæ, cujus triginta & sex pedes continet semidiameter. In ea Tellus est

TAB. LIV.
fig. 1.
*Solaris mundi secundum
veram proportionem
descriptio.*

TAB. LV.
fig. 1.

TAB. LV.
fig. 2.

cir-

circellus C: Lunæ vero circum eam via, circulus DE; in quo Lunæ corpusculum quale ad D expressum est.

Saturniarum vero Lunarum exterior in circulo feretur cujus semidiameter pollicum 29. Jovialium item exterior in minore aliquanto, cujus semid. poll. 19 $\frac{1}{4}$.

Sic demum habebitur germanus & omni proportionem perfectus solaris Regiæ typus, in quo jam Tellus duodecim mille diametris suis à Sole aberit. Cujus spatii amplitudo si miliarium numero designanda sit, plus quam septemdecim miliones, ut vocant, miliarium Germanicorum comprehendet. Sed melius fortasse hanc vastitatem animo concipiemus, si motus cujusdam celeritate eam metiamur; Hesiodi Poëtæ exemplo; qui altitudinem cœli, & Tartari profunditatem æquis spatiis definiens, novem dierum noctiumque lapsu, ferream incudem è cœlo dimissam, ad terram decimâ pervenire scripsit; ac tanto quoque tempore è Terræ superficie cadentem ad Tartara ferri. Nos vero non incudis lapsum sed continuam potius celeritatem globi ex majore tormento emissi huc adhibebimus; quem singulis horæ secundis scrupulis, sive arteriæ pulsibus, centum circiter hexapedas conficere experimentis compertum est, quæ in Balisticis Mersennus commemorat; cum sonus eo tempore ad centenas octogenas extendatur.

Ajo igitur, si ex Terra ad Solem tanta illa celeritate globus continuè feratur, fere annos 25 esse insumpturum antequam iter hoc peragat. Ut proinde à Jove ad Solem 125 annis opus habeat, à Saturno 250. Et hic quidem calculus ex mensura Terræ diametri pendet, qui ex probatioribus Galilæorum observationibus est hexapedarum Parisiensium 6538594. cum gradus unus circuli maximi efficiat hexapedas 57060. Quanta itaque sint istorum orbium spatia, quamque exilis, eorum respectu, Telluris globulus, in quo tam multa homines molimur, tantum navigamus, tot bella gerimus, ex his intelligitur. Quod utinam discant cogitentque Reges & Monarchæ nostri; ut sciant quantilla in re laborent cum de angulo aliquo terræ occupando totis viribus, magno multorum

*Immensitas
intervallo-
rum inter So-
lem & Pla-
netas, illu-
stratur com-
paratione
cum motu
globi è tor-
mento emissi.*

malo, contendunt. Sed ad nostra revertamur, ac de Sole videamus, cujus jam simul ad Planetas & eorum orbitas magnitudinem ampla illa descriptio, quam exposuimus, demonstrat.

*In Sole
omnem con-
jecturam de-
ficere.*



In hoc igitur ipso Sole non improbabile quibusdam visum est animalia vivere posse. Sed cum multo magis etiam, quam in Lunis, conjectura omnis hic deficiat, nescio qua ratione id ita esse opinati sint. Non enim adhuc planè compertum est, utrum dura an liquida sit vasti illius globi materies; etsi propter lucis naturam, quam aliàs explicui, magis verisimile sit liquidam esse; quod etiam perfecta rotunditas ejus, lumenque per totam superficiem æqualiter diffusum suadere videtur. Nam exigua quædam in disci circumferentia apparens inæqualitas, quæ telescopiis, nec tamen semper, cernitur, & ex qua miros *undarum fluctus, flammarumque eructationes*, nonnulli sibi fingunt, nihil aliud est quàm vaporum prope Terram nostram tremula agitatio, quæ & stellas noctu


*Faculas So-
lares incertas
videri.*

scintillare facit. Neque ego faculas illas, quas unà cum maculis fere omnes celebrant, unquam videre potui, etsi has sæpius spectaverim; ac valde dubito an aliquid in Sole, ipso Sole lucidius appareat. Invenio enim, fideliores observationes consulens, non nisi in nubeculis illis subfuscis, quæ maculas plerumque circundant, aliquando solæ feruntur, puncta quædam clariora interdum notari, quæ non mirum esset, propter obscuritatis illius viciniam, splendidiora quam sint videri. Summum quidem in Sole calorem, fervoremque esse, certo credendum est, in quo nihil omnino nostrorum corporum simile vivere possit, aut momento superesse.

*Propter calo-
rem nulla il-
lic vivere
copora nostris
similia.*

Itaque aliud genus viventium animo concipiendum esset, longeque ab omni natura eorum quæ unquam vidimus, aut cogitavimus, diversum. Quod fere idem est ac si dicamus nihil hic conjectando nos consequi posse. Est quidem tam præstans, tantæque molis corpus haud dubiè maxima ratione, ac propter insignem usum aliquem creatum. Sed an non apparet jam abunde utilitas ejus in mirabili illa lucis calorisque in totum Planetarum circumstantium chorum effu-
si-





sione; ex qua universo animantium generi non vita solum constat, sed & jucunda ut sit efficitur? Idque non in exiguis solum, qualis Tellus nostra, sed & in tanto majoribus Jovis & Saturni globis, quorum non est contemptibilis ad Solem collata magnitudo. Hæc quidem tanta sunt ut nihil mirum sit eorum gratia duntaxat Solem esse conditum. Nam quod Keplerus opinabatur, aliud quoque illi delegatum esse munus, ut nempe omnium circum ambientium Planetarum motus in suis orbibus incitaret, propria sua circa axem conversione, quod in Epitome systematis Copernicei multis comprobare conatur, non possum assentiri, propter ea quæ in sequentibus dicentur.

Solem ex stellis inerrantibus unam esse, ante Telescopii inventionem, adversari videbatur Copernici sententiæ; quia cum stellæ, quæ dicuntur primæ magnitudinis, censerentur trium scrupulorum diametro, essentque secundum Copernicum tam procul remotæ, ut totus ille Orbis magnus, quo Terra defertur, velut puncti instar esset ad sphæram affixarum comparatus; quandoquidem toto anni tempore, etsi locum Terra mutaret, nihil mutari cernerentur stellarum distantia; sequeretur singulas earum, quæ cæteris clariores apparent, majores esse toto illo magni orbis ambitu: quod absurdum erat. Atque hoc, ut palmarium contra Copernici doctrinam argumentum, Tycho Braheus objectabat. Sed postquam radios stellarum nudo visu apparentes, Telescopia sustulerunt; (quod ita optimè faciunt, si lens oculo proxima flammæ afflatu obscuretur) atque ita haud aliter eas ac puncta lucentia spectandas præbuerunt; prorsus sublata quoque est ea difficultas, nec quidquam jam impedit quominus stellæ istæ pro totidem Solibus habeantur. Idque eo probabilius redditur, quod constet propria luce sua eas lucere: tanta enim est distantia, ut à Sole illam mutuari nequaquam possint. Singulas vero Sole minores non esse nihil credi vetat, cum ex tam immenso intervallo tam vividum lumen fundant. Hanc itaque sententiam nunc passim tenent qui Copernici systema amplectuntur. Qui recte quoque hoc

*Stellas fixas
totidem esse
Soles.*

*Eas spargi
per vasta cali*

sta.

*spatia, &
alias ab aliis,
ut proximas
à Sole remo-
veri.*

statuunt, non in una eademque superficie hæere stellas istas; tum quod nulla ratio hoc suadeat, tum quod in eandem sphæram Sol, qui earum una est, referri nequeat. Itaque veriùs esse spargi eas per vasta cœli spatia, quantumque à Terra aut Sole ad proximas interjacet, tantum circiter ab his esse ad sequentes, atque inde rursus ad alias, continuo progressu.

*Nec Solem
præ cæteris
eminere con-
tra Keple-
rum notatur.*

Scio etiam hic aliud sentire Keplerum, in ea, quam diximus, Epitome. Quamquam enim existimet tota cœli profunditate stellas disseminatas esse, vult tamèn Solem hunc nostrum multo amplius spatium circa se habere, quasi sphæram vacuum, supra quam confertius stellis cœlum incipiat. Putabat enim alioqui futurum ut paucae tantum stellæ numerarentur nobis, cæque summa magnitudinis diversitate: *nam cum omnium maximæ tam appareant parvæ, ut vix instrumentis possint notari aut mensurari, consequens esse ut quæ duplo aut triplo Sc. distarent longius, duplo & triplo appareant minores, positis æqualibus ipsis veris magnitudinibus; citoque veniatur ad eas quæ penitus fiant insensibiles: atque ita paucissimas visum iri stellas, easque in maxima differentia; cum contra amplius quam mille observentur, nec magnitudine ita multum diversæ.* Sed ex his nequaquam id quod ille intendit evincitur; ac præcipue in eo deceptus fuit, quod non advertit ignium, & flammæ eam esse naturam, ut ex maximis intervallis cerni possint, iisque unde alia corpora, æque exiguis angulis comprehensa, prorsus evanescant. Quod vel lucernæ comprobant, quæ per urbium nostrarum vicos noctu incenduntur. Quæ cum ad centenos pedes inter se distent, tamen earum viginti & plures, in continua serie magis magisque remotas, numerare licet, etsi vicesimæ flammula vix 6 secundorum scrupulorum angulo conspiciatur. Idem vero multo magis fieri necesse est in eximia illa stellarum luce; adeo ut nihil mirum sit, ad mille aut duo millia earum, oculis notari posse; Telescopiis vero adhibitis, etiam vigecuplo plures deprehendi. Sed suberat ratio, cur Keplerus Solem præ reliquis stellis præcipuum

puum quid habere cuperet; circumque eum esse unicum, in Natura, Planetarum systema, idque mundi medio situm. Hisce nimirum opus habebat ad confirmandum mysterium Cosmographicum suum, quo certis quibusdam proportionibus respondere volebat Planetarum à Sole distantias diametris sphaerarum, quæ corporibus polyedris Euclideanis inscribuntur & circumscribuntur singulis. Quod tum demum verisimile videri poterat, si in mundo universo unus tantum esset circa Solem aberrantium siderum chorus, adeoque & Sol ipse solus sui generis.

Sed mysterium illud totum, si bene perpendatur, somnium quoddam ex Pythagoræ aut Platonis Philosophia enatum esse apparet. Nec proportionibus satis quadrant, ut ipse quoque auctor agnoscit; sed, cur hoc ita sit, alias causas plane frivolas comminiscitur. Idem levioribus etiam argumentis probat extremam mundi superficiem, stellas omnes continentem, sphaericæ esse figuræ; ac numerum præterea earum necessario esse finitum, ex eo quod singularum finita sit magnitudo. Illud vero vanissimum, quod à Sole, ad superficiem cavam sphaeræ fixarum, definit spatium sexies centena millia Terræ diametrorum. Quoniam scilicet, sicut Solis diameter ad diametrum Orbitæ Saturni, quos inter se esse statuit ut 1 ad 2000; ita sit hic diameter ad illum sphaeræ fixarum interioris, quod nulla ratione nititur. Atque hæc quidem Viro summi ingenii, magnoque Astronomiæ instauratori excidisse mirum est. Nos vero unâ cum præcipuis nostræ ætatis Philosophis, ne dubitemus eandem stellarum earum & Solis naturam existimare. Ex quo jam mundi idea multo major nascitur, quam quæ ex hæc-

Nihil impedire, quo minus credamus circa unamquamque ex fixis, ut circa Solem, esse Planetas.

nus traditis percipiebatur. Quid enim nunc prohibet, quin unamquamque ex stellis hisce, sive Solibus, haud aliter ac Sol noster, circum se Planetas habere putemus, quæ rursus suis Lunis stipatæ sint? Imo hoc ita se habere, manifesta ecce ratio suadet. Etenim si cogitatione in cœli regionibus nos ponamus, non minus à Sole, quàm fixis stellis, remotos; nihil quicquam discriminis hæc inter atque illum tunc effemus animadversuri. Longè enim abest ut corpora Pla-

netarum, Solem ambientium, conspecturi simus, vel ob tenuissimam eorum lucem, vel quod univertæ, quibus feruntur, orbitæ in unum idemque lucidum punctum cum Sole confunderentur. Hic igitur positi, merito eandem omnium stellarum rationem naturamque esse existimaremus; & ex una, propius inspecta, de cæteris quoque judicari posse nihil ambigeremus. At nunc Dei benignitate, ad unam ex ipsis, Solem videlicet nostrum, admoti sumus, ac tam prope accessimus, ut circum eam sex minores globos converti cernamus; & circa horum quoddam, alios obire secundarios. Cur itaque non eo iudicio nunc utamur; ac prorsus verisimile putemus non solam hanc stellam tali comitatu cingi, aut aliqua in re cæteris præminere? Neque etiam solam circum axem suum converti; sed potius cæteras omnes eadem hæc similia habere? Ergo hac ratione etiam cuncta illa quæ in Planetis circumsolaribus inesse, ad Terræ nostræ similitudinem differuimus, consentaneum erit, ut ad innumeros Planetas alios, tot mille Solibus additos, æquè pertinere credamus. Eruntque & illic stirpes & animalia, atque etiam ratione instructa, quæ cœli convexa mirentur, & sidera observent, motusque eorum intelligant; atque omnia denique habeant, sine quibus neque hæc haberi posse supra ostendimus.

Quam mirabilis igitur quamque stupenda mundi amplitudo & magnificentia jam mente concipienda est. Tot Soles, tot Terræ, atque harum unaquæque tot herbis, arboribus, animalibus, tot maribus, montibusque exornata. Et erit etiam unde augeatur admiratio, si quis ea, quæ de fixarum stellarum distantia & multitudine hisce addimus, perpenderit.

Tantam igitur esse distantiam hanc, ut quæ Solem Terramque interjacet, Terræque diametrorum duodecim milliâ continet, ei comparata, exilis plane habenda sit, non una ratione constat: atque hac inter cæteras, quod si proximæ quædam inter se stellæ notentur, quæ claritate plurimum differunt; velut in media caudæ, (quæ duplex est) Ursæ

ma-

majoris; nulla apparentis intervalli earum mutatio animadvertitur, quocunque anni tempore spectatarum; quod tamen fieri necesse esset, propter diversas visus positiones per annui Orbis ambitum, orireturque parallaxis aliqua si, ut consentaneum est, propior sit stella quæ lucidior apparet. Qui autem ante nos definiendi tam vasti spatii rationem inierunt, nihil certi comprehendere potuerunt, propter nimiam observationum necessariarum subtilitatem, quæque omnem diligentiam superet. Itaque mihi unica hæc via superesse visa est, quam nunc insistam, qua saltem verisimile quid in re tam exploratu ardua consequamur. Cum ergo stellæ ut jam diximus, totidem sint Soles; si earum aliquam Soli æqualem esse sumamus, erit illius tanto major quam Solis distantia, quanto apparens diameter diametro Solis minor erit. Sed tam exiguæ apparent stellæ, etiam quæ primæ sunt magnitudinis, atque etiam Telescopio spectatæ, ut veluti puncta lucentia sine visibili latitudine refulgeant. Quo fit ut ejusmodi observationibus nulla earum mensura deprehendi possit. Cum itaque hac non succederet, tentavi quâ ratione Solis diametrum ita imminuere possem ut non majorem lucem quam Sirius, aut aliud è clarioribus sideribus, ad oculum mitteret. Ergo oclusi rursus, ut supra, tubi duodecimpedalis vacui aperturam alteram lamella tenuissima, cujus medio tam exiguum effeci foramen, ut Lineæ partem duodecimam non superaret, sive pollicis centesimam quadragesimam quartam. Hunc tubum ea parte ad Solem obverti; altera oculo admovi; qui tunc particulam Solis cernebat, cujus diameter, ad totius diametrum, erat ut 1 ad 182. Sed eam particulam multo clariorem comperiebam, quàm noctu Sirius apparet. Itaque cum longè magis arctandum Solis diametrum viderem, id ita effeci, ut, in perforata ejusmodi lamina, vitreum globulum objicerem minutissimum, pari circiter diametro ac prius illud foramen habebat; quo globulo ad microscopia antehac usus fueram. Ita per tubum in Solem intuenti, cōtecto undique capite, ne quid diei lux turbaret, non minor ejus claritas quam Sirii videbatur.

Modus probabiliter investigandi distantiam fixarum à Sole.

Atqui, ex Dioptrices legibus instituto calculo, fiebat jam Solis diameter $\frac{1}{172}$ ejus particulæ centesimæ octogesimæ secundæ, quam, per foramen exiguum, prius conspexeram. Ductis autem in se $\frac{1}{172}$ & $\frac{1}{172}$, fit $\frac{1}{27664}$. Ergo eousque contracto Sole, vel eousque remoto, (erit enim effectus idem) ut diameter ejus sit $\frac{1}{27664}$ ejus, quem in coelo intuemur, superest illi lux quæ Sirii luci non cedat. Solis vero eousque remoti distantia erit necessario, ad eam quam nunc habet, ut 27664 ad 1: & diameter paulum excedet 4. scr. tertia. Itaque cum æqualis ei Sirius ponatur, sequitur Sirii quoque diametrum totidem esse ejusmodi scrupulorum; distantiamque itidem, ad eam qua à Sole absumus, ut 27664 ad 1. Quod quàm incredibile sit intervallum, apparebit eadem ratione, quam in æstimandâ Solis distantia adhibuimus. Nam si 25. annis opus habebat tormenti bellici globus, continua velocitate, quanta exploditur, incedens, ut à Terra ad Solem perveniret; jam numerus 27664. vicies quinquies du-cendus est, atque ita fiunt 691600, adeo ut penè septingenta annorum millia insumpturus sit globus, in tanta celeritate sua, priusquam ad proximas stellarum inerrantium perveniat. Atque ad has stellas serena nocte oculos circumferentes, quantum horum judicio comprehendere possumus, vix aliquot milliaribus supra verticem eas exstare putamus. Quæsi-
sivi vero de proximis tantum. Cæteræ enim cum, ut jam diximus, iis spatiis in ulteriora cœli recedant, ut non minora sint deinceps à propioribus ad sequentes, quàm à Sole ad istas, quanta immensitas superest! Si enim plures quàm mille, nudo visu notantur; telescopiis verò decuplo aut vigecuplo amplius; quomodo sciri potest aut definiiri, quanta sit multitudo ulteriorum, quas neque hoc auxilio attingere licet: aut quis numerus nimis magnus dicendus est, si ad Dei potentiam spectemus? Etenim, sæpe hæc cogitanti mihi, in mentem venit, tantum in primis numerorum exordiis calculos omnes nostros versari. Esse enim in serie eorum infinita, qui non tantum viginti aut triginta, aut centum, aut mille notis scribantur in progressionem nostram denaria; sed qui

qui tot characteribus constent, quot arenæ grana in tota Telluris mole containerentur. Quis verò dicere audeat tali numero non majorem esse multitudinem stellarum inerrantium? Nam longè ulterius progressi sunt, qui infinitam esse dixerunt; ut Veterum aliqui, atque etiam Jordanus Brunus; qui pluribus argumentis hoc se evicisse putat, sed, ut mihi videtur, parum firmis. Nec tamen contrarium quoque perspicuis rationibus probari posse existimo. Illud constat, spatium naturæ universæ infinitè undique protendi; at nihil obstat, quin, ultra definitam stellarum regionem, res alias innumeras Deus effecerit, à cogitationibus nostris, æque, ac sedibus, remotas.

Quid si verò nec innumeras quidem condidit, sed ultra eas vacuum reliquit infinitum; ut totum illud, quod exstare voluit, veluti nihil sit præ iis quæ producere ejus omnipotentia potuisset? Sed ulteriorem horum inquisitionem, totamque illam de infinito difficillimam disputationem persequi omitto, ne ad tot maximarum rerum comprehensionem, qua jam defuncti sumus, novus labor accedat. Ea tantum hic subjungam, ex quibus, quænam sit nostra de toto mundi spatio opinio, cognoscatur; quatenus nempe Solibus seu stellis inerrantibus patet, quibus sua circumponi planetaria systemata, probabile esse antea ostendimus.

Existimo itaque unumquemque Solem circumdari vortice quodam materiæ celeriter motæ, sed qui multum dissimiles sint Cartesianis illis, tum spatii ratione, tum motus genere, quo in illis materia agitur. Ea enim apud Cartesium est vorticum amplitudo, ut quisque eorum alios se circumfidentes contingat, occurrens singulis plana superficie, veluti cum in aqua sapone imbuta bullarum cumulos pueri inflant: moveri verò universam cujusque materiam statuit, in partem eandem, rotando. At hunc motum non parum impediri oporteret, propter angulosam vorticum superficiem. Deinde cum sit ejusmodi, ut, velut circa axem cylindri, materia tota feratur, exoritur ei postea non exigua difficultas, cum globosam Solis formam ex hoc motu deducere conatur: fru-

*Unumquemque
que Solem
vortice cingi,
sed Cartesianis
multum
dissimili;
contra quem
pluribus
disputatur.*

stra prorsus, atque iis rationibus, quæ incautis aliquid esse videantur, cum re ipsa nihil explicant. Vult præterea innatare, ac circumferri cum hac materia ætherea, Planetas; atque ea ratione videlicet in suis orbibus eas retineri, quod non majore vi, quam ipsamet, à centro motus recedere conentur. Sed hic ex Astronomicis complura objiciuntur, de quibus aliqua attigimus in diatriba de causis gravitatis. Ubi & aliam rationem exposuimus, quæ Planetas intra orbium suorum limites contineret. Ea est gravitas eorum Solem versus; quæ unde exoriatur ostendimus, quamque eo magis miror Cartesium prætermississe, quod de gravitate, qua corpora in Terram feruntur, primus solito meliora adferre cœpisset. Refert Plutarchus in libro supra memorato de Facie in orbe Lunæ, fuisse jam olim qui putaret ideo manere Lunam in Orbe suo, quod vis recedendi à Terra, ob motum circularem, inhiberetur pari vi gravitatis, qua ad Terram accedere conaretur. Idemque ævo nostro, non de Luna tantum, sed & Planetis cæteris statuit Alphonsus Borrellus; ut nempe Primariis eorum gravitas esset Solem versus; Lunis vero ad Terram, Jovem, ac Saturnum, quos comitantur. Multoque diligentius subtiliusque idem nuper explicuit Isaacus Newtonus, & quomodo ex his causis nascantur Planetarum orbes Elliptici, quos Keplerus excogitaverat; in quorum foco altero Sol ponitur. Oportet autem, secundum nostram de natura gravium sententiam, quò Planetæ ad Solem suo pondere inclinent, vorticem turbinemve materiæ cœlestis circa eum converti non totum in easdem partes, sed ita ut variis motibus, iisque celerrimis in omne latus secundum diversas sui portiones rapiatur, nec tamen dilabi possit, propter circumstantem ætherem, qui non tali nec tam celeri motu agitur. Hujusmodi vortice gravitatem corporum in Terram, ejusque effectus omnes explicare conati sumus, in ea, cujus meminimus, diatriba. Eademque, ut puto, est ratio gravitatis Planetarum Solem versus; & ex his quoque tam Terræ

no-


nostræ, quàm cæterarum, atque etiam Solis, rotunditas consequitur; quæ in Cartesiana hypothese tantum habet incommodi.

Porro & spatia horum vorticum, ut dixi, multo quam ille contractiora pono. Sic enim fere eos statuo in vasta cœli profunditate dispersos, quemadmodum turbines aquæ exiguos, hinc inde in spatioso lacu stagnare, baculi agitatione, excitatos, ac magnis intervallis totisque stadiis distantes. Et sicuti horum motus nequaquam ab unis ad alios perveniunt, nec proinde sese mutuo impediunt; ita quoque cœlestium vorticum motus, circum astra aut Soles, se habere existimo.

Itaque neque alii alios destruere possunt aut absorbere, quemadmodum finxit Cartesius, cum ostendere vellet quomodo stella aut Sol aliquis vertatur in Planetam. Apparet autem, cum hæc scriberet, non attendisse eum ad immensam stellarum inter se distantiam; idque vel ex hoc uno, quod, cum primum Cometes aliquis intra vorticem nostrum, cujus centrum Sol occupat, descendit; vult eum nobis visibilem fieri, quod est absurdissimum. Quomodo enim, sidus ejusmodi, quod ex Solis lumine repercussio tantummodo splendet; ut cum plerisque Philosophis ipse statuit; quomodo, inquam, posset conspici à tanto intervallo, quod saltem decies millies contineret illud quod à Terra ad Solem est. Non enim ignorare poterat vastissimum, circa Solem undique extensum, spatium; cum sciret in Copernici systemate orbem magnum, hoc est, orbitam Terræ, velut punctum esse cum illo comparatum. Sed tota hæc de Cometarum, atque etiam de Planetarum, & mundi origine, commentatio apud Cartesium tam levibus rationibus contexta est, ut sæpe mirer tantum operæ in talibus concinnandis figmentis eum impendere potuisse. Mihi magnum quid consecuti videbimur, si quemadmodum sese habeant res, quæ in natura existant, intellexerimus; à quo longissime etiam
nunc

nunc absumus. Quomodo autem quæque effectæ fuerint, quodque sunt, esse cœperint, id nequaquam humano ingenio excogitari, aut conjecturis attingi posse, existimo.

FINIS.



CHRISTIANI HUGENII
O P E R A
MISCELLANEA.

TOMUS QUARTUS.

Tomi quarti contenta.

De Ratiociniis in LUDO ALEÆ. 723.

NOVUS CYCLUS HARMONICUS. 745.

Varia de OPTICA. 755.

Experimenta Physica. 767.

DE
RATIOCINIIS
IN
LUDO ALEÆ
AUCTORE
CHRISTIANO HUGENIO.

Tom. IV.

Yyyy

CHRISTIANUS HUGENIUS

Clarissimo Viro,

D. FRANCISCO SCHOTENIO

S. D.



*Um. in editione elegantissimorum ingenii
tui monumentorum, quam præ manibus
nunc habes, Vir Clarissime, id inter cæ-
tera te spectare sciam, ut varietate re-
rum, quarum tractationem instituisti,
ostendas quam latè se protendat divina Analytices scien-
tia, facilè intelligo etiam illa plurimùm proposito tuo
inservire posse, quæ de aleæ ratiociniis conscripsimus;
quantò enim minus rationis terminis comprehendi posse
videbantur, quæ fortuita sunt atque incerta, tantò
admirabilior ars censebitur, cui ista quoque subjacent.
Quare cum in tui gratiam primùm illa exponenda sus-
ceperim, túque digna existimes, quæ simul cum subti-
lissimis tuis inventis in lucem exeant, adeo tibi non re-
fragabor, ut etiam è re mea esse existimem hâc po-
tissimùm ratione ipsa in manus hominum pervenire.
Quippe cum in re levi ac frivola operam collocasse vi-
deri aliqui possem, non tamen prorsus utilitatis expers
ac nullius pretii censebitur, quòd tu veluti inter tua*

Y y y 2

ado-

adoptaveris, nec sine multo labore è vernacula lingua nostra in Latinam converteris. Quanquam, si quis penitiùs ea quæ tradimus examinare cæperit, non dubito quin continuò reperturus sit rem non ut videtur ludicram agi, sed pulchræ subtilissimæque contemplationis fundamenta explicari. Et Problemata quidem quæ in hoc genere proponuntur, nihilo minus profundæ indaginis visum iri confido, quam quæ Diophanti libris continentur, voluptatis autem aliquanto plus habitura, cum non, sicut illa, in nuda numerorum consideratione terminentur. Sciendum verò, quod jam pridem inter præstantissimos totâ Galliâ Geometras calculus hic agitatus fuerit, ne quis indebitam mihi primæ inventionis gloriam hac in re tribuat. Cæterum illi, difficillimis quibusque quæstionibus se invicem exercere soliti, methodum suam quisque occultam retinuere, adeo ut a primis elementis universam hanc materiam evolvere mihi necesse fuerit. Quamobrem ignoro etiamnum an eodem mecum principio illi utantur; at in resolvendis Problematis pulchrè nobis convenire sæpenu-merò expertus sum. Horum Problematum nonnulla in fine operis addidisse me invenies, omissa tamen analysi, cum quod prolixam nimis operam poscebant, si perspicuè omnia exequi voluisssem, tum quod relinquendum aliquid videbatur exercitationi nostrorum, si qui erunt, Lectorum. Vale.

Dat. Hagæ Com.
27 Apr. 1657.


DE

D E

R A T I O C I N I I S

I N

L U D O A L E Æ.



Etsi lusionum, quas sola fors moderatur, incerti solent esse eventus, attamen in his, quanto quis ad vincendum quàm perdendum propior sit, certam semper habet determinationem. Ut si quis primo jactu unâ tessera senarium jacere contendat, incertum quidem an vincet; at quantò verisimilius sit eum perdere quàm vincere, reipsâ definitum est, calculoque subducitur. Ita quoque, si cum aliquo certem hâc ratione, ut ternis lusibus constet victoria, atque ego jam unum lusum vicerim, incertum adhuc uter nostrum prior tertii victor sit evasurus. Verùm quanti expectatio mea, & contra quanti illius, æstimari debeat, certissimo ratiocinio consequi licet, atque hinc definire, si ludum uti est imperfectum relinquere inter nos convenit, quantò major portio ejus quod depositum est mihi quàm adversario meo tribuenda esset: vel etiam si quis in locum sortemque meam succedere cupiat, quo pretio me eam ipsi vendere æquum sit. Atque hinc innumeræ quæstiones exoriri possunt inter duos, tres, plurésve collusores. Cumque minimè vulgaris sit hujusmodi supputatio, & sæpe utiliter adhibeatur, breviter hâc quâ ratione aut methodo expedienda sit exponam, ac deinde etiam, quæ ad aleam sive tesserarum propriè pertinent, explicabo.

Hoc autem utrobique utar fundamēto: nimirum, in aleæ

ludo tanti æstimandam esse cujusque sortem seu expectationem ad aliquid obtinendum, quantum si habeat, possit denuo ad similem sortem sive expectationem pervenire, æquâ conditione certans. Ut, exempli gratiâ, si quis me inscio alterâ manu 3 solidos occulter, alterâ 7 solidos, mihique optionem det ex utra manu solidos accipere malim; hoc tantundem mihi valere dico, ac si 5 solidi mihi dentur. Quoniam quinque solidos habens, denuo eò pervenire possum, ut æquam expectationem nanciscar ad 3 vel 7 solidos obtinendos: idque æquo lusu contendens.

P R O P O S I T I O I.

*Si a vel b expectem, quorum utrumvis æquè
facile mihi obtingere possit, expectatio
mea dicenda est valere $\frac{a+b}{2}$.*

AD hanc regulam non solum demonstrandam, verum etiam primitus eruendam posito x pro eo quod æquivalet expectationi meæ, oportet me, quum x habeo, rursus ad similem sortem pervenire posse, æquâ conditione certantem. Ponatur itaque lusus esse talis, ut cum altero certem hâc conditione, ut quisque deponat x , ac ut victor victo traditurus sit a . Hic autem lusus justus est, & patet me hâc ratione æquam habere sortem ad obtinendum a , si lusum perdam scilicet; aut $2x - a$, si vincam: tum enim obtineo $2x$, id nempe quod depositum est, de quo alteri erogandum est a . Quòd si autem $2x - a$ tantundem valeret atque b , æqua mihi fors obtingeret ad a quàm ad b . Pono itaque $2x - a \propto b$, & fit $x \propto \frac{a+b}{2}$, pro valore meæ expectationis. Cujus de-

monstratio facilis est. Etenim habens $\frac{a+b}{2}$ possum cum a-

lio certare, qui etiam $\frac{a+b}{2}$ deponere volet, hâc conditione
ut

ut vincens victo sit traditurus a . Quâ ratione similis expectatio mihi obtinget ad obtinendum a , si perdam, aut ad obtinendum b , si vincam; tum enim obtineo $a+b$, id nempe quod depositum est, alterique inde concedo a .

In numeris. Si ad 3 vel 7 æqua fors mihi obtingat, tum expectatio mea per hanc Propositionem valet 5; & certum est me 5 habentem rursus ad eandem expectationem pervenire posse. Si enim cum alio certans 5 deponam, atque ille similiter 5 deponat, hâc conditione, ut, qui vincit, alteri sit daturus 3: erit hic lusus omnino justus, & patet mihi æquam obtingere sortem ad obtinendum 3, si perdam, aut 7, si vincam: quoniam tunc obtineo 10, de quo alteri concedo 3.

P R O P O S I T I O II.

Si a , b , vel c expectem, quorum unumquodque pari facilitate mihi obtingere possit, expectatio mea æstimanda est $\frac{a+b+c}{3}$.

AD quod rursus inveniendum, ponatur, ut ante, x pro valore expectationis meæ. Oportet ergo me, cum x habeo, ad eandem expectationem pervenire posse justo lusu. Ponatur lusus esse talis, ut cum duobus aliis ludam hâc conditione, ut quisque nostrum trium deponat x , & ut cum uno hoc pactum aggrediar, si ipse victor evadat, mihi sit daturus b , & ego ipsi traditurus sim b , si idem mihi obtingat. Cum altero autem hanc ineam conditionem, ut ille ludum vincens mihi traditurus sit c , aut ego ipsi sim daturus c , si ego vincam. Et patet hunc ludum justum esse. Æquam autem hâc ratione sortem habebō ad obtinendum b , si nimirum primus vincat, aut c , si secundus vincat, aut etiam $3x-b-c$ si ego vincam; tunc enim obtineo $3x$, quod depositum est, de quo uni concedo b , & alteri c . Quod si $3x-b-c$ æquale fuerit ipsi a , eadem mihi obtingeret expectatio.

pectatio ad obtinendum a , quæ ad b , aut ad c . Pono itaque $3x - b - c \propto a$, & fit $x \propto \frac{a+b+c}{3}$, pro valore meæ expectationis. Eodem modo invenitur, si ad a, b, c , aut d æqua fors mihi obtingat, id tanti valoris esse, quanti $\frac{a+b+c+d}{4}$. Atque ita porrò.

PROPOSITIO III.

*Si numerus casuum, quibus mihi eveniet a , sit p , numerus autem casuum quibus mihi eveniet b sit q , sumendo omnes casus æquè in proclivi esse:
expectatio mea valebit $\frac{pa+pq}{p+q}$.*

AD hanc regulam eruendam, ponatur rursus x pro valore expectationis meæ: ergo oportet me, cùm x habeo, ad eandem expectationem pervenire posse, ut ante, justo lusu. Ad hoc autem tot collusores sumam, ut unà mecum numerum ipsius $p+q$ efficiant, quorum deponat quisque x , ita ut depositum sit $px+qx$, & quisque sibi ludat æquâ expectatione ad vincendum. Porrò cum tot ex hisce collusoribus, quot indicat numerus q , sigillatim hoc pactum inibo, ut eorum qui vincat mihi sit daturus b , aut ego contra ipsi idem b , si vincam. Similiter cum reliquis collusoribus, constituentibus $p-1$ sigillatim hanc conditionem aggrediar, ut eorum quisque, qui ludum vincit, mihi sit daturus a , & ego tantundem (a scilicet) ipsi, si ego vincam. Et patet hunc lusum hâc conditione justum esse, nemine videlicet injuriam patiente. Deinde patet me nunc q expectationis habere ad b , & $p-1$ expectationes ad a , & 1 expectationem (me nempe vincente) ad $px+qx-bq-ap+a$, tunc enim obtineo $px+qx$, id quod depositum est, de quo tradere debeo b unicuique q lusorum, & a unicuique $p-1$ lusorum, quæ simul conficiunt $bq+pa-a$. Si itaque $qx+bx-bq-ap+a$ æqua-

æquale esset ipsi a , haberem p expectationes ad a , (quando-
 quidem jam $p-1$ expectationes ad id habebam) & q expe-
 ctationes ad b , & sic ad priorem meam expectationem rur-
 sus pervenissem. Quocirca porrò $px+qx-bq-ap+a \propto a$,
 & fit $x \propto \frac{ap+bq}{p+q}$, pro valore expectationis meæ, omnino ut
 in initio positum fuit.

In numeris. Si 3 mihi expectationes forent ad 13, & 2
 expectationes ad 8, haberem per hanc regulam tantundem
 ac 11. Et facile est ostendere, me, si 11 habeam, rursus ad
 eandem expectationem pervenire posse. Ludens enim con-
 tra 4 alios, & quisque nostrum quinque deponens 11, cum
 duobus ex illis sigillatim pactum inibo, ut horum qui vincat
 mihi sit daturus 8, aut ego ipsi idem 8, si vincam. Simili-
 ter cum duobus reliquis, ut eorum quisque, qui ludum vin-
 cit, mihi sit daturus 13, aut ego ipsi tantundem, si ego vin-
 cam. Qui quidem lusus justus est. Et patet me hoc modo
 duas habere expectationes ad 8, nimirum si alteruter eorum,
 qui mihi 8 promiserunt, vincat, & 3 expectationes ad 13,
 nimirum si alteruter reliquorum duorum, qui mihi 13 trade-
 re debent, vincat, aut si ipse ludum vincam: ego enim lu-
 dum vincens obtineo depositum, id est, 55, de quo unicui-
 que duorum tradere debeo 13, & unicuique reliquorum duo-
 rum 8, ita ut & mihi relinquatur 13.

PROPOSITIO IV.

*Ut igitur ad primò propositam quæstionem veniamus,
 nimirum, de facienda distributione inter diversos
 collusores, quando eorum sortes inæquales sunt,
 opus est ut a facilioribus incipiamus.*

Sumpto itaque me cum aliquo certare, hoc pacto: ut qui
 priùs ter vicerit, quod depositum est, lucretur, & me jam
 bis vicissè, alterum verò semel. Scire cupio, si lusum pro-

sequi non velimus, sed pecuniam, de qua certamus, prout æquum est, partiri, quantum ejus mihi obtingeret.

Primò considerare oportet lusus, qui utrobique deficiunt. Certum enim est, si inter nos convenerit, verbi gratiâ, ut quod depositum est lucretur is, qui priùs vigesies vicerit, & ego decies & novies vicerò, at alter decies & octies, tantò meliorem fore eo casu sortem meam quantò hîc melior est, ubi à tribus lusibus binos consequutus sum, ille verò unum duntaxat: quia nimirum utrobique mihi unus tantummodo lusus sed ipsi duo deficiunt.

Porro ad inveniendum quanta pars utrique debeatur, advertendum est quid fieret, si in lusu pergeremus. Certum enim est, si primum ludum vincerem, me præscriptum numerum impleturum & omne depositum consecuturum, id quod vocetur a . Quod si autem alter primum ludum vinceret, tunc æquata utriusque fors foret, (quippe utrique uno adhuc deficiente ludo,) adeoque cederet cuique $\frac{1}{2}a$. Manifestum autem est me æquam habere sortem ad primum ludum vincendum aut perdendum, ita ut mihi nunc æqua sit expectatio ad obtinendum a aut $\frac{1}{2}a$: quod ipsum per I^{am} Propositionem tantum est ac si utriusque sortis dimidium, id est, $\frac{1}{2}a$, haberem; & relinquitur alteri meo collusori $\frac{1}{2}a$, quæ ipsius portio statim ab initio eodem modo reperiri potuisset. Unde patet, eum, qui ludum meum in se recipere vellet, mihi $\frac{1}{2}a$ pro eo tradere debere; ac proinde semper tria contra unum deponere eum posse, qui unum ludum vincere contendat, priusquam alter duos vincat.

PROPOSITIO V.

Ponamus unum mihi deficere ludum & collusori meo tres lusus. Oportet hîc facere distributionem.

ADvertamus itaque rursus, in quo essemus statu, si ego vel ipse primum vinceret lulum. Si ego vincerem, obtinerem depositum, id est, a ; quòd si autem ille primum ludum vin-

ce-

ceret, deficerent ipsi duo lusus & mihi unus; ac proinde in eodem statu essemus, qui in præcedenti Propositione positus fuit, mihiq; obtingeret $\frac{3}{4}a$, ut ibi ostensum est. Itaque pari facilitate vel a mihi obtinget vel $\frac{1}{4}a$, id quod tantum est, per 1^{am} Propositionem, ac $\frac{7}{8}a$. Et relinquitur $\frac{1}{8}a$ collusori meo; ita ut mea fors ad sortem illius se habeat, sic ut 7 ad 1.

Quemadmodum autem ad hunc calculum requisitus est præcedens, ita rursus hicce inservit sequenti: nimirum, si ponamus mihi unum ludum deficere & collusori meo 4^{or} lusus. Et invenitur eodem modo, mihi deberi $\frac{15}{16}$ istius quod depositum est, & ipsi $\frac{1}{16}$.

P R O P O S I T I O VI.

Ponamus mihi deficere duos lusus & collusori meo tres lusus.

Flet itaque primo lusu; vel ut mihi unus lusus deficiat & ipsi tres (unde mihi per præcedentem Propositionem obtinget $\frac{7}{8}a$); vel ut cuique nostrum adhuc duo lusus deficiant, unde mihi debebitur $\frac{1}{2}a$, quandoquidem sic utrique æqua fors futura est. Est mihi autem æqualis facilitas ad primum ludum vincendum aut perdendum; ita ut mihi æqua sit expectatio ad obtinendum $\frac{7}{8}a$ aut $\frac{1}{2}a$, id quod mihi valet $\frac{11}{16}a$, per 1^{am} Propositionem. Et debentur mihi 11 partes ejus quod depositum est, & collusori meo 5 partes.

P R O P O S I T I O VII.

Ponamus mihi deficere duos lusus & collusori meo quatuor.

Flet itaque, ut, si primum ludum vincam, unum ludum vincere debeam & alter quatuor; vel, si eundem perdam, duos & alter tres. Ita ut æqua mihi fors obtingat ad $\frac{15}{16}a$

aut $\frac{11}{16}a$, id quod tantum valet ac $\frac{13}{16}a$, per 1^{am} Propositionem. Unde patet, eum meliorem habere sortem, qui duos lusus vincere debet dum alter quatuor, quàm eum, qui unum dum alter duos. In hoc enim posteriori casu, nimirum ipsius 1 ad 2, portio mea, per 4^{am} Propositionem, est $\frac{1}{4}a$, quæ minor est quàm $\frac{11}{16}a$.

PROPOSITIO VIII.

Nunc verò ponamus tres esse collusores, quorum primo ut & secundo unus lusus deficiat, sed tertio duo lusus.

UT igitur inveniatur primæ pars, rursus advertendum est, quid ipsi deberetur, si vel ipse vel alter reliquorum duorum primum lusus vinceret. Si ipse vinceret, haberet depositum, id quod sit a . Quod si secundus vinceret, primus nihil haberet, quoniam secundus sic lusui finem imposuisset. At si tertius vinceret, tunc cuique trium adhuc unus deficeret lusus, ideoque tam primo quàm utrique reliquorum deberetur $\frac{1}{3}a$. Et fit primo una expectatio ad a , una ad 0, & una ad $\frac{1}{3}a$, (quandoquidem æquè facilè contingere potest cuique trium ut primum ludum vincat,) quod ipsi tantundem valet ac $\frac{4}{9}a$, per 2^{dam} Propositionem. Et fit similiter secundo $\frac{4}{9}a$, & remanet tertio $\frac{1}{3}a$. Cujus pars separatim etiam inveniri potuerat, atque inde reliquorum partes determinari.



PROPOSITIO IX.

Ut tot collusorum, quot quis voluerit, ex quibus uni plures & alii pauciores lusus deficiunt, cujusque pars inveniatur, considerandum est, quid illi, cujus partem invenire volumus, deberetur, si vel ipse, vel quislibet reliquorum primum sequentem ludum vinceret. Horum autem partes si in unam summam colligantur, & aggregatum per numerum collusorum dividatur, quotiens ostendet unius quæsitam partem.

Ponamus tres esse collusores A, B, & C, & ipsi A unum ludum deficere, ipsi B duos lusus, & ipsi C similiter duos lusus. Invenire oportet, quid ipsi B, ejus quod depositum est, debeatur. Id quod vocetur q .

Primò examinandum est, quid ipsi B deberetur, si vel ipse, vel A, vel C primum sequentem ludum vinceret.

Si A vinceret, ludo finem imposuisset, ac per consequens ipsi B deberetur 0. Si ipse B vinceret, deficeret illi adhuc unus lusus, & ipsi A unus lusus, at ipsi C duo lusus. Quocirca ipsi B hoc in casu deberetur $\frac{4}{9}q$, per 8^{am} Propositionem.

Denique si C primum sequentem ludum vinceret, tunc ipsis A & C singulis unus deficeret lusus, sed ipsi B duo lusus, ac per consequens ipsi B deberetur $\frac{1}{9}q$, per eandem Propositionem 8^{am}. Nunc autem in unam summam colligendum est, id quod in tribus hisce casibus ipsi B deberetur: nimirum, 0, $\frac{4}{9}q$, $\frac{1}{9}q$: quorum summa est $\frac{5}{9}q$. Quod ipsum divisum per 3, numerum collusorum, dat $\frac{5}{27}q$. Quæ ipsius B quæsitæ pars est. Demonstratio autem hujus patet ex 2^{da} Propositione. Quoniam enim B æquam habet sortem ad obtinendum 0, $\frac{4}{9}q$, vel $\frac{1}{9}q$, habet per 2^{am} Propositionem tantundem ac

Zzzz 3.

oc—.

$0 - \frac{1}{3}q - \frac{1}{3}q$, id est, $\frac{5}{27}q$. Et certum est, hunc divisorem 3 esse numerum collusorum.

Ut autem inveniatur, quid cuiusque debeatur in quolibet casu, videlicet si vel ipse vel aliquis reliquorum primum sequentem ludum vincat: oportet simpliciores casus primò investigare, & horum medio sequentes. Nam sicut hic ultimus casus solvi non potuit priusquam ille octavæ Propositionis calculo subductus esset, in quo deficientes lusus erant 1, 1, 2, ita etiam cuiusque pars supputari nequit in tali casu, ubi deficientes lusus sunt 1, 2, 3, quin primum calculo subductus sit casus deficientium lusuum 1, 2, 2, quemadmodum jam fecimus, & præterea ille, in quo lusus deficientes sunt 1, 1, 3; qui similiter per 8^{am} Propositionem supputari potuisset. Atque hoc quidem pacto consequenter supputare licet casus omnes, qui in sequenti tabula comprehenduntur, & infinitos alios.

Tabula pro 3 collusoribus.

Lusus, qui ipsi deficiunt.	1 . 1 . 2	1 . 2 . 2	1 . 1 . 3	1 . 2 . 3
Eorum partes.	4 . 4 . 1	17 . 5 . 5	13 . 13 . 1	19 . 6 . 2
	9	27	27	27

Lusus, qui ipsi deficiunt.	1 . 1 . 4	1 . 1 . 5	1 . 2 . 4	1 . 2 . 5
Eorum partes.	40 . 40 . 1	121 . 121 . 1	178 . 58 . 7	542 . 179 . 8
	81	243	243	729

Lusus, qui ipsi deficiunt.	1 . 3 . 3	1 . 3 . 4	1 . 3 . 5
Eorum partes.	65 . 8 . 8	616 . 82 . 31	629 . 87 . 13
	81	729	729

Lusus, qui ipsi deficiunt.	2 . 2 . 3	2 . 2 . 4	2 . 2 . 5	2 . 3 . 3	2 . 3 . 4	2 . 3 . 5
Eorum partes.	34 . 34 . 13	338 . 338 . 53	853 . 353 . 23	133 . 55 . 55	451 . 195 . 83	1433 . 635 . 119
	81	729	729	243	729	2187

Quod ad tesseras attinet, de iis hæ quæstiones proponi possunt: videlicet, quotâ vice unâ tessera senarium jacere periclitandum sit, aut aliquod reliquorum punctorum. Item quo-

quotâ vice duos senarios duabus tesseris, aut tres senarios tribus tesseris jacere sit tentandum. Et plures aliæ hujusmodi quæstiones. Ad quas solvendas advertendum est.

Primò unius tesseræ sex esse jactus diversos, quorum quivis æquè faciliè eveniat. Sumo enim tesseram habere figuram cubi perfectam.

Porro duarum tesserarum 36 esse diversos jactus, quorum similiter quivis æquè faciliè obtingere potest. Nam ratione cujusque jactus unius tesseræ potest unus sex jactuum alterius tesseræ simul contingere. Et sexies 6 efficiunt 36 jactus.

Item trium tesserarum esse 216 jactus diversos. Nam ratione cujusque 36 jactuum duarum tesserarum potest unus sex jactuum, qui in 3^{ia} sunt, evenire. Et sexies 36 efficiunt 216 jactus.

Eodem modo pater, quatuor tesserarum jactus esse sexies 216, id est, 1296; atque sic ulterius jactus quotlibet tesserarum supputari posse, sumendo semper pro accessione unius tesseræ sexies jactus præcedentis.

Porro notandum, duarum tesserarum unum duntaxat esse jactum, qui 2 aut 12 puncta efficiat, duos verò jactus, qui 3 aut 11 puncta efficiant. Si enim tesseras vocemus A & B, patet, ad 3 puncta jacienda in A unum & in B duo, vel in B unum & in A duo puncta reperiri posse. Similiter ad 11 puncta jacienda in A quinque & in B sex, vel in A sex & in B quinque puncta patere posse. Quatuor punctorum tres sunt jactus, videlicet, ipsius A 1 & B 3 puncta; vel ipsius A 3 & B 1 punctum; vel ipsius A 2 & B 2 puncta.

Decem punctorum similiter tres sunt jactus.

Quinque vel novem punctorum 4^{or} sunt jactus.

Sex vel octo punctorum 5^{que} sunt jactus.

Septem punctorum 6 sunt jactus.

$$\text{In tribus tesseris reperiuntur} \left\{ \begin{array}{l} 3 \text{ vel } 18 \\ 4 \text{ vel } 17 \\ 5 \text{ vel } 16 \\ 6 \text{ vel } 15 \\ 7 \text{ vel } 14 \\ 8 \text{ vel } 13 \\ 9 \text{ vel } 12 \\ 10 \text{ vel } 11 \end{array} \right\} \text{punctorum} \left\{ \begin{array}{l} 1 \\ 3 \\ 6 \\ 10 \\ 15 \\ 21 \\ 25 \\ 27 \end{array} \right\} \text{jactus.}$$

PROPOSITIO X.

Invenire, quot vicibus suscipere quis possit, ut unâ tesserâ 6 puncta jaciat.

Si quis primâ vice senarium jacere contendat, apparet unum esse casum, quo vincat, habeatque id, quod pignoris loco depositum est; quinque verò esse casus, quibus perdat, & nihil habeat. Sunt enim 5 jactus contra ipsum, & tantum unus pro ipso. Quod autem depositum est vocetur a . Est itaque ipsi unica expectatio ad obtinendum a , sed quinque ad obtinendum 0; id quod per 2^dam Propositionem tantundem valet ac $\frac{1}{5}a$. Et manet pro eo qui ipsi hunc casum offert $\frac{1}{5}a$. Ita ut tantummodo 1 contra 5 deponere possit, qui primâ vice suscipere velit.

Qui duabus vicibus semel senarium jacere certet, fors ejus hoc pacto computatur. Si primâ vice 6 jaciat, obtinet a . Si diversum eveniat, unus ipsi restat jactus, qui ex præcedenti tantum valet, quantum $\frac{1}{5}a$. Atqui ut primâ vice 6 jaciat, unus tantum casus est, & quinque casus, quibus diversum eveniat. Itaque ab initio unus casus est, qui det ipsi a ; & quinque qui dent $\frac{1}{5}a$, id quod per 2^dam Propositionem valet $\frac{1}{36}a$. Unde contracertanti lusori cedit reliquum $\frac{25}{36}a$; adeo ut fors utriusque sive æstimatio expectationis eam servet rationem, quam 11 ad 25; id est minus quàm 1 ad 2.

Hinc eodem modo calculo subducitur, quòd fors ejus, qui tribus vicibus semel senarium jacere suscipit, sit futura $\frac{91}{216}a$; ita ut 91 contra 125 deponere possit; id est, paulò minus quàm 3 ad 4.

Qui quatuor vicibus idem suscipit, fors ejus est $\frac{671}{1296}a$; ita ut 671 contra 625 deponere possit; id est, plus quàm 1 ad 1.

Qui quinque vicibus idem suscipit, fors ejus est $\frac{4651}{7776}a$, & potest 4651 contra 3125 deponere; id est, paulò minus quàm 3 ad 2.

Qui

Qui sex vicibus idem suscipit, fors ejus est $\frac{1101}{46656}a$, & potest 31031 contra 15625 deponere; id est, paulò minus quàm 2 ad 1.

Atque ita consequenter quilibet jactuum numerus inueniri potest. Sed licet majori compendio progredi, ut in sequenti Propositione ostendetur; sine quo calculus aliàs multò prolixior foret.

PROPOSITIO XI.

Invenire, quot vicibus suscipere quis possit, ut duabus tesseris 12 puncta jaciat.

SI quis primâ vice duos senarios jacere contendat, apparet unum esse casum, quo vincat, id est, ad obtinendum a ; & 35 esse casus, quibus perdat sive nihil habeat, quoniam 36 sunt jactus. Itaque habet, per 2^{dam} Propositionem, $\frac{1}{36}a$.

Qui duabus vicibus idem suscipit, si primâ vice duos senarios jaciat, obtinebit a ; si verò primâ vice diversum eveniat, unus ipsi restat jactus, id quod ipsi, per illud quod jam dictum est, valet $\frac{1}{36}a$.

Atqui ut primâ vice duos senarios jaciat, unus tantum est casus, sed 35 casus, quibus diversum eveniat. Itaque ab initio unus casus est, qui det ipsi a , & 35 qui dent $\frac{1}{36}a$; id quod per 2^{dam} Propositionem valet $\frac{71}{1296}a$. Et remanet contracertanti $\frac{1225}{1296}a$.

Ex his invenire licet, qualis sit ei fors aut pars, qui idem suscipit quaternis jactibus, prætereundo casum eum, cum quis illud ternis jactibus suscipit.

Etenim, qui 4^{or} vicibus duos senarios jacere contendit, si illud 1^{ma} aut 2^{da} vice faciat, obtinet a ; sin minus, restant ipsi duo jactus, qui per illud quod superius dictum est, valent $\frac{71}{1296}a$. Sed propter eandem ratio-

tionem habet etiam 71 casus, ut ex duobus primis jactibus semel duos senarios jaciat, contra 1225 casus, quibus diversum eveniat. Habet itaque ab initio 71 casus, qui ipsi dent a , & 1225 casus, qui dent ipsi $\frac{71}{1225} a$. Quod ipsi per 2^{dam} Propositionem valet $\frac{178991}{1679616} a$. Et remanet contracertanti $\frac{1500625}{1679616} a$. Id quod ostendit eorum sortes esse ad se invicem, ut 178991 ad 1500625.

E quibus porrò eâdem ratione invenitur expectatio ejus, qui 8 vicibus semel duos senarios jacere certat. Ac inde rursus expectatio ejus, qui idem suscipit 16 vicibus. Atque ex hujus expectatione, ut etiam ex expectatione illius, qui istud 8 vicibus suscipit, invenitur expectatio ejus, qui illud 24 vicibus in se recipit. In qua operatione, quoniam præcipuè quæritur in quo numero jactuum æqualis fors incipiat, inter eum qui id suscipit & eum qui offert, licebit à numeris, qui alioquin in immensum excrescerent, posteriores aliquot characteres auferre. Atque ita quidem reperio ei, qui illud 24 vicibus suscipit, adhuc aliquid deficere; tumque demum eum potiozem conditionem inire, cum 25 jactibus aggreditur.

PROPOSITIO XII.

Invenire quot tesseriis suscipere quis possit, ut primâ vice duos senarios jaciat.

HOc autem tantundem est, ac si quis scire velit, quanto jactu quispiam unâ tesserâ suscipere possit, ut bis senarium jaciat. Quòd si quis duobus jactibus susciperet, obtingeret ei, per ea quæ ante ostensa sunt, $\frac{1}{36} a$. Qui illud tribus jactibus in se reciperet, si primus ejus jactus senarius non foret, haberet adhuc duos jactus, quorum uterque senarius esse deberet, id quod tantundem

dem valere dictum est ac $\frac{1}{36}a$. At verò primo ejus jactu existente senario, opus est ut ex duobus jactibus non nisi semel senarium jaciatur. Quod per 10 Propositionem tantundem valet ac si $\frac{11}{36}a$ haberet. Atqui certum est ipsum unum habere casum, quo primâ vice senarium jaciatur, & quinque casus quibus diversum eveniat. Habet itaque ab initio unum casum ad $\frac{11}{36}a$, & 5 casus ad $\frac{1}{36}a$, id quod per 2^{dam} Propositionem tantundem valet ac $\frac{16}{216}a$ seu $\frac{2}{27}a$. Hoc pacto assumendo continuè unum jactum amplius, invenitur 10 jactibus unâ tesserâ, aut 10 tesseris primo jactu suscipi posse, ut duo senarii jaciantur, idque cum lucro.

PROPOSITIO XIII.

Si cum alio ludam duabus tesseris unum solummodo jactum, hâc conditione, ut, si septenarius eveniat, ego vincam; at ille, si denarius obtingat; si vero quidquam aliud accidat, ut tum id quod depositum est æqualiter dividamus: Irvenire qualis istius pars cuique nostrum debeat.

QUoniam 36 jactuum, qui duabus tesseris proveniunt, 6 jactus existunt septem punctorum, & 3 jactus decem punctorum, restant adhuc 27 jactus, qui ludum æquare possunt; id quod si fiat, cuique nostrum debetur $\frac{1}{2}a$. Verùm si id non obtingat, habebō 6 casus, quibus vincam, id est, ut a habeam; & 3 casus, quibus diversum eveniat, nihilquē habeam: id quod per 2^{dam} Propositionem tantundem est ac si tali casu $\frac{2}{3}a$ haberem. Habeo itaque ab initio 27 casus ad $\frac{1}{2}a$ & 9 casus ad $\frac{2}{3}a$, id quod, per 2^{dam} Propositionem, tantundem est ac $\frac{13}{27}a$. Et remanet contracertanti $\frac{11}{27}a$.

Aaaaa 2

P R O.

PROPOSITIO XIV.

Si ego & alius duabus tesseris alternatim jaciamus, hâc conditione, ut ego vincam simul atque septenarium jaciam, ille vero quam primum senarium jaciat; ita videlicet, ut ipsi primum jactum concedam: invenire rationem meâ ad ipsius sortem.

Ponatur, sortem meam valere x , & id quod depositum est vocari a ; eritque fors alterius $\propto a - x$. Et patet, quandocunque ipsius vices jaciendi revertuntur, sortem meam tum rursus debere esse $\propto x$. At quandocunque meæ vices sunt ut jaciam, fors mea pluris æstimanda est. Ponatur itaque pro ejus valore y . Jam quo niam ex 36 jactibus reperiuntur 5 in 2 tesseris, qui collusori meo senarium dare lususque victorem reddere possunt; & 31 jactus, quibus diversum eveniat, id est, qui meas jaciendi vices promonent: habeo, priusquam jacit, 5 casus ad obtinendum a , & 31 casus ad obtinendum y . id quod per 3^{tiam} Propositionem valet $\frac{31y}{36}$. Posuimus autem casum meum à

principio esse $\propto x$. Quocirca erit $\frac{31y}{36} \propto x$, adeo-

que $y \propto \frac{36x}{31}$. Deinde positum fuit, vicibus meis venientibus, sortem meam valere y . Ego verò jacturus, habeo 6 casus ad obtinendum a , quandoquidem 6 jactus reperiuntur 7 punctorum, qui me victorem reddunt; habeoque 30 casus, quibus vices collusoris mei revertuntur, id est, ut mihi obtineam x . id quod per 3^{tiam} Pro-

Propositionem valet $\frac{6a + 30x}{36}$. Hoc autem cum sit
 $x y$, erit, invento, ut ante, $\frac{36x}{31} x y$, $\frac{30x + 6a}{36}$
 $x \frac{36x}{31}$. Unde invenitur $x x \frac{31a}{61}$, valor meæ for-
tis. Et per consequens collusoris mei erit $\frac{30a}{61}$; ita ut
ratio fortis meæ ad illius sortem sit, ut 31 ad 30.

Coronidis loco subjungantur sequentia Problemata.

PROBLEMA I.

A & B unà ludunt duabus tesseris, hac conditione,
ut A vincat, si senarium jaciat, at B si septenarium ja-
ciat. A primò unum jactum instituet; deinde B duos
jactus consequenter; tum rursus A duos jactus, atque
sic deinceps, donec hic vel ille victor evadat. Quæri-
tur ratio fortis ipsius A ad sortem ipsius B? Resp. ut
10355 ad 12276.

PROBLEMA II.

Tres collusores A, B & C affumentes 12 calculos,
quorum 4 albi & 8 nigri existunt, ludunt hac condi-
tione: ut, qui primus ipsorum velatis oculis album cal-
culum elegerit, vincat; & ut prima electio sit penes A,
secunda penes B, & tertia penes C, & tum sequens rur-
sus penes A, atque sic deinceps alternatim. Quæritur,
quænam futura sit ratio illorum sortium?

PROBLEMA III.

A certat cum B quòd ipse ex 40 chartis lusoriis, id
est, 10 cujusque speciei, 4 chartas extracturus sit; ita

Aaaaa 3

ut

ut ex unaquaque specie habeat unam. Et invenitur ratio fortis A ad fortem B ut 1000 ad 8139.

P R O B L E M A IV.

Assumptis, ut ante, 12 calculis, 4 albis & 8 nigris, certat A cum B, quòd velatis oculis 7 calculos ex iis exempturus sit, inter quos 3 albi erunt. Quæritur ratio fortis ipsius A ad fortem ipsius B.

P R O B L E M A V.

A & B assumentes singuli 12 nummos ludunt tribus tesseris hâc conditione: ut, si 11 puncta jaciantur, A tradat nummum ipsi B; at si 14 puncta jaciantur, B tradat nummum ipsi A; & ut ille ludum victurus sit, qui primùm omnes habuerit nummos. Et invenitur ratio fortis ipsius A ad fortem ipsius B, ut 244140625 ad 282429536481.

F I N I S.



CHRISTIANI HUGENII
NOVUS CYCLUS
HARMONICUS.

THE
HARMONICS
OF
CHRISTIANITY
AND
NATURE

CHRISTIANI HUGENII
NOVUS CYCLUS
HARMONICUS.

Litteræ D. Hugonii de Cyclo Harmonico.



Ovam tibi mitto de Musica observationem. Spectat hæc prima Scientiæ illius fundamenta, id est, tonorum, qui in cantu & Instrumentorum fabrica observantur, determinationem. Quicumque licet parum versati sint in parte illa Theoriæ, norunt, quid sit, quod vocatur Temperamentum, quod tonos illos moderatur & quam necessarium illud sit in harmonia tuborum Organi vel chordarum Clavecymbali.

Celebriores auctores, uti Zarlinus & Salinas, illud referunt inter inventa pulcherrima & utilissima, quæ in musicis detegi possunt; & uterque contendit se primum Temperamentum hoc ad examen revocasse, & demonstrationibus Mathematicis constituissè. Ante illos experientia & necessitas illud quidem aliquo modo jam introduxerant, licet vera mensura & methodus nondum esset cognitæ. Inventio hujus Temperamenti in causa fuit, ut merito negligerentur omnes veterum Tetrachordarum & Diapasonorum divisiones quarum pleræquæ absurdæ & usus nullius erant in compositione plurimarum partium: hac etiam inventione nostrum systema tonorum magis abundat consonantiis, magisque est juxta naturam cantus, quam illorum erat.

Tom. IV.

Bbbbb

Pono

Pono notas esse proportionem, in quibus consistunt perfectæ consonantiæ, scilicet: Quintam audiri, quando, post sonum editum ex motu chordæ integræ, duæ tertiæ partes ipsius agitantur: vel proportionem, a qua consonantia hæc pendet, esse ut 3 ad 2; Quartæ proportionem esse ut 4 ad 3; Tertiæ majoris ut 5 ad 4; Tertiæ minoris ut 6 ad 5; Sextæ majoris ut 5 ad 3; Sextæ minoris ut 8 ad 5. Et quantum ad Temperamentum, iidem autores, quos modo memoravi, nos docent, ut hoc applicetur instrumentis, consonantiam Quintam minuendam esse quarta parte *Commatis* ut vocant, quæ adeo exigua est diminutio, ut auris hanc difficulter percipiat, & nullam inde capiat molestiam; cum *Comma* integrum sit ratio inter tonum integræ chordæ, & hujus tonum quando parte $\frac{1}{31}$ minuitur. Sequitur inde, Quartam auctam esse hac ipsâ exigua quantitate. Tertia minor pariter, est diminuta $\frac{1}{4}$ *Commatis*, & consequenter Sexta major in tantum aucta; sed Tertia major perfectionem servat, ut & ideo etiam Sexta minor.

Juxta has consonantiarum mensuras, disponuntur omnes instrumentorum toni, tam Diatonici quam Chromatici, quos addidere Musici, & pariter toni Enarmonici, quando & hi ut magis completa sit symphonia adjiciuntur.

Observatio autem nostra hæc est, si dividatur Octava in 31 partes æquales, quod fiet quærendo 30 medias proportionales inter totam chordam (quæ sumitur pro regula Harmonicâ) & ejus dimidium, dabitur in tonis, quos producant longitudines hæ, Systema parum admodum ab isto quod modo memoravi ex Temperamento deductum, ita ut nemo auri quantumvis subtili præditus differentiam percipiet; quod tamen novum Systema toto cælo ab alio differet, novasque afferet utilitates tum in Theoriam cum in Praxin.

Salinas inventum hoc dividendi octavam in 31 partes æquales memorat sed ut hoc culpet, & P. Mersennus pariter post ipsum hanc rejicit divisionem, unde mihi facile fides habenda erit, me nihil ex illis autoribus mutuatum esse; sed si & hoc fecissem, satis a me præstitum crederem, si præstantiam

tiam ejus divisionis ex Geometriæ principiis demonstraverim, & illam vindicaverim adversus injustum duorum illorum celebrium Scriptorum pronunciatum.

In lib. 3. Musices Salinæ integrum exstat caput de hac divisione, cujus inscriptio est, *De prava constitutione cujusdam instrumenti, quod in Italia citra quadraginta annos fabricari ceptum est, in quo reperitur omnis tonus in partes quinque divisus*; Dicit instrumentum hoc nominis Archicymbali donatum fuisse, illudque fuisse incerti autoris; Musicos quosdam admodum idoneos id magni fecisse, præcipue quia continebat omnia intervalla, omnesque consonantias (ut credebant, ait) adscendendo, & descendendo & quia post certam periodum rediebatur ad eundem sonum vel æquivalentem, cum eo a quo initium factum erat; Quia Octava divisa erat in 31 partes æquales, quas vocabant Diesas (seu tonos perfectos) quarum tonus debebat continere 5; magnus semitonus 3; parvus 2; Tertia major 10; Tertia minor 8; Quarta 13; Quinta 18; Sexta minor 21; Sexta major 23. Sed addit, cum tentassent tale disponere instrumentum hoc sonum dedisse admodum ingratum, & qui insigniter aures præsentium offendeat, unde concludit, talem divisionem deviare ab omni ratione harmonica, sive examinetur secundum mensuram justarum consonantiarum sive Temperamenti. Præter experientiam & aliud affert argumentum deductum ex Methodo in hac divisione adhibita. P. Mersennus etiam contendit se bene illam refutavisse. Erravit uterque, quia illos latebat Methodus dividendi Octavam in 31 partes æquales, quod probabiliter & ipsi inventores non potuerunt; requiritur enim cognitio Logarithmorum, qui nondum illorum nequidem Salinæ tempore erant inventi. Tandem novum hoc Temperamentum, quod adeo repudiant, omnium præstantissimum merito dicitur, omnia habens commoda quæ ipsi tribuebantur; præcipuæ simplicitatem quam communicat Theoriæ tonorum, & parum admodum differt ab eo, quo utuntur omnes, ut auris differentiam non percipiat uti computatione probabo.

Dico ergo primum, Quintam nostræ divisionis non superare Quintas Temperamenti quam $\frac{1}{115}$ Commatis, quæ differentia, auditu nullo modo percipi potest; sed quæ alioquin daret istam consonantiam tanto magis perfectam.

Quartæ consequenter Temperamenti ordinarii non excedunt nostras nisi illâ $\frac{1}{115}$ commatis, & hæ tendunt etiam tanto magis ad perfectionem.

Tertiæ minores sunt minores $\frac{3}{115}$ vel circiter $\frac{1}{37}$ Commatis quàm in temperamento, & Sextæ majores in tantum excedunt Sextas majores Temperamenti; utræque fateor recedunt à perfectâ proportionem; sed videmus differentiam $\frac{1}{37}$ Commatis non esse sensibilem, nec augere sensibilibiter $\frac{1}{4}$ Commatis, qua consonantiæ in Temperamento aberrant à veris.

Tandem Tertiæ majores superant Tertias Temperamenti, quæ sunt perfectæ, $\frac{4}{115}$ vel quasi $\frac{1}{28}$ Commatis, quæ adeo exigua est differentia, ut nisi pro perfectis, non obstante hoc augmento haberi queant; quid enim facit $\frac{1}{28}$ Commatis, cum $\frac{1}{4}$ adeo facile patiamur.

Deducimus ex exiguis omnibus hisce differentiis, Organum aut Clavecymbalum constitutum juxta Temperamentum ordinarium, etiam dispositum esse juxta novam divisionem, quantum aure poterit discerni. Si vero quis sibi hac in parte magis desiderat satisfacere, & exactissime constituere instrumentum juxta 31 partes æquales Octavæ, tantum dividenda est monochorda juxta numeros, qui habentur in sequenti Tabula, &, positâ totâ chordâ, æquisonâ cum C Clavecymbali aut Organi, disponere pariter alias chordas vel tubos, cum sonis, ex memorata divisione oriundis & qui audiuntur posito pectine in locis notatis. Quod vero ad Archicymbalum de quo Salinas loquitur, spectat, dubito, an non habuerit 31 palmulas in quavis octava; sed quoniam non poterit sine confusione talis abacus adhiberi præ multitudine palmularum, præstaret meâ sententiâ disponere 31 chordas simplices pro quavis octavâ, quod potest fieri sine difficultate; & constructis palmulis, quæ elevant subsilia, omnibus æqualis longitudinis, altitudinis, & la-

titu-

titudinis, quæ latitudo sit $\frac{1}{2}$ palmulæ vulgaris, deinde superimponendus erit abacus mobilis, cum claviculis in inferiori parte singularum palmularum fixis; semel ita dispositi hi ut chordæ, quæ in quavis octava adhibentur, sonent, omnibus transpositionibus inservient. Quæ ergo fient sine labore per tonos, semitonos, & usque ad quintas partes tonorum; & certum est, omnes tonos & consonantias in singulis transpositionibus æque accuratas esse, quod utile & amœnum erit. Olim Parisiis construi curavi, tales abacos mobiles superimponendos abacis vulgaribus Clavecymbalorum transpositionibus plurimis, licet non omnibus completis, inservientes; quod inventum approbarunt & imitati sunt periti in musicis varii.

Sed ut quis certus sit de veritate illorum, quæ superius dixi, inspiciat Tabulam sequentem cujus contenta ut & usum explicabo.



*Divisio Octavae in
partes 31. æ-
quales.*

*Divisio Octavae secun-
dum Temperamen-
tum vulgare.*

I.	II.	III.	IV.	V.	VI.
N 97106450					
4,6989700043	50000	U ^T ^z	C ^z	50000	4,6989700043
4,7086806493	51131				
4,7183912943	52278				
4,7281019393	53469	S ⁱ	B ^x	53499	4,7283474859
4,7378125843	54678				
4,7475232293	55914	S ^A	B	55902	4,7474250108
4,7572338743	57179	*	*	57243	4,7577249674
4,7669445193	58471				
4,7766551643	59794	L ^A	A	59814	4,7768024924
4,7863658093	61146				
4,7960764543	62528	*	*	62500	4,7958800173
4,8057870993	63942	S ^{OL} ^x	G ^x	64000	4,8061799740
4,8154977443	65388				
4,8252083893	66866	S ^{OL}	G	66874	4,8252574989
4,8349190343	68378				
4,8446296793	69924				
4,8543403243	71506	F ^A ^x	F ^x	71554	4,8546349804
4,8640509693	73122				
4,8737616143	74776	F ^A	F	74767	4,8737125054
4,8834722593	76467				
4,8931829043	78196				
4,9028935493	79964	M ⁱ	E	80000	4,9030899870
4,9126041943	81772				
4,9223148393	83621	M ^A	E ^b	83592	4,9221675119
4,9320254843	85512	*	*	85599	4,9324674685
4,9417361293	87445				
4,9514467743	89422	R ^E	D	89443	4,9515449935
4,9611574193	91444				
4,9708680643	93512	*	*	93459	4,9706225184
4,9805787093	95627	U ^T ^x	C ^x	95702	4,9809224750
4,9902893543	97789				
4,9999999993	100000	U ^T	C	100000	5,0000000000

Tabulæ Explicatio.

Secunda columna continet numeros qui exprimunt longitudes Chordarum; quibus habentur 31 intervalla æqualia secundum novam divisionem; Chorda tota continet partes 100000 & 50000 ejus dimidium dant Octavam.

A latere in 3^a. columna sunt syllabæ, quæ nobis in cantu inserviunt, & * pro quibusdam chordis enarmonicis, quarum prope sol* est maxime necessaria.

In 4^a. columna sunt litteræ quæ ordinario inserviunt ad designandos tonos.

Numeri 2^æ. columnæ ope numerorum col. 1^æ. detecti fuere, hi sunt illorum logarithmi respectivi; ad quos habendos divisi logarithmum numeri 2. qui est 0, 30102999566 per 31. unde venit numerus N. 97106450, quem addidi continuo Logarithmo num. 50000, qui est 4. 6989700043. & hisce additionibus detegimus omnes Logarithmos hujus columnæ usque ad maximum 4, 9999999993, qui parum deficiens a 5, 0000000000, (in cujus locum substitui potest) demonstrat bene subductum calculum. Qui Logarithmos intelligunt norunt ita ineundam computationem, si quærantur 30 numeri proportionales inter 100000 & 50000.

5^a. columna continet in numeris longitudes chordarum juxta Temperamentum ordinarium, & in 6^a. columna sunt eorum numerorum Logarithmi.

Possẽm explicare quomodo eos supputaverim, & pariter, quomodo id Temperamentum posset detegi, si nondum esset repertum; sed id foret nimis longum, & sufficiet, demonstrare methodum examinandi, & numerorum ἀριθμοί, & omnia quæ dixi de nova divisione & de ratione quam habet cum Temperamento.

Ponamus, determinandum esse, an Quinta *Ut, Sol*, temperamenti vulgaris, minor sit $\frac{1}{4}$ Commatis, quam vera Quinta, cujus ratio est trium ad duo. A log. *Ut*, qui est 5, 0000000000 subtraham log. *Sol* qui est 4, 8252574989, id, quod restat

0, 1747425011, exhibet quantitatem Quintæ Temperamenti.

Pariter differentia Logarithmorum 3 & 2 quæ in tabulis Logarithmorum habetur 1760912594, exhibet quantitatem Quintæ perfectæ; hinc subtrahō Quintam Temperamenti inventi & restat 13487583; id quod debet dare Log. $\frac{1}{4}$ Commatis; & hoc verum est; nam log. Commatis toni id est differentia logar. 81 & 80 est 53950319, cujus Quarta pars est 13487580. Si velimus examinare an Quævis Quinta novæ divisionis ut *Re*, *La*, differat a verâ $\frac{1}{4}$ minus $\frac{1}{110}$ Commatis; debemus a Log. *Re*, qui est 4,9514467743, subtrahere Log. *La*, qui est 4,7766551643, restat 1747916100, quem subtrahō a Logarithmo veræ Quintæ qui erat 1760912594, restat 12996494, qui minor est Log. Quartæ partis Commatis, scilicet 13487580; a quo igitur eum subtrahō & restat 491086: Debemus nunc videre, quam partem Commatis hoc faciat; idcirco divido Log. Commatis, scilicet 53950319 per 491086, quotiens est fere $\frac{1}{110}$. Ita ut pateat, nostram Quintam non superari $\frac{1}{4}$ Commatis a Quinta perfectâ; sed $\frac{1}{110}$ Commatis deesse. Eodem modo potest examinari quidquid spectat Temperamentum; nihil enim in computationibus Musicis instituendis Logarithmorum usui anteponendum.

F I N I S.



CHRISTIANI HUGENII
V A R I A
D E
O P T I C A.

Tom. IV.

Ccccc

CONSTITUTIONAL HISTORY

OF THE

UNITED STATES



CHRISTIANI HUGENII
V A R I A
D E
O P T I C A.

I.

*Excerpta ex literis Dⁿⁱ Hugonii, Academiae Regiae
Scientiarum Socii, ad Autorem Diarii Eruditorum
de Catoptrico conspicio Dⁿⁱ Newtoni.*



VT desideras tibi sententiam meam exponam
de Telescopio Dⁿⁱ Newtoni. Licet nondum
viderim hujus inventi effectum, illud me posse
asserere persuasum habeo, pulcrum & ingenio-
sum esse, prosperumque eventum sortiturum;
si modo ad specula cava formanda detegi
queat, de quo minime desperandum puto,
materia quæ poliri possit, ut vivide radios reflectat, ut vitrum.
Commoda hujus conspicii præ illis, in quibus vitra tantum
adhibentur, sunt, primo quod speculum cavum, licet Sphæri-
cum, multo melius colligat radios parallelos in unum punctum,
quam nostra vitra Sphærica, uti Geometrice potest demon-
strari. Unde sequitur duorum conspiciolorum ejusdem lon-
gitudinis, quorum unum erit novæ illius inventionis, alte-
rum ordinario vitro objectivo instructum, primum, magnam
habens aperturam, majori copia collecturum radios ab ob-
jectis procedentes, licet parvum speculum quosdam inter-
cipiat,

cipiat, ideoque magis poterit amplificare objecta, quam alterum. Adeo ut Telescopium novum dimidiæ aut tertiæ partis longitudinis conspicii ordinarii, aut forte etiam minus, æqualem effectum cum hoc præstabit.

Secunda utilitas est, hoc invento vitari incommodum, quod a vitris objectivis separari nequit, mutua nempe duarum superficierum ad se inclinatio. Nam licet hæc parva sit, tamen obest radiis, qui vitra ad latera transeunt & magis oberit, si vellemus uti vitris hyperbolicis vel ellipticis quibus majores concedendæ forent aperturæ.

Tertiam utilitatem censeo, reflexione Speculi metallici non perire tot radios quot in vitris, quæ in utraque superficie reflectunt notabilem radiorum quantitatem & multos intercipiunt obscuritate suæ materiæ.

Cum præterea difficulter admodum vitrum detegatur quod longioribus conspiciis inserviri queat, quia sæpe non ubique homogeneous est, quartum novi Telescopii commodum erit, in metallo nil præter superficiei perfectionem requiri.

Qui viderunt conspiciillum Dni Newtoni, observarunt, illud aliquâ difficultate dirigi ad objecta; sed huic malo occurrere potest satis facile, jungendo huic conspiciillo alterum exacte parallelum, per quod primum quæretur objectum. Desiderabitur fateor alter observator, si conspiciillum catoptricum sit magnum, quoniam ille, qui observat, in illa observat extremitate, quæ maxime elevata est. Sed ad incommodum hoc non attendendum est, si spectetur utilitas inventi: Si loco speculorum Sphæricorum possent obtineri parabolica exacte formata & polita, conspiciilla hæc effectum præstarent quod de vitris ellipticis vel hyperbolicis speravimus; credo autem id in speculis facilius obtineri posse.

I I.

CONSTRUCTIO PROBLEMATIS OPTICI.

Propositio 39 Libri v. Alhazeni, & 22 lib. vi.

Vitellionis.

Puncta B, C, & circulus E K, cujus centrum est A, data sunt in eodem plano; inveniendum est punctum K in peripheria circuli, ita ut lineæ B K, C K faciant cum linea A K angulos inter se æquales.

TAB. LVI;
fig. 1.

Ductis AB, AC; fiat AC, AF:: AF, AQ; & AB, AE:: AE, AP: sint etiam AP, & AQ, bifariam divisæ in R & S; in angulo BAC sint perfecta parallelogramma PAQH & ARZS. In RZ producta sumantur ZY & ZX, utraque æqualis lineæ quæ potest differentiam inter quadrata QS & ZS: fiat XV æqualis XY & parallela AB; & lateribus XV & XY describatur hyperbola, quæ transibit per puncta Q & H, uti patet per constructionem; hyperbola hæc QXH occurret circulo in puncto K; quod quæritur.

Ductis KO & KI parallelis AC & AB, quarum KI occurrit YX in puncto D. Ob hyperbolam rectangulum YDX æquale est quadrato KD ordinatæ, vel quadrato OR; & rectangulum YTX æquale est quadrato HT, vel quadrato PR; & demto a rectangulo YTX, rectangulum YDX & a quadrato PR, quadratum OR, supererit rectangulum RDT vel AIQ, quod æquale erit rectangulo AOP. PO ergo est ad AI, vel OK ipsi æqualem, ut QI ad AO, vel IK; & ductis lineis KP, KQ triangula KOP, KIQ erunt similia & ideo æquiangula; idcirco anguli APK, AQK, qui iidem sunt, vel supplementa angulorum æqualium OPK, IQK erunt inter se æquales; sed per constructionem AB, AE vel AK, :: AK vel AE, AP; ideo duo triangula BAK, KAP sunt similia, & ob eandem causam duo triangula CAK, KAQ, sunt etiam similia; ideo angulus BKA est æqualis angulo APK, &

angulus CKA æqualis ang. AQK , sed demonstravimus angulos APK & AQK esse æquales, ergo anguli BKA , CKA erunt inter se æquales $Q.E.D.$

Si punctum H cadat in circumferentiam circuli punctum H erit punctum K , quod quæritur & lineæ HP , KP , KO in unam HP coalescunt; & similiter lineæ HQ , KQ , KI in unam HQ , & quæ superius demonstrata sunt & hic locum habent, in quo casu Hyperbolâ non indigemus.

III.

A L I T E R.

Dato Speculo Cavo aut Convexo, itemque Oculo & Puncto Rei visæ, invenire Punctum Reflexionis.

TAB. LVI.
fig. 2.

ESto speculum ex sphæra quæ Centrum habeat A punctum; oculus vero sit in B , & punctum visibile in C , Planumque ductum per A , B , C , faciat in sphæra Circulum Dd , in quo invenienda sint Reflexionis Puncta. Per tria Puncta A , B , C , describatur Circuli Circumferentia, cujus sit Centrum Z ; occurrat autem ei producta AE , Perpend. BC , in R ; & sit duabus RA , OA , tertia Proportionalis NA ; eritque NM , Parallela BC , altera Asymptoton. Rursus sint Proportionales EA , $\frac{1}{2} AO$, AI , & summa IY æquali IN , ducatur YM Parallela AZ ; eaque erit altera Asymptotos. Denique sumptis IX , IS , quæ singulæ possint dimidium quadratum AO , una cum quadrato AI ; erunt Puncta X & S in Hyperbola, aut sectionibus oppositis Dd , ad inventas Asymptotos describendis, quarum intersectiones cum Circumferentia DO , ostendent Puncta Reflexionis quæsita. Constructio hæc, in omni Casu, quo Problema solidum est, locum habet, præterquam in uno, ubi non Hyperbola sed Parabola describenda est; cum nimirum Circumferentia per Puncta A , B , C , descripta, tangit Rectam AE .

COM-

IV.

C O M P E N D I U M.

Ductâ lineâ AT , parallelâ CB , eaque bisecta in V ,^{TAB. LVII, fig. 3.} punctum hoc est illud, per quod transire debet una Hyperbolarum Oppositarum, quarum Asymptoti inventæ fuerunt YM , MN .

Sed en Tibi bonam illam Constructionem, quæ in omni-^{TAB. LVI, fig. 4.} bus Casibus obtinet. Sit Circulus datus ED , cujus Centrum est A ; Puncta data, B & C .

Ductis Lineis AB , AC , fiant Proportionales BA (Radius Circuli) & FA : Eodem modo CA , (Radius Circuli) & GA . Tum jungatur FG , eaque bisecetur in H ; & per hoc punctum ducantur Lineæ LHK , MHN , se invicem intersecantes ad Angulos Rectos, quarumque LHK sit Parallela ei quæ bisecat Angulum BAC . Hæ sunt duæ Asymptoti Hyperbolarum describendarum per puncta F & G , & quarum una transibit etiam per Centrum A , quarum Intersectiones cum Circuli Peripheria notabunt puncta Reflexionis quæsitæ.

V.

A L I A S O L U T I O.

Problema Alhazeni.] Dato Circulo, cujus Centrum^{TAB. LVI, fig. 5.} A , Radius AD , & punctis duobus B , C ; invenire punctum H in Circumferentia Circuli dati, unde ductæ HB , HC , faciant ad Circumferentiam Angulos æquales.

Ponatur Inventum, ductaque AM recta, quæ bifariam secet Angulum BAC , ducatur ei perpendicularis HF , itemque BM , CL . Jungatur porro AH , cui perpendicularis sit HE ; rectisque BH , HC , occurrat AM in punctis K , G .

Sit

Sit jam $AM = a$ Quia ergo æquales Anguli KHE & CHZ ,
 $MB = b$ five EHG ; estque EHA angulus re-
 $AL = c$ ctus; erit ut KE ad EG , ita KA ad
 $LC = n$ AG . Quia verò BM ad MK , ut HF
 ad FK , erit,
 ut $BM + HF$ ad HF , ita MF ad FK ,
 Radius $AD = d$ i.e. $b + y : y :: a - x : \frac{ay - xy}{b + y}$. add. $FA = x$
 $AF = x$ fit $KA = \frac{ay + bx}{b + y}$
 $FH = y$

Rursus, quia CL ad LG , ut HF ad FG , erit permutan-
 do & dividendo $CL - HF$ ad HF , ut LF ad FG ,
 $n - y : y :: c - x : \frac{cy - xy}{n - y}$, quâ ablatâ ab $AF = x$, fit

$GA = \frac{nx - cy}{n - y}$. Est autem $EA = \frac{dd}{x}$, quia Proportionales

FA, AH, AE : Ergo $EA - GA$, hoc est, EG , $= \frac{dd}{x} -$

$\frac{nx + cy}{n - y}$. Et $KA - EA$, hoc est, $KE = \frac{ay + bx}{b + y} - \frac{dd}{x}$.

Sed diximus, quod KE ad EG , ut KA ad AG ; i.e.

$\frac{ay + bx}{b + y} - \frac{dd}{x} : \frac{dd}{x} :: \frac{nx + cy}{n - y} : \frac{ay + bx}{b + y} - \frac{nx - cy}{n - y}$.

Unde invenitur

$2anxxxy + 2bnx^3 - ddbnx - ddnxy = +naddy + bddx$
 $- 2acxyy - 2bcxxy + ddbcxy + ddcyy - addyy - bddxy$

Est autem $\frac{2bbc}{a}x^3 = \frac{2bbcd dx}{a} - \frac{2bbcyxx}{a}$, quia $xx = dd - yy$.

Et quia $n = \frac{bc}{a}$, ergo $\frac{-2bbcxxy}{a} - \frac{ddbcyx}{a} - 2acxyy$
 $+ ddcyy = -addy = bddxy$:

Et

Et divisis omnibus per y & ductis in a

$$\begin{aligned} -2bbcx - ddbcx - 2aacxy + ddca y &= -aaddy - bddax \\ abddx - cbddx + acddy + aaddy &= 2aacxy + 2bbcx \\ abddx - cbddx + acddy + aaddy & \end{aligned}$$

$$\frac{\quad}{2aac + 2bbc} = xy, \text{ quæ æquatio}$$

est ad Hyperbolam.

Vel quia $bc = na$, $\frac{abddx - anddx + acddy + aaddy}{2aac + 2bbc} = xy.$

Sit $\frac{add}{aa + bb} = p$; Ergo $\frac{pbx - pnx + pcy + pay}{2c} = xy.$

Unde porrò non difficulter invenitur sequens Constructio: TAB. LVI.
fig. 6.
jungantur BA, AC, & applicato seorsim ad utramque Quadrato Radii AD, fiant inde AP, AQ; & juncto PQ, dividatur ipsa bifariam in R, & per punctum R ducantur RD, RN, sese ad Rectos Angulos secantes, quorumque RD, sit parallela AM, quæ dividet bifariam Angulum BAC. Erunt jam RD, RN Asymptoti oppositarum Hyperbolarum, quarum altera per Centrum A transire debet, quæque secabunt Circumferentiam in punctis H quæsitis. Transibunt autem Hyperbolæ per Puncta P, Q.

Ratio Constructionis apparet, ductis P γ , & Q ζ , perpendicularibus in AM. Fit enim A γ = $\frac{add}{aa + bb}$ sive p ; &

A ζ = $\frac{ap}{c}$. Item P γ = $\frac{pn}{c}$, & Q ζ = $\frac{pb}{c}$. Quare AO = $\frac{pc + pa}{2c}$,

& OR = $\frac{pb - pn}{2c}$. Unde Cætera facilia.

pag. præced. lin. pen. lege -2acxyy
lin ult. lege -addy - bddxy:

VI.

*Excerpta ex litteris Dⁿⁱ. Hugonii Acad. Reg. scient.
Socii, ad auctorem Diarii Paris. de novo Mi-
croscopio ex Hollandia allato.*

Microscopium hoc ex unico formatur exiguo globulo vi-
treo, simili illis, quibus in Hollandia & Anglia ani-
malcula fuere observata in aqua puteali & pluvia, ut & illa in
qua piper fuit maceratum, de quibus egisti in 9. & 11. diario
hujus anni (1678); sed globuli de quibus nunc ago aliis hisce
minores sunt.

Inter ipsos quos ex Hollandia attuli quidam magnitudine
non superant arenæ granulum; alii adeo exigui sunt ut vix vi-
deri queant, quare objecta in immensum amplificant; eo enim
hæc majora apparent quo globuli sunt minores.

Objectum observandum inter vitri laminam & lapidis spe-
cularis lamellam includitur; hæc machinæ adaptantur quæ
mihi aliis huc usque usitatis magis commoda videtur. Exigua
guttula æquæ, in qua per duos aut tres dies piper fuit mace-
ratum, ita inclusa, magna videtur natantibus pisciculis bene re-
pleta piscina.

Quæ pecularia circa aquam hanc observavi, ne quæ in
diario vestro sunt relata iterum memorem, hæc sunt; ex
omni pipere non eadem generantur animalcula; piper quod-
dam animalcula ceteris majora format, sive hoc a piperis ve-
rustate pendeat, sive ab alia causa, quæ in sequentibus de-
tegi poterit.

Similia animalcula ex aliis seminibus ut ex semine corian-
dri etiam producuntur.

Hoc idem observavi in succo Betulæ, ubi per quinque
aut sex dies hunc servaveram.

Quidam animalcula viderunt in aqua in qua nux aroma-
tica, aut casia, macerata fuere: & probabile admodum est
in multis aliis rebus similia detegi posse.

Quis

Quis forte defendet animalcula haec corruptione, aut fermentatione, generari; sed alia dantur quorum origo ab hac diversa est, talia sunt quæ in animalium semine deteguntur, quæ cum hoc ipso nata videntur, & tanta copia observantur ut totum semen quasi ex hisce constet.

Translucida omnia sunt, celerrime moventur, & ranis, antequam horum pedes formentur, similia sunt.

Hæc animalcula in Hollandia primum fuere observata, & horum inventio admodum mihi utilis videtur, & quæ opus suppediet illis qui in animalium genesin inquireunt.

F I N I S.



LIBRARY OF THE

THE UNIVERSITY OF CHICAGO
CHICAGO, ILL.
1891

1891




CHRISTIANI HUGENII
EXPERIMENTA
P H Y S I C A.

CHRISTIAN HUGHES
EXPERIMENTAL
PHYSICS

CHRISTIANI HUGENII
EXPERIMENTA
P H Y S I C A.

*Excerpta ex literis Dⁿⁱ Hugonii, Academiae regiae scientiarum Socii, ad Auctorem Diarii Eruditorum, de
Phænomenis aquæ aëre purgatæ.*



Ntequam tibi communicarem quæ observavi de suspensione aquæ in vacuo, altera vice experimenta instituere volui, ut de observationibus olim a me factis certus essem, & ut melius penetrare possem in causas miri adeo effectus. Primum tibi ipsas referam observationes, & dein pergam ad conjecturas de ipsarum causa.

Experimenta quæ illustris Boyleus anno 1661 publicavit, cum descriptione machinæ Pneumaticæ mihi ab eo tempore dederunt occasionem examinandi hanc materiam; Unum ex experimentis illius est, si tubo vitreo, 4 pedes longo, aqua repleto, cujus extremitas aperta, everso tubo, immergitur aqua vitro contento, superimponas recipiens vel vas, unde aër educitur, post exhaustum aërem, quantum ope machinæ fieri potest, aqua tubi descendet in vitrum, donec ad altitudinem unius tantum pedis sustineatur, superiore tubi parte aquâ & aëre manente vacuâ. Censet optime, aquam ad illam altitudinem unius pedis supra superficiem aquæ in vitro hæ-

hærere propter aërem in recipiente superstitem, & qui ope machinæ, non satis exactæ, annihilari non potuit.

TAB. LVJ.
fig. 7.

Similem construi machinam curaveram; & licet nondum mutaveram quæ in sequentibus correxi, ita tamen omnia adaptaveram, ut instituto experimento memorato aqua in tubo ad libellam aquæ in vitro descenderit; Quare in instituendo experimento non tubo longitudinis memoratæ indigebam. Adhibui tubum novem pollicum cum globo cavo in extremitate ut patet in hac figurâ.

Concipiendum est vitrum CC in totum aquâ repleti, extremitatemque apertam immergi aquâ in vitro D; utrumque obtegatur vase B, cujus os apertum applicatur molli cuidam cimento, quo lamina AA induitur; hæc perforata est in medio parvo foramine, per quod exit aër, quando agitur antlia; si adhibita aqua frigida experimentum instituatur in totum vas C evacuatur, donec aqua ad libellam aquæ in vitro D descendat.

EXPERIMENTUM I.

Aqua, sublatâ aëris pressione, hæret in tubo.

Sed ad finem mensis Decembris ejusdem anni 1661 cum reliquisssem aquam illam in vacuo per 24 horas, (quo plane purgatur bullis aëris quas ejicit, quando adhibetur frigida) cumque implevissem vas C, admiratus vidi, licet optime eduxerim aërem ex vase B, aquam nullatenus descendere ex vase, quod plenum remanebat. Non poteram suspicari ullum in machinâ meâ vitium dari, nec vas B non bene fuisse obturatum; sed ut quidquid rei esset expiscarer, detraxi phialam C ex vase, & postquam in hac admisi parvam bullulam aëris, reposui phialam ut ante; & agitatâ machinâ, vidi tandem omnem aquam descendisse prope ad libellam illius quæ erat in vitro D. Id mihi persuasit, non dari vitium in machinâ & aquam aëre purgatam manere suspensam; licet vas B fuerit plane aëre vacuum vel ad minimum ita, uti erat quando aqua non-

nondum aëre purgata descendebat ex Phialâ; altera vice ut aqua descenderet, effeci immissâ in collum Phialæ bullâ adeo parvâ, ut ægre videri posset.

EXPERIMENTUM II.

Notabile quid in descensu aquæ aëre purgatæ.

SEd alio tempore mihi quid valde memorabile contigit. Cum non immissem bullam aëream, post exhaustum aërem bullam formari observavi in inferiori parte colli Phialæ; Hæc bulla, continuo magis magisque aucta, ubi ad magnitudinem parvi pili pervenit, reliquit vitrum & incepit adscendere in collo Phialæ, ubi autem pervenit ad altitudinem unius pollicis supra superficiem aquæ in vitro D, non ulterius adscendit, sed subito sese expandit superiora versus & unico momento occupavit totam Phialam, ex qua eodem tempore aqua descendit per parvum id spatium, quod reliquum erat inter interiorem colli superficiem & bullam, quæ extensa erat, omnisque remansit infra illam altitudinem unius pollicis, ad quam bulla cæpit sese expandere. Omnia hæc porro mihi contigerunt instituenti experimenta cum tubis duorum pedum & majoribus, ubi aqua manebat suspensa eodem modo ut in tubo 9 pollicum.

Communicavi hæc experimenta cum societate regia Anglicana, sed noluerunt statim illis fidem dare, mihi autem indicarunt verisimiliter aquam Phialæ non descendisse, propter aërem non bene evacuatum: sed respondi, nullam dari rationem illud suspectandi si attendamus ad illud quod notavi in fine experimenti fuisse observatum; & præterea me ex experimentis frequenter repetitis de bona machinæ conditione certissimum esse. Tandem cum anno 1663 essem in Angliâ me præsentem in consessu Societatis Regiæ idem experimentum eodemque cum successu institutum est, licet tubi fuerint quatuor & quinque pedum; dein in mentem venit D^{no} Boyle idem instituere experimentum, non adhibita anthrâ, cum argento vivo in tubo vitreo, cujus extre-

mitas aperta immersa erat in alio argento vivo; quum primo detexisset methodum perfecte Mercurium aëre purgandi per tres vel quatuor dies. Tandem experimentum successit, & cum in experimento Torricelliano Mercurius descendat ad altitudinem 27 vel 28 pollicum supra superficiem Mercurii, in quo impositus est tubus, ita a D^{no} Boyle, & eodem etiam tempore a D^{no} Vicecomite Brounker, Præsidente Societatis Regiæ Anglicanæ, fuit institutum, ut primo hæreret ad altitudinem 34 pollicum, dein 52, postea 55 & tandem ad altitudinem 75 pollicum, tubo semper manente pleno, & huc usque nondum notum est, quænam sit omnium maxima altitudo possibilis. D^{us} Boyle etiam observavit, extracto tubo e Mercurio, in quo aperta ejus extremitas erat imposita, & retento tubo non clauso in aëre libero, Mercurium nihilominus non cecidisse. Porro in his experimentis, ut in illis quæ cum aquâ instituuntur, minimâ aëris bullâ in tubo, sive sponte sive concussione formatâ, subito Mercurium deprimit ad ordinariam altitudinem 27 vel 28 pollicum.

EXPERIMENTUM III.

Adbibito spiritu vini loco aquæ.

SEd ut ad experimenta nostra redeam, non solum illa iterum cum aqua institui, sed & cum Spiritu vini rectificato, & inveni, ad purgationem aëris tantum requiri, ut per unam horam in vacuo relinquatur, licet producat plus aëris quam aqua, uti ex hujus operationis circumstantiis quas referam quæque notabiles satis sunt, æstimari facillime potest. Postquam vas B proxime ope antliæ aëre evacuatum est, magnæ bullæ spiritus vini exeunt & tanta quidem copia, ut pars ejiciatur supra oram vitri D, quod pariter accidit in aquâ parumper calefactâ; sed non in illâ quæ frigida immititur. Illæ ebullitiones continuo minuuntur, ita ut ex vini Spiritu, tantum majores aëris bullæ ad certa temporis intervalla singulatim exeant, & tandem nil omnino emergat.

In---

Interim bullæ, quæ ascenderunt in tubum C, ita dilatantur ut plane impleant globum, ut & totam colli longitudinem, ita ut omnis vini spiritus fugatus sit, & ut pariter emittat multas magnas bullas per aperturam; quod clare indicat, esse aërem in lagena, vel aliam materiam elasticam ut aër, quandoquidem illa fugat spiritum vini longe infra superficiem illius qui est in vitro D contentus: etiam si iterum aërem intrare iuas in vas B, spiritus vini quidem adscendet in lagenam C, non autem plane illam replebit, sed superius hærebit satis notabilis aëris bulla.

EXPERIMENTUM IV.

Aër, ex Spiritu vini aut aqua exhaustus, hæc corpora iterum intrat.

SEd hic notandum, bullam illam si ita relinquatur per spatium unius vel duarum horarum, semper evanuisse, & in spiritum vini, unde emerferat, rediisse. Expertus etiam fui, si immittatur porro bulla veri aëris magnitudine unius pisi, etiam illam periisse, postquam per unam noctem relicta fuerit. Idem quoque accidit in aqua. Sed multo majus tempus requiritur, ut evanescat bulla.

Quod attinet causam præcipui nostri Phænomeni, suspensionis nempe aquæ & Mercurii, hæc est quam mihi persuadere potui huc usque omnium verisimillimam.

Præter pressionem aëris, quæ sustinet Mercurium ad altitudinem 27 pollicum in experimento Torricelliano, & quam dari ex infinitis aliis effectibus, quos videmus, constat, concipio & aliam pressionem illâ fortiolem materiæ aëre subtilioris, quæ haud difficulter penetrat vitrum, aquam, Mercurium, & omnia alia corpora quæ aëri impene-trabilia observamus. Hæc pressio addita ad aëris pressionem potest sustinere 75 pollices Mercurii & forte adhuc plures, quamdiu tantum agit in superficiem inferiorem, vel in superficiem Mercurii, in quem aperta tubi extremitas immer-

gitur: sed quam primum materia hæc potest agere etiam ad alteram partem (quod evenit si tubum concutiendo, vel immittendo parvam æris bullam, occasio detur huic materiæ effectum suum inchoandi) pressio illius æqualis erit ab utraque parte, ita ut sola supersit æris pressio quæ sustinet Mercurium ad ordinariam altitudinem 27 pollicum; Eadem de causa in experimento aquæ ære purgatæ, post remotam pressionem æris evacuando recipiens B, altera illa pressio ejusdem materiæ agit etiam ut antea in superficiem aquæ in vitro D, & cohibet ne aqua in Phiala C descendat. Sed ubi minima bulla æris intrat phialam, materia quam dixi transire per vitrum & aquam, subito inflat bullam, editque pressionem æqualem illi, quæ agit in superficiem aquæ in vitro D, quare omnis aqua phialæ defluit, & ad libellam cum illa, quæ est in vitro sese constituit.

Quæret forte quispiam cur pressio ejus materiæ non agat in aquam suspensam in phiala C, & in Mercurium in tubo Dnⁱ Boyle, etiam dum vasa hæc plena sunt, quoniam supposui, illam haud difficulter penetrare vitrum æque ac aquam & Mercurium? Et quare particulæ ejus materiæ non se jungant, & incipiant pressionem, cum continuo in aqua & Mercurio eant & redeant, & vitrum non impediat illarum communicationem cum particulis exterioribus.

Ut huic difficultati fiat satis, quæ revera maxima est, dicam, licet partes ejus materiæ, quam supposui, transitum inveniant inter illas, ex quibus vitrum aqua & Mercurius formantur, non tamen dari transitum satis latum ut plures simul transeant, neque ut se moveant vi, quæ requiritur ut dispergantur partes Mercurii vel aquæ, quæ inter se habent quendam nexum. Et ex hoc ipso nexu sequitur, (licet ad partem superficiem interioris vitri, quæ tangit aquam vel Mercurium suspensum, plures partes premantur actione particularum ejus materiæ, cum tamen plurimæ partes aquæ aut Mercurii non premantur, quæ a partibus vitri teguntur,) partes aquæ aut Mercurii sese mutuo sustinere, omnesque suspensas hære; quia minor est pressio in superficiem aquæ vel ar-

gen.

genti vivi, quæ contingit vitrum, quam in inferiorem, quæ tota exposita est actioni materiæ, a qua secunda pendet pressio. Solutionem hanc fateor non mihi ita satisfacere, ut nullus mihi supersit scrupulus; nihilominus tamen persuasum habeo novam illam dari pressionem, præter aëris pressionem, cum ob experimenta supra relata tum ob duo alia nunc referenda.

EXPERIMENTUM V.

Laminæ metallicæ arctè inter se cohærent in vacuo licet nihil inter has detur.

QUando duæ laminæ metallicæ vel marmoreæ, quarum superficies sint perfecte planæ, ad se mutuo applicantur, ita cohærent, ut superiore elevatâ inferior eam insequatur, cujus effectus causa tribuitur merito pressioni aëris in superficies externas; duæ mihi sunt laminæ, quarum quævis circiter est magnitudinis pollicis quadrati, quæ ex materiâ conflatæ sunt, ex qua olim specula formabantur, & quæ ita junguntur, ut, licet nihil interponas, superior non solum alteram sustineat, sed interdum etiam pondus trium librarum cum inferiori conjunctum; in quo statu perseverant quamdiu desideraveris.

Has ita junctas & oneratas tribus libris suspendi in machinæ meæ recipiente, quod aëre evacuavi in tantum, ut superstes aër non pressione sua aquam ad altitudinem unius pollicis sustineret, & nihilominus laminæ meæ separatæ non sunt.

Idem etiam institui experimentum interposito spiritu vini inter laminas & inveni quod in recipiente vacuo aëre sustinerent sine separatione eadem pondera, quæ sustinebant recipiente aëre pleno.

Videtur id mihi manifeste satis indicare magnam superesse pressionem in recipiente, postquam aëre vacuus est, & hanc non magis quam ipsius aëris pressionem in dubium vocari posse; sed & alia ad illius confirmationem.

E X P E R I M E N T U M VI.








Effectus Siphonis in vacuo.

NOtum est, effectum siphonis crurum inæqualium, quo evacuatur aqua vasis supra oram, non amplius tribui fugæ vacui, sed ponderi aëris, qui premendo in superficiem aquæ in vase, illam cogit ut in siphonem adscendat, dum in alio crure illa gravitate suâ descendit. Inveni methodum qua effici, ut aqua e siphone fluxerit, postquam recipiens vacuum erat aëre; & observavi effectum, si aqua purgata fuerit aëre, eodem modo ac extra recipiens procedere.

Brevissimum siphonis crus erat octo pollicum & apertura duarum linearum. Nec dubitari debet quin recipiens aëre bene vacuum fuerit; nam id possum affirmare, tum quoniam nullum antliâ aërem ulterius extrahere potui, tum ob alia signa certiora.

Magis ergo confirmatur nostra hypothesis materiam dari prementem aëre subtiliorem. Si quis laborem in se suscipere vellet quærendi, quanta sit vis hujus pressionis quod melius fieri non potest nisi prosequendo experimenta cum tubis Mercurio plenis longioribus, quam quibus usus est Dñus Boyle, inveniet forte, vim illam satis validam esse ad efficiendam unionem partium vitri & aliorum corporum, quæ nimis arcte cohærent, quam ut juncta tantum forent per contiguitatem & quietem uti voluit Cartesius.

F I N I S.



I N D E X R E R U M

Quatuor Tomis contentarum.

T O M U S P R I M U S O P E R A M E C H A N I C A.

HOROLOGIIUM. pag. 1. *Hagæ-Com.*
ann. 1658. in quarto.

HOROLOGIIUM OSCILLATORIUM, si-
ve de Motu Pendulorum ad Horo-
logia aptato Demonstrationes Geo-
metricæ. p. 15. *Parisiis 1673. in fol.*

Descriptio Horologii. 33.

Tabula Æquationis Dierum. 44.

De Descensu Gravium. 52.

De Descensu super plano inclinato. 62.

Dato in Cycloide puncto, rectam per il-
lud ducere quæ Cycloidem tangat. 69.

De Motu in Cycloide. 72.

In Cycloide, cujus axis ad perpendicularum
erectus est, vertice deorsum spectante,
tempora descensus quibus mobile, à
quocunque in ea puncto dimissum, ad
punctum imum verticis pervenit, sunt
inter se æqualia; habentque ad tem-
pus casus perpendicularis per totum
axem cycloidis eam rationem, quam
semicircumferentia circuli ad diame-
trum. 87.

De Linearum curvarum evolutione &
dimensione. 89.

Semicycloidis evolutione, à vertice cœ-
pta, alia semicyclois describitur evo-

luta æqualis & similis, cujus basis est
in ea recta quæ cycloidem evolutam in
vertice contingit. 96.

Cyclois linea sui axis, sive diametri cir-
culi genitoris, quadrupla est. 97.

Cujus lineæ evolutione parabola describa-
tur ostendere. 99.

Rectam lineam invenire æqualem datæ
portioni curvæ paraboloidis, ejus nem-
pe in qua quadrata ordinatim appli-
catarum ad axem, sunt inter se sicut
cubi abscissarum ad verticem. 100.

Conoidis parabolici superficiei curvæ cir-
culum æqualem invenire. 102.

Sphæroidis oblongi superficiei circum-
æqualem invenire. 103.

Sphæroidis lati sive compressi superficiei
circulum æqualem invenire. Ibid.

Conoidis hyperbolici superficiei curvæ cir-
culum æqualem invenire. 104.

Curvæ parabolicæ æqualem rectam li-
neam invenire. 105.

Lineas curvas exhibere quarum evolutio-
ne ellipses & hyperbolæ describantur,
rectasque invenire iisdem curvis æ-
quales. 107.

Datâ lineâ curvâ, invenire aliam cujus
evo-

evolutione illa describatur; & ostendere quod ex unaquaque curva geometrica, alia curva itidem geometrica existat, cui recta linea aequalis dari possit. 108.

De Centro Oscillationis, seu Agitationis. 107.

Ponderibus quotlibet ad eandem partem plani existentibus, si à singulorum centrīs gravitatis agantur in planum illud perpendiculares; hæ singulæ in sua pondera ductæ, tantundem simul efficient, ac perpendicularis, à centro gravitatis ponderum omnium in planum idem cadens, ducta in pondera omnia. 123.

Dato pendulo ex ponderibus quotlibet composito, si singula ducantur in quadrata distantiarum suarum ab axe oscillationis, & summa productorum dividatur per id quod fit ducendo ponderum summam, in distantiam centri gravitatis communis omnium ab eodem axe oscillationis; orietur longitudo penduli simplicis composito isochroni, sive distantia inter axem & centrum oscillationis ipsius penduli compositi. 128.

Dato pendulo ex quocunque ponderibus æqualibus composito; si summa quadratorum factorum à distantis, quibus unumquodque pondus abest ab axe oscillationis, applicetur ad distantiam centri gravitatis communis ab eodem oscillationis axe, multiplicem secundum ipsorum ponderum numerum, orietur longitudo penduli simplicis composito isochroni. 131.

Datâ figurâ planâ & in eodem plano lineâ rectâ, quæ vel secet figuram vel non, ad quam perpendiculares cadant

à particulis singulis minimis & æqualibus, in quas figura divisa intelligitur; invenire summam quadratorum ab omnibus istis perpendicularibus; si ve planum, cujus multiplex, secundum particularum numerum, dictæ quadratorum summæ æquale sit. 135.

Datis in plano punctis quotlibet; si ex centro gravitatis eorum circulus quilibet describatur; ducantur autem ab omnibus datis punctis, ad punctum aliquod in circuli illius circumferentia lineæ rectæ; erit summa quadratorum ab omnibus semper eidem plano æqualis. 138.

Si figura plana, vel linea in plano existens, aliter atque aliter suspendatur à punctis, quæ, in eodem plano accepta, æqualiter à centro gravitatis suæ distent; agitata motu in latus, sibi ipsi isochrona est. 140.

Datâ figurâ solidâ, & lineâ rectâ interminatâ, quæ vel extra figuram cadat, vel per eam transeat; divisâque figurâ cogitatu in particulas minimas æquales, à quibus omnibus ad datam rectam perpendiculares ductæ intelligantur; invenire summam omnium quæ ab ipsis fiunt quadratorum, si ve planum, cujus multiplex secundum particularum numerum, dictæ quadratorum summæ æquale sit. 142.

Figura quævis, si ve linea fuerit, si ve superficies, si ve solidum; si aliter atque aliter suspendatur, agiteturque super axibus inter se parallelis, quique à centro gravitatis figuræ æqualiter distent, sibi ipsi isochrona est. 148.

Dato plano, cujus multiplex per numerum particularum, in quas suspensa figura divisa intelligitur, æquetur qua-

I N D E X R E R U M.

- quadratis omnium distantiarum ab axe oscillationis; si illud applicetur ad rectam, æqualem distantie inter axem oscillationis & centrum gravitatis suspensæ magnitudinis, oriatur longitudo penduli simplicis ipsi isochroni. 149.
- Si spatium planum, cujus multiplex secundum numerum particularum suspensæ magnitudinis, æquetur quadratis distantiarum ab axe gravitatis, axi oscillationis parallelo; id, inquam, spatium si applicetur ad rectam, æqualem distantie inter utrumque dictorum axium, oriatur recta æqualis intervallo, quo centrum oscillationis inferius est centro gravitatis ejusdem magnitudinis. 150.
- Si magnitudo eadem, nunc brevius nunc longius suspensa, agitur; erunt, sicut distantie axium oscillationis à centro gravitatis inter se, ita contraria ratione distantie centrorum oscillationis ab eodem gravitatis centro. 153.
- Centrum oscillationis & punctum suspensionis inter se convertuntur. 154.
- Quomodo in figuris planis centra oscillationis inveniantur. 154.
- Centrum oscillationis Circuli. 157. Rectanguli. Ibid. Trianguli isoscelis. 158. Parabolæ. Ibid. Sectoris circuli. Ibid. Circuli, aliter quam supra. 160. Peripheriæ circuli. Ibid. Polygonorum ordinatorum. 161.
- Quomodo, in solidis figuris, oscillationis centra inveniantur. 165.
- Centrum oscillationis in Pyramide. 166. Coni. 167. Sphæræ. Ibid. Cylindri. 168. Conoidis Parabolici. Ibid. Conoidis Hyperbolici. 169. dimidii Coni. Ibid.
- Horologiorum motum temperare addito pendere exiguo secundo, quod super virga penduli, certa ratione divisa, sursum deorsumque moveri possit. 172.
- Centri oscillationis rationem haberi non posse, in pendulis inter Cycloides suspensis; & quomodo hinc orta difficultas tollatur. 177.
- De mensuræ universalis, & perpetuæ, constituendæ ratione. 178.
- Spatium definire, quod gravia, perpendiculariter cadentia, dato tempore percurrunt. 182.
- Secundi Horologii Constructio è circulari pendulorum motu deducta. 185.
- De Vi Centrifuga ex motu circulari, Theoremata. 188.
- BREVIS INSTITUTIO DE USU HOROLOGIORUM AD INVENIENDAS LONGITUDINES. 193. Hagæ-Com. Belgice edita.
- Reducere horologia ad rectam dierum mensuram vel cognoscere quanto citius vel tardius spatio 24 horarum moveantur. 196.
- Tabula Æquationis Dierum. 198.
- Ope Horologiorum mari invenire longitudinem loci in quo versaris. 202.
- Mari invenire horam diei. 204.
- Quomodo ex observatione ortus & occasus Solis & ex hora horologiorum longitudo mari inveniri queat. 205.
- Excerpta ex literis de successu horologiorum datis Londini $\frac{13}{27}$ Januarii 1665. 211.
- Experimentum circa pendula. 213. Journal des Sçavans 23. Fevr. 1665.
- DE HUGENIANA CENTRI OSCILLATIONIS DETERMINATIONE CONTROVERSIA. 215.
- Observationes Abbatis Catalani in propositionem, quæ fundamentum Tom. IV. Fffff est

I N D E X R E R U M.

- est 4^a. partis tractatus de Pendulis, Hugonii 217. *Journal des Sçavans* 1682. in initio.
- Domini Abbatis Catalani Examen Mathematicum Centri Oscillationis. 219. *ibid.*
- Excerpta ex literis Domini Hugonii, quibus respondet observationi Abbatis Catalani in 4^{am}. propositionem Tractatus de Centris oscillationis. 222. *ibid.* 29. Junii 1682.
- Exceptio Abbatis Catalani ad responsionem Hugonii. 225. *ibid.* 20. Julii 1682.
- Objectio Abbatis Catalani contra motum Pendulorum in Cycloidibus. 227. *ibid.* 7. Sept. 1682.
- Responsio ad objectiones Hugonii adversus methodum Abbatis Catalani de determinando Centro Oscillationis 228. *ibid.* 14. Sept. 1682.
- Excerpta ex litteris D. Bernoullii datis Basileæ ad Autorem Diarii Parisiensis, de Controversia, inter Abbatem Catalanum & Hugonium, de Centro oscillationis. 230. *ibid.* 24. April. 1684.
- Excerpta ex literis Dni. Hugonii ad Auctores Diarii Parisiensis, datis Hagæ 8. Junii 1684. quæ continent ejus responsionem ad exceptionem Dni. Abbatis Catalani, de centro Oscillationis. 232. *ibid.* 3. Julii 1684.
- Responsio Dni. Abbatis Catalani ad Literas Dni. Bernoulli de Controversia sua cum Dno. Hugenio de centro Oscillationis. 235. *ibid.* 11. Sept. 1684.
- Dni. Bernoulli narratio controversiæ inter Dnos. Hugonium & Abbatem Catalanum agitatæ de centro Oscillationis, quæ loco Animadversionis esse poterit in Responsionem Dni. Catalani. 237. *Acta eruditorum Lips.* mensis Julii. 1686.
- Litteræ Dni. Marchionis de l' Hôpital ad Dum. Hugonium, in quibus contendit, se regulam hujus Auctoris de Centro Oscillationis penduli compositi demonstrare per causam Physicam, & respondere simul Dno. Bernoulli. 242. *Histoire des ouvrages des Sçavans.* mensis Junii. 1690.
- Observationes Dni. Hugonii in literas præcedentes & in relationem Dni. Bernoulli, cujus in iis fit mentio. 246. *ibid.*
- MACHINÆ QUÆDAM ET VARIA CIRCA MECHANICAM. 249.
- Excerpta ex Litteris Domini Hugonii, novam quandam Inventionem Horologiorum exactissimorum ac portatiliū concernentibus. 253. *Journal des Sçavans.* 25. Febr. 1675.
- Nova Libella, Telescopio instructa, propriam secum ferens probationem & quæ in unica statione verificatur, & rectificatur. 254. *ibid.* 9. Jan. 1680.
- Rectificationis Libellæ Demonstratio. 258. *ibid.* 26. Feb. 1680.
- Astrosopia Compendiaria, Tubi Optici molimine liberata. 261. *Hagæ. Com.* 1684. in quarto.
- Auctarium. 273. *ibid.*
- Excerpta ex literis Dni. Hugonii de novâ methodo construendi Barometrum. 276. *Journal des Sçavans* 12. Dec. 1672.
- Nova vis movens mediante pulvere

I N D E X R E R U M.

- nittrato & aëre. 280. *Divers ouvrages de Mathématique & de Physique de Mrs. de l' Académie Royale des sciences.* p. 320.
- Demonstratio Æquilibrii Bilancis. 282. *ibid.* p. 113.
- Si super planum Horizontale quod imponitur lineæ rectæ, quæ id dividit in duas partes, applicetur pondus, vis, quam illud pondus habebit ad defle-
tendum planum partem versus ad quam applicatur erit major, quam si positum sit prope dictam lineam. 283.
- Si planum Horizontale; oneratum plu-
rimis ponderibus, maneat in æquili-
brio, impositum lineæ rectæ, quæ id
secat in duas partes, centrum gravi-
tatis plani sic onerati erit in ipsa li-
neâ rectâ. 284.
- Duo gravia commensurabilia appensa ad
extremitates brachiorum Libræ erunt
in æquilibrio, si brachia sint in ratio-
ne reciproca gravium. 284.
- De potentiis fila funesve trahentibus.
287. *ibid.* p. 317.
- Datis positione quotlibet punctis; sive in
eodem plano fuerint, sive non: si à
puncto quod eorum commune est gra-
vitatibus centrum, ad unumquodque
datorum fila extendantur, eaque sin-
gula trahantur à potentiis quæ sint
inter se ut filorum longitudines, fiet
æquilibrium manente nodo communi in
dicto gravitatis centro. 288.
- Solutio problematis a G G. Leibni-
tio propositi. 290. *Nouvelles de la
republique des lettres Mensis Oct.* 1687.
- Detegere lineam juxta quam si corpus
descendat temporibus æqualibus æqua-
liter tellurem versus accedat. 290.
- Christiani Hugonii, Solutio Proble-
matis de linea in quam flexile se
pondere proprio curvat. 291. *Acta
Erud. Lips.* mensis Junii 1691.
- Hugonii Annotationes in Librum Pa-
risiis 1689. editum, de Manuaria
Nautica. 292. *Bibliothèque Univer-
selle.* mensis Sept. 1693.
- Responsum Dni. Renaldi ad Domi-
num Hugonium. 296. *Journal des
Sçavans* 16. & 27. Maji. 1695.
- Exceptio Dni. Hugonii ad Responsum
Dni. Renaldi. 305. *Histoire des ou-
vrages des Sçavans.* mensis April.
1694.

T O M U S S E C U N D U S. O P E R A G E O M E T R I C A.

CHRISTIANI HUGENII THEORE-
MATA DE QUADRATURA HY-
PERBOLES, ELLIPSIS ET CIRCULI,
EX DATO PORTIONUM GRA-
VITATIS CENTRO 309. *Lugd. Bat.*
1651. in quarto.

Omnis hyperboles portio ad triangulum
inscriptum, eandem cum ipsa Basin

habentem eandemque altitudinem, hanc
habet rationem; quam subsesquialtera
duarum, lateris transversi & diametri
portionis, ad eam quæ ex centro se-
ctionis ducitur ad portionis centrum
gravitatis. 323.

Omnis ellipsis vel circuli portio ad trian-
gulum inscriptum, eandem cum ipsa

I N D E X R E R U M.

- Basin habentem eandemque altitudinem, hanc habet rationem; quam subsesquialtera diametri portionis reliquæ, ad eam quæ ex figuræ centro ducitur ad centrum gravitatis in portione* 324.
- In Semicirculo & quolibet circuli sectore, habet arcus ad duas tertias rectæ sibi subtensæ hanc rationem, quam semidiameter ad eam, quæ ex centro ducitur ad sectoris centrum gravitatis.* 326.
- ΕΞΕΤΑΣΙΣ CYCLOMETRIÆ* Clarissimi Viri Gregorii à S. Vincentio, S. J. editæ Anno 1647. 328. *ibid.*
- Christianii Hugonii ad C. V. Franc. Xaverium Ainscom. S. J. EPISTOLÆ, qua diluuntur ea quibus ΕΞΕΤΑΣΙΣ Cyclometriæ Gregorii à Sto. Vincen io impugnata fuit.* 341. *Hagæ. Com. 1656. in quarto.*
- Epistola Cartesii.* 347.
- CHRISTIANI HUGENII DE CIRCULI MAGNITUDE INVENTA. Accedunt ejusdem Problematum quorundam illustrium Constructiones.* 351. *Lugd. Bat. 1654 in quarto.*
- Omnis circulus major est polygono æqualium laterum sibi inscripto & triente excessus quo id polygonum superat aliud inscriptum subduplo laterum numero.* 361.
- Omnis circulus minor est duabus tertiis polygoni æqualium laterum sibi circumscripti & triente polygoni similis inscripti.* 361.
- Omnis circuli circumferentia major est perimetro polygoni æqualium laterum sibi inscripti, & triente excessus quo perimenter eadem superat perimetrum alterius polygoni inscripti subdupla laterum numero.* 362.
- Circulo dato, si ad diametri terminum contingens ducatur, ducatur autem & ab opposito diametri termino quæ circumferentiam secet occurratque tangenti ductæ: erunt interceptæ tangentis duæ tertiæ cum triente ejus quæ ab intersectionis puncto diametro ad angulos rectos incidet, simul arcu abscisso adjacente majores.* 364.
- Omnis circuli circumferentia minor est duabus tertiis perimetri polygoni æqualium laterum sibi inscripti & triente perimetri polygoni similis circumscripti.* 365.
- Peripheriæ ad diametrum rationem invenire quamlibet veræ propinquam.* 366.
- Rectam sumere peripheriæ dati circuli æqualem.* 368.
- Dato arcui cuicunque rectam æqualem sumere.* 370.
- Omnis circuli circumferentia minor est minore duarum mediarum proportionalium inter perimetros polygonorum similium, quorum alterum ordinate circulo inscriptum sit, alterum circumscriptum. Et circulus minor est polygono istis simili cujus ambitus majori mediarum æquetur.* 373.
- Si inter productam circuli diametrum & circumferentiam recta aptetur radio æqualis, & producta circumferentiam secet, occurratque tangenti circumferentiam ad alterum diametri terminum: Intercipiet ea partem tangentis arcu adjacente abscisso majorem.* 376.
- Si diametro circuli semidiameter in directum adjiciatur, & ab adjectæ termino recta ducatur quæ circumferentiam secet, occurratque tangenti circumferentiam ad terminum*

nam diametri oppositum: Intercipiet ea partem tangentis arcu adjacente abscisso minorem. 377.

Portionis circuli centrum gravitatis diametrum portionis ita dividit, ut pars quæ ad verticem reliquâ major sit, minor autem quam ejusdem sesquialtera. 378.

Circuli portio semicirculo minor ad inscriptum triangulum maximum majorem rationem habet quam sesquiterciam, minorem vero quam diameter portionis reliquæ tripla sesquitertia ad circuli diametrum cum tripla ea, quæ à centro circuli pertingit ad portionis basin. 380.

Arcus quilibet semicircumferentiâ minor, major est suâ subtensâ simul & triente differentie quâ subtensa sinum excedit. Idem verò minor quam subtensa simul cum ea quæ ad dictum trientem sese habeat, ut quadrupla subtensa juncta sinui ad subtensam duplam cum sinu triplo. 382.

Circumferentiæ ad diametrum rationem investigare; & ex datis inscriptis in dato circulo invenire longitudinem arcuum quibus illæ subtenduntur. 384.

CHRISTIANI HUGENII ILLUSTRUM QVORUNDAM PROBLEMATUM CONSTRUCTIONES. 388 Ibid.

Datam spheram plano secare, ut portiones inter se rationem habeant datam. 388.

Cubum invenire dati cubi duplum. 391.

Datis duabus rectis duas medias proportionales invenire. 393.

Quadrato dato & uno latere producto, aptare sub angulo exteriori rectam magnitudine datam quæ ad angulum oppositum pertineat. 396.

Dato quadrato, & duobus contiguis lateribus productis, aptare sub angulo interiori rectam magnitudine datam quæ per angulum oppositum transeat. Oportet autem non minorem esse datam quam sit quadrati diameter dupla. 397.

Rhombo dato, & uno latere producto, aptare sub angulo exteriori lineam magnitudine datam quæ ad oppositum angulum pertineat. 397.

Rhombo dato & duobus contiguis lateribus productis, aptare sub angulo interiori rectam magnitudine datam quæ per oppositum angulum transeat. Oportet autem datam non minorem esse quam duplam diametri quæ reliquos duos rhombi angulos conjungit. 399.

In Conchoide linea invenire confinia flexus contrarii. 403.

CONTROVERSIA DE CIRCULI ET HYPERBOLÆ QUADRATURA. 405.

Vera Circuli & Hyperbolæ Quadratura Authore Jacobo Gregorio. 407. Patavii 1668. in quarto.

Serierum terminationes invenire. 423. & 426.

Ex data quantitate, eodem modo composita a duobus terminis convergentibus cujuscunque seriei convergentis, quo componitur ex terminis convergentibus ejusdem seriei immediate sequentibus; seriei propositæ terminationem invenire. 427.

Sectorem circuli, ellipseos, vel hyperbolæ, non esse compositum analyticè à triangulo ad centrum inscripto & trapezio circumscripto. 429.

Dato circulo æquale invenire quadratum. 446.

Ex dato sinu invenire arcum. 448.

I N D E X R E R U M.

Ex dato arcu invenire sinum. 448.

Invenire quadratum æquale spatio hyperbolico contento à curva hyperbolica, uno asymptoto & duabus rectis alteri asymptoto parallelis; quod spatium æquale est sectori hyperbolico cujus basis est eadem curva. 449.

Propositi cujuscunque numeri logarithmum invenire. 452.

Ex dato logarithmo invenire ejus numerum. 459.

Rectâ per datum punctum in diametro ductâ, semicirculum in ratione data dividere. 460.

Hugenii Observationes in Librum Jacobi Gregorii, de Vera Circuli & Hyperbolæ Quadratura. 463. *Journal des Sçavans* 2. Julii. 1668.

Invenire per logarithmos dimensionem Spatii Hyperbolici contenti inter Curvam & unam ex Asymptotis & duas lineas parallelas ad alteram Asymptoton. 465.

Domini Gregorii Responsum ad Animadversiones Domini Hugenii, in ejus Librum, de Vera Circuli & Hyperbolæ Quadratura. 466. *Philosophical Transactions.* n. 37.

Excerpta ex Literis Dni. Hugenii de Responso, quod Dnus. Gregorius dedit ad Examen Libri, cui Titulus est, Vera Circuli & Hyperbolæ Quadratura. 472. *Journal des Sçavans* 12. Nov. 1668.

Excerpta ex Epistola D. Jacobi Gregorii, continente quasdam ejus Considerationes, super Epistola D. Hugenii, impressâ in Vindicationem Examinis sui Libri, de Vera

Circuli & Hyperbolæ Quadratura. 476. *Philosophical Transactions.* n. 44.

CHRISTIANI HUGENII GEOMETRICA VARIA. 483.

Constructio Loci ad Hyperbolam per Asymptotos. 485. *Divers ouvrages de Math. & de Ph. de M^{rs}. de l'Acad. R.* p. 322.

Demonstratio Regulæ de Maximis & Minimis. 490. *ibid.* p. 326.

Regula ad inveniendas Tangentes linearum curvarum. 498. *ibid.* p. 330.

Christiani Hugenii Epistola de Curvis quibusdam peculiaribus. 507. *Histoire des ouvrages des Sçavans.* mensis Febr. 1693.

Invenire lineam rectam æqualem datæ portioni lineæ logarithmicæ. *Ibid.*

Alia curva cujus longitudo ope ipsius curvæ mensuratur. 508.

Quadratura Hyperboles adhibita curva illa. 508.

Curvæ ejusdem descriptio mechanica. 509. *Varia de catinaria.* 511.

Quadratura curvæ cujus æquatio est $x^3 + y^3 = xyn.$ 514.

Problema ab Eruditis solvendum: a Johanne Bernoullio in Actis Lipsiensibus mensis Maji Ann. 1693. propositum. 515.

C. H. Z. *De Problemate Bernoulliano in Actis Lipsiensibus proposito.* 516. *Acta Erud. Lips.* mensis Oct. 1693.

C. H. Z. *Constructio universalis Problematis a Clarissimo Viro Joh. Bernoullio propositi.* 518. *ibid.* Sept. 1694.

I N D E X R E R U M.

T O M U S T E R T I U S.

O P E R A A S T R O N O M I C A.

CHRISTIANI HUGENII DE SATURNI LUNA OBSERVATIO NOVA. 521.
Hagæ-Com. 1656.

CHRISTIANI HUGENII ZULICHEMII, SYSTEMA SATURNIUM, sive de Causis mirandorum Saturni Phænomenon; & Comite ejus Planeta novo. 527. Hagæ Com 1659.

Telescoporium nostrorum Descriptio. 537.
Quædam circa planetas & fixas observata. 539.

In Jovis disco zonæ candicantes. 539.

In Martis zona obscura. 540.

Fixarum diametri nulla latitudine. 540.

Phænomenon in Orione novum. 540.

Circa Saturnum observationes. 541.

Saturnus brachiorum expers inventus. 544.

Brachia Saturno renata. 545.

Brachia Saturni in ansas mutari cœpta. 546.

Ansæ Saturni amplius patefactæ. 547.

Comes infra Saturnum transire visus. 548.

Idem supra Saturnum transiens. 548.

Lunæ Saturniæ periodus. 548.

Eadem periodus accuratius supputata. 549.

Mensis Saturnicolarum vera longitudo. 551.

Tabula motus æqualis Lunæ Saturniæ in orbita sua respectu fixarum. 552.

Locus Lunæ Saturniæ quomodo supputetur. 553.

Non esse alteram ansarum quandoque altera minorem. 559.

Non etiam unam quam alteram citius ad medium Saturni Corpus applicari. 559.

Hevelii hypothēsis circa ansas examinatur. 560.

Causæ phænomenon Saturni à Robervalio excogitatae. 561.

Hodiernæ Siculi circa eadem phænomena opinio. 562.

Nostra hypothēsis qua ratione excogitata. 564.

Annulo Saturnum cingi. 565.

Eum ad Eclipticæ planum obliquè positum esse. 565.

Occurritur iis quæ de annulo objici possent. 566.

Saturnii major diameter Æquatori parallela ostenditur. 567.

Hevelii de inclinatione ansarum contraria opinio. 569.

Ricciolus sibi contrarius Lib. 7. Almag. novi. 570.

Uterior hypotheseos nostræ explanatio. 570.

Causa phaseos ansarum latissimarum. 571.

Clarior Saturnus propter ansas cernitur. 572.

Lunæ Saturniæ motus apparens ellipticus. 572.

Quomodo ansarum latitudo contrahatur. 573.

Quomodo patulæ videri ansæ desinant. 573.

Majorem Saturni diametrum necessario Æquatori parallelam semper videri. 574.

Ro.

I N D E X R E R U M.

Rotundæ phæos causæ. 575.
Quid sit in Saturni disco Zona nigricans. 576.
Saturnus quando necessario rotundus spectari debeat. 578.
Quenam Saturnicolis sint loca æquinoctiorum. 580.
Saturnus brachiorum expers futurus quomodo cognoscatur. 585.
Quibus temporibus rotunda phæsis reversura sit prædicitur. 587.
Quando latissimæ omnium ansæ apparituræ sint. 588.
De Saturni magnitudine & à terris distantia. 589.
Planetarum diametri. 589. & seq.
Diametri Solis ad Planetarum diametros ratio. 591.
Ratio observandi Planetarum diametros apparentes accuratissima. 593.
Diametri Veneris observatio. 594.
**EUSTACHII DE DIVINIS SEPTEMPE-
 DANI BREVIS ANNOTATIO IN SY-
 STEMA SATURNIUM CHRISTIANI
 HUGENII ad Serenissimum Principem Leopoldum Magni Ducis He-
 truriæ fratrem.** 597. *Hagæ-Com.* 1660.
Honorati Fabri, S. J. de Saturno Sententia. 610.
**CHRISTIANI HUGENII ZULACHEMII
 BREVIS ASSERTIO SYSTEMATIS
 SATURNII SUI, ad Serenissimum
 Principem Leopoldum ab Hetru-
 ria.** 619. *Hagæ-Com.* 1660.
Fabriani Systematis examen. 632.
**CHRISTIANI HUGENII DE SATURNI
 ANNULO OBSERVATIONES.** 635.
Observationes in Saturnum Parisiis habitæ in Bibliotheca Regia. 637.
Journal des Sçavans 11. Febr. 1669.
Vera annuli inclinatio. 637.
Phæsis rotunda. 638.

*Excerpta ex literis D. Hugonii, Aca-
 demix Regiæ Scientiarum Socii, ad
 Auctorem Diarii Eruditorum de fi-
 gura Planetæ Saturni.* 638. *ibid.* 12.
Dec. 1672.
Brachia Saturno renata. 638.
Umbra in disco Saturni. 638.
Saturnus rotundus. 639.
Linea æquinoctialis annuli. 640.
**CHRISTIANI HUGENII ΚΟΣΜΟΘΕ-
 ΠΟΣ, SIVE DE TERRIS COELESTI-
 BUS, EARUMQUE ORNATU, CON-
 JECTURÆ.** 641. *Hagæ-Com.* 1698.
*Fuisse qui Planetis incolas tribuerint,
 sed nihil præterea de iis inquisivisse.*
 646.
*Conjecturas hasce S. Scripturis non ad-
 versari.* 647.
*Conjecturas non esse vanas, quia non
 plane certæ.* 649.
*Ad sapientiam & pietatem facere quæ
 hic tractantur.* 649.
Copernici Systema exponitur. 650.
*Copernici doctrinam quæ rationes confir-
 ment.* 650.
*Planetarum magnitudinis inter se & ad
 Solem ratio.* 651.
*Micrometris præstare lamellas virgulas-
 ve tenues.* 652.
*Tellurem Planetis, & hos Telluri recte
 assimilari.* 652.
*Ex similitudine in hisce recte argumen-
 ta peti.* 652.
*Planetas solidos esse & gravitate polle-
 re.* 653.
Nec deesse illis animalia. 653.
Ut nec plantas. 654.
*Non nimiam in hisce fingendam dissimi-
 litudinem.* 655.
Aguas a Planetis non abesse. 656.
Nostræ tamen non prorsus similes. 657.
Nec

I N D E X R E R U M.

Nec alia ratione illic nesci & propagari stirpes quam apud nos. 657.
Idem & de animalibus verum esse. 658.
Summam animalium varietatem esse in Planetis. 660.
Idem in stirpibus locum habere. 660.
In Planetis esse animantia, quæ ratione utantur. 661.
Non obflare hominum vitia quo minus decorem terræ concilient. 662.
Nec rationem in Planetarum incolis à nostra diversam esse. 663.
Nec deesse illis sensus. 664. & seq.
Nec horum sensus longe alios esse ac nostratum. 667.
Ignem quoque Planetis communem esse. 669.
Magnitudinem corporum in Planetis existentium ex Planetarum magnitudine non recte conjici. 670.
In Planetis ut in Terra varia esse animalia quibus ratio competat. 670.
Et inter ea Hominibus similia. 670.
Planetarum incolas scientias excolere, & inter eas, Astronomiam. 672.
Et quæ ei inserviunt artes mechanicas. 673.
Ut & Geometriam, Arithmeticam. 674.
Et scribendi artem. 674.
Opticam. 674.
Has scientias homini præter naturam non esse. 675.
Planetícolas manus habere. 676.
Et pedes. 677.
Erectos oculos, vultumque. 677.
Nec tamen hinc sequi eorum formam nostræ plane similem. 678.
Planetícolas nobis vel æquales vel majores esse. 679.
Eos in societate vivere. 680.
Colloquiorum jucunditate frui. 680.

Domos adversus pluviam exstruere. 681.
Navigare, adeoque & artes, quæ eo faciunt excolere. 682.
Musicam. 683.
Quæ tamen à nostra diversa esse posset. 684.
Cur consonantia diapente post aliam similem vitiose ponatur? 685.
Demonstratio temperamenti in tono vocis adhibendi. 685.
Recensentur commoda quæ ad nos perveniunt ex animalibus, herbis, arboribus. 686.
Ex Metallis. 688.
Ex aqua, & aëre, variisque artificiis. 689.
Ex iis, quæ nostra ætate inventa sunt. 689.
Illa omnia verisimiliter non extare in Planetis, sed aliis æque dignis rependi. 690.
Christiani Hugonii Cosmotheoros, Liber II. 691.
Kircheri iter extaticum examinatur. 691.
Apparens qualis sit constitutio Solis & Planetarum in Mercurio. 694.
Qualis in Venere. 695.
In Marte. 696.
Jovem & Saturnum reliquis Planetis longe præstare, tam magnitudine, quam Lunarum multitudine. 697.
Proportio diametrorum tum Jovis, tum orbitalium satellitum ejus, ad orbitam Lunæ circa Terram. 698.
Tempora periodorum comitum Jovialium. 699.
Quenam sit Solis apparens magnitudo & lux in Jove, & quæ cognosci queat. 700.
Idem in Saturno. 700.
Tom. IV. Ggggg In

I N D E X R E R U M.

In Jove dies esse horarum quinque. 700.
Et perpetuum æquinoctium. 701.
Planeticolis stellas fixas eodem modo apparere, ac nobis. 702.
Qualis sit Planetarum aspectus, dierum ratio in Saturno. 702.
Qualis sit Annuli aspectus in Saturno. 703.
De Luna pauciora conjici posse. 704.
Satellitum Saturni & Jovis eandem ac Lunæ rationem esse. 705.
Lunam montibus & vallibus distinctam esse. 705.
Carere vero mari. 705.
Fluviis. 706.
Nubibus. 706.
Ære & aqua. 706.
Hinc de animantibus & stirpibus incertiore conjecturam esse. 707.
Jovis ac Saturni Lunas, non secus ac nostram Telluri, eandem partem suo Planetæ obvertere. 707.
Lunæ incolis si qui sint, qualis apparitura sit cælorum constitutio, dierum ratio, &c. 708.
Quod ad Jovis & Saturni Lunas facile

transferre est. 709.
Solaris mundi secundum veram proportionem descriptio. 710.
Immensitas intervallorum inter Solem & Planetas illustratur comparatione cum motu globi è tormento emissi. 711.
In Sole omnem conjecturam deficere. 712.
Faculas Solares incertas videri. 712.
Propter calorem nulla illic vivere corpora nostris similia. 712.
Stellas fixas totidem esse Soles. 713.
Eas spargi per vasta cæli spatia, & alias ab aliis, ut proximas à Sole removeri. 714.
Nec Solem præ cæteris eminere contra Keplerum notatur. 714.
Nihil impedire, quo minus credamus circa unamquamque ex fixis, ut circa Solem, esse Planetas. 715.
Modus probabiliter investigandi distantiam fixarum à Sole. 717.
Unumquemque Solem vortice cingi, sed Cartesianis multum dissimili; contra quem pluribus disputatur. 719.

T O M U S Q U A R T U S O P E R A M I S C E L L A N E A.

DE RATIOCINIIS IN LUDDO ALEÆ. 723. *Ad calcem Exercitationum Math. Schotenii.*
Si a vel b expectem, quorum utrumvis æquè facile mihi obtingere possit, expectatio mea dicenda est valere $\frac{a+b}{2}$. 728.
Si a, b, vel c, expectem, quorum unumquodque pari facilitate mihi obtingere

possit, expectatio mea æstimanda est $\frac{a+b+c}{3}$. 729.
Si numerus casuum, quibus mihi eveniet a, sit p; numerus autem casuum quibus mihi eveniet b, sit q; sumendo omnes casus æquè in proclivi esse: expectatio mea valebit $\frac{pa+ bq}{p+q}$. 730.

De facienda distributione inter diversos col-

INDEX

- collusores, quando eorum sortes inæ-
quales sunt. 731.
De facienda distributione, si unus mihi
deficiat lusus & collusori meo tres lusus.
732.
Item, si mihi deficient duo lusus & col-
lusori meo tres lusus. 733.
Item, si mihi deficient duo lusus, & col-
lusori meo quatuor. 733.
Item, positis tribus collusoribus, quorum
primo ut & secundo unus lusus defi-
ciat, sed tertio duo lusus. 734.
Item, positis tot collusoribus, quot quis vo-
luerit, ex quibus uni plures & alii
pauciores lusus deficiunt. 735.
Tabula pro 3 collusoribus. 736.
Invenire, quot vicibus suscipere quis pos-
sit, ut unâ tessera 6 puncta jaciat.
738.
Invenire, quot vicibus suscipere quis pos-
sit, ut duabus tesseris 12 puncta ja-
ciat. 739.
Invenire quot tesseris suscipere quis pos-
sit, ut primâ vice duos senarios jaciat.
740.
Si cum alio ludam duabus tesseris unum
solummodo jactum, hâc conditione, ut,
si septenarius eveniat, ego vincam;
at ille, si denarius obtingat; si vero
quidquam aliud accadat, ut tum id
quod depositum est æqualiter divida-
mus: Invenire qualis istius pars cui-
que nostrum debeatur. 741.
Si ego & alius duabus tesseris alternatim
jiciamus, hâc conditione, ut ego vin-
cam simul atque septenarium jiciam,
ille vero quam primum senarium ja-
ciat; ita videlicet, ut ipsi primum
jactum concedam: invenire rationem
meæ ad ipsius sortem. 742.
Coronidis loco subjungantur V. Pro-

RERUM.

- blemata. 743.
NOVUS CYCLUS HARMONICUS. 745.
Histoire des ouvrages des Sçavans.
Oët. 1691.
Tabula Divisionis octavæ in partes 31.
æquales, & divisionis Octavæ se-
cundum Temperamentum vulgare.
752.
VARIA DE OPTICA. 755.
Excerpta ex literis Dni. Hugenii, A-
cademiæ Regiæ Scientiarum Socii,
ad Autorem Diarii Eruditorum de
Catoptrico conspicio Dni. Newto-
ni. 757. *Journal des Sçavans* 29.
Febr. 1672.
Constructio Problematis optici. Pro-
positio 39 Libri V. Alhazeni, &
22. Lib. VI. Vitellionis. 759.
Datis in eodem plano duobus punctis & cir-
culo; inveniendum est punctum in pe-
ripheria circuli, ita ut lineæ ex pun-
cto invento ad puncta data faciant cum
radio circuli, per punctum inventum
ductum, angulos inter se æquales. 759.
Ouvrages de Mrs. de l'Acad. Roj.
pag. 376.
Aliter. Dato Speculo Cavo aut Conve-
xo; itemque Oculo & Puncto Rei vi-
sæ, invenire Punctum Reflexionis.
760. *Philosophical Transactions.*
n. 97.
Compendium. 761. Ibid. n. 98.
Alia solutio. 761.
Problema Alhazeni.] Dato Circulo, &
punctis duobus, invenire punctum in
Circumferentia Circuli dati, unde du-
ctæ lineæ ad puncta data faciant ad
Circumferentiam Angulos æquales.
761. Ibid. n. 98.
Excerpta ex litteris Dni. Hugenii, A-
cad. Reg. Scient. Socii, ad Aucto-
rem

I N D E X R E R U M.

- rem Diarii Paris. de novo Microscopio ex Hollandia allato. 764.
Journal des Sçavans. 15. Aug. 1678.
- EXPERIMENTA PHYSICA. 767.
- Excerpta ex literis Dni. Hugonii, Academiae Regiae Scientiarum Socii, ad Auctorem Diarii Eruditorum, de Phænomenis aquae aëre purgatae. 769. *ibid.* 25. Jull. 1672.
- Experimentum I. *Aqua, sublata aëris pressione, hæret in tubo.* 770.
- Experimentum II. *Notabile quid in descensu aquae aëre purgatae.* 771.
- Experimentum III. *Adhibito spiritu vini loco aquae.* 772.
- Experimentum IV. *Aër, ex Spiritu vini aut aqua exhaustus, hæc corpora iterum intrat.* 773.
- Experimentum V. *Laminae metallicæ arte inter se coherent in vacuo licet nihil inter has detur.* 775.
- Experimentum VI. *Effectus Siphonis in vacuo.* 776.

F I N I S.



CATALOGUS QUORUNDAM LIBRORUM,

Qui apud JANSSONIOS VAN DER AA, Bibliopolas.
Lugduni Batavorum, venales prostant.

- A** bregé de l'Histoire-generale des Turcs, par Vanel, 12°. 4 voll. avec fig.
Admiranda rerum admirabilium Encomia, 12°.
Æschinis Socratici Dialogi tres, per Horreum, 8°. Gr. & Lat.
Alaric ou Rome vaincûe, Poëme Heroïque, par Monsr. de Scudery 12°. avec fig.
AMINTAS-HERDERSPEL VAN T. TASSO, DOOR WELLEKENS, 8°.
Andry de la Generation des Vers dans le Corps de l'Homme 12°.
Annales de la Cour & de Paris, pour les Annees 1697 & 1698. 12°.
Annus Sacer Poëticus, sive selecta de Divis Cœlestibus Epigrammata 12°. 2
Tomis.
Antonii Jus feudale, cum additamentis Strykii, 4°.
Apologie pour leurs Sereniss. Majestés Britanniques, contre un infame Libelle in-
titulé le vray Portrait de Guillaume Henry de Naussau, nouvel Absçalom, nou-
vel Herode, nouveau Cromwel, nouveau Neron, 12°.
— *pour les Protestans, ou l'Auteur justifié pleinement leur conduite & leur se-*
paration de la Communion de Rome. 12°.
Athanassii Opera, Gr. Lat. fol. 2 Voll.
Aurea Bulla Caroli V. Imp. de jure & ordine succedendi in ducatum Mediœ-
lanensem, &c. 4°.
Bauhufii & Cābillavi Epigrammata, 24°.
Bellefontaine Medicine Dogmatique Mechanique, avec la Phārmacopée Rationellē,
12°. 2 voll.
BÊLLOSTE CHIRURGIEN D'HÔPITAL, 12°. avec fig.
Biblia Græca LXX. Interpretum, curâ L. Bos, 4°.
Bidermanni Acroamatum Academicorum Libri III. 12°.
Bisschop Chorus Musarum, sive Poëmata, 8°.
Blancardi Opera Medica, Theoretica, Practica & Chirurgica, 4°.
Blegny Art de guerir les Maladies Veneriennes, 12°. 3 Tômes avec fig.
Boleslavii Homo bene moriens 12°.
— *Gemmeum monilē Animæ Christianæ,* 12°.
Bontekœe Metaphysica, OEconomia Animalis & Geulinx Phÿsica vera, 8°.
Borgesii Enodatio Juris Naturæ, 8°.
Bresmal Circulation des Eaux ou l'Hydrographie des Minerales d'Aix & de Spa, 8°.
Bruguier Reponse au Livre intitulé le Renversement de la Morale de Jesu Christ,
par les Erreurs des Calvinistes. 12°.

CATALOGUS LIBRORUM.

- Burgundius ad Consuetudines Flandriæ aliarumque Gentium, 12°.
 Camerarii Symbola ac Emblemata Ethico Politica, 8°.
 Catalogus Librorum Manuscriptorum Angliæ & Hiberniæ, fol.
Cherubin Effets de la Force de la Contiguité des Corps, 12°.
Choix des bons Mots, 12°.
 Claubergii Opera Omnia Philosophica, curâ Schalbruchii, 4°.
 Clos de Aquis Mineralibus Galliæ & de Mixtis naturalibus, 12°.
Crebilon Oeuvres, 12°.
Defence de la Monarchie de Sicile contre les Entreprises de la Cour de Rome, 12°.
Description du Chateau de Versailles, 12°. avec fig.
 DIVORCE CELESTE PAR PALLAVICIN, 12°.
 Donkers Idea Febris petechialis, 8°.
 Douxæ Poëmata, 8°.
 EEUWIGDUURENDE LIEFDES ALMANAK, 8°.
 Epistolæ Præstantium ac Eruditorum Virorum, fol. Charta Maj.
 Flâvissæ Poëticiæ sive Electorum Poëticorum Thesaurus Sacro-Profanus, 8°.
 Fleetwood Inscriptionum Antiquarum Sylloge, 8°.
Gassendi Abregé de la Philosophie, 12°. 7 Voll.
 GOBART TRACTATUS PHILOSOPHICUS DE BAROMETRO, 12°. cum fig.
Guide, ou nouvelle Description d'Amsterdam, 8°.
 Hartmanni Praxis Chymiatrica, 8°.
Hartsoeker Principes de Physique, 4°.
 HAVERCAMP DE NUMMIS ALEXANDRI MAGNI, 4°. cum fig.
 Herbinus de Cataractis in Genere, 4°. cum fig.
 Heucheri novi Proventus Horti Medici Acad. Vitembergensis, 4°.
 Hildani Observationes & Epistolæ Chirurgico-Medicæ, 4°. 2 Voll.
 Hippocratis Aphorismi per Almeloveen, 24°.
 — Metrica paraphrasi translati ab H. v. Poot. 24°.
 HISTOIRE DES INDES ORIENTALES PAR MR. SOUCHU DE RENNEFORT, 12°.
 — *des Iles Antilles de l'Amerique* 4°. avec fig.
Homere Iliade & Odyssée, par Mad. Dacier, 12°. 6 Tomes, avec fig.
 — *Iliade Poème avec un discours sur Homere*, par Mr. de la Motte. 12°.
 Huetius de Interpretatione, 8°.
Huygens Traité de la Lumière. 4°.
 Jablonski Disquisitio de Lingua Lycæonica, 4°.
Jean danse mieux que Pierre, Pierre danse mieux que Jean. 12°. 5 Voll.
Instruction pour reunir les Eglises pretendues Reformees a l'Eglise Romaine, par Mr. Comiere. 12°.
Jurieu Justification de la Morale des Reformez, contre les Accusations de Mr. Arnaud, 8° 2 Tomes.
 Jus Austriacum in successione Regnorum Hispaniæ vindicatum, 4°.

CATALOGUS LIBRORUM.

- Knibbe Manuductio ad Oratoriam Sacram, 8°. 2 Voll.
Lamy Elemens de Mathematique, ou traité de la Grandeur en General, 12°. *Leti Critique Historique, Politique, Morale, Economique & Comique, sur les Loteries Anciennes & Modernes, &c.* 12°. *Letres Provinciales par Louis Montalte* 8°. 3 Voll.
 — *de Fr. Rabelais, avec des Observations*, 8°. — *du Cardinal Bentivoglio, Ital. franc.* 12°. Lipenii Bibliotheca Juridica, Struvii, fol.
Logique par Mrs. de Port Royal, 12°. — *courte & facile par le Sr. Du Boisverd.* 8°. LYK-PREDIKATIE OVER DE DOOD VAN D' H. MITSEN, DOOR J. DE HARTOGH, 4°. Machiavelli Historia Florentina, 12°. *Malvezzi Opere Historische e Politische*, 12°. — *Il Tarquino Superbo*, 12°. *Manzini Opere*, 12°. — *furori della Gioventu Esercitii Rhetorici*, 12°. *Marechal Francois*, 12°. Mascampi Epitome Historiæ Civilis, 8°. *Medulla Justiniana*, 12°. *Melanges Historiques*, 12°. *Menken de la Charlatanerie des Savans*, 8°. *Moiens de reunir les Protestans avec l'Eglise Romaine* 12°. Mollenbroccius de Arthritide, 8°. Monavii Bronchotomia, quæ est gutturis aperiendi artificiosa ratio, 8°. Mort Idea Actionis Corporum 12°. MUNDI OPERA OMNIA MEDICO-PHYSICA, 8°. *Oeuvres de Mr. Le Noble* 12°. 19 Voll. Oudini Commentarius de Scriptoribus Ecclesiæ Antiquis, fol. 3 Voll. Pacii Analysis & Isagoge 8°. 2 Voll. Parladorii Opera Juridica, 4°. 2 voll. *Passe partout Galant*, 12°. PASTOR FIDO, 32°. Appresso P. Mortier. *Petau Histoire Universelle*, 12°. Paris 5 Tomes. *Pilpay Conseils & Maximes*, 8°. Plazonus de Partibus Generationis inservientibus, 12°. PLUIMERS GEDICHTEN 4°. TWEEDE DEEL. *Pourtraits des plus Celebres Professeurs de Leide*, 4°. *Preparations pour la Ste. Cene, avec le Voyage de Bethel*, 12°. *Rochevoucault Reflexions ou Sentences & Maximes morales*, 12°. Schiere Doctrina Testamentorum & Fœderum omnium Divinorum, 4°.

CATALOGUS LIBRORUM.

- Senecæ & Syri Mimi Sententiæ, cum Notis Diverforum & Gruteri, 8°.
 SERRE DOLCI PENSIERI SOPRA LA MORTE, 8°.
 THEATRE ET AUTRES POESIES DE MADEM: BARBIER, 12°. avec fig.
 VARIOLARUM METHODUS PER TRANSPLANTATIONEM, 8°.
 Vesslingii Syntagma Anatomicum, sive Anatomia, 4°. cum fig.
 VIEUSSENS NOVUM VASORUM CORPORIS HUMANI SYSTEMA, 8°.
 VIGNOLE REGLE DES CINQ ORDRES D'ARCHITECTURE, 4°. avec fig.
 Voyage de Groenland, par le Pere Cordelier Pierre de Mesange, 12°. 2 Voll.
 — aux Côtes de Guinée & en Amerique, 12°.
 — Le Prudent Voyageur, par L. du May, 12°. 3 Voll.
 WECHWYSER DER EENVULDIGEN, DOOR J. DE HARTOGH, 8°.
 Westenberg ad Pandectas, 8°.
 Dictionnaire Englisch and Frensch & Frensch and Englisch of Miede 8°.
 — Italiaansch en Nederduyts, door Moses Giron, 4°.
 — Antiquitatum Romanarum & Græcar. per Danetum, in Usum Delphini, 4°.
 Grammaire Francoise d'un tour nouveau, composée en faveur de ceux qui preferent la Pratique a la Theorie, par Mr. Derbaud, 12°. avec fig.

Multi etiam alii apud Eosdem reperiuntur.

A V I S A U R E L I E U R.

LE Relieur prendra garde que le papier qui est à côté des Figures doit être conservé pour faire déborder les Figures hors du Livre, & les placer suivant la page marquée sur chaque planche.

B E R I G T A A N D E N B O E K - B I N D E R.

DEn Boek-binder zy gewaarschout het papier ter zyde de Figuren niet af te snyden; maar zodanig in te setten, dat de Figuren buyten het Boek uitslaan: dezelve moeten geplaatst werden volgens de paginaas op yder Tabel genoteert.

ADMONITIO BIBLIOPEGIS,

ubi locandi sint Tituli.

A V I S A U R E L I E U R,

Pour placer les Titres suivant les Pages marquées ci-dessous.

BERIGT AAN DEN BOEKBINDER,

Om en alwaar de Titels te plaatsen.

1. *Christiani Hugonii Opera Mechanica. Tomus Primus.* (ante) (devant) voor Pag. 1. (& post *Hugonii Vitam*) (après *Hugonii Vita*) agter Hugonii Vita.
2. *Christiani Hugonii a Zulichem, dum viveret Zelhemii Toparchæ, Opera Varia. Volumen Secundum.* (ante) (devant) voor Pag. 309.
3. *Christiani Hugonii Opera Geometrica. Tomus Secundus.* (etiam ante) (aussi devant) mede voor Pag. 309. (& post *Titulum Voluminis Secundi*) (& après le Titre de *Volumen Secundum*) en na de Titel van *Volumen Secundum*.
4. *Christiani Hugonii Opera Astronomica. Tomus Tertius.* (ante) (devant) voor Pag. 521.
5. *Christiani Hugonii Opera Miscellanea. Tomus Quartus.* (ante) (devant) voor Pag. 723.

ADMONITIO BIBLIOTHECÆ

ad Lectorem

AVERTISSEMENT

Les livres de cette bibliothèque sont destinés à être consultés par les lecteurs.

OBJET DE LA BIBLIOTHEQUE

On en a fait de trois sortes.

1. Les livres de la collection de la bibliothèque de la ville de Paris, qui sont les plus précieux et les plus nombreux.

2. Les livres de la collection de la bibliothèque de la ville de Paris, qui sont les plus précieux et les plus nombreux.

3. Les livres de la collection de la bibliothèque de la ville de Paris, qui sont les plus précieux et les plus nombreux.

4. Les livres de la collection de la bibliothèque de la ville de Paris, qui sont les plus précieux et les plus nombreux.

5. Les livres de la collection de la bibliothèque de la ville de Paris, qui sont les plus précieux et les plus nombreux.



